



# New Testament

Matal Language

## Matal - Bible - New Testament

Mata	3	
Mark	72	
Luka	114	
Yuhana	189	
Sləray	244	
Rom	312	
1 Korintiya	346	
2 Korintiya	378	
Galatiya	399	
Efesəya	410	
Filipiya	422	
Kolosəya	430	
1 Tesaloniki	438	
2 Tesaloniki	445	
1 Timotawus	449	
2 Timotawus	458	
Titus	464	
Filemon	468	
Ibəranəŋkowen	470	
Yakuba	495	
1 Piyer	503	
2 Piyer	512	
1 Yuhana	518	
2 Yuhana	526	
3 Yuhana	528	
Yahuda	530	
Mafətala	533	

## Matal - Bible - New Testament

### Mata

#### Mata 1

- <sup>1</sup>Aganay sləm aṅa azlababa madzidziga aṅa Yesu Kristu, bəzi aṅa David, bəzi aṅa Abərahām.
- <sup>2</sup>Abərahām ayyà Isak; Isak ayyà Yakuba; Yakuba ayyà Yahuda la azladedā aṅha;
- <sup>3</sup>Yahuda ayyà Farəs atà la Zara, (Sləm aṅa iyà aṅatà Tamar); Farəs ayyà Esərom; Esərom ayyà Aram;
- <sup>4</sup>Aram ayyà Aminadab; Aminadab ayyà Naheson; Naheson ayyà Salmon;
- <sup>5</sup>Salmon ayyà Bowas, (Iyà aṅha kà Rahab); Bowas ayyà Obed, (Iyà aṅha kà Rut); Obed ayyà Isay;
- <sup>6</sup>Isay ayyà sufəl David. David ayyà Salomon, (Iyà aṅha kà mis aṅa Uriya);
- <sup>7</sup>Salomon ayyà Rehabeham; Rehabeham ayyà Abiya; Abiya ayyà Asa;
- <sup>8</sup>Asa ayyà Yosafat; Yosafat ayyà Yoram; Yoram ayyà Ozəya;
- <sup>9</sup>Ozəya ayyà Yotam; Yotam ayyà Ahaz; Ahaz ayyà Hesəkiya;
- <sup>10</sup>Hesəkiya ayyà Manase; Manase ayyà Amon; Amon ayyà Yosəya;
- <sup>11</sup>Yosəya ayyà Yekoniya atà la azladedā aṅha, la mok uwana tahəl azlabəza Isərayel à Babila.
- <sup>12</sup>Mok uwana tadàla atà bokuba azlamayà à Babila kà, Yekoniya ayyà Salatiyel; Salatiyel ayyà Zorobabel;
- <sup>13</sup>Zorobabel ayyà Abiyud; Abiyud ayyà Eliyakim; Eliyakim ayyà Azor;
- <sup>14</sup>Azor ayyà Sadok; Sadok ayyà Akim; Akim ayyà Eliyud;
- <sup>15</sup>Eliyud ayyà Eleyazar; Eleyazar ayyà Matan; Matan ayyà Yakuba;
- <sup>16</sup>Yakuba ayyà Yusufu, zil aṅa Mariyama uwana ayyà Yesu, uwana Kristu tagodəl.
- <sup>17</sup>Kiya uwaga kà dagay Abərahām tsəràh à David mayyi à tsəh ala kulo gəl aṅha ufad, ṅgaha kulo gəl aṅha ufad dagay David tsəràh à uwana tadàla atà à Babila, ṅgaha aya kulo gəl aṅha ufad tsəràh à mayyi Yesu uwana Kristu.

<sup>18</sup>Kiya uwaga apakà vok aña mayyi Yesu Kristu. Iyà aña, Mariyama agà mawda aña Yusufu, ama dagay uwana tagagamay dadàñ aw kà, Mariyama agà la bəzi la hudf, uwaga kà Masasədok Zəzagəla la uwana adàllà à hudf.

<sup>19</sup>Ama Yusufu mawda aña kà dza dziriga, asal masəla à uda la dazuwaya la huma à azladza aw, adzùgw masak à mawda aña la səbàh.

<sup>20</sup>Mok uwana adzùgw uwaga kà masakal kà, malika aña Zəzagəla apəhalla vok la masesiñay agòdal: "Yusufu, mayyi à tsəh ala aña David, guba akəs ka kà mazəb Mariyama mawda aña aw, kà uwana la ndzəda aña Masasədok Zəzagəla la uwana akùd bəzi uwaga la hudf aña.

<sup>21</sup>Masla adəyyi bəzi zilga, uwana kadàvəl sləm Yesu, uwana adəbəl tsəhay aña la tsakana aña ta la abà gesina."

<sup>22</sup>Tatak uwaga gesina apakà vok kà magəf à afik bokuba uwana Sufəl Zəzagəla apəh à ahəl aña azlaməna mapəh à atà gay à ahəl kà mapəh à azladza:

<sup>23</sup>'Dahalay uwana asəl zil aw, adəzəb bəzi à hudf, adəyyi bəzi zilga, tadàvəl sləm Emanuyel.' (Uwana asal magodəy: Zəzagəla la ahəñ la anu)

<sup>24</sup>Mok uwana Yusufu adatsən ala kà, adəhəñ bokuba uwana malika aña Sufəl Zəzagəla apəhal la masesiñay, ŋgaha azəb Mariyama mawda aña kà mis.

<sup>25</sup>Ama Yusufu ahənà à ahəñ la masla tsərəh à mayyi kona aña, uwana Yusufu avəl sləm Yesu, aw.

## Mata 2

<sup>1</sup>Kiya uwaga tayyà Yesu la gudəñ Betelehem, la kutso aña Yahudiya la abà la zamana aña sufəl Herod. Uwana tayyay kà, azlaməna masəl tatak uwana tanərəzàh azlatsetsiliñ tasà à afik la mas à afik afats, tasà à Urusalima.

<sup>2</sup>Tanàv: "Añala bəzi uwanay tayyà la ahəl à ahəl à uwana adəgay Sufəl aña azla Yahudiya la? Mənəñəñ tsetsiliñ aña apəhla vok ala la mas à afik afats, maslà gə la uwaga məsə à afik kà makədedəl à ahəñ."

<sup>3</sup>Kay, mok uwana sufəl Herod atsən uwaga, guba akəs, gəl akədəl à vok la azlaməna madz à ahəñ la Urusalima gesina.

<sup>4</sup>Ahamà gay azlaməngə aña azlaməna mav tatak à Zəzagəla à vok la azlaməna matapla wakità aña Musa à azladza, anav à atà gay ala naka tayyi Kristu ma à uwala asla tak la?

<sup>5</sup>Tagodəl: "La Betelehem, la kutso Yahudiya la abà." Kà uwana aganay azlaməna mapəh à atà gay à ahəl tatsetsèr:

<sup>6</sup>'Kak Betelehem la kutso Yahudiya la abà, Katsəh azlagudəñ aña Yahudiya à tsəh aw, Kà uwana la kak la abà La uwana masla humà uwana adəguw tsəhay gulo Isərayel à huma adàs à uda.' Zəzagəla agodf.

<sup>7</sup>Kiya uwaga Herod azàl azlaməna masəl tatak uwaga la gəl à gəl, ngaha anàvà à atà kaslà mapəhla vok ala aña tsetsiliŋ uwatà la gay ala.

<sup>8</sup>La lig la ahəŋ aslèlla atà à Betelehem: "Dàw, kayahaw bəzi uwatà, baŋa kadabəzawwal kà, kadàpəhaw à gi ala babay, kà gi aña maday aña makədedəl à ahəŋ suwaŋ", agòd à atà.

<sup>9</sup>Mok uwana tatsəb sləm à mapəhay aña sufəl uwaga kà, tahàd, tanəŋà tsetsiliŋ uwana tanəŋàŋ la mas à afik afats, aga la huma aŋatà, ama mok uwana adabəz à slaka uwana bəzi la ahəŋ kà, tsetsiliŋ atsizl à ahəŋ.

<sup>10</sup>Uwana tanəŋàŋ kiya uwaga kà, tahən ala la marabay məŋga.

<sup>11</sup>Tadà à gày, tanəŋàŋ bəzi vərna la iyà aŋha Mariyama. Takədèdàh à ahəŋ, tazlèbà bəzi, tapàlla kazlaŋa aŋatà ala, ngaha tavàhal azlatatak: Luwàluwà, matərsin, ngaha la mir.

<sup>12</sup>La lig la ahəŋ Zəzagəla apəh à atà vok à abà la masesiŋay kà atà aña maguway la slaka sufəl Herod aya aw. Kiya uwaga tanəfà tetəvi anik kà mawul à gudəŋ aŋatà.

<sup>13</sup>Mok uwana azlaməna masəl tatak tadiy aŋatà, malika aña Sufəl Zəzagəla apəhla vok à Yusufu la masesiŋay, agòdàl: "Sà à afik, zəb bəzi la iyà aŋha, ngaha hòy à gudəŋ Misəra, kadàdz à ahəŋ la abatà tsəràh à uwana: 'Wùlla à waŋ', gədàgod à ka, kà uwana Herod adàyah makəf bəzi."

<sup>14</sup>Hadzak, Yusufu atsizilla ala, azəb bəzi la iyà aŋha, ngaha ahòy la atà la vəf à kutso Misəra.

<sup>15</sup>Adzà à ahəŋ la abatà tsəràh à mamətsay aña Herod, uwaga apakà vok kà magəf uwana à afik Sufəl Zəzagəla apəh la paŋaw aña azlaməna mapəh à atà gay à ahəl kà mapəh à azladza: 'Gəzàl à bəzi gulo à uda la kutso Misəra.'

<sup>16</sup>Mok uwana Herod asəl kà azlaməna masəl tatak tavavàràŋ kà, apàk ləv kaykay, avà tetəvi kà makəf azlabeza zilga la gudəŋ Betelehem gesina dagay la azlavərnaga tsəràh à mavay səla. Dagay la matsən gay mapəhla vok ala aña tsetsiliŋ, uwana atsənəŋ la slaka azlaməsəl tatak uwaga.

<sup>17</sup>Kiya uwaga agəf à afik, uwana masla mapəhal gay à ahəl Yereimiya agòd:

<sup>18</sup>'Hulolo atsən la Rama, matuway la mawiyay məŋga. Uwaga kà Rahilu la uwana atùw azlabəza aŋha, Asal matasla ala gay à ahəŋ aw, kà uwana tamatsay.'

<sup>19</sup>Mok uwana Herod adamətsay, malika aña Sufəl Zəzagəla apəhla vok à Yusufu la masesiŋay la Misəra.

<sup>20</sup>Agòdàl: "Lagwa kà, sà à afik, zəb bəzi la iyà aŋha, wùlāw à kutso Isərayel, kà uwana azladza uwana tayàh makəf bəzi kà tadamətsay."

<sup>21</sup>Kiya uwaga Yusufu atsizilla ala, azəb bəzi la iyà aŋha, ngaha tawùl à Isərayel.

<sup>22</sup>Ama atsənàŋ kà Arkelawus la uwana, azùw sufəl aŋa baba aŋha la Yahudiya kà, guba akès kà mawul à kutso uwatà à abà. Ama uwana adatsən Zəzagəla apəhal la masesiŋay la abà aya kà, ahàd, abək vok à makoray aŋa Galili à abà,

<sup>23</sup>ŋgaha aŋəl gày aŋha à bəzi gudəŋ uwana à abà, sləm aŋha Nazaret. Adəhàŋ kiya uwanay kà, kà magəf à afik gay uwana azlaməna mapəh à atà gay à ahəl tapəh, tagəf kà: 'Tadàzalalla zil Nazaret.'

### Mata 3

<sup>1</sup>La zamana uwatà kà, Yuhana masla madəh batem apəhla vok ala la fəta aŋa Yahudiya la abà, ŋgaha adzəkà mazəh sayda.

<sup>2</sup>"Pəhàw gay la ləv ala, kà uwana makoray Sufəl Zəzagəla kà nekwa atsa à waŋ", agəf à atà.

<sup>3</sup>Yuhana kà dza uwana masla mapəhal gay à ahəl Yesayya apəh lakəl aŋha agəf: 'Uwaga kuda aŋa dza la uwana awiyay la fəta la abà: 'Slədàw tetəvi aŋa Sufəl Zəzagəla, Tsizllàw azlatetəvi manalabahayga ala gesina", agəf.

<sup>4</sup>Lukut aŋa Yuhana kà madəhəŋga la aŋidz aŋa zlugumi, ŋgaha awəf parapara aŋa zlap à tsəh, tatak may aŋha kà hayyaw, la zuway mazuway la fəta.

<sup>5</sup>Azlaməna madz à ahəŋ la Urusalima, la azlauwana la kutso Yahudiya ŋgaha la azlauwana la makəla aŋa mukwà Urdun gesina tasà à waŋ à slaka aŋha.

<sup>6</sup>Tapəh tsakana aŋatà à uda la dazuwaya, ŋgaha adəhà à atà batem la mukwà Urdun la abà.

<sup>7</sup>Ama mok uwana Yuhana anəŋà azla Farisəya la azla Sadukiya aŋuvaw tatsà à waŋ à slaka aŋha kà madəhatəŋ batem kà, agəf à atà: "Maham à ahəŋ aŋa matsapa: uwa apəh à akul kà kadətəfaw à seriya aŋa Zəzagəla uwana la gay ala, adàsa à waŋ aw uwa?

<sup>8</sup>Lagwa kapəhawla sləray aŋkul uwana ala, apəhla ala kà kadasakaw à sləray aŋkul uwana uwarà kadəhəhəwəŋ.

<sup>9</sup>ŋgaha kà kadzugwaw kà mats zlapay la gəl aŋkul: 'Abəraham kà baba gami madzidziga', kagodaw aw. Hadəy, gəpəh à akul kà, Zəzagəla aslala vok apak azlaakur ala kà mayyi à tsəh ala aŋa Abəraham.

<sup>10</sup>Lagwa kà, goslka kà madəhəŋ à ahəŋ gə nekwa kà mahərats la tsəh à ahəf à afik. Kəla ahəf uwana av mayyay delga aw, agay manats à ahəŋ gə ŋgaha maduw à akəl à tsəh.

<sup>11</sup>Gi kà, gəfəhakulla batem kà la iyaw, kà mapəhla ala kà kadapəhaw gay la ləv ala pəra. Ama dza uwana adàs à waŋ la lig gulo la ahəŋ kà adəhəhakulla batem kà la Masasəfək Zəzagəla, ŋgaha la akəl. Masla kà, aduwa gi la maslay ndzer, gi kà, gəsla kà mapaləŋ ala amiyaka bə zuwid kwimik aŋha babay aw.

<sup>12</sup>Kətsaw maduw hi aŋha la ahàl kà maduwla hi kà mavàh hi ala la tafàr. Hi kà atsàk à vədà aŋha à abà, ama tafàr kà aduwal à akàl uwana à tsəh adàmatsila la abà aw.”

<sup>13</sup>Kiya uwaga Yesu atsizlla ala la gudəŋ Galili asà à Urdun à slaka Yuhana kà madàhalla batem.

<sup>14</sup>Ama gəl akàd à Yuhana à vok, agòdàl: "Gi la uwana gənuəkudà aŋa batem la slaka aŋak aya kà pəra, katsà à slaka gulo kà madàh à ka batem aya ay?"

<sup>15</sup>Ama Yesu awulàlla: "Kəs, apakà vok kiya uwanay dadəŋ, kà uwana kiya uwanay la uwana məhənaŋ uwana ala Zəzagəla apəh à anu ala la uwana anəv anu gesina.”

<sup>16</sup>La lig la ahəŋ adàhàlla batem. Uwana Yesu adasa à uda la iyaw la abà kà, zagəla apəzlla à ama ala, anəŋà Masasəđok aŋa Zəzagəla atsà à ahəŋ, adzà à gəl aŋha bokuba habakoku.

<sup>17</sup>Ŋgaha kiya uwaga aya, kuda atsən à ahəŋ la zagəla la afik: "Dza uwanay kà bəzi gay ləv gulo, gəf marabay gulo la madzugway gulo kà à masla à afik", agòd.

#### **Mata 4**

<sup>1</sup>Kiya uwaga Masasəđok Zəzagəla adàla Yesu à fəta à abà kà seteni aŋa mapapatay.

<sup>2</sup>Mok uwana Yesu adadàh mavakay dzik ufad, la mahənaŋ dzik ufad kà, may akəs masla.

<sup>3</sup>Kiya uwaga seteni azà vok à slaka aŋha la magòdàl: "Baŋa kak Kona aŋa Zəzagəla ndzer kà, 'Pàk kaf!', gòd à akur uwanay.”

<sup>4</sup>Yesu awùlla à uda: "Uwaga kà matsetserayga: 'Dza adzadzar vok kà la kaf pəra aw, ama la kəla gay gesina uwana atsa à waŋ la paŋaw aŋa Zəzagəla la awtày.'“

<sup>5</sup>Kiya uwaga seteni adàla masla à Urusalima, à gudəŋ tsidəŋaga à abà, adàla à gəl aŋa məŋ gày Zəzagəla à afik,

<sup>6</sup>agòdàl: "Baŋa kak Kona aŋa Zəzagəla ndzer kà: Vəl à ahəŋ la abanay, kà uwana uwaga kà matsetserayga: "Dàw!', Zəzagəla adàgòd à azlamalika aŋha lakəl aŋak kà mazlak ka Ŋgaha tadəkəs ka la matsaw ka kà, kà akur aŋa mazləl ka asik aw.”“

<sup>7</sup>Yesu awulàlla: "Tatsetsèr à wakità à abà la slaka anik babay kà: 'Kapapata Sufəl Zəzagəla aŋak aw.'“

<sup>8</sup>La lig la ahəŋ seteni adàla à gəl gudəŋ matsəkakadəyga à afik aya, apəhalla makoray aŋa gudəŋ à vok gesina la mazləbay aŋha.

<sup>9</sup>"Gədàvə à ka uwaga gesina, à baŋa kakəđəd à gi à ahəŋ kasləkaw gi", agòdàl.

<sup>10</sup>Yesu agòdàl: "Zà vok, kak seteni! Hadəy, tatsetsèr à wakità Zəzagəla à abà kà: 'Zlèbà Sufəl Zəzagəla aŋak, ŋgaha dāhalla sləray kà masla kokudà gəl aŋha pəra.”“

<sup>11</sup>La abatà seteni asàkal à ahəŋ. Azlamalika tasà à waŋ à slaka Yesu kà mazlakəŋ.

<sup>12</sup>Mok uwana Yesu atsənəŋ tadùw Yuhana à daŋay kà, atsizlla ala, adà aŋha à Galili.

<sup>13</sup>Asàk à madz à ahəŋ la Nazaret, ahàd kà madz à ahəŋ la Kapernahum, gudəŋ uwana la gay dərəv aŋa Galili, la makoray aŋa Zabulon la Neftali la abà.

<sup>14</sup>Apakà vok kiya uwaga kà, kà gay aŋa masla mapəhal gay à ahàl Yesayya aŋa magəd à afik:

<sup>15</sup>'Kutso aŋa Zabulon la aŋa Neftali, Uwana la gay mukwà, la kutso uwana la dərəv à uda anik aŋa mukwà Urdun, Dgaha la Galili uwana azladza uwana azla Yahudiya aw, tadz à ahəŋ la abà.

<sup>16</sup>Tsəhay uwana adz à ahəŋ la mələs la abà, Adànəŋ magol udàka. Azlauwana tadz à ahəŋ la dzəgay aŋa mamətsay la abà bay, Udàka adəpəhatàla vok.'

<sup>17</sup>Dagay la kaslà uwatà, Yesu adzəkà mapəh gay Zəzagəla, agəd à atà: "Pəhàw gay la ləv ala kà uwana makoray aŋha kà nekwa."

<sup>18</sup>Mok uwana Yesu auguzahay la gay mukwà aŋa Galili kà, anəŋà Səmon uwana tazallala Piyer atà la deda aŋha Andəre, uwana tadàw dzarawa aŋatà à iyaw à abà; kà uwana atà azlaməna makas kilfi.

<sup>19</sup>Yesu agəd à atà: "Nəfàw gi, ŋgaha gədəpakakulla kà azlaməna makas azladza."

<sup>20</sup>Katskats tasàk à dzarawa aŋatà à ahəŋ ŋgaha tanəfà masla.

<sup>21</sup>Adà à huma à gay kərkər zwek, tanəŋà Yakuba atà la Yuhana deda aŋha, azlakona aŋa Zebede. Tagà la kəslah iyaw aŋatà la afik la baba aŋatà Zebede, tadàh dzarawa aŋatà, Yesu azàl atà.

<sup>22</sup>La katskats tasàk à kəslah iyaw aŋatà à ahəŋ la baba aŋatà gà, tanəfà Yesu.

<sup>23</sup>Yesu auguzàh la kutso Galili gesina, atapàhla azladza la azlagəy madəv kudà la aku, azahà à ata gay marabəŋ lakəl aŋa makoray Zəzagəla, ŋgaha awarà azladza ala la azlatsəhay dūvats anik anik, la azladeri gesina.

<sup>24</sup>Azladza tatsənəŋ tapəhay lakəl aŋha la makoray aŋa Səriya gesina, ŋgaha tasàhla azlaməna dūvats anik anik à waŋ gesina uwana tas ŋgərpa, la azlamasasədok mawisiga, la azladeri ŋgaha awarà atà ala.

<sup>25</sup>Maham à ahəŋ dza aŋuvaw anəfà masla, tasà à waŋ la kutso Galili, la makoray aŋa gudəŋ kulo, la Urusalima, la Yahudiya ŋgaha la gay makwi aŋa dərəv à uda aŋa mukwà Urdun.

## Mata 5

<sup>1</sup>Mok uwana Yesu anəŋà maham à ahəŋ dza uwaga, ahàd à gudəŋ à afik adzà madzay la abatà, azlaməna matapla aŋha tasà à waŋ à slaka aŋha.

<sup>2</sup>Dgaha Yesu adzəkà matapatàla la kiya uwanay:

<sup>3</sup>"Marabay agay la azladza uwana tasəl la gəl aŋatà kà azlaməna kudà, kà uwana makoray Zəzagəla kà aŋatà!



- <sup>4</sup>Marabay agay la azlauwana atà la mazaw la gəl la abà, kà uwana Zəzagəla adàtasl à atà gay à ahəŋ!
- <sup>5</sup>Marabay agay la azlauwana azlatələmma, kà uwana tadàbəz kutso uwana Zəzagəla apəhà ahəŋ!
- <sup>6</sup>Marabay agay la azlauwana tawoya madz à ahəŋ bokuba uwana asa à Zəzagəla, kà uwana Zəzagəla adàhatəŋ lela!
- <sup>7</sup>Marabay agay la azlauwana vok aham à atà kà azladza anik, kà uwana vok adàham à Zəzagəla kà atà suwaŋ!
- <sup>8</sup>Marabay agay la azlauwana azlasətaka la ləv aŋatà la tsəh, kà uwana tadənəŋ Zəzagəla!
- <sup>9</sup>Marabay agay la azlauwana tatsala lapiya à tataka aŋatà à abà, kà uwana Zəzagəla adàzal atà ala azlabəza aŋha!
- <sup>10</sup>Marabay agay la azlauwana tatərəb atà, kà uwana tadəhəŋ kà uwana asà à Zəzagəla, makoray Zəzagəla kà adàgay kà aŋatà ndzer!
- <sup>11</sup>Marabay agay la akul, à baŋa azladza tatsək à akul magodəhay à gəl, takal akul gay à vok, tapəh à akul azlamawisiga à vok gesina babay, kà uwana akul azlaməna matapla la slaka gulo.
- <sup>12</sup>Vələhàw à zagəla, rəbàw kà uwana masik mənğa akud akul la zagəla. La kità bay tatərəbàhəŋ azlaməna mapəh à atà gay à ahəl kà mapəh à azladza, uwana tadzà à ahəŋ uwarà.”
- <sup>13</sup>”Akul la uwana akul azlaslugul aŋa gudəŋ à vok. Ama baŋa slugul azladəy aya aw ma, la mana tazladəŋ ala aya ma? Akəsà vok aya aw, say mafətəkw ala pəra, ŋgaha azladza tamələŋ à tsəh.”
- <sup>14</sup>”Akul la uwana akul azlaudəka aŋa gudəŋ à vok. Hudə gudəŋ uwana maŋal à gəl gudəŋ à afik gə, kà ahədə vok à ahəŋ aw.
- <sup>15</sup>Tavəts fənəs aŋa maf à tsəh tasà aw, ama tafay kà à slaka masərət fənəs à ahəŋ, kà mav udəka à azladza gesina, uwana la kay uwaga.
- <sup>16</sup>Kiya uwaga la uwana udəka aŋkul audəy la huma aŋa azladza gudəŋ à vok kəla suwaŋ, kà azladza gudəŋ à vok aŋa manəŋ sləray aŋkul kà delga, ŋgaha atà tadəzləb Baba aŋkul uwana la zagəla la afik.”
- <sup>17</sup>”Kadzugwaw kà gəsà à waŋ kà masläh mapəhay aŋa Musa ala, ŋgaha la mapəhla ala aŋa azlaməna mapəh à atà gay à ahəl kagodəw aw, ama gəsà à waŋ kà, kà masəla godega aŋha à uda pəra ndzer.
- <sup>18</sup>Hadəy, gəpəh à akul la dziriga: Tsəràh à uwana zagəla la kutso adədəv à gay, amiyaka bə bəzi manəhay aŋa mapəhay uwanay adəkədə vok aw, ŋgaha tsəràh à makədə gəl à ahəŋ aŋa tatak gesina.

- <sup>19</sup>Kà uwaga kəla dza uwana apəsew bəzi manəhay aŋa mapəhay uwaga, ŋgaha atapla azladza anik kà madəhəŋ kiya aŋha kà, masla kà adàgay bəzi gə la makoray Zəzagəla. Ama dza uwana akəs mapəhay uwaga, ŋgaha atapla azladza kà madəhəŋ kiya aŋha kà, masla kà adàgay məŋga la makoray Zəzagəla.
- <sup>20</sup>Ndzer, gəgod à akul: Baŋa dziriga aŋkul aduw aŋa azlaməna mapəhla wakità seriya ala, ŋgaha la azla Farisəya aw kà, kadaw à makoray Zəzagəla aw.”
- <sup>21</sup>"Katsənàw uwana tapəh à azlababa aŋkul madzidziga: 'Kakəf dza aw, dza uwana akəf dza kà tadala à huma seriya.'
- <sup>22</sup>Ama gi gəgod à akul kà: Kəla uwabeyuwi uwana apək ləv lakəl aŋa deda aŋha kà, ad à huma seriya. Dza uwana: 'Kak bada', agod à deda aŋha kà, tadala à huma seriya aŋa azlamasiga. Dza uwana: 'Kak kusoŋu', agod à deda aŋha kà, azlayla vok ad à akəl à abà.
- <sup>23</sup>Lagwa kà, baŋa kadzəka makəf tatak à Zəzagəla, ŋgaha awul à ka à gəl kà gay la ahəŋ la tataka aŋkul la abà la deda aŋak kà,
- <sup>24</sup>sək à tatak aŋak à ahəŋ la abatà, həd, katsənà vok gay la deda aŋak dadəŋ, ŋgaha baŋa gay adadəv à gay kà, wul à waŋ, kakəf tatak aŋak à Zəzagəla adagay zla!”
- <sup>25</sup>"Baŋa dza apuwà à ka gudzi à gəl, pəra kahamàw à tetəvi à ama kà mad à seriya kà, mərə vok kà akul aŋa matsən vok gay la mok uwana akul la tetəvi la ama dadəŋ, kà masla aŋa maf ka à ahəl aŋa masla seriya aw, ŋgaha babay kà masla seriya aŋa maf ka à azlaslodzi à ahəl, ŋgaha atə aŋa maduw ka à daŋay aw.
- <sup>26</sup>La dziriga gəgod à ka, tetuwa kadàsa à uda la abatà aw say baŋa kadətsetsekwah azlakalamay aŋak à waŋ gesina dadəŋ.”
- <sup>27</sup>"Katsənàwwəŋ bokuba uwana apəhà vok kà: 'Kada à gəl gaw aw.'
- <sup>28</sup>Ama gi kà, gəgod à akul kà: Kəla dza uwana anəŋ à mis aŋa dza anik à adi la makəfal à adi vok la ləv aŋha la tsəh kà, adadà à gəl gaw.
- <sup>29</sup>Baŋa kà yewdi ahəl kaf aŋak la uwana katəf à tsakana à abà kà, bəf à adi ala, məl ala kərkər, kà uwana ŋuləm kà manəbay vok aŋak tekula azà ala, kà kak aŋa mad à gəy akəl à abà la vok aŋak gesina.
- <sup>30</sup>Iyay, baŋa ahəl kaf aŋak la uwana apapat ka à tsakana à abà kà, nàts à vok ala, ŋuləm kà aŋak kà manəbay vok aŋak tekula azà ala, à kà vok aŋak gesina aŋa mad à gəy akəl à abà.”
- <sup>31</sup>"Apəhà vok aya babay kà: 'Dza uwana akudək mis aŋha kà, say avəl wakità aŋa mavəh vok ala à ahəl dadəŋ.'
- <sup>32</sup>Ama gi kà, gəgod à akul kà: Kəla uwabeyuwi uwana akudək mis aŋha, uwala abəzal à gəl la mazaḅ zil la tsəh aw kà, masla à zil uwaga kà adada à gəl gaw, à baŋa azəḅ mis anik, ŋgaha dza uwana azəḅ mis makudəkay gə babay kà, adàda à gel gaw, suwaŋ.”

- 33" Bâ gotənaŋ katsənàwwàŋ tapèh à azlababa gami madzidziga babay kà: 'Kazuw mawadáy la fida aw, ama hənà mawadáy aŋak ala kà la Sufəl Zəzagəla la afik pəra.'
- 34 Ama gi kà, gəgod à akul kà: Kazuwaw mawadáy aw! Kazuwaw mawadáy baməraka la zagəla aw, kà uwana uwaga kà kursi aŋa Sufəl Zəzagəla.
- 35 Baməraka la kutso aw, kà uwana uwaga kà slaka maf asik à ahəŋ aŋha, adagay la Urusalima bay aw, kà uwana uwaga kà məŋ gudəŋ aŋa Sufəl.
- 36 Kazuw mawadáy la gəl aŋak aw, kà uwana kaslala vok, kà mapak aŋidz gəl aŋak tekula ala kà medəkuga, baŋaw kà marsiga aw.
- 37 Ama gòdàw pəra kà: 'Iyay', baŋaw 'Awaŋ', kà uwana kəla tatak uwana dza aziŋ à uwaga à gəl kà, aguwa à uda kà la slaka masla mawisiga."
- 38 "Katsənàwwàŋ bokuba uwana apəhà vok kà: 'Yewdi mapəlay la yewdi, slid bay mapəlay la slid.'
- 39 Ama gi kà, gəgod à akul kà: Kawulawla mawisiga à dza uwana asal madəhakulla mawisiga à vok aw. Baŋa dza abək à ka ahəl à paŋaw ahəl kaf kà, gòlla paŋaw ahəl gudzay à awtày aya.
- 40 Baŋa dza akəl à ka gay à vok, kà mazəb tsempe aŋak kà, sàkal azəb dawara gə aya babay.
- 41 Baŋa dza afa à ka gasa à gəl kà mazəbal tatak mahanayga, kà mazəbalaŋ dahoy pəlis tekula kà, dàlla mahoy pəlis səla.
- 42 Və à dza uwana anav à ka tatak; kagola lig à dza uwana à gay asal makəl goder la slaka aŋak aw!"
- 43 "Katsənàwwàŋ bokuba uwana apəhà vok kà: 'Wòyà masla magay aŋak ŋgaha pəsəw masla məzam aŋak.'
- 44 Ama gi kà, gəgod à akul kà: Wòyàwwàŋ azlaməna məzam aŋkul, dèvəw kufa kà aŋa azladza uwana tatərəb akul.
- 45 Kà akul aŋa magay azlabəza aŋa Baba aŋkul uwana la zagəla la afik. Kà uwana avəd afats à azlaməna tsakana, kiya aŋa azladza dziriga babay. Dgaha asuw iyaw à azladza dziriga, asuw à azlaməna tsakana babay.
- 46 Iyay, baŋa kawoyawwaŋ kà azlauwana tawoyà akul pəra ma, kà mana kakudaw mabəz tatak la slaka Zəzagəla aya ma? Amiyaka azlaməna mazəb hadama babay kà, kiya uwaga tadəhəŋ aw takay?
- 47 Dgaha baŋa kadəhawwaŋ 'Ayyi' kà azladedə aŋkul pəra ma 'Delga mədəfəhəŋ', kagodəw takay? Bâ azladza uwana tasəl Zəzagəla aw babay kà, kiya uwaga la uwana tadəhəŋ.
- 48 Kità kà, gəw sətaka, bokuba Baba aŋkul uwana la zagəla la afik sətaka, suwaŋ."

## Mata 6

<sup>1</sup>"Baŋa kaɗahaw dziriga kà, kaɗahawwaŋ kà huma yewdi aŋa azladza aw. Baŋa kiya uwaga kaɗahawwaŋ kà, kaɗabəzaw masik la slaka Baba aŋkul uwana la zagəla aw."

<sup>2</sup>"Baŋa asa à ka mav sili à masla kuɗa anik kà, kahama kà dza à ahəŋ dāŋ kà mavàl aw, bokuba uwana azlaməna magolla dza tadehəŋ la azlagəy madəv kuɗa la aku, ŋgaha la azlamakalapa tetəvi la ama aw. Tadehəŋ kiya uwaga kà, kà azladza aŋa mazləb atà. La dziriga gəpəh à akul, atà kà tabəz masik aŋatà tsewwa adagay.

<sup>3</sup>Ama kak kà, baŋa kav sili à masla kuɗa kà, ɗahà uwaga la kiya uwanay: Amiyaka bà slawda aŋak nekwa gə babay kà, asəl uwaga aw,

<sup>4</sup>kà mavəy aŋak aŋa magay masəlay gə aw. Say Baba aŋak, uwana la zagəla la afik, la uwana asəl tatak uwaga pəra, ŋgaha masla adəwulla à ka ala məŋga aya."

<sup>5</sup>"Baŋa kaɗəvwaw kuɗa kà, kaɗahawwaŋ bokuba aŋa azlaməna magolla dza aw: Kà uwana atà kà, asa à atà madəv kuɗa kà la slaka matsizlla ala la azlagəy madəv kuɗa la aku, ŋgaha la azlamakalapa tetəvi la ama kà azladza gesina aŋa manəŋ atà. La dziriga gəpəh à akul: Atà kà, tabəz masik aŋatà, tsewwa adagay.

<sup>6</sup>Ama kak kà, baŋa asa à ka madəv kuɗa kà, hād à gəy, tsək à vok à ama, ŋgaha dèw kuɗa à Baba aŋak, uwana la zagəla la afik, ŋgaha Baba aŋak uwana asəl uwana kaɗehəŋ la ləv aŋak la tsəh, adav à ka masik aŋak."

<sup>7</sup>"Baŋa kaɗəvwaw kuɗa kà, katsalahaw azlagay deydayga à gay pəra, bokuba aŋa azladza uwana tasəl Zəzagəla aw, aw, tadzugw kà la mavats gay wadza wadzaga uwaga kà, 'Zəzagəla adətsəb à anu sləm', tagod.

<sup>8</sup>Kaɗahawwaŋ kiya uwaga aw, kà uwana Baba aŋkul uwana la zagəla la afik asəl tatak uwana kanavaw kuɗa aŋha dagay uwarà, à mok uwana kadanavawal dadāŋ aw.

<sup>9</sup>Aganay tetəvi aŋa madəv kuɗa: Baba gami uwana la zagəla la afik. Dahəŋ kà azladza gesina tazləba sləm aŋak tsikaslaga.

<sup>10</sup>Makoray aŋak atsà à waŋ. Mawoyəŋ aŋak apaka vok la vəɗah, Bokuba uwana la zagəla.

<sup>11</sup>Và à anu tatak may, uwana asla à anu lakana.

<sup>12</sup>Bàs à anu mawisiga uwana məɗehəŋ gesina, Bokuba uwana məbasəŋ à azladza uwana taɗahà à anu mawisiga à vok babay suwaŋ.

<sup>13</sup>Təfà à anu kà seteni aŋa mapapat anu, kà anu aŋa masak à maɗiŋal gel à vok aw, Ama təfà à anu la ahəl aŋa seteni." [Kà uwana makoray, maslay ŋgaha la mazləbay kà la ahəl aŋak aŋa tsəràh à awtəy. Amen!]

<sup>14</sup>"Baŋa kabasawwaŋ à azladza anik uwana taɗahəkulla mawisiga à vok, Baba aŋkul uwana la zagəla la afik adəbasakulaŋ suwaŋ.

<sup>15</sup>Ama baŋa kabasawwaŋ à azladza anik uwana taɗahəkulla mawisiga à vok aw kà, Baba aŋkul uwana la zagəla adəbasakulla mawisiga aŋkul uwana kaɗahəwwəŋ suwaŋ aw."

- 16"Baṅa kakəsaw nəlay kà, pèhàwla hud'adi aṅkul ala, ùzlèdɔw kà kiya aṅa azlaməna magolla dza uwanay tadəhəŋ aw: Atà kà, tabəɔla hud'adi, kà azladza gesina aṅa masəlay kà atà la nəlay la abà.
- 17Ama kak kà, baṅa kakəs nəlay kà, pəl'adi aṅak lela, wàz gel aṅak à uda,
- 18kà azladza aṅa masəlay kà kak la nəlay la abà aw. Say pəra kà Baba aṅak uwana la slaka mahad'vok à ahəŋ gà la zagəla, la uwana asəlay pəra, ŋgaha Baba aṅak uwana anəṅa uwana kadəhəŋ adàvà à ka masik aṅak."
- 19"Kahamaw ləmana à gudəŋ uwanay la vok aw, kà uwana mamən akəsay, marzaw akəsay, azlaməna à gəl bay tazləlay, tazəbay.
- 20Ama hāmàw ləmana aṅkul kà à zagəla à afik, la abatà mamən la marzaw akəsay aw, azlaməna à gel bay taslala vok aṅa mazləlay kà mazəbay aw.
- 21Kà uwana la slaka uwana ləmana aṅak la abatà, la abatà ləv aṅak la abatà, suwaŋ."
- 22"Yewdi kà udàka aṅa vok: Baṅa yewdi aṅak kà wurwur kà, vok aṅak gesina kà udàka;
- 23ama baṅa yewdi aṅak la dūvats kà, vok aṅak gesina la mələs la abà. Baṅa udàka uwana la kak la abà mələs gà, mələs uwaga adàgay tabadamma kaykay."
- 24"Dza aslala kà atsəp à azlaməŋga à huma à gay səla aw: Adəpəseyaw anik, ŋgaha adakəs gay aṅa anik, adàh dziriga à anik, ŋgaha adəkweska anik. Kaslawwalla vok kà matsəp Zəzagəla à huma la sili aw."
- 25"Kà uwaga à uwana gəpəh à akul: Kafàw gəl à ahəŋ kà tatak may la tatak masay uwana kanawkuɔa aṅha, kà madzadzarla kà vok aw, baməraka lakəl aṅa lukut uwana asa à akul kà aṅa matsokw à vok aṅkul, sifa kà aduwa tatak may, ŋgaha ma vok babay kà aduwa lukut aw takay?
- 26Nərèzàw azlad'iyəŋ uwana tahoyay la zagəla tsi: Tasləkay ŋgaha tatsəɔay tatak babay aw, taham tatak à vəɔa à abà babay aw, ama Baba aṅkul uwana la zagəla la afik adzadzar atà. Iyay zla, akul ma kaduwwəŋ azlad'iyəŋ aw takay?
- 27Uwa la tataka aṅkul la abà aslala vok aṅa maziŋ à mavay aṅa sifa aṅha à adi amiya ŋuv la aslasl à gəl aṅha uwa?"
- 28"Ŋgaha ma, kà mana kafaw gel à ahəŋ kà lukut zlà ma? Akul nərèzàw madz à ahəŋ aṅa azlamawuratatay tsi: Tadàh sləray aw, ŋgaha tavavəɔd lukut babay aw.
- 29Tsa baməraka Salomon la mazləbay aṅha gesina kà, abəzà à lukut delga kiya mawuratatay uwaga aw.
- 30Zəzagəla adàw lukut à azlakəsaf uwana à vok la fəta bay lakana, tekeɔika lebəŋ kà tadəyakats à akəl à abà: ŋgaha ma azlayla kà vok aduwa à akul à vok dāduwa aṅatà babay aw takay? Akul kà madiŋal gel à vok à tsəh kà akul ala.
- 31Kiya uwaga kà, kafàwla kà gəl à ahəŋ la magoɔay: 'Mana mədàzuway lebəŋ mi? Mana mədàsay mi? La mana mədàduw à vok mi?', kagoɔaw aw!

<sup>32</sup>Uwaga kà, azlauwana tasəl Zəzagəla aw, la uwana tayàh tatak uwaga koksikoksi. Ama Baba aŋkul uwana la zagəla kà, asəl tatak uwana kanawkudà aŋha.

<sup>33</sup>Fàw gəl à ahəŋ dadəŋ teraŋa kà la makoray Zəzagəla, ŋgaha la madz à ahəŋ la sifa dziriga uwana la abanay anavay, ŋgaha Zəzagəla adəkəs akul à ahəl ala gesina uwana kayahaw.

<sup>34</sup>Kiya uwaga kà kafàwla kà gəl à ahəŋ kà aŋa lebəŋ aw: Kà uwana lebəŋ uwaga kà, masla la uwana adàf gəl à ahəŋ kà akul, kà uwana ŋgərpa uwana apəhla vok ala kəla mavakay kà aŋa mavakay uwaga pəra."

## Mata 7

<sup>1</sup>"Kadàhaw seriya à azladza anik à gəl aw, ŋgaha Zəzagəla aŋa madàhakulla seriya à gəl suwaŋ aw.

<sup>2</sup>Kà uwana Zəzagəla adàdàhakulla seriya à gəl, kalkal bokuba uwana kadàhawwàŋ à azladza anik, adàzəbay daram uwana kazəbaw kagurawla azladza anik bay!

<sup>3</sup>Kà mana kanəzəzay kəsaf uwana la yewdi aŋa deda aŋak la awtəy, ama kak kanəŋa magol tsakud tsakud uwana la aŋak la awtəy aw ma?

<sup>4</sup>Kakay kagodiyà à deda aŋak: Sàk à gi, gəzəb à ka kəsaf uwaga la adi ala, tsa kak la magol tsakud tsakud la yewdi ma?

<sup>5</sup>Kak masla magolla dza, zəb tsakud tsakud uwaga la adi ala dadəŋ, ŋgaha kadànəŋla lela kà aŋa mazəb aŋa deda aŋak!"

<sup>6</sup>"Kavàw tatak tsidəŋaga à azlakəda aw, kà aŋa magolla à akul ala afad à gəl kà makohàh akul ala aw, kafàw slərkodzka aŋkul à azlanamzi aw à huma à gay aŋa mahabəŋ ala aw."

<sup>7</sup>"Nàvəw ŋgaha kadàbəzawwal; yàhəw ŋgaha kadàbəzawwal, zàlàhəwəwəŋ ŋgaha tadəpəzl akul gamagəy.

<sup>8</sup>Kəla dza uwana anavay abəzal, dza uwana ayahay abəzal, ŋgaha dza apəzl gamagəy à dza uwana azalahay.

<sup>9</sup>Dza la ahəŋ la tataka aŋkul av akur à bəzi aŋha à baŋa anaval kà kaf takay?

<sup>10</sup>Awma avəl ma bebi à baŋa anaval kà kilfi ay?

<sup>11</sup>Iyay, akul azlamawisiga nəma, ama kasəlaw mavəy tatak delga à azlabəza aŋkul, ŋgaha ma asa à mərəka Baba aŋkul uwana la zagəla ay? Adūwa à akul la mav tatak delga à azladza uwana tanaval tatak!"

<sup>12</sup>"Uwana asa à akul azladza anik tadàhakulaŋ kà, akul babay kà dāhəwəwəŋ kiya uwaga à azladza bay suwaŋ, kiya uwaga à uwana mapəhay aŋa Musa apəhay la azlawakitə aŋa azlaməna mapəh à atə gay à ahəl là abə kà mapəhay à azladza."

<sup>13</sup>"Gàw à gay la gamagəy slərkutskutsga! Kà uwana baŋŋaga uwanay kà, gamagəy butu gə, ama adala dza kà à mazila, azladza aŋuwaw la tetəvi uwatə la tsəh.

- <sup>14</sup>Ama slørkutskutsga uwanay kà gamagày zlazladfaga, ama masla la uwana adala dza à sifa à abà, ama azladza kà døn la tetøvi uwatà la ama aw!”
- <sup>15</sup>”Dahàw hanjkæli kà azlamøna mapøh à atà gay à ahàl fida gà. Kà uwana tatsa à wañ à slaka aᅅkul la mapøhla vok aᅅatà ala bokuba azlatuwañ, ama la hud’ gà kà azlakøda føta.
- <sup>16</sup>Kadàsølaw atà kà la madèhøn aᅅatà la vok. Tadøzl mayyay matavøruk la atæk la vok aw, ᅅgaha babay tadøzl gudøv la mazløb la vok aw.
- <sup>17</sup>Ahàf delga avày mayyay delga, ahàf mawisiga avày mayyay mawisiga babay.
- <sup>18</sup>Ahàf delga aslala vok aᅅa mayyi mawisiga aw, ᅅgaha ahàf mawisiga aslala vok aᅅa mayyi delga aw.
- <sup>19</sup>Køla ahàf uwana ayyi delga aw kà, tahørats à ahøn, taduwal à akàl à tsøh.
- <sup>20</sup>La kità babay kà, kadàsølaw azlamøna mapøh à atà gay à ahàl figa gà la madèhøn aᅅatà la abà gesina.”
- <sup>21</sup>”Azlauwana, 'Suføl, Suføl!', tagod’ à gi, la uwana tadàda à makoray aᅅa Zøzagøla gesin pøra aw, ama azlauwana tadèhøn tatak uwana asa à Baba gulo uwana la zagøla.
- <sup>22</sup>Mok uwana mavakay aᅅa seriya adàzlanjalay, aᅅuvaw tadàgod’ à gi 'Suføl, Suføl, la sløm aᅅak la uwana møzahà gay Zøzagøla à azladza, la sløm aᅅak la uwana møkudøkàh azlamasasødok mawisiga, la sløm aᅅak la uwana møfàhàhà azlanadzipo aᅅuvaw aw uwa?’
- <sup>23</sup>Kiya uwaga gødàgod’ à atà: Tetuwa gøsøl akul aw, zàw vok la slaka gulo, akul uwana kadàhàw tsakana!”
- <sup>24</sup>”Dza uwana atsøna gay uwana gøpøh, ᅅgaha af uwaga à ahøn, masla kà kalkal la dza hanjkæli gà, uwana aᅅal gày aᅅha à tøhus à afik.
- <sup>25</sup>Iyaw adzøkà masuway, ahønà à mukwà à afik, afad’ adød’ la ndzødà, ama gày akalàh à ahøn aw, kà uwana matatukway aᅅha kà aga kà la tøhus la afik.
- <sup>26</sup>Ama køla dza uwana atsøb sløm à gay uwanay gødapøhay la abanay, ᅅgaha atsøna uwaga aw kà, gøgagazløla kà la dza kusoᅅu gà, uwana aᅅal gày aᅅha kà à wuyyañ à afik.
- <sup>27</sup>Iyaw adzøkà masuway, ahønà à mukwà à afik, afad’ adød’ la ndzødà, ᅅgaha gày atød’ à ahøn gørim, matød’ à ahøn aᅅha kà panàhhà.”
- <sup>28</sup>Mok uwana Yesu adakød’ gøl à matapla gay aᅅha à azladza kà, maham à ahøn dza gesina kà løv aval à atà à gay, kà tsøhay matapla aᅅha uwana atapàtála.
- <sup>29</sup>Kà uwana masla kà atàpàtála kà bokuba azlamøna mapøhla wakità seriya aᅅatà ala aw, ama aᅅhàtála kà la maslay aᅅha.

## Mata 8

- <sup>1</sup>Mok uwana Yesu adasa à ahəŋ la gudəŋ la afik, maham à ahəŋ dza aŋuvaw tanəfà masla.
- <sup>2</sup>Kiya uwaga masla akàl zagəla anik, azà vok à slaka aŋha, akədēdēf à huma aŋha la magodəy: "Məŋga, baŋa asa à ka, kaslala vok mawur gi ala."
- <sup>3</sup>Yesu abiyà ahàl ala, adəbani, ŋgaha agòd: "Asa à gi, wùr ala." Katskats dza uwaga awur ala la akàl zagəla aŋha la abà.
- <sup>4</sup>Kiya uwaga Yesu agòdàl: "Tsənàŋ lela, kapəh uwaga à dza anik aw. Ama kəla kà, hād kadəpəhla vok aŋak à masla mav tatak à Zəzagəla, ŋgaha babay kavà tatak uwana Musa apəh kà masəlay aŋa azladza gesina kà kawur ala!"
- <sup>5</sup>Mok uwana Yesu adada à Kapernahum à abà, məŋga aŋa azlaslodzi dzim aŋa azla Rom la abà, azà vok à slaka aŋha la magodəy:
- <sup>6</sup>"Məŋga, magamza gulo la slaka mahən à ahəŋ la mtəga, masla maməts à afik gə saŋŋà, ŋgaha as ŋgərpə məŋga məŋga."
- <sup>7</sup>Yesu agòdàl: "Gəda à awtəy, gədəwurəŋ ala."
- <sup>8</sup>Ama məŋga aŋa azlaslodzi uwaga awulàlla, agòd: "Məŋga, gəsla kà kak aŋa mad à gəy gulo aw. Ama pəh gay tekula la tsəh ala pəra kà, magamza gulo adəwur ala.
- <sup>9</sup>Gi bay kà, azlaməŋga la ahəŋ lakəl gulo, ŋgaha gi babay, gi lakəl aŋa azlaslodzi anik suwaŋ. Gəslala vok aŋa magodəy à tekula aŋatà: 'Hād kà', aday. Gəgod à anik aya: 'Sà à waŋ kà', atsa à waŋ; ŋgaha gəgod à magamza: 'Dahà uwanay kà', adəhəŋ."
- <sup>10</sup>Mok uwana Yesu atsən gay uwaga, akəsəl à gəl kayakay, ŋgaha agòd à azlauwana tanəfay la tsəh: "Hadəy la dziriga gəgod à akul kà: Didi gədanəŋ madiŋal gəl à vok uwanay la tataka azla Isərayel la abà aw.
- <sup>11</sup>Gəpəh à akul la dziriga kà, azladza aŋuvaw tadàsa à waŋ la mas à afik afats la matəd à ahəŋ afats, ŋgaha tadədzah madzay la tatak may lakəl la azla Abəraham, Isak, Yakuba la makoray Zəzagəla.
- <sup>12</sup>Ama azlauwana naka tagay azlaaŋa makoray uwaga kà tadəuts atà à mələs à abà la uda, la abatà kà mapad slid la matuway adəgay la ahəŋ aŋa koksikoksi."
- <sup>13</sup>Kiya uwaga Yesu agòd à məŋga aŋa azlaslodzi: "Dà aŋak à mtəga, uwana kanav la madiŋal gəl à vok adəpaka à ka vok!" ŋgaha magamza aŋa məŋga aŋa azlaslodzi awùr ala la kaslà uwana: 'Dà aŋak', Yesu agòdàl.
- <sup>14</sup>La abatà Yesu ahād à mtəga Səmon Piyer. Abəz à məŋay aŋa Piyer à gəl, la slaka mahən à ahəŋ, akàl la vok.
- <sup>15</sup>Yesu adəbani la ahàl, ŋgaha akàl vok asəl à vok ala; asà à afik, adzəkà mazlak à atà.
- <sup>16</sup>Mok uwana mokokhu adasa à waŋ tasəhla azlaməna zagəla zagəla aŋuvaw à Yesu à waŋ. La gay aŋha uwana apəh, Yesu akudəkəh azlazagəla zagəla gesina, ŋgaha la mawar azlaməna dūvats anik anik gesina ala.



- 17 Adfahànj kà aṅa magəḍf gay uwana à afik, masla mapəhal gay à ahəl Yesayya agod: 'Masla azəb maru vok à ahəj gami la dɔvats gami gesina à gəl aṅha.'
- 18 Uwana Yesu anəṅàj kà maham à ahəj dza adahamal à adi, agòḍf à azlaməna matapla la slaka aṅha kà: "Məhàd à gay dərəv à uda anik."
- 19 Masla mapahla mapəhay ala anik, azà vok à slaka aṅha, agòḍf: "Məṅga, à kəla slaka uwana kadàday kà, gədànəf ka."
- 20 Yesu awulàlla: "Azlamayaka kà, afək aṅatà la ahəj, azladīyaṅ babay gày aṅatà la ahəj, ama Kona aṅa dza kà, bà slaka mahən gəl à ahəj aṅha la ahəj kà maduw ləv aw."
- 21 Dza anik la tataka azlaməna matapla aṅha la abà, agòḍf aya: "Məṅga, v à gi tetəvi kà gi aṅa mal baba gulo dadàj."
- 22 Ama Yesu agòḍf: "Nəfà à gi, ṅgaha sàk azlamazimnekid talàh vok aṅatà."
- 23 Yesu ahàd à kəslah iyaw à afik, azlaməna matapla la slaka aṅha tanəfàh.
- 24 Katskats, magol kular məṅga atsizilla ala la gəl dərəv tsərəh à uwana magantsay aṅa iyaw azà kəslah ala. Ama Yesu kà, adatəḍf à madzəhal à abà la godega kəslah iyaw.
- 25 Azlaməna matapla la slaka aṅha tazà à vok à slaka aṅha, tatsənàj ala la magòḍf: "Sufəl, təfà anu, maslà la uwaga məməts à gay!"
- 26 Yesu awùlla à atà ala: "Kà mana guba azà akul ma? Madiṅal gel à vok aṅkul kà matsihila gə." Dgaha atsizilla ala, asləl məl à kular à gəl, ṅgaha tsiriya, iyaw atsà à ahəj titi.
- 27 Ləv avàlāh atà à gay gesina aṅatà, ṅgaha tagòḍf: "Tsəhay dza mana à uwanay à amiyaka kular la iyaw lakəl babay kà atsəna gay aṅha la?"
- 28 Mok uwana Yesu adabez à gay dərəv à uda anik, la kutso aṅa azla Gadareniya la abà kà, azladza səla tasà à waṅ kà magagamay la masla, azladza uwatà kà tasà à lag kà la zəvay la aku, atà la azlamasasəḍok zagəla zagəla lakəl, azlamaksafər, bà dza bay kà aslala vok aṅa maguw à awtày la tetəvi uwatà aw.
- 29 Tadzəka mawiyay: "Kona aṅa Zəzagəla, ma kawoyaṅ la slaka gami ma? Kasà à abanay kà mazàh anu ala, tsa kaslà adàslay dadàj aw takay?"
- 30 Maham à ahəj namzi la ahəj la abatà la gay anik, tayàh huḍf aṅatà à gay.
- 31 Azlamasasəḍok mawisiga tadəv kudà à Yesu la kiya uwanay, tagòḍf: "Baṅa asa à ka makudək anu kà, sləl anu à azlanamzi à awtày à gəl zla!"
- 32 "Dàw!", Yesu agòḍf à atà. Kiya uwaga tasà à azladza səla uwaga lakəl ala, ṅgaha tahàd à azlanamzi uwatà à gəl. Katskats maham à ahəj namzi ahòy à ahəj la madəguruh la afik, tatsàh gəl à iyaw à abà, tasùfàh à abà.

<sup>33</sup>Azlaməna manəhla azlanamzi tahòy aṅatà à hudf gudəṅ à abà, ṅgaha tadzəkà mapàh à azladza à gay aṅa tatak uwaga apakà vok gesina, lakəl aṅa azladza səla uwaga la masasəḍok mawisiga.

<sup>34</sup>Kiya uwaga azlaməna gudəṅ uwatà gesina tasà à uda kà mad à slaka Yesu. Mok uwana tanəṅəṅ kà, tadəval kudà kà maz à vok la kutso aṅatà la abà.

## Mata 9

<sup>1</sup>La lig aṅa uwaga la ahəṅ kà, Yesu ahàd à kəslah iyaw à afik, aguwà à uda la dərəv la abà, ṅgaha ahàd à hudf gudəṅ aṅha à abà.

<sup>2</sup>La abatà tasàlla à waṅ dza makalàh à vədàh gà la kəslah. Mok uwana Yesu anəṅà madiṅal gəl à vok aṅatà, agòḍ à dza makalàh à vədàh gà uwaga: "Wàḍf vok à uda bəzi gulo! Tsakana aṅak adamatsila!"

<sup>3</sup>Kiya uwana azlaməna mapàhla wakità seriya ala taṅoṅuz la tataka aṅatà la abà, tagòḍ: "Dza uwanay kà, apəh mawisiga lakəl aṅa Zəzagəla, ndzer."

<sup>4</sup>Yesu asəl madzugway aṅatà, ṅgaha agòḍ à atà: "Kà mana akul la madzugway mawisiga kiya uwanay ma?"

<sup>5</sup>Tak ma ṅuləm magoḍay: Tsakana aṅak adamatsila, awma: Sà à afik, hàd aṅak takay?!

<sup>6</sup>Ama asa à gi kasəlaw, kà Kona aṅa dza la maslay la gudəṅ uwanay la vok kà mamats tsakana aṅa azladza ala." Kiya uwaga agòḍ à dza makalàh à vədàh gà uwaga: "Sà à afik, zəb kəslah aṅak, kadà aṅak à mtəga!"

<sup>7</sup>Zil uwaga asà à afik ahàd aṅha à mtəga.

<sup>8</sup>Mok uwana maham à ahəṅ dza adanəṅ uwaga kà, ləv avəl atà à gay kaykay, ṅgaha tazləbà Zəzagəla kà ndzəḍa uwaga avà à azladza.

<sup>9</sup>Yesu atsizilla ala la abatà, mok uwana aday kərkər kà anəṅà dza anik uwana sləm aṅha Mata la gày mazəḍ hadama la aku, agòḍal: "Nəfà à gi!". Mata asà à afik anəfà masla.

<sup>10</sup>Mok uwana Yesu adadza à tatak may à adi la mtəga Mata la azlaməna matapla la slaka aṅha kà, azlaməna mazəḍ hadama, la azladza uwana tetəvi aṅatà delga aw, la azlaməna tsakana tasà à waṅ, tadzàh à tatak may à gəl atà nna.

<sup>11</sup>Uwana azla Farisəya tanəṅ uwaga, tagòḍ à azlaməna matapla la slaka aṅha: "Kà mana məṅga aṅkul azuw tatak may la azlaməna mazəḍ hadama la azladza uwana tetəvi aṅatà kà delga aw ma?"

<sup>12</sup>Uwana Yesu atsənà uwaga kà, agòḍ à atà: "Azladza uwana dūvats az atà aw kà, tayàh dokwtar aw, say azlaməna dūvats la uwana tayahay pəra.

- 13**Dàw, katapawla uwana matsetseray gà la wakità la abà: 'Gəwoyaŋ kà dziriga, awkà makad' à gi tatak aw' kà uwana gəsà à waŋ kà mayahay kà azladza uwana: 'Anu azladziriga' tagod'aw, ama azlauwana: 'Anu azlaməna tsakana', tagod.'"
- 14**Azlaməna matapla la slaka Yuhana masla madāh batem tazà à vok à slaka Yesu, ŋgaha tagòd'ál: "Kà mana anu la azla Farisəya kà məkàsàh nəlay, tsa azlaməna matapla la slaka aŋak kà takasàh nəlay aw ma?"
- 15**Yesu awùlla atà ala: "Kadzugwaw ma azladza uwana tazàla atà à mazəb vok à abà, takəs nəlay, la kaslà uwana masla mazəb mis la tataka aŋatà la abà takay? Awaŋ! Ama kaslà adàsa à waŋ à uwana masla mazəb mis adàgay la tataka aŋatà la abà aya aw kà, la mok uwaga la uwana tadəkəs nəlay suwaŋ."
- 16**"Dza aslala vok aŋa matsap à lukut maviyaga à lukut mawga à vok aw, kà uwana lukut mawga uwaga adəkwoh maviyaga uwaga à tsəh kayak aya.
- 17**Ŋgaha babay kà, tadāw iyaw matavəruk mawga à kiwa iyaw maviyaga à agu aw, kà uwana iyaw matavəruk mawga adəsləh kiwa iyaw maviyaga ala, say tadāw iyaw matavəruk mawga kà à kiwa iyaw mawga à agu suwaŋ, ŋgaha kiwa iyaw aŋa makəs iyaw matavəruk uwaga lela."
- 18**Mok uwana Yesu apəh à atà gay uwaga, məŋga anik la tataka azla Yahudiya la abà asà à wan, akədèd' à Yesu à huma la magod'ál: "Dugu gulo adamətsay bà lagonay, sà à waŋ, bək'al ahəl aŋak à vok, ŋgaha adàdza à ahəŋ la sifa aya!"
- 19**Yesu asà à afik tanəfà atà la azlaməna matapla la slaka aŋha.
- 20**Mis anik la ahəŋ aŋiz akəl'al à tsəh ala, dagay mavay kulo gel aŋha səla, agobà à awtəy la lig aŋa Yesu adəbanì gay lukut aŋha.
- 21**Kà uwana agòd' la gəl aŋha kà: 'Baŋa gədəbani bà gay lukut aŋha pəra kà, gədəwur ala.'
- 22**Yesu agolà vok anəŋ'al à adi, agòd'ál: "Wàd' vok à uda dugu gulo, kà uwana madiŋ'al gəl à vok aŋak awùr ka ala", bà la kaslà uwatà, mis uwaga awùr ala.
- 23**Uwana Yesu abəz à mtəga ana məŋga uwatà, anəŋà azlaməna mats segəla, la azlaməna mataway gesina
- 24**ŋgaha agòd' à atà: "Dàw à uda, dugu kà adamətsay aw, adzəhal pəra." "Uwàà...", takədàslal.
- 25**Uwana takudəkàh maham à ahəŋ dza à uda kà, Yesu ahəd à gəy uwatà à agu, akəs bəzi dugu la ahəl, atsənəŋ ala ŋgaha asà à afik.
- 26**Gay uwatà atsən la kutso uwatà la abà gesina.
- 27**Yesu atsizilla ala la abatà adà aŋha, uwana adà aŋha kà, azlaguləf səla tanəfà la tsəh la mawiyay: "Kona aŋa David, Kona aŋa David, vok ahama ka kà anu!"

- <sup>28</sup>Mok uwana Yesu adabəz à mtəga kà, azlaguləf səla uwaga tazà à vok à slaka aḡha, ḡgaha agòd à atà: "Kadiḡawwal gəl à vok kà gəslala vok gəđàh uwaga ay?" "Iyay, mənḡa gami, mədiḡal gəl à vok kà kak la ndzəđà."
- <sup>29</sup>Kiya uwaga Yesu adəbani yewdi aḡatà la magòd à atà: "Delga, uwaga akəs akul à vok bokuba uwana kadiḡawal gəl à vok."
- <sup>30</sup>ḡgaha yewdi aḡatà apàzlla à ama ala adagay. Yesu afàhà à atà akur à lig, agòd à atà: "Tsənàwwàn lela, kapəhaw uwaga à dza anik aw."
- <sup>31</sup>Ama tahəd, tazàhà tatak uwana Yesu adahàtàn la kutso uwatà la abà gesina.
- <sup>32</sup>Mok uwana Yesu adatsizlla ala adiy aḡha kà, tasəlla dza anik uwana à waḡ, aslala vok kà mabadma aw, ḡgaha aya kà, aga la masasəđok mawisiga.
- <sup>33</sup>Uwana Yesu adakudək masasəđok uwaga kà, dza badaga uwaga adzəkà mabadma. Ləv avàläh à maham à ahəḡ dza à gay gesina, ḡgaha tagòd: "Didi, didi mədanəḡ dzəba gə uwanay la Isərayel aw!"
- <sup>34</sup>Ama azla Farisəya tagòd kà: "Sufəl aḡa azlamasasəđok mawisiga la uwana avəl maslay kà makudəkàh azlamasasəđok mawisiga uwaga!"
- <sup>35</sup>Yesu auguzàhàh la azlahud guduḡ la abà, la azlabəza guduḡ gesina, atapàhàtala la azlagəy madəv kudà aḡatà la aku, azà gay marabəḡ aḡa makoray Zəzagəla, la mawar azlaməna đuvats ala gesina, amiyaka tsəhay gə uwala beyli, ḡgaha la azlaməna takàläh à vəđah gesina.
- <sup>36</sup>Vok ahamà à Yesu kà maham à ahəḡ dza uwana tayahay, kà uwana azladza uwatà tayàh vok adagay, ḡgaha bokuba azlatuwaḡ uwana masla manəḡla atà la ahəḡ aw.
- <sup>37</sup>Kiya uwaga agòd à azlaməna matapla la slaka aḡha: "Matsəđ tatak la ahəḡ mənḡa, ama azlaməna sləray kà atà dəḡ aw.
- <sup>38</sup>Kiya uwaga kà: Dəvəw kudà à dza aḡa tatak, kà masla aḡa masləl azlaməna sləray à waḡ kà matsəđal tatak aḡha!"

## Mata 10

- <sup>1</sup>Yesu azəl azlaməna matapla la slaka aḡha kulo gəl aḡha səla uwatà, ḡgaha avà à atà ndzəđà à ahəl kà makudəkàh azlamasasəđok mawisiga la mawar azlatsəhay đuvats anik anik ala, ḡgaha la azlauwana takàläh à vəđah gesina.
- <sup>2</sup>Aganay sləm aḡa azlaməna matapla kulo gəl aḡha səla uwatà la slaka Yesu. Teraḡa dadəḡ kà Səmon uwana tazəllala Piyer, atà la deda aḡha Andəre; Yakuba bəzi aḡa Zebede atà la deda aḡha Yuhana;
- <sup>3</sup>Filip atà la Bartelemi; Tomas atà la Mata, masla mazəb hadama; Yakuba, kona aḡa Alfe atà la Tade;
- <sup>4</sup>Səmon uwana tazəlal ala Zəlot atà la Yudas Iskariyot, masla uwana adàta kaf à Yesu à gəl.

- <sup>5</sup>Yesu aslèl azlaməna matapla kulo gəl aṅha səla uwaga la mapəh à atà gay uwanay à vok à abà: "Gudəṅ uwana azla Yahudiya tadza à ahəṅ la abà aw kà, kadaw à abà aw, kadàw à gudəṅ aṅa Samariya à abà babay aw.
- <sup>6</sup>Ama dāw kà à tataka azlatuwaṅ mazelhaga à abà la tsəhay Isərayel pəra.
- <sup>7</sup>La tetəvi aṅkul la ama kà, zàw sayda, gòdāw kà: 'Makoray Zəzagəla kà nekwa atsa à waṅ.'
- <sup>8</sup>Wàràw azlaməna dūvats ala, wàlàwla azlamazimnekid à uda, wàràw azlaməna akàl zagəla ala, kudəkàhàw azlamasasədok mawisiga. Kabəzaw à uwaga kà deyday, vāw à atà deyday suwaṅ.
- <sup>9</sup>Kazəḃaw luwàluwà à ahàl baṅaw gursu, baṅaw sili la zliba la aku aw.
- <sup>10</sup>Amiyaka kiwa, amiyaka matsəp lukut, amiyaka kwimik, bà amiyaka agəla kà aṅa mauguzahay aṅkul aw. Kà uwana azlayla kà vok, kà masla sləray kà azlayla vok azuw tatak may!"
- <sup>11</sup>"Mok uwana kadàbəzaw azlaməṅ gudəṅ à abà baṅaw azlabəza gudəṅ à abà, yàhàw kà dza uwana akəs akul la ahàl səla, ṅgaha dzàw à ahəṅ la mtəga aṅha tsəràh à uwana katsaw à uda la gudəṅ uwatà la abà.
- <sup>12</sup>Mok uwana kadaw à gày, gòdāw dadəṅ teraṅa kà: 'Lapiya agay la akul.'
- <sup>13</sup>Baṅa azlaməna huḃ gày uwatà takəs akul la ahàl səla kà, 'Ayyi' aṅa lapiya aṅkul uwana kadàhàwwatəṅ kà, adza à ahəṅ lakəl aṅatà, ama baṅa takəs akul aw kà, wùllāw 'Ayyi' aṅa lapiya aṅkul à tsəh la slaka aṅatà.
- <sup>14</sup>Baṅa la huḃ gày anik baṅaw la gudəṅ anik la abà, takweska akul aṅa makəs akul baṅaw aṅa matsəḃ akul sləm kà, dāw aṅkul la abatà, dèdāw à atà à adi burburu aṅa kutso aṅa gudəṅ aṅatà uwana agàḃ à akul à asik.
- <sup>15</sup>La dziriga gəpəh à akul: La vuḃ seriya kà ṅuləm kà aṅa azlaməna gudəṅ Sodom la Gomor kà azlaməna gudəṅ uwaga."
- <sup>16</sup>"Lagwa kà, aganay gəsləl akul bokuba akul azlatuwaṅ, à tataka azlakəda fəta à abà. Kiya uwaga kà, gàw mahanay gə bokuba azlabebi, gəgod à akul, ṅgaha gàw tələmma bokuba akul azlahabakoku.
- <sup>17</sup>Dahàw haṅkəli kà uwana azladza tadàdàhla akul à huma seriya, ṅgaha tadàzlabəh akul la kurpi la gày madəv kudà aṅatà la aku.
- <sup>18</sup>Tadàpahla akul ala la huma aṅa azlaməna makoray ṅgaha la huma aṅa azlasufəl, kà uwana kawoyàw gi, kà akul aṅa maz sayda gulo la huma aṅatà, ṅgaha la huma aṅa azlauwana azla Yahudiya aw.
- <sup>19</sup>Mok uwana tadàdala akul à huma seriya kà, kadàdzugwaw lakəl aṅa uwana kadàpəhaw aw, la uwana kadàwulawla à uda, gay uwana kadàwulawla à uda kà, adàda à paṅaw aṅkul à awtày la kaslà uwatà.

- 20** Gay uwaga kà adàgay kà madzugway aṅkul aw, ama Masasəḍok aṅa Baba aṅkul Zəzagəla la uwana adàguway la akul la abà la kaslà uwatà.”
- 21** "Deda adàvà deda aṅa aslasl gəl aṅha kà makad̄ay, baba bay adàdēhəṅ kiya uwaga la bəzi aṅha; azlabəza babay tadəgola afad̄ à azlababa aṅatà à gəl kà makad̄ atà.
- 22** Azladza gesina tadəpəsew akul kà uwana kawoyaw gi. Ama dza uwana adəgəḍ dziriga à afik tsəràh à makəḍ gəl à ahəṅ kà adàbəlay.
- 23** Baṅa tatərəḍ akul la gudəṅ anik la abà, hòyàw à huḍ gudəṅ anik à abà. La dziriga gəpəh à akul: Kadàdəvaw mauguzahay à gay la gudəṅ Isərayel gesina dadəṅ kà mas à waṅ aṅa Kona aṅa Zəzagəla aw.”
- 24** "Masla asik ad̄uw məṅga aṅha tetuwa aw, magamza ad̄uw dza uwana ad̄ahalla sləray aw.
- 25** Say aslay kà masla asik apakay bokuba məṅga aṅha la masəlay dāṅ, ṅgaha magamza agay bokuba məṅga aṅha dāṅ. Baṅa tazàla à zil gày Belzəbul kà, sləm uwana tadàv à azlaməna huḍ gày kà adàgay delga aw ad̄ad̄uwa à gay aṅa zil gày la mawisiga.”
- 26** "Guba akəs akul kà azladza asik zlà ma aw. Tatak mahad̄ à ahəṅ gə gesina adəgay mapəhla vok ala gə, ṅgaha tatak nasiri gə gesina adəgay masəlay gə la dazuwaya.
- 27** Kəla tatak uwana gəpəhakulla la mələs la abà, pəhàw uwaga la ud̄aka ala; ṅgaha tatak uwana katsənawwaṅ la à gəl à gəl kà, dāw kà wiyawla la gay zaṅ.
- 28** Guba akəs akul kà azlauwana takəḍ sləḅ vok aw, kà uwana taslala vok aṅa makəḍ dokvadzi aṅa sifa aw, guba akəs akul kà, kà Zəzagəla uwana aslala vok aṅa maduw dokvadzi la sifa la sləḅ vok gesina à gày akàl à abà.
- 29** Taslala vok aṅa maduw dəgtsetsek səla ala kà aṅa sili tekula aw takay? Amiyaka tekula aṅatà azila la masəlay aṅa Baba aw kà aga la ahəṅ aw.
- 30** Amiyaka aṅidz takasagəl aṅkul gesina kà, Zəzagəla asəl la tekula tekula gesina aṅha.
- 31** Tsa kità kà, guba akəs akul aw, kà uwana akul kad̄uwaw azladəgtsetsek uwaga gesina la manəṅ akul à adi.”
- 32** "Baṅa dza apəhla gi ala la huma azladza la dazuwaya kà, gi babay gəd̄apəhla masla ala la huma aṅa Baba gulo, uwana la zagəla la afik: Masla kà aṅulo, gəd̄agoday.
- 33** Ama baṅa dza agəḍəṅ à afik kà asəl gi aw la dazuwaya la huma azladza kà, gi babay gəd̄agəḍəṅ à afik la dazuwaya la huma Baba gulo kà: Gəsəl masla aw, gəd̄agoday bay, suwaṅ.”
- 34** "Iyay, kadzugwaw kà lapiya la uwana gəsəlla à gudəṅ à vok, kagod̄aw aw: Gəsəlla lapiya à waṅ aw ama mavàhla.
- 35** Gəsà à waṅ kà masàh gəl à azlabəza zil gə à vok la azlababa aṅatà, azladəgam à vok la azlaiyà aṅatà, ṅgaha azlamis à vok la azladzedzi aṅatà.

<sup>36</sup>Mazan vok à gəl adàgay la tataka azlaməna hudf gày la abà.”

<sup>37</sup>"Dza uwana awoya baba aṅha baṅaw iyà aṅha kà gi kaykay kà, akəs gi vok aw, dza uwana awoya bəzi aṅha zilga baṅaw dugu aṅha gə kaykay kà gi kà, akəs gi vok aw.

<sup>38</sup>Dza uwana akəs maməts à ahàf à adi aṅha, ṅgaha anəf gi aw kà, masla akəs gi vok aw.

<sup>39</sup>Kəla dza uwana asal matuw sifa aṅha, adàziṅ ala; ama dza uwana atuw sifa aṅha aw kà gi kà, adàbəzal.”

<sup>40</sup>"Dza uwana akəs akul kà, akəs gi babay, ṅgaha dza uwana akəs gi, akəs dza uwana asləl gi à waṅ babay.

<sup>41</sup>Dza uwana akəs masla mapəhal gay à ahàl aṅa Zəzagəla, à kà uwana masla mapəhal gay à ahàl aṅha kà, adàbəz masik uwana maf à ahəṅ gə kà aṅa azlaməna mapəh à atà gay à ahàl, ṅgaha dza uwana akəs dza dziriga la huma aṅa Zəzagəla, kà uwana masla dziriga la huma aṅha, adàbəz masik uwana maf à ahəṅ gə kà aṅa azladza dziriga.

<sup>42</sup>Hadəy, gəpəh à akul la dziriga: Kəla dza uwana atəf iyaw mataslay gə à tekula la tataka azlabəza uwanay la abà, à kà uwana masla matapla la slaka gulo kà, adàbəz masik aṅha."

## Mata 11

<sup>1</sup>Mok uwana Yesu adadəv mapəhla à tatak azlaməna matapla la slaka aṅha kulo gəl aṅha səla uwaga, atsizlla ala la slaka uwatà kà mad matapla tatak à azladza la azlahudf gudəṅ la kutso uwatà la abà.

<sup>2</sup>Mok uwatà kà Yuhana masla madəh batem kà, agə la daṅay. Uwana atsənə gay aṅa sləray aṅa Yesu Kristu, asləl azlaməna matapla azlaanik aṅha à slaka Yesu

<sup>3</sup>kà manaval à gay ala: "Kak dza uwana məkuday awma kak dza anik kəla ay?"

<sup>4</sup>Yesu agədf à atà: "Dàw, kadəpəhaw Yuhana à tatak uwana katsənəwwəṅ la uwana kanəṅəwwəṅ gesina:

<sup>5</sup>Azlaguləf tanəṅla, azladeri taday, azlaməna akəl zagəla tawarla, azlamadagazlam bay tatsən sləm, azlamazimnekidf tawal à uda, azlaməna kuḍa babay tatsən gay marabay.

<sup>6</sup>Marabay agay la azladza uwana tasak à madiṅ gi gəl à vok aw.”

<sup>7</sup>Mok uwana azlaməna matapla aṅa Yuhana tadiy aṅatà, Yesu adzəkà mapəhay à maham à ahəṅ dza lakəl aṅa Yuhana la magəḍay: "Mana à uwana kadàw kà mayahay la kəsaf la abà ma, mazuwa uwana afad abəlakəṅ ay? Awaṅ, uwaga aw.

<sup>8</sup>Kətà zla, mana kadàw kà aṅa manəṅəṅ ma? Awma dza uwana atsəkəw à lukut mahəḍayga à abà kəla ay? Ama azlauwana tatsəkəwəh à lukut mahəḍayga à abà kà, atà kà la hudf gày sufəl.

<sup>9</sup>Mana kadàw kà aṅa manəṅəṅ ma? Masla mapəhal gay à ahàl aṅa Zəzagəla kəla ay? La kità kà, gəgodf à akul kà, Yuhana aduwa masla mapəhal gay à ahàl,

<sup>10</sup>kà uwana tatsetsèr lakəl aṅha: 'Aganay, gəsləl à awtày masləlay gulo à huma aṅak' Zəzagəla agòd, 'Kà madāh tetəvi à ahəṅ.'

<sup>11</sup>La dziriga gəpəh à akul: La tataka azladza asik la abà kà, dza mayyayga la ahəṅ aduw Yuhana masla madāh batem uwanay aw, tekedika, dza uwana mabəziga bəziga la makoray Zəzagəla kà, aduwa Yuhana uwaga.

<sup>12</sup>Dagay la mok uwana Yuhana masla madāh batem azà sayda tsərəh à lakana, kà tadāh gasa à makoray Zəzagəla à gəl, ṅgaha azlaməna məzam tayahay kà mazəbay lakana.

<sup>13</sup>Azlaməna mapəh à atà gay à ahəl gesina la mapəhay aṅa Musa tapəh gay lakəl aṅa makoray Zəzagəla tsərəh à mas à waṅ aṅa Yuhana, masla madāh batem.

<sup>14</sup>Baṅa asa à akul kà madiṅ gi gəl à vok kà, Yuhana kà Eliya uwana wakità apəhla mas à waṅ aṅha ala dagay uwarà.

<sup>15</sup>Dza uwana sləm lakəl kà, atsəbal sləm lela!"

<sup>16</sup>Yesu agòd aya: "Ma la mana lagwa gəgagazləla azladza aṅa zamana uwanay lakana ma? Gəgagazləla atà la azlabəza uwana tadzàh madzay la vadavaday kasukwa la afik, tazàlāh vok kà atà kà atà,

<sup>17</sup>la magodāy, anu mətəsà à akul talakway, ama akul kahàbàwwal à tsəh aw, məhàb à akul dəs kudā, ama katàwàw la mats hulolo aw.

<sup>18</sup>La kità Yuhana asà à waṅ, azùw aw, asà aw, ṅgaha azladza tagòd kà: 'Masla la masasəfok mawisiga.'

<sup>19</sup>Kità aya babay kà, Kona aṅa dza asà à waṅ, azuway, asay, ṅgaha azladza tagòd kà: 'Nərəzàw dza uwanay tsi, masla hud. Afa sləm à kà à mazuway la masay aṅha pəra', tagòd. 'Kafaw masla kà à tataka aṅa azlaməna mazəb hadama à abà, la azlaməna tsakana, ṅgaha la azladza uwana madz à ahəṅ aṅatà kà lela aw.' Ama tekedika matsihila aṅa Zəzagəla apəhla vok ala la sləray aṅha la abà."

<sup>20</sup>Kiya uwaga Yesu adzəkà maslāh məl à azlagudəṅ uwana à gəl, adāhàhà azlanadzipo kaykay gə la abà, kà uwana azlaməna madz à ahəṅ la abà kà tapəh gay la ləv ala aw.

<sup>21</sup>Agòd: "Dgərpa lakəl aṅak à kak Korazən! Dgərpa lakəl aṅak à kak Betsayda! Kà uwana agay nadzipo uwana adāhà à ahəṅ la tataka aṅkul la abà, agay kà la gudəṅ Tir la Sədon kà, naka dagay uwarà azlaməna madz à ahəṅ la abà kà, tatsàh kutso akəl à vok ṅgaha la madaw abuh à vok, kà mapəhla ala kà atà tapəh gay la ləv ala.

<sup>22</sup>Kà uwaga à uwana gəgod à akul kà: La vud seriya kà, seriya uwana adəbəz azlaməna gudəṅ Tir, la azlaməna gudəṅ Sədon kà ṅuləm kà aṅatà à kà aṅa gudəṅ aṅkul.

<sup>23</sup>Dgaha kak Kapernahum kadzugw kà: 'Gədàzigəṅay tsərəh à zagəla,' kagòd takay? Awaṅ, tadàdukwa ka à vədāh à gày akəl à abà, kà uwana azlanadzipo uwana adāhàhàn la kak la abà, agay la Sodom kà, naka gudəṅ uwatà kà agay la ahəṅ tsərəh à lakana.



<sup>24</sup>Kiya uwaga kà, gəpəh à akul kà la vudf seriya kà, azlaməna Sodom tadəgay ɲuləm kà kak.”

<sup>25</sup>La mok uwatà Yesu agòd: "Iyay Baba, Sufəl ana zagəla ɲgaha aɲa vəfəh, 'Kikay', gəgodf à ka, kà uwana kafatəla à azlabezaga la à ama ala tatak nasiri gə uwana kahàd à azlaməna masəl tatak uwana à adi, 'Mədawur gəl', tagòd.

<sup>26</sup>Iyay, Baba gəzləb ka kà uwaga.”

<sup>27</sup>"Baba gulo abək à gi tatak gesina. Dza la ahəɲ asəl Kona aw, say Baba pəra asəl gi, dza la ahəɲ asəl Baba aw, say gi Kona aɲha pəra, ɲgaha la azlauwana Kona apəhatàla Baba aɲha pəra.”

<sup>28</sup>"Sàw à waɲ à slaka gulo akul gesina, akul uwana kayàw vok la mazəb mahanay, gədàvə à akul maduw ləv.

<sup>29</sup>Zəbàw zeləɲ zukw kuda gulo, ɲgaha kəsàw matapla gulo, kà uwana gi kà gi dzəɲdzəɲ aw, gi tələmma, ɲgaha kadàbəzaw maduw ləv aɲa ləv aɲkul.

<sup>30</sup>Kà uwana zukw kuda uwana asa à gi mav à akul kà zlazladà kà mazəbay aw, mahanay uwana gədàfa à akul à gəl babay kà tsafsaf.”

## Mata 12

<sup>1</sup>Mok uwana uwaga adadà à lig kà, Yesu lanalkamaazlaməna matapla la slaka aɲha tagùw à uda la guf nalkama la abà, (uwana bokuba hi), la vudf maduw ləv. Azlaməna matapla la slaka aɲha uwaga kà may akəs atà, tadzəka makalay kà mazuway.

<sup>2</sup>Uwana azla Farisəya tanəɲà uwaga kà, tagòd à Yesu: "Nerəz, azlaməna matapla la slaka aɲak tadəh tatak uwana mapəhay gami avərə gay kà madəhəɲ la vudf maduw ləv tsi!”

<sup>3</sup>Yesu awùlla atà ala: "Kadzəɲàw à tatak uwana David adəhəɲ vərđi anik la mok uwana may akəs la azlaməna aɲha aw uwà?”

<sup>4</sup>Ahàd à gày Zəzagəla à agu, kà mazəb tatak may tsikasliga uwana maf à ahəɲ gə. Tekedika tetəvi la ahəɲ kà mazuway aɲha aw, baməraka azlamanalay aɲha babay aw, say à azlaməna mav tatak à Zəzagəla pəra, la uwana tetəvi la ahəɲ.

<sup>5</sup>Awma kadzəɲàw la mapəhay aɲa Musa la abà kà, azlaməna mav tatak à Zəzagəla tadəh sləray la gày Zəzagəla la aku amiyaka la vudf maduw ləv, ɲgaha tatugw mawisiga lakəl aɲatà aw kà, kasəlaw aw takay?

<sup>6</sup>La dziriga gəpəh à akul kà, dza uwana aduwa məɲ gày Zəzagəla uwaga kà aga la abanay.

<sup>7</sup>Agayɲa kasəlaw, uwana matsetseray uwanay asal magodəy kà: 'Vok mahamay la uwana asa à agi, awkà tatak makadəy gə aw', naka kadùkwàw seriya à azladza uwana à gəl, atà kokudà tsakana aw.

<sup>8</sup>Kà uwana Kona aɲa dza kà masla la uwana məɲga aɲa vudf maduw ləv.”

- <sup>9</sup>Yesu atsizilla ala la abatà, azà à vok, ahàd à gày madəv kudà aṇatà à agu.
- <sup>10</sup>Dza anik la ahəṇ la abatà, uwana agà la ahàl mamətsayga. Azladza uwana la gày uwatà la aku tanəvə à Yesu: "Mapəhay gami ma avà tetəvi kà mawur dza ala, la vudf maduw ləv takay?", kà atà aṇa mabəzal à tsəh kà mapuwal gudzi à gəl.
- <sup>11</sup>Ama Yesu awùlla atà ala: "Baṇa dza la ahəṇ la tataka aṅkul la abà la tuwaṇ tekula pəra, ṅgaha tuwaṇ uwaga atəf à suwa à abà la vudf maduw ləv, ma aday kà mazəb à uda la abà aw takay?"
- <sup>12</sup>Ḑgaha dza ndzer, ma aduwa tuwaṇ aw takay? Kà uwaga à uwana mapəhay gami avà tetəvi à dza kà madàh delga la vudf maduw ləv."
- <sup>13</sup>Kiya uwaga Yesu agòd à dza uwatà: "Biyà ahàl ala!" Abiyà ahàl ala, ṅgaha ahàl aṇha adawurla bokuba anik uwahà.
- <sup>14</sup>Azla Farisəya tadà aṇatà, takəs sawaray kà mabəz tetəvi kà makədla Yesu.
- <sup>15</sup>Mok uwana Yesu atsənà uwaga kà, asà à uda la slaka uwatà la abà, ṅgaha maham à ahəṇ dza aṇuvaw tanəfà. Awarà azlaməna dūvats ala gesina.
- <sup>16</sup>Ama afàh à atà akur à lig la ndzəfà kà atà aṇa mapəh uwana apakà vok aw.
- <sup>17</sup>Adàhàṇ kiya uwanay kà, kà gay aṇa masla mapəhal gay à ahàl Yesayya aṇa magəf à afik.
- <sup>18</sup>Zəzagəla agòd: 'A aganay masla sləray gulo uwana gəkəsàni, Uwana gəwoyàṇ ṅgaha marabay gulo lakəl aṇha. Gədəsləl Masasəfok gulo à gəl aṇha, Ḑgaha adàz gay seriya gulo à azlatsəhay gudəṇ à vok gesina.
- <sup>19</sup>Masla adàgazlay la dza aw, adàwiyyay aw, Ḑgaha dza adàtsən mawiyay aṇha la azlatetəvi la ama aw.
- <sup>20</sup>Adàdavla à gay à mazuwa manəlfahayga à vok aw, Ḑgaha akəl fənəs uwana atəm à ahəṇ ṇuliza bay kà, adàdəvla à gay à vok aw. Masla adàdz à ahəṇ kiya uwanay tsərəh à madàh dziriga à gudəṇ à vok gesina.
- <sup>21</sup>Azlatsəhay gudəṇ à vok gesina tadàf manəwəṇ aṇatà à masla à afik', agòd aya.
- <sup>22</sup>Kiya uwaga la abatà tasələ dza à Yesu à waṇ, guləf badaga, la masasəfok mawisiga lakəl. Yesu awurà dza uwatà ala tsərəh à uwana dza aslala vok aṇa mabadma, ṅgaha la manəṇla.
- <sup>23</sup>Ləv avàläh à maham à ahəṇ dza à gay gesina, ṅgaha tagòd: "Masla kà Kona aṇa David təga aw ay?"
- <sup>24</sup>Ama uwana azla Farisəya tatsənà uwaga kà, tagòd: "Kona uwaga akudəkahay azlamasəfok mawisiga kà, kà uwana Belzəbul, sufəl aṇa seteni avàl ndzəfà kà makudəkàhla."
- <sup>25</sup>Ama Yesu asəl madzugway aṇatà ṅgaha agòd à atà: "Baṇa azladza gudəṇ tekula tatsàkla, ṅgaha guvəl la tataka aṇatà la abà, makoray aṇa gudəṇ uwatà kà azila. Hudf

gudəŋ, baŋaw huɖ gày, uwana tap guvəl la tataka aŋatà la abà, aslala vok aŋa madz à ahəŋ aw.

**26**Baŋa seteni akudək seteni, masla la gəl aŋha adatsakla, ma kakay à makoray aŋha adàdza à ahəŋ ma?

**27**Iyay, akul kadzugwaw kà Belzəbul la uwana avà à gi ndzəɖa kà makudəkàh azlamasəɖok mawisiga uwaga, kagodāw. Kità ma, uwa adav ndzəɖa à azlabəza aŋkul kà makudəkahay uwa? Kà uwaga à uwana tadàgah azlaməna seriya aŋkul.

**28**Ama tsa baŋa la Masasəɖok Zəzagəla la uwana gəkudəkàh azlamasəɖok mawisiga uwanay kà, tsa kətà kà, gòɖāw kà makoray aŋa Zəzagəla kà adabəz akul à vok lakana, gòɖāw zla.”

**29**"Dza la ahəŋ ad à gày la mtəga aŋa dza ndzəɖa-ndzəɖaga kà mad à gəl aw, say atsà à vok à abà, akəs dza uwaga, awadəŋ dāŋ, ŋgaha la lig la ahəŋ aslala vok aŋa mazuw gày aŋha à gay.”

**30**"Dza uwana anu səla aw kà, masla məzam gulo. Ŋgaha babay kà dza uwana azlak gi kà maham ala gay à vok aw kà, masla kà masla madàdasiŋ ala.

**31**Kà uwaga gəgod à akul haɖay kà: Maham à ahəŋ tsakana la azlagay mawisiga aŋa azladza gesina kà agay mamatsila gà, ama kəla kà, dza uwana apəh mawisiga la matsək magodāhay à Masasəɖok Zəzagəla à gəl kà, masla kà, abəz mamatsila aŋa tsakana aw.

**32**Kəla dza uwana apəh mawisiga lakəl aŋa Kona aŋa dza adəmətsalaŋ ala, ama kəla dza uwana agodāh à Masasəɖok Zəzagəla kà, masla adəbəzal mamatsila tsakana aŋha la zamana uwanay, ŋgaha la məlo uwana adàsa à waŋ babay aw.”

**33**"Baŋa ahəf delga kà, mayyay aŋha bay kà delga. Ahəf mawisiga bay kà, mayyay aŋha kà mawisiga. Kà uwana tasəl ahəf kà la mayyay aŋha uwana la vok ayyay.

**34**Akul azlabəza aŋa matsapa, kakay kapəhaw azlatatak delga, tsa akul azlamawisiga ma? Uwana gay apəhay kà uwana adahən ləv ala.

**35**Dza delga atsalla tatak delga à uda la ləmana delga aŋha la abà; dza mawisiga bay atsalla tatak mawisiga à uda la ləmana aŋha mawisiga la abà babay.

**36**Iyay, gəgod à akul kà: La vuɖ seriya kà, azladza tadəwulla à uda la gəl aŋatà lakəl aŋa azlagay deyday gə uwana tapəh gesina.

**37**Kà uwana la afad gay aŋak la uwana seriya adəpəh à vok, ŋgaha adəpəhla ala kà kak dziriga baŋaw azlayla ka aw.”

**38**Kiya uwaga azlaanik la tataka aŋa azlaməna mapəhla mapəhay ala la azla Farisəya tagòɖ à Yesu: "Məŋga, asa à anu kà kadəhəŋ nadzipo tekula mənəŋəŋ.”

**39**Kiya uwaga Yesu awùlla atà ala, agòɖ: "Azladza aŋa zamana uwanay azlamaksafər, tadəh mabila, tanəv nadzipo, ama nadzipo la ahəŋ tanəŋəŋ aw, say aŋa masla mapəhal gay à ahəl Yonas uwatà pəra.

<sup>40</sup>Bokuba uwana Yonas adàhà mavakay makər la mahənay makər la huđ aña kilfi babay kà, kiya uwaga adàpaka vok la Kona aña dza uwana adàdàh mahənay makər la mavakay makər la zəvay la aku babay.

<sup>41</sup>La vuđ seriya kà, azladza aña gudəŋ Niniv tadàgola afad à azladza aña zamana uwanay à gəl, ŋgaha tadàpuwa à atà gudzi à gəl, à kà uwana azlaməna madz à ahəŋ la Niniv tapəh gay la ləv ala, à mok uwana tatsəŋ sayda aña Yonas. Uwana aduwa Yonas aganay la abanay.

<sup>42</sup>La vuđ seriya kà, sufəl mis gə uwana la gəl la aku adàgola afad à azladza aña zamana uwanay à gəl, ŋgaha adàpuwa à atà gudzi à gəl, kà uwana asà à afik la tsəh la ahəŋ la makəđ gəl à ahəŋ gudəŋ à vok, kà matsəb sləm à haŋkəli aña Salomon. Uwana aduwa Salomon kà aganay la abanay.”

<sup>43</sup>"La mok uwana masasəđok mawisiga adasa à uda la dza la abà kà, aday auguzahay la azlaslaka deydayga gesina, ayàh slaka maduw ləv. Ama baña abəzal aw kà,

<sup>44</sup>agodəy la gəl aña kà: 'Lagwa kà, gəday, gədàwul à slaka gulo uwana à abà gəsà à uda la abà. Ŋgaha awulay abəzal à gəl kà masladəyga lela, madəhəŋ à ahəŋ gə dzəba aña səla aw.'

<sup>45</sup>La abatà kà aday, ayahay azlamasasəđok mawisiga anik à tsəh məđəf, azlauwana taduwa masla la dzaŋdzaŋ, tatsa à waŋ atà nna, tadza à ahəŋ la abatà. Kiya uwaga kà, madz à ahəŋ aña dza uwaga agay mawisiga dāduwa uwana uwarà. Kiya uwaga adəgay la azladza mawisiga aña zamana uwanay.”

<sup>46</sup>La mok uwana iyà la azladedə aña Yesu tasà à waŋ kà, Yesu abadimà à maham à ahəŋ dza. Tatsàzl à uda, asà à atà mabadalma.

[<sup>47</sup>Dza anik agəđ à Yesu: "Iyà la azladedə aña k la uda, asà à atà mabadakama!"]

<sup>48</sup>Yesu awulla à dza uwatà: "Uwa à iyà gulo la azladedə gulo uwa?"

<sup>49</sup>Ŋgaha apəhla azlaməna matapla la slaka aña ala la magodəy: "Atà nna azlaiyà la azladedə gulo.

<sup>50</sup>Kəla dza uwana adàh uwana asa à Baba gulo uwana la zagəla la afik kà, masla kà deda gulo, baŋaw iyà gulo."

## Mata 13

<sup>1</sup>La mavakay uwatà Yesu asà à uda la kay, ŋgaha ahàd adzà madzay la gay dərəv kà matapla tatak à azladza.

<sup>2</sup>Magol maham à ahəŋ dza ahəmal à adi. Masla ahàd à kəslah iyaw à afik, adzà madzay la afik, maham à ahəŋ dza babay tatsàzlla à gay dərəv.

<sup>3</sup>Apəhàtala azlatatak aŋuvaw la azlagay la gay la abà, ŋgaha agəđ à atà: "Masla maslək tatak asa à uda kà mad à maslək tatak.

- <sup>4</sup>La mok uwana aslæk hi la guf aṅha la abà, azlafofulo anik tanis à tetøvi à ama, azladīyaṅ tasa à waṅ tazuw à gay.
- <sup>5</sup>Azlaanik aya tanis à pala akur afik, bokuba uwana kutso la pala akur lakəl mənḡa aw kà, hi as à uda katskats, kà uwana kutso aga la ahəṅ mənḡa aw.
- <sup>6</sup>Ḷgaha uwana afats adàdzəka mavəḡay la ndzəḡà, agulla fofulo tsatsadēḡà ala, kà uwana abək slilih kà à pala akur à afik.
- <sup>7</sup>Bà gotənaṅ azlafofulo anik tanis à atək à abà, uwana atək azigənaṅ, akəḡ mas uda aṅa fofulo à tsəh.
- <sup>8</sup>Bà gotənaṅ azlafofulo anik tanis à kutso delga gə à abà, ḡgaha tavà mayyay lela: Azlaanik tayya à adi zazuṅ səla, azlaanik aya zuṅ, ḡgaha azlaanik huməts.”
- <sup>9</sup>Yesu azatàlanḡ à gəl agòḡ: "Tsəbàwwal sləm lela à baṅa sləm aga à akul lakəl.”
- <sup>10</sup>Kiya uwaga azlaməna matapla la slaka aṅha tazà vok à slaka aṅha: "Kà mana kapəhatàla gay la gay la abà ma?", tagòḡal.
- <sup>11</sup>Yesu agòḡ à atà: "Akul kà, kabəzaw masəl nasiri aṅa makoray Zəzagəla, ama atà kà tabəzal aw.
- <sup>12</sup>Kà uwana dza uwana la tatak tadàvəlla à gəl aya, ḡgaha adəsəg gəl ala. Ama kà aṅa dza uwana la tatak ḡuv kà, kà tadədəvəlla à ahəl ala.
- <sup>13</sup>Kà uwaga à uwana gəpəhatàla gay la gay la abà, kà uwana tanəṅaṅ ama tanəṅəzaṅ ala aw, ḡgaha tatsənaṅ ama bokuba tatsəbal sləm la matsənaṅ aw,
- <sup>14</sup>kà gay aṅa masla mapəhal gay à ahəl Yesayya aṅa magəḡ à afik: 'Akul la matsəbal sləm, ama katsənaṅ aw; kanəṅawwaṅ la matsəkəl yewdi à gay, ama kanəṅawwaṅ aw.
- <sup>15</sup>Kà uwana tsəhay uwanay kà adàdzadza gəl aṅha ala, Danakàh à sləm à ama. Tatsakàh à yewdi aṅatà à ama Kà yewdi aṅatà aṅa manəṅ aw Kà sləm aṅatà aṅa matsənaṅ aw, Ḷgaha kà atà aṅa masəl tatak la ləv aṅatà la tsəh aw, Kà atà aṅa mawul à waṅ à slaka gulo, kà gi aṅa mawuratàla aya aw, Zəzagəla agòḡ.’
- <sup>16</sup>Ama akul kà, marabay agay la akul, kà uwana yewdi aṅkul kà anəṅla, ḡgaha sləm aṅkul atsənà tatak.
- <sup>17</sup>La dziriga gəpəh à akul: Aṅuvaw azlaməna mapəh à atà gay à ahəl kà mapəhla à azladza, la azladza dziriga aṅa Zəzagəla, tayàh kà manəṅəṅ uwana kanəṅàwwàṅ, ama tanəṅàṅ aw, kà matsən uwana katsənaṅwwàṅ, ama tatsənàṅ aw.”
- <sup>18</sup>"Iyay, tsənàwwàṅ godega aṅa gay la gay la abà aṅa masla maslæk tatak, uwana asal magòḡay zla.
- <sup>19</sup>Azlauwana tatsəna gay marabəṅ lakəl aṅa makoray Zəzagəla ḡgaha takəsəṅ aw, atà kà kalkal la gay tetøvi uwana azlafofulo tanis ala à ama: Ḷgaha mawisiga atsa à waṅ, atsatsam uwana à uda tasləka à ləv aṅatà à tsəh.

- <sup>20</sup>Azlaanik kalkal la pala akur, uwana azlafofulo tanis à afik, tatsəb sləm à gay, takəs la marabay katskats,
- <sup>21</sup>ama tadala slilih la atà la abà aw. Takəs kà aña kaslà ñuv pəra. Mok uwana matərəbay, la mas ñgərpa adàtsizlla ala kà gay Zəzagəla kà, katskats tasak madiñal gəl à vok aña à la tsəh ala.
- <sup>22</sup>Azlaanik kalkal la gày atək uwana azlafofulo tanis à abà: Tatsəna gay Zəzagəla, ama madzugway la adi aña gudəñ à vok uwanay, la matsidəy aña, la mapapatay aña lakəl aña ləmana asufa gay uwana ala la ləv aña à la tsəh, ñgaha ahən aw.
- <sup>23</sup>Azlaanik kalkal la kutso delga uwana azlafofulo tanis à abà: Tatsəb sləm à gay, ñgaha tatsənañ. Ñgaha tahən lela, azlaanik tayya à adi zazuñ səla, azlaanik zuñ, azlaanik aya huməts.”
- <sup>24</sup>Yesu apəh à atà gay la gay la abà anik, agòd à atà: "Aganay tatak uwana məgagazləla la makoray Zəzagəla. Dza anik asləkà fofulo delga à guf aña à abà.
- <sup>25</sup>La vəd la abà vərđi anik, à mok uwana azladza gesina la madzəhal la abà, masla məzam aña dza uwatà asà à wañ, akokos mañaviya à guf hi uwatà à abà, ñgaha adà aña.
- <sup>26</sup>Mok uwana hi adazigənañ, adzəkà matsa à gəl ahənañ kà, mañaviya apəhla vok ala babay.
- <sup>27</sup>Azlamagamza aña dza aña guf tasà à wañ tagòdəl: 'Məña, kasləkà kà fofulo delga à guf aña kà abà mi ya, mañaviya uwanay ma asà à wañ ma lala aya la?’
- <sup>28</sup>Agòd à atà: 'Uwaga kà masla məzam gulo la uwana adəhà kiya uwaga'. Kiya uwaga azlamagamza tanəval, tagòdəl: 'Lagwa ma, asa à ka məday mədàtsəd à ahəñ ay?’
- <sup>29</sup>'Awañ', agòd à atà: 'Baña la katsədəw mañaviya à ahəñ kà, zlahaw kà, kadàtsədəwla hi gə,
- <sup>30</sup>səkəwwal, tahən la slaka gə tsərah à matsəd tatak. La kaslà uwatà kà, gədəgod à azlaməna matsəd tatak: Tsədəw kà mañaviya dadəñ, wədəhəwəñ təmtatəm kà matəl à gay, ñgaha la lig la ahəñ kà, dəwgəla hi gulo à mtəga, gədəgod à azlaməna matsəd tatak’.”
- <sup>31</sup>Yesu apəh à atà gay la gay la abà anik aya, agòd à atà: "Makoray Zəzagəla kà, məgagazləla kà la tsəhay hamadz uwana atsa à uda la lig gày aña dza.
- <sup>32</sup>Masla la uwana à tsəh azlatsəhay anik anik à tsəh gesina, ama baña adazigənañ kà, masla la uwana adəwa azlaahəf anik, apak magol ahəf tsərah à uwana azladəyañ tasaha à wañ kà mañaləh gày aña à afik.”
- <sup>33</sup>Yesu apəh à atà gay la gay la abà anik aya, agòd à atà: "La mana gəgagazləla makoray Zəzagəla ma? Makoray Zəzagəla kà kalkal la tatak maməsl tatak ala, uwana mis akotsiñ à pəhəw dogum zlo à tsəh uwana adəh kilo dzik səla gəl aña səla, tsərah à uwana aməsl magol pəhəw uwaga ala gesina.”

- <sup>34</sup>Yesu apèh uwaga gesina à maham à ahəŋ dza kà la gay la gay la abà. Apèh à atà gay la kokudà la gay la gay la abà aw,
- <sup>35</sup>kà gay aŋa masla mapəhal gay à ahàl aŋa mapàhla à azladza aŋa magəf à afik: 'Gədàpaha à atà kà la gay la gay la abà, Gədàpəhatàla tatak mahad vok à ahəŋ gà uwana agà dagay madzəka vok aŋa gudəŋ à vok.'
- <sup>36</sup>La lig la ahəŋ Yesu asàk à maham à ahəŋ dza à ahəŋ, awùl à mtəga. Azlaməna matapla la slaka aŋha tazà vok à slaka aŋha kà manaval godega aŋa gay la gay la abà uwatà: "Pəhanula gay la gay la abà aŋa maŋaviya uwana la guf hi la abà!"
- <sup>37</sup>Yesu awùlla atà ala la kiya uwanay: "Iyay, dza uwana aslək fofulo delga kà, uwaga kà Kona aŋa dza,
- <sup>38</sup>guf kà, uwaga kà gudəŋ à vok, fofulo delga kà, azladza uwana azlaaŋa makoray Zəzagəla, ŋgaha maŋaviya bay kà, azlaaŋa masla mawisiga.
- <sup>39</sup>Masla məzam uwana akokos maŋaviya uwaga kà seteni; təla matsəf tatak uwaga, kà madəv à gay gudəŋ à vok, azlaməna matsəf tatak kà azlamalika.
- <sup>40</sup>Bokuba uwana tawədfəh maŋaviya à akàl à gay kà, kiya uwaga adəpaka vok la madəv à gay gudəŋ à vok babay.
- <sup>41</sup>Kona aŋa dza adàsləl azlamalika aŋha à ahəŋ, ŋgaha tadətsatsam à uda la makoray aŋha la abà azladza uwana tasokw dza à tsakana à abà gesina, la azladza uwana tadəh mawisiga.
- <sup>42</sup>Tadəwuts atà à gudəh akàl uwana à abà, matuway la mapəf slid la tsəh ala terawawa la abà.
- <sup>43</sup>Ama azlauwana takəs gay aŋa Zəzagəla kà, atà kà tadəudəy bokuba afats la makoray aŋa Baba Zəzagəla la abà. Tsəbàwwal sləm lela, à baŋa sləm aga akul lakəl."
- <sup>44</sup>"Makoray Zəzagəla kà kalkal la ləmana uwana mahadəŋ à ahəŋ gà la guf la abà. Dza anik aḃəz à ləmana uwaga, ŋgaha ahadəŋ à ahəŋ aya. Masla arab, ahad madawla uwana akoray gesina, ŋgaha asukwla guf uwatà."
- <sup>45</sup>"Makoray Zəzagəla kà, kalkal la masla matsakalay uwana ayəh azlatatak bədfà delga delga gà.
- <sup>46</sup>Mok uwana adəḃəz tatak bədfà uwana delga gà, tsakalay aŋha zlazladà kà, aday, adawul tatak uwana akoray gesina, ŋgaha asukw la tatak bədfà uwatà."
- <sup>47</sup>"Makoray Zəzagəla kà kalkal la dzarawa uwana aduway à iyaw à abà uwana ahəl tsəhay tatak anik anik gesina.
- <sup>48</sup>Mok uwana adahən ala, azlaməna makas kilfi tabiyəŋ à uda, ŋgaha tadzəh madzay kà makəs kilfi delga delga à takosà à abà, ama uwana delga aw kà, tafətukw ala.
- <sup>49</sup>Kiya uwanay à uwana adəpak à vok la makəf gəl à ahəŋ gudəŋ à vok: Azlamalika tadəsa à ahəŋ kà mavəh azlamawisiga ala la azladelga,

<sup>50</sup>ŋgaha tadàfètukw azlamawisiga à gudùh akàl à abà. Tadàtaway la mapadàh slid la tsəh ala, la abatà.”

<sup>51</sup>"Katsenaw uwaga gesina nəma ay?", Yesu agòd' à atà. "Iyay", tagòdàl.

<sup>52</sup>Ŋgaha agòd' à atà: "Kiya uwanay zla, kəla masla mapàhla wakità mapəhay uwana ala apàk masla asik aṅa makoray Zəzagəla kà, masla kà bokuba zil gày uwana ahəl à uda la ləmana aṅha la abà azlatatak mawga la azlamaviyaga.”

<sup>53</sup>Mok uwana Yesu adadəv azlagay la gay la abà uwaga à gay kà, adà aṅha la abatà.

<sup>54</sup>Ŋgaha awùl à gudəṅ uwana à abà azigən la abà, adzəkà matapatàla azlatatak la gày madəv kudà anata la aku, ŋgaha azladza gesina kà ləv avàläh à atà à gay gesina, tagòd': "Haṅkəli uwanay ma abəzal ma lala? Kakay asla kà madəhəṅ azlanadzipo uwanay ma?

<sup>55</sup>Masla kà bəzi aṅa masla mapəd' ahàf təga aw uwà? Mariyama la uwana iyà aṅha aw takay? Yakuba, Yusufu, Səmon, ŋgaha Yahuda la uwana azladedà aṅha təga aw takay?

<sup>56</sup>Azladedà aṅha dəgam gà bay kà, atà la abanay kəla mavakay aw takay? Ŋgaha ma lala abəzal ndzəda uwaga zlam la?”

<sup>57</sup>Kà uwaga à uwana tadinṅ gəl à masla à vok aw. Ama Yesu agòd' à atà: "Masla mapəhal gay à ahəl kà lala beyli kà takəs gay aṅha, ama la gudəṅ aṅha uwana tayyà à abà baṅaw la huɖ gày aṅha kà, takəs gay aṅha aw.”

<sup>58</sup>La abatà kà Yesu adàhà azlanadzipo ṅuv pəra kà uwana tadinṅ gəl à masla à vok aw.

## **Mata 14**

<sup>1</sup>La zamana uwatà, Herod sufəl aṅa Galili avərà gay kà mapəhay lakəl aṅa Yesu.

<sup>2</sup>Agòd' à azlaməna magamza aṅha: "Yuhana masla madàh batem kà, adawul à uda la mamətsay, kà uwaga à uwana aga la maslay kà madàh azlanadzipo kiya uwanay.”

<sup>3</sup>Tekedik kà, Herod la uwana avà tetəvi kà makəs Yuhana, awàdāṅ, ŋgaha adùw à daṅay kà lakəl aṅa mis aṅa deda aṅha Filip, uwana sləm aṅha Herodiya.

<sup>4</sup>Kà uwana Yuhana agòd' à Herod: "Azlayla kà, kà kak aṅa mazəb Herodiya kà aṅa mis aw.”

<sup>5</sup>Herod asəl makəd' Yuhana, ama guba akès kà azla Yahudiya, kà uwana gesina anata tanəṅà Yuhana kà bokuba masla mapəhal gay à ahəl aṅa Zəzagəla kà mapàhla azladza.

<sup>6</sup>Mok uwana mavakay uwana tayyà Herod adadəbà, tahəb madəvaday la mavakay uwatà. Dugu aṅa Herodiya ahəb dəs la huma aṅa azladza uwana tazaläh atà. Dəs uwatà, adà à ləv aṅa Herod à tsəh, aràbāṅ,

<sup>7</sup>tsəràh à uwana azùw mawadāy kà mav tatak à dugu uwaga kəla tatak uwana anavay gesina.



- <sup>8</sup>La mapəhal aṅa iyà aṅha, agòḍ à sufəl: "Nàts gi gəl aṅa Yuhana à tasà à abà, kavà à gi."
- <sup>9</sup>Kay, uwaga azà à sufəl mənğa, ama kà mazuw mawadāy aṅha, ṅgaha la azladza uwana azàläh atà kà, avà tetəvi kà madāh uwaga.
- <sup>10</sup>Asləl dza kà mad manats gəl aṅa Yuhana masla madāh batem à waṅ la daṅay.
- <sup>11</sup>Tasələ gəl uwatà à waṅ la tasà la abà, tavà à dahalay, masla bay adàla à iyà aṅha.
- <sup>12</sup>La lig la ahəṅ azlaməna matapla la slaka Yuhana masla madāh batem, tasà à waṅ, tazəḅ vok aṅha kà mad malay. La lig la ahəṅ, tahàd kà mapəh tatak uwana apakà vok à Yesu.
- <sup>13</sup>Mok uwana Yesu atsənà uwaga, atsizlla ala la abatà la kəslah iyaw, kà mad aṅha à kəsaf à abà kokudà gəl aṅha. Ama uwana maham à ahəṅ dza atsən uwaga kà, tasà à uda la gudəṅ la abà, ṅgaha tanəfà Yesu la maguway la gay gərdza.
- <sup>14</sup>Mok uwana Yesu adasa à ahəṅ la kəslah iyaw la afik, anəṅà maham à ahəṅ dza aṅuvaw. Vok ahəmal kaykay kà azladza uwaga, ṅgaha adzəkà mawar atà ala la dūvats aṅatà la abà gesina.
- <sup>15</sup>Uwana mokokhu adasa à waṅ kà, azlaməna matapla la slaka aṅha tazà vok à slaka aṅha, tagòḍal: "Vəḍ adagay, ṅgaha slaka uwanay kà fəta aya. Sàk à maham à ahəṅ dza tadà aṅatà à huḍ gudəṅ, kà atà aṅa mayàh huḍ aṅatà à gay."
- <sup>16</sup>Yesu awùlla atà ala: "Akəsa vok kà atà aṅa madiy aṅatà aw, akul la gəl aṅkul, vaw à atà tatak may."
- <sup>17</sup>Ama tagòḍal: "La abanay kà kaf gay bərsew zlo la kilfi səla pəra aga anu la ahəl."
- <sup>18</sup>Yesu agòḍ à atà: "Sàwgəla à waṅ à abanay dadəṅ."
- <sup>19</sup>Yesu agòḍ à maham à ahəṅ dza: "Dzàw madzay la kəsaf la afik!" Ḍgaha masla ahəl kaf gay bərsew zlo la kilfi səla uwatà, anəṅà à zagəla, "Kikay", agòḍ à Zəzagəla. Atsəkà kaf ala, avà à azlaməna matapla la slaka aṅha, ṅgaha azlaməna matapla uwaga tavàh à maham à ahəṅ dza uwatà bay.
- <sup>20</sup>Kiya uwaga kəla uwabeyuwi azùw, kəla aṅa may aṅha. Azlaməna matapla tahamà à gay à matəm à atà à ahəl gə à vok, takosà kulo gəl aṅha səla à uwana atəmal à atà à ahəl la kaf zlo la kilfi səla uwaga la abà.
- <sup>21</sup>Matugway aṅa azlazil uwana tazùw kaf kà, aslay dəbow zlo kokudà matugw azlamis la azlabəza.
- <sup>22</sup>Kiya uwaga Yesu agòḍ à azlaməna matapla la slaka aṅha kà: "Dàw à kəslah iyaw à afik, katsəvokaw à gay dərəv à uda anik kà gi, gi kà: 'Mada aṅulo zlà', gəgod à maham à ahəṅ dza."
- <sup>23</sup>Uwana tavàh vok ala, ahàd à gudəṅ anik à afik kokudà gəl aṅha kà madəv kudà. Vəḍ abəzal à gəl la abatà.

- <sup>24</sup>Kəslah iyaw babay kà adaday kà kərkər. Afad atəərbà atà, kà uwana tagolà à huma à gay.
- <sup>25</sup>Zwek la huma la gay la matuway gotsak teraṇa, Yesu adà à awtày à slaka azlaməna matapla aṇha la maday lakəl iyaw.
- <sup>26</sup>Ama mok uwana tanəṇaṇ aday la gəl iyaw kà, tasəkùläh à tsəh ala kà guba, "Uwaga kà tatak mavavat dza", tagòd, ṅgaha tadzəkà mawiyay guba.
- <sup>27</sup>Ama katskats Yesu abadátàmà: "Karuwaw vok à ahəṇ aw, gi ṅuwà, guba akəs akul aw!", agòd à atà.
- <sup>28</sup>Piyer abadəlmà, agòdàl: "Sufəl, baṇa kak dziri kà: 'Sà à waṇ', gòd à gi, gəda à awtày la gəl iyaw!"
- <sup>29</sup>"Sà à waṇ", Yesu agòdàl. Piyer asà à ahəṇ la kəslah iyaw la afik, adzəkà maday la gəl iyaw kà mad à slaka Yesu.
- <sup>30</sup>Ama uwana anəṇaṇ afad adzəkà madəday kà, adzəkà masəkulay la mad à iyaw à abà, adzəkà mawiyay: "Sufəl, bəlla gi!"
- <sup>31</sup>Katskats Yesu abiyà ahəl ala, akəs la ahəl, ṅgaha agòdàl: "Kayyà, madiṇal gəl à vok aṇak kà à tsəh ala, kà mana kadzurkway la ləv aṇak la tsəh ma?"
- <sup>32</sup>Tadà à kəslah iyaw à afik atà səla, ṅgaha afad adəd aya aw, adzà à ahəṇ titi.
- <sup>33</sup>Kiya uwaga azlaməna matapla uwana la kəslah iyaw la afik takədèd à ahəṇ la huma aṇa Yesu, tagòdàl: "Ndzer, kak Kona aṇa Zəzagəla."
- <sup>34</sup>Mok uwana tadà à uda la dərəv la abà kà, tabəz à makoray aṇa Genesaret à abà.
- <sup>35</sup>Bokuba uwana azladza la gudəṇ uwatà tasəl Yesu kà, tazàhà gay aṇa mas à waṇ aṇha la huđ gudəṇ gesina, ṅgaha tahamàhla azlaməna dūvats à waṇ gesina.
- <sup>36</sup>Tadəv kudà à Yesu kà azlaməna dūvats tabəz tetəvi kà madəbani amiyaka gay aṇa lukut aṇha pəra, ṅgaha dza gesina uwana adəbani kà awur ala la dūvats aṇha la abà.

## Mata 15

- <sup>1</sup>Azla Farisəya la azlaməna matapla mapəhay aṇa Zəzagəla tasà à waṇ la Urusalima, tasà à slaka Yesu la magòdàl:
- <sup>2</sup>"Kà mana azlaməna matapla la slaka aṇak kà takəs mapəhay aṇa azlababa madzidziga aw ma? Kà mana tapalàh ahəl bokuba uwana matapla gami apəhay kà mazuw tatak may aw ma?"
- <sup>3</sup>Yesu awùlla atà ala, agòd à atà: "Akul ma, kà mana kakəsaw mapəhay aṇa Zəzagəla aw, kanəfaw kà matapla aṇa gəl aṅkul ma?"
- <sup>4</sup>Tekeđik kà Zəzagəla agòd kà: 'Zləbà baba aṇak la iyà aṇak' ṅgaha 'Dza uwana apəh mawisiga lakəl aṇa baba aṇha baṇaw aṇa iyà aṇha kà azlayla mamətsay.'

- <sup>5</sup>Ama akul kà kagodfaw kà: 'Baŋa dza agodf à baba aŋha baŋaw à iyà aŋha: Humà tatak gulo, uwana gødàhla sləray kà, annaka gəslala vok aŋa mav à ka mazlak ka, uwaga kà tatak maf à ahəŋ gà kà aŋa Zəzagəla.'
- <sup>6</sup>Kiya uwaga kà, dza uwaga anəkudà kà mazlakay baba aŋha baŋaw iyà aŋha aya aw. Kiya uwaga à uwana kakəlaw mapəhay aŋa Zəzagəla ala, kà akul aŋa manəf matapla aŋa gəl aŋkul.
- <sup>7</sup>Akul azlaməna magolla dza, azlawla Yesayya masla mapəhal gay à ahəl apəh lakəl aŋkul, agòd:
- <sup>8</sup>'Azladza uwanay kà tazləb gi la paŋaw deyday pəra. Ama ləv aŋatà kà kərkər la gi.
- <sup>9</sup>Makədəf à ahəŋ uwana azladza uwanay takədəf à gi à ahəŋ kà deyday, Kà uwana atà tapəhla ala kà masəlay aŋa gəl aŋatà, uwana mapəhay aŋa dza pəra.“
- <sup>10</sup>La lig la ahəŋ Yesu azəl à maham à ahəŋ dza agòd à atà: "Tsənàwwəŋ, fəwwal sləm lela:
- <sup>11</sup>Tatak mazuway uwana ada à gay à awtày, la uwana adàh àlành à dza aw, ama uwana atsa à waŋ la gay la awtày, la uwana adàh àlành à dza.”
- <sup>12</sup>Azlaməna matapla aŋa Yesu tazà à vok à slaka aŋha, tagòdál: "Kasəl kà gay aŋak uwanay kà azin azla Farisəya à gəl kaykay aw takay?”
- <sup>13</sup>Awùlla à atà la magodfay: "Kela fofulo uwana Baba gulo uwana la zagəla la afik asləkà aw kà, adəgay mabəf à ahəŋ gà.
- <sup>14</sup>Sàkàw atà, atà azlaməna makas azlaguləf à ahəl. Ama baŋa akəs guləf anik à ahəl kà, atà səla nna tadəsokw à afək à abà.”
- <sup>15</sup>Piyer atsəval gay aŋha à gay, agòdál: "Sànula à uda à gay la gay la abà uwaga!”
- <sup>16</sup>Yesu agòd à atà: "Akul babay kà kaslaw matsən uwanay aw takay?”
- <sup>17</sup>Kasəlaw kà kəla tatak uwana ad à huď aŋa dza kà aguw à uda la godega aw takay?”
- <sup>18</sup>Ŋgaha babay kəla tatak uwana aguwa la gay aŋa dza kà asà à uda kà la ləv la tsəh, uwaga la uwana adàh àlành à dza à vok.
- <sup>19</sup>Kà uwana la ləv la tsəh la uwana madzugway mawisiga atsà à uda adàla dza à makəf dza à abà, à gəl gaw à abà, à mabila à abà, à limlim à abà, à gəl à abà, à fida à abà, ŋgaha à mapəh mawisiga lakəl aŋa azladza anik à abà babay.
- <sup>20</sup>Uwaga la uwana adàh àlành à dza à vok, ama mazuw tatak la kokudà mapal ahəl bokuba uwana manəbay aŋkul agòd kà, adàh àlành à dza à vok aw.”
- <sup>21</sup>Yesu atsizilla ala la abatà, ahəd à kutso uwana à abà nekwa la gudəŋ Tir la Sədon.
- <sup>22</sup>Mis Kananiya uwana adzà à ahəŋ la gudəŋ uwatà, asà à waŋ à slaka aŋha, adəval kudà: "Məŋga, Kona aŋa David, vok aham à ka kà gi. Dugu gulo la zagəla zagəla lakəl məŋga, uwana atərəbəŋ kaykay.”

- <sup>23</sup>Ama Yesu apakwà gay mæslæk aw. Kiya uwaga azlamæna matapla la slaka aᅇha tasà à waᅇ, tagòd à Yesu: " 'Dà aᅇak', gòd à mis uwaga, anəf anu la tsəh la gay."
- <sup>24</sup>Yesu awùlla à uda: "Gi kà gəga masləl gi à waᅇ kà, kà aᅇa azlatuwaᅇ mazàhla gà Isərayel pəra."
- <sup>25</sup>Ama mis asà à waᅇ, akədèd à ahəᅇ la huma aᅇha la magòdàl: "Məᅇga, kamkam zlàk à gi."
- <sup>26</sup>Yesu awùlla à uda, agòdàl: "Delga kà mazəb kaf aᅇa azlabəza kà maməl à azlakəda à ahəᅇ aw."
- <sup>27</sup>"Iyay nəma, Məᅇga", mis agòdàl. "La kità babay kà, azlakəda kà tatsatsəm mapətsəh pətsəhga uwana atəd kà azlaməᅇga à vədàh."
- <sup>28</sup>Kiya uwaga Yesu awulàlla, agòdàl: "Hay, mis, madiᅇal gəl à vok aᅇak kà məᅇga, tatak uwana kayahay kadàbəzal." Ņgaha dugu aᅇha awùr ala la kaslà uwatà.
- <sup>29</sup>Yesu adà aᅇha la abatà, ahəd à gay dərəv aᅇa Galili, à gudəᅇ à afik, adzà madzay la abatà.
- <sup>30</sup>Maham à ahəᅇ dza aᅇuvaw tasà à waᅇ à slaka aᅇha, tasàhla azlamæna dūvats à waᅇ: Azladeri, azlaguləf, azlamakalàh gà, azlabada, ᅇgaha azlatsəhay anik anik gesina babay. Tahamà atà à huma aᅇa Yesu, ᅇgaha awaràtala.
- <sup>31</sup>Ləv avàlàh à azladza à gay məᅇga, kà uwana tanəᅇà kà azlabada tavats gay, azlamakalàh gà tawàrla, azladeri tadày, ᅇgaha azlaguləf bay tanəᅇla. Tadzəka mazləb Zəzagəla aᅇa Isərayel.
- <sup>32</sup>Yesu azàl azlamæna matapla la slaka aᅇha ᅇgaha agòd à atà: "Kay, vok aham à gi kà azladza uwanay, kà uwana mahəᅇay makər atà la slaka gulo, ᅇgaha tatak may adadàv kà atà à gay, asa à gi maduw atà à gəl la may gà aw, kà uwana may adàkad atà asik à gəl, tadàtəd à ahəᅇ la tetəvi la ama."
- <sup>33</sup>Azlamæna matapla la slaka aᅇha tanàval à gay ala: "Lala məbəz tatak may məᅇga kà aᅇa azladza kat uwanay la kəsaf uwanay la abà la?"
- <sup>34</sup>Yesu anəv à atà gay ala, agòd à atà: "Kaf gay bərsew nna aga à akul la ahəl ma?" Tagòdàl: "Gay bərsew mədəf, la azlabəza kilfi ᅇuv ᅇuv."
- <sup>35</sup>"Kiya uwaga dzàhàw madzay", agòd à maham à ahəᅇ dza. Maham à ahəᅇ dza tadzàhà à madzay.
- <sup>36</sup>La lig la ahəᅇ ahəl kaf mədəf la azlabəza kilfi uwatà, "Kikay", agòd à Zəzagəla, akàlähəᅇn ala, ᅇgaha avà à azlamæna matapla la slaka aᅇha, kà atà aᅇa mavàh à maham à ahəᅇ dza.
- <sup>37</sup>Kəla uwabeyuwi aᅇatà azùw kəla may aᅇha. Matam à atà à ahəl gà kà, azlamæna matapla tahəmalla à gay à vok takosà mədəf aya.
- <sup>38</sup>Azlamæna mazuw tatak uwaga kà zil dəbow ufəd kokudà matugw azlamis la azlabəza.

<sup>39</sup>Mok uwana "Dàw wurwur", Yesu adagodiya à maham à ahəŋ dza kà, ahàd à kəslah iyaw à afik kà maday à kutso aŋa Magadan à abà.

## Mata 16

<sup>1</sup>Azla Farisəya la azla Sadukiya tazà à vok à slaka Yesu, kà mavavarəŋ, tanàv à Yesu kà mapəhatàla la nadzipo la abà kà ndzəda aŋha kà atsa à ahəŋ kà la Zəzagəla.

<sup>2</sup>Ama Yesu awùlla atà ala: "La matəf à ahəŋ afats kagodaw kà: 'Baŋa məlo, atəv à tsəh la matəf à ahəŋ afats kà, lebəŋ kà məl adəhəday', kagodaw.

<sup>3</sup>Ama la gay bebəŋ gə kà kagodaw: 'Iyaw adəsuway lakana, kà uwana zagəla atəv à tsəh'. Akul kà, kasəlaw mavəh məlo aŋa zagəla ala, ama kà mana kasəlaw mavəh masəlay aŋa zamana uwanay ala aw ma?

<sup>4</sup>Azladza aŋa zamana uwanay kà azlamaksafər, azlamabila la huma Zəzagəla aw, tanavay azlanadzipo, ama nadzipo la ahəŋ aw, say masəlay aŋa Yonas pəra". La lig la ahəŋ asək atà à ahəŋ, adà aŋha.

<sup>5</sup>Mok uwana azlaməna matapla taguway la gay dərəv à uda kà avikà à atà kà mazəb tatak may à ahəl.

<sup>6</sup>Kiya uwaga Yesu agòd à atà kà: "Dahàw haŋkəli, nəŋàwla gəl aŋkul kà tatak maməsl tatak ala aŋa azla Farisəya la azla Sadukiya."

<sup>7</sup>Azlaməna matapla tadzəka magoday kà atà kà atà: "Iyay, apəh kiya uwanay kà, kà uwana məzəb tatak may à ahəl aw", tagòd.

<sup>8</sup>Yesu atsənà madzugway aŋatà, agòd à atà: "Kà mana kavətsəw gay la tsəh ala kà akul à akul ma? Kà uwana tatak may aga à akul la ahəl aw takay? Madiŋal gel à vok aŋkul kà à tsəh ala.

<sup>9</sup>Tsəràh à lakana babay kà, katsənawwəŋ aw takay? Dzùgwàw lakəl aŋa kaf gay bərsew zlo uwana gətsəkəŋ ala kà aŋa azlazil dəbow zlo tsi. Kasəlaw ma takosà nna atəmal à tsəh ala ma?

<sup>10</sup>Dzùgwàw lakəl aŋa kaf mədəf uwana gətsəkəŋ ala kà aŋa azlazil dəbow ufaɖ aya tsi. Dgaha ma takosà nna atəmal à tsəh ala babay aya ma?

<sup>11</sup>Kà mana katsənəwwəŋ kà gəpəh à akul kà lakəl aŋa tatak may aw ma? Nəŋàwla gəl aŋkul kà tatak maməsl tatak ala aŋa azla Farisəya la azla Sadukiya."

<sup>12</sup>Kiya uwaga kà, azlaməna matapla tatsənəŋ kà apəh à atà kà lakəl aŋa manəŋla vok kà tatak maməsl tatak ala aw, ama kà mapəhla ala aŋa azla Farisəya la azla Sadukiya.

<sup>13</sup>Yesu ahàd à kutso uwana à abà nekwa la Zəsare aŋa Filip, anəv azlaməna matapla la slaka aŋha la gay ala: "Mana azladza tapəhay lakəl aŋa Kona aŋa dza ma?"

<sup>14</sup>Tawulàlla: "Azladza anik tagod kà: 'Kak Yuhana masla madəh batem', azlaanik tagod kà: 'Kak Eliya', ŋgaha azlaanik aya tagod kà: 'Kak Yereimiya, baŋaw masla mapəhal gay à ahəl anik' ", tagòd.

- <sup>15</sup>"Iyay zla, akul ma gi uwa kagodaw tak uwa?", Yesu agòd à atà.
- <sup>16</sup>Səmon Piyer awùlla à uda agòdàl: "Kak Kristu, Kona aña Zəzagəla uwana la sifa aña tsərəh à awtày."
- <sup>17</sup>Kiya uwaga Yesu agòdàl: "Kak la marabay, Səmon kona aña Yuhana, kà uwana dza asik à uwana apəhakala dziriga uwaga aw, ama Baba gulo uwana la zagəla la afik la uwana apəhakala uwaga.
- <sup>18</sup>Ŋgaha gi, gəgod à ka: Kak Piyer, uwana asal magodəy kà: Dzəgla, ŋgaha la dzəgla uwanay la afik la uwana gədəŋal maham à ahəŋ məna gay Zəzagəla gulo, bə mamətsay bay kà, adəslal à vok aw.
- <sup>19</sup>Gədàvə à ka tsəkurəm aña makoray Zəzagəla à ahəl: Uwana kawadəŋ la vədah adəgay mawadəŋga la zagəla, uwana kapələŋ ala la vədah adəgay mapələŋ ala gə la zagəla la afik babay."
- <sup>20</sup>La lig la ahəŋ Yesu afəh akur à azlaməna matapla à lig la slaka aŋha, kà atə aña mapəhay à dza anik kà masla Kristu aw.
- <sup>21</sup>Dagay la kaslā uwatə Yesu adzəkə matapla azlaməna matapla à slaka aŋha la dazuwaya la magodəy: "Azlayla kà vok kà, gəda à Urusalima, ŋgaha kà gi aña mas ŋgərpa məŋga la abatə la ahəl aña azlamasiga, la azlamadzahaga aña azlaməna mav tatak à Zəzagəla, ŋgaha aya la azlaməna mapəhla mapəhay ala. Tadəkəđ gi, ŋgaha la mahəny maməkər gədəwul à uda la mamətsay."
- <sup>22</sup>Kiya uwaga Piyer akəs à fəta à awtày ŋgaha adəl à gəl, agòdàl: "Zəzagəla anəŋla ka Sufəl, uwaga adəbəz à ka aw!"
- <sup>23</sup>Ama Yesu agolə vok, agòd à Piyer: "Zà à gi vok kərkər, kak seteni, kak masla matsalla à gi matekwid la tetəvi gulo la ama, kà uwana madzugway aŋak kà aña azladza vədah awkə uwana asə à Zəzagəla aw."
- <sup>24</sup>Ŋgaha la lig aña uwaga la ahəŋ Yesu agòd à azlaməna matapla la slaka aŋha: "Baŋa dza asal manəf gi kà, asak à maf sləm à gəl aŋha, ŋgaha azəb ahəf mamətsay aŋha, ŋgaha anəf gi.
- <sup>25</sup>Dza uwana asal matəf gəl aŋha, adəziŋ ala, ama dza uwana az gəl aŋha ala kà gi, adəbəl gəl aŋha.
- <sup>26</sup>Mana akəs vok à dza, uwana akor gudəŋ à vok gesina, ŋgaha masla adəz gəl ala la huma la gay bawbaw ma? Tatak la ahəŋ dza avəy kà masukwla sifa aŋha takay?
- <sup>27</sup>Kona aña dza adəsa à waŋ la mazləbay aña Baba aŋha la abə la azlamalika aŋha, ŋgaha adəpəlay à kəla dza la tsəhay madəhəŋ aŋha uwana adəhəhəŋ.
- <sup>28</sup>Hadəy, gəpəh à akul la dziriga: Azladza anik la tataka aŋkul la abə la abanay kà, tadəmətsay dəŋ aw, say baŋa tanəŋ Kona aña dza atsa à waŋ la makoray aŋha."

## Mata 17

- <sup>1</sup>Mahənyay mukwa la lig aŋha la ahəŋ, Yesu azəb Piyer, Yakuba ŋgaha Yuhana, deda aŋa Yakuba, ŋgaha adàla atà à gəl gudəŋ kərkər gə à afik, kokudà gəl aŋatà.
- <sup>2</sup>Aḅəḅla vok la huma yewdi aŋatà, huḍ adi aŋha aŋəràzlla atà à adi bokuba afats, ŋgaha lukut aŋha aùḍ təlla.
- <sup>3</sup>Ŋgaha azlaməna matapla makər uwaga tanəŋà Musa atà la Eliya, tavàts gay la Yesu.
- <sup>4</sup>Kiya uwaga Piyer agòḍ à Yesu: "Sufəl delga à uwana məga la abanay zla. Baŋa asa à ka gəts safsaf makər à abanay, tekula aŋak, tekula aŋa Musa, tekula aŋa Eliya."
- <sup>5</sup>La mok uwana Piyer aḅadmə, habaga akəl atà, mələs magol magodugodu à adi tabadamma, la habaga uwatà la abà kà kuda atsən la magodəy: "Uwanay kà bəzi gay ləv gulo, gərabay mənğa, mənğa kà masla. Tsəḅàw sləm à masla lela."
- <sup>6</sup>Mok uwana azlaməna matapla tatsən kuda uwaga kà, guba akəs atà, takədèḍ à ahəŋ la huma aŋa Yesu.
- <sup>7</sup>Yesu azà à vok à slaka aŋatà, ŋgaha aḅək atà à ahəl à gəl: "Tsizləwla guba akəs akul aw", agòḍ à atà.
- <sup>8</sup>Tawàlla gel à afik, ama tanəŋà dza anik aw say Yesu kokudà gel aŋha pəra.
- <sup>9</sup>Mok uwana tatsəh à ahəŋ la gudəŋ la afik, Yesu afahà à atà akur à lig: "Kapəhaw à dza lakəl aŋa tatak uwana kanəŋəwwəŋ tsərəh à mok uwana Kona aŋa dza adəwul à uda la mamətsay aw."
- <sup>10</sup>Ŋgaha kiya uwaga azlaməna matapla tanəv à Yesu: "Kà mana azlaməna mapəhla mapəhay ala tagòḍ kà: 'Eliya adàtsa à vok à waŋ ma?'"
- <sup>11</sup>Awùlla à atà ala: "La dziriga Eliya atsa à waŋ kà madəh tatak à ahəŋ la tetəvi aŋha.
- <sup>12</sup>Ama gəgòḍ à akul kà, Eliya kà adasa à waŋ dagay uwarà, ama azladza tasəl kà masla aw, tadəhələn à vok bokuba uwana asà à atà. Kiya uwaga babay tadəḍəhəŋ à Kona aŋa dza la gel aŋha."
- <sup>13</sup>Kiya uwaga à uwana azlaməna matapla tatsənəŋ à uwana apəh à atà gay lakəl aŋa Yuhana masla madəh batem.
- <sup>14</sup>Mok uwana tabəzay à slaka uwana maham à ahəŋ dza la ahəŋ, dza anik azà à vok à slaka Yesu akədèḍal à huma,
- <sup>15</sup>agòḍal: "Mənğa, vok aham à ka, kà bəzi gulo uwana la dūvats tatagà akasay, atərəḅ à ahəŋ kaykay, ŋgaha babay atadəh à akəl à abà, à iyaw à abà aya babay.
- <sup>16</sup>Gəsəlla à azlaməna matapla la slaka aŋak à waŋ, ama taslələ vok aŋa mawurəŋ ala aw."
- <sup>17</sup>Yesu agòḍ à atà: "Kayyà, akul azladza dzaŋdzəŋga, ŋgaha mawisiga, dagay mbà mədədz à ahəŋ anina ma? Tsərəh mbà, gədəbasahakulaŋ ma? Lagwa səwğəla bəzi uwatà à abanay!"

<sup>18</sup>La abatà Yesu aslèh mël à masasədòk mawisiga à gəl, ñgaha masasədòk mawisiga uwaga asà à uda la bəzi uwaga la abà, awùr ala la mok uwatà.

<sup>19</sup>La lig la ahəj, azlaməna matapla la slaka aᅇha tazà à vok à slaka aᅇha, tanàval à gay ala: "Kà mana məslalla vok, kà masəlla masasədòk mawisiga uwaga à uda aw ma?"

<sup>20</sup>Yesu agòd à atà: "Kà uwana madiᅇal gəl à vok aᅇkul asla aw! Haᅇay, la dziriga: Agay madiᅇal gel à vok aᅇkul à gay la ahəj bà kat tsəhay hamadz kà, naka kaslawwalla vok aᅇa magod à dadəgwal uwanay: 'Zà à vok la abanay!', ñgaha masla aslala vok aᅇa maz à vok. Tatak la ahəj adəd à akul gay à ahəj aw.

[<sup>21</sup>Ama say la madəv kuᅇa la makəs nəlay la uwana, dza aslala vok aᅇa masəla à tsəhay masasədòk mawisiga uwanay à uda!]"

<sup>22</sup>Vud tekula, mok uwana azlaməna matapla la slaka aᅇha tagà la kutso Galili, Yesu agòd à atà: "Kona aᅇa dza kà tadàvày à ahəl aᅇa azladza.

<sup>23</sup>Tadəkəᅇay, ama la mahənay mamakər adàwul à uda la mamətsay." Azlaməna matapla tadzà à ahəj la mazaw la gel la abà məᅇga, kà gay uwaga.

<sup>24</sup>Mok uwana Yesu la azlaməna matapla la slaka aᅇha tabəz à Kapernahum, azlaməna mazəb hadama aᅇa məᅇ gày Zəzagəla tazà à vok à slaka Piyer, kà manaval à gay ala: "Piyer, məᅇga aᅇkul ma apəl hadama aᅇa məᅇ gày Zəzagəla aw takay?"

<sup>25</sup>"Iyay, apəlay", Piyer agòᅇal. Mok uwana Piyer adà à gày la kay, Yesu adzəkà gay teraᅇa, agòᅇal: "Mana kadzugway ma Səmon? Azlauwana tapəlay hadama baᅇaw tapəl gəl à azlasufəl aᅇa gudəᅇ à vok uwanay uwà? Azlaməna gudəᅇ takay awma azlaməlok dza takay?"

<sup>26</sup>"Azlaməlok dza", Piyer agòᅇal. Yesu agòᅇal: "Tsa kiya uwaga kà, azlaməna gudəᅇ tapəlay aw.

<sup>27</sup>Ama kà mazin à atà à gəl aw kà, hād à dərəv à abà, ᅇadùw kodzar aᅇak à iyaw à abà, kilfi uwana kadàtsa à vok à makəsay kà, kadàpakw à gay aᅇha kadàᅇəzal gursu la paᅇaw aᅇha la awtày kà, kadàhəlay, ñgaha kadàᅇək à atà kà aᅇami anu səla."

## Mata 18

<sup>1</sup>La kaslà uwatà azlaməna matapla tazà à vok à slaka Yesu ñgaha tanàval: "Uwa, məᅇga gà la makoray Zəzagəla uwa?"

<sup>2</sup>Yesu azàla bəzi ᅇuv gà, atsizllatàᅇ à huma à gay,

<sup>3</sup>agòᅇ à atà: "Gəpəh à akul la dziriga: Baᅇa kapakaw bokuba bəzi ᅇuv gà uwanay aw kà, kadàdaw à makoray Zəzagəla aw.

<sup>4</sup>Dza uwana tələmmaga bokuba bəzi uwanay kà, masla la uwana dza məᅇga gà la makoray Zəzagəla.

<sup>5</sup>Ñgaha: Dza uwana akəs bəzi ᅇuv gà uwanay kà sləm gulo kà, akəs gi babay."



6"Dza uwana adukw mabəziga bəziga uwanay adiŋ gi gəl à vok, à tsakana à abà kà, ŋuləm kà aŋha kà tawadäl magol dzəgla à kuda, ŋgaha taduw à dərəv à abà.

7Kayyà ŋgərpa kà aŋa gudəŋ à vok uwanay, kà uwana aga la azlatatak uwana adala dza à tsakana à abà. Dza aslala vok kà madəf gay à uwaga à ahəŋ aw, ama ŋgərpa agay la dza uwana abiy uwaga à waŋ."

8"Baŋa ahàl aŋak baŋaw asik aŋak la uwana adala ka à tsakana à abà kà, nàtsàh à tsəh ala, wùtsla kərəkər la kak, ŋuləm kahàd à sifa dziriga à abà la ahàl tekula baŋaw la asik tekula, à kà kak aŋa mad à gày akàl uwana à abà amatsila aw la azlaahàl aŋak la azlaasik aŋak gesina aŋa koksikoksi.

9Baŋa kà yewdi aŋak la uwana adala ka à tsakana à abà kà, bəf à adi ala, məlla kərəkər, ŋuləm kahàd à sifa à abà ŋizliŋa ŋizliŋ la yewdi, kà kak aŋa mad à gày akàl uwana à abà amatsila aw aŋa koksikoksi la yewdi səla nna."

10"Dahàw haŋkəli kà mapəseway tekula aŋa azlabəza uwanay, kà uwana gəpəh à akul à vok à abà kà, la zagəla kà azlamalika aŋatà tatsizl à ahəŋ koksikoksi la huma aŋa Baba gulo, kà aŋatà."

[11Kà uwana Kona aŋa dza asa à waŋ kà mayàh mabəl azlauwana tazahla.]

12"Mana kadzugwaw à baŋa dza akor tuwaŋ dzim, ŋgaha tekula aŋatà azilà, asàk azladzik ladəga gəl aŋha ladəga gə uwanay la gudəŋ la afik, kà mad mayàh uwana azalà aw takay?

13Gəgod à akul baŋa adabəzal kà, arabay məŋga kaykay à kà azladzik ladəga gəl aŋha ladəga uwanay tazàh ala aw.

14Kiya uwaga babay, Baba aŋkul uwana la zagəla la afik kà, asal amiyaka tekula la tataka azlabəza gə uwaga la abà azila aw."

15"Baŋa deda aŋak adàhà à ka tsakana à vok, hād à slaka aŋha, pəh alla mawisiga aŋha, ama gəw kà akul səla səla pəra. Baŋa atsəb à ka sləm kà, kabəz deda aŋak aya.

16Ama baŋa akwes kà matsəb à ka sləm kà, zàl à dza tekula à tsəh baŋaw səla, kà mapəhay lakəl aŋa gay uwaga gesina, kà magay la sayda aŋa azladza səla la afik baŋaw aŋa azladza makər bokuba uwana matsetseray apəhay.

17Ama baŋa akweska matsəb à atà sləm kà, pəh uwaga à azlaməna madiŋal gəl à vok gesina; ŋgaha baŋa atsəna à atà aw kà, pəkàw dza uwaga ala bokuba dza uwana asəl Zəzagəla aw, baŋaw kiya masla mazəb hadàma."

18"La dziriga gəpəh à akul uwana kawadawwaŋ la vədàh, adəgay mawadəŋga la zagəla, uwana kapəlawwaŋ ala la vədàh, adəgay mapələŋ ala gə la zagəla la afik babay."

19"Iyay, gəpəh à akul babay aya kà, baŋa azladza səla la tataka aŋkul la abà, tatsən vok gay kà manavay amiyaka bə mana beymi la madəv kudà la abà kà, Baba gulo uwana la zagəla la afik adàvə à atà.

- 20 Kà uwana la slaka uwana azladza sèla banjaw makør taham gay à vok la slèm gulo kà, gi la tataka aṅatà la abà", Yesu agòd.
- 21 Kiya uwaga Piyer azà à vok à slaka Yesu, anàvalla gay ala: "Sufəl, asik nna gədàmatsiṅ à deda gulo ala à baṅa asàkiyà à madèhgəṅ mawisiga à vok aw ma? Tsəràh à asik mədəf ay?"
- 22 "Awaṅ", Yesu agòdàl: "Asik mədəf gəgod à ka aw, ama tsəràh à asik dzik mədəf asik mədəf.
- 23 Kiya uwaga à uwana məgagazləla makoray Zəzagəla la Sufəl anik uwana asal masəl madz à ahəṅ aṅa tatak aṅha la slaka magamza aṅha.
- 24 Mok uwana tadzàh madzay kà matugway kà, tasàlla dza uwana à waṅ anəfay la sili ləfu gà, azlamillion aṅuvaw la vok.
- 25 Dza uwatà agà la tatak kà mapəlla sili uwatà aw. Məṅga aṅha agod: Məduw masla ala bokuba mayà, ṅgaha maduw mis aṅha ala la azlabəza aṅha gesina, ṅgaha kəla tatak uwana akoray gesina, kà mapəlla goder uwana la vok gesina.
- 26 Magamza uwaga akədəf à ahəṅ la huma aṅa məṅga aṅha: 'Kamkam, bàsəgəṅ, gədàpəla à ka gesina', agòdàl.
- 27 Kiya uwaga vok aham à məṅga aṅha: Asàkalla goder aṅha uwaga la vok gesina, adùwal gəl, adà aṅha."
- 28 "Magamza maduwal gəl gà uwaga, asà à uda anəṅà dza uwana tadahàhà sləray atà sèla, uwana goder aṅha la vok aṅa sili akur akurga dzim. Uwana adanəṅəṅ kà, akès la kuda agòdàl: 'Pəl à gi goder gulo uwana aga à ka la vok.'
- 29 'Kamkam, kamkam', manalay aṅha akədəfàl à ahəṅ la magòdàl: 'Bàsəgəṅ, gədàpəla à ka goder aṅak gesina', agòdàl.
- 30 Ama akès aw, adùw à daṅay tsəràh à uwana apəl goder aṅha dàṅ.
- 31 Mok uwana azlamagamza anik tanəṅà uwaga apakà vok, tapàkàh ləv məṅga kà uwaga, ṅgaha tahàd, tapəh uwaga à məṅga aṅatà.
- 32 Kiya uwaga məṅga aṅatà azàla magamza uwaga. 'Kak magamza makəsafər gà, gi gəsàk à ka ala goder gulo uwana agà à ka la vok gesina, kà uwana kadəv à gi kudà aw takay?
- 33 Naka vok aham à ka kà manalay aṅak suwaṅ, bokuba uwana vok ahamà à gi kà kak aw takay?'
- 34 Məṅga uwaga apək ləv məṅga lakəl aṅha, adùw magamza uwaga à daṅay tsəràh à uwana apəlal goder aṅha gesina suwaṅ."
- 35 Kiya uwaga Yesu azàlən à gəl: "Baba gulo uwana la zagəla la afik adàdahakulaṅ kiya uwaga babay, à baṅa tekula aṅkul amatsàṅ à deda aṅha ala la ləv aṅha gesina aw zla!"

## Mata 19

- <sup>1</sup>Mok uwana Yesu adakəḏ gəl à gay uwaga, asà à uda la Galili kà mad à makoray aṅa Yahudiya uwana à abà la gay dərəv uda anik aṅa mukwà Urdun.
- <sup>2</sup>Maham à ahəṅ dza aṅuvaw tanəfà, ṅgaha awarà azlaməna dūvats aṅatà ala gesina.
- <sup>3</sup>Azla Farisəya anik tazà à vok à slaka Yesu kà matap masla, tanəval: "Hadəy, ma mapəhay gami avà tetəvi à dza kà makudək mis la kəla gay uwala beyli takay?"
- <sup>4</sup>Yesu awùlla à uda, agòḏ: "Kadzèṅàw uwana matsetseray apəhay aw takay? La madzəka Zəzagəla aṅəl zil atà la mis.
- <sup>5</sup>Kà uwaga à uwana zil adàsak à baba aṅha à ahəṅ, ṅgaha à iyà aṅha à ahəṅ kà madz à ahəṅ atà la mis aṅha, atà səla nna tadəgay vok tekula pəra.
- <sup>6</sup>Kiya uwaga kà, atà səla aya aw, atà tekula pəra, kità kà, dza avəh tatak uwana ala Zəzagəla adahamalla à atà ala gay à vok aw."
- <sup>7</sup>Azla Farisəya tanəv: "Kà mana zlà ma Musa agòḏ kà, zil av wakità mavəh vok ala à ahəl aṅa mis kà atà aṅa mavəhla, agòḏ zla ma?"
- <sup>8</sup>Yesu awùlla à uda: "Musa avà à akul tetəvi kà, kà uwana akul azladzaṅdzaṅ. Awkà dagay la madzəka kà, agà kiya uwanay aw.
- <sup>9</sup>Gəpəh à akul la dziriga: Baṅa dza akudək mis aṅha, tsa la mazaḅ zil la tsəh aw kà, masla kà adàda à gəl gaw, à baṅa azəḅ mis anik."
- <sup>10</sup>Azlaməna matapla la slaka aṅha tagòḏəl: "Iyay, baṅa gay aṅa zil atà la mis adagay kiya uwanay kà, ṅuləm mazəḅ mis aw pəra."
- <sup>11</sup>Yesu awùlla à atà ala: "Azladza gesina taslala vok aṅa makəs mapəhay uwanay aw, say azlauwana Zəzagəla avà à atà maslay pəra.
- <sup>12</sup>Tatak anik anik la ahəṅ à uwana adəḏ gay à dza à ahəṅ, kà mazəḅ mis dagay la mayyay. Azladza anik kà azladza la uwana tadəhatəṅ à vok, tadadəsləh atà, kà aṅa azladza anik babay kà tapak kiya uwanay kà makoray Zəzagəla. Dza uwana asla kà makəsay matapla uwanay kà, akəs!"
- <sup>13</sup>Azladza tasəhla azlabəza à slaka Yesu kà masla aṅa mabək à atà ahəl à gəl, ṅgaha kà madəv kudə lakəl aṅatà. Ama azlaməna matapla la slaka Yesu tavərə atà gay.
- <sup>14</sup>Yesu agòḏ à atà: "Sàkàw azlabəza ṅuv ṅuvga tasa à waṅ à slaka gulo, kavəraw atà gay aw, kà uwana makoray Zəzagəla kà aṅa azlatsəhay gə uwaga", agòḏ à atà.
- <sup>15</sup>Masla abək à atà ahəl à gəl ṅgaha adə aṅha la abatà.
- <sup>16</sup>Dza anik azà à vok à slaka Yesu, anəv: "Məṅga, mana à delga gəḏəhəṅ, kà gi aṅa mabəz sifa adəv à gay aw ma?"
- <sup>17</sup>Yesu agòḏəl: "Kà mana kanəv à gi lakəl aṅa delga ma? Dza tekula pəra, delga. Baṅa asa à ka, kà mabəz sifa adəv à gay aw kà, say kakəs mapəhay gesina."

- 18"Tsəhay gə uwala?", agòd à Yesu. Yesu agòdàl: "Kakədf dza aw, kada à gəl gaw aw, kad à gəl aw, kapəh mawisiga lakəl aṅa dza aw,
- 19sləkàw baba aṅak la iyà aṅak, wòyà masla magay aṅak bokuba uwana kawoya gəl aṅak."
- 20Bəzi kohana agòdàl: "Uwaga kà, dagay la bəziga la uwana gəkəs uwaga gesina. Mana gə à uwana gədehəṅ aya ma?"
- 21Yesu agòdàl: "Baṅa asa à ka aṅa magay sətaka kà, həd, dāw tatak uwana ala kakoray gesina, ṅgaha vāh sili gə à azlaməna kudā, kiya uwaga kadàbəz ləmana la zagəla, ṅgaha sà à waṅ kanəf gi!"
- 22Ama mok uwana bəzi kohana atsənà gay uwaga kà, adà aṅha la mazaw la gəl gə, kà uwana galepi gə kaykay.
- 23Kiya uwaga Yesu agòd à azlaməna matapla la slaka aṅha: "Gəpəh à akul la dziriga, zlazladā kà aṅa galepi kà mad à makoray Zəzagəla.
- 24Ḑgaha gəpəh à akul uwanay aya: Ḑuləm zlugumi aguw à uda la afək lepiri, à kà galepi aṅa mad à makoray Zəzagəla."
- 25Mok uwana azlaməna matapla la slaka aṅha tatsən gay uwaga kà, ləv avàlāh atà à gay kaykay la magodāy: "Tsa kiya uwanay zlà ma, uwa aslala vok aṅa maḃəlay uwa?"
- 26Yesu anərəz atà la magod à atà: "Zlazladā la slaka azladza, ama zlazladā la slaka Zəzagəla aw."
- 27Kiya uwaga Piyer agòdàl: "Tsənāṅ, anu mədasak à tatak à uwana ahəṅ məkòr gesina, ṅgaha kà manəf ka. Mana adəpaka vok kà aṅami ma?"
- 28Yesu agòd à atà: "Gəpəh à akul la dziriga kà: Mok uwana Kona aṅa dza adàdza madzay la kursi aṅa mazləḃay aṅha la afik kà, akul kulo gəl aṅha səla uwana kanəfaw gi, akul babay kà, kadàdzaw madzay la kursi la afik, kà madāh seriya à tsəhay kulo gəl aṅha səla aṅa Isərayel à gəl.
- 29Ḑgaha azlauwana gesina tasək azlagəy aṅatà à ahəṅ baṅaw azladedə aṅatà à ahəṅ, à azladedə aṅatà dəgam gə à ahəṅ, à azlababa aṅatà à ahəṅ, à azlaiyà aṅatà à ahəṅ, à azlabəza aṅatà à ahəṅ, à azlaàlāk aṅatà à ahəṅ kà gi, tadàḃəzal aṅuvaw asik dzim aya, ṅgaha la huma aya sifa uwana adəv à gay aw.
- 30Ama aṅuvaw azlaməna huma lagonay, tadəgay azlaməna lig gə, ṅgaha aṅuvaw azlaməna lig gə lagonay, tadəgay azlaməna huma."

## Mata 20

- 1"Aganay, gəgagazləla makoray Zəzagəla la dza uwana asà à uda la gay bebəṅ bəṅ, kà mahəl azlaməna sləray à guf aṅha à abà.
- 2Akəs kà mapəl à atà sili aṅa mavakay: Gursu tekula, ṅgaha asləl atà à guf à abà.

- <sup>3</sup>Asà à uda la zil gosila aya, anəṅà azladza anik tatsàzl à ahəṅ la vadavaday la afik kokudà sləray.
- <sup>4</sup>Agòḍ à atà: 'Akul babay, dāw à guf gulo à abà, gəḍəpəl akul bokuba uwana akəs à vok'.
- <sup>5</sup>Ḍgaha tahàd. Kona uwaga asà à uda la tataka afats, ṅgaha la afats dat magovagova gərewni delga aya, ṅgaha adəhàṅ kiya uwana adəhàṅ aya.
- <sup>6</sup>Ḍgaha asà à uda afats dābək agər à abà, abèz azladza anik à gəl uwana tatsàzl à ahəṅ la vadavaday la afik deyday aya. Anəv à atà à gay ala: 'Kà mana kavakaw à abanay kokudà madəh sləray ma?'
- <sup>7</sup>'Dza la ahəṅ ahəl anu aw', tagòḍal. Agòḍ à atà: 'Akul bay, dāw à guf gulo à abà!' “
- <sup>8</sup>"Mok uwana mokokhu adasa à waṅ, dza aṅa guf agòḍ à kohana aṅha: 'Zàl azlaməna sləray kà, pəl à atà sili aṅatà, dzəkà la azlaməna ligga, tsərah à azlauwana tasà à waṅ gay bebəṅ'.
- <sup>9</sup>Azlauwana tadzəkà sləray la afats dābək agər à abà tasà à waṅ, kəla uwabeyuwi aṅatà tabàz à gursu tekula tekula.
- <sup>10</sup>Mok uwana tazàl azlaməna mahəl atà teraṅa, tasà à waṅ, tadzùgw kà tadəbəzal kà aduwaṅ à azladza anik, tagòḍ. Ama kəla uwabeyuwi aṅatà tabàzà gursu tekula tekula pəra.
- <sup>11</sup>La mok uwana takasay kà takokòtəhà gəl lakəl aṅa dza aṅa guf.
- <sup>12</sup>Ḍgaha tagòḍ: 'Azlaməna sləray uwana tadəhà sləray kà sa tekula pəra kà, kapəl atà kà kalkal la aṅami uwana məbàs may vok aṅa mavakay lis à marabak ala ma?'
- <sup>13</sup>Ama dza aṅa guf awùlla à tekula aṅatà: 'Slawda gulo, gəvavarə ka aw. 'Aya', kagòḍ, kà madəh sləray aṅa mavakay lakəl aṅa gursu tekula aw takay?'
- <sup>14</sup>Kəs sili aṅak ṅgaha kà, dà aṅak. Asa à gi mav à dza uwana gəzəb la lig aṅak la ahəṅ bokuba aṅak suwaṅ.
- <sup>15</sup>Kagòḍ ma, gəslala vok aṅa madəhəṅ la sili gulo bokuba uwana asa à gi aw takay? A uwana kadəh à adi ma, kà uwana gəḍəhà delga takay?'
- <sup>16</sup>Kiya uwanay azlauwana azlaməna ligga tadəgay azlaməna huma, ṅgaha azlaməna huma tadəgay azlaməna ligga", Yesu agòḍ à atà.
- <sup>17</sup>Yesu adà à Urusalima à afik. Ahəl azlaməna matapla aṅha kulo gəl aṅha səla uwaga à fəta à awtəy, ṅgaha apəh à atà gay la asik lakəl:
- <sup>18</sup>"Tsənəwwəṅ, mēda à Urusalima lagwa, ṅgaha tadəv Kona aṅa dza à ahəl aṅa azlamadzahaga aṅa azlaməna makad tatak à Zəzagəla la ahəl aṅa azlaməna mapəhla mapəhay ala. Tadədukwa ala mamətsay à gəl.

- <sup>19</sup>Ŋgaha tadàvày à ahàl aṅa azladza uwana azla Yahudiya aw, atà tadàkèdaslal, tadàzlabay la kurpi ṅgaha tadàtataslay à ahàf à adi. Ama la mahəny makər kà, adàwul à uda la mamətsay.”
- <sup>20</sup>Kiya uwaga iyà aṅa azlabəza aṅa Zebede azà à vok à slaka Yesu la azlabəza aṅha, akədèf à huma aṅha kà manaval tatak.
- <sup>21</sup>"Mana asa à ka ma?", Yesu agòdàl. Agòd: "Và à gi tetəvi, kà azlabəza gulo səla uwanay kà, tadàdzah madzay tekula la ahàl kaf aṅak ṅgaha anik la ahàl gudzay aṅak lakəl la makoray aṅak!"
- <sup>22</sup>"Kasəlaw tatak uwana kanavaw aw", Yesu agòd, "Kaslawwalla vok kà mas tatak à uda la kətsaw ṅgərpa uwana la abà gədàsay ay?" "Məslala vok", tagòdàl.
- <sup>23</sup>"Ndzer kadàsaw la kətsaw ṅgərpa gulo", Yesu agòd à atà. "Ama la ahàl gulo kà magodəy lakəl aṅa madz madzay la slaka gulo, anik la ahàl kaf, anik la ahàl gudzay aw. Slaka uwatà kà, kà aṅa azlauwana Baba gulo adàhatəṅ à ahəṅ pəra.”
- <sup>24</sup>Uwana azlaməna matapla kulo anik uwanay tatsənà uwaga kà, taṅoṅuz lakəl aṅa azladedə səla uwanay.
- <sup>25</sup>Kiya uwaga Yesu azàla atà gesina, agòd: "Kasəlaw kà azlasufəl aṅa gudəṅ à vok tadàh gasa à azladza à gəl, ṅgaha azlaməṅga tapəh la ndzəda aṅatà ala.
- <sup>26</sup>Ama uwaga kà apaka vok kiya uwaga la tataka aṅkul la abà aw, baṅa tekula la tataka aṅkul asal magay məṅga kà, say agay masla mazəb dagum à azladza anik,
- <sup>27</sup>ṅgaha baṅa tekula la tataka aṅkul asal magay masla huma, say agay mayà aṅkul.
- <sup>28</sup>Amiyaka gi Kona aṅa dza kà, gəsà à waṅ kà azladza aṅa mazlək gi aw, ama gəsà à waṅ kà mazlək azladza, la mav sifa gulo bokuba tatak mapəlla gəl à ahəṅ aṅa azladza aṅuvaw.”
- <sup>29</sup>Mok uwana tasà à uda la gudəṅ Yeriko la abà, maham à ahəṅ dza aṅuvaw tanəfà Yesu.
- <sup>30</sup>Azlaguləf səla la ahəṅ tadzàh madzay la gay tetəvi tatsənəṅ kà Yesu adà à awtəy la abatà, tadzəkà mawiyay: "Məṅga, Kona aṅa David, vok aham à ka kà anu!"
- <sup>31</sup>Maham à ahəṅ dza taslāh à atà məl à gəl la magodəy: "Dzàw à ahəṅ titi!", ama tazə kuda à zagəla la mawiyay aya kaykay: "Məṅga, Kona aṅa David, vok aham à ka kà anu!"
- <sup>32</sup>Yesu atsizilla à ahəṅ, azàl atà, ṅgaha anəv à atà gay ala: "Mana asa à akul, kà gədàhakulaṅ ma?"
- <sup>33</sup>Tagòdàl: "Məṅga, kà yewdi gami aṅa manəṅla.”
- <sup>34</sup>Vok ahamà à Yesu, adəbanì yewdi aṅatà; katskats azladza səla uwaga tanəṅ ala, ṅgaha tanəfà Yesu.

## Mata 21

<sup>1</sup>Kiya uwaga mok uwana tazlâbêz kà Urusalima la gudəŋ Betfaze, la gudəŋ kuvu la afik, Yesu aslêl azlaməna matapla la slaka aŋha səla à huma à gay.

<sup>2</sup>Agòd' à atà: "Dàw à gudəŋ uwatây à abà la huma aŋkul, kadàbəzaw à ziwŋŋu à gəl mawadəŋ à ahəŋ gə la bəzi aŋha, pəlâw masla, ŋgaha sàwŋgəla à waŋ à abanay.

<sup>3</sup>Baŋa dza apəh à akul gay 'Kà mana mi kà', gòdâwwal kà, Sufəl awoyəŋ, ŋgaha tadàsak à akul aŋa masəlla à waŋ."

<sup>4</sup>Uwaga apakà vok kà aŋa magəď à afik aŋa gay aŋa masla mapəhal gay à ahəl aŋa mapəh à azladza uwana agòd':

<sup>5</sup>Gòdâw à azlaməna madz à ahəŋ la Səyon kà: Nəŋəŋ Sufəl aŋak atsa à waŋ à slaka aŋak La masləkaway məŋga la ziwŋŋu la afik, ŋgaha la bəzi ziwŋŋu la afik.'

<sup>6</sup>Azlaməna matapla tadəhəŋ bokuba uwana apəh à atà.

<sup>7</sup>Tas

<sup>1</sup>əlla ziwŋŋu à waŋ la bəzi aŋha, ŋgaha tadawal azladebdebi aŋatà à lig. La lig la ahəŋ Yesu adzà à afik.

<sup>8</sup>Maham à ahəŋ dza aŋuvaw tadawal azladebdebi aŋatà à tetəvi à ama, ŋgaha azlaanik tasläh babasl aŋa azlaahəf, à tetəvi à ama kà mazləb masla.

<sup>9</sup>Azladza uwana taguwà à huma aŋa Yesu tawiyà la marabay: "Mazləbay agay la Kona aŋa David, ŋgaha Zəzagəla apis gay à dza uwana à vok, atsa à waŋ la sləm aŋa Sufəl Zəzagəla. Mazləbay agay la Zəzagəla uwana kərkər la zagəla la afik!"

<sup>10</sup>Mok uwana adabəz à Urusalima à abà, azladza gudəŋ uwaga gesina tavədzəh ala. Tanəv à vok: "Uwa à dza uwaga uwa?"

<sup>11</sup>"Masla mapəhal gay à ahəl Yesu, zil Nazaret, uwana la Galili", maham à ahəŋ dza agòd'.

<sup>12</sup>Uwana tabəz à Urusalima, Yesu ahəd à məŋ gəy Zəzagəla à agu, ŋgaha akudəkəh azlaməna madaw tatak ala la azlaməna masukw tatak à lag la məŋ gəy Zəzagəla uwatà la aku. Adakwà table aŋa azlaməna mabad' sili à ahəŋ, ŋgaha la azlakursi aŋa azlaməna madaw habakoku ala,

<sup>13</sup>agòd' à atà: "Tatsetsèr à wakità Zəzagəla à abà kà: 'Gəy gulo kà tazallala kà gəy madəv kudà. Ama akul kà, kadapakawwaŋ ala kà katsakur aŋa azlaməna à gəl'."

<sup>14</sup>Kiya uwaga azlaguləf la azladeri tazà à vok à slaka aŋha la məŋ gəy Zəzagəla la aku, ŋgaha awarà atà ala.

<sup>15</sup>Azlamadzahaga aŋa azlaməna mav tatak à Zəzagəla, la azlaməna mapəhla mapəhay ala kà, gəl akəd' atà à vok à mok uwana tanəŋà tatak uwana adəhəŋ kà, la mawiyay aŋa azlabəza uwana la məŋ gəy Zəzagəla la aku: "Mazləbay agay la Kona aŋa David", tawiyà.

- 16**Kiya uwaga tagòd à Yesu: "Katsəna uwana tapəhay ay?" "Iyay, gətsənaŋ", Yesu agòd à atà. "Akul kà, kadzə̀nàw uwana la matsetseray la abà aw ay? A uwana agòd kà: Azlabəza la azlabəza vərna tazləbay, aw takay?"
- 17**Ŋgaha asà à uda, asàk à atà à ahəŋ kà mad à Betaniya kà mahən à abatà.
- 18**La bəŋ, mok uwana awùl à hudf gudəŋ à abà, may akəs Yesu.
- 19**Anəŋà gudəv la gay tetəvi, azà à vok à tsəh aŋha, ama mayyay la vok aw, say babasl pəra. Masla agòd à gudəv: "Tetuwa kadəyyay aya aw!" La kirim yewdi gudəv uwaga agùl à afik, saŋlatta.
- 20**Azlaməna matapla la slaka aŋha tanəŋàŋ, ŋgaha ləv avàl à atà à gay kaykay, tanàv à Yesu: "Kakay gudəv uwanay adagula saŋlatta la kirim yewdi ma?"
- 21**Yesu agòd à atà: "Gəpəh à akul la dziriga: Agay madiŋal gəl à vok aŋkul la ahəŋ, ŋgaha katsaw gay la ləv aŋkul la tsəh aw kà, naka akul kà, kadəhawwaŋ uwanay gəfəhàŋ à gudəv uwanay pəra aw, naka kaslawal à vok aŋa magodəy à dadəgwal uwanay: "Bəd à vok la abanay, həd, katsà gəl à dərəv à abà!" Kà uwaga apakà vok, hadəy.
- 22**Baŋa kadiŋawwal gəl à vok kà tatak uwana kanavaw gesina la madəv kudə la abà kà, kadəbəzawwal."
- 23**Yesu ahəd à məŋ gəy Zəzagəla à agu, ŋgaha adzəkà matapla tatak. Azlamadzahaga aŋa azlaməna mav tatak à Zəzagəla la azlamasiga aŋa azla Yahudiya tazà à vok à slaka aŋha, ŋgaha tagòdàl: "La tetəvi ma uwala kadəh azlatatak uwanay la? Uwa avà à ka ndzədə uwanay uwa?"
- 24**Yesu agòd à atà: "Gi babay lagwa kà gənav akul manavay tekula, baŋa kawulaw gi ala manavay uwanay kà, gədəpəhakulla ndzədə uwana gəfəhləŋ tatak uwanay.
- 25**Uwa à uwana asləl Yuhana masla madəh batem à waŋ uwa? Zəzagəla awma azladza takay?" Ama tadzəkà mabay vok gay la tataka aŋatà la abà, ŋgaha tagòd: "Baŋa məgod kà Zəzagəla la uwana asləl à waŋ, adəgod à anu: 'Kà mana zlə ma kadiŋaw gəl à masla à vok aw ma?"
- 26**Ama baŋa məgod: 'Azladza la uwana tasləl à waŋ', bay kà, guba aza à anu kà maham à ahəŋ dza, kà uwana azladza gesina tasəl kà masla mapəhal gay à ahàl aŋa Zəzagəla kà mapəhay à azladza."
- 27**Kiya uwaga tawùlla à Yesu: "Məsəl aw!". Ŋgaha agòd à atà: "Tsa kətà kà, gi babay kà, gəpəh à akul la ndzədə uwana gəfəhla tatak uwanay babay suwaŋ aw!"
- 28**Yesu adà à huma à gay la mapəhay: "Mana kadzugwaw lakəl aŋa uwanay ma? Dza anik agə la azlabəza səla. Adà à slaka matera, agòdàl: 'Bəzi gulo, həd, kadəfəha sləray la guf la abà lakana.'
- 29**'Gəday aw', agòdàl, ama zwek la huma la gay kà, abədla madzugway aŋha, ahəd, adəfəhà sləray.



- <sup>30</sup>Baba ahàd à slaka aṅa anik, apèhal. Masla kà, 'Ayà, Baba', agòdàl, ama ahàd aw.
- <sup>31</sup>Uwa lala tataka aṅatà la abà adàhà uwana asà à Baba uwa?" "Matera", tagòdàl. Yesu agòd à atà: "Gèpèh à akul la dziriga: Azlamèna mazəb hadama, la azlamèna mazaḅ zil tadàtsa à vok à makoray Zəzagəla kà akul,
- <sup>32</sup>kà uwana Yuhana asà à waṅ à slaka aṅkul la mapəhakulla tetəvi dziriga, ama kadiṅawwal gəl à vok aw, kakwesawka. Ama azlamèna mazəb hadama la azlamèna mazaḅ zil kà, takəs, tadiṅal gəl à vok, bà amiyaka tanəṅà uwaga dadàṅ aw. Ama akul kà, kanəṅaw uwaga, ama kabəḁawla vok dagay la huḁ gà kà madiṅ gəl à masla à vok aw!"
- <sup>33</sup>"Tsəbàw sləm à gay la gay la abà anik. Zil gày anik la ahəṅ, atsəb guf matavəruk, akəsàl zlagam à adi, ṅgaha alà afək, kà makudits iyaw aṅa mayyay ahàf aṅha à abà, ṅgaha aṅàl gày mad à afik maday, kà aṅa masla manəṅla guf, asàkla guf uwatà à azlamèna sləray la ahàl. Dgaha adà aṅha à mauguzahay kərkər.
- <sup>34</sup>Mok uwana təla mahəṅay tatak adaslay, asləl azlamagamza aṅha à slaka azlamèna sləray guf kà mazəḅal humà mahəṅay aṅa tatak aṅha.
- <sup>35</sup>Ama azlamèna sləray takəs à atà, tazlàḅ anik, takəḁ anik, tatsàh anik la akur.
- <sup>36</sup>Ama masla guf asləl azlamagamza anik aya, uwana atà dəṅ kà azlauwana uwarà, ama azlamèna sləray guf tadàhà à atà à vok bokuba uwana tadàhàṅ azlamatera à vok.
- <sup>37</sup>La lig aṅa uwaga la ahəṅ, asləl bəzi aṅa huḁ aṅha, agòd kà: 'Tadàsləkaw masla'.
- <sup>38</sup>Ama mok uwana azlamèna sləray guf tanəṅ bəzi aṅha, tagòd kà atà kà atà: 'Yewwa, masla la uwana adàgay dza aṅa tatak bawbaw. Məkəḁ masla, ṅgaha mədàbədàl à gəl!' "
- <sup>39</sup>Takəs, tadùw à uda la guf la abà, takəḁ."
- <sup>40</sup>Yesu anàv: "Iyay zla, baṅa dza aṅa guf adàsa à waṅ, ma mana adàḁəhəṅ la azlamèna sləray uwaga ma?"
- <sup>41</sup>Tagòdàl: "Adàkad azlamèna sləray mawisiga uwaga à gay, ṅgaha adàvə guf à ahàl aṅa azlamèna sləray anik, uwana tadàvəhal mahəṅay aṅa tatak aṅha la mok uwana asàl."
- <sup>42</sup>"Iyay", Yesu agòd à atà: "Kadzèṅàw didi à uwana matsetseray apəhay aw takay? 'Akur uwana azlamèna maṅal gày taməl ala kà, Masla la uwana adapak akur mawad gày, Kiya uwaga la uwana Sufəl adəhəṅ, Dgaha uwaga kà akəsa à vok kà aṅami kà manəṅ uwaga!'"
- <sup>43</sup>Kà uwaga Yesu azàlāṅ à gəl: "Haday, la dziriga, gèpèh à akul, makoray Zəzagəla adàgay mazəḅakullaṅ ala gà, kà mav à tsəhay anik uwana adàvə mayyay à məṅga aṅha.
- [<sup>44</sup>Kəla dza uwana atəḁ à akur uwanay à afik kà, adàkalahla. Ama baṅa akur la uwana atəḁ à dza à gəl kà aslèrəḁəṅ ala kədəṅna.]"

<sup>45</sup>Azlamadzahaga aṅa azlaməna mav tatak à Zəzagəla la azla Farisəya tatsənà gay la gay la abà uwaga kà Yesu kà apəhay kà lakəl aṅatà.

<sup>46</sup>Kiya uwaga tayàh dabaray kà makəsay, ama guba akəs atà kà maham à ahəṅ dza, uwana tapakà Yesu ala kà masla mapəhal gay à ahəl kà mapəhla à azladza.

## Mata 22

<sup>1</sup>Yesu apəhatàla la gay la gay la abà, agòd' à atà:

<sup>2</sup>"Aganay tatak uwana məgagazləla la makoray aṅa Zəzagəla: Sufəl anik atà magol tatak may kà mazəb mis aṅa bəzi aṅha.

<sup>3</sup>Asləl azlamagamza aṅha kà mazallàh azladza uwana azàllàh atà kà aṅa tatak may uwaga, ama asà à atà mas à waṅ aw.

<sup>4</sup>Asləl azlaanik aya, la mapəhay uwanay la ahəl: 'Gòdàw à azladza uwana gəzàllàh atà kà: Tatak may gulo kà adahənay adagay, azlakokur gulo, la azlatatak gulo magag seyga gədakadəy gesina, adahənay. Sàw à waṅ à tatak may mazəb mis à gəl!'

<sup>5</sup>Ama azlaməna mazala atà kà, tafəl sləm aw, tadəhəṅ à atà à azlaudəra aṅatà anik anik. Anik ahəd à guf aṅha à abà, anik bay à matsakalay aṅha.

<sup>6</sup>Azlaanik takəs azlamagamza, tatəwəbàhà atà, ṅaha takəd' azlaanik.

<sup>7</sup>Kiya uwaga Sufəl apək ləv məṅga, asləl azlaslodzi aṅha kà makəd' atà la mabəbəh gudəṅ aṅatà à gay la akəl.

<sup>8</sup>Ḍgaha agòd' à azlamagamza aṅha: 'Tatak may aṅa mazəb mis kà adagay nekwa, ama azlaməna mazala atà gə kà tadəbəzal aw.

<sup>9</sup>Lagwa kà, dàw à azlabəza tetəvi à ama gesina, uguzàhàw, sàwla à waṅ kəla dza uwana kabəzawwal à tatak may à gəl.'

<sup>10</sup>Azlamagamza tahəd à azlabəza tetəvi à ama, ṅaha tahamà gay azlauwana à vok tabəzal gesina, azlamawisiga, la azladelga ṅaha kiya uwaga à uwana gəy madəvaday ahənà ala la dza."

<sup>11</sup>"La lig la ahəṅ Sufəl asà à gəy kà manəwəz azladza uwana tazàllàh atà, ṅaha anəṅà dza uwana lukut mazəb mis la vok aw.

<sup>12</sup>Sufəl agòd'al: 'Slawda gulo, kakay kaslà kà mas à gəy uwanay à agu, kokudà lukut mazəb mis la vok ma?' Ama dza uwaga aslàla vok kà mabadma aya aw.

<sup>13</sup>Ḍgaha Sufəl agòd' à azlamagamza aṅha: 'Tsəwəkàw azlaahəl aṅha la azlaasik aṅha ṅaha dūwàw à mələs à abà la uda, la abatà la uwana mawiyay la mapəd' slid' la tsəh ala la ahəṅ,

<sup>14</sup>kà à uwana azlaməna mazal atà gə aṅuvaw, ama azlaməna matsatsamani atà gə kà dəṅ aw'."

- <sup>15</sup>Azla Farisøya tahàd, takès sawaray kà atà aṅa masəlayla: "Kakay à uwana məslala vok aṅa məbəzal à tsəh la manavay mi?", tagòd.
- <sup>16</sup>Tasləl azlakohana aṅatà la azlaanik la tataka maham à ahəṅ matsən vok gay aṅa Herod la abà, tahàd kà magod à Yesu: "Məṅga, məsəl kà dziriga la uwana katapla kà azladza aṅa madz à ahəṅ uwana asà à Zəzagəla, kurit yewdi agod à ka, kà madəhəṅ aṅa azladza uwana tadzugway aw, kà uwana kadāh tatak la mahoy adi uwana dza adəhəṅ aw.
- <sup>17</sup>Lagwa kà: Pəh à anu uwana kadzugw lakəl aṅa uwanay zla: Mapəhay gami ma, avà à anu tetəvi kà mapəl hadama à məṅ sufəl aṅa azla Rom takay, awma kakay ma?"
- <sup>18</sup>Ama Yesu asəl madzugway mawisiga aṅatà, agòd à atà: "Azlaməna magolla dza, kà mana asa à akul aṅa məbəz gi à tsəh ma?"
- <sup>19</sup>Pəhàw gi ala sili uwaga kapəlawla hadama tsi!" Tapəhalla akur sili.
- <sup>20</sup>Ḑgaha Yesu anàv à atà: "Gəl la sləm uwanay ma aṅa uwa la sili uwanay la afik uwa?"
- <sup>21</sup>"Aṅa məṅ sufəl", tagòdɔl. Kiya uwaga Yesu agòd à atà: "Kità kà, pəlàw à məṅ sufəl Zəsar tatak uwana aṅha, ṅgaha pəlàw à Zəzagəla uwana aṅha suwaṅ!"
- <sup>22</sup>Mok uwana tatsən mawulla à uda aṅa Yesu kiya uwaga, ləv avàlàh à atà à gay kayak, tasàkal, tadà aṅatà.
- <sup>23</sup>La mavakay uwatà, azla Sadukiya, atà uwana mawul à uda la mamətsay la ahəṅ aw tagod, tasà à waṅ à slaka Yesu, kà manaval.
- <sup>24</sup>Tanàval: "Məṅga, à aganay uwana Musa apəh: Baṅa dza aməts aṅa mis ala kokudà məbəz bəzi kà, say deda aṅha azəb à uda la gəy kudà ṅgaha atsilla tsəhay aṅha ala.
- <sup>25</sup>Azladza la ahəṅ, atà mədəf, la azladedda aṅatà la tataka gami la abà la abanay. Magolga azəb mis, amətsal à kəl ala kokudà məbəzal bəzi, ṅgaha asàkla mis kudà à deda aṅha.
- <sup>26</sup>Apakà vok kalkal la uwaga la deda masəla bay, ṅgaha kiya uwaga la mamakər aya, ṅgaha kà mədəf nna gesina apakà vok kiya uwaga.
- <sup>27</sup>La lig aṅatà la ahəṅ gesina kà, mis aməts.
- <sup>28</sup>La vud uwana azlaməna mazimnekid tadàwul à uda ma, atà mədəf uwaga ma mis adəgay ma aṅa uwa? Kà uwana gesina aṅatà kà, tazəb?"
- <sup>29</sup>Yesu agòd à atà: "Kazawla, haday zla, kà uwana kasəlaw bə amiyaka matsəterayga, bə amiyaka ndzəfà aṅa Zəzagəla aw.
- <sup>30</sup>Kà uwana mok uwana azladza tadàwul à uda la mamətsay kà, mazəb vok adəgay la ahəṅ aya aw. Tadàdza à ahəṅ kà bokuba azlamalika uwana la zagəla.
- <sup>31</sup>Lakəl aṅa azlamazimnekid uwana tadàwul à uda la mamətsay kà kadzeṅaw à uwana Zəzagəla apəh lakəl aṅha aw ay? Agòd:

<sup>32</sup>'Gi Zəzagəla aña Abəraham, gi Zəzagəla aña Isak, gi Zəzagəla aña Yakuba' Zəzagəla azələn̄ à gəl Zəzagəla kà aña azladza uwana la sifa, kà aña azlamazimnekid aw."

<sup>33</sup>Maham à ahəŋ dza uwana tatsənà uwaga kà, ləv avələh à atà à gay mən̄ga kà matapla aña.

<sup>34</sup>Mok uwana azla Farisəya tatsənən̄ Yesu adaməl gəl à azla Sadukiya à ahəŋ la gay kà, tahamà gay à vok.

<sup>35</sup>Ŋgaha tekula aña tətə uwana atapla mapəhay à azladza asəl kà makəsəl asik la tsəh ala, anəval à gay ala:

<sup>36</sup>"Mən̄ga, mapəhay gami ma uwala à uwana aduwa azlaanik gesina ala?"

<sup>37</sup>Yesu agòdəl: "Wòyà Sufəl Zəzagəla aña k la ləv aña k gesina, la sifa aña k gesina, la haŋkəli aña k gesina, ŋgaha la masasədok aña k gesina bay.

<sup>38</sup>Uwaga la uwana mapəhay uwana aduwa azlaanik.

<sup>39</sup>Ŋgaha aganay masəla aña uwana tazlā à gay kalakal: Wòyà masla magay aña k bokuba gəl aña k.

<sup>40</sup>Mapəhay aña Musa la azlamatapla aña azlaməna mapəh à atà gay à ahəl gesina tapəh kà lakəl aña mapəhay səla uwaga."

<sup>41</sup>Uwana azla Farisəya tahamà gay à vok kà, Yesu anavà à atà gay uwanay:

<sup>42</sup>"Mana kadzugwaw lakəl aña Kristu ma? Aga ma mayyi à tsəh ala ma aña uwa?" "Mayyi à tsəh ala aña David!", tagòdəl.

<sup>43</sup>Yesu agòd' à atà: "Kakay zlə ma, David uwana masasədok Zəzagəla aguwa la masla la abà, aslāla vok azəlal Sufəl ma? Kà uwana David agòd':

<sup>44</sup>'Sufəl Zəzagəla agòd' à Sufəl gulo: Dza madzay la ahəl kaf gulo lakəl, Tsərəh à uwana gəbək à ka azlaməna məzam aña k à tsəh asik.'

<sup>45</sup>Iyay zla, baña David azəlal ala Sufəl gulo ma, kakay Kristu apək kona aña ma?"

<sup>46</sup>Dza la ahəŋ aslāla vok kà mawulla gay uwaga à uda amiyaka tekula aw, ŋgaha dagay la mavakay uwatà, dza aslāla vok kà manaval manavay aya aw.

## Mata 23

<sup>1</sup>La lig la ahəŋ, Yesu agolà à huma à slaka maham à ahəŋ dza la azlaməna matapla la slaka aña

<sup>2</sup>agòd' à atà: "Azlaməna mapəhla mapəhay ala la azla Farisəya, sləray aña tətə kà mapəhla mapəhay aña Musa à azladza.

<sup>3</sup>Kiya uwaga kà, kəsàw gay aña tətə, ŋgaha hənàw uwana ala tapəh à akul gesina, ama kadəhawwan̄ bokuba madəhəŋ aña tətə aw, kà uwana atà takəs uwana tatapla à azladza anik aw.

- <sup>4</sup>Tawàdàh tatak mahanayga kà mafàh à azladza anik à gəl, ama atà kà takəs aw, amiyaka bà gay gəl ahàl aṅatà babay kà tadəbəlani aw.
- <sup>5</sup>Ama tadàh sləray aṅatà gesina kà la huma yewdi aṅa azladza pəra. Tawàdàhla azlalaya à vok la azlagabaga bəzləh bəzləhga à vok, uwana matsetser à ahàl azlamapəhay anik anik aṅa wakità Zəzagəla à adi, ṅgaha la azlagwazazuv duksuffa la azlalukut aṅatà la gay.
- <sup>6</sup>Asa à atà kà azlaslaka teraṅa la azlagəy madəv kufa la aku, la azlatatak may lakəl kà manəṅ à atà aṅa azladza.
- <sup>7</sup>Asa à atà bay kà azladza tadàhaha à atà 'Ayyi' la azlavadavaday la afik, la mazalàhatàla azlaməṅga.
- <sup>8</sup>Ama akul kà, kayahaw mazalakulla azlaməṅga aw, kà uwana akul gesina kà akul azladedə, ṅgaha məṅga aṅkul kà tekula ahàl pəra.
- <sup>9</sup>Kazalawla Baba à dza asik babay aw, kà uwana akul kà Baba aṅkul kà tekula à ahàl pəra, masla uwana la zagəla la afik.
- <sup>10</sup>Ḍgaha aya kayahaw mazalakulla sufəl babay aw, kà uwana Sufəl aṅkul kà tekula à ahàl pəra, uwaga kà Kristu.
- <sup>11</sup>Mazəb gəl gə aṅkul kà, agà kà bokuba masla mazəb à akul dogum.
- <sup>12</sup>Dza uwana azigəṅ gəl kà tadàwulla à vədàh, ṅgaha dza uwana awulla gəl à vədàh kà, tazigəṅəṅ.”
- <sup>13</sup>”Ḍgərpa agay la akul, akul azlaməna matapla mapəhay, la akul azla Farisəya. Akul azlaməna magolla dza. Katsakaw à gamagəy aṅa makoray Zəzagəla à ama kà azladza. Tekedik kà, akul la gəl aṅkul kà asa à akul mad à gəy aw, azlauwana tayàh mad à gəy bay kavàw à atà tetəvi aw.”
- [<sup>14</sup>”Ḍgərpa agay la akul, akul azlaməna matapla mapəhay la akul azla Farisəya, akul azlaməna magolla dza. Kazawaw azlamis kufa à uda gesina, ṅgaha aya kavakaw à madəv kufa à abà kà mapəhla gəl aṅkul ala la huma azladza. Kà uwaga à uwana kadàbəzaw seriya uwana aduwa aṅa azladza anik.”]
- <sup>15</sup>”Ḍgərpa agay la akul, akul azlaməna matapla mapəhay la akul azla Farisəya, akul azlaməna magolla dza. Kauguzahaw dawali dawali gesina la gudəṅ la vok, amiyaka la kəslah iyaw babay, kà akul aṅa maḃəz masla mapəh gay la ləv ala tekula. Ḍgaha baṅa kabəzàwwal aya kà, kapakàwwàṅ ala kà bəzi aṅa gəy akəl dāduwa à gay akul asik səla.”
- <sup>16</sup>”Ḍgərpa agay la akul, akul azlaməna maguwàh azlaguləf à huma. Kagodāw kà: 'Baṅa dza azuw mawadāy la məṅ gəy Zəzagəla kà, uwaga kà deyday', kagodāw. 'Ama baṅa azuw mawadāy kà la luwàluwà uwana la gəy Zəzagəla la aku kà, mawadāy adānəfay', kagodāw.
- <sup>17</sup>Akul azlakusoṅu, akul azlaguləf! Uwa la à uwana məṅga gə la? Luwàluwà ay awma məṅ gəy Zəzagəla uwana masla la uwana agəṅ luwàluwà uwaga sətaka takay?

- 18**Kagodaw aya kà: 'Baŋa dza azuw mawadāy la slaka makəf tatak kà, uwaga kà deyday', kagodaw, 'Ama dza uwana azuw mawadāy la tatak makədayga uwana la afik kà, mawadāy adənəfay', kagodaw.
- 19**Akul azlaguləf, uwa la à uwana mənŋa gà la? Tatak makədayga ay awma slaka makəf tatak uwana agəŋ tatak makədayga sətaka takay?
- 20**Kà uwaga kà, dza uwana azuw mawadāy la slaka makəf tatak kà azuw mawadāy la tatak makədayga uwana la afik babay.
- 21**Dza uwana azuw mawadāy la mənŋ gày Zəzagəla kà, azuw mawadāy la mənŋ gày Zəzagəla ŋgaha la Zəzagəla uwana adz à ahəŋ la aku babay.
- 22**Dza uwana azuw mawadāy la zagəla kà, azuw mawadāy la kursi Sufəl aŋa zagəla, ŋgaha la masla uwana adz à ahəŋ la afik babay.”
- 23**"Ŋgərpa agay la aku, aku azlaməna matapla mapəhay, ŋgaha la aku azla Farisəya, aku azlaməna magolla dza, kavàw makulo aŋa tatak aŋkul, baməraka la azlatsəhay aləl anik anik gesina, ama kapəsewaw uwana aduwa à vok la mapəhay la abà, bokuba madəhəŋ delga la tələmma, ŋgaha la madiŋal gəl à vok. Uwaga la uwana akəsà à vok kà makəsay la kokudā mapəsewaw azlaanik uwanay.
- 24**Aku azlaməna maguwəh azlaguləf à huma, kazaɓaw slaslam à uda la tataka masay aŋkul la abà, ama zlugumi kà kadəguwa à gay.”
- 25**"Ŋgərpa agay la aku, aku azlaməna matapla mapəhay, la aku azla Farisəya, aku azlaməna magolla dza, kapalaw lig aŋa kətsaw la azlakəsɓad aŋkul, ama la huɗ aŋkul kà kahənawla la makəsafər dzəɓaŋŋa, ŋgaha la gəl la adi gesina.
- 26**Kak zil Farisəya guləf gə, pəl huɗ kətsaw dadəŋ, ŋgaha lig gə adəgay kuzekaka babay.”
- 27**"Ŋgərpa agay la aku, aku azlaməna matapla mapəhay, la aku azla Farisəya, aku azlaməna magolla dza. Aku kà bokuba aku azlazəvay uwana tawodəŋla, ahəf la lig gə, ama la huɗ gə kà, mahənlaga la azlatatak mazinga vaŋvavaŋ.
- 28**Aku babay kà la lig gə kà, kapəhawla vok ala kà kiya uwaga: 'Anu azladza delga', kagodaw, ama la huɗ kà kahənawla la magolla dza ŋgaha la mawisiga", Yesu agəf à atà.
- 29**Yesu ahəd à huma à gay la magodāy: "Ŋgərpa agay la aku, aku azlaməna matapla mapəhay, la aku azla Farisəya, aku azlaməna magolla dza, kaŋaləhəw zəvay aŋa azlaməna mapəh à atə gay à ahəl kà mapəhla à azladza ala kà lela. Kadəhəw azlatatak bədā à azlazəvay aŋa azlauwana à vok tadzà à ahəŋ la dziriga la abà.
- 30**'Aganay məgay la ahəŋ la zamana aŋa azlababa gami madziziga kà naka mədāh sləray anina kà makəf azlaməna mapəh à atə gay à ahəl kà mapəh à azladza aw', kagodaw aya.
- 31**La gəl aŋkul kà, kasəlaw kà aku azlamayyi à tsəh ala aŋa azladza uwana takədāh azlaməna mapəh à atə gay à ahəl uwaga.

<sup>32</sup>Kətà zlà kà, dàw à huma à gay kadəvawla sləray uwana à gay azlababa aŋkul tadzəkà madəhəŋ zla!

<sup>33</sup>Akul azlabəza matsapa: 'Kakay mədətəf seriya aŋa gày akàl la gay ala?', kagodəw ma!"

<sup>34</sup>Ŋgaha agòd aya: "Kà uwaga katsənàwwəŋ lela, gədàsləl akul à azlaməna mapəh à atà gay à ahàl à wəŋ, la azlaməna haŋkəliga, ŋgaha la azlauwana tasəl mapəhay. Kadàkadəw azlaanik, azlaanik aya kà, kadətataslaw atà à ahàf à adi, azlaanik kadàzlabahaw atà la kurpi la gày madəv kudà la aku, ŋgaha aya kadənəfahaw la gudəŋ la gudəŋ kà makad atà.

<sup>35</sup>Kiya uwaga à uwana aŋiz aŋa azladza dziriga uwana takàdàhàh atà dadzəka à vok la Abel, dza dziriga uwana takàd, tsərəh à makad Zakari, kona aŋa Baraki uwana kakàdəw la tataka aŋa azlagəy tsidəŋaga à abà la slaka makad tatak.

<sup>36</sup>Hadəy, gəpəh à akul la dziriga kà, kà uwaga gesina adətəday kà à gəl aŋa azladza aŋa zamana uwanay lakana."

<sup>37</sup>"Urusalima, Urusalima, kak la uwana kakàd azlaməna mapəh à atà gay à ahàl uwana à gay, ŋgaha katsəh azlauwana Zəzagəla aslala kà atà à wəŋ la akur. Gəday vok kà mənga, kà maham gay à vok aŋa azladza aŋak la slaka gulo, bokuba gotsak uwana aham gay azlabəza aŋha à vok la tsəh gogozlèh aŋha, ama kakəsaw aw.

<sup>38</sup>Ŋgaha zla, lagwa kà, gày aŋkul adəgay ŋvagay.

<sup>39</sup>La kità gəpəh à akul kà: Dagay lakana kadənəŋaw gi aya tsərəh à uwana: 'Məpis gay à vok à gay la dza uwana atsa à wəŋ la sləm aŋa Sufəl', kadəgodəw", Yesu agòd.

## Mata 24

<sup>1</sup>Kiya uwaga Yesu asà à lag la məŋ gày Zəzagəla la aku. Uwana adiy aŋha kà, azlaməna matapla la slaka aŋha tazà à vok à slaka aŋha kà mapəhalla maŋalay aŋa məŋ gày Zəzagəla uwatà.

<sup>2</sup>Kiya uwaga Yesu awùlla à uda, agòd à atà: "Kanəŋaw uwaga gesina takay? Hadəy gəpəh à akul la dziriga kà, amiyaka akur tekula babay kà adəgədal à gay aw, tadəkalah à ahəŋ gesina."

<sup>3</sup>Yesu adzà madzay la gudəŋ kuvu la afik, la abatà azlaməna matapla la slaka aŋha tazà à vok à slaka aŋha, tanàval à gay ala: "Pəhanula: Mbà uwaga adəpaka vok ma, masəlay ma uwala adəpəhanula kaslà mas à wəŋ aŋak la makəf gəl à ahəŋ gudəŋ à vok la?"

<sup>4</sup>Yesu awùlla à atà ala: "Dahəw haŋkəli kà aŋa mapapatakulla aw.

<sup>5</sup>Kà uwana azladza aŋuvaw tadàsa à wəŋ la sləm gulo, ŋgaha: 'Gi Kristu!', tadəgodəy, ŋgaha tadəvavarah azladza aŋuvaw à bada à abà.

- <sup>6</sup>Kadàtsənaw azlamawiyay aña guvəl, ɲgaha azlagay lakəl aña guvəl. Guba adəkəs akul aw, uwaga kà, say leri apaka vok, ama uwaga kà makəf gəl à ahəŋ gudəŋ à vok dadəŋ aw.
- <sup>7</sup>Azladza tsəhay anik tadəp guvəl la azlatsəhay anik, ɲgaha makoray anik adəp guvəl la makoray anik, azlamay tadəgahay la ahəŋ, ɲgaha azlamaβəlakah vok aña kutso tadəgahay la ahəŋ la azlaslaka anik anik.
- <sup>8</sup>Ama azlatatak uwaga gesina adəpaka vok kà bokuba madzəka mazay aña hud' bəzi.”
- <sup>9</sup>"Azladza tadəvəh akul à ahəl aña azladza anik kà matərəbəh akul, ɲgaha tadəkafəh akul. Azlatsəhay gudəŋ à vok gesina tadəpəsew akul kà uwana kawoyaw gi.
- <sup>10</sup>La kaslā uwatà, azladza aŋuvaw tadəsak à madiŋal gəl à vok la tsəh ala, ɲgaha tadətah à vok kaf à gəl, ɲgaha tadəzin vok à vok ala kà atà à àtə.
- <sup>11</sup>Azlaməna mapəh à atə gay à ahəl fida gə tadəpahla vok ala la tataka aŋkul la abà, tadəvavarah azladza anik aŋkul aŋuvaw.
- <sup>12</sup>Mawisiga la uwana adəsləh gəl à ahəŋ à kà delga, azladza gay məŋga tadəwadəh vok à uda la uwaga la abà à kà delga.
- <sup>13</sup>Ama dza uwana adəbasin tsərəh à makəf gəl à ahəŋ la tetəvi aña Zəzagəla à ama kà, adəbəlay.
- <sup>14</sup>Gay marabəŋ aña makoray Zəzagəla adəgay mapəhayga la gudəŋ la vok gesina, kà maziŋ gə à azlatsəhay gudəŋ à vok gesina. Baŋa adatsanay kiya uwaga kà, madəv à gay gudəŋ à vok adəzlaŋalay.”
- <sup>15</sup>"Mok uwana kadənəŋaw masla məzam aña Kristu, uwana masla mapəhal gay à ahəl Daniyel apəh, à uwana atsizl à slaka tsikasla gə à abà kà, (kəla dza uwana adzeŋ uwaga kà, adəha haŋkəli lela!)
- <sup>16</sup>Kiya uwaga kà azlauwana la kutso Yahudiya kà, tadəhoy à gudəŋ à afik.
- <sup>17</sup>Dza uwana la gəl gəy babay, adəsa à ahəŋ kà mad à gəy kà mahəl azlatatak uwana la hud' gəy aŋha aya aw.
- <sup>18</sup>Ŋgaha dza uwana la fəta, adəwul à mtəga kà mahəl dəbdəbi aŋha la mtəga aŋha aw.
- <sup>19</sup>Kay, ɲgərpa məŋga adəgay la azlamis uwana la bəza la hud', ɲgaha la azlauwana bəza vərna aga la atə la ahəl la mavakay uwatà!
- <sup>20</sup>Dəvəw kudə à Zəzagəla kà mavakay mawisiga uwaga aña matəf à təla anasl à abà baŋaw à vud' maduw ləv à abà aw.
- <sup>21</sup>La kaslā uwatà kà, ɲgərpa məŋga adəgay la ahəŋ uwana adapakə vok dagay uwana Zəzagəla adəhə gudəŋ à vok tsərəh à lakana aw, uwana adəpaka vok bokuba uwaga aya diki diki aw.
- <sup>22</sup>Agayŋa Zəzagəla atətuwə mavakay uwaga aw kà, naka dza la ahəŋ abəlay aw, ama Zəzagəla atətuwə mavakay uwaga kà, kà azlaaŋha uwana atsatsəmənì atə.”



- 23"Baŋa 'Kristu kà à aganay, la abanay, à agatày la abatày', tagodf à akul kà, kakəsaw gay aŋatà aw.
- 24Kà uwana azlakristu fidaga, la azlaməna mapəh à atà gay à ahəl fida gà tadəpahahla vok ala. Tadəfah azlamagol nadzipo kà mavavarla azladza amiyaka bà azlauwana Zəzagəla atsatsəmàni atà.
- 25Tsəbàwwal sləm kà uwana gədapəh à akul à vok à abà.”
- 26"Kità kà, baŋa: 'A agatày la kəsaf la abà, la abatày', tagodf à akul kà, kadaw aw! Baŋaw dza agodf à akul: 'A ganay adada à gày à abà la abanay', tagodf à akul kà, kakəsaw gay aŋha aw.
- 27Bokuba habaga uwana awutsədf à uda la ləv zagəla la abà dagay la tsəh la ahəŋ tsəràh à gəl à agu kà, kiya uwaga à mas à waŋ aŋa Kona aŋa dza babay.
- 28La slaka uwana tatak mamətsayga la ahəŋ la uwana azlakwatsamu tahəm gay à vok la abatà.”
- 29"La katskats la lig mapak vok aŋa ŋərpə uwaga la ahəŋ kà, afats adəufay aya aw, təla bay adəv udəka aŋha aya aw, azlatsetsiliŋ tadəsokw à ahəŋ la zagəla, ŋaha ndzəfà aŋa zagəla adəbəlaka vok.
- 30Ŋgaha masəlay aŋa Kona aŋa dza adəpəhla vok ala la zagəla la afik. Kiya uwaga azladza à vədah gesina tadətaway, tadənəŋ Kona aŋa dza atsa à ahəŋ la habaga la abà la ndzəfà mazləbay mənŋa la zagəla.
- 31Magol mapara mənŋa adətsənay, ŋgaha tadənəŋ azlamalika la gay tər gudəŋ ufad aŋa kutso, tadəham gay azlauwana à vok atsatsəmàni atà la azlagay tər gudəŋ à vok uwaga.”
- 32"Tsənàw uwana gudəv apəhakulla: Mok uwana gudəv agagəray babasl aŋha adəy kà, sələw kà madara kà nekwa.
- 33Kiya uwaga kà, baŋa kadənəŋaw uwaga gesina kà, sələw kà, kaslā mas à ahəŋ aŋa Sufəl kà adaslay.
- 34Hadəy, gəpəh à akul la dziriga kà: Kà azladza aŋa zamana uwanay tadəməts à gay dadəŋ gesina, kà mas à waŋ aŋa makoray Zəzagəla aw.
- 35Zagəla la kutso kà adədəv à gay, ama gay gulo kà, adədəv à gay aw!”
- 36"Dza la ahəŋ asəl kaslā la mavakay, baŋaw sa aŋa mapaka vok aŋa tatak uwaga aw, amiyaka azlamalika uwana la zagəla, amiyaka Kona aŋha babay aw, say Baba kokudə gəl aŋha pəra la uwana asəl.
- 37Tatak uwana apakà vok la zamana aŋa Nuhu kà, adəpaka vok kalkal la uwaga aya à mok uwana Kona aŋa dza adəsa à waŋ.
- 38La kità, à mok uwana mavakay aŋa iyaw, uwana azà dza ala, aləg à waŋ kà, azladza tazəw, tasəh tatak, tazəb mis, tadəh à zil tsəràh à mavakay uwana Nuhu adà à kəslah iyaw à abà.

<sup>39</sup>Tadzùgw tatak dikiidiki tsèràh à uwana iyaw asà à waŋ, azàtála gesina aw. Kiya uwaga adàpakay la vuɔ mas à waŋ aŋa Kona aŋa dza babay.

<sup>40</sup>La kità, azladza sèla tadàgay la fəta, tekula adàgay mazəbay gà, anik adàgay masakal gà.

<sup>41</sup>Azlamis sèla tadàdzam vəl, tekula adàgay mazəbay gà, anik adàgay masakal gà.

<sup>42</sup>Dzàw à ahəŋ la adi, kà uwana kasəl aw mavakay uwana Kona aŋa dza adàsa à waŋ aw.

<sup>43</sup>Tsəbàw sləm à uwanay lela: Aŋa zil gày asəl kaslà uwana masla à gəl atsa à waŋ kà mazləl gày aŋha la vəɔ kà, adzəhal aw, ahən à ahəŋ la adi kà masla gəl aŋa mad à gày aŋha aw.

<sup>44</sup>Kà uwaga: Dahàw vok à ahəŋ, akul babay, kà uwana Kona aŋa dza adàsa à waŋ kà la kaslà uwana manəwəŋ aŋkul lakəl aw.”

<sup>45</sup>"Uwa à magamza dziriga uwana la haŋkəli gà uwa? Uwaga kà dza uwana məŋga aŋha afà à gəl aŋa azlaməna sləray anik, kà masla aŋa mavàha à atà tatak may la sa uwana asà à atà.

<sup>46</sup>Marabay agay la magamza uwana məŋga aŋha awul à waŋ, abəzal à gəl la sləray aŋha la abà.

<sup>47</sup>Hadəy, gəpəh à akul la dziriga: Zil gày adàv ləmana à magamza aŋha uwanay à ahəl gesina.

<sup>48</sup>Ama baŋa magamza uwaga mawisiga kà, agodəy la gəl aŋha kà: Məŋga gulo kà adàsafay,

<sup>49</sup>adzəka mazləbàh azlamanalzay aŋa sləray, ŋgaha azuway la azlaməna guzu,

<sup>50</sup>kiya uwaga zil gày adàzlaŋalay la vuɔ uwana magamza uwaga la makuday la abà aya amiyaka aŋa sa tekula aw.

<sup>51</sup>Zil gày adàdàhla seriya zlazladəga à gəl, ŋgaha adàvəl masik aŋha kà la tataka aŋa azlaməna magolla dza la abà, la abatà la uwana adàtuway, la mapad slid la tsəh ala tərrowawa", Yesu agòɔ.

## Mata 25

<sup>1</sup>"Kiya uwaga makoray Zəzagəla kà kalkal la gay aŋa azladəgam kulo uwana tasà à uda, tahəl fənəs aŋatà, tahəd kà magagamay la masla mazəb mis.

<sup>2</sup>Azladəgam zlo la tataka aŋatà la abà kà, azlakusoŋu gà. Azlazlo anik uwanay kà, azlaməna masəl gəl gà.

<sup>3</sup>Azlakusoŋuga uwaga tahəl fənəs aŋatà kokudà matəɔfani aməl à koloba à agu kà madla la ahəl.

- <sup>4</sup>Ama azlamasəl gəl gə uwanay kà tadatədfani aməl à koloba à agu, tadàla la ahəl gesina la fənəs aṅatà.
- <sup>5</sup>Hay, masla mazəb mis asəf kà mas à waṅ, azladəgam kulo uwaga tadzehəl.”
- <sup>6</sup>"La tataka vəd mawiyay atsən: 'Masla mazəb mis vok adazlaṅalay, sàw à afik, məgàgàm la masla zla!'
- <sup>7</sup>Kiya uwaga azladəgam kulo uwaga tatsànla, ṅgaha tavàtsàhà fənəs aṅatà.
- <sup>8</sup>Azlakusonuga uwanay tagòd à azlamasəl gəl gə uwanay: 'Kamkam, dzèslàhàw à anu aməl aṅkul, kà uwana fənəs gami adàmatsahla, səlewkw sesəlewkw tsi!'
- <sup>9</sup>Azlamasəl gəl gə tagòd à atà: 'Awaṅ, adàsla anu aw, dàw à kanti à agu, kadàsukwaw!'
- <sup>10</sup>Kiya uwaga azlakusonuga uwaga tahàd kà masukw aməl la kanti, ama la sa uwaga masla mazəb mis asà à waṅ, azladəgam zlo masəl gəl gə uwatà tadà à gày la slaka gə, à gày mazəb vok à agu, kà uwana tagà nekwa, ṅgaha tatsàk à gamagày à ama la tsəkurəm tərrezl.
- <sup>11</sup>Zewk, la huma la gay, azladəgam anik uwanay tasà à waṅ, tadzəkà mazalahay: 'Məṅga, pèzl à anu gamagày!'
- <sup>12</sup>Ama masla mazəb mis agòd à atà: 'Hadəy, gəgòd à akul la dziriga: Tetuwa gəsəl akul aw!'
- <sup>13</sup>Yesu azàlàn gəl, agòd à atà: "Dzàw à ahəṅ la adi, kà uwana kasəlaw mavakay, amiyaka sa uwatà aw!"
- <sup>14</sup>"Adagay kalkal la dza uwana ad à mauguzahay. Azàläh azlamagamza aṅha, abək à atà à gəl aṅa tatak aṅha gesina.
- <sup>15</sup>Anik aṅatà avəl gursu dəbow, à anik aya gursu dadərmokw ufaɸ, à mamakər gə avəl gursu dadərmokw səla. Avà à atà la kəla ndzəɸa aṅa dza suwaṅ, ṅgaha la lig la ahəṅ adà aṅha à mauguzahay.
- <sup>16</sup>Magamza uwana abəzà gursu dəbow, ahàd, atsàkàlla, ṅgaha abəzal riba aṅa gursu dəbow anik aya.
- <sup>17</sup>Masla aṅa mabəzal gursu dadərmokw ufaɸ adəhàṅ kiya uwaga babay suwaṅ, ṅgaha abəz riba aṅa gursu dadərmokw ufaɸ anik aya.
- <sup>18</sup>Ama dza uwana abəzà gursu dadərmokw səla, ahàd, alà à afək à uda, ṅgaha ahàd à sili uwatà à agu məṅga aṅha avəl.”
- <sup>19</sup>"Uwana adasafay məṅga kà, məṅga aṅatà awùl à waṅ la mauguzahay, ṅgaha adzà madzay, kà matugway lakəl aṅa sili aṅha.
- <sup>20</sup>Magamza uwana abəzà gursu dəbow atsà à vok à waṅ à slaka məṅga aṅha, apəhal gursu dəbow anik uwana ayyà à tsəh. 'Məṅga, kavà à gi kà gursu dəbow tekula, təga

aw uwà ay? Nèhàh tsi, aganay gursu dèbow uwaga ayyà à tsèh ala gursu dèbow anik aya.’

<sup>21</sup>Məŋga aŋha agòdàl: 'Delga, kak magamza dziriga, kagà dziriga la azlabəza tatak deyday gà la abà, gədàfa à ka à gəl aŋa azlatatak uwana aga la ndzəda, sà à waŋ à marabay gulo à abà.’

<sup>22</sup>Magamza uwana abəzà gursu dadərmokw ufad, azà à vok à awtày babay, agòd: 'Məŋga, kavà à gi gursu dadərmokw ufad aw uwà ay? Nèhàh, aganay dadərmokw ufad anik uwana ayyà à tsèh.’

<sup>23</sup>Məŋga aŋha agòdàl: 'Delga, kak magamza dziriga, kagà dziriga la azlabəza tatak deydayga la abà, gədàfa à ka à gəl aŋa azlatatak məŋga gà. Sà à waŋ à marabay gulo à abà.’

<sup>24</sup>La lig la ahəŋ magamza uwana abəzà à gursu dadərmokw səla azà à vok à awtày, agòd: 'Məŋga gulo, gəsəl kà kak dza dzaŋdzaŋga. La guf uwana la abà kasləkà tatak à abà babay aw kà, katsəday, ŋgaha la guf uwana la abà kasləkà aw kà, kalay.

<sup>25</sup>Guba akəs à gi kà uwaga à uwana, gəhəd, gəlà sili aŋak uwaga à afək à agu. Nèhàh, aganay à tatak aŋak!’

<sup>26</sup>Məŋga aŋha awulàlla: 'Kak magamza mawisiga, ŋgaha masaga, kasəl kà gətsəday ŋgaha gəlay la guf uwana la abà gəsləkà aw, kagod, ààà?!

<sup>27</sup>Kà mana kafà sili gulo à gày makal goder aw, naka mok uwana gədawul à waŋ kà naka gəday, gəhəl sili la iyaw la tsèh la abatà aw ma?

<sup>28</sup>Hèlèwla gursu dadərmokw səla gà uwaga ala, ŋgaha bəkàw à dza aŋa gursu dèbow à vok.

<sup>29</sup>Kà uwana kəla dza uwana akoray kà, tadàvəlla à vok, ama dza uwana akoray aw kà, bə bəzi gə uwatà agà la ahəl kà, tadədəval à ahəl ala aya.

<sup>30</sup>Ama magamza mawisiga uwaga kà dūwàw à uda à mələs à abà, la abatà matuway la mapad slid adəpaka vok!’ “

<sup>31</sup>"Mok uwana Kona aŋa dza adàsa à ahəŋ mas Sufəl Sufəl, la azlamalika aŋha gesina kà, adàdza à kursi mazləbay aŋha à afik.

<sup>32</sup>Azlatəhay gudəŋ à vok gesina tadəham gay à vok la huma aŋha, ŋgaha adəvəh azladza ala, bokuba uwana masla manəŋla azlatatak avəh azlatuwaŋ ala la azlaawək.

<sup>33</sup>Adəbək azlatuwaŋ à ahəl kaf aŋha à gəl, ŋgaha azlaawək à ahəl gudzay aŋha à gəl.

<sup>34</sup>Kiya uwaga Sufəl adəgodəy à azlauwana la ahəl kaf aŋha lakəl: 'Sàw à waŋ akul uwana Baba gulo adapis akul gay à vok, ŋgaha bəzàw à makoray uwana aga madəhakullaŋ à ahəŋ gə dagay madzəka gudəŋ à vok.

<sup>35</sup>Kà uwana may azà à gi, kavàw à gi tatak may, nəlay akəs à gi, katədcàw gi iyaw gəsà, gəgà mələk gə, kakəsàw gi la ahəl səla.

<sup>36</sup>Gəgà la godega deyday, kadùwàw à gi lukut à vok, gəgà la dıvats gà, kasàw à waŋ kà manəŋ gi à gày la à gi sləm, gəgà la daŋay, kasàw waŋ kà manəŋ gi à gày.’

<sup>37</sup>Kiya uwaga azladza uwana azladziriga taulàlla: 'Sufəl, mbà mənəŋà ka la may gà, ŋgaha məvə à ka tatak may baŋaw la nəlay gà ŋgaha mətəđ à ka iyaw masay ma?

<sup>38</sup>Mbà mənəŋà ka kak məlok gà, ŋgaha məkəs kà la ahəl səla, baŋaw mənəŋà ka la godega deyday ŋgaha məduwà à ka lukut à vok ma?

<sup>39</sup>Mbà mənəŋà ka dıvats azà ka, mbà la daŋay maslà mədà à awtày kà manəŋa ka à gày la?’

<sup>40</sup>Sufəl awulla à atà ala: 'Haday, la dziriga gəpəh à akul: Uwana kadàhàhàwwàŋ à tekula la tataka azlabəza uwanay la abà gesina kà, uwaga kà, kadàhàhàwàŋ kà gi!' “

<sup>41</sup>"Ŋgaha la lig la ahəŋ Sufəl adàgod à azlauwana la ahəl gudzay aŋha: 'Zàw gi à vok, akul uwana Zəzagəla adàtsafla akul! Dàw à akəl uwana à abà adàmats ala aw uwana madəhəŋ à ahəŋ gà, kà aŋa seteni la azlamalika aŋha gesina!

<sup>42</sup>Kà uwana may azà à gi, kavàw à gi tatak may aw, nəlay akəs à gi, katəđàw à gi iyaw gəsà aw,

<sup>43</sup>gəgà məlok gà, ama kakəsàw gi aw, gəgà la dıvats ŋgaha gəgà la daŋay kafàw gi sləm babay aw.’

<sup>44</sup>Kiya uwaga taulàlla: 'Sufəl, mbà mənəŋà ka la may gà baŋaw la nəlay gà, baŋaw kagà məlok gà, baŋaw la godega deyday, baŋaw la daŋay ŋgaha maslà məzlakà ka aw la?’

<sup>45</sup>Sufəl awulla à atà ala: 'Haday, gəpəh à akul la dziriga: Kəla tatak uwana kadàhàhàwwàŋ à azlabəzaga uwanay gesina kiya uwaga aw kà, bə kadàhàhàwwàŋ à gi babay aw.’

<sup>46</sup>Kiya uwaga tadàdala atà à seriya uwana à abà adədəv à gay aw. Ama azladza dziriga kà tadəbəz sifa uwana adəv à gay aw", Yesu agòđ zlà.

## Mata 26

<sup>1</sup>Haday, mok uwana Yesu adədəvla gay aŋha à gay kà, agòđ à azlaməna matapla la slaka aŋha:

<sup>2</sup>"Səlàw kà madəvaday uwana sləm aŋha Paska adəgay la ahəŋ la mahənay səla la abà, ŋgaha tadəv Kona aŋa dza à ahəl aŋa azladza kà matatasl à ahəf à adi.”

<sup>3</sup>Kiya uwana azlamadzahaga aŋa azlaməna mav tatak à Zəzagəla, la azlamasiga aŋa azla Yahudiya tahamà gay à vok la mtəga aŋa Kayyif, məŋ madzahaga aŋa azlaməna mav tatak à Zəzagəla.

<sup>4</sup>Takəs matsən vok gay la gəl la gəl, kà makəs Yesu, ŋgaha kà makəđay.

<sup>5</sup>Tagòđ: "Məslala vok kà makəsay la madəvaday la abà aw, kà uwana maham à ahəŋ dza adəvədzahla", tagòđ.

- <sup>6</sup>Mok uwana Yesu la Betaniya, la mtəga aŋa Səmon masla akəl zagəla uwatà kà,
- <sup>7</sup>mis anik asà à waŋ à slaka aŋha la dərəw aməl la ahəl mahənlaga la aməl matərsin zlazladəga. Adzadzəb aməl matərsin uwatà à Yesu à gəl la mok uwana tazùw kaf.
- <sup>8</sup>Uwana azlaməna matapla la slaka aŋha tanəŋà uwaga kà, gəl akədf à atà à vok, tagòdf: "Kà mana awis tatak ala kiya uwanay ma?"
- <sup>9</sup>Agayŋa avà à anu aməl matərsin uwaga tsakalay aŋha zlazlada: məduw ala, kà mav sili gə à azlaməna kudə, kà ŋuləm."
- <sup>10</sup>Yesu kà asəl uwana tapəhay, agòdf à atà: "Kà mana katərəbaw mis uwaga ma? Kà uwana adəhəgəŋ kà dzəba aŋha səla aw?"
- <sup>11</sup>Kà uwana azlaməna kudə tadəgay la ahəŋ koksikoksi, ama gi kà mədəgay la ahəŋ anina koksikoksi aw.
- <sup>12</sup>Kà uwana aməl uwanay adzadzəb à gi à vok kà, madəh aməl à mazimnekid uwana à vok kà mazəb à uda.
- <sup>13</sup>Hadəy, gəpəh à akul la dziriga: Kəla slaka, uwana dza adəpəh gay matsidəyga uwanay la gudəŋ la vok gesina kà, tadəpahay lakəl aŋa uwana mis uwanay adəhəŋ, kà mis uwanay aŋa mawul à atà à gəl."
- <sup>14</sup>Mok uwana uwaga adada à lig kà, tekula la tataka azlaməna matapla kulo gəl aŋha səla uwaga la abà, uwana sləm aŋha Yudas Iskariyot, ahəd kà məbəz à azlamadzahaga aŋa azlaməna mav tatak à Zəzagəla à vok,
- <sup>15</sup>agòdf à atà: "Mana kadəvəw à gi, à baŋa gəfa à akul Yesu à ahəl ma?" Ŋgaha tatəgwal gursu dzik makər à ahəl.
- <sup>16</sup>Dagay la mok uwatà Yudas ayəh tetəvi kà maf à atà Yesu à ahəl.
- <sup>17</sup>La mavakay terəŋa aŋa madəvaday pain uwana kokudə tatak makəsliŋ, azlaməna matapla tasà à waŋ, tanəv à Yesu: "Lala asa à ka məday kà madəh tatak madəvaday Paska à ahəŋ la?"
- <sup>18</sup>Kiya uwaga Yesu agòdf à atà: "Dəw à huf gudəŋ à abà à slaka dza uwahə: Məŋga agodf à ka, 'Kaslà gulo adaslay kà gi aŋa mazuw tatak may aŋa Paska la azlaməna matapla gulo la mtəga aŋak', agodf, gòdfəwwal."
- <sup>19</sup>Azlaməna matapla tahəd, tadəhə uwana Yesu apəh à atà à ahəl, ŋgaha tadəhə tatak may aŋa madəvaday Paska à ahəŋ.
- <sup>20</sup>Mok uwana mokokhu adasa à waŋ kà, Yesu adzà à tatak may à adi la azlaməna matapla la slaka aŋha kulo gəl aŋha səla uwatà.
- <sup>21</sup>Mok uwana tazùw tatak may, Yesu agòdf à atà: "Hadəy, gəpəh à akul la dziriga, tekula aŋkul adəta à gi kaf à gəl."
- <sup>22</sup>Uwaga abək mazawla à gəl à azlaməna matapla məŋga, tadzəkà manavahal la tekula, tekula: "Sufəl, gi zlak uwà, gi zlak uwà?", tagòdfəl.

- <sup>23</sup>Yesu awùlla à uda, agòd à atà: "Dza uwana mēdēb ahàl à kaf à gəl anu sēla la kēsłaf la abà, la uwana adàta à gi kaf à gəl.
- <sup>24</sup>Haday, Kona aṅa dza adāmētsay la tsəhay gə uwana matsēseray, apəhay la wakità la abà lakəl aṅha, ama ṅgərpa adāgay la dza uwana adàta kaf à Kona aṅa dza à gəl! Agayṅa tayyay aw kà, naka ṅuləm kà aṅha."
- <sup>25</sup>Yudas masla matal kaf à gəl, uwaga agòd la manavay: "Məṅga, gi la magay zlak uwà?" Yesu awulàlla, agòdal: "Kak Yudas, kapəh!"
- <sup>26</sup>La mok uwana tazùw tatak may, Yesu azəb kaf, "Kikay", agòd à Zəzagəla, atsakən ala, avà à azlaməna matapla la slaka aṅha la magòday: "Uwanay kà vok gulo, zəbàw, kazùwwàw!"
- <sup>27</sup>Ḷgaha azəb kətsaw mahənla gə la tatak masay gə, "Kikay", agòd à Zəzagəla, avà à atà la magòday: "Sàw uwaga gesina aṅkul,
- <sup>28</sup>kà uwana uwaga kà aṅiz gulo, aṅiz makəs vok slawda, uwana masokw à vədah gə, kà aṅa azladza aṅuvaw, kà mabəz mamatsila tsakana.
- <sup>29</sup>Gəpəh à akul uwaga la dzahhà: Dagay lakana gədāsai yaw mayyay ahəf uwanay aw, tsəràh à uwana mēdāsai anina la makoray aṅa Baba gulo aya."
- <sup>30</sup>La lig aṅa mahab mahabay mazləbay à gay, tadà aṅatà à gudəṅ kuvu à afik.
- <sup>31</sup>Kiya uwaga Yesu agòd à azlaməna matapla la slaka aṅha: "La hud aṅa vəd uwanay lakana kà, kadāsakaw gi à ahəṅ gesina aṅkul, bokuba uwana mēdzeṅay la matsēseray la abà: 'Gədəkəf masla manəṅla azlatuwan, ṅgaha maham à ahəṅ tuwan gesina adəsləh gəl à ahəṅ.'
- <sup>32</sup>Ama mok uwana gədàwul à uda kà, gədətsəvokay kà akul à Galili."
- <sup>33</sup>Piyer agòdal: "Amiyaka azladza anik gesina tasək à kak à ahəṅ kà, gi kà, gədāsak à ka à ahəṅ tetuwa aw!"
- <sup>34</sup>Yesu awulàlla: "Haday, gəpəh à ka la dziriga: Bə la vəd uwanay kà, gurayṅa mewgdzagalaṅ awiyay kà, kadəgòday asik makər, kà kasəl gi aw, kà uwaga Piyer."
- <sup>35</sup>Piyer agòdal: "Dikidiki: Gəsəl kak aw, gədəgòday aw, amiyaka bə makits aga à gi la kuda bay!" Azlaməna matapla uwana la slaka aṅha tapəh bokuba aṅa Piyer uwaga babay.
- <sup>36</sup>Kiya uwaga Yesu abəz à slaka anik à abà uwana sləm aṅha Getsemane, ṅgaha agòd à azlaməna matapla aṅha: "Aga, gəday, gədədəv kudà la abatay kà, dzàhàw madzay la abanay."
- <sup>37</sup>Adàla Piyer, ṅgaha azlabəza aṅa Zebede sēla la tsəh, adzəkà maskulay la mazaw la gəl.
- <sup>38</sup>Agòd à atà: "Ləv gulo adahənla la mazaw la gəl aṅa mamətsay, dzàw à ahəṅ la abanay, dzàw à ahəṅ la adi kiya gi."

- <sup>39</sup>Masla adàni kærkær zewk, atsòn gəl à ahəŋ, ŋgaha adəv kudà la kiya uwanay: "Baba gulo, agayŋa uwanay abəz à vok kà naka, kazəbğəŋ kətsaw ŋgərpa uwanay ala, amiyaka bà la uwaga babay kadàhaŋ bokuba uwana asa à ka, awkà bokuba uwana asa à gi aw!"
- <sup>40</sup>La lig la ahəŋ awul à waŋ à slaka azlaməna aŋha makər uwaga, abəz atà à gəl kà tadzehal. Agòd à Piyer: "Kaslawwalla vok kà madz à ahəŋ la adi la gi, amiyaka sa tekula aw uwà?"
- <sup>41</sup>Dzàw à ahəŋ la adi, dèvəw kudà kà akul aŋa matəf à mapapatay à abà aw. Masasədok aŋa dza asal manəfay nəma, ama vok kà guɓguɓ."
- <sup>42</sup>Azà à atà vok la vok ala kà masəla, ŋgaha adəv kudà kiya uwanay: "Baba gulo, baŋa akəs à vok kà kətsaw uwanay azəb vok à uda kiya uwanay aw, sàk à gi kà gi aŋa mas à uda la abà, ŋgaha masal aŋak apaka vok zla."
- <sup>43</sup>Masla awul à waŋ aya à slaka azlaməna matapla aŋha uwaga, abəz atà à gəl kà tadzehal aya, taslalla vok aŋa madz à ahəŋ la adi aw.
- <sup>44</sup>Yesu azà à atà vok la vok ala aya kà mamakər, adəv kudà la kiya uwana uwarà.
- <sup>45</sup>La lig la ahəŋ, awul à waŋ à slaka aŋatà, agòd à atà: "Kadzewhal gotənaŋ, kaduwaw ləv aŋkul pəra ay? Nəŋəwwəŋ sa kà adaslay adagay, ŋgaha Kona aŋa dza adagay mavəyga à ahəl aŋa azlaməna tsakana.
- <sup>46</sup>Sàw à afik, məhəd! Dza uwana adata à gi kaf à gəl kà aganay la abanay!"
- <sup>47</sup>Ŋgaha bokuba uwana Yesu à lig la mabadma la abà, à mok uwana Yudas, tekula la tataka azlaməna matapla kulo gəl aŋha səla la abà, asà à waŋ la maham à ahəŋ dza aŋuvaw la tsəh, katsakar la azlaazəva agà à atà la ahəl. Azlamadzahaga aŋa azlaməna mav tatak à Zəzagəla, la azlamasiga aŋa azla Yahudiya la uwana tasləl atà à waŋ.
- <sup>48</sup>Yudas, uwana adata kaf à Yesu à gəl apəh à atà uwana à vok à abà, adədəhəŋ kà mapəhatàla Yesu: "Lagwa kà, dza uwana gədəkəs vok kà, masla gə la uwaga à uwana kayahaw, kadàvalahawka pəra", agòd à atà.
- <sup>49</sup>Yudas azà à vok à slaka Yesu la katskats: "Ayyi, məŋga gulo", agòdàl, la makəs à vok.
- <sup>50</sup>Yesu agòdàl: "Slawda, uwana kasà à waŋ kà madəhəŋ kà, dāhəŋ katskats!" Kiya uwaga azladza anik tasà à waŋ, tavələhàka Yesu, takəs.
- <sup>51</sup>Tekula uwana agà la Yesu abəd katsakar aŋha à uda, ŋgaha adədla magamza aŋa məŋ madzahaga, anətsal sləm lakəl ala.
- <sup>52</sup>Yesu agòdàl: "Kay, wulla katsakar aŋak à gəy aŋha à agu, kà uwana azladza uwana tahəl katsakar kà, tadàkad atà la katsakar babay.
- <sup>53</sup>Kasəl kà aŋa asa à gi kà gəzal à Baba gulo kà mazlak gi aw takay, ŋgaha asləl gi azlamalika à ahəŋ maŋəlaŋəl kulo gəl aŋha səla aw takay?"



- 54** Ama baŋa kiya uwaga ma kakay à uwana tatsetsèr à wakità à abà, agòd à afik ma? Kà uwana wakità agòd kà: Say uwanay adàpaka vok kiya uwanay, agòd.”
- 55** Ìgaha Yesu agòd à maham à ahəŋ dza: "Kasàw à waŋ kà makəs gi la azlakatsakar, la azlaazəva la ahàl bokuba gi masla nabəra takay? Kəla mavakay gədzàhà madzay la məŋ gày Zəzagəla la aku kà matapla tatak à azladza, uwala kakəsàw gi aw!
- 56** Ama uwaga gesina apakà vok kà gay aŋa masla mapəhal gay à ahàl uwana la wakità la abà aŋa magòd à afik." Ìgaha azlaməna matapla tasàkal à ahəŋ, tahòy aŋatà gesina.
- 57** Azladza uwana takəs Yesu, tadàla masla à huma aŋa Kayyif, məŋ madzahaga aŋa azlaməna mav tatak à Zəzagəla, la azlaməna mapəhla mapəhay ala, la azlamasiga uwana tahamà gay à vok la abatà.
- 58** Piyer anəfà Yesu la tsəh makəda kəda. Tsəràh à gəl akàl aŋa məŋ madzahaga, adà à gày, adzà madzay la slaka aŋa azlamənəhla, kà manərəz tatak uwana apaka vok la Yesu.
- 59** Azlamadzahaga aŋa azlaməna mav tatak à Zəzagəla, la azlamasiga aŋa gudəŋ tayəh mapuw gudzi à Yesu à gəl, amiyaka bà la fida uwala beyli, kà mabəzal à tsəh kà makəday.
- 60** Ama tabəzal aw, amiyaka bà la uwala beyli, bà la abatà azladza tasəhla azlagay deyday gà à waŋ lakəl aŋha. Bà la kità babay azladza səla tapəhla vok ala.
- 61** Tagòd: "Dza uwanay agòd kà: 'Gəslala vok, gəkaləh məŋ gày Zəzagəla uwanay à ahəŋ, ñgaha gəwulla à afik la mahənay makər la abà', agòd.”
- 62** Məŋ madzahaga asà à afik, agòd à Yesu: "Kawulla gay à uda aw takay? Mana à uwanay azladza uwanay tapəhay lakəl aŋak tak ma?”
- 63** Ama Yesu adzà à ahəŋ titi. Məŋ madzahaga uwaga agòdàl aya: "La sləm aŋa Zəzagəla uwana la sifa, kamkam wulla gay à uda: Ma kak, Kristu Kona aŋa Zəzagəla takay?”
- 64** Yesu awulàlla: "Iyay, bokuba uwana kapəh. Ìgaha aya gəpəh à akul la dziriga: Dagay lakana kadənəŋaw Kona aŋa dza adàdza madzay la ahàl kaf aŋa Zəzagəla lakəl la ndzəda, kadənəŋawwaŋ adàsa à ahəŋ la habaga la abà babay.”
- 65** Kiya uwaga məŋ madzahaga akwàhà lukut aŋha à vok agòd: "Apəh mawisiga à Zəzagəla à vok, asà à anu azlaməna sayda anik aya aw, katsənàw uwana adapəhay lakəl aŋa Zəzagəla təga aw way? Mana kadzugwaw aya ma?", agòd.
- 66** "Azlayla kà, say makəday pəra!", azlaməna matsəbal sləm tagòd.
- 67** Ìgaha tadzəkà matafal slesliḃ à adi, azlāḃ la mamits à ahàl, azlaanik tazlāḃ à paŋaw à abà,
- 68** tagòdàl: "Pəhanula dza uwana adəḃka, à baŋa kak Kristu zla!”
- 69** Piyer adzà madzay la uda la gəl akàl. Magamza misga aŋa məŋ madzahaga azà à vok à slaka aŋha, agòdàl: "Kak babay kà, kadzàw à ahəŋ la Yesu zil Galili uwaga.”

<sup>70</sup>Ama Piyer adàhà fida la huma aña azladza gesina la magodáy: "Gi kà, gəsəl uwana asa à ka mapəhay aw!"

<sup>71</sup>Kiya uwaga asà à afik la abatà, azà à vok à gay gamagày. Magamza misga anik, anəhəh aya, h̄gaha agòd à azlaməna madz à ahəh la abatà: "Iyay, dza uwanay kà adzà à ahəh la Yesu zil Nazaret."

<sup>72</sup>Ama Piyer adàhà fida kà masəla la magodáy aya: "Zagəla, gəsəl dza uwaga kapəhaw aw!"

<sup>73</sup>Mok uwana tasəfānì aya, azladza uwana la abatà la slaka Piyer, tazà à vok à slaka aḡha, tagòdāl: "Ndzer kà, kak tekula aḡatà, məsəl ka la kuda aḡak la abà, à slaka uwana kasà à waḡ la abà."

<sup>74</sup>Kiya uwaga Piyer adzəkà magodáy: "Baḡa fida gəpəhay kà, Zəzagəla adàhà à gi seriya à gəl. Gədāzuwa à akul mawadáy kà, gəsəl dza uwaga aw, gəgòd à akul, aw takay?" Apəh uwatà la gay ala, tsatsokw yokwyokw mewgdzagalaḡ adawiyay.

<sup>75</sup>ḡgaha awùl à Piyer à gəl à gay uwana Yesu apəhal: "Gurayḡa mewgdzagalaḡ adāwiyay asik makər kà, kasəl gi aw, kadàgodáy Piyer!", Piyer asà à uda, atùw la iyaw tugwi.

## Mata 27

<sup>1</sup>Mok uwana uwaga adada à lig kà, bəh la zay la tsəh, azlamadzahaga, la azlamasiga takəs sawaray la slaka gə kà makəf Yesu.

<sup>2</sup>Tawadāh, tadāla, tavà à Pilatus gumna aḡa azla Rom à ahəl.

<sup>3</sup>Mok uwana Yudas masla mat kaf à Yesu à gəl anəhəh kà, seriya adətəf à Yesu à gəl kà, awùlla sili gursu dzik makər uwaga à slaka azlamadzahaga, la azlamasiga.

<sup>4</sup>Agòd à atà: "Gədāhà tsakana, kà uwana gətà kaf à dza uwana à gəl kokudā tsakana", agòd. Ama tagòdāl: "Anu kà, gay gami la abà aya aw. Uwaga adagay kà abəz ka à kak pəra!"

<sup>5</sup>Yudas adùw sili uwaga à məh gày Zəzagəla à agu. La lig la ahəh, ahəd, akəf vok aḡha la madəb vok aḡha à zagəla.

<sup>6</sup>Azlamadzahaga tazəb sili uwaga, tagòd: "Makoray gami avà tetəvi kà mazəbay sili uwanay kà maf à sahar aḡa gày Zəzagəla à agu aw, kà uwana uwanay kà sili aḡa aḡiz."

<sup>7</sup>Mok uwana tatsən vok gay la tataka aḡatà la abà lakəl aḡha kà, tasùkw guf aḡa masla maḡalàh tatak la sili uwatà, kà atà aḡa malàh azlaməlok dza à abà la abatà.

<sup>8</sup>Kà uwaga à uwana tsərah à lakana kà tazallala: Guf aḡiz, à guf uwatà.

<sup>9</sup>Kiya uwanay à uwana gay aḡa masla mapəhal gay à ahəl Yeremiya agod: "Tahəl gursu dzik makər uwaga. (Sili uwaga azla Isərayel tatsəna vok gay lakəl aḡha kà masukwla)

- <sup>10</sup>Tasukwla guf aṅa masla maṅalàh tatak, bokuba uwana Sufəl Zəzagəla apəh.’
- <sup>11</sup>Yesu la huma aṅa gumna kà manaval gay la gay ala: "Kak la uwana kak Sufəl aṅa azla Yahudiya ay?" "Iyay, bokuba uwana kapəh", Yesu agòdál.
- <sup>12</sup>Uwana azlamadzahaga, la azlamasiga tapùwla gudzi à gəl kà, awùlla gay à uda aw.
- <sup>13</sup>Kiya uwaga Pilatus agòdál: "Kak katsə̀nà azlagay uwaga gesina tatugway lakəl aṅak aw, takay?"
- <sup>14</sup>Ama Yesu awulàlla gay amiyaka tekula aw, tsə̀ràh à uwana lə̀v avəl à gumna à gay.
- <sup>15</sup>Bà kə̀la madə̀vaday Paska kà, gumna adawah gəl à masla daṅay tekula uwana asà à maham à ahə̀ṅ dza kà uwana adagay zagə̀lā aṅha.
- <sup>16</sup>La mok uwatà kà, dza anik la ahə̀ṅ la daṅay, masla mawisiga kaykay, sləm aṅha kà Barabas.
- <sup>17</sup>Kiya uwaga Pilatus anə̀v à maham à ahə̀ṅ dza la gay ala: "Uwa à uwana asa à akul gə̀duw à akul ala à gəl uwa: Barabas ay awma Yesu uwana Kristu ay?", agòd à atà.
- <sup>18</sup>Kà uwana Pilatus asəl ndzer kà tafəl Yesu à ahəl kà, kà maṅor.
- <sup>19</sup>Uwana gəl akə̀d à Pilatus à vok kà gay aṅa seriya, kà mis aṅha asləl dza à slaka aṅha agòdál: "Katapa à ahəl à dza uwaga à vok tetuwa aw, kà uwana masla kà adàhà tsakana aw, gəsày ṅgərpa mə̀ṅga la masesiṅay la və̀dđà lakəl aṅa gay aṅha.”
- <sup>20</sup>Mə̀ṅ madzahaga la azlamasiga tagòd à azladza kà: Say tanav à masakay kà Barabas, ṅgaha takə̀d Yesu.
- <sup>21</sup>Gumna anə̀v à atà à gay ala aya: "Uwa la tataka aṅa azladza sə̀la uwanay la abà asa à akul kà gə̀duw à akul la gəl ala?" Tagòdál: "Dùw à anu gəl à Barabas!"
- <sup>22</sup>Anə̀v à atà: "Mana gə̀déhə̀ṅ la Yesu, uwana Kristu tagòdál zlà ma?" Gesina aṅatà tagòd: "Zləl à ahàf à adi!”
- <sup>23</sup>Pilatus anə̀v à atà aya: "Slə̀ray mawisiga ma uwala adàhàṅ là?" Ama tazà kuda à zagə̀la la ndzə̀dà, tagòd: "Zləl à ahàf à adi!”
- <sup>24</sup>Uwana Pilatus anə̀ṅàṅ kà aslāla vok adàh tatak anik aw say mawiyay pə̀ra taziṅ à zagə̀la kà, atə̀dāni iyaw, apəl ahəl aṅha la huma aṅa azladza gesina, agòd: "Tsakana aṅa makə̀d kona uwanay kà, abə̀z kà gi aw, uwaga kà say gay lakəl aṅkul pə̀ra.”
- <sup>25</sup>Azladza gesina tagòd: "Tsakana makə̀d masla kà awulla à anu à gəl la azlabə̀za gami!”
- <sup>26</sup>᠓gaha Pilatus adùw gəl à Barabas, aslahà Yesu ala la kurpi, avà à atà à ahəl kà mazləl à ahàf à adi.
- <sup>27</sup>Azlaslodzi aṅa Pilatus tadàla Yesu à mtə̀ga aṅa gumna, ṅgaha maham à ahə̀ṅ slodzi gesina ahàmal à adi.
- <sup>28</sup>Tasə̀rətalla la ahəl lukut aṅha la vok ala, tadùwal diri mativga à vok.

- <sup>29</sup>Taslàslàp gabaga aṅa atàk, tafàl à gəl, tafàl azəva gulakay à ahàl kaf, ṅgaha takədèdàl à huma à gay, takədàslal la magodày: "Ayyi, Sufəl aṅa azla Yahudiya!"
- <sup>30</sup>Tatàfal slesliḅ à vok, tazəḅ azəva uwatà la ahàl aṅha, tazlàḅla à gəl.
- <sup>31</sup>Mok uwana takədàslal tsewwa kà, tasərətal diri mativga uwatà la vok ala, tadùwal lukut aṅha à vok, tadàla masla kà mazləl à ahàf à adi.
- <sup>32</sup>La mok uwana tadùw à uda la gudəṅ à abà kà tagagàm la dza anik sləm aṅha Səmon, zil Səren. Azlaslodzi tafàl leri à gəl kà mazəḅ ahàf uwana tadàzləl Yesu à adi.
- <sup>33</sup>Tabəz à slaka anik uwana sləm aṅha Golgota, bokuba magodày: Slaka hərəṅ gəl.
- <sup>34</sup>La abatà la uwana tatəd̄f à tatak masay hamhamga à Yesu, atapəṅ ṅiz yewdi kà, akweskà.
- <sup>35</sup>Tazləl Yesu à ahàf à adi, ṅgaha tavàhà lukut aṅha la tataka aṅatà la abà la matsal tsatsa lakəl.
- <sup>36</sup>Ḷgaha tadzàh madzay la abatà kà manəṅla.
- <sup>37</sup>Tafà matsetseray à gəl aṅha à afik à abatà kà mapəhla godega aṅa makədày aṅha ala: DZA UWANAY KÀ, YESU SUFƏL AḶA AZLA YAHUDIYA.
- <sup>38</sup>Tatatàslàh azlaməna nabəra səla à ahàf à adi babay, anik la ahàl kaf, anik la ahàl gudzay.
- <sup>39</sup>Azladza uwana tauguwàh à awtày la abatà takokòtəhà gəl, tatsàk atà magodàhay à gəl,
- <sup>40</sup>tagòdàl: "Kak uwana kayàh makal məṅ gày Zəzagəla à ahəṅ, ṅgaha kà mawulla à afik la mahəṅay makər kà, ḅəl gəl aṅak à baṅa kak Kona aṅa Zəzagəla, sà à ahəṅ la ahàf uwaga la adi zla!"
- <sup>41</sup>Kiya uwaga babay azlamadzahaga aṅa azlaməna mav tatak, la azlaməna mapəhla mapəhay ala, la azlamasiga takədàsl à masla, tagòd:
- <sup>42</sup>"Masla kà abàlāhà azladza anik, ama aslāla vok aṅa mabəl gəl aṅha aw takay? A tsa masla kà Sufəl aṅa azla Isərayel ay? Lagwa kà, sà à ahəṅ la ahàf la adi zlà pəra, anu bay məd̄iṅ à ka gəl à vok.
- <sup>43</sup>Masla afà madzugway aṅha à Zəzagəla à afik, ṅgaha apəhla lela: 'Gi Kona aṅa Zəzagəla', agòd! Iyay zla, mənəṅəṅ à baṅa Zəzagəla abələṅ lagonay zla!", tagòd.
- <sup>44</sup>Azlaməna nabəra uwana tazləlal à makəla aṅha tatsəkàl magodàhay à gəl kiya uwaga babay.
- <sup>45</sup>La tataka afats, mələs apakà vok la kutso la abà gesina, tsəràh afats dat magovagova gərewni delga.
- <sup>46</sup>La afats dat magovagova gərewni delga uwatà, Yesu awiyà la ndzədà, agòd: "Eli, Eli lema sabachthani?" (Bokuba magodày: Zəzagəla gulo, Zəzagəla gulo, kà mana kasàk gi ma?)

- 47Azlaanik uwana tadzà à ahəŋ la abatà tatsənəŋ uwaga, tawiyà: "Azalay kà à Eliya!", tagòd.
- 48Katskats tekula aŋatà ahòy, azəb sawsaw, adùw à iyaw hamhamga à abà, afà à gulakay à gay, adziyla à Yesu, kà masla aŋa makokuzay.
- 49Ama azlaanik tagòd: "Məkuda, à baŋa Eliya atsa à waŋ kà mabələŋ kà mənəŋəŋ tak zlà!"
- 50La lig la ahəŋ Yesu awiyà la ndzəda aya, ŋgaha aməts.
- 51La sa uwatà bafta uwana tanəlla məŋ gày Zəzagəla ala akohàla tsəràd tsəràh à afik tsəràh à vədah. Kutso abəlàkà à vok, ŋgaha azladzəgla tapəslàkàh ala.
- 52Azlazəvay tapàzlla à ama ala ŋgaha aŋuvaw azlaməna madiŋal gəl à Zəzagəla à vok tawàlla à uda la mamətsay.
- 53Tasàhà à lag la zəvay la aku, ŋgaha la lig mawul à uda aŋa Yesu la ahəŋ, tahàd à huđ gudəŋ tsidəŋaga à abà, azladza aŋuvaw tanaŋà atà.
- 54Azlaslodzi aŋa azla Rom, la məŋga aŋatà tanəŋla Yesu. Uwana tanəŋà mabəlak à vok aŋa kutso la tatak uwana apakà vok gesina kà, guba məŋga akəs atà, tagòd: "Ndzer masla kà, Kona aŋa Zəzagəla!"
- 55Azlamis aŋuvaw tagà la abatà, tatsàzl à ahəŋ kərəkər, tanəzəzay atà. Tanəfà Yesu à waŋ dagay la Galili, kà atà aŋa mazlak masla à sləray à abà.
- 56Mariyama uwana dəg zla Magdala, Mariyama iyà aŋa Yakuba atà la Yusufu, la iyà aŋa azlabəza aŋa Zebede tagà la tataka azlamis uwaga la abà.
- 57Uwana mokokhu adasa à waŋ kà, dza galepi anik uwana la Arimate asà à waŋ, sləm aŋha kà Yusufu, masla bay kà masla asik aŋa Yesu.
- 58Ahàd, abəz à Pilatus à vok kà manaval vok aŋa Yesu. Kiya uwaga Pilatus avà tetəvi à Yusufu kà mazəb vok aŋa Yesu.
- 59Yusufu asà à waŋ, azəb vok aŋa Yesu à ahəŋ, afafədàl à bafta mawga à adi.
- 60Ŋgaha afà à zəvay aŋa aslasl gəl aŋha uwana à agu, alà à təhus à afik, atakòslal magol bəlam à gay, kà matsakal à ama, ŋgaha adà aŋha.
- 61Mariyama dəg zla Magdala atà la Mariyama anik uwanay tadzàhà madzay la abatà la magohla à huma à zəvay à adi.
- 62La vuđ maduw ləv aŋa azla Yahudiya bəŋ azlamadzahaga aŋa azlaməna mav tatak à Zəzagəla, la azla Farisəya tahàd à slaka aŋa Pilatus,
- 63tagòdàl: "Arveri, awùlla à anu à gəl kà, masla fida uwanay kà, uwana aləg mamətsay kà, agòd kà: La mahənay makər kà, gədàwul à uda, agòd.
- 64Đuləm kà, gòd, kà tanəŋla zəvay aŋha mahənay makər, kà azlaməna matapla aŋha aŋa mas à waŋ kà mazəb à lag la aku aw, ŋgaha kà atà magodəy à azladza kà adawul à uda la mamətsay aw. Kà uwana fida uwaga adàduw fida aŋa uwarà."

<sup>65</sup>Pilatus agòd' à atà: "Azlaslodzi kà atà la uwanay, dàw, kanəjawla zəvay bokuba uwana kaslawwalla vok gesina."

<sup>66</sup>Tahàd tabèk azlaməna manəŋla zəvay à ahəŋ, tafà masəlay à akur uwana à vok tatsakla zəvay à ama, ŋgaha tabèk azlaslodzi à ahəŋ kà manəŋla.

## Mata 28

<sup>1</sup>La lig aŋa vuɸ maduw ləv aŋa azla Yahudiya la ahəŋ, à vuɸ ladu la bəŋ gə, Mariyama dəg zla Magdala, atà la Mariyama anik uwatà, tahàd kà manəŋ à gəl zəvay.

<sup>2</sup>La katskats kutso abəlàkà à vok la ndzəda, malika aŋa Sufəl Zəzagəla asà à ahəŋ la zagəla, atakòslla à bəlam uwana ala tatsàkla à zəvay à ama, ŋgaha adz à afik la abatà.

<sup>3</sup>Masla awutsəɸay bokuba mawutsəɸay habaga, lukut aŋha babay təlla bokuba slewzi.

<sup>4</sup>Mok uwana azlaməna manəŋla zəvay tanəŋəŋ kà, guba akəs atà kayakay, atà tasəkùläh, tapàkàh iyaw.

<sup>5</sup>Malika agòd' à azlamis uwatà: "Akul kà, guba akəs akul aw, kà uwana gəsəl kà kayahaw kà Yesu uwana tazləl à ahàf à adi.

<sup>6</sup>Aga la abanay aw, adawulla à uda la mamətsay, bokuba uwana apəh à akul uwarà. Sàw à waŋ, kagovàlāw slaka uwana tahən à ahəŋ tsi.

<sup>7</sup>Dàw katskats kadəpəhaw à azlaməna matapla la slaka aŋha kà masla adawulla à uda la mamətsay. Lagwa adàtsəvokay kà akul à kutso Galili. Kadənəŋawwaŋ kà la abatà, uwaga la uwana gəpəh à akul zla."

<sup>8</sup>Katskats azlamis uwaga tatsizlla ala la gəl zəvay la guba la vok, ama la marabay məŋga babay. Tahàd la mahoyay kà madla gay uwaga à azlaməna matapla aŋa Yesu.

<sup>9</sup>Katskats Yesu asà à waŋ agagam à atà nna, agòd' à atà: "Ayyi, gəgod' à akul". Azlamis uwaga tazà à vok à slaka aŋha, takàs à asik aŋha à ahàl, takəɸdàl à ahəŋ, ŋgaha tasləkàw masla.

<sup>10</sup>Kiya uwaga Yesu agòd' à atà: "Guba akəs akul aw. Dàw, kadəgodəw à azladedə gulo kà, tahàd à kutso Galili, la abatà la uwana tadənəŋ gi", agòd' à atà.

<sup>11</sup>Mok uwana azlamis uwanay tadà aŋatà kà, azlaanik la tataka aŋa azlaslodzi uwana la abà tanəŋla zəvay uwaga, tahàd à huɸ gudəŋ à abà. Tapəh tatak uwana apakà vok à azlamadzahaga aŋa azlaməna mav tatak gesina.

<sup>12</sup>Azlamadzahaga takəs sawaray la azlamasiga. Mok uwana tatsən vok gay, tavà sili à azlaslodzi uwatà məŋga.

<sup>13</sup>Tagòd' à atà: "Kadəgodəw kà azlaməna matapla la slaka aŋha tasà à waŋ la vəɸ, tazəb vok aŋa Yesu la gəl à gəl, la mok uwana mədatəɸ à madzəhal à abà.

<sup>14</sup>Kiya uwaga baŋa atsən à gumna, məsəl dabaray uwana mədəbəzal à tsəh, ŋgaha akul kadəsaw à uda la gay la abà gesina."

**15** Azlamanəŋla tahəl sili, ŋgaha tafahən bokuba uwana tatàp à atà ala kà mafəhəŋ gesina. Kiya uwaga gay uwaga azahà vok la tataka azla Yahudiya la abà tsərəh à lakana.

**16** Kiya uwaga azlaməna matapla kulo gəl aŋha tekula uwaga, tawùl à gudəŋ Galili à dadəgwal uwana à afik, Yesu apəhatàla.

**17** Mok uwana tanəŋəŋ kà, taslèkàw masla, azlaanik la tataka aŋatà la abà tabèk gəl à ahəŋ səla.

**18** Yesu azà à vok à slaka aŋatà, agòf à atà: "Lagwa kà ndzəda uwana la zagəla, ŋgaha la uwana la vəfah kà agay mav à gi gə.

**19** Dàw à slaka azladza gudəŋ à vok gesina, kapakahawatàla kà azlaməna matapla gulo, kadàfahaw à atà batem la sləm aŋa Baba, la sləm ana Kona, ŋgaha la sləm aŋa Masasəfok tsikasla.

**20** Tapawatàla kà atà aŋa manəf uwana gətəpəkulla gesina. Səlàw kà, gədàgay la ahəŋ la akul koksikoksi, tsərəh à makəf gəl à ahəŋ gudəŋ à vok."

## Mark

### Mark 1

<sup>1</sup>Aganay gay delga uwana adzəka à vok lakəl aŋa Yesu, Kona aŋa Zəzagəla, uwana mafal dzakwa à gəl gà.

<sup>2</sup>La wakità uwana la abà Yesayya atsetsèr, Zəzagəla agòd: "Aganay gəsləl à awtày masləlay gulo, la huma aŋak kà madəhkaŋ tetəvi à ahəŋ."

<sup>3</sup>Uwaga kà kuda aŋa dza uwana awiyay la fəta la abà: "Dahàwla azlatetəvi à Sufəl Zəzagəla à ahəŋ tərta."

<sup>4</sup>Kiya uwaga Yuhana apəhla vok ala la fəta la abà. Az gay Zəzagəla, anavà azladza uwana tasà à waŋ à slaka aŋha: "Kəsàw batem, uwana apəhla ala kà kadapəhaw gay la ləv ala, ŋgaha Zəzagəla adàmamatsakula tsakana ala."

<sup>5</sup>Azladza la makoray masla Yahudiya, la azladza la Urusalima gesina, tasà à waŋ à slaka aŋha, uwana tasəlla tsakana aŋatà à uda. Yuhana adəhà à atà batem la mukwà Urdun la abà.

<sup>6</sup>Yuhana adùw lukut madəhəŋga à vok la aŋidz aŋa zlugumi, rəts awadà vok ala la parapara zlap, tatak may aŋha kà hayyaw la zuway mazuway.

<sup>7</sup>Apəh à azladza, agòd à atà: "Dza uwana atsa à waŋ la lig gulo la ahəŋ kà, aduwa gi la məŋga, gəsla gay kà makəl gəl à ahəŋ aŋa mapəl zuwid kwimik aŋha ala aw.

<sup>8</sup>Gi kà, gədəhakulla batem kà la iyaw, ama masla kà adəhakullaŋ kà la Masasədok Zəzagəla."

<sup>9</sup>La abatà Yesu asà à waŋ la gudəŋ Nazaret la kutso Galili. Yuhana adəhalla batem la mukwà Urdun la abà.

<sup>10</sup>Mok uwana Yesu asà à uda la iyaw la abà, anəŋà à zagəla kà, zagəla mapəzl à ama ala gà. Anəŋà Masasədok Zəzagəla atsà à ahəŋ à gəl aŋha bokuba habakoku.

<sup>11</sup>Ŋgaha tatsənà kuda uwana atsən à ahəŋ la zagəla: "Kak bəzi gay ləv gulo, gərabay məŋga kà kak."

<sup>12</sup>La lig la ahəŋ, katskats Masasədok Zəzagəla adala Yesu à fəta à abà.

<sup>13</sup>Adzà à ahəŋ la abatà mavakay dzik ufađ, ŋgaha seteni apapàt masla. Yesu adzà à ahəŋ la tataka azlatatak fəta la abà, ŋgaha azlamalika tazlək masla bay.

<sup>14</sup>Tadùw Yuhana à daŋay, kiya uwaga Yesu ahàd à kutso Galili, kà maz gay matsidayga aŋa Zəzagəla.

<sup>15</sup>Agòd: "Kaslà adaslay à dagay kà Zəzagəla adzəka makoray aŋha. Pəhàw gay la ləv ala, diŋàw gəl à gay matsidayga aŋa Zəzagəla à vok!"

<sup>16</sup>Mok uwana Yesu anəf à gay dərəv aŋa Galili, anəŋà azlaməna makas kilfi səla, Səmon la deda aŋha Andəre. Tadàw dzarawa à iyaw abà kà makasla kilfi.



- 17 Yesu agòd à atà: "Sàw à waṅ, nèfàw gi, gèdàpakakulla kà azlaməna makas azladza."
- 18 Katskats tasàk à dzarawa aṅatà, tanəfà masla.
- 19 Uwana adada à huma à gay ṅuv, anəṅà azlabəza aṅa Zebede, Yakuba atà la Yuhana, atà la kəslah iyaw la abà tadāh dzarawa aṅatà.
- 20 Katskats Yesu azàla atà, tasàk à baba aṅatà à ahəṅ la azlaməna sləray aṅha la kəslah iyaw la afik, ṅaha tanəfà Yesu.
- 21 Yesu la azlaməna matapla la slaka aṅha tahàd à Kapernahum. La vuḍ maduw ləv aṅa azla Yahudiya, Yesu adà à gày madəv kuḍa aṅatà à agu kà matapatàla.
- 22 Azladza uwana tatsəna gay aṅha kà, ləv avàl atà à gay, kà uwana atapàtala kà bokuba azlaməṅga aṅa azlaməna madzeṅ wakità Zəzagəla aw, ama bokuba dza uwana akor ndzəḍa.
- 23 Mok uwatà, dza la masasəḍok mawisiga apəhla vok ala la gày madəv kuḍa uwatà la aku, awiyà:
- 24 "Mana à gay aṅak la anu ma? Yesu, kak zil Nazaret! Kasà à waṅ kà mazanula ay? Gəsəl kà, kà kak Tsikaslaḡa uwana Zəzagəla asləl kak à waṅ."
- 25 Yesu asləh məlo à masasəḍok uwatà à gəl: "Dzà à ahəṅ titi! Sà dza uwaga lakəl ala!"
- 26 Ḍgaha masasəḍok mawisiga abəllakà dza uwatà la ndzəḍa, awiyà la kuda məṅga, ṅaha asàlla à kəl ala.
- 27 Ləv avàl atà à gay gesina. Tanəvəhà à vok: "Mana gay mawga uwanay asal magodəy ma? Mana uwaga ma, akor azlamasasəḍok mawisiga la ndzəḍa, ṅaha azlamasasəḍok mawisiga bay tafa à gəl à gay aṅha?"
- 28 Katskats azladza tazəhà gay lakəl aṅa Yesu la kutso Galili gesina.
- 29 Uwana tasà à uda la gày madəv kuḍa la aku kà, katskats Yesu ahàd atà la Yakuba ṅaha la Yuhana à mtəga aṅa Səmon la Andəre.
- 30 Məṅay aṅa Səmon la akəl la vok la slaka mahən à ahəṅ. Mok uwana Yesu abəz atà à vok kà, tapəhal gay lakəl aṅha.
- 31 Yesu ahàd à slaka aṅha, akəs la ahəl, atsizlləṅ ala, ṅaha akəl vok asàlla vok ala. La lig la ahəṅ mis uwatà azlək atà.
- 32 La mokokhu, mok uwana afats adatəḍ à ahəṅ, azladza tasəhla azlaməna dūvats aṅuvaw à waṅ à slaka Yesu, la azlauwana la masasəḍok mawisiga.
- 33 Azladza gudəṅ uwatà tahamà gay à vok la gay gamagəy aṅha.
- 34 Yesu awarəṅ ala azladza aṅuvaw uwana tas ṅərpə la azladūvats anik anik gesina, la makudəkəh azlamasasəḍok mawisiga, afəhà à atà akur à lig kà mapəhlaṅ ala aw, kà uwana atà: "Məsəl Yesu", tagòḍ.

- <sup>35</sup>Lebəŋ gà bəŋ, afats à lig mas à afik, Yesu atsizlla ala, ŋgaha asà à uda la kay, ahàd aŋha à fəta à abà ŋgaha adəv kudà la abatà.
- <sup>36</sup>Səmon atà la azlamanalay aŋha tahàd kà mayàh masla.
- <sup>37</sup>Uwana tabəzal à vok, "Azladza gesina tayàh kà!", tagòdàl.
- <sup>38</sup>Ama Yesu agòd à atà: "Məhàd à azlagudəŋ anik anik, gədàpəhay gay Zəzagəla la abatà babay, kà uwana gəsà à waŋ kà madàh sləray uwaga."
- <sup>39</sup>Kiya uwaga auguzàhàh la kutso Galili gesina. Apàh gay matsidəyga la azlagay madəv kudà aŋatà la aku, ŋgaha akudəkàh azlamasəsəđok mawisiga à uda.
- <sup>40</sup>Masla akəl zagəla asà à waŋ à slaka Yesu, akədèdàl à huma à gay, anàval: "Kamkam, baŋa asa à ka kà, kaslala vok kà mawur gi ala!"
- <sup>41</sup>Vok ahəm à Yesu, abiyà ahəl ala, adəbani, ŋgaha agòdàl: "Asa à gi, wùr ala!"
- <sup>42</sup>Katskats akəl zagəla asəl à vok ala, awùr ala.
- <sup>43</sup>La lig la ahəŋ, Yesu awùl à masla la mafahal akur à lig, agòdàl:
- <sup>44</sup>"Tsənàŋ lela, kapəh uwaga à dza anik aw, ama hàd kadàpəhla vok à masla mav tatak à Zəzagəla, kà kadawurla, ŋgaha và tatak uwana Musa apəh à ahəŋ kà masəlay kà kawùr ala."
- <sup>45</sup>Ama dza uwatà ahàd, adzəkà mapəhay à azladza gesina lakəl aŋa mawurla aŋha. Gay gà la uwaga à uwana Yesu aslala vok kà mad gudəŋ à abà la dazuwaya aw. Kà uwaga à uwana Yesu adzà à ahəŋ la uda la fəta la abà, la abatà bay, azladza tadàh à awtày à slaka aŋha la kəla slaka gesina.

## Mark 2

- <sup>1</sup>La lig mahənay ŋuv Yesu ahàd à Kapernahum aya. Uwana tatsənàŋ Yesu la kay kà,
- <sup>2</sup>azladza aŋuvaw tahamà ahəŋ tsəràh à uwana slaka atəm à ahəŋ baməraka la gəl akəl aw, apəh à atà gay Zəzagəla.
- <sup>3</sup>Ŋgaha azladza anik tasà à waŋ à slaka aŋha, tasəlla dza makalàh à vədàh gà à waŋ, azladza ufad la tsəh tazəbay.
- <sup>4</sup>Ama tabəz à tetəvi kà madla à slaka Yesu aw, kà uwana maham à ahəŋ dza aŋuvaw la ahəŋ, tadala à gəl gày à afik, tapokwà gəl gày uwana Yesu la kay la afik, uwana tapokwàŋ tadzilà dza makalàh à vədàh gà uwatà à gày la kəslah gà.
- <sup>5</sup>Uwana Yesu anəŋàŋ madiŋal gəl à vok aŋatà məŋga, agòd à dza makalàh à vədàh gà uwaga: "Bəzi gulo, tsakana aŋak adəmatsila!"
- <sup>6</sup>Ama azladza anik la tataka azlaməna mapəhla wakità seriya la abà la slaka madzàh madzay la abatà, tadzùgw la gəl aŋatà:
- <sup>7</sup>"Kà mana dza uwanay apəhay mawisiga lakəl aŋa Zəzagəla kiya uwaga ma? Dza aslala vok aŋa mamats tsakana à dza ala aw, say Zəzagəla pəra!"

<sup>8</sup>Katskats Yesu asəl uwana tadzugway la ləv aŋatà la tsəh, agòd à atà: "Kà mana kadzugwaw kiya uwanay la ləv aŋkul la tsəh ma?"

<sup>9</sup>Butu mala zlazladà magodáy: gədámats à ka tsakana aŋak ala takay? Awma: Sà à afik, zəb kəslah aŋak, həd aŋak takay?

<sup>10</sup>Ama asa à gi kasəlaw, kà gi kona aŋa dza, ŋgaha kà gi la masəlay aŋa mamats tsakana aŋa azladza gudəŋ à vok ala:

<sup>11</sup>Sà à afik, zəb kəslah aŋak, həd mtəga aŋak! Gəgod à kak", Yesu agòd à dza makaləh à vədah gə.

<sup>12</sup>Katskat asà à afik, azəb kəslah aŋha. Uwana azladza gesina tanəŋəŋ adin aŋha, ləv avəl à atà à gay gesina, tazləbà Zəzagəla, tagòd: "Mədanəŋəŋ dikidiki kiya uwanay aw!"

<sup>13</sup>Yesu awùlla à gay dərəv aya, sləm aŋha kà dərəv Galili. Azladza aŋuvaw tahamà à waŋ à slaka aŋha, ŋgaha atàpatàla.

<sup>14</sup>Uwana adà à awtəy, anəŋəŋ Levi, kona aŋa Alfe, adadza madzay la gəy mazəb hadama la aku. Yesu agòdal: "Sà à afik, nəfà à gi!" Levi asà à afik, anəfà.

<sup>15</sup>La lig la ahəŋ Yesu la azlaməna matapla aŋha tahəd à mtəga Levi kà mazuw tatak may. Azlaməna mazəb hadama aŋuvaw la azlaməna tsakana aŋuvaw, tadzàhà madzay atà nna, kà uwana azladza tsəhay gə uwaga aŋuvaw tanəfà atà aya.

<sup>16</sup>Azlaanik la tataka azlamadzahaga aŋa wakitə seriya aŋa Zəzagəla la abà, uwana la tataka aŋa azla Farisəya la abà, tanəŋəŋ kà Yesu azùw tatak may la slaka gə la azlaməna mazəb hadama la azladza tsakana, tagòd à azlaməna matapla la slaka aŋha: "Kà mana azuw tatak may la azlaməna mazəb hadama la azlaməna tsakana ma?"

<sup>17</sup>Uwana Yesu atsənà uwaga, agòd à atà: "Azladza uwana dūvats aza à ata aw, kà tayəh mad dokwtar aw, say azlaməna dūvats pəra. Gi, gəsà à waŋ kà mazalay azladza uwana tadzugw kà azladziriga aw, ama gəsà à waŋ kà, kà mazal azlaməna tsakana."

<sup>18</sup>Azlaməna matapla aŋa Yuhana, masla madəh batem la azla Farisəya takasəh nəlay la azlakaslà anik anik. Azladza anik tasà à waŋ à slaka Yesu, tanəval: "Kà mana azlaməna matapla aŋa Yuhana, masla madəh batem, la azla Farisəya kà takas nəlay, ama kà mana azlaməna matapla la slaka aŋak kà takas nəlay aw ma?"

<sup>19</sup>Yesu agòd à atà: "Baŋa dza azəb mis azaləh azlaslawda aŋha kà mazuw tatak may, ma tasək tatak may la mavakay uwatà aŋa makəs nəlay takay? Awaŋ, tasəkal aw, tazuway.

<sup>20</sup>Ama mok uwana zil mis adədin aŋha la slaka aŋatà, la uwana tadəkas nəlay adəgay la mok uwatà."

<sup>21</sup>Yesu agagəzlla atà ala la matapatla mawga aŋha uwanay: "Dza atsap lukut mawga à maviyaga à vok aw. Baŋa adəhəŋ kità kà, lukut mawga akwəh maviyaga à tsəh, ŋgaha makwəhla aŋha azəh à tsəh aya.

<sup>22</sup>Dza adaw iyaw aṅa mayyay ahàf mawga à kiwa iyaw maviyaga à agu aw, kà uwana à baṅa amsəlila kà, akwàh kiwa ala. Dgaha iyaw aṅa mayyay ahàf la kiwa iyaw tadàuwisila. Ama aduwa à vok kà tadaw iyaw aṅa mayyay ahàf mawga à kiwa mawga à agu, suwaṅ.”

<sup>23</sup>Vərđi anik la vuđ maduw ləv, Yesu aguwà à awtày la gay guf nalkama. Azlaməna matapla la slaka aṅha tadzəkà mabərədahay nalkama la tetəvi la ama.

<sup>24</sup>Azla Farisəya tagòđ à Yesu: "Kà mana azlaməna matapla la slaka aṅak tadàh tatak uwana azlayla kà à vok aw ma? Kà uwana wakità seriya gami avəra gay kà tatak uwaga la vuđ maduw ləv.”

<sup>25</sup>Yesu awùlla à atà ala: "Kadzèṅàw dikiđiki aw uwana David adàhàṅ la mok uwana may akès la azladza uwana la slaka aṅha aw uwà?”

<sup>26</sup>Ahàd à gày Zəzagəla à agu, azəb kaf uwana tafàh à huma aṅa Zəzagəla, azùw. Mok uwatà kà, Abiyatar la uwana məṅga aṅa azlaməna mav tatak à Zəzagəla. Wakità seriya gami kà, avà tetəvi kà azlaməna mav tatak à Zəzagəla kà mazuway pəra. Ama David azəb, azùw, ṅgaha avàh à azlaməna aṅha bay.”

<sup>27</sup>Yesu agòđ à atà aya: "Zəzagəla adàhà vuđ maduw ləv kà, kà madz à ahəṅ delga aṅa dza, awkà Zəzagəla adàhà dza kà aṅa vuđ maduw ləv aw.

<sup>28</sup>Gay gà la uwaga gi Kona aṅa dza la uwana Sufəl aṅa vuđ maduw ləv.”

### Mark 3

<sup>1</sup>La vərđi anik, Yesu ahàd à gày madəv kuđa à agu aya. La gày uwatà la aku kà, dza la ahəṅ uwana ahàl aṅha mamətsayga.

<sup>2</sup>Azladza la ahəṅ la gày madəv kuđa la aku, tanəwəz Yesu à baṅa awur dza ala la vuđ maduw ləv, kà atà mabəzal à tsəh la gay la abà, kà uwana akès mapəhay lakəl aṅa vuđ maduw ləv aw.

<sup>3</sup>Yesu agòđ à dza uwana ahàl aṅha mamətsayga: "Sà à afik, sà à waṅ à huma azladza gesina!”

<sup>4</sup>Dgaha anəv azladza uwana tatsəkəl yewdi à gay: "Mana wakità seriya gami apəh à anu ma? Tetəvi la ahəṅ kà madàh delga la vuđ maduw ləv takay? Awma madàh mawisiga takay?" Asà à atà mawulla gay à uda aw. Takwès.

<sup>5</sup>Yesu atsəkà à atà yewdi à gay la mazinal à gəl. Ama apək ləv məṅga kà madzugway mawisiga aṅatà. Kiya uwaga agòđ à dza uwatà: "Biya ahàl ala!" La kirim yewdi awur ala.

<sup>6</sup>Batsàrà, uwana azla Farisəya tanəṅ uwaga kà, tasà à uda la gày Zəzagəla la aku, tahàd, tahamà gay à vok la azladza maham à ahəṅ gà uwana tatsən vok gay la Herod kà aṅa magəđ uwana à afik azlayla makəđla Yesu.

<sup>7</sup>Yesu la azlaməna matapla aṅha tazà vok. Tahàd à gay dərəv aṅa Galili, maham à ahəṅ dza aṅuvaw tanəfà atà. Azladza tasàhà à waṅ la makoray Galili, la Yahudiya,

- <sup>8</sup>la Urusalima dagay la gay dzika makoray aña Idumiya tsəràh à gay dzika aña dərəv uda aña mukwà Urdun, la azladza uwana tadzà à ahəŋ nekwa la gudəŋ Tir la Sədon. Magol maham à ahəŋ dza tasàhà à wəŋ à slaka Yesu kà uwana tatsənəŋ lakəl aña tatak uwana adfahàhəŋ.
- <sup>9</sup>Yesu agòd à azlaməna matapla la slaka aŋha: "Yàhàw à gi bəzi kəslah iyaw, kà maham à ahəŋ dza aña maŋisl gi aw."
- <sup>10</sup>Yesu awurà azladza ala aŋuvaw, gay gà la uwaga azladza uwana tasà ŋgərpa la azladuvats anik anik tavàhà vok kà madəbani masla.
- <sup>11</sup>La mok uwana azladza uwana la azlamasasədok mawisiga tanəŋà masla, tatàdàl à huma la mawiyay, tagòdàl: "Kak, Kona aña Zəzagəla!"
- <sup>12</sup>Ama Yesu aslèhà atà məl à gəl la ndzəda, kà mapəhla masla ala aw.
- <sup>13</sup>Yesu ahəd à dadəgwal à afik, ŋgaha azàl azladza uwana asàl, kà tatsà à wəŋ à slaka aŋha.
- <sup>14</sup>Yesu akàsàni azladza kulo gəl aŋha səla, ŋgaha azàla atà ala azlaməna matapla la slaka aŋha, agòd à atà: "Gəkàsàni akul kà madz à ahəŋ la slaka gulo, ŋgaha gədàslal akul kà mapəh gay Zəzagəla.
- <sup>15</sup>Gəvə à akul maslay kà makudəkàh azlamasasədok mawisiga."
- <sup>16</sup>Aganay azladza kulo gəl aŋha səla uwana akàsàni atà: Səmon uwana Yesu avàl sləm Piyer;
- <sup>17</sup>Yakuba la deda aŋha Yuhana, azlabəza aña Zebede. (Yesu avà à atà sləm Bowanergəs, asal magodəy: maslèh məl aña habaga, kà uwana tasaf à mapak ləv aw)
- <sup>18</sup>La Andəre; Filip; Bartelemi; Mata; Tomas; Yakuba, bəzi aña Alfe; Tade; Səmon zil Kananan
- <sup>19</sup>ŋgaha Yudas Iskariyot, uwana adàda kà məzam à Yesu à gəl.
- <sup>20</sup>Yesu ahəd à mtəga aña dza anik. Maham à ahəŋ dza tahamà gay à vok aya, kà uwaga à uwana Yesu la azlaməna matapla la slaka aŋha tabəzà tetəvi kà mazuw tatak may aw.
- <sup>21</sup>Mok uwana azlaməna hud gəy aŋha tatsən uwaga, tahəd kà masəla à mtəga, kà uwana azladza tagòd kà: "Gəl adakadàl à vok!"
- <sup>22</sup>Azlamadzahaga aña wakità seriya tasà à ahəŋ la Urusalima tagòd: "Masla la Belzəbul, sufəl aña zagəla zagəla!", asal magodəy sufəl aña azlamasədok mawisiga. Azlaanik tagòd: "Sufəl aña azlamasasədok mawisiga avàl maslay kà makudək azlamasasədok mawisiga."
- <sup>23</sup>Yesu azàl azladza à slaka aŋha, agòd à atà: "Kakay sufəl aña masasədok mawisiga aslala vok aña makudək seteni à uda aya ma? Akəsà vok aw.

- <sup>24</sup>Baṅa azladza la makoray tekula tatsak ala kà, makoray sufəl uwatà kà aslala vok madz à ahəṅ aw.
- <sup>25</sup>Baṅa azladza la huɖ gày tatsak ala kà, huɖ gày uwatà aslala vok madz à ahəṅ aw.
- <sup>26</sup>Baṅa seteni ap guvəl à vok aṅha à adi kà, makoray aṅha adavahla, aslala vok aṅha madz à ahəṅ aw, ama makoray uwaga adàdəv à gay.
- <sup>27</sup>Dza aslala vok aṅha mad à gày aṅha masla ndzəɖà kà mazəɖ tatak aṅha aw, say atsərkwiṅ dadàṅ, ṅgaha aslala vok kà mahəl tatak aṅha gesina.
- <sup>28</sup>Gəpəh à akul la dziriga: Tsakana gesina la gay mawisiga gesina uwana azladza tapəhay, Zəzagəla adàmatsataṅ ala.
- <sup>29</sup>Ama dza uwana apəh mawisiga lakəl aṅa Masasəɖok Zəzagəla kà, tsakana uwaga adàmatsila ɖikiɖiki aw, ama tsakana uwaga adàdza à ahəṅ aṅa koksikoksi.”
- <sup>30</sup>Yesu apəh kiya uwaga kà, kà uwana azlaanik tagòɖ kà: "Masla la masasəɖok mawisiga", tagòɖ.
- <sup>31</sup>Iyà la azladede aṅa Yesu tasà à waṅ, tasləl dza kà mazal à atà la uda.
- <sup>32</sup>Azladza aṅuvaw tadzàhà madzay la makəla aṅa Yesu, tagòɖal: "Iyà la azladede aṅak la uda, tazala ka!"
- <sup>33</sup>Yesu awul à atà ala: "Uwa iyà gulo la azladede gulo uwa?"
- <sup>34</sup>Ḑgaha Yesu anərəz azladza uwana la makəla aṅha lakəl, agòɖ à atà: "Aganay azlaiyà la azladede gulo la abanay.
- <sup>35</sup>Kà uwana kəla uwabeyuwi uwana adàh mawoyəṅ aṅa Zəzagəla la uwana azladede gulo la azlaiyà gulo."

## Mark 4

- <sup>1</sup>Yesu atàpla à maham à ahəṅ dza la gay dərəv aṅa Galili aya. Aṅuvaw tahamà gay à vok la slaka aṅha. Kà maham à ahəṅ dza, Yesu adà à kəslah iyaw à afik, adzà madzay. Ama maham à ahəṅ dza la gay dərəv.
- <sup>2</sup>Yesu apəhatàla azlatatak aṅuvaw la gay la gay la abà, ṅgaha agòɖ à atà la matapla aṅha la abà:
- <sup>3</sup>"Tsəbàwwal sləm!", Yesu agòɖ à atà, "Dza anik asà à uda kà mad maslək hi.
- <sup>4</sup>Mok uwana adadzəka maslək hi à guf aṅha à abà, fofulo anik tanis à gay tetəvi, azladīyaṅ tasà à waṅ, tazùw à gay.
- <sup>5</sup>Azlaanik aya tanis à pala akur à afik uwana kutso lakəl məṅga aw, katskats asà à uda, kà uwana kutso la pala akur lakəl məṅga aw.
- <sup>6</sup>Mok uwana afats adadzəka mavəɖay la ndzəɖà agulà hi ala kà uwana abək slilih kà à pala à akur à afik.

- <sup>7</sup>Gotənaŋ fofulo anik tanis à atək à abà. Uwana atək azigənaŋ akəd̄f à tsəh, atsà à gəl aw.
- <sup>8</sup>Bà gotənaŋ fofulo anik tanis à kutso delga gà à abà. Asà à uda lela azigəh lela, ŋgaha atsà gəl lela. Anik abək à adi huməts, anik abək à adi zuŋ, ŋgaha anik aya bay zazuŋ səla.”
- <sup>9</sup>Yesu agòd̄f à atà: "Tsəbàwwal sləm lela, wàd̄aw vok à uda kà mafal sləm!"
- <sup>10</sup>Mok uwana Yesu kokudà aŋha, azladza uwana tatsəbal sləm, la azlaməna matapla la slaka aŋha kulo gəl aŋha səla, tasà à waŋ à slaka aŋha, ŋgaha tanəv godega aŋa gay la gay la abà uwatà.
- <sup>11</sup>Yesu agòd̄f à atà: "Akul kà, Zəzagəla avà à akul nasiri aŋa makoray aŋha, ama azladza anik tatsən tatak gesina kà say la gay la gay la abà pəra.
- <sup>12</sup>Kà uwaga à uwana: "Tanərzay la yewdi aŋatà babay, ama tanəŋaŋ la dziriga aw, Tatsəbal sləm la sləm aŋatà babay, ama tatsənaŋ la dziriga aw, Kiya uwaga kà atà aŋa mawul à slaka Zəzagəla aw, ŋgaha Zəzagəla aŋa amatsa à atà tsakana aŋatà ala aw!"
- <sup>13</sup>Ŋgaha Yesu anəv à atà gay ala: "Katsənəw gay la gay la gay la abà uwanay aw takay? Kakay kadatsənaw gay la gay la abà anik zla ma?
- <sup>14</sup>Masla masləkay kà masla mapəh gay Zəzagəla.
- <sup>15</sup>Azladza anik kà bokuba gay tetəvi uwana fofulo anis ala ama: Mok uwana tatsənəŋ, katskats seteni asa à waŋ, abəd̄f atà à ləv ala gay uwana tasləkà à ləv à tsəh.
- <sup>16</sup>Kiya uwaga bay la azladza anik tadəbani slaka pala akur gà, à uwana gay anis à afik, katskats uwana tatsən gay kà takəs la marabay.
- <sup>17</sup>Ama tasəkəl adàla slilih la ləv aŋatà la tsəh aw, tafəl sləm la lela aw, takəs kà aŋa kaslā ŋuv pəra. La mok uwana ŋgərpa la matərəbay adabəz atà kà gay Zəzagəla kà, katskats tasək madiŋ gəl à vok aŋatà la tsəh ala.
- <sup>18</sup>Azladza anik aya kà tadəbani à vok la gəy atək uwana fofulo anis à abà. Tatsəb sləm à gay.
- <sup>19</sup>Ama adi aŋa gudəŋ à vok uwanay la matsiday aŋha uwana apapət azladza, adà à ləv aŋatà à tsəh, akəd̄f gay masləkayga uwaga à tsəh, ŋgaha azladza uwaga tav mayyay aw.
- <sup>20</sup>Azladza anik aya gotənaŋ kà tadəbani à vok la kutso uwana fofulo anis à abà. Atà tatsəb sləm à gay lela, tafəl sləm lela, tavə mayyay, anik abək à adi huməts, azlaanik zuŋ, azlaanik aya gotənaŋ zazuŋ səla.”
- <sup>21</sup>Yesu agòd̄f à atà aya: "Dza af fənəs à tsəh tasà takay, awma à tsəh gogozlāh ay? Awaŋ, aduwa vok kà dza af fənəs à slaka dzəgamma gà.
- <sup>22</sup>Bokuba magodfay, tatak mahadəŋ à ahəŋ gà ada à gay mapəhla à vok ala gà. Ŋgaha nasiri gesina, azladza tadəsəlay.

- <sup>23</sup>Tsèbàwwal sləm lela à baŋa sləm aga akul lakəl.”
- <sup>24</sup>Yesu agòd à atà aya: "Dahàw haŋkəli lakəl aŋa tatak uwana katsənaŋwəŋ la uwana kaɗahawwəŋ. La daram uwana kagoraw la azladza, Zəzagəla adàgor akul la uwaga la mazakullaŋ à gəl suwəŋ.
- <sup>25</sup>Kà uwana dza uwana af sləm à uwana Zəzagəla avəl, adàbəzal mənŋga aya. Ama dza uwana af sləm à tatak aw, tadàdəvalla à ahəl ala ŋuv gə uwatà Zəzagəla avəl aya babay.”
- <sup>26</sup>Yesu agòd à atà aya: "Məslala vok magagazləla makoray Zəzagəla kà la dza uwana asləkà fofulo à guf aŋha à abà.
- <sup>27</sup>La lig la ahəŋ kà say madzəhal aŋha kəla mahənaŋ pəra. La kaslə uwana fofulo adas à uda azigən la kokudà masəlay aŋha.
- <sup>28</sup>Kutso azigəna makəl gay aŋa tatak: Teraŋa kavak gə, ŋgaha masəh gəl à uda, la maɓək bəza adi.
- <sup>29</sup>Mok uwana tatak adahənaŋ, dza adzəka sləray la mavaw aŋha, kà uwana matsəɗ tatak adasa à wəŋ.”
- <sup>30</sup>Yesu anəv à azladza la gay la: "La mana makoray Zəzagəla adəbani vok ma? La gay la gay la abà ma uwala məgagazləla makoray aŋha la?
- <sup>31</sup>Adəbani vok kà la tsəhay uwana bəziga gə la tataka azlatsəhay fofulo anik la abà gesina bokuba tsəhay hamadz.
- <sup>32</sup>Ama baŋa azigənaŋ kà, aduwa azlababasl anik anik gesina. Azigənaŋ mənŋga, aduwa azlaahəf anik, azləl ahəl mənŋga, ŋgaha azladfiyaŋ tadza à ahəŋ la dzəgay aŋha la abà.”
- <sup>33</sup>Kiya uwaga Yesu apəh à atà gay Zəzagəla la azlagay la gay la abà aŋuvaw bokuba uwanay. Apəh à atà kà bokuba uwana azladza taslala vok aŋa matsənaŋ.
- <sup>34</sup>Apəh à atà kà bə la gay la gay la abà pəra. Ama uwana masla la azlaməna matapla la slaka aŋha kokudà gəl aŋatà kà, apəh à atà ala tatak gesina la paraka.
- <sup>35</sup>La mokokhu vuɗ uwatà, Yesu agòd à azlaməna matapla la slaka aŋha: "Məhəd à gay dərəv uda anik.”
- <sup>36</sup>Kiya uwaga tasək à maham à ahəŋ dza à ahəŋ, azlaməna matapla la slaka aŋha tadà à kəslah iyaw uwana à afik, Yesu atsà à vok à afik. Azlakəslah iyaw anik la ahəŋ la abatà bay aw.
- <sup>37</sup>Magol kular adzəkà madəɗay. Magaŋtsay aŋa iyaw adəh à kəslah iyaw à abà, kiya uwaga kà ahənəŋ ala.
- <sup>38</sup>Yesu agə la godega kəslah iyaw la madzəhal gə, afà gəl à tatak maf gəl à afik à afik. Azlaməna matapla la slaka aŋha tatsənaŋ ala la magodəl: "Mənŋga, məzləmətsay, kafa à anu gəl aya aw, takay?”



<sup>39</sup>Yesu atsənà ala, aslèh mèlo à kular à gəl. Apèh la ndzəfà à magan̄tsay aṅa iyaw: "Dzà à ahəṅ titi!" Kular atsizl à ahəṅ, iyaw adzà à ahəṅ titi, magan̄tsay aṅa iyaw la ahəṅ aya aw, tsiriya.

<sup>40</sup>La lig la ahəṅ agòd à azlaməna matapla la slaka aṅha: "Kà mana guba akès à akul ma? Kadiṅaw gi gəl à vok aw ay?"

<sup>41</sup>Guba akès atà mən̄ga tagòd kà atà kà atà: "Uwa à dza uwanay, amiyaka afad la iyaw bay kà takəs gay aṅha uwa?"

## Mark 5

<sup>1</sup>La lig la ahəṅ tabəzà à gay dərəv uda aṅa gay dərəv aṅa Galili uwana la kutso Gerasəniya la abà.

<sup>2</sup>Uwana Yesu adasa à ahəṅ la kəslah iyaw la afik, batsàrà dza anik anəṅà Yesu kərkər, asà à waṅ kà magagamay səla. Dza uwaga asà à waṅ kà la gày zəvay la abà, dza uwatà kà zagəla zagəla lakəl.

<sup>3</sup>Adzà à ahəṅ kà la mabuwaṅ zəvay la aku. Dza aslàla vok aṅa mawadəṅ à ahəṅ ba amiyaka la mazakazak aw.

<sup>4</sup>Aṅuvaw tawəcāhalla ahəl à ahəṅ la azlamatatasla ahəl, la sasala asik la azlamazakazak aṅa ada. Ama aslāhàhəṅ ala la azlamanal sasala ala. Dza aslàla vok kà makəsiṅ à ahəṅ aw.

<sup>5</sup>Koksikoksi kəla mahəṅay la mavakay auguzahahay la azlagəl zəvay la azlamatəkukurùh la afik la mawiyay la masàh vok aṅha la akur.

<sup>6</sup>Dza uwatà anəṅà Yesu kərkər ṅgaha ahəd la mahoyay à huma aṅha, atəd à Yesu à huma.

<sup>7</sup>Awiya la ndzəfà: "Masak à ama Yesu, Kona aṅa Zəzagəla uwana la afik. Kamkam gənava à ka, kà la sləm aṅa Zəzagəla: Sàk à gi, bàsak, kavà à gi ṅgərpa aw."

<sup>8</sup>Apèh uwaga kà, kà uwana Yesu afəl gay à gəl: "Kak zagəla zagəla: Sà à dza uwaga la kəl ala."

<sup>9</sup>La abatà Yesu anəval: "Uwa sləm aṅak uwa?" Masla zagəla zagəla agòdāl: "Sləm gulo kà maham à ahəṅ, kà uwana anu aṅuvaw.

<sup>10</sup>Kamkam mədəv à ka kudà, kakudək anu la gudəṅ uwanay aw!"

<sup>11</sup>Maham à ahəṅ namzi la ahəṅ la abatà uwana tadzadzàr à vok nekwa la matəkukurùh la afik.

<sup>12</sup>Azlamasasədok mawisiga tanəv à Yesu, tagòdāl: "Sləl anu à maham à ahəṅ namzi à abà pəra, v à anu tetəvi, məda à atà à gəl."

<sup>13</sup>"Aya, dāw!" Yesu agòd à atà. La kità azlazagəla zagəla tasà à dza uwatà lakəl ala, ṅgaha tahəd à azlanamzi à gəl gesina. Batsàrà, tahòy à ahəṅ, tavalàh à iyaw à abà, ṅgaha tasùfàh à abà. Azlanamzi uwaga gesina kà taslà dəbow səla.

- 14** Azlaməna manəŋla azlanamzi tahòy aŋatà, tadàla gay uwaga kà maziŋ azladza bəza gudəŋ la azlahuđ gudəŋ gesina la makoray uwatà. Azladza tasàhà à uda, tasà à waŋ kà manəŋ tatak uwana adàhà vok.
- 15** Uwana tabèz à slaka Yesu tanəŋà dza uwana agà la maham à ahəŋ zagəla zagəla lakəl, madza madzayga la lukut la vok, haŋkəli adawulla à gəl. Ləv avəl à azladza à gay. Guba akəs atà.
- 16** Azlaməna manəŋ uwana apakà vok gesina kà, tazàhà gay aŋa dza uwana la zagəla zagəla lakəl uwarà la aŋa azlanamzi gesina bay.
- 17** La abatà tagòđ à Yesu: "Kamkam, sà à uda la makoray gami." Yesu asà à afik, ahəd à slaka kəslah iyaw.
- 18** Mok uwana adà à kəslah iyaw à afik, dza uwana agà la azlazagəla zagəla lakəl uwarà, agòđ à Yesu: "Kamkam, asa à gi mədaw səla."
- 19** Ama Yesu avəl tetəvi aw: "Wùl à huđ gày aŋak, zàhàtəŋ uwana Sufəl Zəzagəla adàhàkəŋ gesina lakəl aŋa uwana vok ahàmàl kà kak!", agòđal.
- 20** Dza uwaga adà aŋha zla, ŋgaha adzəkà mapahay la makoray uwana sləm aŋha gudəŋ kulo, à tatak uwana Yesu adàhàləŋ gesina. Azladza gesina uwana tatsəb sləm à gay uwaga, gesina aŋatà, ləv avəl atà gay.
- 21** Yesu awùl à waŋ la gay dərəv uda anik la kəslah iyaw. La mok uwana adatsizl à ahəŋ la gay mukwà, maham à ahəŋ dza aŋuvaw ahamàl à adi.
- 22** Məŋga aŋa gày Zəzagəla asà à waŋ, sləm aŋha Yayrus. Uwana anəŋəŋ Yesu akədèđ à makəla asik aŋha.
- 23** Anàval, agòđal: "Bəzi dugu gulo azlāmətsay. Kamkam, sà à waŋ, kabək ahəl à bəzi à vok kà masla mawur ala ŋgaha kà masla abəz sifa aŋha aya."
- 24** Yesu asà à afik, tahəd atà səla, maham à ahəŋ dza aŋuvaw taŋisl Yesu.
- 25** Mis anik la ahəŋ la abatà, aŋiz akəllal à tsəh ala dagay mavakay kulo gəl aŋha səla.
- 26** Aday vok məŋga la madàh à slaka azlaməna mavàh yohof, az ləmana aŋha ala kà aŋuvaw. Ama aga ŋuləm aw: say mavədzehəŋ ala pəra.
- 27** Vərdi anik atsənəŋ tapəhay lakəl aŋa Yesu, kiya uwaga afà à vok à maham à ahəŋ dza à abà.
- 28** Adzùgw la gəl aŋha: "Baŋa gədəbani lukut aŋha pəra kà, gədàwurla", agòđ. Aguwà la lig aŋa Yesu, adəbani lukut aŋha.
- 29** Batsàrà makəlay aŋiz aŋha atsizl à ahəŋ, atapà vok aŋha kà adawur ala la đuvats aŋha la abà.
- 30** La mok uwatà Yesu atapà kà ndzəđà asà à uda la vok aŋha. Agolà vok à maham à ahəŋ dza à abà la magòđay: "Uwa à uwana adəbani lukut gulo uwa?"

<sup>31</sup>Azlaməna matapla la slaka aṅha tagòfal: "Nəṅà maham à ahəṅ dza taṅisl ka tsi, pəra kanav madəbiṅ ka aya ay?"

<sup>32</sup>Yesu anəṅà à makəla gəl kà masəl dza uwana adàhà uwaga.

<sup>33</sup>Anasl adadiya à mis à vok kà uwana asəl uwana adàhà vok la masla. Asà à waṅ, atəd à makəla asik aṅa Yesu, apəhal dziriga aṅha gesina.

<sup>34</sup>Yesu agòfal: "Dugu gulo, madiṅal gəl à vok aṅak awurà ka ala. Həd la wurwur, kadawurla la ṅgərpa aṅak la abà!"

<sup>35</sup>Mok uwana Yesu apəh gay uwaga kà, azlaməna masləlay tasà à waṅ la mtəga aṅa Yayrus, məṅga aṅa gày madəv kuḍa, tagòfal: "Dugu aṅak kà adamətsay, kà mana katərəb Sufəl aya ma?"

<sup>36</sup>Ama Yesu afà sləm à gay aṅatà aw, agòd à Yayrus: "Ləv aval à kak à gay, kasak à madiṅal gəl à vok aw!"

<sup>37</sup>Avà tetəvi à dza kà malakəṅ aw, say Piyer, Yakuba la deda aṅha Yuhana pəra.

<sup>38</sup>Mok uwana abəz à mtəga aṅa məṅga aṅa gày madəv kuḍa, Yesu atsənà hulolo aṅa azladza, la mataway, la mawiyay məṅga.

<sup>39</sup>Yesu adà à gày, agòd à atà: "Kà mana kadzudəḍəkaw la mataway ma? Dugu uwanay kà, adamətsay aw, ama adzəhal pəra!"

<sup>40</sup>Uwana azladza tatsənà uwaga: "Uwàà...", tasakwà à ahəṅ, takəḍaslal. Kà uwaga: "Dàw à uda gesina!", agòd à atà. Say Baba la iyà aṅa dugu la azlaməna matapla la slaka aṅha makər uwatà pəra tagəd à gày. Uwana tahəd la gày uwana la aku tahənà dugu à agu.

<sup>41</sup>Yesu akəs bəzi dugu la ahəl, agòfal: "Talitha koum" (Bokuba magoḍay: Bəzi dugu sà à afik, gəgod à ka)

<sup>42</sup>Katskats bəzi dugu asà à afik, adzəkà maday. (Mavay aṅha kà kulo gəl aṅha səla) La mok uwana tanəṅà uwaga kà, ləv avəl à atà à gay kaykay.

<sup>43</sup>Ama Yesu afàhà à atà akur à lig kà aṅuvaw, kà atà mapəh à dza anik aw. Ḍgaha agòd à atà: "Vàwwal tatak may!"

## Mark 6

<sup>1</sup>Yesu azà vok la slaka uwatà, awùl à gudəṅ aṅha, uwana azigən la abà. Azlaməna matapla la slaka aṅha tanəfà.

<sup>2</sup>Uwana vuḍ maduw ləv adasa à waṅ, adzəkà matapla tatak à azladza la gày madəv kuḍa la aku. Maham à ahəṅ dza aṅuvaw la abatà. Uwana tatsəbal sləm gesina kà, ləv avəl à atà à gay, tagòd: "Lala abəzà tsəhay gay uwanay la? Dzəba matsihila mana gà à uwanay abəzal ma? Kakay adəhəṅ à tsəhay tatak dzəba aṅha səla aw gà uwanay ma?"

- <sup>3</sup>Dza uwanay kà masla mapəḏ kəslah aw takay? Kona aṅa Mariyama, ṅgaha deda aṅa Yakuba, la Yosəs, la Yahuda, la azla Səmon aw ay? Azladedda aṅha degagamga bay atà la uwanay anina la abanay aw takay?" Kà uwaga à uwana tadiṅal gəl à vok aw.
- <sup>4</sup>Yesu agòḏ à atà: "Tazləḅ masla mapəhal gay à ahàl aṅa Zəzagəla baməraka la mali, ama la gudəṅ aṅha kà tazləḅ masla aw, la tataka azlayaga aṅha la abà, azlaməna gày aṅha kà tazləḅay aw!"
- <sup>5</sup>Yesu aslàla vok kà madàh nadzipo la abatà dəṅ aw, say abək ahàl à azlaməna dūvats anik à gəl ṅgaha awàr atà ala.
- <sup>6</sup>Ləv avàlal à gay kà uwana madiṅal gəl à vok aṅatà la ahəṅ aw. La lig la ahəṅ Yesu auguzàh la gudəṅ la abà gesina kà matapla gay Zəzagəla à azladza.
- <sup>7</sup>Yesu azàl azlaməna matapla la slaka aṅha kulo gəl aṅha səla, adzəkà masləl atà la səla səla, avà à atà maslay kà makor azlamasasəḏok mawisiga.
- <sup>8</sup>Afàh à atà akur à lig, agòḏ à atà: "Kazəḅaw tatak à ahàl kà aṅa tetəvi aw, tatak may aw, kiwa aw, sili la zliba la aku aw, say azəva pəra.
- <sup>9</sup>Bəkàw kwimik à asik, ama katsəpaw lukut səla à vok aw!"
- <sup>10</sup>Agòḏ à atà bay: "Baṅa kadaw à gudəṅ à abà kà, dzàw à ahəṅ la mtəga aṅa dza uwana akəs akul lela tsəràh à uwana kadaw aṅkul la abatà.
- <sup>11</sup>Azladza gudəṅ uwana takəs akul aw, ṅgaha tatsən akul aw kà, kadaw aṅkul la abatà, dèḏàw burburu la asik ala kà mapəh à atà ala kà tadàh mawisiga."
- <sup>12</sup>Azlaməna matapla la slaka aṅha tahəd mapəh gay Zəzagəla, kà à azladza aṅa mapəh gay ləv ala, kà atà tasak à tsakana aṅatà.
- <sup>13</sup>Takudəkàh azlamasasəḏok mawisiga aṅuvaw, tadàhàṅ amàl à azlaməna dūvats à gəl, aṅuvaw tawàr ala.
- <sup>14</sup>Sufəl Herod atsənà gay aṅa Yesu, kà uwana azladza tasəl sləm aṅha baməraka la mali, tagòḏ: "Yuhana masla madàh batem adawul à uda, gay gà la uwaga aslàla vok aṅa madàh nadzipo", tagòḏ.
- <sup>15</sup>Azlaanik tagòḏ aya: "Uwaga kà Eliya", azlaanik bay: "Uwaga masla masləl à waṅ aṅa Zəzagəla bokuba tekula la tataka aṅa azlaməna mapəh à atà gay à ahàl uwana la abà uwarà", tagòḏ.
- <sup>16</sup>Uwana Herod atsənà gay uwaga, agòḏ: "Uwaga Yuhana masla madàh batem uwana gəsləl dza kà manats gəl aṅha, masla la uwana adawul à uda la mamətsay."
- <sup>17</sup>Kà uwana Herod la gəl aṅha apəh gay makəs Yuhana dagay uwarà, kà aṅa mawodəṅ à gày daṅay à agu. Adàhàṅ kiya uwaga kà gay aṅa Herodiya, mis aṅa deda aṅha Filip, uwana Herod azəḅ.
- <sup>18</sup>Ama Yuhana agòḏ à Herod: "Uwaga kà delga aw, kà aṅa mazəḅ mis deda aṅak aw!"

- 19**Kà uwaga Herodiya apàk lèw lakèl aṅa Yuhana, ayàh kà makòf masla. Ama abèzà à tetèvi aw kà Herod.
- 20**Kà uwana guba azà Herod kà Yuhana, asèl kà masla dza dziriga ṅgaha sətaka gà, anəṅla masla lela, asàl matsən gay aṅa Yuhana, ama uwana adatsen gay aṅha gesina kà, haṅkèli aṅha awisa ala.
- 21**Mavakay delga aṅa Herodiya adasa à waṅ, uwaga mavakay aṅa mayyi Herod. Masla atà kaf à uda kà aṅa azlaməna aṅha, kà azlaməṅga aṅa azlaslodzi la azlaməṅga aṅa kutso Galili.
- 22**Bəzi dugu aṅa Herodiya adà à gày, ahàb dəs, arabà lèw aṅa Herod la azladza uwana tadzàh madzay atà nna. Sufèl Herod agòf à dahalay: "Mana asa à ka gèwà à ka ma? Nàv uwana asa à ka gesina, gèwà à ka", agòfàl.
- 23**Azùwal mawadáy: "Uwana kanav à gi gesina gèwà à ka, amiyaka tenma aṅa makoray gulo bay."
- 24**Dahalay asà à uda, agòf à iyà aṅha: "Mana gənavay ma?" Agòfàl: "Nàval gəl aṅa Yuhana masla madàh batem."
- 25**Katskats amərəà vok kà mad à slaka sufèl, anəv la magodáy: "Asa à gi kanèl gi gəl aṅa Yuhana masla madàh batem à tasà à abà."
- 26**Uwaga kà azà à sufèl la lèw məṅga, ama kà mazuw mawadáy aṅha uwana azùw la huma aṅa azladza kà, aslala vok kà makosal aw.
- 27**Katskats sufèl aslèl slodzi kà manèl gəl aṅa Yuhana, kà aṅa masèlla à waṅ. Slodzi ahàd à gày daṅay à agu, anèl gəl aṅa Yuhana.
- 28**Asèlla gəl aṅa Yuhana à waṅ la tasà la abà, avà à dahalay. Dahalay bay adàla à iyà aṅha.
- 29**Mok uwana azlaməna asik aṅa Yuhana tatsən uwaga, tasà à waṅ kà mazəb vok aṅha, kà malay.
- 30**Azlaməna matapla la slaka aṅha tawùl à waṅ à slaka Yesu. Tapèhal uwana tafahəṅ, la uwana tatàpla à azladza.
- 31**Azladza aṅuvaw tasà à waṅ, aṅuvaw tadəṅ atà, kiya uwaga Yesu la azlaməna matapla la slaka aṅha tabèzà à tetèvi kà mazuw tatak may aw. Gay gà la uwaga Yesu agòf à atà: "Məhàd kokudà gami à fəta a abà, kà anu aṅa maduw lèw ṅuv."
- 32**Tahàd la kəslah iyaw kokudà gəl aṅatà à fəta à abà.
- 33**Ama azladza aṅuvaw tanəṅà atà à uwana taday, aṅuvaw tasèl atà. Tasəhà à uda la gudəṅ la abà gesina tamərəà vok la asik ṅgaha tatsà vok à huma kà Yesu la azlaməna matapla la slaka aṅha.
- 34**Uwana Yesu adasa à ahəṅ la kəslah iyaw la afik kà, anəṅà azladza aṅuvaw. Vok ahàmàl kà atà, kà uwana anəṅà atà kà bokuba azlatuwaṅ uwana masla manəṅla atà la ahəṅ aw. Adzəkà matapatàla tatak aṅuvaw.

- 35Uwana afats adatəf à ahəŋ, azlaməna matapla aŋha tasà à waŋ à slaka aŋha tagòfal: "Afats adatəf à ahəŋ ŋgaha uwanay bay kà anu la fəta.
- 36Wùlla azladza kà taday à bəza gudəŋ à abà la azlahud' gudəŋ kà tasukw tatak may aŋatà."
- 37Yesu awùlla à uda, agòf à atà: "Akul vaw à atà tatak may tazuw!" Tagòfal: "Lala məbəz tatak may kà madzadzarla azladza kət uwanay la?"
- 38Yesu anəv atà: "Kaf ma katay aga la akul la ahəl ma? Dàw, kanəŋàwwàŋ!" Uwana tanəŋəŋ uwaga: "Kaf gay bərsew zlo la kilfi səla." tagòfal.
- 39Yesu agòf à azlaməna matapla la slaka aŋha, kà azladza tadzàhà madzay la dzibokw dzibokw la kəsaf biyaga la afik.
- 40Tadzàhà madzay la dzibokw dzibokw, azlaanik dzim, azlaanik bay dzik zlo, dzik zlo.
- 41Yesu ahəl kaf zlo la kilfi səla uwatà, anəŋà à zagəla, "Kikay", agòf à Zəzagəla, ŋgaha atsəkà kaf ala, avà à azlaməna matapla la slaka aŋha kà mavàh à azladza. Kiya uwaga ahəlla kilfi səla uwatà ala bay, tavàh à maham à ahəŋ dza gesina.
- 42Atà gesina tazùw, asläh atà.
- 43La lig la ahəŋ azlaməna matapla la slaka aŋha tahamà gay mapətsəh pətsəh aŋa kaf uwana à vok atəmal à tsəh ala la kilfi səla uwatà, kà adàhà takosà kulo gəl aŋha səla.
- 44Matugway aŋa azladza uwana tazùw kaf kà taslà zil dəbow zlo.
- 45Yesu afà à gay à azlaməna matapla aŋha à gəl kà tadiyà à kəslah iyaw à afik kà matsəvokay kà masla à gay dərəv uda anik, nekwa la Betsayda, mok uwana: 'Dàw aŋkul!', agodiyà à maham à ahəŋ dza.
- 46La mok uwana tavàhla atà nna kà, Yesu adà aŋha à gudəŋ à afik kà madəv kudà.
- 47Uwana vəd' adasa à waŋ, mok uwaga kəslah iyaw bay adabəzay à tataka iyaw à abà, ama Yesu aləg la vədàh kokudà gəl aŋha.
- 48Anəŋəŋ azlaməna matapla la slaka aŋha kà atà la ŋgərpa la abà kà madla kəslah iyaw, kà uwana afad' awùl à atà à adi. Uwana azlagay matuway gotsak, Yesu adà à awtəy à slaka aŋatà lakəl iyaw. Asal matsəvkay kà atà.
- 49Uwana tanəŋəŋ aday lakəl iyaw kà, atà tadzùgw kà tatak mavavat dza, tadzəkà mawiyay,
- 50kà uwana atà gesina tanəŋəŋ, ŋgaha guba akəs atà. Ama katskats Yesu abadətàmà, agòf à atà: "Wàdāw vok à uda, uwaga kà gi ŋwà!"
- 51Ahəd à kəslah iyaw à afik la slaka aŋatà, afad' akəsà à asik. Azlaməna matapla la slaka aŋha tahàn ala la madzugway məŋga, ləv avəl à atà à gay.
- 52Kà uwana tasəl godega aŋa nadzipo aŋa kaf uwatà aw, kà uwana haŋkəli aŋatà aslā kà aŋa matsən godega aŋa tatak uwatà aw.

<sup>53</sup>Uwana tadùw à uda à gay dərəv anik kà, tawàdâ kəslah iyaw aṇatà à gay gərdza, tabəz à kutso aṇa Genesaret à abà.

<sup>54</sup>Mok uwana tasà à ahəṇ la kəslah iyaw la afik kà, katskats azladza tasəl Yesu.

<sup>55</sup>Tadàh à gudəṇ à abà la mahoyay, tadzəkà masàhla à waṇ azlaməna dūvats la kəslah la slaka gesina.

<sup>56</sup>Bà kəla slaka uwana Yesu adà à abà, bamərika la azlaməṇ gudəṇ la abà, la azlabəza gudəṇ la abà gesina azladza tasàhla azlaməna dūvats aṇatà à waṇ à vadavaday kasukwa à afik, ṅgaha azlauwana tadəvəhal kudà kà madəbani amiyaka gay aṇa lukut aṇha, tawàr ala.

## Mark 7

<sup>1</sup>Azla Farisəya la azlaanik la tataka aṇa azlamadzahaga aṇa wakità seriya aṇa Zəzagəla la abà tasà à waṇ à gudəṇ Urusalima, tahamà gay à vok la slaka Yesu.

<sup>2</sup>Tanəṇəṇ azlaanik la tataka azlaməna matapla aṇa Yesu la abà tazùw tatak may la kokudà matsuf manəfay aṇatà.

<sup>3</sup>Kà uwana azà à azla Farisəya la azla Yahudiya gesina takəs lakəl aṇa matapla aṇa azlababa aṇatà madzidziga, tazùw tatak may kokudà mapal ahəl aw.

<sup>4</sup>Baṇa tawùl à waṇ la kasukwa tazùw tatak may dāṇ aw, say baṇa tapəl vok lela. Takəs gay aṇa azlababa madzidziga kà məṅga. Uwana azlababa madzidziga tadàhàhàṇ delga bokuba mapalal azlakətsaw, la azlamasik, la azlatasà vərzegani ṅgaha la kəslah mahən à afik aṇuvaw.

<sup>5</sup>Azla Farisəya la azlamadzahaga aṇa wakità seriya aṇa Zəzagəla tanəv à Yesu: "Kà mana azlaməna matapla la slaka aṇak tatsuf gay aṇa azlababa gami madzidziga aw ma? Tazùw tatak la ahəl àlāhga ma?"

<sup>6</sup>Yesu awùlla à atà ala: "Hay! Azlayla masla mapəhal gay à ahəl aṇa Zəzagəla Yesayya asəl madzugway aṅkul lela. Akul azlaməna magolla dza, bokuba uwana tatsətsər à wakità Zəzagəla à abà, Zəzagəla agòd: 'Azladza uwanay tazləb gi la gay pəra, ama ləv aṇatà kà kərkər la gi!"

<sup>7</sup>Tagòd kà, tawoya gi, ama gay aṇatà kà deyday pəra, kà uwana tapàh mapəhay aṇa azlababa aṇatà kà bokuba mapəhay aṇa Zəzagəla."

<sup>8</sup>Yesu agòd à atà: "Kasakaw à mapəhay aṇa Zəzagəla, ṅgaha kanəfaw matapla aṇa azladza!"

<sup>9</sup>Ḑgaha Yesu agòd à atà aya: "Hay, kasəlaw makweska gay makoray aṇa Zəzagəla kà makəs mapəhla ala aṅkul.

<sup>10</sup>Musa agòd: 'Zlèbà baba aṇak la iyà aṇak. Dza uwana adàha à atà mawisiga à vok, say makəday.'

- 11** Ama akul kagodaw kà: Baŋa dza agòd à baba aŋha baŋaw à iyà aŋha: 'Tenma aŋa tatak gulo uwana asa à gi mav à ka kà mazlak kà, kà uwaga kà Korban.' (Bokuba magoday, tatak maviyàga à Zəzagəla)
- 12** La lig la ahəŋ kasakaw dza uwana azlak baba baŋaw iyà aŋha diki diki aya aw.
- 13** Kiya uwaga kawisəwwəŋ gay Zəzagəla ala la gay matapla aŋkul. Uwana kazəhəwwəŋ vok gesina, ŋgaha kapəkəw aŋkul ala kà gay Zəzagəla.”
- 14** La abatà Yesu azàla à maham à ahəŋ dza aya, agòd à atà: "Tsəbàw gi sləm gesina aŋkul, tsənàw gay uwanay", agòd à atà,
- 15** "Tatak uwana dza azuway kà adəh àləh à dza à vok aw, say uwana atsa à uda la ləv aŋa dza la tsəh la uwana adəh àləh.
- 16** Tsənəwwəŋ lela, baŋa sləm aga à akul lakəl aŋa matsəŋəŋ!”
- 17** Mok uwana Yesu adasak à maham à ahəŋ, adà à gəy, azlaməna matapla la slaka aŋha tanəval gay lakəl aŋa gay la gay la abà uwatà.
- 18** ŋgaha Yesu agòd à atà: "Akul babay, kaslawwal à vok aŋa matsəŋəŋ aw ay? Tatak uwana adiya à huɖ aŋa dza atsa à uda aslala vok madəh àləh à dza à vok aw,
- 19** kà uwana adiya à ləv à tsəh aw, ad à huɖ, atsa à uda!" (La gay uwaga la abà Yesu apəh kà dèwdèw tatak may gesina kà, azuw vok)
- 20** ŋgaha agòd à atà aya: "Uwana atsa à uda la ləv aŋa dza la tsəh la uwana adəhla àləh.
- 21** Kà uwana la ləv aŋa dza la uwana madzugway mawisiga atsa à uda uwana adala dza à mabila à abà, mad gəl, makəɖ dza,
- 22** à gəl gaw, adi, maksafər, dəmdəm, maŋor, mapəh mawisiga lakəl aŋa dza anik, zlapay, masəl gəl aw.
- 23** Dèwdèw tatak mawisiga uwanay gesina atsa à uda la ləv aŋa dza la tsəh, uwaga la uwana adəhla tsakana.”
- 24** ŋgaha Yesu atsizilla ala la abatà, ahəd à gay makwi aŋa gudəŋ Tir. Adà à gəy anik à abà, asəl kà azladza tasəl slaka uwana masla la abà aw, ama aslala vok aŋa mahad vok à ahəŋ aw.
- 25** Mis anik uwana dugu aŋha la masasəɖok mawisiga lakəl atsənà gay lakəl aŋa Yesu. Katskats asà à wəŋ à slaka aŋha, akədəɖal à makəla asik aŋha.
- 26** Mis uwaga kà mələk gə, tayyà à gudəŋ Fenesəya uwana la kutso Səriya la abà. Adəv kudà à Yesu kà makudək masasəɖok mawisiga à dugu aŋha lakəl ala.
- 27** Ama Yesu agòɖal: "Sək azlabəza tahanla dadəŋ, mazəb tatak may aŋa azlabəza aŋa maməl à azlakəda à ahəŋ kà delga aw.”
- 28** Mis awùlla à uda: "Sufəl gulo, azlakəda kà uwana la makəla kəsɖatəɖ kà azlabəza à vədəh, la uwana tatsatsamay!”



- <sup>29</sup>Yesu awulàlla: "Kà gay aṅak uwanay kà, dà aṅak à mtəga, masasəḍok mawisiga adasiya à dugu aṅak lakəl ala!"
- <sup>30</sup>Awùl aṅha à mtəga, abəz à bəzi aṅha à gəl mahən à ahəṅ gà la azlav la afik, masasəḍok mawisiga adasal à kəl ala.
- <sup>31</sup>Ɖgaha Yesu asà à uda la kutso aṅa Tir. Aguwà la Sədon, ṅgaha awùl à gay dərəv Galili, aguwà la makoray aṅa azlagudəṅ kulo la abà.
- <sup>32</sup>Tasàlla dza madagazlamga uwana à waṅ, aslàla vok mabəḍma aw, tadəval kudà kà mabəkəkal ahəl à gəl kà mawuriṅ ala.
- <sup>33</sup>Yesu adàla à uda la tataka maham à ahəṅ dza la abà, atsizlləṅ à ahəṅ kokudà aṅha, adùwal gay gəl ahəl à sləm à abà, atəf slesliḍ à ahəl, adəḅani aləh aṅha.
- <sup>34</sup>Anəṅà à zagəla, abàs vok la tsəh ala, agòḍ à dza: "Ephphatha!" (Bokuba magoḍay: Pəzlla à ama ala!)
- <sup>35</sup>La kirim yewdi sləm aṅha asləh ala. Katskats tatak uwana awəḍla aləh à ahəṅ, apəzlla, abəḍmà lela.
- <sup>36</sup>Yesu afahà à atà akur à lig, kà tapəh à dza aw. Ama bà la mafəh à atà akur à lig, uwaga tapəh gesina.
- <sup>37</sup>Ləv avəl à azladza à gay məṅga, tagòḍ: "Adəhaṅ kà dzəḅa aṅha səla aw, adəhaṅ kà azlamadagazlam aṅa matsən sləm, azlauwana taslàla vok aṅa mabəḍma aw bay tabəḍma adagay!"

## Mark 8

- <sup>1</sup>La vuḍ uwatà maham à ahəṅ dza aṅuvaw tahamà gay à vok aya la slaka Yesu. Uwana tatak may aṅatà la ahəṅ aw, Yesu azàla azlaməna matapla à slaka aṅha, agòḍ à atà:
- <sup>2</sup>"Kay, vok aham à gi kà azladza uwanay, kà uwana anina dagay mahəṅay makər lagwa, tatak may aṅatà bay adadəv kà atà à gay.
- <sup>3</sup>Baṅa gəwulla atà à mtəga anatà la may gà kà, tadətəḍ à ahəṅ la tetəvi la ama, kà uwana azlaanik kà tasà à waṅ kà kərəkər."
- <sup>4</sup>Azlaməna matapla la slaka aṅha tagòḍal: "Lala məḅəz tatak may kà aṅa azladza gesina uwanay la kəsaf la abà la?"
- <sup>5</sup>Yesu anəv à atà gay ala: "Kaf gay bərsəw nna aga à akul la ahəl ma?" "Gay bərsəw məḍəf", tagòḍal.
- <sup>6</sup>Yesu agòḍ à azladza: "Dzəhəw madzay!" Ɖgaha ahəl kaf gay bərsəw məḍəf uwatà, "Kikay", agòḍ à Zəzagəla, atsakà kaf ala, avà à azlaməna matapla la slaka aṅha, ṅgaha azlaməna matapla aṅha tavəhà à atà.
- <sup>7</sup>Kilfi bəziga la ahəl aṅatà aya, Yesu ahəl, "Kikay", agòḍ à Zəzagəla, avà à azlaməna matapla la slaka aṅha kà mavəh à azladza.

- <sup>8</sup>Gesina aṅatà tazùw, asläh à atà. Azlaməna matapla la slaka aṅha tahàm à gay mapətsèh pətsèhga à vok takosà mədəf à uwana atəm à atà à ahəl.
- <sup>9</sup>Azladza uwana tazùw kaf uwaga taslà dəbow ufad. Dgaha adəgay kà: "Dàw à mtəga aṅkul!", Yesu agòd à atà.
- <sup>10</sup>Katskats ahəd à kəslah iyaw à afik la azlaməna matapla la slaka aṅha, tahəd à kutso Dalmanuta.
- <sup>11</sup>Azla Farisəya anik tadà à awtày, tadzəkà mabay vok gay la Yesu. Asà à atà makəsay, gay gà la uwaga tanəv nadzipo la slaka aṅha, kà mapəhatàla, ṅgaha atà aṅa masəlay kà ndzəda aṅha asà à waṅ kà la slaka Zəzagəla.
- <sup>12</sup>Yesu abàs vok la ndzəda, ṅgaha agòd: "Kà mana azladza aṅa lakana tanav à gi nadzipo ma? Gəpəh à akul la dziriga: Gədəpəhakulla nadzipo dikiḍiki aw."
- <sup>13</sup>Dgaha asək atà à ahəṅ, ahəd à kəslah iyaw à afik aya, ahəd à gay məṅ dərəv anik.
- <sup>14</sup>Avika azlaməna matapla aṅa Yesu kà mahəl kaf à ahəl. Tatak may la ahəṅ la slaka aṅatà la kəslah iyaw la afik aw, say kaf gay bərsew tekula pəra.
- <sup>15</sup>Yesu afahà à atà akur à lig, agòd à atà: "Dàw haṅkəli kà tatak makəsl tatak ala aṅa azla Farisəya la aṅa Herod."
- <sup>16</sup>Azlaməna matapla la slaka aṅha tavəts gay la tsəh ala kà atà kà atà la tataka aṅatà la abà, tagòd: "Apəh uwaga kà, kà uwana kaf aga anu la ahəl aw."
- <sup>17</sup>Yesu asəl uwana tadzugway, anəv atà gay ala: "Kà mana kavatsaw gay la tsəh ala ma? Kà uwana kaf aga akul la ahəl aw ay? Kasəlaw tatak uwanay gotənaṅ aw uwà? Katsənaw godega aṅha aw, bə gotənaṅ ay? Matsihila aṅkul ma matsak à ama à gay ay?"
- <sup>18</sup>Yewdi aga à akul la vok, ama kanəṅawla aw ay? Sləm aga à akul lakəl, ama katsənawlaṅ aw? Awul akul à gəl gotənaṅ aw ay?fa
- <sup>19</sup>Kaf gay bərsew zlo uwana gətsəkəṅ ala kà aṅa azladza dəbow zlo, ma takosà nna à mapətsèh pətsèhga à uwana kahaməwla gay à vok ma?" "Kulo gəl aṅha səla", tagòdal.
- <sup>20</sup>Dgaha Yesu anəv à atà gay ala aya: "Kaf gay bərsew mədəf uwana gətsəkəṅ ala kà aṅa azladza dəbow ufad bay, ma takosà nna à mapətsèh pətsèhga à uwana kahaməwla gay à vok ma?" "Mədəf", tagòdal.
- <sup>21</sup>"La kità", Yesu agòd à atà: "Kakay katsənaw godega aṅha aw gotənaṅ zlà ma?"
- <sup>22</sup>Uwana tabəz à gudəṅ Betsayda, tasàlla guləf à waṅ. Tadəval kudà kà aṅa madəbani guləf, kà masla mawur ala.
- <sup>23</sup>Yesu akəs guləf à ahəl, adàla à uda la gudəṅ la abà, ṅgaha adəbal slesliḍ à yewdi, abəkəl ahəl à gəl, ṅgaha anəv à dza uwaga: "Kanəṅa tatak ay?"
- <sup>24</sup>Guləf anəṅ à zagəla, agòdal: "Gənaṅa azladza, ama gənaṅa atà kà bokuba azlaahəf uwana taday."

- <sup>25</sup>Bà gotənaŋ, Yesu adəbani yewdi aŋa guləf aya. Masla atsək yewdi à uda la ndzəda, anəŋla, anəŋà azlatatak gesina la paraka.
- <sup>26</sup>Ŋgaha la lig la ahəŋ, Yesu agòdál kà: "Hàd à mtəga aŋak, kada à gudəŋ à abà aw!"
- <sup>27</sup>La lig la ahəŋ, Yesu ahàd à azlabəza gudəŋ uwana à abà la kutso Zəsare, uwana la makoray aŋa Filip la azlaməna matapla la slaka aŋha. Yesu anəv à atà gay ala la tetəvi la ama: "Azladza ma uwa tagòd kà gi ma?"
- <sup>28</sup>Tawùlla à uda: "Azadza anik tagòd, kà kak Yuhana masla madàh batem, azlaanik tagòd, kà kak Eliya, azlaanik aya tagòd, kà kak tekula la tataka azladza uwana la abà, Zəzagəla aslál atà à waŋ uwarà."
- <sup>29</sup>"Iyay zla! Ama akul ma, gi uwa kagòdaw uwi?", Yesu anəv à atà. Piyer awùl à uda, agòdál: "Kak, dza uwana Zəzagəla afà à ka dzakwa à gəl."
- <sup>30</sup>Yesu afahà à atà akur à lig la magòd à atà: "Kapəhawla gi ala la slaka azladza aw!"
- <sup>31</sup>La lig la ahəŋ, Yesu adzəkà matapla azlaməna matapla la slaka aŋha: "Say Kona aŋa dza as ŋərpə məŋga. Azlaməŋga, azlamasiga, la azlaməna mav tatak à Zəzagəla, la azlamadzahaga aŋa wakità seriya aŋa Zəzagəla tadəkweska, ŋgaha tadəkəda. La lig aŋa mahənaŋ makər adàwul à uda la mamətsay."
- <sup>32</sup>Apəh à atà gay uwaga la paraka. Piyer akəs Yesu à ahəŋ kokudà aŋha, adzəkà mafahal akur à lig la magòday: "Kapəh kiya uwaga aw!"
- <sup>33</sup>Ama Yesu agolà à vok, anəŋà azlaməna matapla anik à adi, ŋgaha adzəkà masläh məl à Piyer à gəl, agòdál: "Zà à vok la slaka gulo, kak seteni, kà uwana madzugway aŋak kà bokuba aŋa Zəzagəla aw, ama kiya aŋa azladza."
- <sup>34</sup>Ŋgaha Yesu azàl à maham à ahəŋ dza, la azlaməna matapla la slaka aŋha, agòd à atà: "Baŋa dza asal manəf gi kà, say asak maf gəl à azlatatak aŋha à tsəh, azəb ahàf mamətsay aŋha, ŋgaha anəf gi, bokuba uwana gədàzəbay suwaŋ.
- <sup>35</sup>Kà uwana uwabeyuwi, uwana asal mabəl sifa aŋha la ahəl aŋha, az gəl aŋha ala. Ama uwabeyuwi, uwana az sifa aŋha ala kà gi, ŋgaha kà gay matsidayga aŋa Zəzagəla kà, masla adàbəl sifa aŋha.
- <sup>36</sup>Mana akəsa vok à dza uwana abəza tatak aŋa gudəŋ à vok gesina, ama az sifa aŋha ala ma?
- <sup>37</sup>Tatak la ahəŋ, dza avà y kà masukwla sifa aŋha takay?
- <sup>38</sup>Gay gà la uwaga, baŋa ziruwi az dza kà gi, ŋgaha kà gay gulo lakana la tataka azladza uwana takəs gay aŋa Zəzagəla aw la abà, ŋgaha tadəhəŋ mawisiga, kiya uwaga kà Kona aŋa dza ziruwi adəkəsay kà masla suwaŋ, la mok uwana adàwul à waŋ la mazləbay aŋa Baba aŋha la abà la azlamalika aŋha."

## Mark 9

- <sup>1</sup>Yesu agòd à atà aya: "Haday, gəgod à akul, azladza anik uwana la abanay kà, tadàmətsay dikidiki aw, say baŋa tanəŋ makoray Zəzagəla atsa à waŋ la ndzəda."
- <sup>2</sup>Uwana mahənay mukwa adada à lig, Yesu ahəl azla Piyer, Yakuba, Yuhana ŋgaha tahəd à matsəkəkəday gudəŋ à afik kokudā gəl aŋatà. La abatà abədla vok à ahəŋ la huma yewdi aŋatà.
- <sup>3</sup>Lukut aŋha apək medəkuga mawutsədayga təlla. Dza la ahəŋ la gudəŋ la vok awud lukut ala kiya uwatà aw.
- <sup>4</sup>Ŋgaha azlaməna matapla la slaka aŋha makər uwatà tanəŋà Eliya la Musa tabadmà la Yesu.
- <sup>5</sup>Piyer agòd à Yesu: "Sufəl gulo, delga kà anu la abanay. Sàk anu mədāh safsaf makər, tekula aŋak, tekula aŋa Musa, tekula aŋa Eliya."
- <sup>6</sup>Piyer asəl tatak uwana anakà apəhay aw, kà uwana guba akəs masla la azlaməna matapla anik səla uwanay.
- <sup>7</sup>Habaga asà à waŋ, akəl atà mələs à adi. La habaga uwatà la abà kà tatsənà dza abadmà la abà: "Uwaga kà bəzi gay ləv gulo uwana gəwoyaŋ, tsəbàwal sləm!"
- <sup>8</sup>Katskats azlaməna matapla makər uwatà tanəŋla, ama tanəŋà dza aw, say Yesu kokudā gəl aŋha la slaka aŋatà pəra.
- <sup>9</sup>Uwana tatsà à ahəŋ la gudəŋ la afik, Yesu afāh à atà akur à lig kà atà aŋa mapəh tatak uwana tanəŋəŋ à dza aw, say baŋa Kona aŋa dza adəwul à uda la mamətsay dadəŋ.
- <sup>10</sup>Takəs gay uwatà, ama tanəvəhà vok kà atà kà atà: "Mana asal magoday mawul à uda la mamətsay ma?"
- <sup>11</sup>Gay gə la uwaga tanəv la slaka Yesu: "Kà mana à azlamadzahaga aŋa wakità seriya Zəzagəla tagòd kà, say Eliya atsa à vok à waŋ dāŋ ma?"
- <sup>12</sup>Agòd à atà: "La dziriga, say Eliya atsa à vok à waŋ, adədāh tatak à ahəŋ gesina. Ama kà mana zlà ma tatsetsèr à wakità Zəzagəla à abà bay kà, say Kona aŋa dza as ŋgəpə məŋga ma, ŋgaha azladza tanəwəz kà bokuba dza delga aw ma?"
- <sup>13</sup>Ama gəgòd à akul: Eliya asà à waŋ, ŋgaha azladza tadāhəlləŋ à vok uwana asà à atà gesina, bokuba uwana tatsetsèr à wakità Zəzagəla à abà lakəl aŋha."
- <sup>14</sup>Mok uwana tabəzìyà à azlaməna matapla anik à vok, tanəŋà maham à ahəŋ dza aŋuvaw uwana takəs atà gay à adi. Azlamadzahaga aŋa wakità seriya aŋa Zəzagəla tabəy vok à gay la azlaməna matapla aŋha.
- <sup>15</sup>Uwana azladza tanəŋà Yesu kà, tadzà à ahəŋ titi. Katskats tadà à awtəy à slaka aŋha la mahoyay kà maskuwìŋ.
- <sup>16</sup>Yesu anəv à azlaməna matapla la slaka aŋha la gay ala: "Kà mana kabayaw vok gay akul nna ma?"

- 17**Dza tekula la tataka maham à ahəŋ dza la abà awùlalla: "Məŋga, gəsàla bəzi gulo zilga à waŋ, kà uwana masla la masasəfok uwana avàl tetəvi aŋa mabadma aw.
- 18**Baməraka la mali beli masasəfok akàsàh, amàlal gəl à ahəŋ, huzləv asàhal à gay ala la mapad slid la tsəh ala. Vok aŋha apakahay dzaŋdzaŋ. Gədəv kufa à azlaməna matapla la slaka aŋak kà makudək masasəfok mawisiga uwaga, ama taslala vok aw."
- 19**Yesu agòf à atà: "Kay, madiŋal gəl à vok aŋkul la ahəŋ aw takay? Dagay mbà gədadza à ahəŋ la akul ma? Dàgay mbà gədàbasakulaŋ ma? Sàwgəla bəzi à waŋ!"
- 20**Tasəlla bəzi à slaka Yesu, mok uwana bəzi adanəŋ Yesu, katskats masasəfok abiyà bəzi, atəd à vədàh, abàbal, huzləv asàl à gay ala.
- 21**Yesu anəv à baba aŋa bəzi: "Dagay mbà tatak uwanay azəŋ ma?" Baba agòfal: "Dagay la vərnaga.
- 22**Aŋuvaw masasəfok mawisiga uwaga amàlàhal à gəl akàl à abà, à iyaw à abà kà makəday. Ama kamkam, baŋa kaslala vok mazlak anu, kà vok aham à ka, kà anu!"
- 23**Yesu agòfal: "Kà mana kagof kà: Baŋa kaslala vok ma? Dza uwana adiŋal gəl à vok aslala vok kà madàh tatak gesina."
- 24**Katskats baba aŋa bəzi awiyà: "Gədiŋal gəl à vok, ama zlak à gi, kà uwana madiŋal gəl à vok gulo kà à tsəh ala!"
- 25**Yesu anəŋà maham à ahəŋ dza tatsà à waŋ à slaka aŋatà, aslèh məl à masasəfok uwana à gəl, adəf gay à dza à ahəŋ aŋa mabadma la matsən sləm: "Kak, masasəfok madagazlamga, sà à dza uwanay lakəl ala, gəgof à ka, kadàdal à gəl diki diki aya aw!"
- 26**Masasəfok awiyà, agodzàlla bəzi, asà à uda la masla la abà. Bəzi apək bokuba mamətsayga. Kiya uwaga azladza aŋuvaw uwana la abatà tagòf kà adamətsay.
- 27**Ama Yesu akəs bəzi la ahàl, atsizlləŋ ala, dzawwa bəzi agòf à zagəla à tsəh.
- 28**La lig la ahəŋ, mok uwana Yesu adawul à gày, azlaməna matapla la slaka aŋha tanəvla gəl à gəl: "Kà mana anu kà, məslàla vok aŋa makudəkay aw ma?"
- 29**Yesu agòf à atà: "Makudək tsəhay masasəfok uwanay kà, say la madəv kufa. Ndzəda anik la ahəŋ aw."
- 30**Tadà aŋatà la abatà, taguwà à uda la kutso Galili la abà. Yesu kà asàl kà dza asəl slaka madz à ahəŋ aŋha aw,
- 31**kà uwana atapəlà azlaməna matapla la slaka aŋha, agòf à atà: "Kona aŋa dza tadəviya à ahàl aŋa azladza. Atà tadəkəday, ama la lig la ahəŋ gədəwul à uda la mamətsay la mahənyay makər."
- 32**Azlaməna matapla la slaka aŋha tatsənà godega aŋa gay uwatà aw, ŋgaha guba akəs atà bay kà manaval.
- 33**Tabəz à gudəŋ Kapernahum. Uwana tadà à gày, Yesu anəv à azlaməna matapla la slaka aŋha: "Kà mana kabəyàw vok gay la tetəvi la ama ma?"

- <sup>34</sup>Ama tadzà à ahəŋ titi, kà uwana la tetəvi la ama kà, tabayà à vok à gay haday, tagòd: "Uwa mənəŋa la tataka gami la abà uwa?"
- <sup>35</sup>Yesu adzà madzay, azàl azlaməna matapla la slaka aŋha kulo gəl aŋha səla, agòd à atà: "Baŋa dza asal mapak mazəb gəl gə kà, say apak mabəziga bəziga aŋa azladza gesina, apak masla mazəb à atà kiwa."
- <sup>36</sup>Yesu azəb bəzi ŋuvga à ahàl, atsizilla atà à huma à gay. Akəs bəzi la ahàl, agòd à azlaməna matapla la slaka aŋha:
- <sup>37</sup>"Uwabeyuwi uwana akəs bəzi ŋuvga uwanay kà sləm gulo kà, akəs gi. Ŋgaha uwabeyuwi uwana akəs gi kà, akəs gi pəra aw, ama akəs masla masləl gi à waŋ."
- <sup>38</sup>Yuhana agòd à Yesu: "Sufəl gulo, mənəŋà dza anik uwana akudək masasədok mawisiga la sləm aŋak, ama mədèdal gay à ahəŋ, kà uwana anəfà anu aw."
- <sup>39</sup>Ama Yesu agòd à atà: "Kadədawwal gay à ahəŋ aw, kà uwana dza la ahəŋ adàh nadzipo la sləm gulo pəra, la lig la ahəŋ kà, atugw à gi gay à vok aw.
- <sup>40</sup>Kà uwana uwabeyuwi uwana masla məzam gami aw, kà slawda gami.
- <sup>41</sup>Səlàw kà, dza uwana adàvə à akul kətsaw iyaw, kà uwana akul aŋa dza uwana Zəzagəla afàl dzakwa à gəl kà, adàbəz à masik aŋha."
- <sup>42</sup>"Dza uwana adukw tekula aŋa azlabəza uwanay à ahəŋ à tsakana à abà, tadiŋ gi gəl à vok kà, masla kà ŋuləm tawadal nəvol akur à kuda, taməla à dərəv à abà.
- <sup>43</sup>Baŋa kà ahàl aŋak la uwana katəd à tsakana à abà, nàts à tsəh ala, ŋuləm kà kabəz à sifa la ahàl tekula, kà magay la ahàl səla nna, uwana adàdala kà à gày akàl uwana à abà adàməts ala aw.
- [<sup>44</sup>La abatà maduwari uwana azuw vok amətsay aw, ŋgaha akàl bay amats ala aw.]
- <sup>45</sup>Baŋa kà asik aŋak la uwana katədiya à tsakana à abà kà, nàts à tsəh ala. Ŋuləm kabəz à sifa la asik tekula, kà mad à gudùh akàl à abà la asik səla nna, uwana amats ala dikidiki aw.
- [<sup>46</sup>La abatà maduwari uwana azuw vok adàmətsay aw, ŋgaha akàl amats ala aw.]
- <sup>47</sup>Baŋa kà yewdi aŋak la uwana adala ka à tsakana à abà, bəd à waŋ, ŋuləm kabəz à sifa la yewdi tekula gə à ka magay la yewdi səla kà madiya à gudùh akàl à abà.
- <sup>48</sup>La abatà maduwari uwana azuw vok adàmətsay aw, ŋgaha akàl la abà kà madzad atà ala adàmats ala aw.
- <sup>49</sup>Kà uwana dza gesina tadətəka atà slugul à adi la akàl, bokuba uwana tatək slugul à tatak à adi kà matsedəŋ."
- <sup>50</sup>"Kà uwana slugul kà tatak delga, ama baŋa slugul azladay aw, ma kakay kazladawwaŋ ala ma? Gəw la slugul la ləv aŋkul la tsəh, dzàw à ahəŋ la wurwur, kadàhawa à magazlay la tataka aŋkul la abà aw!"

## Mark 10

- <sup>1</sup>Yesu asà à afik la abatà, ahàd à gay makwi aña kutso Yahudiya la gay dərəv uda anik aña Urdun. Bà gotənañ maham à ahəñ dza tahamà gay à vok la slaka aña aya. Dgaha atàpatàla bokuba uwana adàhàhàhàñ koksikoksi.
- <sup>2</sup>Azla Farisəya anik tasà à wañ à slaka Yesu, asà à atà kà makəsəl maləkaw à ahəñ kà gay aña: "Wakità seriya gami ma avà tetəvi à dza kà makudək mis aña takay?"
- <sup>3</sup>Yesu awùlla à atà ala la magoday: "Mana Musa agod à akul ma?"
- <sup>4</sup>Tagòdal: "Musa avà tetəvi à dza kà matsetser wakità makudək mis, ñgaha məsakiya à mis uwatà."
- <sup>5</sup>Ama Yesu agod à atà: "Musa apəh à akul kiya uwatà kà, kà dzañdzañ aña ləv añkul.
- <sup>6</sup>Ama dagay madzəka gudəñ à vok, mok uwana Zəzagəla adàhà tatak gesina kà, añañ zil la mis pəra.
- <sup>7</sup>Gay gà la uwaga zil asàkiyà à baba aña à ahəñ la iyà aña, kà madz à ahəñ la mis aña.
- <sup>8</sup>Atà səla nna tapək vok tekula. Kiya uwaga atà səla aya aw, ama tagay kà vok tekula pəra.
- <sup>9</sup>Dza avahəñ ala uwana Zəzagəla ahamàla gay à vok aw."
- <sup>10</sup>Mok uwana atà la kay, azlaməna matapla la slaka aña tanàvə Yesu lakəl aña gay uwatà aya.
- <sup>11</sup>Masla agod à atà: "Baña dza akudək mis aña, azəb anik, adàh à gəl gaw la mis teraña gà uwatà.
- <sup>12</sup>La kità babay kà, baña mis akweska zil aña teraña, ñgaha adiya à zil anik, adàzab zil."
- <sup>13</sup>Azladza tasàhla azlabəza ñuv ñguvga à Yesu à wañ, kà madəbani atà la mapis à atà gay à vok. Azlaməna matapla la slaka aña tasläh məl à azladza à gəl.
- <sup>14</sup>Uwana Yesu anəña uwaga, azinal à gəl, agod à azlaməna matapla la slaka aña: "Sàkàw azlabəza ñuv ñuvga tasa à wañ à slaka gulo. Kadəfaw atà gay à ahəñ aw, kà uwana makoray Zəzagəla kà aña azladza uwana bokuba atà uwaga.
- <sup>15</sup>Haday, gəgod à akul: Uwabeyuwi uwana akəs makoray Zəzagəla bokuba bəzi ñuvga aw, adàda à abatà dikiidiki aw."
- <sup>16</sup>Dgaha azəb azlabəza à ahəl, afahà à atà ahəl aña à gəl, la tekula tekula añañ gesina, apis à atà gay à vok.
- <sup>17</sup>Uwana Yesu adatsizilla kà maday aña, dza anik asà à wañ la mahoyay, akədèdal à ahəñ, agòdal: "Kak Sufəl, kak delga, mana gədehəñ kà gi aña mabəz sifa adəv à gay aw ma?"

- 18**Yesu agòdál: "Kà mana kagodf, kà gi delga ma? Dza delga la ahəŋ aw, say Zəzagəla pəra.
- 19**Kasəl mapəhay aŋa Zəzagəla bay: Kakədf dza aw, kəs gay aŋa azlababa aŋak la aŋa iyà aŋak."
- 20**Masla agòd: "Məŋga, gədakəs mapəhay uwaga dagay la bəzi gà."
- 21**Yesu anə̀rə̀z masla la mawoyəŋ, agòdál: "Tatak tekula aləg kà ka: Hād, kadaw azlatatak aŋak ala gesina, vāh sili gà à azlaməna kudā, kadābəz ləmana la zagəla la afik. Ūgaha kà, sà à waŋ, kà nəfà à gi!"
- 22**Ama uwana atsənà uwaga, ləv azəŋ kà gay uwatà, ŋgaha adà aŋha la mapak ləv gà, kà uwana tatak aŋha aŋuvaw.
- 23**Yesu anə̀ŋà azlaməna matapla la slaka aŋha à adi, agòd à atà: "Zlazladā kà aŋa dza galepi kà mad à makoray Zəzagəla!"
- 24**Ləv avəl à atà à gay kà gay uwaga. Ama Yesu agòd à atà aya: "Azlabəza gulo, madiya à makoray Zəzagəla kà zlazladā!"
- 25**Duləm zlugumi agwu à uda la afik lepiri, kà galepi aŋa mad à makoray Zəzagəla."
- 26**Ləv avəl à azlaməna matapla aŋha à gay kayak aya kà gay uwaga, tagòd kà atà kà atà: "Tsa baŋa kiya uwaga ma: Uwa aslala vok aŋa mabəlay uwa?"
- 27**Yesu anə̀ŋà à atà à adi, agòd: "Zlazladā la slaka azladza, ama la slaka Zəzagəla kà zlazladā aw, kà uwana masla aslala vok kà madāh tatak gesina."
- 28**Piyer agòdál: "Nə̀ŋàŋ, mədasak à tatak gesina à ahəŋ, mədanəfa ka."
- 29**Yesu agòdál: "Dziriga, gi bay gəgodf à akul: Uwabeyuwi uwana asakiya gəy aŋha à ahəŋ, baŋaw azladedā aŋha, la azlaiyà aŋha, la azlababa aŋha, baŋaw azlabəza aŋha à ahəŋ, amiyaka guf aŋha kà gi, ŋgaha kà gay matsidəyga kà,
- 30**Zəzagəla adāvəl, adābəz tatak aŋha asik dzim aya, la mok aŋa madz à ahəŋ la gudəŋ la vok: azlagəy, azladedā, azlaiyà, azlabəza, azlaguf, azlamatə̀rə̀bay bay, kà la huma la gay, adābəzal sifa adəv à gay aw la zagəla la afik aya.
- 31**Ama aŋuvaw uwana tatsà vok à huma, tadəpakah azlaməna à lig, ŋgaha azlaməna à lig bay tadəpakah azlaməna à huma."
- 32**Uwana atà la tetəvi la ama kà mad à Urusalima, Yesu aguwa à huma, guba akəs azlaməna matapla la slaka aŋha, azladza uwana tanəfà atà guba akəs atà babay. Ūgaha Yesu ahəl azlaməna matapla kulo gəl aŋha səla uwatà aya, kokudā aŋatà, adzəkà mapəh à atà gay uwana adābəzal.
- 33**Agòd à atà: "Tsənə̀wwəŋ, məda à Urusalima. La abatà tadāvà Kona aŋa dza à ahəl aŋa azlaməŋga aŋa azlaməna mav tatak à Zəzagəla, la azlamadzahaga aŋa wakitə seriya aŋa Zəzagəla. Tadədukwla seriya mamətsay à gəl, tadəməliya à ahəl aŋa azladza uwana tasəl Zəzagəla aw.



- <sup>34</sup>Tadàtsəkəl magodəhəy à gəl, tadàtafal slesliḃ à vok, tadàzlabəy la golba, tadəkədəy. Ama la mahənəy maməkər adàwul à uda la mamətsay.”
- <sup>35</sup>La lig la ahəy Yakuba la Yuhana, azlabəza aḡa Zebede, tazà vok à slaka Yesu, tagòdál: "Məḡga gami, tatak la ahəy à uwana mənava à gay ala.”
- <sup>36</sup>Yesu agòd à atà: "Mana asa à akul gədəhəkullaḡ ma?”
- <sup>37</sup>Tawulàlla: "Baḡa kadàdza madzay la kursi mazləbəy aḡak la afik kà, và à anu tetəvi kà madza madzay tekula la ahəl kaf aḡak ḡgaha tekula la ahəl gudzay aḡak!”
- <sup>38</sup>Yesu agòd à atà: "Kasəlaw tatak uwana kanavaw aw, kaslawwal à vok kà mas tatak à uda la kətsaw ḡḡərpa uwana la abà gədəsəy ay? Kadàbəzaw batem aḡa ḡḡərpa uwana tadədəh gi à ahəy ay?”
- <sup>39</sup>ḡgaha tawulàlla: "Iyay, məslala vok." Yesu agòd à atà: "Hadəy, kadəsaw tatak à uda la kətsaw ḡḡərpa uwana la abà bokuba gi, kadàbəzaw batem uwana tadədəhḡəy bay.
- <sup>40</sup>Ama slaka madza madzay la ahəl kaf gulo ḡgaha la ahəl gudzay gulo kà, gay gulo aw. Slaka uwaga kà, Zəzagəla la uwana adəhəḡ à ahəy kà aḡa azladza uwana atsatsàmàni à atà.”
- <sup>41</sup>Uwana azlaməna matapla anik kulo tatsən gay uwaga kà, taḡoḡuz lakəl aḡa Yakuba atà la Yuhana.
- <sup>42</sup>Gay gà la uwaga Yesu azəl à atà gesina à slaka aḡha, agòd à atà: "Kasəlaw kà azlauwana tanəḡla à atà bokuba azlasufəl aḡa kutso kà takor azladza, ḡgaha azlaməḡ dza aḡatà, tadəha à atà ndzədə à gəl.
- <sup>43</sup>Ama uwaga apaka vok la tataka aḡkul la abà aw. Ama baḡa tekula la tataka aḡkul la abà asal mapak məḡga kà, say agay masla mazəḃ kiwa à azlaanik.
- <sup>44</sup>Dza uwana asal mapak dza teraḡa gà la tataka aḡkul la abà kà, say apak mayà aḡa azlaanik aḡkul gesina.
- <sup>45</sup>Amiyaka Kona aḡa dza kà, asà à waḡ kà mazlakəḡ aḡa azladza aw, ama asà à waḡ kà mazlak azladza, ḡgaha kà mav sifa aḡha bokuba tatak mapəlla gəl à azladza aḡuvaw à ahəy.”
- <sup>46</sup>Uwana tabəz à gudəḡ Yeriko, Yesu la azlaməna matapla aḡha la maham à ahəy dza aḡuvaw tasà à uda la gudəḡ uwatà la abà. Dza guləfga la slaka madza madzay la gay tetəvi atsàtsàh tatak. Sləm aḡha Bartime, kona aḡa Time.
- <sup>47</sup>Uwana atsənəḡ kà Yesu zil Nazaret la uwana adà à awtəy kà, adzəkà mawiyay: "Yesu, Kona aḡa David, vok aham à kak kà gi!”
- <sup>48</sup>Azladza aḡuvaw tasləhal məl à gəl kà madz à ahəy titi, ama masla awiyà la ndzədə aya: "Kona aḡa David, vok aham à kak kà gi!”
- <sup>49</sup>Yesu atsizilla à ahəy, agòd: "Zàləwwal!" Tazàlalla, tagòdál: "Wədəf vok à uda, sà à afik, azàla ka!”

<sup>50</sup>Dgaha guləf awiṭs peteli ala, avàl à afik, asà à waṅ à slaka Yesu.

<sup>51</sup>Yesu anàval la gay ala: "Mana asa à ka gəḏahakanṅ ma?" Guləf agòḏal: "Məṅga, asa à gi gəḏəz yewdi gulo."

<sup>52</sup>Dgaha Yesu agòḏal: "Hàd, madiṅal gəl à vok aṅak adawur kak ala!" Katskats abəzà à yewdi aṅha, anəfà Yesu.

## Mark 11

<sup>1</sup>Mok uwana atà nekwa la Urusalima, bokuba la bəza gudəṅ Betfaze la Betaniya, tabəzà à gudəṅ kuvu à afik. (Uwana tazalalla la gay nasara gudəṅ Oliviyə) Yesu asləl azlaməna matapla aṅha səla à huma, agòḏ à atà:

<sup>2</sup>"Dàw à gudəṅ uwaga à abà la huma aṅkul. Kadəbəzaw à ziwṅṅu ṅuvga mawadəṅ à ahəṅ gə uwana dza adadza à afik dikiḏiki aw. Pəlàw, kasawgəla à waṅ!

<sup>3</sup>Baṅa dza agòḏ à akul: 'Mana kadəhawlaṅ mi?', kagodəwwal: 'Asa à Sufəl gami, adəullàlla à waṅ katskats'."

<sup>4</sup>Tahàd, tabəzà à ziwṅṅu mawadəṅ à ahəṅ gə à gəl la gay gamagəy, la gay tetəvi. Uwana tapəl ziwṅṅu uwatà kà,

<sup>5</sup>azladza anik uwana la abatà, tanəv à atà gay ala: "Mana kadəhawllaṅ ma? Kà aṅa ma kapəlaw bəzi ziwṅṅu uwaga ma?"

<sup>6</sup>Tawul ala bokuba uwana Yesu apəh à atà, ṅgaha azladza tasək atà.

<sup>7</sup>Tasəlla bəzi ziwṅṅu uwatà à Yesu à waṅ, tabəkəkal lukut aṅatà à lig, ṅgaha Yesu adà à afik.

<sup>8</sup>Azladza aṅuvaw tadəw lukut aṅatà à tetəvi à ama, azlaanik tatsəḏ babasl biyaga uwana la guf la abà, tasläh à tetəvi à ama kà masləkaway.

<sup>9</sup>Azlawana la huma aṅa Yesu, la azlawana tanəfay la tsəh, tawiyà la magoḏay: "Delga kà azladza tazləḏ Zəzagəla, mapis gay à vok agay la dza uwana atsà à waṅ la sləm aṅa Sufəl.

<sup>10</sup>Zəzagəla apis gay à makoray aṅa baba gami David à vok, uwana adadzəka vok lagwa. Məzləḏà Zəzagəla uwana la zagəla la afik kəkək!"

<sup>11</sup>Kiya uwaga Yesu ahàd à gudəṅ Urusalima, kà mad à gəy Zəzagəla à agu, anəṅà azlatatak gesina lela. Uwana gay mokokhu adagay, ahàd à gudəṅ Betaniya la azlaməna matapla aṅha kulo gəl aṅha səla uwatà.

<sup>12</sup>Lebəṅ gə, uwana tasà à uda la gudəṅ Betaniya, may akəs Yesu.

<sup>13</sup>Anəṅà gudəv la babasl la vok, ṅgaha ahàd kà mayəh mayyay la vok aṅha. Ama uwana adabəziya à tsəh aṅha kà, abəzà mayyay la vok aṅha aw, say babasl pəra, kà uwana kaslā aṅa gudəv dadəṅ aw.

- 14**Yesu agòd à gudəv: "Dza adàzuw mayyay la vok aṅak aṅa tetuwa aya aw!" Azlaməna matapla la slaka aṅha tatsə̀nà gay uwaga.
- 15**Uwana tabèz à Urusalima, Yesu ahàd à mən̄ gày Zəzagəla à agu. Adzəkà makudəkàh azlaməna tsakalay à uda, la azlaməna masukw tatak la gày Zəzagəla la aku. Adakwà azlatable aṅa azlaməna mabadla sili à ahəṅ la azlaslaka madza madzay aṅa azlaməna madaw habakoku ala.
- 16**Asà kà dza baməraka tekula aṅa mad à gày Zəzagəla à agu la tatak lakəl aw.
- 17**Atapla tatak à azladza, agòd: "Aganay uwana tatsetsèr à wakità à abà, Zəzagəla agòd: 'Sləm aṅa gày gulo kà uwaga gày madəv kudà aṅa azladza gudəṅ à vok gesina. Ama akul kà, kadapakawwaṅ ala kà bokuba tsakur aṅa azlaməna gəl.'" "
- 18**Azlaməṅga aṅa azlaməna mav tatak à Zəzagəla, la azlamadzahaga aṅa wakità seriya aṅa Zəzagəla tatsə̀nà gay uwatà. Gay gà la uwaga tayàh Yesu kà maziṅ ala. Ama guba akès atà kà masla, kà uwana ləv avàl à azladza à gay gesina kà gay aṅha.
- 19**Uwana mokokhu adasa à waṅ, Yesu la azlaməna matapla la slaka aṅha, tasà à uda la gudəṅ la abà.
- 20**La gay bebəṅ bəṅ uwana tadùw à awtày la abatà, tanəṅà gudəv uwatà aya, adagul à afik la slilih gà gesina.
- 21**Awùl à Piyer à gəl, agòd à Yesu: "Məṅga gulo, nəṅà gudəv uwana katsàfla, kà adagul à afik tsi!"
- 22**Yesu awùlla à atà ala: "Haday, gəgod à akul, baṅa kadiṅaw gəl à Zəzagəla à vok kà,
- 23**kaslawwal à vok aṅa magodfay à gudəṅ uwanay: Zà vok la abanay, tsà gəl à dərəv à abà. Baṅa kadzurkaw la ləv aṅkul la tsəh aw, kadiṅawwal gəl à vok la ləv aṅkul la tsəh kà, uwaga adàpakakulla vok haday.
- 24**Gay gà la uwaga gəgod à akul, baṅa kadəvaw kudà kà manav tatak anik la sləm gulo kà, diṅawwal gəl à vok kà kadaḅəzawwal, ṅgaha tadàvəkulla.
- 25**Mok uwana katsìzlàwla kà madəv kudà kà, baṅa gay la ahəṅ la ləv aṅkul la tsəh la dza anik kà, matsalaṅ mawisiga aṅha ala ṅgaha Baba aṅkul, uwana la zagəla la afik amatsakulaṅ ala bay.
- [**26**Ama baṅa kamatsawwaṅ azladza anik ala aw kà, Baba aṅkul uwana la zagəla la afik adà matsakulaṅ ala bay aw.]
- 27**Tawùl à Urusalima aya. Mok uwana Yesu auguzahay la gày Zəzagəla la aku kà, azlaməṅga aṅa azlaməna mav tatak à Zəzagəla, la azlamadzahaga aṅa wakità seriya aṅa Zəzagəla, la azlamasiga tasà à waṅ à slaka Yesu.
- 28**Tanəv à Yesu la gay ala: "La maslay ma uwala kadàh sləray uwanay la? Uwa avà à ka tetəvi kà madàh sləray uwanay uwa?"
- 29**Yesu awùlla à atà ala: "Gi bay, gənav à akul manavay tekula. Baṅa kawulawgəla, gi bay gəḅəpəhakulla maslay uwana gəḅəhla sləray.

<sup>30</sup>Uwa avà tetəvi à Yuhana kà madāh batem uwa? Zəzagəla ay? Awma azladza takay? Wuləwgəla!”

<sup>31</sup>Ama takəs sawaray kà atà kà atà, tagòd: "Baŋa məgod kà: Zəzagəla la uwana avàl tetəvi kà, adəgod à anu: Ka mana kadiŋawwal gəl à vok aw zlà ma?"

<sup>32</sup>Ama baŋa məgod kà, azladza tavàl tetəvi tsa kità aw kà..." (Guba akəs atà kà azladza, kà uwana azladza gesina tanəŋà Yuhana kà masla kà dza uwana Zəzagəla asləl à waŋ la dziriga)

<sup>33</sup>Kà uwaga tagòd à Yesu: "Məsəl aw." Yesu agòd à atà: "Ayyà, gi bay, gəpəhakulla dza uwana avà à gi tetəvi aŋa madāh tatak uwanay suwaŋ aw."

## Mark 12

<sup>1</sup>Yesu apəh à atà gay la gay la abà, agòd: "Dza anik atsəb matavəruk à guf aŋha à abà, akəsəl zlagam à adi; adāhà slaka à ahəŋ kà makudits iyaw mayyay matavəruk uwatà à abà, aŋəl gày kà aŋa masla manəŋla guf. Asàkla à azlamagamza aŋha la ahəl, adà aŋha à mauguzahay anik kərkər.

<sup>2</sup>Uwana təla mahənay tatak adasa à waŋ, asləl kohana aŋha à slaka azlamagamza uwatà kà, mavàl humà tatak aŋa guf aŋha suwaŋ.

<sup>3</sup>Ama atà takəs magamza uwatà, tazləb, takudək la ahəl deyday.

<sup>4</sup>Dza aŋa guf asləl kohana anik à slaka aŋatà aya. Azlamagamza tatsàh à gəl, ŋgaha tatsəkəl magodahay à gəl.

<sup>5</sup>Dza aŋa guf asləl magamza anik aya. Masla kà takəd. Tadāhàhəŋ azlamagamza anik à vok aŋuvaw kalkal kiya uwaga, tazləbàh azlaanik, ŋgaha azlaanik bay takəd atà.

<sup>6</sup>Atəm kà dza aŋa guf à ahəŋ kà dza tekula pəra, bəzi gay ləv aŋha uwana awoyəŋ məŋga. La madəvla à gay, asləl à slaka aŋatà, adzəgw kà: 'Tadəzləb kona gulo haday aw ay', agòd.

<sup>7</sup>Ama atà tagòd kà atà kà atà: 'Aganay dza uwana adəzuw gày. Sàw à waŋ, məkəd ŋgaha guf adəgəd à anu!'

<sup>8</sup>Takəs masla, takəd masla, taməl à uda la guf la abà.”

<sup>9</sup>Yesu agòd: "Iyay zla, mana dza aŋa guf adədəhəŋ ma? Adàsa à waŋ, adəkəd azlamagamza makəsafərga uwatà, adàvə guf uwatà à azlaanik.

<sup>10</sup>Haday, kadzəŋəw gay uwanay la wakità Zəzagəla la abà: 'Akur uwana azlaməna maŋal gày taməlla kà, masla la uwana adapak akur mawad gày.

<sup>11</sup>Aganay uwana Sufəl Zəzagəla adāhəŋ uwaga kà nadzipo la huma yewdi gami!”

<sup>12</sup>Azlamadzahaga aŋa azla Yahudiya tayàh kà makəs Yesu, kà uwana atà tasəl, kà Yesu apəh gay la gay la abà uwaga kà lakəl aŋatà. Ama guba akəs atà, kà maham à ahəŋ dza, kà uwaga à uwana tasəkəl, tadà aŋatà.

**13** Ama katskats azlaməna mav tatak à Zəzagəla, la azlamadzahaga aṅa wakità seriya aṅa Zəzagəla, la azlamasiga tasləl azla Farisəya anik, la azlaanik la tataka aṅa maham à ahəṅ matsən vok gay la sufəl Herod kà magədf uwana à afik, azlayla kà vok kà makəsla.

**14** Tasà à waṅ, tagòdf à Yesu: "Məṅga, məsəl kà kapəhay kà say dziriga pəra, la madz à ahəṅ bokuba uwana asà à Zəzagəla, pəh à anu wakità seriya gami, ma avà à anu tetəvi aṅa mapəl hadama à mən sufəl Zəsar takay? Awma məpəlal aw takay?"

**15** Ama Yesu asəl kà madzugway aṅatà kà mawisiga, agòdf à atà: "Kà mana kavavaraw gi kiya uwaga ma? Sàwgəla sili uwaga à waṅ gənəṅəṅ."

**16** Tasàlla sili à waṅ. Agòdf à atà: "Gəl la sləm uwanay la sili la afik ma aṅa uwa?" Tagòdfal: "Aṅa Zəsar."

**17** Yesu awùlla à atà ala: "Delga, vāv à mən sufəl Zəsar tatak uwana aṅha, vāv à Zəzagəla bay tatak uwana aṅa Zəzagəla." Ləv avàl à atà à gay kà gay aṅha, məslək la ahəṅ aw.

**18** Azlaanik la tataka aṅa azla Sadukiya la abà, tasà à waṅ à slaka Yesu. (Atà kà, mawul à uda la mamətsay la ahəṅ aw, tagòdf)

**19** Tagòdf à Yesu: "Məṅga, Musa atsetsər à anu mapəhay uwanay: 'Baṅa dza anik amətsay, asàkiyà à mis aṅha à ahəṅ kokudà bəzi, say deda aṅha azəb mis à uda la gay kudà la abà. Dgaha abəziya azlabəza la mis uwatà kà à huma aṅa deda aṅha uwana aməts.'

**20** Azladedda zilga mədfəf la ahəṅ. Magolga aṅatà azəb mis, ṅgaha aməts kokudà mayyay bəzi.

**21** Masəla azəb à uda la gày kudà la abà, amətsəlāṅ ala kokudà mayyi bəzi aya. Kiya uwaga apakà vok la mamakər aṅatà bay.

**22** Kiya uwaga atà mədfəf nna mis atsetsər à atà à gay, taməts kokudà mayyi bəzi la masla. La lig la ahəṅ, mis aməts suwaṅ.

**23** Dgaha tak ma, la mok uwana azladza tadàwul à uda la mamətsay ma, mis ma adəgay ma aṅa uwa tak uwa? Kà uwana agà mis aṅatà mədfəf nna!"

**24** Yesu awùlla à atà ala: "Kazawla haday zla! Kasəlaw wakità Zəzagəla aw, kasəlaw maslay aṅha babay aw.

**25** Kà uwana la vuđ uwana azlamazimnekid tadàwul à uda la mamətsay kà, azlamis la azlazil tadəzab vok aya aw, ama tadəpakahay kà bokuba azlamalika, uwana la zagəla la afik pəra.

**26** Lakəl aṅa azlamazimnekid, uwana tawul à uda la mamətsay kà, kadzəṅàw dikiđiki la wakità la abà aw uwà? Paṅaw ma uwala abadlamà à Musa la aləl aṅa akəl la abà, la gay kuswekuswe la abà ala? Agòdfal: 'Gi Zəzagəla aṅa Abəraham, gi Zəzagəla aṅa Isak, ṅgaha gi Zəzagəla aṅa Yakuba bay.'

- <sup>27</sup>Uwaga bokuba magoday kà Masla kà Zəzagəla aṅa azlamazimnekid aw, ama aṅa azlauwana la sifa. Gay gà la uwaga kazahawla la dziriga.”
- <sup>28</sup>La kaslà uwatà madzahaga aṅa wakità seriya aṅa Zəzagəla la ahəṅ la abatà, atsəbà à atà sləm kà tabày vok à gay. Atsənəṅ kà Yesu awùlla à azla Sadukiya kà lela. Azà vok à awtày, anàval à gay ala: "Mapəhay ma uwala à uwana aduwa vok ala?"
- <sup>29</sup>Yesu awulàlla: "Aganay uwana aduwa azlaanik gesina: 'Tsənàwwəṅ akul azladza Isərayel! Sufəl Zəzagəla gami kà, masla Sufəl kokudà gəl aṅha.
- <sup>30</sup>Wòyà Sufəl Zəzagəla aṅak la ləv aṅak gesina, la sifa aṅak gesina, la haṅkəli aṅak gesina, ṅgaha la ndzəfà aṅak gesina.’
- <sup>31</sup>Aganay mapəhay masəla: 'Wòyà masla magay aṅak bokuba gəl aṅak!' Mapəhay uwanay la uwana aduwa azlaanik gesina.”
- <sup>32</sup>Məṅ dza uwatà agòfàl: "Delga Sufəl, kapəh dziriga, Zəzagəla tekula, anik la ahəṅ aw, say azladza takəs gay aṅha.
- <sup>33</sup>Say dza awoy Zəzagəla la ləv aṅha, la haṅkəli aṅha, la ndzəfà aṅha gesina, ṅgaha bay awoy masla magay aṅha babay bokuba gəl aṅha. Manəf mapəhay səla uwaga la uwana aduwa tatak gesina uwana mədawal à akàl à tsəh kà aṅa Zəzagəla, la uwana məvəl gesina.”
- <sup>34</sup>Yesu anəṅəṅ kà madzahaga aṅa wakità seriya uwatà awùlla à uda la haṅkəli, ṅgaha agòfàl: "Kak kà, kərkər la makoray Zəzagəla aw." La lig la ahəṅ guba akəs atà gesina kà manaval gay anik.
- <sup>35</sup>Mok uwana Yesu atàpatàla la gày Zəzagəla la aku, anàvə à atà gay uwanay: "Kakay azlamadzahaga aṅa wakità seriya tagoday kà: Dza uwana tafàl dzakwa à gəl, kà mayyi à tsəh ala aṅa David ma?"
- <sup>36</sup>Kà uwana Masasəfòk Zəzagəla la uwana aguwa la David la abà, à uwana apəh la gəl aṅha: 'Sufəl agòf à Sufəl gulo: 'Dzà madzay la ahəl kaf gulo lakəl, ṅgaha gədàbək azlaməna məzam aṅak à tsəh asik aṅak.’
- <sup>37</sup>David la gəl aṅha azàlal Sufəl, ṅgaha ma kakay Kristu kà agay mayyi à tsəh ala aṅa David ma?" Maham à ahəṅ dza aṅuvaw tatsənà gay aṅa Yesu la marabay.
- <sup>38</sup>Agòf à atà la matapla aṅha la abà: "Dahàw haṅkəli kà azlamadzahaga aṅa wakità seriya! Asa à atà mauguzahay la dawarawa məṅga la vok, asa à atà kà azladza tasokw à atà la slaka maham gay à vok.
- <sup>39</sup>Tayahay kà slaka madza madzay delga la gày mazuw tatak may la aku.
- <sup>40</sup>Tazàb tatak à azlamis kudà ala, ṅgaha la madəv kudà zinzinga kà azladza aṅa magoday kà atà azladza dziriga. Atà tadàbəzal seriya dzaṅdzanṅa.”
- <sup>41</sup>Yesu adzà madzay nekwa la sahar sili, la gày Zəzagəla la aku, ṅgaha anəṅə uwana azladza tabàk sili à sahar à agu. Azlagalepi anik aṅuvaw tavəh məṅga.
- <sup>42</sup>Mis kudà gà asà à wəṅ, awits nini səla à agu.

<sup>43</sup>Yesu azàl azlamèna matapla la slaka aṅha, agòd à atà: "Gəgod à akul: mis kudà uwanay kà, avà sili uwana aduwa à azladza anik gesina,

<sup>44</sup>kà uwana atà kà, tavà sili aṅa ləmana aṅatà mənḡa, ama mis kudà uwanay avà gesina, anik aṅha la ahəṅ kà mazuway aw."

## Mark 13

<sup>1</sup>Uwana Yesu adasa à uda la gày Zəzagəla la aku, tekula la tataka aṅa azlamèna matapla la slaka aṅha agòdàl: "Mənḡa gulo, nərèz azlaakur aṅa gày uwanay tsi, atà dzəba aṅha səla aw!"

<sup>2</sup>Yesu awulàlla: "Kanəṅa gày mənḡa uwanay ay? Amiyaka akur tekula kà, adàgədàl à gay aw. Azlamèna məzam tadəbazlah à ahəṅ gesina."

<sup>3</sup>Yesu ahəd à gudəṅ à afik, adzà madzay la gudəṅ kuvu la afik, la huma magol gày Zəzagəla. Azla Piyer, Yakuba, Yuhana la Andəre uwana kokudà gəl aṅatà, tanàval:

<sup>4</sup>"Pəhanula, mbà tatak uwanay adəpaka vok ma? La mana mədànəṅəṅ madəv à gay aṅa tatak uwaga adàsa à waṅ ma?"

<sup>5</sup>La abatà Yesu adzəkà mapəhla ala la magodəy: "Dahàw haṅkəli, dza avavar akul aw!"

<sup>6</sup>Kà uwana azladza aṅuvaw tadàsa à waṅ la sləm gulo, tadəgodəy: 'Gi la uwana, gi dza uwana Zəzagəla afàl dzakwa à gəl.' Tadəzah azladza ala aṅuvaw.

<sup>7</sup>Baṅa kadətsənaw gay guvəl la slaka nekwa gə, ṅgaha uwana la slaka kərkər gə kà, guba akəs akul aw. Say uwaga adapaka vok leri, ama uwaga kà makəd gəl aṅha dadəṅ aw.

<sup>8</sup>Kà uwana azladza kutso anik tadəp guvəl la azladza kutso anik, makoray aṅa sufəl anik tadəp guvəl la makoray aṅa sufəl anik. Kutso adəbəlaka vok la slaka anik anik, ṅgaha may mənḡa adàsa à waṅ. Uwaga madzəka vok aṅa ṅgərpa bokuba mazay aṅa huf bəzi pəra."

<sup>9</sup>"Ama akul kà, dāhàw haṅkəli kà gəl aṅkul, kà uwana tadəkasaḡ akul, ṅgaha tadədəhla akul à huma seriya. Tadəzlabəh akul la gày madəv kudà la aku. Tadətsazlah akul à huma azlamənḡa, la azlasufəl kà gay gulo, ṅgaha kadəpahaw gay gulo la huma aṅatà.

<sup>10</sup>Say dza gesina la gudəṅ la vok tadətsən gay Zəzagəla dadəṅ.

<sup>11</sup>Baṅa takas akul, tadala akul à huma seriya, guba adəkasa akul dadəṅ, kà gay uwana kadəpəhaw à atà à adi aw. Ama baṅa kaslā adàsa à waṅ, gay uwana kadəpəhaw kà kadəbəzawwal la ləv aṅkul la tsəh, kà uwana gay uwanay kà, gay aṅa gəl aṅkul aw, ama Masasədok Zəzagəla adàvə à akul!

<sup>12</sup>Azladza tadəvah azladedə aṅatà la ahəl aṅatà kà makəd atà. Baba bay adəva bəzi aṅha kà aṅa makədəy, azlabəza bay tadəgohla afəd à azlababa aṅatà à gəl, ṅgaha tadəkad atà.

- <sup>13</sup>Azladza gesina tadàpəsewah akul lakəl aña gay gulo. Ama dza uwana adàbasin tsəràh à awtày la tetəvi Zəzagəla la ama kà, masla kà adàbəlay.”
- <sup>14</sup>Yesu agòd bay: "Kadànəñaw dza uwana tazala: Məzam aña Zəzagəla adàdza madzay la slaka uwana azlayla aw, (Dza uwana adzeñ uwaga kà atsənəñ lela!), azlauwana la Yahudiya tadàhoy à gudəñ à afik.
- <sup>15</sup>Dza uwana la gəl gày, adàsa à vədàh, ama adàda à gày kà mahəl tatak aña aya aw.
- <sup>16</sup>Dza uwana la guf la abà, adàwul à mtəga kà mahəl lukut aña bay aw.
- <sup>17</sup>Ŋgərpa kà aña azlamis uwana la bəza la huf, ŋgaha azlamis uwana bəza vərna aga à atà la ahəl, la mavakay uwatà.
- <sup>18</sup>Dəvəw kudà à Zəzagəla kà tatak uwaga aña mapak vok la təla anasl aw.
- <sup>19</sup>La kaslè uwatà kà, ŋgərpa mənğa adàgay la ahəñ, uwana adapak vok dagay uwana Zəzagəla adàhà gudəñ à vok tsəràh à lakana aw, adàpaka vok bokuba uwaga aya dikiđiki aw.
- <sup>20</sup>Ama Zəzagəla adag azlamavakay uwatà desl kà azladza aña uwana adatsatsamani à atà. Baña kiya uwaga aw, kà dza adàbəlay dikiđiki aw.”
- <sup>21</sup>"Kiya uwaga, baña dza anik agòd à akul: 'Aganay dza uwana Zəzagəla afəl dzakwa à gəl la abanay, à agatày, la abatày', kadiñawwal gəl à vok aw!
- <sup>22</sup>Kà uwana azlaməna mapəh à atà gay à ahəl fidaga tadàsaha à wañ, tadàpahla azlanadzipo anik anik ala, kà maz azladza uwana ala Zəzagəla adatsatsamni atà, à baña taslala vok.
- <sup>23</sup>Akul zlà kà, dāhàw hañkəli! Gədapəh à akul tatak uwaga à vok à abà dagay uwarà.”
- <sup>24</sup>"La mavakay uwatà, la lig aña ŋgərpa la ahəñ, afats adətəf à zagəla, təla adàudəy aya aw.
- <sup>25</sup>Azlatsetsilin tədàsokw à ahəñ la zagəla, azlamaslay uwana la zagəla la afik tadàbəlaka vok.
- <sup>26</sup>Ŋgaha azladza gesina tadànəñ Kona aña dza atsa à ahəñ la habaga la abà, la ndzəda ŋgaha la mazləbay mənğa.
- <sup>27</sup>Adàsləl azlamalika aña à slaka gesina, kà maham à gay azladza uwana à vok Zəzagəla atsatsàmàni atà, dagay la gay tər gudəñ à vok ufad.”
- <sup>28</sup>"Tapawla gay la gay la abà aña gudəv: Baña azləl ahəl mawga babasl adəy, kasəlaw kà təla madara kà nekwa.
- <sup>29</sup>Kiya uwaga babay, baña kanəñaw tatak uwaga apakà vok gesina, sələw kà, Kona aña dza kà nekwa la gay gamagày kà mas à wañ.
- <sup>30</sup>Hadəy, gəgòd à akul: Azladza aña zamana uwanay tadədəv à gay dadəñ aw, say baña tatak uwanay adàpaka vok gesina dadəñ.



- <sup>31</sup>Zagəla la kutso tadədəv à gay, ama gay gulo kà, adədəv à gay diki diki aw.”
- <sup>32</sup>"Ama dza asəl mavakay uwatà, baɲaw kaslà uwatà aw, azlamalika uwana la zagəla la afik tasəl aw, Kona aɲa dza bay asəl aw, say Baba kokudà gəl aɲha pəra.
- <sup>33</sup>Dahàw haɲkəli, kadzewhal aw, kà uwana kasəlaw mok uwana tatak uwaga adəpaka vok aw.
- <sup>34</sup>Adəpakay kà bokuba dza uwana ad à mauguzahay, asàkiyà à gày aɲha à ahəɲ, aviyà à ahəl aɲa azlamagamza aɲha, avàhà à atà sləray ala, ɲgaha agòd à masla manəɲla gamagày: 'Say kanəɲla lela, kadzehal aw!'
- <sup>35</sup>Kà uwaga dzàw à ahəɲ la adi, kà uwana kasəlaw mok uwana zil gày adàwul à waɲ aw, bi la mokokhu, bi la tataka vəd, bi la mawiyay gotsak, bi məl palaha.
- <sup>36</sup>Baɲa atsa à waɲ katskats, abəza akul à gəl la madzehal la abà aw.
- <sup>37</sup>Tatak uwana gəgod à akul, gəgod à azladza gesina babay: Dzàw à ahəɲ la adi!"

## Mark 14

- <sup>1</sup>A lig mavakay səla kà aɲa madzəka madəvaday Paska uwana azladza tazuw Pain kokudà tatak makəsliɲ, azlaməɲga aɲa azlaməna mav tatak à Zəzagəla, la azlamadzahaga aɲa wakità seriya aɲa Zəzagəla tayàh tetəvi la vud uwatà, kà makəs Yesu la dēmdēm, ɲgaha aɲa makəday.
- <sup>2</sup>Tagod: "Mədəkəs la vud madəvaday aw, kà azladza aɲa madzəka magazlay aw.”
- <sup>3</sup>Uwana Yesu la gudəɲ Betaniya, la kay aɲa Səmon, masla akəl zagəla, mok uwana adadza madzay kà mazuw tatak may kà, mis anik asà à waɲ la aməl matərsin la ahəl la koloba gə, sləm aɲa aməl uwatà kà nar. Tsakalay aɲha kà zlazladà. Mis uwatà apəzl koloba, adzadzəb matərsin uwatà à Yesu à gəl.
- <sup>4</sup>Azladza anik uwana la abatà kà, azɲ atà à gəl, tagod: "Kà mana awis aməl matərsin aɲha ala deyday ma?"
- <sup>5</sup>Agayɲa aduw matərsin gə ala aɲa sili dadərmokw makər, ɲgaha avàh sili gə azlaməna kudà la uwana aduwa à vok." Kiya uwaga taɲoɲuz à tsəh ala lakəl aɲha.
- <sup>6</sup>Ama Yesu agòd à atà: "Sàkəwwal! Kà mana kavərawla gay ma? Adàh à gi sləray delga gə.
- <sup>7</sup>Azlaməna kudà kà, atà la slaka aɲkul koksikoksi, kaslawwalla vok aɲa madàha à atà delga koksikoksi bokuba uwana asa à akul. Ama gi gədàdza à ahəɲ la akul koksikoksi aw.
- <sup>8</sup>Mis uwanay adàhà uwana aslala vok. Masla adàh gi aməl matərsin à vok kà, kà madàh gi à ahəɲ aɲa maf gi à zəvay à agu.
- <sup>9</sup>Haday, gəgod à akul: La gudəɲ la vok gesina, uwana tadəpah gay marabəɲ, tadəpəhay bay tatak uwana mis uwanay adàhəɲ, ɲgaha mis uwanay adàwul à atà à gəl.”

- <sup>10</sup>La lig la ahəŋ, Yudas Iskariyot, tekula la tataka aŋa azlaməna matapla kulo gəl aŋha səla la abà, ahàd à slaka azlamadzahaga aŋa azlaməna mav tatak à Zəzagəla kà mat kaf à Yesu à gəl.
- <sup>11</sup>Uwana tatsənà uwaga kà, taràb, tagòdál: "Mədàvà à ka sili." Dagay kaslà uwatà, Yudas ayàh tetəvi kà mapəhla Yesu ala.
- <sup>12</sup>La mavakay teraŋa aŋa madəvaday Pain kokudá tatak makəsliŋ, vud' makad' magadzaw aŋa Paska, azlaməna matapla aŋha tanàval à gay la: "Lala asa à ka kà mədáy kà madàh à ka tatak may aŋa madəvaday Paska à ahəŋ la?"
- <sup>13</sup>Yesu asləl azladza səla la tataka aŋatà la abà, agòd' à atà: "Dàw à gudəŋ à abà, dza la ahəŋ la tuguzl lakəl, la iyaw gà, kadàgagamaw akul nna.
- <sup>14</sup>Nəfàw à gày uwana à abà adàda à agu, gòdàw à zil gày uwatà kà: Məŋga gami agod' à ka: 'Lala à gày gulo, uwana gədàzuw tatak may aŋa Paska la aku la azlaməna matapla gulo li? agod', gòdàwwal.
- <sup>15</sup>Masla adəpəhakulla gày məŋga uwana la afik gà, slaka madəhəŋ à ahəŋ gà gesina. La abatà la uwana kadàfəhaw vok à ahəŋ gesina kà aŋami."
- <sup>16</sup>Azlaməna matapla la slaka aŋha tahàd, tahàd à hud' gudəŋ à abà, tabəzà tatak à gəl bokuba uwana Yesu apəhatàla. Uwana tadàh tatak may Paska à ahəŋ kà, tawùl à slaka Yesu.
- <sup>17</sup>Uwana mokokhu adasa à waŋ kà, Yesu abəz à abatà la azlaməna matapla aŋha kulo gəl aŋha səla.
- <sup>18</sup>Mok uwana tadzà madzay, tazùw tatak may, Yesu agòd' à atà: "Hadáy, gəgod' à akul, tekula la tataka aŋkul la abà uwana məzuw tatak may səla adàta à gi kaf à gəl."
- <sup>19</sup>Azlaməna matapla la slaka aŋha tadzəkà mazawla à gəl, tagodál la tekula tekula aŋatà: "Gi zlàk uwà? Gi zlàk uwà?"
- <sup>20</sup>Yesu agòd' à atà: "Dza tekula la tataka aŋkul la abà, uwana mədəb aləl à kaf à gəl anu səla, la uwana adàta à gi kaf à gəl.
- <sup>21</sup>Ndzer gi, gi Kona aŋa dza gədàmətsay bokuba uwana tatsetsèr à wakità à abà lakəl gulo. Ama ŋgərpa adàgay la dza uwana adətəg kaf à gəl aŋa Kona aŋa dza agay, tayyi dza uwaga aw kà ŋuləm kà masla."
- <sup>22</sup>La mok uwana tazùw tatak may, Yesu azəb kaf, atsàkàŋ ala, 'Kikay' agòd' à Zəzagəla, ŋgaha avà à azlaməna matapla la slaka aŋha, agòd' à atà: "Zùwàw uwaga kà vok gulo!"
- <sup>23</sup>Ŋgaha azəb kətsaw la iyaw mayyay ahəf gà, 'Kikay', agòd' à Zəzagəla, avà à atà, atà gesina tasà à uda la abà,
- <sup>24</sup>ŋgaha agòd' à atà: "Uwaga kà aŋiz gulo, aŋiz makəs vok slawda la Zəzagəla, uwana asokw à vədàh kà aŋa azladza aŋuvaw.

- <sup>25</sup>Hadây, gəgòd à akul, gədàsa iyaw mayyay ahàf uwanay aya aw, tsərəh à uwana mədàsay anina aya la makoray Zəzagəla.”
- <sup>26</sup>Tazləbà Zəzagəla la mahabay, ŋgaha tasà à uda, tadà aŋatà à gudəŋ kuvu à afik.
- <sup>27</sup>Yesu agòd à azlaməna matapla la slaka aŋha: "Akul gesina kadàsakaw gi à ahəŋ, kadəhoy à waŋ akul, kà uwana uwaga kà matsetserayga la wakità Zəzagəla la abà: 'Gədàkəf masla manəŋla azlatuwaŋ, azlatuwaŋ tadəvah gəl à ahəŋ.'
- <sup>28</sup>Ama la lig la ahəŋ, gədàwul à uda la mamətsay, gədàtsəvokay kà akul kà mad à Galili.”
- <sup>29</sup>Piyer agòdàl: "Amiyaka azladza gesina tasak à kak à ahəŋ kà, gi kà, gədàsak à kak à ahəŋ aw.”
- <sup>30</sup>Ŋgaha Yesu awùllal ala: "Hadây, gəpəh à ka, la vuɸ uwanay lakana, gurayŋa mewgdzagalaŋ awiyay asik səla kà, kà kak Piyer kadəgoday kà, kà kasəl gi aw, asik makər.”
- <sup>31</sup>Ama Piyer agòd la ndzədə aya: "Gədàpəh tsəhay gay uwaga aw, gəmətsay ndzer la kak!" Atà gesina tagòd kiya uwaga babay.
- <sup>32</sup>Tabəz à slaka anik uwana sləm aŋha Getsemane. Yesu agòd à azlaməna matapla la slaka aŋha: "Dzàw à abanay, gəda à madəv kudà!”
- <sup>33</sup>Yesu ahəl azla Piyer, Yakuba la Yuhana kà maday atà nna. Adzəkà maskulay la mazaw la gəl.
- <sup>34</sup>Agòd à atà: "Mazaw la gəl akəf gi. Ama dzàw la abanay, dzəwhəl aw!”
- <sup>35</sup>Azà à atà vok la vok ala ŋuv, atəd à vədàh, adəv kudà à Zəzagəla: "Baŋa kaslala vok, v à gi tetəvi, kà kaslà aŋa ŋgərpa ada aŋha la slaka gulo.
- <sup>36</sup>Iyay Baba gulo, kaslala vok kà madàh tatak gesina. Zəbagəŋ kətsaw ŋgərpa uwanay ala la slaka gulo. Ama bokuba uwana asa à gi aw, say bokuba uwana asa à ka.”
- <sup>37</sup>Ŋgaha awul à waŋ, abəzà azlaməna matapla aŋha makər uwatà à gəl, atà la madzəhal gə. Agòd à Piyer: "Səmon, kadzəhal ay? Kaslala vok aŋa madz à ahəŋ la adi sa tekula aw ay?
- <sup>38</sup>Akul gesina dzàw à ahəŋ la adi, dəvəw kudà kà matədiya à mavavaray à abà aw. Hadây, masasədok aŋa dza asal makəs gay, ama vok aŋha la nzdədə aw!”
- <sup>39</sup>Ŋgaha adà aŋha aya. Adəv kudà kalkal uwana uwarà.
- <sup>40</sup>Uwana awul à waŋ, abəzà atà à gəl la madzəhal gə. Taslələ vok aŋa madz à ahəŋ la adi aw. Tasəl uwana tawùllal ala aw.
- <sup>41</sup>Uwana awul à waŋ à slaka aŋatà aŋa mamakər aŋha, agòd à atà: "Kadzəwhal, kaduwaw ləv ay? Diga adagay, sa kà adaslay. Lagwa azlaməna tsakana takəs Kona aŋa dza.

- 42Sàw à afik, mēhād adagay, aganay dza uwana atəg à gi kaf à gəl kà adazlanjaj", Yesu agòd à atà.
- 43Mok uwana Yesu avàts gay dadənj, Yudas, tekula la tataka aŋa azlakulo gəl aŋha səla la abà, asà à wəj. Maham à ahəj dza aŋuvaw tanəfà à wəj la katsakar, la zəva. Məj madzahaga aŋa azlaməna mav tatak à Zəzagəla, la azlamadzahaga aŋa wakità seriya aŋa Zəzagəla, la azlamasiga la uwana taslèlla atà.
- 44Yudas uwana atəl kaf à gəl apəhla dabaray à maham à ahəj dza kà makəs Yesu. Agòd: "Dza uwana gədàsəkwiŋ maslawda slawda kà, masla la uwana kayahaw, kadà, kəsàw, dāwùlla nəŋàwla."
- 45Uwana adabəz à abatà, katskats ahād à slaka Yesu, agòd: "Məŋga gulo!", akəsà vok.
- 46Azladza takəs Yesu, tawàslàhənj à ahəj.
- 47Ama tekula la tataka azlaməna matapla la abà, atsizlla ala, abəd katsakar aŋha à lag, adəd magamza aŋa məŋga aŋa azlaməna mav tatak à Zəzagəla, anàtsal sləm lakəl ala.
- 48Yesu agòd à maham à ahəj dza: "Kà mana katsàw à wəj la katsakar ŋgaha la zəva la ahəl kà aŋa makəs gi ma? Gi masla nabəra ay?"
- 49Kəla mavakay gədzà à ahəj la akul la məj gəy Zəzagəla la aku, gətəpakulla tatak, akul bay kakəsàw gi aw. Ama uwaga apaka vok kà madəvənj à gay tatak uwana azlaməna mapəh à atà gay à ahəl tapəh dagay uwarà."
- 50Ŋgaha azlaməna matapla la slaka aŋha gesina tasàkal à ahəj. Tahòy aŋatà.
- 51Kohana anik la ahəj, anəfà Yesu la peteli la vok pəra. Tayəh kà makəsay.
- 52Ama asàkatàla peteli à ahəj, ahòy aŋha ala diga.
- 53Maham à ahəj dza tadàla Yesu à slaka məŋga aŋa azlaməna mav tatak à Zəzagəla, la azlamagol dza la azlamadzahaga aŋa wakità seriya aŋa Zəzagəla. Gesina tahamà gay à vok.
- 54Piyer anəfà atà la lig kərkər, adà à kodal aŋa məŋga aŋa azlaməna mav tatak à Zəzagəla à abà, adzà madzay la azlaslodzi à vəfà akəl à vok.
- 55Azlaməŋga aŋa azlaməna mav tatak la azlamadzahaga gesina tayəh dabaray aŋa makəsalla fida à gəl aŋa madukwla seriya mamətsay à gəl, ama tabəzà à mawisiga aŋha aw.
- 56Kà uwana uwabeyuwi atùgw gay fida lakəl aŋha, ama fida aŋatà akəsà vok aw.
- 57Azlanik aŋatà tasà à afik ŋgaha tatsədàl azlafida anik anik à gəl gesina.
- 58"Mətsənənj agòd kà: 'Gədàkal magol gəy Zəzagəla uwanay à ahəj, uwana azladza tanjəl la ahəl la mahənay makər, gədàhənənj ala kokudà maf ahəl à abà aŋa azladza', agòd."
- 59Baməraka la madəh fida uwatà, gay aŋatà akəsà à vok aw.

<sup>60</sup>Məŋga aŋa azlaməna mav tatak asà à afik, atsìzlla ala la tataka azladza la abà gesina, anavà Yesu la gay ala: "Kawulla gay à uda aw takay? Mana à uwana tatugw kà gəl tak ma?"

<sup>61</sup>Ama Yesu adzà à ahəŋ titi. Awùlla gay à uda aw. Məŋga aŋa azlaməna mav tatak anavà Yesu aya: "Kak Kristu, Kona aŋa Zəzagəla uwana tazləbay ay?"

<sup>62</sup>Yesu agòdál: "Bà kiya uwaga, kadənəŋaw Kona aŋa dza madza madzayga la ahəl kaf aŋa Zəzagəla lakəl la maslay, la mazləbay məŋga, ŋgaha atsa à ahəŋ la habaga zagəla la abà."

<sup>63</sup>Məŋga aŋa azlaməna mav tatak akwàhà lukut aŋha ala, agòd: "Məwoya sayda anik lakəl aŋha aya aw!"

<sup>64</sup>Katsənàw uwana apəh mawisiga lakəl aŋa Zəzagəla. Mana kadzəgwaw ma?" Gesina aŋatà tadükwla seriya mamətsay à gəl.

<sup>65</sup>Azladza anik la tataka aŋatà la abà tadzəkà mataf slesliḃ à Yesu à adi. Tatsàkal à yewdi à ama, tazləḃ la mamits ahəl, ŋgaha tagòdál: "Pəhanula, uwa à uwana adəḃ à ka uwa?" Azlaslodzi takəs Yesu, ŋgaha tabakàlla ahəl à sləm à abà.

<sup>66</sup>Piyer la gəl akəl dadəŋ, à uwana dugu madzadzaray aŋa məŋga aŋa azlaməna mav tatak asà à waŋ.

<sup>67</sup>Uwana anəŋà Piyer à vəḃà akəl à vok kà, anərəz, agòd: "Kak bay, kadzà à ahəŋ la Yesu, zil Nazaret."

<sup>68</sup>Ama Piyer adàhà fida, agòd: "Gəsəl aw, gətsəna gay uwaga asa à ka magodəy aw!" Dgaha asà à uda, adà aŋha à dzogdzog à abà. Mok uwatà mewgdzagalaŋ awiyà.

<sup>69</sup>Dugu madzadzaray anəŋà Piyer aya, agòd à azladza uwana la abatà aya: "Dza uwanay kà tekula aŋatà bay!"

<sup>70</sup>Ama Piyer agòd aya: "Awaŋ, gi tekula aŋatà aw." La lig la ahəŋ ŋuv, azladza uwana la abatà tagòd à Piyer: "Hadəy, kak bay, kak tekula aŋatà, kà uwana kak zil Galili."

<sup>71</sup>Piyer adzəkà magodəy: "Baŋa gəḃàh fida, say Zəzagəla avà à gi ŋgərpa zagəla. Gəsəl dza uwaga kapəhaw gay aŋha dikidiki aw!"

<sup>72</sup>La mok uwatà mewgdzagalaŋ awiyà kà masəla. Gay uwana Yesu apəh, awul à Piyer à gəl: 'Mok uwana mewgdzagalaŋ awiyay asik səla dadəŋ aw, kadəgodəy asik makər kà, kasəl gi aw.' Piyer adzəkà matuway.

## Mark 15

<sup>1</sup>Bəŋ la zay la tsəh, azlaməŋga aŋa azlaməna mav tatak takəs sawaray la azlamadzahaga aŋa wakità seriya aŋa Zəzagəla gesina, tatsurkà Yesu, tadàlla, tavà à Pilatus à ahəl à afik.

<sup>2</sup>Pilatus anavà Yesu la gay ala: "Kak Sufəl aŋa azla Yahudiya ay?" Yesu awulàlla: "Iyay, bokuba uwana kagòd."

- <sup>3</sup>Azlaməŋga aŋa azlaməna mav tatak, takəl gay à Yesu à vok aŋuvaw.
- <sup>4</sup>Pilatus anavà Yesu aya: "Kawulla à gay à uda aw uwà? Tsənà makəl à ka gay à vok aŋatà tsi."
- <sup>5</sup>Ama Yesu awùlla à gay à uda aw. Ləv avəl à Pilatus à gay kà uwaga.
- <sup>6</sup>Kəla madəvaday Paska, Pilatus adùwatàla gəl à masla daŋay tekula, uwana maham à ahəŋ awoyàŋ.
- <sup>7</sup>La mok uwatà, dza tekula la ahəŋ la daŋay la aku, sləm aŋha Barabas. Masla tekula aŋa azlaməna mazləl guvəl à gumna à adi, takəɸ dza la magazlay la abà.
- <sup>8</sup>Maham à ahəŋ dza ahəd à mtəga Pilatus kà aŋa manav uwana Pilatus adəhəhətəŋ viya viya.
- <sup>9</sup>Pilatus anavà atà à gay ala: "Asa à akul kà gəduwakulla gəl Sufəl aŋa azla Yahudiya ay?"
- <sup>10</sup>Kà uwana asəl kà azlaməŋga aŋa azlaməna mav tatak tadàla Yesu à slaka aŋha kà maŋor pəra.
- <sup>11</sup>Ama azlaməŋga aŋa azlaməna mav tatak tavədzəhà à tsəh azladza à afik kà Pilatus aduwatàla gəl kà Barabas.
- <sup>12</sup>Pilatus agòɸ à maham à ahəŋ dza aya: "Mana asa à akul gədehəŋ à dza uwanay à vok kazalawla ala Sufəl aŋa azla Yahudiya ma?"
- <sup>13</sup>Tawulàlla la mawiyay: "Zləl masla à ahəf à adi!"
- <sup>14</sup>Pilatus anavà atà: "Mana mawisiga aŋha uwana adəhəŋ ma?" Ama tazàla mawiyay à gəl aya: "Zləl masla à ahəf à adi!"
- <sup>15</sup>Pilatus awoyà marab ləv aŋa azladza. Kà uwaga à uwana aduwà à atà gəl à Barabas. Dgaha agòɸ à azlaslodzi kà tasläh Yesu ala la kurpi, avà à atà masla à ahəl kà mazləliya à ahəf à adi.
- <sup>16</sup>Azlaslodzi tadàla Yesu à gəl akəl aŋa Pilatus, tazàlähà azlaslodzi gesina.
- <sup>17</sup>Tadùwal dawara mativga à vok, tasləsləp atək, tatsefədəl à gəl magabaga gabaga aŋa sufəl kà makədaslal.
- <sup>18</sup>Dgaha tasukwà masla: "Ayyi, Sufəl aŋa azla Yahudiya!"
- <sup>19</sup>Tadəɸ à gəl la kavak, tatəfal slesliɸ à vok, takədeɸ à ahəŋ la huma aŋha bokuba sufəl kà madzedzinay.
- <sup>20</sup>Uwana tadəv makədaslal à gay, tasəɸətəl dawara mativga uwatà la vok ala, tawùllal lukut aŋha à vok, ŋgaha tadàla à uda kà aŋa mazləl à ahəf à adi.
- <sup>21</sup>La tetəvi la ama, tagagəm la dza, uwana zil gudəŋ Səren, sləm aŋha Səmon baba aŋa Alekəsander atà la Rufus. Masla atsà à waŋ la guf aŋha la abà. Azlaslodzi tafəl ndzəɸà à gəl aŋa mazəɸ ahəf aŋa Yesu.

<sup>22</sup>Tadàla Yesu à slaka uwana sləm aṅha Golgota. (Bokuba magodáy: slaka aslasl takasa à gəl)

<sup>23</sup>La abatà asà à atà aṅha maval iyaw hamhamga uwana tatèdàlla mir à tsəh, kà mataslala maziṅ ala, ama Yesu akweskà kà masay.

<sup>24</sup>Ḑgaha tatatàsl Yesu à ahàf à adi. Tavàhà lukut aṅha la tataka aṅatà la abà, tatsàl tsatsa lakəl, kà uwana asà à atà masəl tatak uwana uwabeyuwi aṅatà abèzal.

<sup>25</sup>Mok uwana tatàsl Yesu à ahàf à adi kà zil gosela.

<sup>26</sup>Tatsetsèr à gəl aṅha gay seriya tapèhla ala la magodáy gay uwana takèd'ala: SUFƏL ADA AZLA

<sup>27</sup>Tatatàsl azlaməna nabəra səla à ahàf à adi la Yesu, tekula la ahàl kaf aṅha, tekula bay la ahàl gudzay aṅha.

[<sup>28</sup>Kiya uwaga agay bokuba uwana tatsetsèr à wakità Zəzagəla à abà: Tatugw masla à tataka aṅa azlaməna haypa à abà.]

<sup>29</sup>Azladza uwana taguwàhà à awtày la abatà takədàslal, takokòtəhà gəl, tagòd'ál: "Nəṅəṅ zla! Kak uwana kagòd' kà, asa à ka makal magol gày Zəzagəla à ahəṅ, aṅa maṅalay anik la mavakay makər, kagòd'.

<sup>30</sup>Sà à ahəṅ la ahàf la adi, bəlla gəl aṅak tak zla!"

<sup>31</sup>Kiya uwaga babay azlaməṅga aṅa azlaməna mav tatak takədàslal la azlamadzahaga aṅa wakità seriya aṅa Zəzagəla la slaka gà, tagòd' kà atà kà atà: "Aḃəlà azladza anik, ama aslala vok aṅa mabəl gəl aṅha aw uwà?"

<sup>32</sup>Say mənəṅəṅ Mesi, Sufəl aṅa Isərayel atsa à ahəṅ la ahàf la adi dadəṅ, ṅgaha mədiṅal gəl à vok." Azladza uwana tatatàsl à ahàf à adi tatsək'al magodəhay à gəl babay.

<sup>33</sup>La tataka afats, mələs apakà vok la kutso la abà gesina, tsərəh afats dat mogova gova gərewni delga.

<sup>34</sup>La afats dat magova gova gərewni delga uwatà, Yesu awiyà la ndzəḃa, agòd': "Eloyyi, Eloyyi, lema sabachthani?" (Bokuba magodáy: Zəzagəla gulo, Zəzagəla gulo, kà mana kasak gi ma?)

<sup>35</sup>Azlaanik uwana tadzà à ahəṅ la abatà tatsənà uwaga, tagòd' kà: "Aganay azalay à dza uwana Zəzagəla apəhal gay à ahàl à uwana sləm aṅha Eliya."

<sup>36</sup>Dza tekula ahòy à awtày la abatà, ahənà sawsaw ala la iyaw hamhamga, afà sawsaw à gay kavak, avàl kà makokuzay, agòd': "Tsetsi mədzà à ahəṅ titi, mənəṅəz à baṅa Eliya atsa à waṅ kà aṅa mazəḃ à ahəṅ la ahàf la adi!"

<sup>37</sup>Ama Yesu awiyà la ndzəḃa, ṅgaha aməts.

<sup>38</sup>Ama bafta məṅga uwana la gày Zəzagəla la aku, akohàla tsərəd', tsərəh à afik, tsərəh à vədàh.

<sup>39</sup>Məŋga aŋa azlaslodzi dzim, uwana atsizl à huma aŋa Yesu, anəŋà mamətsay aŋha, à uwana adawiyay, agòd: "Haďay, dza uwanay kà Kona aŋa Zəzagəla!"

<sup>40</sup>Azlamis uwana tanəŋà à awtày kərkər la ahəŋ, la abatà la tataka aŋatà la abà, Mariyama dəg zla Magdala, la Mariyama iyà aŋa Yakuba uwana bəziga la Yosəs, la Salome.

<sup>41</sup>Tauguzàhàh la azla Yesu, à mok uwana agà la gudəŋ Galili. La abatà bay azlamis anik aŋuvaw tahàď la azla Yesu la slaka gà à Urusalima à afik.

<sup>42</sup>Lagwa kà mokokhu adagay, uwaga mavakay maďàh vok à ahəŋ bokuba magoďay vuď maďàh vok aŋa vuď maduw ləv.

<sup>43</sup>La gay mokokhu, Yusufu zil Arimate asà à waŋ, masla tekula la tataka aŋa azlamasiga la abà. Masla kà akùd makoray Zəzagəla babay. Kurit yewdi agòďal kà madiya à slaka Pilatus aw. Anəv vok aŋa Yesu.

<sup>44</sup>Ama ləv avàl à Pilatus à gay, kà uwana atsənəŋ kà Yesu adamətsay katskats. Azàla məŋga aŋa azlaslodzi dzim, anəv la slaka aŋha: "Aməts ma uwarà ay?"

<sup>45</sup>Uwana adatsən dziriga la slaka məŋga aŋa azlaslodzi dzim, avà tetəvi à Yusufu kà mazəb vok aŋa Yesu.

<sup>46</sup>Yusufu asùkw bafta, azəb vok aŋa Yesu à ahəŋ la ahàf la adi, afafàď à bafta uwatà à abà, afà à zəvay à agu, zəvay kà tàlla kà à tsakur à abà. Dgaha atakòslal məŋ abəlam à ama.

<sup>47</sup>Mariyama dəg zla Magdala, la Mariyama iyà aŋa Yosəs tanəŋà zəvay uwana tafà Yesu à agu.

## Mark 16

<sup>1</sup>Uwana mavakay maduw ləv adada à lig, Mariyama dəg zla Magdala, la Mariyama iyà aŋa Yakuba, la Salome tasùkw amàl matərsin kà aŋa madla aŋa maďahiya à Yesu à vok.

<sup>2</sup>Bəŋ la zay la tsəh, vuď ladu uwana afats à lig mas à afik, tahàď à gəl zəvay.

<sup>3</sup>Tagòď kà atà kà atà: "Uwa adàtakosl anu à bəlam à zəvay la ama ala uwa?"

<sup>4</sup>Kà uwana bəlam uwatà kà məŋga. Ama tanəŋà à awtày kà, tanəŋà bəlam matakoslal à ama ala gà tsewwa.

<sup>5</sup>Tahàď à zəvay à agu. Tanəŋà bəzi kohana uwana adzà madzay la abatà la ahàl kaf lakəl, la lukut medəkuga la vok. Guba akəs atà.

<sup>6</sup>Agòď à atà: "Guba akəs akul aw! Kayahaw Yesu zil Nazaret, uwana tatatàsl à ahàf à adi. Aga la abanay aw, awùl à uda la mamətsay. Aganay slaka aŋha uwana tahənəŋ à ahəŋ.



<sup>7</sup>Lagwa kà, dàw, kadàgodfaw à azlaməna matapla aṅha, kaykay gà kà à Piyer à gay uwanay: Yesu atsavokkay kà akul kà mad à Galili. La abata kadənəṅawwaṅ bokuba uwana agòd à akul.”

<sup>8</sup>Azlamis tasà à uda la zəvay la aku, tahòy. Ləv avàl atà à gay la guba məṅga. Tabadmə à dza aw kà uwana guba akəs atà.

<sup>9</sup>Uwana Yesu adawul à uda la mamətsay, bəṅ vudf ladu apəhla vok à Mariyama dəg zla Magdala dadəṅ. (Mis uwana akudəkəkal azlamasasəfok mawisiga mədəf lakəl ala)

<sup>10</sup>Mariyama ahəd kà mapəh uwaga à azladza uwana tadzàhà à ahəṅ la Yesu, tazàwla gəl, ṅgaha tatàw.

<sup>11</sup>Ama mok uwana tatsənà uwana apəh à atà kà, Yesu aga la ahəṅ la sifa kà, ṅgaha kà masla anəṅəṅ kà, atà tadiṅal gəl à vok aw.

<sup>12</sup>La lig la ahəṅ, Yesu apəhla vok à azlaməna matapla aṅha səla. La mok uwana atà tahəd à mauguzahay à bəzi gudəṅ anik à abà.

<sup>13</sup>Tawul à Urusalima à abà, tapəh à azladza anik, ama atà bay kà, tadiṅal gəl à vok aw.

<sup>14</sup>La lig la ahəṅ, Yesu apəhla vok à azlaməna matapla la slaka aṅha kulo gəl aṅha tekula, la mok uwana atà la tatak may lakəl. Agòd à atà kà, atà la madiṅal gəl à vok aw, atà la ləv dzaṅdzaṅga. Kà uwana tadiṅ gəl à azladza uwana à vok, tagòd à atà kà tadanəṅ la sifa aw.

<sup>15</sup>Yesu agòd à atà: "Dàw à gudəṅ à vok gesina, zàwəṅ, pəhàw gay Zəzagəla à azladza gesina!

<sup>16</sup>Dza uwana adiṅal gəl à vok adàhalla batem, adàbəlay. Dza uwana adiṅal gəl à vok aw Zəzagəla adàcfahalla seriya à gəl.

<sup>17</sup>Aganay azlanadzipo la maslay uwana azlaməna madiṅal gəl à vok tadàcfah à ahəṅ la sləm gulo: Tadàslala vok makudəkəkh azlamasasəfok mawisiga, tadàvatsah azlagay mələk gə,

<sup>18</sup>tadəkəs azlabebi la ahəl amiyaka tadàsa magur bay kà, aza à atà aw. Tadàbak ahəl à azlaməna dūvats à gəl, ṅgaha tadàwur ala.”

<sup>19</sup>La mok uwana Sufəl Yesu adadəv gay aṅha à gay, adà aṅha à zagəla, adzà madzay la ahəl kaf aṅa Zəzagəla lakəl.

<sup>20</sup>Azlaməna asik aṅha, tahəd à gudəṅ à vok gesina aṅa maz gay matsidayga aṅa Sufəl Zəzagəla. Sufəl Yesu adàhà sləray la atà aya gotənaṅ, apəhla dziriga aṅa gay aṅatà ala la madāh nadzipo aṅuvaw.

## Luka

### Luka 1

- <sup>1</sup>Deda Tewofil. Azladza aɲuvaw tawàf vok à uda, kà matsetser gay uwana apakahà vok la tataka gami la abà.
- <sup>2</sup>Tatsetseràh azlatatak uwana tatsənàɲ la slaka azladza uwana tanəɲàɲ la yewdi aɲatà, dagay la madzəka, ɲgaha tafà à atà kà mapəhay gay uwaga à ahàl.
- <sup>3</sup>Gi babay gəkəs tetəvi aɲa manərəz tatak uwaga gesina, dagay la madzəka, kà gi aɲa mapàhla uwaga ala, la tekula tekula à kak mənɲa Tewofil.
- <sup>4</sup>Uwana gəɖahà uwaga kà, kà kak aɲa matsən dziriga aɲa matapla uwana kabəzal gesina.
- <sup>5</sup>La mok uwana Herod agà Sufəl aɲa Yahudiya kà, masla mav tatak à Zəzagəla anik la ahəɲ, uwana sləm aɲha kà Zakari; masla kà tsəhay aɲa azlaməna mav tatak à Zəzagəla, la hud gày aɲa Abiya. Sləm aɲa mis aɲha kà Elisabet, masla kà mayyi à tsəh ala aɲa Haruna, mənɲ madzahaga aɲa azlaməna mav tatak à Zəzagəla uwarà.
- <sup>6</sup>Atà səla nna kà, azladza dziriga la huma aɲa Zəzagəla, ɲgaha takəs gay aɲa Sufəl Zəzagəla la ləv tekula, tanəfà mapəhay aɲha la dziriga bay.
- <sup>7</sup>Ama bəzi aɲatà la ahəɲ aw, Elisabet aslàla vok aɲa mabəz bəzi aw, kà uwana tadapak makoz.
- <sup>8</sup>Vərđi anik, Zakari adàh sləray aɲa makaɖ tatak à Zəzagəla, kà uwana à ahàl iyaw aɲha kà madəhəɲ.
- <sup>9</sup>Bokuba uwana zagələ aɲatà aɲa mazəbani vok la ahàl iyaw la ahàl iyaw, kà masəl dza uwana adàh sləray la mavakay uwatà la tsəh, ɲgaha atəɖ à Zakari à gəl kà mabək kidzidzi la gày Sufəl Zəzagəla la aku.
- <sup>10</sup>La mok uwana abək kidzidzi kà, maham à ahəɲ dza tadəv kuɖa.
- <sup>11</sup>La abatà malika aɲa Sufəl Zəzagəla apəhla vok à Zakari, atsizl à ahàl kaf aɲa slaka mabək kidzidzi à gəl.
- <sup>12</sup>Guba akəs Zakari à mok uwana anəɲàɲ askùlla à tsəh ala kaykay.
- <sup>13</sup>Ama malika agòɖal: "Zakari, guba akəs ka aw, kà uwana Zəzagəla adatsən madəv kuɖa aɲak. Elisabet mis aɲak adàyya à ka bəzi, kadàvəl sləm Yuhana.
- <sup>14</sup>Kak kadàhənlà la marabay, ɲgaha azladza aɲuvaw tadàrabay lakəl aɲa mayyi masla.
- <sup>15</sup>Kà uwana adàgay mənɲ dza la huma yewdi aɲa Sufəl Zəzagəla. Tetuwa adàsa guzu aw, amiyaka bà mana beymi uwana maməslga bay kà adàsaw aw. Adàgay mahənlà à la Masasəɖok Zəzagəla dagay la hud aɲa iyà aɲha.
- <sup>16</sup>Adàwulla azla Isərayel aɲuvaw à huma Sufəl Zəzagəla.

- <sup>17</sup>Masla la gəl aṅha adàtsa vok à awtày à huma Zəzagəla la ndzəda aṅa Masasədok, ṅgaha la ndzəda aṅa masla mapəhal gay à ahəl Eliya uwana uwarà, kà matsən vok gay azlababa la azlabəza aṅatà, adàwulla azlaməna makəs gay aw à haṅkəli aṅa azladza dziriga à abà, adàdàh tsəhay à ahəṅ kà mas à waṅ aṅa Sufəl Zəzagəla.”
- <sup>18</sup>Ama Zakari agòd à malika: "Kakay gədəsəlay kà uwaga kà dziriga ma? Tsa mədapakah makoz la mis gulo mi", agòdal.
- <sup>19</sup>Kiya uwaga malika agòdal: "Gi kà sləm gulo kà Gabəriyel. Gi la uwana Zəzagəla afà à gi à huma aṅha à gay, kà gi aṅa mazlakəṅ, masla asləl gi à waṅ kà mapəh à ka gay uwaga.
- <sup>20</sup>Ama kadiṅ gəl à gay gulo uwana à vok gəpəh à ka, adəpaka vok gəgòd à ka aw kà, kà uwaga kapakay bada, kabadma aya aw, tsərəh à uwana tatak uwana gəpəh à ka adəpaka vok dandan la uwana kadəbadma.”
- <sup>21</sup>La kaslà uwatà, azlaməna madiṅal gəl à vok takùd Zakari la uda, ṅgaha ləv avəl atà à gay məṅga, kà uwana asəf məṅga la gày mabək kidzidzi la aku.
- <sup>22</sup>Ama mok uwana adasa à uda kà, aslāla vok aṅa mabadatəma aya aw, azladza tadzùgw kà: Anəṅà nadzipo anik la gày la aku, tagòd. Abadatəmə kà la ahəl pəra, kà uwana aslāla vok kà mabadma aya aw.
- <sup>23</sup>Mok uwana Zakari adadəv kaslà aṅha à gay kà mabək kidzidzi la məṅ gày Zəzagəla la aku kà, awul à mtəga aṅha.
- <sup>24</sup>Zwek la huma la gay kà, bəzi adà à Elisabet, mis aṅha, à huđ, ṅgaha masla Elisabet ahadà bəzi la huđ tsərəh à təla zlo. Agòd la gəl aṅha:
- <sup>25</sup>"Iyay, aganay tatak uwana Sufəl Zəzagəla adahəṅ kà aṅulo, Zəzagəla asəl aṅa mahəlla gi ziruwi lakəl ala la huma azladza gesina.”
- <sup>26</sup>La təla mukwa, Zəzagəla asləl malika Gabəriyel à gudəṅ Galili, uwana sləm aṅha Nazaret,
- <sup>27</sup>à slaka dahalay anik, uwana mawdà aṅa Yusufu, masla kà la mayyi à tsəh ala aṅa sufəl David la abà. Sləm aṅa dahalay uwatà bay kà Mariyama.
- <sup>28</sup>Malika adagay à slaka aṅha agòdal: "Ràb, kà uwana Zəzagəla adahənkala la vok mahamay aṅha, Sufəl Zəzagəla la ahəṅ la kak.”
- <sup>29</sup>Mariyama kà gəl akədàl à vok kà gay uwaga. Anavà gəl aṅha agòd: 'Mana asal magodəy ayyi marabay gə uwanay ma?'
- <sup>30</sup>Kiya uwaga malika agòdal: "Mariyama, guba akəs ka aw, kà uwana kadabəz vok mahamay aṅa Zəzagəla.
- <sup>31</sup>Kadəgay la bəzi la huđ ṅgaha kadəyyi bəzi zilga, uwana kadəvəl sləm Yesu.
- <sup>32</sup>Masla adəgay məṅ dza, ṅgaha tadəzallalla Kona aṅa Zəzagəla, uwana kərkər la afik. Sufəl Zəzagəla adəpakəṅ ala kà məṅ sufəl, bokuba uwana adahəṅ à David, baba aṅha madzidziga.

- 33 Ɖgaha adàkor tsəhay Isərayel aŋa koksikoksi; makoray aŋha adàkəf gəl à ahəŋ aw.”
- 34 Mariyama agòd à malika: "Kakay uwaga adàpaka vok, tsa gi la zil dadàŋ aw ma?"
- 35 Malika agòdàl: "Masasədòk tsikasla adàsa à ahəŋ à gəl aŋak, ŋgaha ndzədá aŋa Zəzagəla uwana kərkər la afik, adàsa à ka à gəl, bokuba dzəgay, kà uwaga à uwana bəzi uwana kadàyyi kà, tadàzallalla: Tsikasla, Kona aŋa Zəzagəla uwana la zagəla la afik.
- 36 Elisabet dəg tsin aŋak babay kà, bəzi la huď, tekeďika adagay makoz babay, azladza kà 'Dəgər', tagòdàl, ama lagonay kà bəzi la huď aŋa təla mukwa.
- 37 Kà uwana tatak la ahəŋ aduw kà Zəzagəla à gəl aw.”
- 38 Kiya uwaga Mariyama agòd: "Gi kà, gi mayà aŋa Sufəl Zəzagəla; apakà à gi vok, bokuba uwana kapəh lagwa zlà." Kiya uwaga malika asàkal à ahəŋ.
- 39 La kaslà uwatà, Mariyama atsizilla ala, amərə vok, kà mad à gudəŋ anik à abà, la gudəŋ la afik la kutso Yahudiya.
- 40 Ahàd à gày aŋa Zakari, "Ayyi", agòd à Elisabet.
- 41 La mok uwana Elisabet atsənà madàh 'Ayyi' aŋa Mariyama kà, bəzi abəlakà vok la huď aŋha. Elisabet adàhənla la Masasədòk Zəzagəla,
- 42 awiyà la ndzədá: "Zəzagəla apis à ka gay à vok kayakay la tataka azlamis anik la abà gesina, ŋgaha mapis gay à vok aŋha adàdza à ahəŋ lakəl aŋa bəzi, uwana kadàbəzal.
- 43 Gi ma gi uwa, à uwana iyà aŋa Sufəl gulo atsa à waŋ à mtəga gulo uwa?
- 44 Kà uwana mok uwana gətsənà 'Ayyi' aŋak kà, bəzi abəlakà vok la huď gulo la marabay.
- 45 Lapiya agay la kak, kà uwana kadiŋ gəl à tatak uwana à vok, Sufəl Zəzagəla apəh à ka uwaga apaka vok.”
- 46 Kiya uwaga Mariyama agòd: "Masasədòk gulo azləb mənğa aŋa Sufəl Zəzagəla,
- 47 Ləv gulo adahənla la marabay à kà Zəzagəla masla mabəl gi.
- 48 Kà uwana vok ahamàl kà gi à uwana anəŋ gi kà kiya gi mayà aŋha tələmmaga. Iyay, dagay lakana azladza tagodəy kà, gi kà gi mapis gay à vok gà.
- 49 Kà uwana Zəzagəla, uwana tsikasla, adàhà tatak gesina dzəba aŋha səla aw kà aŋulo. Sləm aŋa Zəzagəla kà tsikasla.
- 50 Mawoyəŋ aŋha adəgay la ahəŋ Lakəl aŋa azladza gesina, uwana tahoy yewdi aŋha koksikoksi.
- 51 Ahənà azlasləray mənğa mənğa ala, la ndzədá aŋa ahəl aŋha. Awits azlaməna zlapay gə ala.
- 52 Adakwà azlasufəl à ahəŋ la kursi aŋatà la afik, adawalla atà à vədàh; Ama azigənàhà azlaməna tələmmaga.

- 53 Ahanà azlaməna may ala la azlatatak delga, delga gà, Akudĕkàh azlagorobu la ahàl deyday.
- 54 Asà à waŋ, azlāk tsəhay aŋha Isərayel, masla sləray aŋha Avikàŋ kà mapəhla delga aŋha ala aw,
- 55 La slaka Abəraham, ŋgaha la mayyi à tsəh ala aŋha kà aŋa koksikoksi, Bokuba uwana apəh à azlababa gami madzidziga.”
- 56 Mariyama adzà à ahəŋ la Elisabet nekwa nekwa təla makər, la lig la ahəŋ, awùl à mtəga aŋha.
- 57 Kiya uwaga mok uwana kaslā masewk à ahəŋ aŋa Elisabet adaslay kà, ayyà bəzi zilga.
- 58 Azlaməna magay aŋha la azlatsəhay aŋha tatsənəŋ kà Sufəl Zəzagəla adadāhalla delga, ŋgaha atà taràb la slaka gà.
- 59 Mok uwana bəzi adadāh kasukwa tekula kà, tadala kà makədəv à uda, atà kà, asà à atà kà mavàl sləm aŋa baba aŋha, Zakari.
- 60 Ama, "Awaŋ", iyà aŋha agòd; "Sləm aŋha kà mavàl kà Yuhana.”
- 61 "Awaŋ, dza la ahəŋ la tsəhay aŋak la abà, à uwana tavàl tsəhay sləm uwanay", tagòdàl.
- 62 Kiya uwaga tanavà baba aŋha mabada bada, kà masəl sləm uwana asàl mav à bəzi.
- 63 Zakari anəv tatak kà manəhal à adi, ŋgaha kiya uwanay à uwana anəh: 'Yuhana, la uwana sləm aŋha.' Ləv avàl atà à gay gesina aŋatà.
- 64 Katskats la abatà Zakari adzəkà mapokw gay kà mabādma, adzəkà mazləb Zəzagəla la kuda zləkkà.
- 65 Kiya uwaga guba akəs azlaməna magay aŋha gesina, ŋgaha azlaməna madz à ahəŋ la gudəŋ uwatà la afik gesina tapəh tatak uwana apakà vok.
- 66 Azladza gesina uwana tatsənà uwana tapəhay kà, awùl atà à gəl, ŋgaha tanàvəh à vok: "Tsa bəzi uwanay ma adàgay ma uwa tak uwa? Ndzer, maslay aŋa Sufəl Zəzagəla la ahəŋ lakəl aŋha, haday!”
- 67 Zakari, baba aŋa bəzi uwaga, agà mahənlaga la Masasədok Zəzagəla, adzəkà maziŋ kiya uwanay:
- 68 "Mazləbay agay kà la Sufəl, uwana Zəzagəla aŋa azla Isərayel Kà uwana afà sləm à azladza aŋha, abəlla atà.
- 69 Masla apəhanula maslay la mav à anu masla mabələŋ dziriga, Uwana la mayyi à tsəh ala aŋa Sufəl David la abà, uwana magamza aŋha.
- 70 Uwaga la uwana apəh uwarà la paŋaw aŋa azlaməna mapəh à atà gay à ahàl kà mapəh à azladza:

- <sup>71</sup>'Gədàtəf akul la ahàl aṅa azlaməna məzam aṅkul agòd, Dgaha la ahàl aṅa azlauwana tapəsew anu gesina.'
- <sup>72</sup>Masla adəpəhla mawoyəṅ aṅha à azlababa gami madzidziga ala, Dgaha gay makəs vok slawda aṅha tsikaslaḡa uwatà adàwulal à gəl.
- <sup>73</sup>Kà uwana Sufəl Zəzagəla azùw mawadəy à baba gami madzidziga Abəraham.
- <sup>74</sup>Kà masla aṅa mapəlanula la ahàl aṅa azlaməna məzam gami, Dgaha kà anu aṅa madàhala sləray la kokudà kurit yewdi.
- <sup>75</sup>Kà anu aṅa magay sətaka, ṅgaha la dziriga la huma aṅha koksikoksi.
- <sup>76</sup>Dgaha kak, bəzi gulo kadəgay masla mapəhal gay à ahàl aṅa dza uwana kərkər la afik aṅa koksikoksi. Kà uwana kak la uwana kadəguway la huma aṅa Sufəl kà madàhalləṅ tetəvi à ahəṅ.
- <sup>77</sup>Dgaha kà mapəhla à azladza aṅha ala kà, adàbəl atà la mamats atà tsakana aṅatà ala.
- <sup>78</sup>Hadəy, Sufəl Zəzagəla gami kà, adahənla la vok mahamay, ṅgaha la lapiya, Adasləl à anu ufaka à ahəṅ à gəl gami gesina, bokuba ufaka aṅa afats uwana atsa à afik.
- <sup>79</sup>Kà masla aṅa manəṅ azladza uwana ala, atà la mələs la abà, ṅgaha la azladza uwana la dzəgay aṅa mamətsay la abà, Dgaha masla aṅa manəṅla asik gami la tetəvi aṅa lapiya la tsəh."
- <sup>80</sup>Bəzi azigən, ṅgaha haṅkəli aṅha bay azàla vok à gəl. Adzà à ahəṅ la fəta la abà, tsəràh à mavakay uwana apəhla vok ala la huma tsəhay Isərayel.

## Luka 2

- <sup>1</sup>La zamana uwatà Awgustus, məṅ sufəl aṅa azla Rom agòd kà: 'Say tatugw dza la makoray gulo gesina', agòd.
- <sup>2</sup>Uwaga kà matugw dza matera, uwana apakà vok la zamana aṅa Kwiriniyus gumna aṅa kutso Səriya.
- <sup>3</sup>Azladza gesina tadàh kà matsetser atà, kəla uwabeyuwi adà à gudəṅ aṅha.
- <sup>4</sup>Yusufu babay atsizilla ala la Nazaret la kutso Galili, kà maday à kutso Yahudiya, à huđ gudəṅ uwana à abà, Betelehem tagòdàl, à slaka uwana tayyà sufəl David à abà. Kà uwana masla kà mayyi à tsəh ala aṅa David.
- <sup>5</sup>Tahəd kà matsetser sləm aṅatà, la mawdà aṅha, Mariyama, uwana akùd kaslà masewk à ahəṅ.
- <sup>6</sup>Kiya uwaga, mok uwana tabəzay, kaslà masewk à ahəṅ aṅha adaslay.
- <sup>7</sup>Dgaha ayyà bəzi zilga, malkwoy aṅha, afafədàl lukut à adi, ṅgaha ahənàṅ à daṅor à abà, kà uwana slaka la ahəṅ kà aṅatà la gày mələk dza la aku aw.
- <sup>8</sup>La gudəṅ uwatà, azlaməna manəṅla azlatatak la ahəṅ uwana tahanay la fəta kà manəṅla azlatatak aṅatà.

- <sup>9</sup>Malika aña Sufəl Zəzagəla apəhatàla vok, ɲgaha mazləbay aña Sufəl Zəzagəla awùdla slaka aɲatà. Guba akəs atà gesina aɲatà.
- <sup>10</sup>Ama malika agòd à atà: "Guba akəs akul aw, kà uwana gəsà à akul à waɲ kà gay matsidayga, uwana adàrab azlatsəhay gesina.
- <sup>11</sup>La huf aña vəd uwanay la abà, la huf gudəɲ aña David la abà kà, tayyà à akul masla maɓəl akul: Masla Kristu, Sufəl.
- <sup>12</sup>Aganay tatak uwana adàpəhakulla: Kadànəɲaw bəzi vərna mafafàdɪl lukut à adi gà, mahənəɲ à ahəɲ gà la daɲor la abà."
- <sup>13</sup>Katskats, maham à ahəɲ malika la zagəla tahamà gay à vok la malika uwatà, tasləkàw Zəzagəla tagòd:
- <sup>14</sup>"Mazləbay aga la Zəzagəla uwana la zagəla, Lapiya aga la gudəɲ la vok la slaka azladza uwana Zəzagəla awoya atà, ɲgaha azlauwana tawoya masla babay!"
- <sup>15</sup>Mok uwana azlamalika tasàk atà à ahəɲ, tawùl aɲatà à zagəla kà, azlaməna manəɲla azlatatak tagòd à vok kà atà à atà: "Məhàd tsəràh à Betelehem zlà, delga kà mənəɲ tatak uwana apakà vok, mədànəɲ Sufəl Zəzagəla apəhanula zlà", tagòd.
- <sup>16</sup>ɪgaha atà tamərə vok kà maday, tabəz à Mariyama à vok atà la Yusufu, ɲgaha la bəzi vərna, uwana mahənəɲ à ahəɲ gà la daɲor la abà.
- <sup>17</sup>Mok uwana tanəɲəɲ, tatùgw gay uwana tanəɲàɲ, la uwana tatsənà la slaka aña malika lakəl aña bəzi.
- <sup>18</sup>Azladza uwana tatsəb sləm à azlaməna manəɲla azlatatak uwaga kà, ləv avəl atà à gay gesina, kà uwana tatsənà uwaga.
- <sup>19</sup>Ama Mariyama kà, abək uwaga gesina à gəl aɲha à afik, adzùgw uwaga la lela.
- <sup>20</sup>La lig la ahəɲ, azlaməna manəɲla azlatatak takəs tetəvi kà mawul aɲatà la mazləb Zəzagəla. Tazləbà masla kà azlatatak uwana tatsənàɲ, la uwana tanəɲàɲ, kà uwana uwaga gesina kà, apakà vok bokuba uwana malika apəh à atà.
- <sup>21</sup>Mok uwana kasukwa tekula adadà à lig kà, mahənay adaslay kà makədəv Yesu à uda, tavəl sləm Yesu, sləm uwana malika apəhla ala à mok uwana iyà aɲha alèg mazəb à huf dadàɲ.
- <sup>22</sup>ɪgaha bokuba uwana gay aña madàh mavəlàh adadəv à gay kà, bokuba uwana mapəhay aña Musa agod, tadàla Yesu à Urusalima kà mapəhla masla ala la huma aña Sufəl Zəzagəla,
- <sup>23</sup>bokuba uwana tatsetsèr à mapəhay aña Sufəl à abà: 'Kəla malkwoy zilga kà, uwaga tatak matsufay gà aña Sufəl Zəzagəla la fəta la awtày tsikasla.'
- <sup>24</sup>Takadàh azlatatak uwana kadàw, wakità mapəhay agòd: 'Azlahabakoku fəta səla baɲaw azlazlabara habakoku mtəga səla.'

- <sup>25</sup>Dza anik la ahəŋ la Urusalima uwana sləm aŋha Səmeyyon. Zil uwatà kà dza dziriga, akəs gay aŋa Zəzagəla, ŋgaha akudà dza uwana naka atsa à waŋ, kà maβəl azladza Isərayel. Masla kà agà la Masasəđok Zəzagəla.
- <sup>26</sup>Ŋgaha Masasəđok Zəzagəla apəhla à vok à abà kà, adàmətsay dadəŋ aw, say baŋa adənəŋ huf adi aŋa Kristu, uwana Sufəl Zəzagəla adəsləl à ahəŋ dadəŋ.
- <sup>27</sup>Masasəđok Zəzagəla adàla masla à mənəŋ gəy Zəzagəla à agu, la mok uwana azlababa tasəlla Yesu à waŋ, kà madəhallaŋ bokuba uwana: 'Dahəwwəŋ', wakità seriya agòđ.
- <sup>28</sup>Səmeyyon azəb bəzi à ahəl, ŋgaha 'Kikay', agòđ à Zəzagəla la magođay:
- <sup>29</sup>"Sufəl, lagonay kà mapəh à ahəŋ aŋak kà adagəđ à afik, Sək à mayà aŋak aməts aŋha la lapiya adagay zlà,
- <sup>30</sup>Kà uwana lagwa kà, gədanəŋ maβəlay aŋak la yewdi gulo,
- <sup>31</sup>Uwana kadəhəŋ à ahəŋ kà aŋa tsəhay gesina.
- <sup>32</sup>Uwaga la uwana udəka uwana adapəhla ka ala la huma azladza gudəŋ à vok gesina, Uwaga la uwana adavà mazləbay à tsəhay aŋak Isərayel."
- <sup>33</sup>Baba la iyà aŋha atà səla nna ləv avəl atà à gay kà gay uwana Səmeyyon apəh lakəl aŋha.
- <sup>34</sup>Səmeyyon apis à atà gay à vok, ŋgaha agòđ à Mariyama iyà aŋa Yesu: "Zəzagəla akəsənì bəzi uwanay kà, kà matsalla matekwid, ŋgaha kà aŋa matsizlla azladza aŋuvaw ala la tataka azla Isərayel la abà. Adagay tatak manəŋal adi aŋa Zəzagəla, uwana azladza tadəkweška.
- <sup>35</sup>Ŋgaha adəpəhla madzugway aŋa azladza gesina ala la udəka la abà la dazuwaya, ŋgaha kak babay kà, katsakar adəzləl madzugway aŋak ala kà madzugway aŋa tsəh ləv aŋak mas à uda la dazuwaya."
- <sup>36</sup>Agà la ahəŋ babay masla mapəhal gay ahəl misga uwana sləm aŋha kà Hana, dugu aŋa Fanuyel uwana la tsəhay aŋa Asər. Masla adagay makoz, zil dahalay aŋha uwana ahəd kà, tadəhà mavay məđəf atà səla,
- <sup>37</sup>adzà à ahəŋ bokuba mis kudà tsərəh à mavay dzik mtəgis gəl aŋha ufađ. Masla azəhà vok la gəy Zəzagəla la aku aw, la mavakay la mahanay gesina, azləkəh Zəzagəla, ŋgaha akəs nəlay la madəv kudà babay.
- <sup>38</sup>Asà à waŋ la kaslà uwatà, "Kikay", agòđ à Zəzagəla, ŋgaha apəh gay aŋa bəzi à azladza gesina uwana atà takudà kà Zəzagəla aŋa maβəl Urusalima.
- <sup>39</sup>Mok uwana azlababa aŋa Yesu tadəva tatak uwana à gay: 'Dahəwwəŋ', wakità mapəhay aŋa Sufəl Zəzagəla agòđ kà, tawùl aŋatà la masla à Galili à gudəŋ Nazaret.
- <sup>40</sup>Bəzi adà à huma à gay la mazigənay, azàla ndzəđà à gəl aya, ahənla la matsihila. Ŋgaha vok mahamay aŋa Sufəl Zəzagəla agà lakəl aŋha.
- <sup>41</sup>Kəla mavay azlababa aŋha tadəhah à Urusalima kà aŋa madəvaday Paska.



<sup>42</sup>La mok uwana adadāh mavay kulo gəl aṅha səla kà, tasəl à waṅ la tsəh, kà uwana zagələ aṅatà.

<sup>43</sup>Mok uwana madəvaday adadəv à gay kà, tawùl aṅatà, la kokudā masəlay aṅa azlababa, kà Yesu agəd à Urusalima.

<sup>44</sup>Madzugway aṅatà kà: 'Yesu kà aga la tataka aṅa azlamanalay aṅha la abà', tagòd, ṅgaha la mok uwana lis tavək asik à gəl kà, tadzəkà mayahay la tataka aṅa dugum tsin aṅha la abà, ṅgaha la azlamanalay aṅha la abà babay.

<sup>45</sup>Ama tabəzal aw, kà uwaga à uwana azlababa aṅha tawùl à Urusalima kà mayahay.

<sup>46</sup>La mavakay mamakər tabəzal à gəl la məṅ gày Zəzagəla la aku. Masla adadza madzay la tataka aṅa azlaməna matapla tatak à azladza la abà, atsəb à atà sləm, la manavàh atà tatak.

<sup>47</sup>Azladza gesina uwana tasəbal sləm, ləv avəl atà à gay kà haṅkəli aṅha, ṅgaha kà azlamawul à uda aṅha aya.

<sup>48</sup>Mok uwana azlababa aṅha tanəṅ kà, takəs gəl la ahəl səla, ṅgaha iyà aṅha agòdāl: "Bəzi gulo, kà mana madāh à anu a ahəṅ kiya uwanay ma? Nəṅàṅ tsi, anu la baba aṅak kà, mədayàh ka kà məṅga, la iyaw tugwi la adi."

<sup>49</sup>Agòd à atà: "Kà mana kayàhàw gi ma? Kasələw kà, azlayla gi, aṅa madz à ahəṅ la gày aṅa baba gulo la aku, kà madāh sləray aṅha aw takay?"

<sup>50</sup>Ama atà kà tatsənà tatak uwana apəh à atà aw.

<sup>51</sup>Kiya uwaga Yesu awùl à mtəga atà nna à gudəṅ Nazaret, akəs atà gay la ahəl ala. Ama iyà aṅha kà akəsàn lakəl à mad vok aṅa azlatatak gesina uwana apakà vok.

<sup>52</sup>Yesu azigəṅ, maslay aṅha adà à huma à gay, masla ahəd à Zəzagəla à adi, ṅgaha à azladza gesina à adi babay.

### Luka 3

<sup>1</sup>La mavay makulo gəl aṅha zlo aṅa makoray aṅa məṅ sufəl aṅa azla Rom, uwana sləm aṅha Tiber Zəsar, Pontsəyus Pilatus agà gumna aṅa Yahudiya, Herod bay akòr Galili, ṅgaha deda aṅha Filip akòr Ituriya la Tərakoniya, ṅgaha Lisaniyas akòr Abilen.

<sup>2</sup>La kaslà uwatà kà, Hanas atà la Kayyif atà tagà azlaməṅ madzahaga aṅa azlaməna mav tatak à Zəzagəla. La mok uwaga gay aṅa Zəzagəla atsənà à Yuhana, kona aṅa Zakari la kəsaf la abà.

<sup>3</sup>Yuhana augùzàh la kutso uwana la abatà la makəla aṅa Urdun gesina. Azàtəṅ, agòd: "Pəhàw gay la ləv ala, dəhàw batem ṅgaha Zəzagəla adàmatsakulla tsakana aṅkul ala."

<sup>4</sup>Uwaga kà bokuba uwana tatsetsèr à wakità aṅa masla mapəhal gay à ahəl Yesayya à abà: 'Uwaga kà kuda aṅa dza uwana awiyay la fəta la abà: Slədāw tetəvi à Sufəl à ahəṅ, Tsàzləw azlatetəvi manalabahayga ala gesina!

<sup>5</sup>Azlažlələk gesina adəhəbà, Azlagudəŋ la azladadəgwal tapakəh vadavaday, Azlamanalabay aŋa barama tatsazl ala, azlatetəvi uwana maləh à uda gə, tadəhəbà takakarra.

<sup>6</sup>Kiya uwaga azladza gesina tadənəŋ məbəl anu aŋa Zəzagəla.’

<sup>7</sup>Maham à ahəŋ dza aŋuvaw asà à waŋ à slaka Yuhana, kà atà aŋa məbəz batem. Masla agòd à atà kà: "Akul azlabəza aŋa matsapa, uwa à uwana agòd à kul kà kadətəfaw à mapak ləv aŋa Zəzagəla la gay la à uwana adəsa à waŋ bawbaw uwa?"

<sup>8</sup>Lagwa kà, dəhəwəŋ sləray uwana apəhla ala kà kadəbədəwla kà vok, kà kapəhaw gay la ləv ala zlə, kadzugwaw la ləv aŋkul la tsəh kà: 'Abəraham baba gami madzidziga', kagodəw aw. Kà uwana hadəy gəpəh à kul kà, Zəzagəla aslala vok aŋa mapak azlaakur uwanay ala, kà magay azlabəza aŋa Abəraham.

<sup>9</sup>Lagwa kà goslka kà madəhəŋ à ahəŋ gə, kà mahərats la tsəh à ahəf à afik. Kəla ahəf uwana av mayyay delga aw kà, tanats à ahəŋ, ŋgaha taduwa à akəl à tsəh.”

<sup>10</sup>Kiya uwaga maham à ahəŋ dza anəv: "Mana ma à uwana mədəhəŋ zlə ma?"

<sup>11</sup>Masla awulatəla, agòd: "Dza uwana akor lukut səla tavəhəŋ la dza uwana aŋha la ahəŋ aw, ŋgaha dza uwana la tatak may babay tatsəkəŋ la dza uwana aŋha la ahəŋ aw.”

<sup>12</sup>Azlaməna mazəb hadama tasà à waŋ aŋa madəhatəŋ batem suwaŋ, ŋgaha tanavə Yuhana: "Məŋga, mana ma à uwana mədəhəŋ ma?"

<sup>13</sup>Kiya uwaga agòd à atà: "Kafəw à azladza à gəl kà mapəlay məŋga dūwə uwana pələw, tagòd aw.”

<sup>14</sup>Kiya uwaga azlaslodzi tanəv suwaŋ: "Anu ma, kakay anu babay zlə ma?" Agòd à atà: "Kahalaw sili azladza ala la gasa aw, baŋaw la tetəvi fida gə aw, ama kùdəw kà masik aŋkul uwana kadəbəzawwal.”

<sup>15</sup>Ama uwana maham à ahəŋ dza gesina tagə la manəwəŋ la abə lakəl aŋa Yuhana kà, 'Zlahaw kà, masla la uwana Kristu' tagòd.

<sup>16</sup>"Gi", Yuhana agòd à atà gesina kà, "Gədəhakulla batem kà la iyaw. Ama dza anik la ahəŋ atsa à waŋ la lig gulo la ahəŋ kà, bə gi babay kà gəsla mapəzl zuwid kwimik aŋha ala babay aw. Masla kà adədəhakulla batem kà la Masasədok tsikasla, ŋgaha la akəl.

<sup>17</sup>Kətsaw madula hi aŋha la ahəl, kà masəhla hi, kà mavəh à atà ala la tafarga. Hi aŋha kà adətsak à vədə aŋha à abə, ama tafarga kà, aduwal à akəl uwana à tsəh adəməts ala dikidiki aw!"

<sup>18</sup>La mapəh à atà azlagay anik anik aŋuvaw aya, la uwana Yuhana azə gay matsidəyga à azlatsəhay uwaga.

<sup>19</sup>Yuhana asləhə vok à Herod à kà uwana azəb Herodiya, mis aŋa deda aŋha, ŋgaha kà uwana adəhə azlamawisiga anik anik aŋuvaw aya.

- <sup>20</sup>Kiya uwaga Herod azàla mawisiga aṅha à gəl aya la maduw Yuhana à daṅay.
- <sup>21</sup>Kiya uwaga Yesu asà à waṅ, à mok uwana azladza gesina tabèz batem, abèzà à batem aṅha suwaṅ. La kaslà uwana adèv kuḍa, zagəla apèzl à ama ala,
- <sup>22</sup>ṅgaha Masasədök Zəzagəla asà à ahəṅ à gəl aṅha bokuba habakoku. Ḷgaha bay kuḍa atsən à ahəṅ la zagəla la magoday: "Kak bəzi gay ləv gulo; marabay gulo gesina kà la kak la afik."
- <sup>23</sup>La mok uwana Yesu adzəkà sləray aṅha, kà adadāh mavay dzik makər. La madzugway aṅa azladza kà: 'Kona aṅa Yusufu' tagòd, à uwana agà kona aṅa Heli. Aganay madzəka vok mayyi à tsəh ala aṅa azlababa madzidziga uwana adà à huma à gay.
- <sup>24</sup>Heli kona aṅa Matat, kona aṅa Levi, kona aṅa Melki, kona aṅa Yanay, kona aṅa Yusufu,
- <sup>25</sup>kona aṅa Matatiyas, kona aṅa Amos, kona aṅa Nahum, kona aṅa Esəli, kona aṅa Nagay,
- <sup>26</sup>kona aṅa Mat, kona aṅa Matatiyas, kona aṅa Səmeyyi, kona aṅa Yosək, kona aṅa Yoda,
- <sup>27</sup>kona aṅa Yohanan, kona aṅa Resa, kona aṅa Zorobabel, kona aṅa Salatiyel, kona aṅa Neri,
- <sup>28</sup>kona aṅa Melki, kona aṅa Adi, kona aṅa Kosam, kona aṅa Elmadam, kona aṅa Er,
- <sup>29</sup>kona aṅa Yesu, kona aṅa Eliyezər, kona aṅa Yorim, kona aṅa Matat, kona aṅa Levi,
- <sup>30</sup>kona aṅa Səmeyyon, kona aṅa Yahuda, kona aṅa Yusufu, kona aṅa Yonam, kona ana Eliyakim,
- <sup>31</sup>kona ana Meleyya, kona aṅa Mena, kona aṅa Matata, kona aṅa Natan, kona aṅa David,
- <sup>32</sup>kona aṅa Yese, kona aṅa Yobed, kona aṅa Boz, kona aṅa Sala, kona aṅa Naheson,
- <sup>33</sup>kona aṅa Aminadab, kona aṅa Adəmin, kona aṅa Arəni, kona aṅa Esərom, kona aṅa Farəs, kona aṅa Yahuda,
- <sup>34</sup>kona aṅa Yakuba, kona aṅa Isak, kona aṅa Abəraham, kona aṅa Tara, kona aṅa Nakor,
- <sup>35</sup>kona aṅa Səruk, kona aṅa Ragaw, kona aṅa Falek, kona aṅa Eber, kona aṅa Sala,
- <sup>36</sup>kona aṅa Kaynam, kona aṅa Arəfakəsad, kona aṅa Səm, kona aṅa Nuhu, kona aṅa Lamek,
- <sup>37</sup>kona aṅa Matusala, kona aṅa Enok, kona aṅa Yared, kona aṅa Maleleyel, kona aṅa Kaynan,

<sup>38</sup>kona aṅa Enos, kona aṅa Sət, kona aṅa Adama, uwana agà la gəl aṅha kona aṅa Zəzagəla.

## Luka 4

<sup>1</sup>Yesu ahənla la Masasəḍök Zəzagəla, awùlla à waṅ la gay mukwà Urdun. Ɖgaha Masasəḍök Zəzagəla adàlla à fəta à abà.

<sup>2</sup>La abatà adàhàṅ mavakay dzik ufad, azùw tatak aw, la mok uwaga seteni apapàt masla kà, uwana masla la may gà.

<sup>3</sup>Kiya uwaga seteni agòḍal: "Baṅa kak bəzi aṅa Zəzagəla kà, pakà akur uwanay ala kà kaf."

<sup>4</sup>Yesu awulàlla: "Iyay, uwaga kà matsetseray gà: 'Ama dza adzadzar vok kà la kaf pəra aw.'"

<sup>5</sup>Seteni adàlla à afik kərkər aya, apəhla azlamakoray aṅa gudəṅ à vok.

<sup>6</sup>Ɖgaha agòḍal: "Gədàvə à ka maslay uwana la abà la tatak uwana la gudəṅ uwanay la vok gesina, kà uwana uwaga kà aṅulo, ɲgaha gi babay kà gəslala vok aṅa mav à dza uwana asa à gi.

<sup>7</sup>A baṅa kak kasləkaw gi, la makəd à gi à aheṅ, kà uwaga gesina kà adàgay kà aṅak."

<sup>8</sup>Yesu agòḍal: "Wakità agod kà: 'Sufəl Zəzagəla aṅak la uwana kanəfay pəra, ɲgaha masla kokudà gəl aṅha la uwana kazlakəṅ pəra.'"

<sup>9</sup>Kiya uwaga seteni adàla masla à Urusalima, adàla masla à gəl məṅ gày Zəzagəla à afik, agòḍal: "Baṅa kak bəzi aṅa Zəzagəla kà, vəl à ahəṅ la abanay!

<sup>10</sup>Kà uwana uwaga kà matsetseray gà: 'Dàw, Zəzagəla adàgod à azlamalika aṅha, kà manəṅla ka!' Ɖgaha aya kà:

<sup>11</sup>'Atà kà, tadəkəs kà ahəl, kà kak aṅa mazləl asik à akur la adi aw.'"

<sup>12</sup>Yesu agòḍal: "Wakità Zəzagəla agod kà: 'Katapa Sufəl Zəzagəla aṅak aw.'"

<sup>13</sup>Mok uwana seteni adàv mapapat Yesu à gay la azladabaray anik anik gesina kà, asàkal à ahəṅ, adà aṅha, say kà afats anik.

<sup>14</sup>Yesu awùlla à Galili mahənlaga la ndzəḍa ana Masasəḍök Zəzagəla. Tadzəkà mavats gay lakəl aṅha la makoray uwatà la abà gesina.

<sup>15</sup>Atàpla tatak à azladza la azlagày madəv kudà la aku. Azladza gesina tatsəḍbal sləm, tazləba masla.

<sup>16</sup>Yesu awùlla à gudəṅ Nazaret à slaka uwana à abà azigən. La vuḍ maduw ləv aṅa azla Yahudiya, ahəd à gày Zəzagəla à agu bokuba uwana adagay zagələ aṅha. Atsizlla ala kà madzeṅ wakità.

<sup>17</sup>Tavəl à ahəl wakità aṅa Yesayya, masla mapəhal gay à ahəl, à ahəl, apapàs wakità uwatà à uda ɲgaha abəz à slaka anik uwana tatsetsər kà:

- 18'Masasəḏok ana Sufəl Zəzagəla lakəl gulo, Akəsàni gi, kà gi aṇa madla gay matsidayga à azlaməna kudà. Asləl gi à waṇ kà, kà gi aṇa mapəh gay mapəlla à azlaməna daṇay, Kà mavàh yewdi à azlaguləf, Ɖgaha kà mataf azlauwana tas ṇgərpa.
- 19'Kà mapəhla ala mavày uwana vok mahamay aṇa Sufəl Zəzagəla adàpəhla vok ala.'
- 20'Ɖgaha kiya uwaga Yesu akəl wakità à abà, awùlla à ahəṇ, adzà aṇha madzay. Dèwdèw dza uwana la gày uwatà la aku tatsəkəkal yewdi à gay gesina.
- 21'La lig la ahəṇ, adzəkà magoḏ à atà: "Lakana kà, matsetseray uwanay kà, adagəḏ à afik à uwana mədzèṇ la abanay la sləm aṇkul."
- 22'Atà gesina takəs gay aṇha, ləv avəl atà à gay, kà gay aṇha dzəba aṇha səla aw gà uwaga apəh à atà. Tagoḏ: "Masla kà kona aṇa Yusufu aw takay?"
- 23'Yesu agoḏ à atà: "Dzer, asa à gi kapəhaw gi gay la gay la abà uwanay: 'Dokwtar wurà gəl aṇak ala!' kadàgodaw gi babay: 'Anu mətsonà uwana kadahəṇ la Kapernahum gesina, d'ahəṇ uwaga la huḏ gudəṇ aṇak babay zlà!' "
- 24'Ɖgaha aya agoḏ à atà: "La dziriga gəpəh à akul, d'ikidiki masla mapəhal gay à ahəl la ahəṇ tawoyəṇ, la huḏ gudəṇ aṇha uwana tayyà abà aw.
- 25'Iyay la dziriga gəpəh à akul: La zamana aṇa Eliya, azlamis kudà la ahəṇ aṇuvaw la gudəṇ Isərayel, la mok uwana iyaw anəḏ à ahəṇ la zagəla aw mavay makər la təla mukwa. Ɖgaha magol məl may məṇga apakà vok la gudəṇ uwatà gesina.
- 26'Ama Zəzagəla asləl Eliya à mtəga aṇa tekula aṇa azlamis uwaga aw, say à slaka aṇa mis kudà uwana la Sarepəta, la makoray aṇa Sədon la abà pəra.
- 27'Agà la ahəṇ babay azlaməna akəl zagəla aṇuvaw la gudəṇ Isərayel la zamana aṇa Elise, masla mapəhal gay à ahəl, amiyaka bə tekula aṇatà kà awùr ala aw, say Naman zil Səriya pəra."
- 28'Mok uwana tatsənà gay uwaga, azladza gesina la gày madəv kudà la aku tapakàh à ləv.
- 29'Tasà à afik, takəs masla, tabàyàṇ à uda la gudəṇ aṇatà la abà, tadàlla à dadəgwal uwana à afik taṇàlāhal gày aṇatà à makəla, ṇgaha kà atà aṇa maməl à ahəṇ la afik la abatà.
- 30'Ama masla, kussàh, asà à uda la tataka aṇatà la abà, adà aṇha.
- 31'Yesu ahəd à gudəṇ Kapernahum, uwana la kutso Galili la abà. Ɖgaha adzəkà matapla tatak à azladza la vuḏ maduw ləv.
- 32'Ləv avəl atà à gay məṇga kà mapəhla ala aṇha, kà uwana atàpatàla kà lela, ṇgaha la maslay.
- 33'La gày madəv kudà uwatà la aku kà, dza anik la ahəṇ uwana masasəḏok mawisiga atərebəhəṇ, adzəkà mawiyay la ndzəḏà.

- <sup>34</sup>"Kayyà, kak Yesu, zil Nazaret, mana gay aṅak la anu ma? Kasà à waṅ ma, kà mazàh anu ala takay? Gəsəl la dziriga kà, kak tsikaslaga uwana Zəzagəla asləl kà à waṅ!"
- <sup>35</sup>Yesu aslèh məl à masasədök mawisiga uwaga à gəl la ndzəda, agòdal: "Dzà à ahəṅ titi, sà à dza uwaga lakəl ala!", masasədök mawisiga aməl gəl à dza uwaga à ahəṅ la huma aṅa azladza gesina, ṅgaha asəl à kəl ala, kokudà madàhal amik à vok.
- <sup>36</sup>Azladza gesina kà, ləv avəl à atà à gay, tavàts gay la tsəh ala kà atà kà atà: "Kakay, à tsəhay gay uwanay ma? Masla akor azlamasasədök mawisiga la ndzəda, ṅgaha azlamasasədök takəs gay aṅha, tasàh azladza lakəl ala ma?"
- <sup>37</sup>Ḑgaha azladza tadzəkà mapəhay lakəl aṅa Yesu la makoray uwatà la abà gesina.
- <sup>38</sup>Yesu asà à lag la gày madəv kudà la aku, ṅgaha ahàd à mtəga aṅa Səmon. Məṅay aṅa Səmon la akəl à vok məṅga, məṅga. La abatà tanavà Yesu kà mawurəṅ ala.
- <sup>39</sup>Yesu atsəṅ à masla dūvats à gəl, apəh gay la tsəh ala la ndzəda, "Sàkal!", agòd à dūvats. Duvats asək à mis uwaga, katskats asà à afik kà mazlak atà à sləray à abà.
- <sup>40</sup>La mok uwana afats adatəf à ahəṅ, tasàhla azlaməna dūvats à waṅ, la azladūvats anik anik gesina, kà mabak à atà ahəl à gəl la tekula, tekula aṅatà gesina, awarà atà ala.
- <sup>41</sup>Azlagəla zagəla la azlamasasədök mawisiga tasàh à azlaməna dūvats lakəl ala aṅuvaw la mawiyay: "Kak la uwana kak Kona aṅa Zəzagəla!" Ama Yesu apəh à atà gay la ndzəda, ṅgaha adèf à atà gay à ahəṅ kà mavats gay la ndzəda, kà uwana tasəl kà, masla kà Kristu.
- <sup>42</sup>Mok uwana məl adawulla, Yesu asà à uda la gudəṅ la abà, adà aṅha à fəta à abà kokudà gəl aṅha. Maham à ahəṅ dza aṅuvaw tadzəkà mayàh masla. Mok uwana tabəzal à vok kà, asà à atà asək atà à ahəṅ aya aw.
- <sup>43</sup>Ama Yesu agòd à atà: "Say gəz gay matsidayga aṅa makoray Zəzagəla à azlagudəṅ anik gesina bay, kà aṅa uwaga à uwana Zəzagəla asləl gi à waṅ."
- <sup>44</sup>Ḑgaha apəh gay Zəzagəla la azlagəy madəv kudà la aku la kutso Galili gesina.

## Luka 5

- <sup>1</sup>Vərdi anik Yesu atsizilla à gay dərəv aṅa dərəv Genesaret, ṅgaha magol maham à ahəṅ dza tahamà à slaka aṅha kà matsəb sləm à gay Zəzagəla.
- <sup>2</sup>Yesu anəṅà azlakəslah iyaw səla la gay gərdza, azlaməna makas kilfi tasà à ahəṅ la afik, tapalàh dzarawa aṅatà.
- <sup>3</sup>Yesu ahàd à kəslah iyaw à afik, uwana agà aṅa Səmon, agòdal: "Zà à gi à gəl iyaw ṅuv." Ḑgaha adzà madzay la kəslah iyaw la afik, adzəkà matapla tatak à maham à ahəṅ dza uwaga.
- <sup>4</sup>Mok uwana adadəv matapatàla à gay kà, agòd à Səmon: "Zàw vok à gəl dərəv lela, ṅgaha kak la azlamanalay aṅak kadawaw dzarawa aṅkul à iyaw à abà, kà makas kilfi."

- <sup>5</sup>Səmon agòdɔl: "Məŋga, huyip, mədahənal à gəl kà madaw à abà, ama mədakəs tatak aw. Ama bokuba uwana kapəh kà, gəkweska gay aŋak aw, gəduw à abà aya kità."
- <sup>6</sup>Kiya uwaga atà tadùw dzarawa aŋatà à abà, ahəl kilfi à agu aŋuvaw tsərəh à uwana dzarawa aŋatà awòy maslahàhla, kà magay məŋga aŋa kilfi uwana la aku.
- <sup>7</sup>La abatà atà tafatakàhà azlamanalay aŋatà, uwana la kəslah iyaw anik la afik, kà atà aŋa mas à waŋ aŋa mazlak atà, tadà à awtày tazlæk atà, tahanà kəslah iyaw ala səla nna la kilfi tsərəh à uwana azlakəslah iyaw uwaga tawòy madàh à huɖ iyaw, kà mahanay aŋa azlakilfi uwaga.
- <sup>8</sup>Uwana Səmon Piyer anəŋà uwaga kà, akədèɖ à huma aŋa Yesu la magòdɔl: "Sufəl, zà à gi vok la vok ala, kà uwana gi kà gi masla tsakana!"
- <sup>9</sup>Guba akəs masla, la azladza uwana atà nna gesina, kà magol kilfi uwana takàs.
- <sup>10</sup>Azla Yakuba la Yuhana, azlabəza aŋa Zebede, uwana sləray aŋatà tekula la Səmon, ləv avəl atà à gay babay. Ama Yesu agòɖ à Səmon: "Guba akəs ka aw, dagay lakana gədàpaka ka ala kà masla makas azladza."
- <sup>11</sup>Mok uwana tadàla azlakəslah iyaw aŋatà à gay gərdza kà, tasàk à tatak gesina à ahəŋ, tanəfà Yesu.
- <sup>12</sup>Yesu agà la gudəŋ anik la abà, à uwana masla akəl zagəla asà à waŋ kà magagamay la masla, uwana adanəŋəŋ atəɖ à huma asik aŋha la magòdɔl: "Məŋga, baŋa asa à ka kà, kaslala vok mawur gi ala!"
- <sup>13</sup>Yesu abiyà ahəl ala, adəbani masla la magòɖay: "Asa à gi, kawur ala!" Akəl zagəla asà à dza uwatà la vok ala katskats.
- <sup>14</sup>Aganay mafahal akur à lig, uwana Yesu afàhal à lig: "Kapəh gay uwanay à dza aw. Ama həd, kadàpəhla vok aŋak à məŋga aŋa azlaməna mav tatak à Zəzagəla, ŋgaha kavà tatak uwana Musa apəh la wakità seriya la abà, kà azladza gesina aŋa masəlay kà kawùrla!"
- <sup>15</sup>Amiyaka bà la uwaga gesina kà, gay aŋa Yesu atsənla la slaka azladza gesina. Maham à ahəŋ dza aŋuvaw tasàhàw à waŋ à slaka aŋha kà matsəbal sləm, ŋgaha tawàràh ala la azladuvats aŋatà la abà gesina.
- <sup>16</sup>Ama Yesu asà à uda la tataka aŋatà la abà, adà aŋha à fəta à abà kokudà gəl aŋha, kà madəv kudà.
- <sup>17</sup>Iyay, vərđi anik aya, Yesu adzəkà mapàhla tatak ala. Azla Farisəya la azlaməna mapàhla wakità seriya ala tadzàhà madzay nekwa la slaka aŋha. Tasà à waŋ la gudəŋ aŋa Galili, la aŋa Yahudiya ŋgaha babay la Urusalima. Ndzədà aŋa Sufəl Zəzagəla agà la Yesu la abà kà mawar azlaməna duvats ala.
- <sup>18</sup>Ŋgaha tasəlla masla duvats à waŋ la kəslah, kà uwana makalàh à vəɖah gə, tayàh tetəvi kà madalla à gày kà maf à huma aŋa Yesu.

- 19** Ama tasèl slaka uwana tagòla à awtày la abà aw, kà uwana maham à ahəŋ dza kà aŋuvaw. Kiya uwaga tagòla la gəl gày, tazlèlla gəl gày ala, tawàdàh zuwid à kəslah à gay, tadzilà à gày la abatà la kəslah gà, à tataka maham à ahəŋ dza à abà la huma aŋa Yesu.
- 20** Mok uwana Yesu anəŋà madiŋal gəl à vok aŋa azladza uwaga, Yesu agòd à dza makalàh à vədàh gà: "Tsakana aŋak adamatsila tsewwa."
- 21** Dgaha azlaməna mapàhla wakità seriya ala la azla Farisəya tadzəkà madzugway la magodəy: "Uwa asla à tsəhay dza uwanay, atugw mawisiga lakəl aŋa Zəzagəla uwa? Uwa aslala vok aŋa mamats tsakana à dza ala, tsa baŋa Zəzagəla kokudà gəl aŋha pəra aw uwa?"
- 22** Bokuba uwana Yesu asèl madzugway aŋatà, agòd à atà: "Mana kadzugwaw la maŋoŋuzay la ləv aŋkul la tsəh ma?"
- 23** Tak ma, butu ma, la magodəy kà: Tsakana aŋak adamatsila, awma magodəy: Sà à afik, ŋgaha həd aŋak, takay?"
- 24** Ama asa à gi kasəlaw kà, kà Kona aŋa dza la maslay la gudəŋ uwanay la vok kà mamats tsakana aŋa dza ala." Dgaha agòd à dza makalàh à vədàh gà uwaga: "Gi uwaga gəgod à ka: Sà à afik, zəb kəslah aŋak, ŋgaha dà aŋak à mtəga!"
- 25** Kiya uwaga, hadzak, dza uwaga asà à afik la huma azladza gesina, azəb kəslah aŋha uwana ahəŋay la afik, ŋgaha adà aŋha à mtəga la mazləb Zəzagəla.
- 26** Ləv avàläh atà à gay gesina, ŋgaha tazləbà Zəzagəla, guba akəd atà à gay, ŋgaha tagòd: "Lakana kà, mədanəŋəŋ azlatatak dzəba aŋha səla aw gà, ndzer."
- 27** La lig aŋa uwaga la ahəŋ, Yesu asà à uda, ŋgaha anəŋà masla mazəb hadama, sləm aŋha Levi, adadza madzay la gày mazəb hadama la aku.
- 28** Yesu agòdal: "Nəfà à gi!" Hadzak, Levi asà à afik asək azlatatak à ahəŋ gesina, anəfà masla.
- 29** Levi atà magol tatak may la mtəga aŋha. Azladza aŋuvaw tahamà gay à vok la masla, azlaməna mazəb hadama, la azladza anik babay.
- 30** Azla Farisəya la azlaməna mapàhla mapəhay ala, uwana tagà la paŋaw tekula kà, azà à atà lakəl aŋa uwaga, tagòd à azlaməna matapla la slaka aŋha: "Kà mana kazuwaw la azlaməna mazaḅ hadama ma, ŋgaha kasaw la azladza uwana madz à ahəŋ aŋatà kà delga aw gà, la azlaməna tsakana ma?"
- 31** Uwana Yesu atsənà uwaga, agòd à atà: "Azladza uwana la dūvats aw kà, tanəkudà mad à dokwtar aw, say azlauwana la dūvats pəra!"
- 32** Ama agòd atà aya: "Gəsà à waŋ kà mazala azladza uwana azlawurwur aw, ama gəsà à waŋ kà mazala azladza uwana atà la dūvats pəra, kà atà aŋa mapəh gay la ləv ala", agòd.



<sup>33</sup>Ɔgaha azladza tagòdál: "Azlaməna matapla la slaka Yuhana kà takàsàhàh nəlay koksikoksi, ɲgaha tadàv kudà, amiyaka aɲa azla Farisəya bay. Ama azlaaɲak kà: tazuway, tasay."

<sup>34</sup>Ama Yesu agòd atà: "Madzugway aɲkul ma maf leri à azlauwana à gəl tazala atà à mazəb vok à abà aɲa makəs nəlay à baɲa masla mazəb mis aləg la tataka aɲatà la abà kagodaw takay? Awaɲ, akəs vok aw.

<sup>35</sup>Ama kaslà adàsa à waɲ, à mok uwana masla mazəb mis adəgay la tataka aɲatà la abà aya aw kà, la mok uwatà la uwana tadàkas nəlay suwaɲ."

<sup>36</sup>Yesu apəhatàla gay la gay la abà uwanay: "Dza la ahəɲ, akohəni lukut mawga kà matafay à lukut maviyaga à vok aw, baɲa adəhəɲ kiya uwaga kà, awis lukut mawga ala, ɲgaha lukut mawga agay kalkal la lukut maviyaga babay aw.

<sup>37</sup>Ɔgaha aya babay kà, dza la ahəɲ adaway iyaw matavəruk mawga à kiwa iyaw maviyaga à agu aw. Baɲa adəhəɲ kiya uwaga kà, mamslila aɲha kà, adəkwhah kiwa maviyaga ala, ɲgaha iyaw matavəruk asokw à vədàh, ɲgaha kiwa babay awis ala.

<sup>38</sup>Ama kəla kà, say tadaway iyaw matavəruk mawga à kiwa iyaw mawga à agu suwaɲ.

<sup>39</sup>Baɲa dza adasa iyaw matavəruk maviyaga kà, ayàh mas iyaw matavəruk mawga aya aw, kà uwana tagod kà: 'Maviya gà la uwana aduwa mawga la matsiday', tagod."

## Luka 6

<sup>1</sup>Vərdi anik, la vud maduw ləv Yesu aguwa à uda la guf nalkama la abà. (Uwana bokuba hi) Azlaməna matapla la slaka aɲha tadzəkà manal gəl gà, ɲgaha tavərəslàh kà mapaday kà uwana may azà à atà.

<sup>2</sup>Azla Farisəya anik tagòd à atà: "Kà mana kadàhaw tatak uwana tetəvi la ahəɲ aɲa madàh uwaga, la vud maduw ləv aw ma?"

<sup>3</sup>"Kay", Yesu agòd à atà: "Akul kà, kadzəɲàw tatak uwana David adahəɲ la mok uwana may akəs la azladza uwana tagà atà nna aw takay?"

<sup>4</sup>Masla, la azlaməna aɲha tahàd à gày Zəzagəla à agu, tazùw tatak may tsikaslaga, uwana maf à ahəɲ gà kà aɲa Zəzagəla pəra. Tekedika tetəvi la ahəɲ kà atà aɲa mazuway aw, say azlaməna mav tatak à Zəzagəla la uwana atà la tetəvi aɲa mazuway pəra."

<sup>5</sup>Yesu agòd à atà aya: "Kona aɲa dza la uwana məɲga aɲa vud maduw ləv uwaga."

<sup>6</sup>La vud maduw ləv anik aya, Yesu ahàd à gày madəv kudà anik à agu, ɲgaha adzəkà matapla azladza la abatà. Dza anik la ahəɲ la abatà, uwana ahəl kaf aɲha kà mamətsayga.

<sup>7</sup>La abatà kà, azlaməna mapàhla mapəhay ala, la azla Farisəya tatsəb sləm à Yesu la manərəzay, à baɲa awur dza uwaga ala la vud maduw ləv, kà atà aɲa mabəzal à tsəh, kà mapuw ala gudzi à gəl kà uwana apesew vud maduw ləv.

- <sup>8</sup>Ama Yesu asèl madzugway aṅatà, kiya uwaga agòd à dza uwana la ahàl mamòtsayga: "Sà à afik, tsizilla à tataka à abà, la abà gà, la huma azladza gesina." Dza uwaga asà à afik, ṅgaha atsizilla à atà à huma à gay la abatà.
- <sup>9</sup>"La kità", Yesu agòd à atà: "Gi la manavay la slaka aṅkul: Mapəhay gami ma avà à anu tetəvi aṅa madàh delga la vud maduw ləv takay, awma madàh mawisiga ay? Mabəl sifa aṅa dza, awma maz sifa aṅa dza ala, la uwana delga takay?"
- <sup>10</sup>Atà gesina tatsəkàl yewdi à gay, kiya uwaga Yesu agòd à dza uwaga: "Biyà ahàl ala!" Abiyà ahàl ala, ṅgaha ahàl adawur ala.
- <sup>11</sup>Ama azla Farisəya la azlaməna mapàhla mapəhay ala tahən ala la maṅor, ṅgaha la mapakàh ləv, ṅgaha tadzəkà mabay vok gay kà atà kà atà lakəl aṅa uwana asà à atà madəhəṅ à Yesu à vok.
- <sup>12</sup>La kaslà uwatà, Yesu ahàd à dadəḡwal à afik kà madəv kudà la abatà, huyip ahən à madəv kudà à gəl, adəv kudà à Zəzagəla.
- <sup>13</sup>Mok uwana məl adawulla, azàla azlaməna asik aṅha, ṅgaha atsatsàmànì kulo gəl aṅha səla, uwana apakàtəla kà azlaməna matapla la slaka aṅha.
- <sup>14</sup>Səmon (uwana avəl sləm Piyer bay) la deda aṅha Andəre, Yakuba, Yuhana, Filip, Bartelemi,
- <sup>15</sup>Mata, Tomas, Yakuba kona aṅa Alfe, Səmon uwana tazàlal Zəlot,
- <sup>16</sup>Yudas kona aṅa Yakuba, ṅgaha Yudas Iskariyot, uwana apaka masla məzam aṅa Sufəl Yesu.
- <sup>17</sup>Yesu asà à ahəṅ la dadəḡwal la afik atà nna, ṅgaha asà à vadavaday à afik, kà uwana azlaməna asik aṅha aṅuvaw la abatà. Azlaməna kutso Yahudiya, la azlaməna gudəṅ Urusalima ṅgaha azlauwana la makəla aṅa gudəṅ Tir, la Sədon uwana la gay mukwà, atà gesina la abatà.
- <sup>18</sup>Tasàhà à waṅ kà matsəbal sləm, ṅgaha kà atà aṅa mawarla la azladuvats aṅatà la abà. Azlauwana tasà ṅgərpə la ahàl aṅa azlamasasədok mawisiga babay kà, tawarà ala.
- <sup>19</sup>Dèwdèw dza tayàh kà madəbani Yesu, kà uwana ndzəfà asahàh à uda la masla la abà, awàràhà atà ala gesina.
- <sup>20</sup>Yesu anə̀rəz azlaməna matapla la slaka aṅha agòd: "Marabay agay la akul uwana azlaməna kudà lagwa, kà uwana makoray Zəzagəla kà adəḡay kà aṅkul.
- <sup>21</sup>Marabay agay la akul uwana may az akul lagwa, kà uwana kadàbəzawwal tatak may sakay sasakay. Marabay agay la akul uwana katuwaw lagwa, kà uwana kadəkəfəslaw.
- <sup>22</sup>Marabay agay la akul à baṅa azladza tapəsew akul, takweska akul, tatsək à akul magodəhay à gəl, ṅgaha tatə̀rəb akul la mawisiga, kà Kona aṅa dza.

**23**Ràbàw la vuf uwaga, ñgaha vâlàhàw à zagəla kà uwana masik mənğa akud akul la zagəla, kiya uwaga à uwana azlababa aᅅkul madzidziga tatə̀rə̀bàhà azlaməna mapəh à atà gay à ahəl uwarà.

**24**Ama ñgərpa agay la akul, akul azlagorobu, kà uwana kadazuwwaw.

**25**Ñgərpa agay la akul, akul uwana kakoraw tatak sakay sasakay lakana, kà uwana may la uwana adàkad' akul. Ñgərpa agay la akul uwana kadakə̀dàslaw lakana, kà uwana bawbaw kà, kadàgaw la mazaw la gəl la abà, ñgaha kadàgahaw la iyaw tugwi la adi.

**26**Ñgərpa agay la akul à baᅅa azladza gesina tasləkaw akul, kà uwana kiya uwaga la uwana, azlababa aᅅkul madzidziga tadàhàhàᅅ la azlaməna mapəh à atà gay à ahəl fidaga."

**27**"Ama gəpəh à akul, akul uwana katsə̀baw gi sləm: Wòyàw azlaməna məzam aᅅkul, dàhàw delga à azladza uwana tapəsew akul.

**28**Pisàw gay à azlauwana à vok, tatsafla akul, dè̀vàw kuđà kà aᅅa azlauwana tatə̀rə̀b akul.

**29**Baᅅa dza adedka à paᅅaw à abà, gòlla anik uwanay à awtày aya, baᅅa dza ahəl dawara aᅅak kà, sàkal ahəl bəzi aᅅha aya babay.

**30**Kəla dza uwana anav à ka tatak kà, vəl, baᅅa dza azə̀b à ka tatak ala la gasa kà, kapùwla gudzi à gəl aw.

**31**Tatak delga uwana asa à akul azladza tadàhàkulaᅅ kà, dàhàwàᅅ à azladza anik bokuba uwaga suwaᅅ kəla."

**32**"Baᅅa kawoyawwaᅅ kà azladza uwana tawoya akul pəra ma, kà mana kakudaw masik anik aya ma? Kà uwana bə azlaməna tsakana babay kà, tawoya azlauwana tawoya atà babay suwaᅅ pəra.

**33**Ñgaha baᅅa kadàhawwaᅅ delga kà azlauwana tadàhàkulaᅅ delga pəra ma, kà mana kakudaw masik anik aya ma? Amiyaka azlaməna tsakana kà, kiya uwaga à uwana tadəhəᅅ babay.

**34**Baᅅa kakəllaw goder à dza uwana kasəlaw, kà adəpəlay ma, kà mana kakudaw masik anik aya ma? Azlaməna tsakana babay kà, takal vok goder, ñgaha atà aᅅa mavàh vok aᅅatà suwaᅅ, kità ma: Uwa adàvə akul masik aya zlà ma uwa?

**35**Ama kəla kà: Wòyàw azlaməna məzam aᅅkul, ñgaha kə̀làw atà goder la kokuđà madzugway kà mawul akul ala. Kiya uwaga kà, kadàbəzaw à masik mənğa la slaka Baba uwana kə̀kə̀r la afik, ñgaha kadàgaw azlabəza aᅅha. Kà uwana masla kà dziriga la huma aᅅa azlaməna tsakana la azlaməna makəsafər gesina.

**36**Hənàwla, la delga ñgaha la vok mahamay, bokuba Baba aᅅkul uwana adahənlà la dzə̀ba aᅅha səla aw."

37"Kadáhaw seriya à azladza anik à gəl aw, ɲgaha Zəzagəla adàdáhakulla seriya à gəl suwaɲ aw; kadəkaw seriya à azladza à gəl aw, ɲgaha Zəzagəla adàdəkakulla seriya à gəl suwaɲ aw, matsawaɲ azladza anik ala, ɲgaha Zəzagəla adàmatsakullaɲ ala suwaɲ.

38Vàw à azladza anik, ɲgaha Zəzagəla adàvà à akul: Zəzagəla adàtsak akul à zliba aɲkul à agu tsəɲ tsətsəɲ, tadàhatsəkəwəɲ la madəkəwəɲ serafaffa. La daram uwana kagurawla à azladza anik kà, uwaga la la uwana tadàgur à akul ala suwaɲ."

39Yesu apəh à atà gay la gay la abà anik, agòd à atà: "Guləf aslala vok aɲa makəs guləf anik à ahəl takay? Awaɲ, atà səla nna tadəsakway à afək à abà.

40Masla matapla aduw masla matapalla aw, ama baɲa adàdəv matapla madzeɲay aɲha à gay kà, aslala vok aɲa magay bokuba masla."

41"Kay, kà mana kanəɲa kəsaf la yewdi aɲa deda aɲak la awtày, ama aɲak uwana magol tsəkudf tsəkudf la awtày kà, kanəɲa aw ma, kà mana ma?

42Dgaha kagodəy à deda aɲak: 'Deda, sək à gi, gəzəb à ka kəsaf la adi ala'. Kak, la gəl aɲak kà, kanəɲà magol tsəkudf tsəkudf uwaga la aɲak la awtày aw ma? Kak, masla magolla dza, zəb aɲak la adi ala dadàɲ, ɲgaha la lig la ahəɲ kà, kadànəɲla lela kà mazəb kəsaf à deda aɲak la adi ala, la dziriga."

43"Ahàf delga kà avà mayyay mawisiga aw, ahàf mawisiga babay kà, aslala vok aɲa mav mayyay delga aw.

44Iyay, kəla ahàf kà agay masəlayga la mayyay aɲha la vok. Dza aslala vok aɲa madəzl gudəv la matatak la vok aw, ɲgaha bay, dza adəzl matavəruk la mazləb la vok aw.

45Dza delga kà, adəhəɲ kà delga, kà uwana, uwana la ləv aɲha la tsəh kà delga. Dza mawisiga kà, adəhəɲ kà mawisiga, kà uwana uwana la ləv aɲha la tsəh kà mawisiga. Kà uwana paɲaw aɲa dza kà, apəhay kà uwana la ləv aɲha la tsəh."

46"Kà mana kazalaw gi ala: Sufəl, Sufəl, ɲgaha tsa kadáhaw tatak uwana gəpəh à akul aw ma?

47Kəla uwabeyuwi uwana atsa à waɲ à slaka gulo ɲgaha atsəb sləm à kuda gulo kà, gəpəhakulla dza uwana gəgagazləla la masla.

48Masla kà kalkal la dza uwana atatukw matatukway aɲa gày aɲha kà à təhus à afik. Mok uwana iyaw adàdzəka mas à afik, akəl la lig gày, afad adəd la ndzəda, ama gày kà akalàh à ahəɲ aw, kà uwana tatətùkw kà à təhus à afik.

49Ama dza uwana atsəb sləm à gay gulo, ɲgaha akəs uwaga aw kà, masla kà gəgagazləla kà la dza, uwana aɲal gày à wuyyaɲ à afik. Mok uwana iyaw mukwà adàda à mukwà à afik, azəb gày uwaga gesina, adalla."

## Luka 7

1Mok uwana Yesu adadəv gay aɲha à gay la huma aɲa maham à ahəɲ dza, atsizlla ala la abatà, ahàd à Kapernahum.

<sup>2</sup>Məŋga aŋa azlaslodzi aŋa azla Rom la ahəŋ la abatà. Magamza aŋha uwana awoyàŋ kaykay, aga la dıvats, agà kà la ləv la ləv.

<sup>3</sup>Mok uwana məŋga aŋa azlaslodzi atsənà gay uwana tapahay lakəl aŋa Yesu kà, masla asləl azlamasiga anik la tataka azla Yahudiya la abà, kà madəv kudà à Yesu kà mas à waŋ aŋa mawur magamza aŋha ala.

<sup>4</sup>Kiya uwaga, mok uwana tabèz à slaka Yesu, tadəval kudà la kamkam la iyaw tugwi, ŋgaha la magodəy: "Dza uwanay kà, azlayla kà vok kà kazlakay,

<sup>5</sup>kà uwana masla kà awoyà tsəhay gami, ŋgaha aya, masla la uwana aŋəl anu gəy madəv kudà gami aya."

<sup>6</sup>Kiya uwaga Yesu anəfà atà, ŋgaha mok uwana tadazlabèz kà mtəga, məŋga aŋa azlaslodzi uwaga asləl azlamanalay aŋha kà magodəl: "Madzahaga katərəb gəl aŋak aw, kà uwana gəsla kà kak aŋa makəl gəl à ahəŋ kà mas à gəy gulo à agu aw.

<sup>7</sup>Kà uwaga, gi babay la gəl gulo kà, gənərèz kà, gəslà kà mad à awtəy à slaka aŋak la gəl gulo aw. Ama pəh gay tekula la tsəh ala pəra kà kona gulo aŋa mawurla.

<sup>8</sup>Gi babay kà azlaməŋga la ahəŋ lakəl gulo, gi babay, gi lakəl aŋa azlaslodzi anik suwaŋ. Dgaha gəslala vok magodəy à tekula aŋatà: Həd, kà aday. Gəgodəy à anik aya: Sà à waŋ kà, atsa à waŋ, ŋgaha bay gəgodəy à masla sləray gulo: Dahəŋ uwanay kà, adəhəŋ bay."

<sup>9</sup>Mok uwana Yesu atsənà gay uwaga, awoyà masla kaykay, agòla vok, ŋgaha agòd à maham à ahəŋ dza uwana tanəfà la tsəh: "La dziriga gəpəh à akul: Gədanəŋəŋ didididi à tsəhay madiŋal gəl à vok uwanay, amiyaka bà la Isərayel aw."

<sup>10</sup>Azlaməna sləray aŋa məŋga aŋa azlaslodzi tawul à mtəga, ŋgaha tabèz à magamza uwaga à gəl, kà adawur ala.

<sup>11</sup>Dgaha Yesu ahəd à gudəŋ anik uwana à abà, sləm aŋha Nayyin, la azlaməna matapla la slaka aŋha, ŋgaha maham à ahəŋ dza aŋuvaw tanəfà masla.

<sup>12</sup>Kiya uwaga mok uwana tazlèbèz à gay gamagəy aŋha huđ gudəŋ, tagagəm la azladza uwana tazəb mazimnekiđ à uda. Uwaga bəzi tekula gə aŋa mis kudà, uwana anik aŋha la ahəŋ aw. Maham à ahəŋ dza aŋa gudəŋ uwaga gesina tagà la slaka mis uwaga.

<sup>13</sup>Mok uwana Sufəl Yesu anəŋà mis uwaga vok ahaməl: "Katùw aw", agòdəl.

<sup>14</sup>Dgaha Yesu azà vok à slaka mazimnekiđ, adəbanì azlav aŋha. Azlaməna mazəbay tatsizlla à ahəŋ, Yesu agòd: "Kohana, sà à afik, gəgod à ka!"

<sup>15</sup>Kiya uwaga mazimnekiđ atsizlla ala, ŋgaha adzəkà mavats gay. La lig la ahəŋ Yesu awùlla à iyà aŋha.

<sup>16</sup>La abatà ləv avəl à azladza à gay gesina, tazlèbà Zəzagəla la magodəy: "Magol masla mapəhal gay à ahəl aŋa mapəh azladza adapəhla vok ala la tataka gami la abà lakana. Zəzagəla la gəl aŋha adasa à ahəŋ kà mazlak tsəhay aŋha lakana."

- 17**Ɖgaha gay aṅa Yesu uwaga atsèn la kutso Yahudiya la abà gesina la kutso uwana la makèla aṅha gesina.
- 18**Kiya uwaga azlamèna matapla la slaka aṅa Yuhana tapèh uwaga gesina aṅatà à mɔṅga aṅatà. Yuhana azàl azladza sèla la tataka aṅatà la abà,
- 19**ṅgaha aslèlla atà à slaka Yesu kà manaval à gay ala: "Kak, ma kak dza uwana məkud kà aṅa mas à waṅ takay? Awma məkud dza anik kèla ay?"
- 20**Mok uwana tabèz à slaka Yesu, tagòdàl: "Yuhana, masla madàh batem, aslèl anu à waṅ kà manav à ka: 'Kak, ma kak dza uwana məkuday kà aṅa mas à waṅ takay, awma məkud dza anik ay?' "
- 21**La kaslà uwatà, Yesu awarà azladza ala aṅuvaw, la azladuvats aṅatà la abà, ṅgaha la azlamazay vok aṅatà la abà, apàlla atà ala la ndzèdà aṅa azlamasasèdòk mawisiga la abà, ṅgaha avàh yewdi à azlagulèf aṅuvaw.
- 22**Kiya uwaga awùlla gay à azlamèna maslèl atà à waṅ gè aṅa Yuhana: "Dàw, kadàpèhaw à Yuhana uwana kanèṅàwwàṅ la uwana katsèṅàwwàṅ: 'Azlagulèf tanèṅla, azladeri taday, azlamèna akàl zagèla tawarla, azlamadagazlam tatsèn slèm, azlamazimnekid' tawul à uda la mamètsay. Ɖgaha gay matsidàyga babay adatsèn à azlamèna kudà.'
- 23**Marabay agay la dza, uwana asak gi à tsèh ala la madiṅal gel à vok la abà aw!"
- 24**Mok uwana azlamèna matapla la slaka Yuhana tadiy aṅatà, Yesu adzèkà mapèhay à maham à ahèṅ, dza lakèl aṅha la magòdày: "Mana à uwana kadàw kà mayahay la fèta la abà ma? Mazuwa uwana afad' abèlakèṅ ay? Awaṅ, uwaga aw.
- 25**Kètà zlà ma: Mana à uwana kadàw aṅa manèṅṅ zlà ma? Dza uwana atsàkwàh à lukut mahèdàyga à abà kèla ay? Azlauwana tatsàkwàh à lukut mahèdàyga à abà kà, atà kà azlasufèl. Ɖgaha tadzà à ahèṅ la hud' gày sufèl.
- 26**Kètà zlà ma: Mana kadàw kà aṅa manèṅṅ ma, masla mapèhal gay ahàl aṅa Zèzagèla kèla ay? Iyay, gègod' à akul: amiyaka adagay masla mapèhal gay à ahàl babay kà,
- 27**hadày, Yuhana kà masla kà dza uwana matsèteray apèh lakèl aṅha: "Aganay gèslèl maslèlay gulo à awtày à huma aṅak,' Zèzagèla agod': 'Kà masla aṅa mapèslak tetèvi.'"
- 28**"La dziriga gèpèh à akul: La tataka azladza asik la abà, agè la ahèṅ dza uwana agè bokuba Yuhana masla madàh batem uwanay aw; tekedika, dza uwana mabèziga bèziga la makoray Zèzagèla kà, aduwa Yuhana uwanay lagwa."
- 29**Maham à ahèṅ dza gesina la azlamèna mazèb hadama tatsèb slèm à masla, atà gesina tagèdàṅ à afik kà Zèzagèla kà dziriga. Atà tabèzàl batem la slaka Yuhana.
- 30**Ama azla Farisèya la azlamèna mapàhla mapèhay ala, takweskà tatak uwana asà à Zèzagèla kà madàh à atà à ahèṅ kà aṅatà, kà uwana takweskà batem aṅa Yuhana.

- 31 Yesu agòd aya: "Lagwa ma, la mana gəgəzələ azladza aṅa zamana aṅa lakana uwanay ma? La mana atà tadəbani vok lagwa ma?"
- 32 Haday, atà gəgəzələ atà la azlabəza uwana tadzàh madzay la vadavaday kasukwa la afik. Tazələh vok, kà atà kà atà la magoday: Anu mətəsa à akul talakwoy, ama akul kahàbàwal à tsəh aw. Məhàb à akul dəs kufa, ama katàwàw la mats hulolo aw.
- 33 Dgaha aya Yuhana masla madàh batem azlaṅal, azùw kaf aw, ṅgaha asàh iyaw matavəruk aw, ṅgaha kagòdàw aya kà: 'Masla la masasədok mawisiga.'
- 34 Kità aya, Kona aṅa dza azlaṅal, azuway, asay, ṅgaha kagodaw kà: 'Nə̀rə̀zàw dza uwanay tsi: Masla hud', kagodaw. 'Afa sləm kà à mazuway la masay aṅha pəra. Kafaw masla kà à tataka aṅa azlaməna mazəb hadama abà, la azlaməna tsakana, ṅgaha la azladza uwana madz à ahəṅ aṅatà kà lela aw.'
- 35 Ama matsihila aṅa Zəzagəla apəhla masla ala la slaka azladza gesina kà makəs masla."
- 36 Zil Farisəya anik azàla à Yesu kà mazuw tatak may la mtəga aṅha. Yesu ahàd à mtəga aṅa zil uwatà, adzà à tatak may à adi.
- 37 Mis masla tsakana agà la gudəṅ uwatà la abà. Mok uwana atsənà, kà Yesu la tatak may la adi la mtəga aṅa zil Farisəya uwaga kà, asəlla aməl matərsin à waṅ wuf la dərəw gà.
- 38 Mis atsìzl à makəla asik aṅa Yesu la matuway, aləbà asik aṅa Yesu la iyaw tugwi, ṅgaha aslaslədāṅ ala la aṅidz gəl aṅha, ṅgaha ahəl asik aṅa Yesu à təkul à abà kà madzadzabal aməl matərsin à gəl.
- 39 Mok uwana zil Farisəya uwana azàla Yesu, anəṅà uwaga kà, agòd la gəl aṅha kà: 'Ndzer kà, agayṅa zil uwanay, agay masla mapəhal gay à ahəl kà mapàh à azladza kà, naka asəl mis uwanay kà masla tsakana gà.'
- 40 Yesu agòd à zil Farisəya: "Səmon, gi la gay anik kà mapəh à ka!" Səmon agòdàl: "Məṅga, pəh!"
- 41 Dgaha Yesu agòd: "Tsənàṅ lela: Dza anik la ahəṅ uwana avà goder sili à azladza səla, anəfà dza anik la gursu dadərmokw zlo, ṅgaha la slaka dza anik aya, gursu dzik zlo.
- 42 Uwana tabəz à tatak kà mapəlla aya aw, asàk à atà ala goder aṅha la vok. Dgaha ma, dza uwala à uwana awoyàṅ kaykay la?"
- 43 Səmon agòdàl: "Gi kà, gədzugw kà, dza uwana gursu dadərmokw zlo la vok, kà masla la uwana 'Kikay', agoday kaykay." Yesu agòdàl: "Iyay, azlayla kà."
- 44 Yesu agòla à huma à slaka mis la magod à Səmon: "Səmon, kanəṅa mis uwanay ay? Gi la kay aṅak, bə iyaw bay, kà katədəgəṅ kà mapal asik gulo aw, ama masla kà aləb à gi asik gulo la iyaw tugwi aṅha, ṅgaha aya la aṅidz gəl aṅha la uwana aslaslədāṅ ala.

<sup>45</sup>Kak, kakès gi la ahàl sèla aw, ama masla kà akès gi la ahàl sèla. Dagay uwana gəsà à gày kà akəsà à asik gulo, kà uwana awoyà gi.

<sup>46</sup>Kak, kadàh à gi à amàl à gəl aw, ama masla kà adzadzàb à gi matərsin à asik.

<sup>47</sup>Kà uwaga à uwana gəgod' à ka: Kà magol masal mənğa uwaga apəhla ala kà, maham à ahəŋ tsakana aŋha kà adamatsila, suwaŋ. Ama aŋa dza uwana tamàtsàlànğ ala ŋuv kà, masal aŋha suwaŋ kà ŋuvga babay."

<sup>48</sup>Kiya uwaga Yesu agòd' à mis: "Tsakana aŋak adamats ala."

<sup>49</sup>Azladza uwana la tatak may la adi atà nna, tadzəkà maŋoŋuzay: "Uwa asla dza uwaga, aslala vok aŋa mamats tsakana à dza ala uwa?"

<sup>50</sup>Ama Yesu agòd' à mis: "Madiŋal gəl à vok aŋak adabəl ka, hād la wurwur!"

## Luka 8

<sup>1</sup>La lig aŋa uwaga la ahəŋ, Yesu adàh à azlagudəŋ à abà la azlahud' gudəŋ, azahà gay matsidayga aŋa makoray Zəzagəla.

<sup>2</sup>Azlaməna matapla la slaka aŋha kulo gəl aŋha sèla uwatà, la azlamis anik anik, uwana adapalàh atà ala la azlamasasədok mawisiga la abà, ŋgaha la azladuvats anik anik la abà, atà gesina tanəfà, Mariyama, dəg zla Magdala, uwana akudəkal azlamasasədok mawisiga mədəf lakəl ala,

<sup>3</sup>ŋgaha Yohana mis aŋa Kuza, vazaray aŋa sufəl Herod, Suzan la azlamis anik aŋuvaw uwana tazlək Yesu la azlaməna matapla la slaka aŋha, la ləmana aŋatà.

<sup>4</sup>Azladza gudəŋ anik, anik gesina tasàhà à waŋ, tahamà gay à vok la slaka aŋha, ŋgaha apəh à atà gay la gay la abà uwanay:

<sup>5</sup>"Masla maslək tatak asà à uda, kà mad maslək hi. La mok uwana aslək hi uwaga la guf aŋha la abà, azlafofulo anik anis à tetəvi à ama. Tafàhal asik à gəl ŋgaha azladiyanğ tasà à waŋ, tazùw à gay.

<sup>6</sup>Azlaanik aya anis à pala akur à afik, bokuba uwana kutso la pala akur lakəl mənğa aw, hi asà à uda katskats, ŋgaha uwaga agùl ala katskats, kà uwana kutso la pala akur lakəl mənğa aw.

<sup>7</sup>Gotənaŋ fofulo anik anis à atək à abà, asà à uda, ama bokuba uwana tazigənaŋ la slaka gà, atək akəd' à tsəh.

<sup>8</sup>Bà gotənaŋ fofulo anik aya anis à kutso delga à abà, uwaga asà à uda, azigən, atsà gəl lela, ŋgaha tavà mayyay lela, anik ayyà à adi huməts, anik aya ayyà à adi zuŋ, ŋgaha anik ayyà à adi zazuŋ sèla." Mok uwana Yesu adakəd' gəl à mapəh gay aŋha, agòd' à atà la mazatàlaŋ à gəl: "Tsəbàwwal sləm lela, à baŋa sləm aga à akul lakəl!"

<sup>9</sup>Azlaməna matapla la slaka aŋha tanəv godega aŋa gay la gay la abà uwatà.



- 10** Yesu agòd à atà: "Akul kà, kabèzàw nasiri aṅa masèl godega aṅa wakità Zəzagəla. Ama kà aṅa azladza anik kà, apəhatàla kà la gay la gay la abà pəra: 'Kà atà aṅa manəṅəṅ, ama bokuba tanəṅəṅ aw, kà atà aṅa matsənəṅ ama bokuba tatsənəṅ aw.'"
- 11** "Aṅanay godega aṅa gay la gay la abà uwanay: Fofulo kà gay Zəzagəla.
- 12** Azladza anik məpakatàla bokuba tetəvi uwana hi anisal à ama: Atà tatsəb sləm à gay, ama katskats seteni asa à waṅ, abəf à gay uwaga la ləv aṅatà la tsəh, kà atà aṅa madiṅal gəl à vok kà mabəlay aw.
- 13** Azlaanik aya kalkal la pala akur uwana fofulo anis à afik. Tatsəb sləm à gay, takəs la marabay katskats, ama tasakal adala slilih la atà la abà la lela aw. Tadiṅal gəl à vok kà aṅa kaslà ṅuv pəra, la mok uwana azlaṅgərpa tadzahka vok kà, takweska madiṅal gəl à vok la katskats.
- 14** Fofulo uwana anis à atək à abà aya kà, apəhla azlauwana ala tatsəna gay Zəzagəla, takəs, ama madzugway la adi aṅa gudəṅ à vok uwanay, la matsidəy aṅha, la mapapatay aṅha lakəl aṅa ləmana, asufa gay uwanay ala la ləv aṅatà la tsəh, ṅaha ahən aw.
- 15** Fofulo uwana anis à kutso delga à abà kà, apəhla azlauwana ala tatsəb sləm à gay, ṅaha takəs uwaga la ahəl səla ṅaha la ləv tekula, ṅaha tatsizlla gay uwaga à afik, kiya uwaga tahən lela."
- 16** Yesu agòd: "Dza avats fənəs kà maf à tsəh tasà takay, awma kà maf à tsəh gogozläh takay? Awaṅ, tafay kà à slaka dzəgamma gə, kà azladza uwana tada à gəy aṅa manəṅ uɖaka aṅha.
- 17** Dèwdèw tatak mahadəṅ à ahəṅ gə kà, adəpəhla vok ala, ṅaha dèwdèw tatak nasiri gə, adəgay masəlay gə, adəpəhla vok ala la dazuwaya la afats kà manəṅəṅ aṅa azladza.
- 18** Dahàw haṅkəli la kaykay à uwana katsənawwaṅ! Kà uwana tavəy məṅga à dza à uwana la tatak, ama kà tazəballaṅ ala à abà bəziga gə à uwana adzugw mabəzal babay."
- 19** Iyà la azladedə aṅa Yesu tahəd à slaka aṅha, ama taɖəzal à vok aw, kà uwana maham à ahəṅ dza aṅuvaw.
- 20** Ḑgaha tapəh à Yesu: "Iyà la azladedə aṅak la uda, tayəh ka, asa à atà manəṅ ka", tagòdal.
- 21** "Iyà la azladedə gulo kà azlauwana tatsəna gay Zəzagəla, ṅaha la madəhəṅ, la uwana azladedə gulo la iyà gulo pəra", Yesu agòd à atà.
- 22** Vərdi anik kà, Yesu ahəd à kəslah iyaw à afik la azlaməna matapla la slaka aṅha, agòd à atà: "Məguwà la gay dərəv à uda anik", ṅaha tahəd.
- 23** Uwana tagə la kəslah iyaw la afik kà, Yesu adzəhəl. Katskats magol kular adzəkà vok la ndzəɖa lakəl iyaw, kəslah iyaw ahən ala la magantsay aṅa iyaw uwana adàhà à abà, ṅaha atà kà, tagə la zlamtsa la abà.

- 24**Kiya uwaga azlaməna matapla tazà vok à slaka aṅa Yesu tatsənaṅ ala la magodfal: "Məṅga, məṅga, məzləmamətsay, zlak anu!" Hadzak, Yesu asà à afik ṅgaha aslèh məlo à kular à gəl la magantsay ana iyaw, ṅgaha tadzà à ahəṅ titi.
- 25**Ḷgaha Yesu agòd à azlaməna matapla la slaka aṅha: "Aṅala madinaḷ gəl à vok aṅkul la?" Ama guba akəs atà, ləv avəl atà à gay, ṅgaha tagòd à vok kà atà kà atà: "Tsəhay dza uwala à uwanay la? Amiyaka kular, la magantsay aṅa iyaw babay kà tasəl masla, ṅgaha takəsəl gay la ahəl ala!"
- 26**La lig la ahəṅ gesina aṅatà tabəz à gay dərəv à uda aṅa gay dərəv aṅa Galili, uwana la kutso aṅa Gerasəniya la abà.
- 27**Batsàrà uwana Yesu atsà à vədah la kəslah iyaw la afik, dza anik asà à waṅ la huđ gudəṅ la abà kà magagamay la masla. Dza uwatà kà zagəla zagəla lakəl, adasafay kà atsakwah à lukut abà aw, ahanay la gəy la aku babay aw, la azlamabuwaṅ zəvay la aku pəra.
- 28**Mok uwana anəṅà Yesu, awiyà la ndzəda ṅgaha atəd à makəla asik aṅha la magodfay: "Mana kayahay la slaka gulo ma? Yesu Kona aṅa Zəzagəla uwana kərkər la afik. Kamkam gədəv à ka kudà, kasa à gi ṅgərpa aw gəgod à ka!"
- 29**Uwana apəh uwaga kà, kà uwana Yesu afà gay à masasədok mawisiga uwaga à gəl, kà masal à kəl ala. Zagəla zagəla uwaga adahal à gəl zwek zwek. Aṅuvaw tawadəhəṅ à ahəṅ la azlamazakazak ada, aslähàh ala la manalàh ada ala, kà matəf à fəta.
- 30**Kiya uwaga Yesu anəval gay ala la magodfal: "Uwa à sləm aṅak uwa?" Masla awùlla à uda agòd: "Sləm gulo kà: Maham à ahəṅ." Kà uwana azlazagəla zagəla kà atà aṅuvaw tahaməl à gəl.
- 31**Azlazagəla zagəla uwaga tadəv kudà à Yesu kà mawits atà à afək zəṅzəṅga à abà aw.
- 32**Maṅəlaṅəl namzi la ahəṅ la abatà tapəd awul la madəguruh la afik. Azlazagəla zagəla uwaga tadəv kudà à Yesu, kà masla masləlla atà à azlanamzi uwatà à abà. Yesu avà à atà tetəvi: "Dàw à atà à gəl!", agòd à atà.
- 33**Kiya uwaga azlazagəla zagəla uwaga, tasà à dza uwaga lakəl ala, tahəd à azlanamzi à gəl. Kiya uwaga maṅəlaṅəl namzi uwaga tahòy à ahəṅ la madəguruh la afik, ṅgaha tatsàh gəl à iyaw à abà, tasufàh à abà.
- 34**Uwana azlaməna manəṅla azlanamzi tanəṅà uwaga apakà vok, tahòy anatà, tahəd kà mapàh azlagay uwaga à azladza huđ gudəṅ gesina, la azladza uwana la azlabəza gudəṅ la abà babay.
- 35**Azladza tasà à uda la gudəṅ la abà gesina kà maday manəṅ tatak uwana apakà vok, ṅgaha tasà à waṅ à slaka Yesu, tabəzà dza uwaga à gəl azlazagəla zagəla tasəl à kəl ala. Adadza madzay la makəla aṅa Yesu, masla adatsokw lukut à vok, haṅkəli aṅha babay kà delga. Azladza uwana tanəṅəṅ gesina kà, ləv avəl atà à gay kà masla.

- <sup>36</sup>Azladza uwana tanəḡəḡ mawurla aḡha, tapəḡh godega aḡha mawurla aḡha à azladza uwatà.
- <sup>37</sup>ḡgaha maham à ahəḡ dza gesina, uwana la makoray aḡha Gerasəniya tadəv kudà à Yesu kà mas à uda la makoray aḡatà la abà, kà uwana guba akəs atà à gay kaykay. Kiya uwaga masla ahàd à kəslah iyaw à afik, adà aḡha la abatà.
- <sup>38</sup>Dza uwana azlazagəla zagəla tasàl à kəl ala, adəv kudà à Yesu kà madz à ahəḡ atà səla. Ama "Dà aḡak!", Yesu agòdàl la magoday:
- <sup>39</sup>"Wùl à hud' gəy aḡak, ḡgaha pəḡh tatak uwana Zəzagəla adəhəḡ kà aḡak gesina!" Masla atsizilla ala, ahàd, apəḡh tatak gesina uwana Yesu adəhəḡ kà aḡha la makoray uwatà la abà gesina.
- <sup>40</sup>La mok uwana Yesu adawul à waḡ maham à ahəḡ dza takəs masla la ahəl səla, kà uwana takudà masla.
- <sup>41</sup>Dza anik uwana sləm aḡha Yayrus asà à waḡ, masla agà məḡga aḡha gəy madəv kudà, atəd' à makəla asik aḡha Yesu, la madəval kudà kà masla aḡha manəf à mtəga aḡha.
- <sup>42</sup>Dugu aḡha kà tekula à ahəl gə, la uwatà mavay aḡha kulo gəl aḡha səla. Masla la dūvats, aləḡ kà la ləv la ləv pəra. La mok uwana Yesu aday la tetəvi la ama, maham à ahəḡ dza taḡisl masla la makəla gesina.
- <sup>43</sup>Mis anik la ahəḡ aḡiz akəllal à tsəh ala dagay mavay kulo gəl aḡha səla. Ləmana aḡha gesina kà adadəvəḡ à dokwtar à tsəh gesina, ama ḡuləm aw.
- <sup>44</sup>Kiya uwaga mis uwaga aguwà la lig aḡha Yesu, ḡgaha adəbanì makəlbà aḡha gay dzika aḡha lukut aḡha. Katskats makəlay aḡha aḡiz aḡha atsizilla à ahəḡ.
- <sup>45</sup>Dzàw, Yesu atsizilla à ahəḡ, agòla vok: "Uwa à uwana adəbanì gi uwa?" Kəla uwabeyuwi agòdàl: "Gi kà, gi aw!" Piyer agòdàl: "Məḡga, kasəl kà maham à ahəḡ dza tahamà ka à adi, kakay kagoday kà: Uwa adəbanì gi uwi ma?"
- <sup>46</sup>Yesu agòd': "Dza la ahəḡ adəbanì gi, kà uwana gətəp à ndzəda asà à uda la vok gulo la abà."
- <sup>47</sup>Kiya uwaga mis anəḡəḡ kà, aslala vok kà mahad' vok à ahəḡ aw, asà à waḡ la masukulay kosl kakosl à huma aḡha Yesu, ḡgaha atsehùr à makəla asik aḡha, apəḡhal godega aḡha uwana adəbanì gay lukut aḡha. La huma aḡha azladza la kirim yewdi awùr ala.
- <sup>48</sup>Yesu agòdàl: "Dugu gulo, madiḡal gəl à vok aḡak awùr ka ala, dà aḡak la lapiya!"
- <sup>49</sup>La mok uwana Yesu à lig la mabadma la abà dadəḡ, dza anik asà à waḡ la mtəga aḡha məḡga aḡha gəy madəv kudà à Zəzagəla, la magoday: "Kà mana katərəb məḡga aya ma? Dugu aḡak adamətsay, tsewwa."
- <sup>50</sup>Mok uwana Yesu atsənà gay uwaga kà, agòd' à Yayrus: "Ləv aval à ka à gay aw. Diḡal gəl à vok pəra, ḡgaha adəbelay!"

<sup>51</sup>Mok uwana tabèz à mtəga, Yesu avà tetəvi à dza amiyaka tekula kà mad à gày aw, say Piyer, Yuhana, Yakuba, ŋgaha baba la iyà aŋa bəzi pəra.

<sup>52</sup>Tekedika azladza gesina tatuway la matsàh hulolo, kà uwana bəzi adamətsay. Ama Yesu agòd à atà: "Katawaw aw, kà uwana bəzi la adi atəđ à madzəhal à abà pəra", agòd à atà.

<sup>53</sup>"Uwàà...", takədâslal kà uwana tasəl kà bəzi kà adamətsay.

<sup>54</sup>Ama masla à Yesu akəs bəzi la ahəl la mazalal: "Bəzi, sà à afik, tsizilla ala!"

<sup>55</sup>Kiya uwaga bəzi awùlla à ləv, ŋgaha asà à afik. Yesu agòd à atà: "Vàwwal tatak may, azuw!"

<sup>56</sup>Gəl akəd azlababa aŋha à vok, ləv avàlähà atà à gay. Ama Yesu afahà à atà akur à lig la magòd à atà: "Dza apəh tatak uwana apakà vok à azladza anik aw."

## Luka 9

<sup>1</sup>Yesu ahamà gay azlaməna matapla la slaka aŋha à vok gesina, avà à atà ndzəđà la maslay kà makudəkahay azlamasasəđok mawisiga gesina, ŋgaha kà mawar azlaməna dūvats ala.

<sup>2</sup>La lig la ahəŋ, asləl atà kà maz gay aŋa makoray Zəzagəla, ŋgaha kà mawar azlaməna dūvats ala,

<sup>3</sup>agòd à atà: "Zəbàw tatak à ahəl aŋa maday aw. Adàgay azəva, adàgay kiwa, adàgay kaf, adàgay sili, adàgay lukut bay, katsəpawwaŋ à vok aw!

<sup>4</sup>Kəla huđ gày uwana azladza takəs akul la kay la ahəl səla kà, dzàw à ahəŋ la abatà, tsərəh à uwana kadətsizlawla, kadàdaw aŋkul la abatà.

<sup>5</sup>Ŋgaha kəla slaka uwana tadəkəs akul la abà aw kà, sàw à uda la huđ gày aŋatà. Baməraka burburu aŋa kutso aŋa gudəŋ aŋatà, uwana agəđ akul à asik bay kà, kadəđaw à atà à adi, uwaga kà agay bokuba tatak mapəh à atà à vok à abà gə kà aŋatà."

<sup>6</sup>Azlaməna matapla tatsizilla ala, tahəd kà maz gay matsidəyga aŋa makoray Zəzagəla la azlahuđ gudəŋ gesina, ŋgaha tawàràhà azlaməna dūvats ala gesina.

<sup>7</sup>Kiya uwaga à uwana Herod, sufəl aŋa gudəŋ uwatà, atsənà uwana tapəhay kà, gəl akəđal à vok, kà uwana azladza anik tagòđay kà: "Yuhana masla madəh batem adawul à uda la mamətsay."

<sup>8</sup>Azlaanik tagòd kà: "Eliya, la uwana adazlaŋalay." Ŋgaha azlaanik tagòd kà: "Uwaga kà, tekula la tataka azlaməna mapəh à atà gay à ahəl la abà uwarà, adazlaŋalay."

<sup>9</sup>Ama Herod agòd: "Tsa gi la uwana 'Nàtsàw gəl aŋa Yuhana!' gəgod, ma uwaga zlà ma uwi? Uwa à dza uwaga tapəh azlatatak aŋuvaw lakəl aŋha zlà à ama uwa?" Kà uwaga à uwana ayəh manəŋ Yesu.

- 10**Uwana azlaməna matapla tawùl à waŋ tapəh à Yesu dèwdèw tatak uwana tafahàn gesina. Uwana adatsən uwaga kà, asəlla atà à uda la abatà, adàla atà à fəta à awtày kokudà gəl aŋatà la huma aŋa huđ gudəŋ, uwana sləm aŋha Betsayda.
- 11**Ama uwana maham à ahəŋ dza adatsən uwaga kà, tanəfà masla, Yesu akəs atà la lela, ŋgaha apəh à atà gay aŋa makoray Zəzagəla, la mawar azlauwana ala, asà à atà mawarla.
- 12**Mok uwana vəđ adasa à waŋ, azlaməna matapla tahàd à slaka aŋha, tagòđal: " 'Dàw aŋkul,' gòđ à maham à ahəŋ dza, kà atà aŋa mad à azlagudəŋ uwana à abà takəs anu gay à adi, kà atà aŋa maḃəz tatak may la azlaslaka mahan à ahəŋ, kà uwana la abatà kà fəta."
- 13**Ama Yesu agòđ à atà: "Akul, vàw à atà tatak may, tazuw!" Atà tagòđ à Yesu: "Kaf gay bərsəw zlo, la bəza kilfi səla pəra, aga anu la ahəl. Asa à ka məday kà masukw tatak may kà aŋa maham à ahəŋ dza uwanay gesina la gəl gami kəla ay?"
- 14**Kà uwana la abatà kà matugway aŋatà kà aslay dza dəbow zlo. Yesu agòđ à azlaməna matapla la slaka aŋha: "Dzàhàw atà madzay la dzibokw dzibokw, dzik zlo dzik zlo gesina aŋatà!"
- 15**Azlaməna matapla takəs, ŋgaha tadzàhà atà madzay gesina aŋatà.
- 16**Ŋgaha Yesu ahəl kaf gay bərsəw zlo la kilfi səla uwatà, anəŋà à zagəla, "Kikay", agòđ à Zəzagəla. Atsakà kaf ala, avà à azlaməna matapla la slaka aŋha, ŋgaha azlaməna matapla uwaga tavàh à maham à ahəŋ dza uwatà bay.
- 17**Kiya uwaga kəla uwabeyuwi azùw kəla aŋa may aŋha. Azlaməna matapla tahamà gay à matam à atà à ahəl gə à vok, takosà kulo gəl aŋha səla à uwana atəm à atà à ahəl la kaf gay bərsəw zlo la kilfi səla uwaga la abà.
- 18**Vuđ tekula Yesu adəv kudà kokudà gəl aŋha. Azlaməna matapla tasà à waŋ à slaka aŋha. Yesu anəv atà manavay la magòđ à atà: "Uwa azladza tagòđ kà gi uwa?"
- 19**Tawulàlla tagòđal: "Azladza anik tagòđay kà: Kak Yuhana, masla madàh batem, azladza anik bay tagòđ: Kak Eliya, azlaanik aya tagòđ: Kak tekula la tataka aŋa azlaməna mapəh à atà gay à ahəl, à uwana tapàhàh gay à azladza uwarà."
- 20**Yesu agòđ à atà: "Iyay zlà, akul ma: Gi uwa kagòđaw uwa?" Piyer agòđal: "Kak la uwana Kristu aŋa Zəzagəla."
- 21**Yesu afahà à atà akur à lig kaykay, kà atà aŋa mapəh tatak uwaga à dza aw.
- 22**Ŋgaha azàlàn à gəl, agòđ aya: "Say Kona aŋa dza as ŋgərpa məŋga. Azlamasiga, la azlamadzahaga aŋa azlaməna mav tatak à Zəzagəla, ŋgaha la azlaməna matapla mapəhay à azladza tadàkweska masla, tadàkəđ masla bay, ama la mahənay mamakər adàwul à uda la mamətsay."
- 23**Ŋgaha agòđ à azladza gesina: "Baŋa dza asal manəf gi kà, asak maf sləm à gəl aŋha, ŋgaha azəḃ ahəf mamətsay aŋha koksikoksi, ŋgaha anəfa gi.

- <sup>24</sup>Dza uwana asal matəf gəl aŋha, adàziŋ ala, ama dza uwana az gəl aŋha ala kà gi, adàbəl gəl aŋha.
- <sup>25</sup>Mana akəs vok à dza, uwana akor gudəŋ à vok gesina, ŋgaha masla adàz gəl aŋha ala la makəf gəl à vok aŋha ma?
- <sup>26</sup>Baŋa ziruwi az dza kà gi, ŋgaha kà gay gulo, kità kà, Kona aŋa dza kà, ziruwi adəkəsay kà masla suwaŋ, la mok uwana adàsa à ahəŋ la mazləbəy aŋha, ŋgaha la mazləbəy aŋa Baba Zəzagəla, ŋgaha la aŋa azlamalika aŋha tsikaslaga la abà.
- <sup>27</sup>Hadəy, gəpəh à akul la dziriga: Azladza anik la tataka aŋkul la abà la abanay kà, tadəmətsay dən aw, say baŋa tanəŋ makoray aŋa Zəzagəla dən.”
- <sup>28</sup>La lig mavakay mtəgis la ahəŋ, à uwana apəh gay uwaga, Yesu ahəl Piyer, Yuhana, ŋgaha Yakuba, à tsəh, adàla atà à gudəŋ à afik, kà madəv kuda la abatà kokuda gel aŋatà.
- <sup>29</sup>La mok uwana tadəv kuda, hudə adi aŋha agòlla vok, lukut aŋha awutsədəy təlla.
- <sup>30</sup>Katskats aganay azladza səla la slaka aŋha, tavəts gay, uwatà kà Musa atà la Eliya,
- <sup>31</sup>uwana tapəhla vok ala la mazləbəy aŋa zagəla la abà. Tapəhà gay lakəl aŋa sləray aŋha uwana adədəhəŋ, la mamətsay à Urusalima aŋha.
- <sup>32</sup>Piyer la azlamanalay aŋha uwaga, tatəf à madzəhal à abà. Ama kà uwana tatsənla, tanəŋà mazləbəy aŋha, ŋgaha la azladza səla uwana tatsizlla à ahəŋ la masla.
- <sup>33</sup>Mok uwana azladza səla uwaga tadiy aŋatà, tasək à Yesu à ahəŋ, Piyer agòdal: "Məŋga, delga zlà bə à uwana anu la abanay zla. Mədəh safsaf makər à abanay, tekula à aŋak, tekula aŋa Musa, ŋgaha tekula aŋa Eliya." Kà uwana masla asəl tatak uwana apəhay aw
- <sup>34</sup>La mok uwana Piyer abadmə, habaga akəl à atà mələs à adi, tabadamma. Ləv avəl à azlaməna matapla uwaga à gay, kà uwana habaga atsakà à atà à ama la makəl à atà mələs à adi.
- <sup>35</sup>Ŋgaha kuda atsənà à uda la habaga uwatà la abà: "Masla uwanay, la uwana Kona gulo uwana gi gəkəsàni. Tsəbàwwal sləm.”
- <sup>36</sup>Mok uwana kuda uwaga atsən kà, tanəŋəŋ kà Yesu kokuda gəl aŋha pəra. Azlaməna matapla la slaka aŋha tadzà à ahəŋ titi. Ŋgaha babay tapəh à dza tatak uwana tanəŋəŋ la mavakay uwatà aw.
- <sup>37</sup>La bebəŋ gà, uwana tatsà à ahəŋ la gudəŋ la afik, maham à ahəŋ dza aŋuvaw tasà à waŋ kà magagamay la Yesu.
- <sup>38</sup>La maham à ahəŋ dza uwatà la abà kà, dza anik la ahəŋ awiyà la magodəy: "Məŋga, vok ahamà ka, kà bəzi gulo tekula gə uwanay tsi, kà uwana masla la dūvats.
- <sup>39</sup>Kà uwana masasəfok mawisiga akasay, amallal gəl à ahəŋ, agodzal à ahəŋ la ndzədə, huzləv asahal à waŋ la gay la awtəy, atərəb à ahəŋ kà məŋga, məŋga, asək à ahəl kà wiy aw.

- <sup>40</sup>Gədəvən kudā à azlaməna matapla la slaka aṅak kà makudəkal masasəḏok mawisiga uwaga lakəl ala, ama taslāla vok aw.”
- <sup>41</sup>Uwana Yesu atsənà gay uwaga, agòḏ à atà: "Kayyà, akul azladza mawisiga, kokudā madiṅal gəl à vok, dagay mbà à uwana mədadza à ahəṅ anina ma? Dagay mbà gədəbasahakulaṅ ma?" Yesu agòḏal: "Sàgəla kona aṅak à waṅ à abanay!"
- <sup>42</sup>Mok uwana bəzi azà vok à slaka aṅha, masasəḏok aməllal gəl à ahəṅ, agodzàlla bəzi la ndzəḏa. Ama Yesu aslèh məlo à masasəḏok mawisiga uwatà à gəl la ndzəḏa, ṅgaha awurà bəzi ala, avà à baba aṅha.
- <sup>43</sup>Ḑgaha gesina aṅatà la abatà, ləv avəl atà à gay, kà məṅga aṅa ndzəḏa aṅa Zəzagəla la mazləḃay ṅgaha la maslay aṅha. Ama Yesu atapà azlaməna matapla la slaka aṅha, agòḏ à atà kà:
- <sup>44</sup>"Fàw gay uwanay à sləm à abà lela! Kona aṅa dza kà tadàvày à ahəl aṅa azladza.”
- <sup>45</sup>Ama tatsənà gay uwatà aw, ahadā godega aṅa gay uwatà à ahəṅ, kà atà aṅa masəlay aw. Ḑgaha atà kà, guba akəs atà kà manav godega aṅha babay.
- <sup>46</sup>Kiya uwaga azlaməna matapla tadzəkà mabay vok gay la tetəvi la ama, kà masəl dza uwana məṅga gə la tataka aṅatà la abà.
- <sup>47</sup>Yesu asəl madzugway aṅatà uwana tadzugway gesina la ləv aṅatà la tsəh, masla akəs bəzi ṅuvga, atsizllatəṅ à huma à gay,
- <sup>48</sup>agòḏ à atà: "Dza uwana akəs bəzi ṅuvga uwanay kà, kà uwana awoya gi kà, masla babay kà akəs gi, ṅgaha dza uwana akəs gi, akəs dza uwana asləl gi à waṅ babay. Dza uwana bəziga la tataka aṅkul la abà kà, masla la uwana məṅga gə.”
- <sup>49</sup>Yuhana adzəkà mabadma, agòḏal: "Məṅga, mənəṅà dza anik uwana akudəkàh azlamasasəḏok mawisiga la sləm aṅak, ṅgaha məvərəla gay kà uwana anina aw.”
- <sup>50</sup>Yesu agòḏ à atà: "Awaṅ, kà mana kavərəwla gay ma, kà uwana dza uwana masla məzam aṅkul aw kà, masla kà slawda aṅkul!”
- <sup>51</sup>Mok uwana kaslā mad à zagəla aṅa Yesu adagay nekwa kà, akəs tetəvi kà mad à Urusalima.
- <sup>52</sup>Yesu asləl azlaməna masləlay la huma dadəṅ, tahəd, tadà à gudəṅ, uwana la Samariya la abà kà madəhalla azlatatak à ahəṅ gesina.
- <sup>53</sup>Ḑgaha azlaməna madz à ahəṅ la gudəṅ uwatà takəs aw, kà uwana agə la tetəvi la ama, kà mad à Urusalima.
- <sup>54</sup>Kiya uwaga à uwana azlaməna matapla Yuhana atà la Yakuba tatsənəṅ uwaga kà, tagòḏ: "Sufəl, asa à ka kà mənəv akəl atsa à ahəṅ la zagəla kà mabaḃəh atà à gay ay?”
- <sup>55</sup>Ama Yesu agòlla vok, anəṅà atà à adi, ṅgaha aslèhà à atà vok.
- <sup>56</sup>Ḑgaha atà tahəd à gudəṅ anik à abà.

<sup>57</sup>Mok uwana tatsizilla ala, dza anik agòd' à Yesu: "Yesu, kəla slaka uwana kadàday kà gədànéf ka."

<sup>58</sup>Ŋgaha Yesu agòd'ál: "Azlamayaka kà: afək aṅatà la ahəṅ, azladíyaṅ kà: gày aṅatà la ahəṅ, ama Kona aṅa dza kà bà, slaka mahən gəl à ahəṅ aṅha la ahəṅ kà maduw ləv aw."

<sup>59</sup>Kiya uwaga Yesu agòd' à anik aya: "Nəfà gi!" Ama masla agòd'ál: "Məṅga, v à à gi tetəvi, kà gi aṅa mal baba gulo dadàṅ."

<sup>60</sup>Ama Yesu agòd'ál: "Sàk azlamazimnekid' talàh vok aṅatà, ama kak kà, hàd, kazà gay aṅa makoray Zəzagəla."

<sup>61</sup>Dza anik agòd'ál aya: "Sufəl, gi kà gənəf ka nəma, ama v à à gi tetəvi kà maday, 'Gi kà maday', gədàgod' à huɸ gày gulo dadàṅ."

<sup>62</sup>Yesu agòd' à atà: "Kəla dza uwana adafa ahəl aṅha à səɸuk sla à lig, ṅgaha anəṅ à lig kà, masla kà, akəsa vok aya kà aṅa makoray Zəzagəla aw."

## Luka 10

<sup>1</sup>La lig aṅa uwaga la ahəṅ, Sufəl atsatsàmàni azladza anik dzik mədəf gəl aṅha səla, ṅgaha aslələtələ səla səla la huma aṅha, à azlagudəṅ uwana à abà, à uwana masla la gəl aṅha asəl madàdàh à abà.

<sup>2</sup>Kiya uwaga Yesu agòd' à atà: "Sləray matsəɸ tatak la ahəṅ aṅuvaw, ama azlaməna sləray kà dəṅ aw. Kità kà, dèwàw kuɸa à dza ana makor tatak, kà masla aṅa masləl azlaməna matsəɸ tatak à waṅ dəṅ.

<sup>3</sup>Dàw, aganay gəsləl akul bokuba azlatuwaṅ à tataka azlakəda fəta à abà.

<sup>4</sup>Kazəɸaw sili à ahəl, amiyaka kiwa aṅa tatak may, la kwimik babay aw. Katsizllaw à ahəṅ la tetəvi la ama kà madàh 'Ayyi' à dza aw.

<sup>5</sup>Kəla gày, uwana kadaw à gày kagodàw dadàṅ teraṅa kà: 'Lapiya agay la kay uwanay.'

<sup>6</sup>Baṅa masla lapiya la ahəṅ la kay uwatà, ayyi aṅa lapiya ankul adàdza à ahəṅ lakəl aṅha, tsa baṅa kità aw kà, ayyi aṅa lapiya ankul anəfa akul.

<sup>7</sup>Dzàw à ahəṅ la huɸ gày aṅa lapiya, zùwàw, sàw uwana taf à akul à huma à gay gesina, kà uwana masla sləray kà azlayla masik aṅha. Ama katsetserahaw à gày à gày aw.

<sup>8</sup>Baṅa kadàdaw à huɸ gudəṅ anik à abà, ṅgaha takəs akul la ahəl səla, zùwàw tatak uwana taf à akul à huma akul à gay.

<sup>9</sup>Wàràw azlaməna dɸuvats ala la gudəṅ uwatà la abà, gòdàw à azlaməna madz à ahəṅ la abatà kà: 'Makoray aṅa Sufəl Zəzagəla kà nekwa la akul.'

<sup>10</sup>Ama baṅa kadaw à huɸ gudəṅ anik à abà, ṅgaha takəs akul la ahəl səla aw kà, sàw à uda à tetəvi à ama, ṅgaha gòdàw à atà:



- 11'Aganay mēdfəd à akul burburu aṅa gudəṅ aṅkul à adi, à uwana agədf à anu à asik la gudəṅ aṅkul la abà. Tekedika səlàw la lela kà: Makoray Zəzagəla kà adagay nekwa.'
- 12La dziriga gəpəh à akul kà: La vudf seriya kà ḡuləm adagay kà aṅa azlaməna madz à ahəṅ la gudəṅ Sodom, kà azlaməna madz à ahəṅ la gudəṅ uwanay la abà."
- 13"Ḍgərpa lakəl aṅak à kak Korazən! Ḍgərpa lakəl aṅak à kak Betsayda! Kà uwana agay nadzipo uwana tadfahəṅ la tataka aṅkul la abà agay kà la gudəṅ Tir la Sədon kà, nakà, dagay uwarà azlaməna madz à ahəṅ la abà kà tatsəh kutso akəl à vok, ḡgaha la madaw abūh à vok, kà mapəhla ala kà, atà tapəh gay la ləv ala.
- 14Kà uwaga à uwana gəgodf à akul kà: La vudf seriya kà, seriya uwana adəbəz azlaməna gudəṅ Tir, la azlaməna gudəṅ Sədon kà, ḡuləm kà aṅatà, à kà aṅa gudəṅ aṅkul.
- 15Ḍgaha kak, Kapernahum, kadzugw kà: 'Gədazigəṅay tsəràh à zagəla', kagodf takay? Awaṅ, tadədukw ka à vədah à gày akəl à abà."
- 16Kiya uwaga Yesu agədf à azlaməna matapla la slaka aṅha: "Dza uwana atsəb à akul sləm, atsəb à gi sləm babay, dza uwana akweska akul kà, akweska gi babay, ḡgaha akweska masla masləl gi à waṅ babay aya."
- 17Kiya uwaga azlaməna asik uwaga tawul à waṅ, la marabay tseksatsek tagədf: "Məṅga gami, amiyaka azlamasasədfok mawisiga babay kà takəs anu gay la ahəl ala, à mok uwana mədapəh à atà gay aṅak!"
- 18"Haday", Yesu agədf à atà: "Gəṅəṅà seteni atədf à ahəṅ la zagəla bokuba mawutsəday aṅa habaga.
- 19Tsənàwwəṅ, aganay gədavà à akul maslay kà akul aṅa mahaḃəh azlabebi ala, la azlaaliz, ḡgaha babay kà akul aṅa mahaḃəh ndzəda aṅa masla məzam ala gesina. Ḍgaha tatak mawisiga la ahəṅ adədəbani à akul aw.
- 20Ama kəla kà, karabaw kà uwana azlamasasədfok mawisiga takəs gay aṅkul aw, ama kà, rəbàw kà, kà uwana sləm aṅkul matsetserayga la wakità aṅa sifa la abà, la zagəla la afik!"
- 21La mok uwatà, Masasədfok Zəzagəla ahənà Yesu ala la marabay, agədf: "Iyay, Baba Sufəl aṅa zagəla ḡgaha aṅa vədah, kikay gəgodf à ka, kà uwana kafətla à azlabəzaga la ama ala tatak nasiriga uwana kahadəṅ à azlaməna masəl tatak uwana à adi: 'Mədawur gəl', tagodf. Iyay Baba gəzləb ka kà uwaga."
- 22"Baba gulo abək à gi tatak gesina. Dza la ahəṅ asəl Kona aw, say Baba pəra asəl gi, dza la ahəṅ asəl Baba aw, say gi Kona aṅha pəra, ḡgaha la azlauwana, Kona apəhatàla masla pəra."
- 23Ḍgaha Yesu agəla à huma à azlaməna matapla la slaka aṅha à gay, agədf à atà, à atà kokudà gəl aṅatà pəra: "Marabay kà aṅkul, kà uwana yewdi ankul tanəṅà tatak dzəba aṅha səla aw!

<sup>24</sup>La dziriga gəpəh à akul, azlaməna mapəh à atà gay à ahàl aŋa mapàh à azladza, la azlasufəl tayàh kà manəŋ uwaga kanəŋàwwàŋ lagwa, ama tanəŋàŋ aw. Ŋgaha kà matsəŋəŋ uwana katsəŋàwwàŋ lagwa, ama tatsəŋàŋ aw.”

<sup>25</sup>Masla mapàhla wakità mapəhay ala, asà à afik. Asàl matap ləv aŋa Yesu, kà mabəzal à tsəh la gay la abà, agòdàl: "Məŋga, mana à uwana, gədəhəŋ kà gi aŋa mabəz sifa adəv à gay aw ma?"

<sup>26</sup>Kiya uwaga Yesu agòdàl: "Mana tatsətsèr à wakità mapəhay à abà ma, aŋa kadzeŋay ma?"

<sup>27</sup>Masla awùlla à uda, agòdàl: "Wòyà Sufəl Zəzagəla aŋak, la ləv aŋak gesina, la ndzəda aŋak gesina, la haŋkəli aŋak gesina, ŋgaha la sifa aŋak gesina, ŋgaha wòyà masla magay aŋak, bokuba gəl aŋak uwana kawoyàŋ.”

<sup>28</sup>Kiya uwaga Yesu agòdàl: "Delga kawùlla à uda, Dahàŋ kiya uwaga zlà, kadàbəz sifa uwana adəv à gay aw.”

<sup>29</sup>Ama masla asàl mag gəl aŋha dziriga, agòd à Yesu: "Iyay zlà, uwa à masla magay gulo uwa?"

<sup>30</sup>Yesu agòdàl: "Iyay tsəŋàŋ: Dza anik atsizilla ala la Urusalima kà mad à Yeriko. La tetəvi la ama, azlaməna nabəra tasà à waŋ, tazlawàŋ, tazlàb masla, tazùw, ŋgaha tasàkàl à ahəŋ la ləv la ləv pəra.

<sup>31</sup>La lig la ahəŋ, tsəhay azlaməna mav tatak à Zəzagəla aguwaŋ la tetəvi uwatà. Mok uwana anəŋà dza uwaga kà, akəllal vavara à adi, aguwa la dərəv à uda anik.

<sup>32</sup>Ŋgaha aya, zil Levi, (Uwana azlakaha à azlaməna mav tatak à Zəzagəla à sləray uwana la abà, tadəhaŋ la gày Zəzagəla la aku) anəfà tetəvi uwatà bay. Mok uwana adabəz à slaka uwatà, anəŋà dza uwaga, akəllal vavara à adi aya suwaŋ, aguwa la dərəv à uda anik.

<sup>33</sup>Agà la ahəŋ aya babay zil Samariya uwana la mauguzahay la abà, anəfà tetəvi uwatà babay suwaŋ, abəzà à slaka aŋa dza uwatà la ləv la ləv. Mok uwana anəŋàŋ, vok ahamàl kaykay kà masla.

<sup>34</sup>Ŋgaha azà vok à slaka aŋha nib, apàləhal azlaamik aŋha, la madəhəhal amàl à gəl, la iyaw matavəruk uwana azay la abà, bokuba mamleləŋ uwana azay la amik la abà, ŋgaha abàkal azlaamik uwaga, afà masla à tatak aŋha uwana à afik, masla aday la afik, ŋgaha adàla masla à gày mələk dza à agu, la slaka uwana tadəŋəŋal à adi lela.

<sup>35</sup>La bebəŋ bəŋ, mok uwana atsizilla ala, kà mad aŋha, ahəl gursu səla à uda, avà à dza aŋa gày mələk la magodàl: 'Fàl sləm lela à dza uwanay, la vud uwana gədawul à waŋ à abanay kà, gi la gəl gulo, gədəpəlla ka tatak uwana kadəziŋ ala kà aŋha gesina.' “

<sup>36</sup>La lig la ahəŋ Yesu anavà à dza uwaga gà: "Iyay zlà, la tataka aŋa azladza makər uwaga la abà, ma uwala à uwana agà bokuba masla magay aŋa dza uwana azlaməna nabəra tazùw, tazlàb ala?"

<sup>37</sup>Masla mapahla mapəhay uwaga ala agòd: "Gi kà, dza uwana vok ahamàl kà masla, gəgod." "Delga", Yesu agòdàl, "Kak babay, hàd, kadàhàŋ kiya uwaga babay suwaŋ zlà."

<sup>38</sup>Mok uwana atà la tetəvi la ama la azlaməna matapla aŋha, ahàd à gudəŋ anik à abà. Mis anik la ahəŋ la abatà, sləm aŋha Marta, akəs Yesu à mtəga aŋha la ahàl səla.

<sup>39</sup>Deda aŋa mis uwatà la ahəŋ, sləm aŋha Mariyama, adzà madzay la makəla asik aŋa Sufəl, kà matsəb sləm à uwana masla apəhay.

<sup>40</sup>Bokuba uwana sləray madəgəl adakəf gəl à Marta à vok, ŋgaha agòd à Yesu: "Sufəl, uwaga kà aza ka aw, tak à uwana deda gulo adasəgəla sləray à gəl gesina ay? 'Zlakà deda aŋak', gòdàl!"

<sup>41</sup>Sufəl awulàlla agòdàl: "Marta, Marta, katərəb gəl aŋak la azlatatak aŋuvaw kiga ma, kà mana ma?"

<sup>42</sup>Ama kəla kà, tatak tekula la uwana akəsa vok! Mariyama kà, akəsàni tatak uwana dzəba aŋha səla aw gə, uwana dza azəballaŋ ala aya aw tetuwa."

## Luka 11

<sup>1</sup>Kiya uwaga vərđi anik, Yesu adəv kuđa la slaka anik. Mok uwana adakəf gəl à madəv kuđa, tekula la tataka azlaməna matapla la slaka aŋha la abà anàval: "Sufəl, tàpanula madəv kuđa, bokuba aŋa Yuhana uwana atàpla azlaməna asik aŋha."

<sup>2</sup>Yesu agòd à atà: "Baŋa kadəvaw kuđa kà, gòdàw kà: Baba, Sləm aŋak tsikasłaga agay masəlay gə, la slaka azladza. Ŋgaha makoray aŋak atsa à waŋ.

<sup>3</sup>Và à anu tatak may asla à anu kəla mahənay.

<sup>4</sup>Matsan tsakana gami ala, Ŋgaha anu bay la gəl gami aŋa mamatsiŋ à azladza uwana ala, tadàhà à anu mawisiga à vok. Ŋgaha, fà à anu sləm, kà seteni aŋa mapapat anu aw."

<sup>5</sup>Ŋgaha Yesu agòd à atà: "Baŋa tekula aŋkul ada à mtəga slawda aŋha la tataka vəd agòdàl: 'Slawda gulo, kamkam bək à gi kaf gay bərsəw makər tsi,

<sup>6</sup>kà uwana slawda gulo anik agurùh à gi, asà à waŋ la mauguzahay, gəsəl tatak uwana gəvəl aw.'

<sup>7</sup>Tsənàw mabadma à uda la kay aŋa dza anik uwanay tsi: 'Sàk à gi titi, gədatsak gamagày à ama kà dagay uwarà, ŋgaha anu babay kà mədahan à ahəŋ la azlabəza gulo, tsewwa. Gəslala vok aŋa mas à afik aŋa mav à ka aya aw.'

<sup>8</sup>Đođà à gi kà, masla adàsa à afik kà aŋa mavəl kà, kà slawda aw; ama adàsa à afik kà, kà uwana slawda aŋha ad à huma à gay la mazalay, la mapakla.

<sup>9</sup>Ama gi kà gəgod à akul kà: Nàvàw ŋgaha kadàbəzawwal, yàhàw ŋgaha tadàv à akul dèdàwwàŋ, ŋgaha dza uwana ayahay abəzal, ŋgaha dza apəzl gamagày à dza uwana azalay,

- 10**kà uwana kèla dza uwana anavay: abəzal; dza uwana ayahay: abəzal; ngaha dza apəzl gamagày à dza uwana azalahay.
- 11**Baba ma aṅa uwa la tataka aṅkul la abà, baṅa bəzi aṅha anaval kilfi ma avàl bebi takay?
- 12**Awma baṅa anaval slaslay ma avàl aliz ay?
- 13**Akul azlamawisiga nəma, ama kasəlaw mav tatak delga à azlabəza aṅkul, ngaha zlà ma adaməraaka Baba uwana la zagəla la afik takay. A masla uwana avàhay Masasədok aṅha à azladza uwana tanaval?"
- 14**Yesu adzəkà makudək masasədok mawisiga à dza anik lakəl ala à uwana adapakəṅ ala kà bada. Mok uwana masasədok mawisiga uwaga adasal à kəl ala, bada adzəkà mabadma, ngaha ləv avàl à maham à ahəṅ dza à gay gesina la abata.
- 15**Ama azladza anik la tataka aṅatà la abà, tagòd: "Belzəbul, sufəl aṅa azlamasasədok mawisiga la uwana avàl ndzəda kà makudəkàh azlamasasədok mawisiga."
- 16**Azladza anik asà à atà malal à afək à ahəṅ, kà uwaga à uwana azladza anik tagòd: "Dahà à anu a ahəṅ nadzipo tsi, kà aṅa mapəhanula kà, Zəzagəla la uwana asləl kà à waṅ."
- 17**Ama Yesu asəl madzugway aṅatà, agòd à atà: "Baṅa azladza gudəṅ tekula tatsək ala, ngaha tapa guvəl la tataka aṅatà la abà kà, makoray ana gudəṅ uwatà kà azila, huđ gày la huđ gày tagwàh vok à gəl.
- 18**Tsa baṅa seteni la gəl aṅha adatsakla ma, kakay makoray aṅha ad à huma à gay aya ma? Tsa akul kagòdāw kà: Gəkudəkàh azlamasasədok mawisiga kà Belzəbul la uwana avà à gi ndzəda kagòdāw ma?
- 19**Iyay, akul kadzugwaw kà Belzəbul la uwana avà à gi ndzəda kà makudəkàh azlamasasədok mawisiga, uwaga kagòdāw. Kità ma, uwa adavà ndzəda à azlabəza aṅkul, kà makudəkàhla uwa? Kà uwaga à uwana tadəgah azlaməna seriya aṅkul.
- 20**Ama tsa baṅa la Masasədok Zəzagəla la uwana gəkudəkàh azlamasasədok mawisiga uwanay kà, tsa kətà kà, gòdāw kà makoray aṅa Zəzagəla kà adabəz akul à vok lakana, gòdāw zlà!"
- 21**"Baṅa dza mabəlafaga abək kazlaṅa guvəl aṅha à vok, anəṅla gày aṅha lela, kà uwana akoray gesina kà ahàl adàlla vok aw.
- 22**Ama baṅa dza uwana aduwa masla la ndzəda atsa à waṅ à slaka aṅha, ngaha akədaslal, ahəlla kazlaṅa guvəl aṅha uwana ala à uwana afà manəwəṅ aṅha à afik gesina. Dgaha ahəl tatak aṅha, avàh à azladza à uda gesina."
- 23**"Dza uwana anu səla aw kà, masla kà, masla məzam gulo. Dgaha babay, dza uwana azlak gi, kà mahamla gay à vok aw kà, masla kà, masla madàdasinla."
- 24**"La mok uwana masasədok mawisiga adasa à uda la dza la abà kà, aday auguzahay la azlaslaka deyday gə gesina, ayàh slaka maduw ləv. Ama baṅa abəzal aw kà, agòdāy

la gəl aṅha kà: 'Lagwa kà, gəday, gədàwul à slaka gulo uwana à abà, gəsà à uda la abà.'

**25**Ŋgaha awulay, abəzal à gəl kà masladayga lela, madəhəṅ à ahəṅ gà dzəba aṅha səla aw.

**26**La abatà kà, aday, ayahay azlamasasədok mawisiga anik à tsəh mədəf, azlauwana taduwa masla la dzaṅdzaṅ, tatsa à waṅ atà nna, tadza à ahəṅ la abatà. Kiya uwaga kà madz à ahəṅ aṅa dza uwaga agay mawisiga daduwa à gay uwana uwarà."

**27**Mok uwana Yesu adapəh gay kiya uwanay kà, mis anik adzəkà mabədma la tataka maham à ahəṅ dza la abà: "Lapiya agay la mis uwana azàb ka la huɖ, ṅgaha la uwana avàhà à ka awà."

**28**Ama Yesu agòfal kà: "Lapiya agay kayakay kà la azladza, uwana tatsəb sləm à gay Zəzagəla, ṅgaha taf sləm à uwaga lela."

**29**Mok uwana dza adahama gay à vok la slaka aṅha kà, Yesu agòf à atà: "Azladza aṅa zamana uwanay lakana kà, azlamawisiga, dziriga aṅatà la ahəṅ aw. Atà tayàh nadzipo, ama nadzipo la ahəṅ tanəṅ aw, say aṅa masla mapəhal gay à ahəl Yonas uwatà pəra.

**30**Ŋgaha bokuba uwana Yonas apək nadzipo kà aṅa azlaməna gudəṅ Niniv kà, kiya uwaga Kona aṅa dza adəpak nadzipo kà aṅa azladza aṅa zamana aṅa lakana suwaṅ.

**31**La vuɖ seriya kà, mis sufəl gà uwana la gəl la aku, adəgola à huma azladza aṅa lakana à gay, ṅgaha adəpuwa à atà gudzi à gəl, kà uwana asà à afik la tsəh la ahəṅ la makəɖ gəl à ahəṅ gudəṅ à vok, kà matsəb sləm à gay matsihila aṅa Salomon. Aganay à dza uwana aduwa Salomon la abanay lakana.

**32**La vuɖ seriya azlaməna aṅa gudəṅ Niniv tadəgola afad à azladza aṅa lakana à gəl, ṅgaha tadəpuwa atà gudzi à gəl, à kà uwana azlaməna madz à ahəṅ la gudəṅ Niniv tapəh gay la ləv ala, la mok uwana tatsənà sayda aṅa Yonas. Ama dza uwana aduwa Yonas kà aganay la abanay zlà."

**33**"Dza la ahəṅ avats fənəs maf à tsəh tasà aw, ama afay kà à slaka masəɾət fənəs à ahəṅ, kà mav uɖaka à azladza gesina, uwana tad à gày.

**34**Yewdi kà uɖaka aṅa vok aṅak: baṅa yewdi aṅak kà wurwur kà, vok aṅak gesina kà uɖaka, ama baṅa yewdi aṅak la duvats kà, vok aṅak gesina kà la mələs la abà.

**35**Kiya uwaga kà, dāhà haṅkəli kà uɖaka uwana la vok aṅak kà, kà aṅa magay la mələs la abà aw.

**36**Iyay, baṅa vok aṅak gesina audəy, kokudā magay la abà aṅa bəzi mələs la slaka anik kà, vok aṅak gesina kà adəgay uɖaka, bokuba fənəs uwana av uɖaka la huɖ gày gesina."

**37**La mok uwana Yesu adadəv mabədma à gay, zil Farisəya anik azəlal kà mazuw tatak may atà səla la mtəga aṅha. Yesu adà à gày à dza à tatak may à gəl.

- <sup>38</sup>Kay, zil Farisøya uwaga akès gəl la ahəl səla, kà uwana Yesu apəl ahəl kà mazuw tatak may aw, azùw pəra.
- <sup>39</sup>Sufəl agòdál: "Akul, azla Farisøya kà kapalahaw azlatatak masala iyaw, la azlakəsład. Ama la hudf ankul kà, kahənàwla la makəsafər dzəbaŋŋa, ŋgaha à gəl la adi gesina.
- <sup>40</sup>Akul azlakusonju. Dza uwana adáhəŋ udaga uwaga, ma masla la uwana adáhà hudga à awtày takay?
- <sup>41</sup>Duləm kavàw à azlaməna kudà à tatak uwana la kətsaw ankul la abà, la uwana la kəsład ankul la abà, ŋgaha tatak gesina adàgay dzahhà kà ankul."
- <sup>42</sup>"Dgərpa la akul, azla Farisøya! Kà uwana kavàw Zəzagəla makulo aŋa tatak ankul, baməraka la azlatsəhay aləl bəzaga gesina bay, ama kapəsewaw dziriga la masal aŋa Zəzagəla. Tekedika naka uwatà la uwana madəhəŋ kəla, ŋgaha mapəsew azlatatak anik anik deydayga uwanay gesina."
- <sup>43</sup>"Dgərpa la akul, azla Farisøya! Kà uwana asa à akul azlaslaka materaga la azlagəy madəv kudà la aku, ŋgaha aya asa à akul kà azladza tadəhakulla 'Ayyi', la huma maham à ahəŋ dza gesina kà mapəhla gəl ankul ala, kà akul azladza məŋga.
- <sup>44</sup>Dgərpa la akul! Akul uwana kapakàhàw kà bokuba azlazəvay uwana adakal à ahəŋ tabazl à abà tanəŋla aya aw, kalkal la kutso uwana tauguzahay la afik."
- <sup>45</sup>"Iyay", tekula la tataka azlaməna mapəhla mapəhay ala la abà agòdál: "Məŋga, la mapəhay kiya uwaga kà, anu babay kà kagodəha à anu ma kasəl nəmay?"
- <sup>46</sup>Yesu agòd à atà: "Dgərpa la akul, akul azlaməna mapəhla mapəhay ala! Kà uwana kabəđaw dzəgla à azladza à gəl, tsa tekedik akul la gəl ankul kà, amiyaka la gay gəl ahəl babay kà, kadəbawani aw.
- <sup>47</sup>Dgərpa la akul! Akul uwana kaŋalahaw zəvay aŋa azlaməna mapəh à atà gay à ahəl kà mapəh à azladza, tekedik azlababa ankul la uwana takàđah atà.
- <sup>48</sup>Kiya uwaga kà, akul azlaməna sayda aŋatà lakəl aŋa sləray aŋatà uwana tadəhəŋ. Kà uwana atà la uwana takàđah azlaməna mapəh à atà gay à ahəl. Dgaha aya, akul kà katərkakaslahaw la maŋaləh azlazəvay aŋatà aya!
- <sup>49</sup>Kiya uwaga à uwana Zəzagəla agòd la matsihila aŋha kà: "Gədàsləl atà à awtày azlaməna mapəh à atà gay à ahəl la azlaməna matapatàla tatak. Atà tadəkəđahay azlaanik aŋatà, ŋgaha babay tadətərbəh azlaanik aŋatà aya!"
- <sup>50</sup>Gəpəh à akul la dziriga kà, aŋiz aŋa azlaməna mapəh à atà gay à ahəl, uwana tasòkwəh à vədəh dagay madzəka gudəŋ à vok kà, tadənavay kà la ahəl aŋa azladza aŋa lakana.
- <sup>51</sup>Dagay aŋiz aŋa Abel tsəràh à aŋiz aŋa Zakari, uwana kakəđaw à tataka azlaslaka makəđ tatak à abà la slaka tsikaslaga. Gəpəh à akul la dziriga kà, tadənav aŋiz aŋa azladza uwaga kà la ahəl aŋa azladza aŋa lakana!"

<sup>52</sup>"Dgërpa la akul, akul azlamëna mapàhla mapèhay ala! Kà uwana kazèbàw tsèkurum uwana av tetèvi kà masèl tatak, uwala akul la gèl aṅkul kà, kadaw à gày la abatà aw, ṅgaha pèra aya kà, kadèdàw gay à azladza anik uwana à ahèṅ, asa à atà mad à gày la abatà."

<sup>53</sup>Mok uwana Yesu adasa à uda la abatà azlamëna mapàhla mapèhay ala la azla Farisèya tanèfà masla la gay, tanàvahal azlatatak aṅuvaw la gay ala.

<sup>54</sup>Atà tayàh mabèzal à tsèh la azlagay mawisiga la abà, ṅgaha kà atà aṅa mapuwalla gudzi à gèl.

## Luka 12

<sup>1</sup>La kaslà uwatà kà, azladza dèbow dèbow tahamà gay à vok, tsèràh à uwana azladza tafàh vok asik à gèl kà atà kà atà. Teraṅa kà, Yesu kà, apèh gay kà à azlamëna matapla la slaka aṅha dadàṅ, masla agòd' à atà: "Nèṅàwla gèl aṅkul, kà tatak makèsliṅ aṅa azla Farisèya, uwaga asal magòd'ay kà: Magolla dza aṅatà.

<sup>2</sup>Tatak mahadèhèṅ à ahèṅ gà gesina, adàgay mapèhla vok ala gà, ṅgaha tatak nasiri gà gesina adàgay masèlayga la dazuwaya.

<sup>3</sup>Kèla tatak uwana kadàhawwanṅ la mèlès la abà kà, adàtsènla la paraka, ṅgaha tatak uwana kà ṅoṅuzawla la gèl la gèl la kay kà, uwaga adàgay bokuba mawiyilaga la gay azàṅ."

<sup>4</sup>"Gègòd'ay kà akul, azlamëna gay lèv gulo, guba akès akul kà azlauwana takèd' slèb vok aw. Kà uwana tatak anik la ahèṅ tadèhèṅ à uwana aduwa uwaga aw!

<sup>5</sup>Ama aganay gèpèhakulla, dza uwana kahoyaw guba, kà masla: Guba akès akul kà Zèzagèla, kà uwana mok adakèd' akul kà, asla kà maduw vok aṅkul à akàl uwana à abà, adàmatsila aw kèla, iyay, masla la uwana kahoyaw guba aṅha pèra."

<sup>6</sup>"Tak ma taslala vok aṅa maduw dègtsetsek zlo ala, kà aṅa sili sèla aw takay? Iyay, tekedika amiyaka tekula aṅatà kà azila la huma Zèzagèla aw.

<sup>7</sup>Amiyaka aṅidz takasagèl aṅkul gesina kà, Zèzagèla asèl, la tekula tekula gesina aṅha. Guba akès akul aw, kà uwana kaduwaw azladègtsetsek gesina la manèṅla akul à adi."

<sup>8</sup>"Had'ay, gègòd' à akul la dziriga: Baṅa dza agòd'ay: 'Gi aṅa Yesu la paraka', 'Aṅulo', Kona aṅa dza adàgòd'ay la huma aṅa azlamalika aṅa Zèzagèla lakèl aṅha bay.

<sup>9</sup>Ama baṅa dza apèhay mawisiga lakèl kà aṅa Kona aṅa dza, Kona aṅa dza adàpèh mawisiga lakèl aṅha suwanṅ, la huma aṅa azlamalika aṅa Zèzagèla."

<sup>10</sup>"Kèla dza uwana apèh mawisiga lakèl aṅa Kona aṅa dza, adàmatsalaṅ ala, ama kèla dza uwana agòd'ah à Masasèdòk Zèzagèla kà, masla adàbèz mamatsila tsakana aṅha aw!"

<sup>11</sup>"Mok uwana tadàbayàh akul à azlagày madèv kudà à agu, baṅaw à huma aṅa azlasufèl, baṅaw à huma aṅa azlagumna kà aṅa madàhàh akul seriya à gèl kà, guba akès akul à kà tatak uwana kadàpèhaw, kà matèf gèl aṅkul aw.

- 12**Kà uwana la kaslà uwatà kà, uwana kadzugwaw aw kà, Masasə̀dòk Zəzagəla adə̀pə̀hakulla adàgay la paŋaw aŋkul la awtə̀y.”
- 13**Kiya uwaga dza anik la ahə̀ŋ, la maham à ahə̀ŋ dza la abà, agò̀d à Yesu: "Mə̀ŋga, gò̀d à deda gulo kà: 'Vàhàw lə̀mana, uwana baba aŋkul asàk à akul à ahə̀ŋ', gò̀dal.”
- 14**Yesu awulàlla, agò̀dal: "Zil, uwa à uwana afà à gi à ahə̀ŋ, kà gi aŋa magay masla seriya aŋa mavàhakulla tatak ala la deda aŋak uwa?”
- 15**Kiya uwaga agò̀d à atà gesina: "Dahàw haŋkə̀li la gəl aŋkul lakəl aŋa mawoy lə̀mana, kà uwana sifa aŋa dza kà la magay la ahə̀ŋ, amiyaka adàgay masla gorobu mə̀ŋga gà, aw.”
- 16**Kiya uwaga Yesu apə̀h à atà gay la gay la abà uwanay la magòdày: "Dza anik la ahə̀ŋ uwana agà la azlaàlak delga delga.
- 17**Masla adzugw la gəl aŋha, 'Mana gə̀dèhə̀ŋ mi: Tsa uwala slaka aslə̀kà à gi aŋa matsakə̀h tatak may gulo à abà aw mi.
- 18**Lagwa kà, gə̀kalə̀h bə̀za və̀dà uwanay à ahə̀ŋ gesina, ŋgaha gə̀ŋalə̀h mə̀ŋga mə̀ŋgaga, ŋgaha gə̀dàtsakah azlatatak gulo à abà gesina.
- 19**Ŋgaha gə̀dàgodày à gəl gulo: Kak la tatak aŋuvaw, lagwa adàgay kà aŋa mavay də̀ŋ; dùw lə̀v aŋak, zùw, ŋgaha sà, ràb aŋak, dùw asik à zagə̀la.’
- 20**Ama Sufəl Zəzagəla agò̀dal: 'Kak zil kusoŋuga! Zlahaw la və̀d uwanay lakana kà kamə̀tsay ma, ŋgaha ma adàgay ma aŋa uwa à tatak uwaga kadahaŋ à ahə̀ŋ gesina uwa?' “
- 21**Kiya uwaga Yesu azàlən à gel, agò̀d à atà: "Kiya uwaga à uwana dza uwana ahamə̀ lə̀mana aŋa gəl aŋha à ahə̀ŋ kà, masla kà, galepi la huma yewdi aŋa Zəzagəla aw.”
- 22**Kà uwaga à uwana Yesu agò̀d à azlamə̀na matapla la slaka aŋha, "Kafawla kà gəl à ahə̀ŋ kà tatak may uwana kadzadzawla kà vok aw, bamə̀raka lakəl aŋa tatak matsokw à abà babay aw.
- 23**Sifa ma aduwa tatak may aw takay? Ŋgaha ma vok aduwa tatak matsokw à abà aw takay?
- 24**Nə̀rə̀zàw azlakwakwak tsi: Uwala taslə̀kay aw, ŋgaha tatsə̀dày babay aw, və̀dà aŋatà la ahə̀ŋ, kà aŋa lebə̀ŋ aw. Ama Zəzagəla adzadzar atà, akul ma kaduwawwə̀ŋ azlakolaŋ uwaga aw takay?
- 25**Uwa la tataka aŋkul la abà aslala vok aŋa maziŋ à mavay aŋa mamə̀tsay aŋha à adi amiyaka ŋuv la aslasl gəl aŋha uwa?
- 26**Ŋgaha ma, tsa baŋa azlabə̀za tatak babay kà, kaslawwalla vok aw ma, kà mana kafawla kà gəl à ahə̀ŋ lakəl aŋa azlatatak anik anik deyday ma?
- 27**Nə̀rə̀zàw bokuba uwana azlamawuratatay aŋa guf tazigə̀nay tsi: Tadàh slə̀ray aw, ŋgaha tavavə̀d slewzi kà aŋa lukut babay aw. Ama la dziriga gə̀gò̀d à akul kà:



Amiyaka bà Salomon uwana akòr lòmàna aṅha aṅuvaw babay kà, abəzà à lukut bokuba aṅa azlamawuratatay uwaga tatsokw à abà aw.

<sup>28</sup>Iyay zlà, Zəzagəla adàw lukut à azlakəsaf à vok uwana à vok la fəta bay lakana, tekedika atà kà lakana baṅaw lebəṅ kà tayakats à akàl à gay: Ɖgaha ma adàgay anu uwanay babay takay? Kay akul la maḍiṅal gəl à vok matsihilaga haḍay.

<sup>29</sup>Kiya uwaga kà, kafawla kà gəl à ahəṅ, la uwana kadàzuwwaw, la uwana kadàsaw aw, ṅgaha kagahaw azlaadi aw.

<sup>30</sup>Kà uwana uwaga kà, say azladza uwana tasəl Zəzagəla aw, la uwana tayàh tatak uwaga koksikoksi. Ndzer Baba aṅkul uwana la zagəla la afik kà asəl tatak uwana kanawkudà aṅha gesina.

<sup>31</sup>Fàwla kà gəl à ahəṅ dadəṅ teraṅa kà, kà makoray Zəzagəla, la lig la ahəṅ kà masla adàkəs akul à ahəl ala dèwdèw tatak uwana kanavawwal.”

<sup>32</sup>"Maham à ahəṅ bəziga, guba akəs akul aw, kà uwana asa à Baba kà masla aṅa mav à akul makoray aṅha.

<sup>33</sup>Dàwàw azlatatak aṅkul ala, vāhàw sili gà à azlaməna kudà à uda. Pàkàw vok ankul ala kà kiwa sili uwana sili adəv à lag la aku aw, ṅgaha lòmàna uwaga awisila la zagəla aw aw. Kà uwana la abatà kà, masla à gəl ad à abatà aw, marzaw la fafay bay awisəṅ ala aw.

<sup>34</sup>Kà uwana slaka uwana lòmàna aṅak la abatà kà, la abatà bay kà, ləv aṅak adz à ahəṅ babay suwaṅ!”

<sup>35</sup>"Gàw maḍàh vok à ahəṅ gà, wàḍàhàw parapara aṅkul à tsəh lela, ṅgaha bay fənəs aṅkul agàh mavats à ahəṅ gà.

<sup>36</sup>Gàw bokuba azlamagamza uwana takud məṅga aṅatà ala, à baṅa ahàd à mazəb mis, kà atà mapəzlal gamagày la mok uwana mazalahay aṅha adàsa à waṅ.

<sup>37</sup>Marabay à gay kà la azlamagamza uwana məṅga aṅatà atsa à waṅ, abəz atà à gəl la adi. La dziriga gəpəh à akul kà, məṅga aṅatà adàwad parapara aṅha à tsəh, ṅgaha adàdzàh atà madzay, kà mavàh à atà tatak may la gəl aṅha.

<sup>38</sup>Baṅa məṅga aṅatà asa à waṅ la tataka vəḍ, adàḍuw uwaga babay, baṅa abəz atà à gel la adi kà, marabay agay la atà!

<sup>39</sup>Tsəbàw sləm à gay uwanay lela: Agayṅa zil gày asəl kaslà uwana masla à gəl atsa à waṅ kà, mazləl gày aṅha la vəḍ kà, naka masla kà naka adzəhal aw huyip à ahən à ahəṅ la adi, kà mad à gay aṅha, aṅa masla à gəl aw.

<sup>40</sup>Akul babay kà, gəw nekwa, kà uwana la mas à waṅ aṅa Kona aṅa dza babay kà adàgay kà bà kiya uwaga la gurùh!”

<sup>41</sup>Kiya uwaga Piyer agòḍal: "Sufəl kà aṅami la uwana kapəhay gay la gay la abà uwaga, awma kà aṅa azladza gesina takay?”

- <sup>42</sup>Kiya uwaga Sufəl agòdɔl: "Kità ma, uwa à masla sləray dziriga, ɲgaha haɲkəliɲa uwa? Uwaga kà dza uwana mənɲa aɲha afà à gəl aɲa azlamagamza anik, kà masla aɲa mavàh à atà tatak may la kaslà uwana asa à atà.
- <sup>43</sup>Marabay agay la magamza uwana mənɲa aɲha awul à waɲ, abəzal à gəl la sləray aɲha la abà.
- <sup>44</sup>Haday, gəpəh à akul la dziriga: Ndzer, zil gày adàvə ləmāna aɲha à ahəl aɲha gesina.
- <sup>45</sup>Ama baɲa magamza uwaga agoday la ləv aɲha la tsəh: 'Mənɲa gulo kà adəsafay', ɲgaha adzəka makəsafər la mazlabàh azlamagamza anik anik gesina, ɲgaha aday à mazuway à abà, à masay à abà, apaka masla guzu.
- <sup>46</sup>Kiya uwaga kà, mənɲa aɲha adàsa à waɲ la gurùh, la mavakay uwana adzugw mas à waɲ aɲa mənɲa aɲha aw. Kiya uwaga kà, mənɲa aɲha adàsəl ɲgərpa, kà uwana akudàɲ ala aw, masla kà tadəfay kà à tataka aɲa azlaməna tsakana à abà."
- <sup>47</sup>"Tekedika magamza uwana asəl tatak uwana asa à mənɲa aɲha, akuda mənɲa aɲha ala aw kà, adàhàɲ kà bokuba uwana asa à gəl aɲha pəra, mazlabay adəsləl mənɲa.
- <sup>48</sup>Ama kà aɲa magamza uwana asəl madàh uwana asa à mənɲa aɲha aw, ɲgaha adàh sləray uwana agay tazlabla kà, tadəzlabay kà ɲuv pəra, kà uwana asəl aw. Dza uwana tavəl tatak mənɲa kà, la slaka aɲha kà, tanaval kà mənɲa suwaɲ; ɲgaha aya dza uwana tafal à ahəl mənɲa tadənaval mənɲa suwaɲ."
- <sup>49</sup>Yesu agòd: "Gi kà, gəsà à waɲ kà, kà masəlla akəl à waɲ à gudəɲ à vok, ɲgaha asa à gi kà agay mavats vok gə.
- <sup>50</sup>Batem anik la ahəɲ tadəfahgəɲ, nənəw madz à ahəɲ gulo la mazaw la gəl la uwaga la abà tsi, gətərabay tsərəh adəpakə vok.
- <sup>51</sup>Akul ma, kagodaw ma, gəsəlla lapiya à kutso uwanay à abà, kagodaw takay? Awaɲ, gəgod à akul, ama mavàhla la uwana gəsəlla à waɲ.
- <sup>52</sup>Dahàw haɲkəli, dagay lakana, huɔ gày aɲa dza uwana atà zlo la kay, tadətsak kəla azladza makər tadəhamay à azladza səla à gəl, ɲgaha səla adəham à makər à gəl.
- <sup>53</sup>Baba adəgola afad à bəzi aɲha à gəl, iyà babay adəgola afad à dugu aɲha à gəl, dugu bay adəgola afad à iyà à gəl. Dzedzi misga adəgola afad à kuhuwə aɲha à gəl, ɲgaha kuhuwə aɲha babay adəgola afad à dzedzi aɲha misga à gəl."
- <sup>54</sup>Kiya uwaga Yesu agòd à maham à ahəɲ dza aya: "La mok uwana kanəɲaw habaga atsa à afik la matəd à ahəɲ afats, katskats kagodaw kà: 'Iyaw adəsaway', uwaga apakàhə vok, haday.
- <sup>55</sup>Baɲa kanəɲaw afad adəday la gəl la aku, 'Aɲuf adəgay la ahəɲ', kagodaw, uwaga bay kà apakàhə vok, haday.

<sup>56</sup>Kay, akul kà akul azlaməna magolla dza, kasəlaw mavəh məlo uwana ala la vədəh, ŋgaha la uwana la zagəla, ŋgaha ma kà mana katsənaw godega aŋa məlo uwanay lakana aw zlà ma?"

<sup>57</sup>"Kà mana akul la gel aŋkul kadəhaw vok seriya à vok aŋkul à gəl kà madz à ahəŋ la dziriga la abà aw ma?"

<sup>58</sup>Baŋa dza apuwà à ka gudzi à gəl kà, la mok uwana akul à tetəvi la ama, kadaw à huma seriya akul səla kà, wəd' vok à uda kà akul aŋa matsən vok gay səla, ŋgaha kà masla aŋa maf ka à ahəl aŋa masla seriya aw, ŋgaha bay kà masla seriya aŋa maf ka à ahəl aŋa azlaslodzi aw, ŋgaha kà azlaslodzi babay aŋa maduw ka à daŋay aw.

<sup>59</sup>La dziriga gəpəh à ka kà, kadàsa à uda la abatà aw, say baŋa katsatsakwəh azlamatəm à ahəŋ sili aŋak à waŋ gesina dadəŋ!"

### Luka 13

<sup>1</sup>La kaslà uwatà, azladza anik tasà à waŋ kà mapəh à Yesu gay lakəl aŋa azla Galili, uwana Pilatus akəd' atà, à mok uwana tahəd kà maf tatak aŋatà à slaka mav tatak à Zəzagəla.

<sup>2</sup>Yesu agəd' à atà: "Hadəy, ma kadzugwaw ma azla Galili uwaga ma: 'Tadəhəŋ mawisiga uwana aduwa aŋa azla Galili anik uwanay,' kagodəw takay?"

<sup>3</sup>Awaŋ, gəgod' à akul gesina, baŋa kapəhaw gay la ləv ala aw kà, akul gesina kadəzahawla bokuba aŋatà babay.

<sup>4</sup>Iyay zlà, azladza kulo gəl aŋha mtəgis uwana məŋ gəy la gudəŋ Silowe atəd' à gəl, adzaməhà atà ala ma, akul ma, la madzugway aŋkul ma, azlaməna tsakana taduwa azlaməna gudəŋ Urusalima anik kagodəw takay?"

<sup>5</sup>Kay! Awaŋ, gəgod' à akul, ama baŋa kapəhaw gay la ləv ala aw kà, akul gesina kadəmatasaw à gay bokuba atà babay."

<sup>6</sup>Kiya uwaga Yesu apəh à atà gay la gay la abà uwanay la magodəy: "Dza anik la ahəŋ, gudəv la guf matavəruk aŋha la abà. Masla atsizlla ala, ahəd kà mayəh mayyay la vok aŋha, ama abəzal aw.

<sup>7</sup>Masla à dza aŋa guf, agod' à masla mapəs guf aŋha: 'Kay, nəŋəŋ tsi, dagay mavay makər gəsəhà waŋ kà mayəh mayyay la vok aŋha, ama gəbəzal aw, adadza à slaka à gəl deyday, kiya kà, gəkəsay aya aw, nàts à ahəŋ.'

<sup>8</sup>Ama masla mapəs guf agodəl: 'Məŋga gulo, kamkam, səkal la viya uwana aya, gədàla à tsəh aŋha gədətəkal vərəw à tsəh dadəŋ.

<sup>9</sup>Baŋa gədəfəhəŋ kiya uwaga kà, zlahaw kà adəyyay, nərəz tsərəh à kà vuɸ anik, baŋa ayya aw kà: Kadənatəts à ahəŋ!" "

<sup>10</sup>La vuɸ maduw ləv, vərđi anik, Yesu adzəkà matapla tatak à azladza la gəy madəv kuɸa la aku.

- 11**La abatà aga la ahəŋ mis masla dūvatsga, uwana agà makəlàh à vədàh gə dagay mavay kulo gəl aŋha mtəgis. Masasədok mawisiga adakalahal gay à vok, aslàlla à vok aŋa matsizlla ala aw.
- 12**Mok uwana Yesu anəŋà mis uwaga azàlal la magodàl: "Lagwa kà, wūr ala la dūvats aŋak la abà!"
- 13**Abəkàl ahàl à gəl, ŋgaha la katskats, mis atsizlla ala, ŋgaha adzəkà mazləb Zəzagəla la matsəkay.
- 14**Ama məŋga aŋa gày madəv kudà kà, gəl akədàl à vok, ləv avàlal à gay kà mawur dza ala uwana Yesu awurəŋ ala vuđ maduw ləv. Agòđ à maham à ahəŋ dza: "Mavakay mukwa la ahəŋ la tsəh aŋa kasukwa, à uwana dza aslala vok aŋa madàh sləray. Sàhàwwàŋ, tawarakulla la azlamavakay uwaga la tsəh, awkà kasawwaŋ kà mawarakulla la mavakay maduw ləv aw!"
- 15**"Iyay", Sufəl Yesu agòđ à atà: "Akul azlaməna magolla dza, kəla uwabeyuwi aŋkul ma apàlàh sla aŋha ala baŋaw ziwŋŋu aŋha ala la vuđ maduw ləv kà madla atà à iyaw à abà aw takay?"
- 16**Ŋgaha ma baməraka mis mayyi à tsəh ala aŋa Abəraham, uwana tak seteni adatsiŋ à sasala aŋha à abà mavay kulo gəl aŋha mtəgis, ŋgaha ma azlayla kà vok aŋa mapələŋ ala la sasala aŋha la abà la vuđ maduw ləv aw takay?"
- 17**Mawul à uda aŋa Yesu uwaga akəlla ziruwi à azlaməna məzam aŋha à gəl gesina; ama maham à ahəŋ dza tagà la marabay məŋga kà azlasləray nadzipo uwana Yesu adàhàhàŋ.
- 18**Apəh à atà gay la gay la abà anik, agòđ à atà: "La mana makoray Zəzagəla adəbani vok ma? La mana à uwana gəgagazləla ma?"
- 19**Yesu agòđ: "Makoray Zəzagəla kà, gəgagazləla la tsəhay hamadz uwana atsà à uda la lig gày aŋa dza: Azigənay, apaka magol ahàf, tsərəh à uwana azladīyaŋ tasaha à waŋ kà maŋalàh gày aŋatà à afik."
- 20**Kiya uwaga Yesu agòđ à atà aya: "La mana gəgagazləla makoray Zəzagəla ma?"
- 21**Makoray Zəzagəla kà kalkal la tatak maməsl tatak ala, uwana mis akotsəŋ à pəhàw dogum zlo à tsəh, uwana adàh kilo dzik səla gəl aŋha səla, tsərəh à uwana aməsl magol pəhàw uwaga ala gesina."
- 22**La maday aŋha la abà à Yesu kà, aguwàhà à uda la azlaməŋ gudəŋ la abà, la azlabəza gudəŋ la abà gesina, ŋgaha la matapla tatak à azladza la tetəvi aŋa maday à Urusalima la ama.
- 23**Kiya uwaga dza anik anav: "Məŋga, kà mana azladza ŋuv pəra tadəbəlay ma?" Ama Yesu agòđ à atà:
- 24**"Wàdàw vok à uda kà mad à gày la gamagày slərkuťkuťsga uwaga; la paraka gəpəh à akul kà, azladza aŋuvaw tadəyah aŋa mad à gày la abatà, ama tadəslay aw."

<sup>25</sup>Agòd à atà: "La mok uwana zil gày adatsizlla ala adatsak à gamagày à ama kà, akul uwana la uda kadàdzawka mazalahay la magoday: 'Sufəl, Sufəl, pèzl anu à ama ala.' Ama masla adàtsizlla ala, adàgod' à akul: 'Akul gesina uwaga, gəsəl slaka uwana kaguwàŋ la abà aw, gəsəl akul aw.'

<sup>26</sup>Ŋgaha kadàgodawwal: 'Məzàw tatak məsàh tatak gesina kà la slaka gà anina, ŋgaha aya katàpàhànula tatak la azlagudəŋ gami la abà.'

<sup>27</sup>Ŋgaha aya adàgod' à akul: 'Gəsəl akul aw, gəsəl slaka uwana kaguwàŋ la abà aw, zàw gi vok akul gesina aŋkul, uwana kadàhàw mawisiga.'

<sup>28</sup>La abatà la uwana kadàtawaw, la mapad' slid' la tsəh ala tərawawa, la mok uwana kadànəŋaw Abəraham, Isak, Yakuba, ŋgaha la azlaməna mapəh à atà gay à ahəl, kà mapàh à azladza gesina la makoray Zəzagəla, tekedika akul kà akul mawits akul à uda gà.

<sup>29</sup>Ŋgaha aya kà, azladza tadàsa à waŋ la tsəh la ahəŋ, la matəf' à ahəŋ afats, la mas à afik afats ŋgaha la gəl la aku bay. Ŋgaha atà tadàbəzal slaka madza madzay la tatak may lakəl la makoray aŋa Sufəl Zəzagəla.

<sup>30</sup>Kiya uwaga azlaanik la tataka azlaməna huma la abà, tadàgay azlaməna lig, ŋgaha azlaanik la tataka azlaməna lig la abà bay kà, tadàgay azlaməna huma."

<sup>31</sup>La kaslà uwatà kà, azla Farisəya anik tazà vok à slaka Yesu, ŋgaha tagòd'al: "Dà aŋak la abanay. Hād à slaka anik kà uwana Herod asal makəf' ka!"

<sup>32</sup>Ŋgaha Yesu agòd' à atà: "Dàw, kadàpəhaw à hayyàŋ uwaga kà kiya uwanay: Aganay gəkudəkàh azlamasasəfok mawisiga la mawar azladza ala lakana, lebəŋ, ama la mavakay makər aŋha kà gədàkəf' gəl à sləray gulo.

<sup>33</sup>Ama kəla kà, say gətsizlla ala lakana, lebəŋ, la vud' uwahà, kà uwana akəsa vok kà aŋa masla mapəhal gay à ahəl aŋa Zəzagəla aŋa maməts à uda aŋa hud' gudəŋ Urusalima aw, say la hud' gudəŋ Urusalima kəla."

<sup>34</sup>"Urusalima, Urusalima kak la uwana kakàdàh azlaməna mapəh à atà gay à ahəl aŋa Zəzagəla, uwana aslālàh kà atà à waŋ gesina. Asik dəŋ gədayahah maham gay à azladza aŋak à vok la slaka gula, bokuba gotsak uwana ayàh maham gay azlabəza aŋha à vok, la tsəh gogozlāh aŋha. Ama kakəsàw aw.

<sup>35</sup>Haday, lagwa kà, gày aŋkul adàpak ŋvagay. Ama gi kà, gəpəh à akul la dziriga kà, akul kadànəŋaw gi, tsərəh à kaslà uwana kadàgodaw kà: 'Zəzagəla apis gay à dza uwana à vok, atsa à waŋ la sləm aŋa Sufəl Zəzagəla', aw."

## Luka 14

<sup>1</sup>Vərdi anik, Yesu ahād à mtəga aŋa tekula aŋa məŋga aŋa azla Farisəya la vud' maduw ləv, kà mazuw tatak may. Azladza uwana la abatà, tanə̀̀z Yesu lela.

<sup>2</sup>Dza anik la ahəŋ uwana makəsl və̀̀dàh gà la abatà la huma aŋha.

- <sup>3</sup>Yesu apèh gay à azlaməŋga aŋa azlaməna mapəhla mapəhay ala la azla Farisəya: "Wakità mapəhay gami ma avà tetəvi kà mawur dza ala la vuɸ maduw ləv takay?"
- <sup>4</sup>Ama asà à atà mawulla gay à uda aw. Kiya uwaga abək ahəl à masla dūvats à gəl, awurəŋ ala, ŋgaha asək à dza uwatà, adà aŋha.
- <sup>5</sup>Yesu agòɸ à atà: "Uwa à uwana bəzi aŋha aŋkaw kokur aŋha atəɸ à suwa à abà ma la vuɸ maduw ləv kà, azəb à uda aw uwi?"
- <sup>6</sup>Dza la ahəŋ aslələ vok kà mawulla gay à uda lakəl aŋa uwaga aw.
- <sup>7</sup>Iyay, la abatà Yesu anərəz mayahani slaka aŋa azladza uwana tazəläh atà à maham gay à vok à abà. Tayahay kà azlaslaka delga. Kiya uwaga apèh à atà gay uwaga:
- <sup>8</sup>"Baŋa dza azàla ka à madəvaday mazəb mis à abà kà, kayəh slaka madza madzay delga gə dadəŋ aw. Zlahaw dza anik la ahəŋ, à uwana tazələl à madəvaday uwaga à abà, adūwa ka bay ma?"
- <sup>9</sup>Ŋgaha kà pəra masla mazalləh akul atsa à waŋ, agòɸ à ka: 'Kona, səkla slaka uwaga à dza uwanay.' La abatà kà, kak kà magol ziruwi adahama ka à gəl kà matsizlla ala la huma, kà mad à lig.
- <sup>10</sup>Ama baŋa tazàla ka kiya uwaga kà: Həd, kadza aŋak à madzay la lig. Kà uwana la mok uwana masla mazalləh akul adàda à awtəy kà, adəgòɸ à ka: 'Slawda, kak kà, zə vok à huma à gay la abanay', la abatà kà, kà aŋak kà adəgay dzəba aŋha səla aw la huma azladza uwaga gesina, kà kak aŋa mad à huma à gay.
- <sup>11</sup>Kà uwana kəla uwabeyuwi uwana azigəŋ gəl aŋha kà, tadəwulla ala à lig. Ŋgaha dza uwana awulla gəl à vəɸah kà, tadədalla à huma."
- <sup>12</sup>Kiya uwaga Yesu agòɸ à dza uwana, azəläh babay: "Iyay zlà, baŋa kavà tatak may, baŋaw kata kaf à uda kà, kazəlləh azlaslawda aŋak la azladedə aŋak, baŋaw la azlayaga aŋak, la azlaməna magay aŋak, uwana azlagalepiga pəra aw. Way kà atà babay kà tadəzalla ka vərđi anik, kà mazuw tatak, kà uwana baŋa tazàla ka kà bokuba tapəlla ka uwana à abà tazəw la mtəga anak suwaŋ.
- <sup>13</sup>Ama baŋa kat kaf à uda kà, zəläh kà azlaməna kuɸa, azlamagodu, azladeri ŋgaha la azlaguləf pəra.
- <sup>14</sup>Kità kà, kadəgay la marabay, kà uwana atà kà taslala vok aŋa mapəlla ka à abà aw. Uwaga kà Zəzagəla la uwana adəpəlla ka à abà la mavakay uwana adəwulla azladza dziriga à uda la mamətsay."
- <sup>15</sup>Mok uwana tatsəŋ gay uwaga kà, tekula la tataka aŋa azladza uwana la tatak may la adi, agòɸ à Yesu: "Tsa kətà kà, marabay agay la dza uwana adəzuw tatak may aŋha la makoray aŋa Zəzagəla!"
- <sup>16</sup>Yesu agòɸ à atà: "Dza anik la ahəŋ, atà magol kaf à uda, ŋgaha azəläh azladza aŋuvaw.

- 17**La mok uwana tatak adahənyà kà, asləl magamza aṅha kà mazalàh azladza uwana tapàh à atà: 'Sàw à waṅ, sàw à waṅ adagay, kà uwana tatak may kà adahənyà!'
- 18**Ama gesina aṅatà tadzəkà manav kamkam la tekula tekula. Matera agòd' à magamza: 'Gi, gəsùkw guf kà, asa à gi, gəday kà manəṅəṅ, kamkam bàsgəṅ.'
- 19**Kiya uwaga masəla agòd' aya: 'Gəsùkw sla səduk zlo, gəday gədàgurla atà sləray, kamkam bàsgəṅ.'
- 20**Ŋgaha anik agòd' aya suwaṅ: 'Gi kà, gədazəb mis kà bà lagwa lagwa, kà uwaga à uwana gəslala vok aṅa manəf ka aw pəra.'
- 21**Kiya uwaga magamza awùl à slaka məṅga aṅha, apəhal uwana tapàhal gesina. La abatà kà, zil gày apək ləv, la magod'ay à magamza aṅha: 'Hàd, katskats à azlavadavaday à afik, la azlagay barama à ama la hud' gudəṅ la abà, ṅgaha hàd kasəlla azlaməna kudà à waṅ, la azlamagodu, la azlaguləf ṅgaha la azladeri gesina!'
- 22**Zwek la huma, uwana uwaga adad'aha vok kà, magamza asà à waṅ agòd' à məṅga aṅha: 'Məṅga, uwana kapəh kà, ad'ahà vok, ama slaka atamà à ahəṅ bà gotənaṅ aya.'
- 23**Kiya uwaga məṅga agòd' à magamza aṅha: 'Lagwa kà, dàh à azlabəza mazləramàh tetəvi à ama, la azlalig zlagam, fàh à atà gasa à gəl, kà masəlla atà à waṅ kà aṅa mahənlà aṅa gày gulo!
- 24**Ndzer, gəpəh à akul la dziriga kà, azlauwana gəzàl'ah atà takwès'ah kà, tetuwa tadàtap tatak may gulo tetuwa aw.' “
- 25**Maham à ahəṅ dza aṅuvaw tanəfà Yesu la tsəh. Yesu agòla vok, ṅgaha agòd' à atà:
- 26**"Baṅa dza asal, manəf gi kà, say apəsew baba aṅha, la iyà aṅha, la mis aṅha, la azlabəza aṅha, la azladedà aṅha ṅgaha amiyaka gəl aṅha dadàṅ. Tsa baṅa kiya uwaga aw kà, aslala vok aṅa magay masla matapla la slaka gulo aw.
- 27**Kəla dza uwana akəs mamətsay aṅha, ṅgaha anəf gi aw kà, aslala vok aṅa magay masla matapla la slaka gulo aw.
- 28**Baṅa dza asal maṅal magol gày kà, say adza madzay dadàṅ, atugw tatak uwana adàziṅ ala gesina dadàṅ. Baṅa sili aslay kà mahənləṅ ala, la uwana adzəka sləray.
- 29**Awkà baṅa adzəka maf godega à gày à ahəṅ pəra, uwala à adàhəṅəṅ ala aw kà, kəla dza uwana adàṅəṅ gày uwana ahənlà aw kà, tadàdzəka makəf'aslal.
- 30**Tadàgod'ay: 'Nəṅ'aw tsi, kona uwanay tsi: Adzəkà maṅal magol gày, uwala aslala vok aṅa mahəṅəṅ ala aw tsi!'
- 31**Kiya uwaga babay la sufəl uwana asal map guvəl la sufəl anik kà, say adza madzay dadàṅ, kà manə'əzay à baṅa dza dəbow kulo aslala vok aṅa map guvəl la dza dəbow dzik səla.
- 32**Baṅa aslay aw kà, tsa sufəl anik uwanay aləg kərkə' dadàṅ kà, say asləl gay kà manav masəl vok atà səla.”

<sup>33</sup>Yesu agòd kiya uwaga babay zlà: "Baŋa dza apəsew tatak aŋha gesina aw kà, aslala vok aŋa magay masla matapla la slaka gulo aw!"

<sup>34</sup>"La hadəy gà kà, slugul kà tatak delga. Ama baŋa azladəy aya aw ma, kakay dza azladəŋ ma?"

<sup>35</sup>Uwaga akəsa vok baməraka aŋa kutso aw, ŋgaha bay apək arəguwa babay aw. Uwaga kà say maftukw ala pəra. Dza uwana sləm lakəl kà atsəbal sləm lela zlà!"

## Luka 15

<sup>1</sup>La abatà azlaməna mazəb hadama la azladza anik uwana madz à ahəŋ aŋatà kà lela aw kà, tazà vok à slaka Yesu kà matsəbal sləm.

<sup>2</sup>Azla Farisəya la azlaməna mapəhla mapəhay ala taŋoŋuz à tsəh ala kà atà kà atà la magodəy: "Nəŋaw, konnay akəs azlaməna tsakana kà la ahəl səla tsi, ŋgaha tazùw tatak may la slaka gà la atà nna tsi."

<sup>3</sup>Kiya uwaga Yesu apəh à atà gay la gay la abà uwanay, agòd à atà:

<sup>4</sup>"Uwa la tataka aŋkul la abà uwana akor tuwaŋ dzim, ŋgaha tekula aŋatà azila à ama, asak à dzik ladəga gəl aŋha ladəga gə uwanay la fəta, kà masla aŋa mad mayəh tekula gə uwaga tsərəh à uwana abəzal aw uwi?"

<sup>5</sup>Mok uwana adabəz tuwaŋ aŋha kà arabay, akəsay, af à kuda.

<sup>6</sup>Mok uwana adà à mtəga kà, adzəka mazaləh azlaslawda aŋha la azlaməna magay aŋha, la magod à atà: 'Mərəb anina, kà uwana gədabəzal tuwaŋ gulo uwana azalà.'

<sup>7</sup>Kiya uwaga babay gəgod à akul kà, marabay məŋga adəgay la zagəla la afik, kà aŋa masla tsakana tekula uwana apəh gay la ləv ala, aduwa dza dzik ladəga gəl aŋha ladəga gə uwanay, uwana: 'Anu azladziriga', tagod."

<sup>8</sup>"Awma mis ma uwala à uwana akor gursu kulo, ŋgaha tekula azilə à ama, kadzugwaw ma, avats fənəs, aslad gəy, ŋgaha ayahay la haŋkəli, tsərəh à uwana abəzal aw takay?"

<sup>9</sup>Mok uwana adabəzal gursu aŋha kà, azəlləh azlaslawda aŋha la azlamatetegi aŋha gesina, ŋgaha agod à atà: 'Mərəb anina, kà uwana gursu gulo uwana azalà kà gədabəzal adagay!'

<sup>10</sup>Kiya uwaga babay, gəgod à akul kà, marabay adagay la zagəla la afik, la slaka azlamalika aŋa Zəzagəla, kà mapəh gay la ləv ala aŋa masla tsakana tekula, uwana atsà à huma aŋa Zəzagəla."

<sup>11</sup>Kiya uwaga Yesu agòd aya: "Dza anik la ahəŋ agə la azlabəza səla."

<sup>12</sup>Kiya uwaga, mabəziga bəziga agòd à baba aŋha: 'Baba və à gi humə ləmana, uwana adəgay aŋulo!' Kiya uwaga baba avahə ləmana à azlabəza aŋha səla ala."



- 13**Mok uwana adahëni à ahëŋ ɲuv, mabëziga bëziga adàw humà makoray aŋha ala, adà aŋha kërker la sili gà. La abatà azà sili aŋha ala la magogotsay aŋa gudëŋ à vok la abà gesina.
- 14**Kiya uwaga, mok uwana adakëf tatak aŋha gesina kà, magol may adzëkà vok la gudëŋ uwatà la abà, ɲgaha adzëkà mawoy tatak, ama tatak la ahëŋ aw.
- 15**Masla ahàd à mtëga dza anik aŋa gudëŋ uwatà la abà uwana aslël à guf aŋha à abà kà manëŋla azlanamzi.
- 16**Masla kà ayàh kà bà mahën hud' aŋha ala, la azlamaholahola uwana azlanamzi tapadáy, ama dza la ahëŋ avàl aw.
- 17**Tëh, awùlal à gël lakël aŋa madz à ahëŋ aŋha uwana uwarà, agòd: 'Azlamëna slëray aŋa baba gulo kà tatak may aduwa atà, ama gi kà, masla la uwanay gëmëtsay kà may ma, kakay ma?
- 18**Lagwa kà, ɲulëm, gëda à mtëga baba gulo gëdàgòdál: Baba, kamkam gëdàhà mawisiga à Zëzagëla à vok, ɲgaha à kak à vok bay.
- 19**Baba, lagwa kà, azlayla kà vok kà mazal gi ala bëzi aŋak aya aw! Ama lagwa kà, fà à gi à ahëŋ bokuba gi magamza aŋak!'
- 20**La abatà kà atsizilla ala, kà mad à mtëga baba aŋha." "Mok uwana alëg kërker la gày aŋa baba aŋha kà, baba aŋha anëŋàŋ kà, atsa à waŋ. ɲgaha vok ahamàl kaykay. Hadzak, asà à afik, atsëdál à ama, avàl kà, akësà vok la marabay.
- 21**Bëzi uwaga agòdál: 'Baba, kamkam gëdàhà mawisiga à Zëzagëla à vok, ɲgaha à kak à vok. Lagwa kà, azlayla kà vok kà mazalgëla bëzi aŋak aya aw!'
- 22**Ama baba agòd' à azlamagamza aŋha: 'Katskats, sàwla dawara delga à waŋ, kaduwal à vok; fàwwal dzedà à ahàl, bëkàwwal kwimik à asik.
- 23**Lagwa kësàw vëlik magagseyga à waŋ, kakëdàw, mëpàd' ɲgaha mëràb,
- 24**kà uwana bëzi gulo uwana agà bokuba mamëtsayga kà aganay, adawul à uda la sifa aya, azalà, ama adagay mabëzalga.' ɲgaha kiya uwaga tadzëkà marabay."
- 25**"Tekedíka magol bëzi aŋha kà, agà la fëta. La mok uwana atsà à waŋ la fëta, uwana adagay nekwa la gày kà, atsënà talakway la azladës la madëvaday gesina.
- 26**Magol bëzi uwaga azàla magamza tekula, anàvalla gay ala: 'Mana ma à uwaga adadzëka vok la mtëga gami ma?'
- 27**Kiya uwaga magamza agòdál: 'Deda aŋak kà adawul à waŋ. Masla gà la uwaga, baba aŋak akëd' vëlik magagseyga uwatà, kà uwana awùlla à waŋ la wurwur.'
- 28**Nëŋ, adzëkà mapak lëv, ɲgaha akës mad à gày aya aw. Kiya uwaga baba aŋha asà à uda, adëval kudá kà mad à gày.

<sup>29</sup>Ama masla agòd à baba aṅha: 'Baba, mavay dɛṅ à uwana gi la slaka aṅak, didi gɛdakweska mapəhay aṅak aw. Ama bà məzezak babay kà, kavà à gi aṅa marabla la azlamanalay gulo aw!

<sup>30</sup>Ama baṅa kà aṅa bəzi aṅak uwanay adadadas tatak aṅak ala la zlapay la tsəh, ṅgaha adawulla à waṅ kà, kakəɖal vɛlik uwana mɛgagsàṅ aya ma kà mana ma?'

<sup>31</sup>Ama baba agòɖal: 'Bəzi gulo, iyay, kak la ahəṅ koksikoksi la gi, gəsəl. Kasəl kà, dèwdèw tatak uwana gəkoray kà uwaga kà aṅak aw takay?'

<sup>32</sup>Ama lakana kà, akəsà vok kà, məvalàh à zagəla, la mahab madəvaday, kà uwana deda aṅak uwana agà bokuba mamətsayga kà, aganay adawula à uda la sifa aya, azalà ṅgaha adagay mabəzalga aya kà uwaga à uwana mərəbay!'" "

## Luka 16

<sup>1</sup>Kiya uwaga Yesu agòd à azlaməna matapla la slaka aṅha aya: "Dza galepi gà la ahəṅ uwana agà la magamza lakəl aṅa ləmana aṅha gesina. Ḷgaha azladza tasàhàla gay uwana à waṅ, magamza aṅha uwaga adahəṅ la tatak aṅha.

<sup>2</sup>Məṅga aṅha azàlal, agòɖal: 'Mana ma à uwana gətsenəṅ lakəl aṅak ma? Iyay, tūgw à gi godega aṅa sləray aṅak lagonay, kà uwana kadàgay magamza gulo aya aw!'

<sup>3</sup>Magamza adzugw la gel aṅha, agòd: 'Aga, məṅga gulo azəb gi à tatak aṅha lakəl ala ma, mana ma à uwana gəɖəhəṅ lagwa zlà ma? Mapəs guf, ndzəɖa gulo la ahəṅ aw. Matsatsàh tatak babay, ziruwi.

<sup>4</sup>Iyay, təga, gəsəl uwana gəɖəɖəhəṅ à mok uwana adàzəb gi à tatak aṅha lakəl ala. Azladza la ahəṅ à uwana tadàfa à gi à ahəṅ à mtəga aṅatà.'

<sup>5</sup>Kiya uwaga azàlàh azladza uwana goder aṅa məṅga aṅha agàhà à atà la vok tekula, tekula. Agòd à matera: 'Nna à goder aṅa məṅga gulo, uwana agà kà la vok ma?'

<sup>6</sup>'Amàl kuvu gəṅgəṅ dzim', agòɖal. Magamza agòɖal: 'Wakità aṅa goder aṅak kà, aganay, dzà madzay katskats, katsetser gəṅgəṅ dzik zlo!'

<sup>7</sup>Ḷgaha anavà dza anik aya: 'Kak ma, nna aga kà la vok ma?' 'Nalkama nesesa dadərmokw zlo.' Magamza agòɖal: 'Kak bay kà, aganay à wakità aṅa goder aṅak: Tsetsèr dadərmokw ufad!'

<sup>8</sup>Kiya uwaga məṅga aṅha, azləbà magamza kaskasga uwana adàhà uwaga gesina la dɛmɖem, kà uwana azladza aṅa gudəṅ à vok lakana taduwa à azladza aṅa udàka la katskats la sləray aṅatà la abà."

<sup>9</sup>Yesu azàlàn à gəl, agòd à atà: "Kəsàw vok slawda la azlaləmana aṅa gudəṅ à vok uwanay, ṅgaha kà vud uwana kadàbəzaw à tatak aw kà, tadəkəs akul à slaka madz à ahəṅ, uwana adəv à gay aw.

<sup>10</sup>Kà uwana dza uwana dziriga la azləbəza tatak la abà kà, masla kà dziriga la azlaməṅ tatak la abà babay. Ḷgaha dza uwana kaskas la azləbəza tatak la abà kà, masla kaskas la azlaməṅ tatak la abà bay.

- 11**Tsa baŋa akul kagaw dziriga la tatak uwana la abà, tafà à akul à ahàl la gudəŋ uwanay la vok aw, ma uwa à uwana adàfa à akul ləmana dziriga à ahàl zlà ma uwa?
- 12**Baŋa akul kagaw dziriga la ləmana aŋa azladza anik aw, ma uwa à uwana aslala vok mav à akul ləmana aŋkul uwa?"
- 13**"Kiya uwaga dza la ahəŋ atsəp azlaməŋga səla à huma à gay aw: Apəsew anik, ŋgaha akəs gay aŋa anik; awoy anik, ŋgaha akweska anik. Kiya uwaga babay zlà, kaslawwalla vok kà matsəp Zəzagəla à huma la sili aw."
- 14**Azla Farisəya tatsənà gay uwaga gesina, takədàsl à Yesu, kà uwana atà kà, azlaməna mawoy sili məŋga.
- 15**Kiya uwaga Yesu agòd à atà: "Akul kà: 'Anu azladza dziriga', kagodaw la huma aŋa azladza la madàh gasa. Ama Zəzagəla asəl madzugway aŋkul. Uwana azladza tanəwəz bokuba tatak məŋga gə kà, la huma Zəzagəla, kà uwaga kà bokuba tatak deydayga pəra."
- 16**"Azlaməna mapəh à atà gay à ahàl la azlamapəhay aŋa Musa tapəh gay lakəl aŋa makoray Zəzagəla tsərəh à kaslà aŋa Yuhana masla madàh batem. Dagay la mok uwatà kà, kəla uwabeyuwi adàh gasa kà mad à makoray Zəzagəla à abà.
- 17**Zagəla la kutso kà adəv à gay la butu, à kà matədla aŋa mapəhay ŋuvga la wakità Zəzagəla la abà."
- 18**"Kəla dza uwana akudək mis aŋha, ŋgaha azəb anik kà adada à gəl gaw, ŋgaha dza uwana azəb mis uwana zil aŋha akudəkay babay kà, adada à gəl gaw suwaŋ."
- 19**"Dza galepi anik la ahəŋ, uwana atsakwàh à diri mativga à abà uwana tsakalay aŋatà kà zlazladà. Masla kà adzàhà à ahəŋ kà say la matsiday la abà pəra.
- 20**La abatà kà, masla kudà anik la ahəŋ uwana sləm aŋha Lazar. Vok aŋha gesina kà bə amik amik tsatsabasla. Adzàhà à ahəŋ la slaka mahən à ahəŋ la gay gamagày aŋa galepi.
- 21**Asal mahən huɸ aŋha ala la azlatatak may mapətsəh pətsəhga, uwana atəd à ahəŋ la table aŋa galepi uwaga la afik, ama aslà aw. Ŋgaha aya kà, azlakəda tasàhà à waŋ kà mamətədàh amik aŋha uwaga la abatà kà, azàhəŋ kaykay.
- 22**Masla kudà uwatà aməts, ŋgaha azlamalika tasà à waŋ, tazəb masla, tadàlla à slaka Abəraham la zagəla. La lig la ahəŋ kà, galepi uwaga aməts suwaŋ, talà, tatùw lela.
- 23**Galepi uwaga kà asà ŋgərpa məŋga la mezewi. La matərəbay aŋha la abà kà, anəŋà à zagəla kərkər kà, anəŋà Abəraham la Lazar la slələf aŋha lakəl.
- 24**Ŋgaha masla adzəkà mazalahal la magoday: 'Baba Abəraham, vok ahamà ka kà gi, sləl Lazar à waŋ, atəp gay gəl ahàl aŋha à iyaw abà, kà matasgəla alàh gulo, kà uwana gəs ŋgərpa məŋga la gày akàl uwanay la abà.'

<sup>25</sup>Ama Abərahām agòdál: 'Iyay bəzi gulo, dzùgw tsi, kazùw matsidəy la mok uwana kaləg la sifa, ama Lazar kà asà ngərpa mənğa. Lagonay kà, adabəz à matsidəy suwaŋ la abanay, ngaha kà kak, kadabəd à matərəbay à abà.

<sup>26</sup>Ŋgaha aya kà, la tataka gami la abà la akul kà, magol afək zəŋzəŋga la ahəŋ; avahanula. Azladza uwana la slaka gami la abanay taslala vok aŋa mad à uda à slaka aŋkul aw, ngaha azlauwana la slaka aŋkul taslala vok aŋa mas à gay babay à slaka gami aw.'

<sup>27</sup>Galepi agòd: 'Kamkam, baba Abərahām, sləl Lazar à mtəga baba gulo,

<sup>28</sup>kà uwana azladeda gulo la ahəŋ zlo aya, kà masla aŋa mapəh à atà à vok à abà, kà atà aŋa mas à waŋ à slaka uwanay gi la abà aw.'

<sup>29</sup>Ama Abərahām agòdál: 'Musa la azlaməna mapəh à atà gay à ahəl kà tapəh à atà. Say takəs gay aŋatà pəra!'

<sup>30</sup>Galepi agòdál: 'Awaŋ, baba Abərahām, diga aw. Ama baŋa dza awul à uda la mamətsay, ahəd, la uwana tadəkəs gay aŋha, ngaha tadəpəh gay la ləv ala.'

<sup>31</sup>Kiya uwaga Abərahām agòdál: 'Baŋa tatsəna gay aŋa Musa la azlaməna mapəh à atà gay à ahəl anik aw kà, amiyaka bə dza uwana awùlla à uda la mamətsay, adəday babay kà, tadətsən gay aŋha aw' ", kiya uwaga Yesu apəh à atà.

## Luka 17

<sup>1</sup>Yesu agòd à azlaməna matapla la slaka aŋha: "Tatak uwana adədəhla azladza à tsakana à abà la ahəŋ koksikoksi. Ama ngərpa adəgay la dza, uwana adəh uwaga.

<sup>2</sup>Duləm tawadəl dzəgla à kuda, taduw à dərəv à abà, à kà uwana adukw tekula aŋa azlabəza uwanay à tsakana à abà.

<sup>3</sup>"Dahəw haŋkəli lela!" "Baŋa deda aŋak adəha tsakana kà, pəhal la tələmna; baŋa atuw lakəl aŋa tsakana aŋha kà, matsallaŋ ala.

<sup>4</sup>Baŋa adəhà à ka tsakana à vok asik mədəf la mavakay la tsəh, pəra kəla madəh tsakana kà, atsa à waŋ atuway lakəl aŋha kà, matsallaŋ ala gesina."

<sup>5</sup>Azlaməna matapla tagòd à Sufəl: "Zənula madiŋal gəl à vok gami à gəl!"

<sup>6</sup>Sufəl agòd à atà: "Agayŋa la madiŋal gəl à vok aŋkul à gay la ahəŋ bakət tsəhay hamadz kà, naka: "Bədə vok ala la abanay, həd kadətsəb vok à dərəv à abà!", kagodaw à gudəv kà, naka uwaga kà apakakulla vok, kà uwana akul la madiŋal gel à vok."

<sup>7</sup>"Uwa la tataka aŋkul la abà, à uwana magamza aŋha apəs guf baŋaw anəŋla azlatatak kà, la mok uwana adasa à waŋ la fəta kà: 'Sà à waŋ katskats, kadza à tatak may à gəl', agòdál uwa?

<sup>8</sup>Awaŋ, ama agòdál kà: "Dəh gi tatak may, bədəla lukut, kà mav à gi tatak may la tatak masay, la lig la ahəŋ kà pəra, kak kadədzəka mazuw tatak, la masay suwaŋ.'

- <sup>9</sup>Kagodaw ma, 'Kikay', agod à masla sləray uwana adəhalla kiya uwanay kagodaw takay? Awan, uwaga kà sləray aŋha.
- <sup>10</sup>Akul babay kà kiya uwaga: Mok uwana kadafahaw uwana tapəh à akul gesina kà, gòdāw kà: 'Anu azlaməna sləray deydayga pəra', gòdāw; 'Mədfahəŋ kà uwana uwaga kà, agay kà sləray gami pəra'."
- <sup>11</sup>La mok uwana Yesu adà à Urusalima kà, aguwa la gay makwi aŋa Samariya atà la Galili.
- <sup>12</sup>La kasla uwana masla azlādà à hudf gudəŋ anik à abà kà, azlaməna akəl zagəla kulo tagagam la masla. Tatsəzl à fəta à awtəy.
- <sup>13</sup>Ŋgaha tazà kuda à zagəla la mawiyay: "Yesu, məŋga, vok ahama ka kà anu!"
- <sup>14</sup>Masla anəzəz atà, agòd à atà: "Dəw kadəpəhawla vok aŋkul à azlaməna mav tatak à Zəzagəla!" La mok uwana atà la asik lakəl kà maday kà, tanəzəz vok aŋatà kà: Tawàrla.
- <sup>15</sup>Kiya uwaga tekula la tataka aŋatà la abà, uwana anəŋəŋ kà adawurla kà, awul à slaka Yesu la mazləb Zəzagəla la kuda zləkkà.
- <sup>16</sup>Atədf à makəla asik aŋha la magodəy: 'Kikay'. Masla kà tekefika zil Samariya.
- <sup>17</sup>Kiya uwaga Yesu agòd à atà: "Azladza kulo tawər ala aw takay? Atà la azlaladəga anik uwanay la?"
- <sup>18</sup>Dza la ahəŋ adzəgw kà mawul à awtəy kà mav kikay aw. Say məlok dza uwanay pəra."
- <sup>19</sup>Ŋgaha Yesu agòd à dza uwana awul à wəŋ: "Sà à afik, həd aŋak; madiŋal gəl à vok aŋak adawur ka ala!"
- <sup>20</sup>Azla Farisəya tanavà Yesu: "Mbà makoray Zəzagəla adəsa à wəŋ mi", tagòdāl. Yesu agòd à atà: "Makoray Zəzagəla kà, atsa à wəŋ la kiya uwanay aŋa manəŋəŋ la yewdi aw.
- <sup>21</sup>Ŋgaha dza aslala vok babay kà magodəy kà: 'Aganay la abanay, baŋaw agatəy la abatəy', tagodəy babay aw. Sələw kà, aganay la tataka aŋkul la abà à makoray Zəzagəla."
- <sup>22</sup>Masla agòd à azlaməna matapla la slaka aŋha: "Azlamavakay anik tadəsa à wəŋ à uwana kadəyahaw la iyaw tugwi kà manəŋ Kona aŋa dza bə à mavakay tekula, ama kadənəŋawwəŋ aya aw.
- <sup>23</sup>Ŋgaha azladza tadəgodəh à akul Kristu kà 'Aganay la abanay, baŋaw agatəy la abatəy.' Kakəsaw gay aŋatə aw, kadaw la abatə aw!
- <sup>24</sup>Kà uwana bokuba habaga uwana awutsədf à uda la ləv zagəla la abà, dagay la tsəh la ahəŋ tsərah à gəl à agu kà, la kiya uwaga adəpaka vok la wudf mas à wəŋ aŋa Kona aŋa dza babay.

- <sup>25</sup>Ama kəla kà say asa ɲgərpa mənɲa dadən, ɲgaha kà say azladza aɲa zamana uwanay takweska masla aya dadən.
- <sup>26</sup>Bokuba uwana apakàhà vok la zamana aɲa Nuhu kà, kiya uwaga à uwana adàpaka vok babay la mavakay aɲa Kona aɲa dza.
- <sup>27</sup>La zamana uwatà azladza tazàw, tasàh, tazàb mis, tavàh azladəgam aɲatà à zil, tsəràh à mavakay uwana Nuhu adà à kəslah iyaw à agu. Ama atà kà, tadzùgw tatak anik dikiɲiki tsəràh à uwana mazlaha asà à waɲ azàhà atà ala aw.
- <sup>28</sup>Apakà vok la zamana aɲa Lot bay kà kità: Tazàw, tasàh, tasàkwàh, tadàwàh ala, tasləkàh tatak, ɲgaha taɲàlàh azlagày aɲatà.
- <sup>29</sup>Ama la mavakay uwana Lot asà à uda la gudəɲ Sodom la abà kà, Zəzagəla aduw akàl à ahəɲ la zagəla uwana la abà, kadàh kà kadàh. ɲgaha azaha azladza ala gesina.
- <sup>30</sup>Adàpaka vok kalkal la uwaga la vuɔ mas à waɲ aɲa Kona aɲa dza babay.”
- <sup>31</sup>"Kiya uwaga babay la mavakay uwatà kà, dza uwana la gəl gày la afik kà, amiyaka kazlaɲa aɲha la kay kà, adàsa à ahəɲ kà mahəlay aw. ɲgaha babay kà, dza uwana la guf la abà kà, adàwul à mtəga babay aw.
- <sup>32</sup>Dzùgwàw lakəl aɲa mis aɲa Lot tsi.
- <sup>33</sup>Dza uwana ayàh matəf sifa aɲha kà, adàziɲ ala, ɲgaha dza uwana atùw sifa aɲha aw kà, adàtəfəɲ uwaga.
- <sup>34</sup>La dziriga gəpəh à akul: La vuɔ uwatà kà, azladza səla la kəslah tekula la afik kà, tekula tadàzəbɲay, tekula tadàsakal.
- <sup>35</sup>Azlamis səla la vəl tekula la afik kà, tekula adàzəbɲay, tekula tadàsakal.
- [<sup>36</sup>Aya kà, azlazil səla la guf tekula la abà, tekula tadàzəbɲay, ɲgaha tekula tadàsakal.]”
- <sup>37</sup>Kiya uwaga azlaməna matapla la slaka aɲha taɲàv: "Sufəl, uwaga ma adàpaka vok ma lala?" Masla agòɔ à atà: "La slaka uwana tatak mamatsayga la ahəɲ la uwana azlakwatsamu taham gay à vok la abatà."

## Luka 18

- <sup>1</sup>La lig la ahəɲ Yesu apəh à atà gay la gay la abà kà aɲa mapəhatàla kà masak à madəv kuɔa la tsəh ala la ahəɲ la maruw vok à ahəɲ aw.
- <sup>2</sup>"Masla seriya la ahəɲ la gudəɲ anik ahoy guba aɲa Zəzagəla aw, ɲgaha akəs gay aɲa dza babay aw.
- <sup>3</sup>La gudəɲ uwatà la abà babay kà, mis kuɔa anik la ahəɲ, asàh à waɲ à slaka aɲha la magòɔal: "Dàh à gi seriya la masla məzam gulo."
- <sup>4</sup>Asik dəɲ masla seriya akwesàhal à gəl, ama la lig la ahəɲ adzùgw la gəl aɲha: "La dziriga kà, guba az à gi kà aɲa Zəzagəla aw, gəkəs gay aɲa azladza aw.

- <sup>5</sup>Ama lagwa kà, mis kudà uwanay atərəb gi ayigəla kà, gədfàhla seriya aŋha ŋgaha masla aŋa masàh à waŋ aŋa mawis à gi gəl à vok aya aw.' “
- <sup>6</sup>Kiya uwaga Sufəl Yesu agòd: "Tsənàw uwana masla seriya mawisiga uwanay agòd tsi.
- <sup>7</sup>Kətà zlà ma, Zəzagəla kà adàdàh dziriga à azlauwana atsatsàmànì atà aw, kagodaw takay? Adàdàh dziriga à azlauwana tanàval tatak mavakay la mahəny gesina. Dgaha vok ahamàl kà atà babay aya.
- <sup>8</sup>Bà la dziri gəpəh à akul kà, adàdàh à atà dziriga la katskats. Tekedík ma, baŋa Kona aŋa dza adàsa à waŋ ma, adàbəz à madiŋal gəl à vok à gəl la vədàh takay?"
- <sup>9</sup>Uwana Yesu apəh gay la gay la abà uwanay kà, kà aŋa azladza anik, uwana tapakà gəl aŋatà ala kà: 'Anu azladza dziriga la huma Zəzagəla', tagòd, tapəsəw azladza anik.
- <sup>10</sup>"Azladza səla tatsizilla kà mad madəv kudà la məŋ gəy Zəzagəla la aku. Anik zil Farisəya, anik uwanay masla mazəb hadama.
- <sup>11</sup>Zil Farisəya atsizilla ala, adəv kudà la kiya uwanay: 'Sufəl Zəzagəla, kikay gəgod à ka, kà uwana gi kà, gi kiya azladza anik aw. Kà uwana atà kà: Azlaməna gəl, azlamawisiga, azlamabila! Zəzagəla, kikay gəgod à ka, kà uwana gi kà kiya masla mazəb hadama uwanay aw!
- <sup>12</sup>Dgaha aya kà, asik səla gəkəs nəlay la kasukwa la tsəh, kəla tatak gulo uwana gəbəzal kà, gəvəhay tekula la gay aŋa makulo gesina.'
- <sup>13</sup>Ama masla mazəb hadama atsizilla à fəta à awtəy, aslà kà madzək yewdi à zagəla aw, ama atatàsilla gay ləv: 'Sufəl Zəzagəla gulo, vok ahama ka kà gi, à gi uwana gi masla tsakana!'
- <sup>14</sup>Gəpəh à akul la dziriga kà, masla la uwana adà à mtəga la ləv sətakaga, à kà dza anik uwanay. Kà uwana kəla uwabeyuwi uwana azigən gəl aŋha kà tawulla à lig, ŋgaha kəla dza uwana awulla gəl aŋha à vədàh kà, Zəzagəla adàdalla à huma.”
- <sup>15</sup>Azladza tasàhla azlabəza à Yesu à waŋ, kà masla aŋa mapis à atà gay à vok, ŋgaha azlaməna matapla la slaka aŋha taslāh atà məl à gəl.
- <sup>16</sup>Ama Yesu azàla atà la magodəy: "Sàkàw azlabəza tasa à waŋ à slaka gulo, kavəraw atà ay aw, kà uwana makoray Zəzagəla kà aŋa azlatsəhay azlauwaga!
- <sup>17</sup>La dziriga gəpəh à akul: Kəla uwabeyuwi uwana akəs makoray aŋa Zəzagəla bokuba azlabəza uwanay aw kà, adàda à makoray Zəzagəla dikiđiki aw!"
- <sup>18</sup>Masiga anik aŋa azla Yahudiya anavà Yesu la magodəl: "Məŋga, kak delga, mana à delga gədehəŋ, kà gi aŋa mabəzal sifa adəv à gay aw ma?"
- <sup>19</sup>Yesu agòdəl: "Kà mana 'Kak delga', kagòd à gi ma? Dza delga la ahəŋ aw, say Zəzagəla kokudà gəl aŋha pəra delga.

- 20** Kasəl mapəhay uwana la wakità Zəzagəla la abà ay? Kada gəl gaw aw, kakəf dza aw, kada à gəl aw, kadàhà fida lakəl aña dza anik aw, ñgaha zləkàw baba aña la iyà aña!”
- 21** Kohana agòd: "Uwaga kà, dagay la bəziga la uwana gekəs uwaga gesina.”
- 22** Uwana Yesu adatsən uwaga kà, agòdál: "Lagwa kà, tatak tekula atəm à ka kà à ahəñ! Kəla tatak gesina uwana kakoray kà: Dàw ala, vàh à azlaməna kudà à uda gesina, ñgaha sà à wañ, kanəfa à gi, kadàbəz ləmana la zagəla!”
- 23** Ama mok uwana kohana atsən uwaga gesina kà, aməts à ahəñ la adi, kà uwana galepi.
- 24** Uwana Yesu anəñəñ kà, adapak ləv kà, agòd: "Hadəy gə, kà zlazladà kà dza galepi aña mad à makoray Zəzagəla.
- 25** Dulem zlugumi aguwa à uda la afik lepiri, kà dza galepi aña mad à makoray Zəzagəla.”
- 26** Kiya uwaga azlauwana tatsəbal sləm kà, tadzəkà magodəy: "Tsa aña kità ma, uwa à uwana aslala vok aña mabəlay zlə ma uwa?”
- 27** Yesu agòd: "La slaka azladza kà zlazladà, ama la slaka Zəzagəla kà zlazladà aw.”
- 28** Kiya uwaga Piyer agòdál: "Tsənəñ anu kà, mədəsək tatak uwana à ahəñ məkor gesina, kà manəf ka.”
- 29** Yesu agòd à atà: "Gəpəh à akul la dziriga kà, baña dza asək gəy aña à ahəñ, à mis aña à ahəñ, à azladedə aña ahəñ, à azlababa aña à ahəñ, à azlabəza aña à ahəñ kà makoray Zəzagəla kà,
- 30** dagay lakana la zamana uwanay adàbəz tatak aņuvaw, ñgaha la huma la gay aya kà, adàbəz sifa adəv gay aw aya!”
- 31** Yesu ahəl azlaməna matapla kulo gəl aña səla uwatà à tsəh, ñgaha agòd à atà: "Tsənəwwəñ, aganay mədàda à Urusalima, kà uwana la abatà la uwana tatak uwana azlaməna mapəh à atà gay à ahəl aña mapəh à azladza tatsətsər adəgəf à afik, lakəl aña Kona aña dza.
- 32** Tadəkəs masla, tadàvə à ahəl aña azladza uwana azla Yahudiya aw, atà tadəkədaslal, tadətsakal magodəhay à gəl la matafal slesliḃ à vok.
- 33** Tadəzlabəy la kurpi, tadəkəfəy. Dəgaha la mahənay maməkər kà, adəwul à uda la mamətsay.”
- 34** Ama azlaməna matapla tatsənə godega aña aw, kà uwana godega aña gay uwatà kà, ahədətəñ à adi, tasəl uwana Yesu apəh aw.
- 35** Uwana Yesu azləbəz gudəñ Yeriko kà, guləf anik madza madzay gə la gay tetəvi, atsətsəh tatak la abatà.



<sup>36</sup>Mok uwana atsənà dərükdərük aña maham à ahəŋ dza uwana tadà à awtày kà, katskats masla adzəkà manavay la magodáy: "Uwaga ma, mana ma aguwa ma?"

<sup>37</sup>Azladza tagòdál: "Yesu, zil Nazaret la uwana ada à awtày kiya uwaga la maham à ahəŋ dza la tsəh."

<sup>38</sup>Kiya uwaga adzəkà mawiyay la magodáy: "Yesu, Yesu, Kona aña David, vok ahama ka kà gi."

<sup>39</sup>Ama azladza uwana taguwà à huma taslähäl məl à gəl, "Dzà à ahəŋ titi!", tagòdál, ama azà kuda à zagəla la mawiyay aya: "Kona aña David vok ahama ka kà gi, gəgod à ka!"

<sup>40</sup>Kiya uwaga Yesu atsizilla à ahəŋ, "Səwgəla à waŋ!", agòd à atà. Mok uwana tadàlla guləf à slaka aña, anavà guləf la gay ala:

<sup>41</sup>"Mana asa à ka, kà gəđahəŋ ma?", Yesu agòdál. "Məŋga, asa à gi kà gənəŋla la yewdi gulo", guləf awulàlla.

<sup>42</sup>La abatà: "Nəŋ ala, madiŋal gəl à vok aña adawur ka ala!"

<sup>43</sup>Kiya uwaga, udək, anəŋla la kirim yewdi, ŋgaha anəfà Yesu la tsəh la mazləb Zəzagəla. Mok uwana maham à ahəŋ dza anəŋà uwaga kà, gesina aña tazləbà Zəzagəla.

## Luka 19

<sup>1</sup>Mok uwana Yesu adada à gudəŋ Yeriko kà, aguwa à uda la huđ gudəŋ la abà.

<sup>2</sup>Dza anik la ahəŋ, uwana sləm aña Zase la abatà, masla kà məŋga aña azlaməna mazəb hadama, ŋgaha galepi aya,

<sup>3</sup>ayəh manəŋ Yesu. "Uwa à Yesu uwatà uwi?", agòd, ama aslè aw, kà uwana maham à ahəŋ dza kà aŋuvaw, ŋgaha babay kà azigən aw, agòd à ahəŋ desl.

<sup>4</sup>Ahàd à huma à gay la mahoyay, ahàd à gudəv à afik, ŋgaha kà masla aña manəŋ Yesu, uwana aguwa à awtày la tetəvi uwatà.

<sup>5</sup>Ŋgaha mok uwana Yesu adabəz à tsəh aña kà, anəŋ à afik, agòdál: "Zase, sà à vədah katskats, kà uwana lakana kà, say gəda à mtəga aña!"

<sup>6</sup>Katskats asà à vədah, akəs Yesu la ahəl səla, kà mad à mtəga aña.

<sup>7</sup>Uwana azladza gesina tanəŋà masla kà, taŋəŋuz à tsəh ala, tagòd: "Kakay ada mahən à mtəga masla tsakana ma?"

<sup>8</sup>Zase asà à afik la huma aña Sufəl, agòdál: "Sufəl, tenma aña ləmana gulo kà, gəvəh à azlaməna kuda à uda gesina. Ŋgaha aya, baña gəđahə mawisiga à dza à vok la mahəl sili aña la kaskas kà, gəvəlla à iyaw à tsəh asik makər, ŋgaha aña magay maufad la iyà aña sili aña!"

- <sup>9</sup>Yesu agòdál: "Lakana kà mabəlay adasa à huɖ gày uwanay, kà uwana masla babay kà mayyi à tsəh ala aŋa Abəraham, ndzer.
- <sup>10</sup>Kà uwana Kona aŋa dza asà à waŋ kà mayàh mabəl azlauwana tazàhla."
- <sup>11</sup>Yesu ahàd à huma à gay la mapəhatàla gay la gay la abà à azladza uwana tatsəna paŋaw aŋha. Bokuba uwana atà nekwa la Urusalima kà tagòɖ kà: 'Makoray Zəzagəla kà apəhla vok ala la katskats la dazuwaya', gəl aŋatà agòɖ. Kiya uwaga Yesu apəh à atà gay la gay la abà anik.
- <sup>12</sup>Aganay à uwana apəh: "Gadamula anik, uwana la huɖ gày məŋga, ahàd à gudəŋ anik kərkər kà mazuw sufəl la abatà, kà masla mawul à mtəga la lig la ahəŋ.
- <sup>13</sup>Uwana adày kà, azàllàh azlamagamza aŋha kulo dadàŋ, avàhà à atà gursu aŋa luwàluwà tekula tekula, agòɖ à atà: 'Tsakàllàw la sili uwanay, tsəràh à mok uwana gədàwul à waŋ.'
- <sup>14</sup>Ama azlaməna gudəŋ aŋha tapəsəw masla, tasləl gay kà magodəy kà: 'Asa à anu dza uwanay aŋa magay sufəl lakəl gami aw', tagòɖ.
- <sup>15</sup>Mok uwana adazuw sufəl kà, awul à waŋ à gudəŋ aŋha à abà. Dgaha azàllàh azlamagamza aŋha uwana avàhà à atà gursu aŋa luwàluwà kà aŋa matsakalla, asəl manəraz uwana tabəzalla à adi.
- <sup>16</sup>Kiya uwaga matera adà à awtày la magodəy: 'Sufəl, sili aŋak kà ayyà à tsəh sili kulo.'
- <sup>17</sup>Sufəl agòdál: 'Delga, kak magamza delga, bokuba uwana kagà dziriga la bəzi tatak la abà kà, gəf ka à ahəŋ lawan aŋa gudəŋ kulo.'
- <sup>18</sup>Kiya uwaga masəla asà à waŋ: 'Sufəl, sili uwana kavà à gi kà, gəbəzalla à adi zlo aya'.
- <sup>19</sup>Sufəl agòɖ à masla babay: 'Kak babay, kak lawan aŋa gudəŋ zlo.'
- <sup>20</sup>Magamza anik asà à waŋ aya, agòɖ: 'Sufəl, aganay sili aŋak, gəfafàɖ à makatsekatsa à abà, gəhadəŋ à ahəŋ.
- <sup>21</sup>Guba akəs gi kà kak, kà uwana kak dza dzaŋdzəŋga. Kà uwana tatak uwana kak kafà à ahəŋ aw babay kà, kazəbay, ŋgaha bà tatak uwana kak kasləka aw babay kà, katsəɖay.'
- <sup>22</sup>Sufəl agòdál: 'Kak magamza maksafərga. Paŋaw aŋak uwana kapəh, la uwana adàhà à ka seriya à gəl. Iyay, kasəl kà gi dza dzaŋdzəŋga, ŋgaha gəzəb tatak uwana gəfà à ahəŋ aw, kagòɖ. Gətsəɖ tatak uwana gəsləkà aya bay aw, kagòɖ.'
- <sup>23</sup>Dgaha sufəl agòdál: 'Kà mana kafà sili gulo à gày makal goder, naka mok uwana gədawul à waŋ kà, naka gəday, gəhəl sili la iyaw la tsəh la abatà aw ma?'
- <sup>24</sup>Dgaha sufəl agòɖ à azladza uwana la slaka aŋha: 'Zəbàwwal gursu tekula uwaga la ahàl ala, vawla à dza uwana à vok akor sili kulo!'

[<sup>25</sup>Atà tagòd: 'Sufəl, masla kà sili kà kulo la ahəl ɲuwà!']

<sup>26</sup>'La dziriga', gəpəh à akul: 'Dza uwana akoray kà, tadàvalla à vok. Ama dza uwana akoray aw kà, bà bəziga uwatà aga la ahəl kà, tadàdəvalla à ahəl ala aya!

<sup>27</sup>Ama azlaməna məzam gulo uwana la abanay, asà à atà kà gəkor atà aw kà, sàwla atà à abanay à huma gulo, kàdāw atà la yewdi gulo', sufəl agòd à azlamagamza aṅha", kiya uwanay Yesu apəh.

<sup>28</sup>La mok uwana adapəh gay uwaga, Yesu adà à huma aṅa maham à ahəṅ dza kà mad à Urusalima.

<sup>29</sup>Mok uwana tazlābəz à Betfaze atà la Betaniya, nekwa la gudəṅ uwana gudəṅ kuvu tagodəl kà, asləl azlaməna matapla səla la slaka aṅha la huma, agòd à atà:

<sup>30</sup>"Dāw à gudəṅ uwaga à abà la huma aṅkul. Baṅa kadābəzaw kà, kadānəṅaw bəzi ziwṅṅu mawadəṅ à ahəṅ gà, uwana dza adadza à afik didi aw. Dapəllāw, kadāsawla à waṅ à abanay.

<sup>31</sup>Baṅa: 'Kà mana kapəllaw mi', dza agòd à akul kà, 'Sufəl gami awoyaṅ', gòdāwwal!"

<sup>32</sup>Uwana azlaməna masləlay taday kà, tanəṅà tatak gesina apakà vok bokuba uwana Sufəl apəh à atà.

<sup>33</sup>Mok uwana tapəl bəzi ziwṅṅu uwaga kà: "Kà mana kapəllaw bəzi ziwṅṅu uwaga mi?",

<sup>34</sup>azladza aṅha tagòd à atà, "Sufəl awoyaṅ", tagòd.

<sup>35</sup>Ḷgaha tasəlla bəzi ziwṅṅu uwaga à slaka Yesu, atà tadāwal azlalukut aṅatà à lig, tadzà Yesu à afik.

<sup>36</sup>Mok uwana adadzəka maday, azladza tadāw azlalukut aṅatà à tetəvi à ama.

<sup>37</sup>La mok uwana tazlābəzay à Urusalima, kà mad à ahəṅ la gudəṅ kuvu la afik kà, azlaməna matapla tahən ala la marabay gesina aṅatà, ṅgaha tazləbà Zəzagəla la kuda zləkkà, kà azlatatak nadzipoga uwana tanaṅəṅ gesina.

<sup>38</sup>Azla dza tagòd: "Delga kà Zəzagəla apis gay à Sufəl uwana à vok, atsa à waṅ la sləm aṅa Sufəl Zəzagəla! Lapiya la zagəla, ṅgaha mazləbay agay la Zəzagəla uwana la zagəla la afik."

<sup>39</sup>Ḷgaha azla Farisəya anik uwana la tataka maham à ahəṅ dza la abà tagòd à Yesu: "Məṅga, 'Dzàw à ahəṅ titi', gòd à azlaməna matapla la slaka aṅak!"

<sup>40</sup>Ama Yesu agòd à atà: "Baṅa: 'Dzà à ahəṅ titi', gəgòd à atà babay kà, bà azlaakur babay kà tadzəka mawiyay babay!"

<sup>41</sup>Mok uwana Yesu azlābəz à huɖ gudəṅ kà, adzəkà matuway à uwana adanəṅəṅ

<sup>42</sup>la magodāy: "Agayṅa kak la gəl aṅak kasəl tatak uwana agay lapiya kà aṅak kà, naka kità aw. Ama lagonay kà adadza à ahəṅ kà bokuba nasiriga la huma yewdi aṅak.

<sup>43</sup>Kà uwana azlamavakay anik tadàsa, à waŋ à uwana azlaməna məzam aŋak tadəkəs à ka gay adi la kazlaŋa guvəl la ahəl, tadàtsak à ka à ama tadàtsah kà makalla gesina.

<sup>44</sup>Tadàzakala tetuwa kak la azlabəza aŋak, amiyaka bà akur tekula babay kà adàgəđ à gəl aŋa anik aw, kà uwana awul à ka à gəl à mavakay uwana Zəzagəla asa à waŋ aŋa mazlak ka aw.”

<sup>45</sup>Mok uwana Yesu adada à mənɣ gày Zəzagəla à agu kà, adzəkà makudəkàh azlaməna matsakalay à lag la aku.

<sup>46</sup>Agòđ à atà: "Aganay à uwana tatsetsèr à wakità Zəzagəla à abà: 'Gày gulo kà adagay kà gày madəv kudà, ama akul kà kadapakawwaŋla kà tsakur aŋa azlaməna gəl.'"

<sup>47</sup>Yesu atapàhla tatak à azladza la mənɣ gày Zəzagəla la aku koksikoksi. Azlamadzahaga aŋa azlaməna mav tatak à Zəzagəla, la azlaməna mapàhla mapəhay à azladza, ŋgaha la azladza uwana masəl à atà gà, la gudəŋ uwatà la abà, tayàh makəs Yesu, kà makəđay.

<sup>48</sup>Ama taslà kà madàh dabaray uwana asà à atà madəhəŋ aw, kà uwana azladza gesina kà, tafà sləm kà à masla la matsəbal sləm pəra.

## Luka 20

<sup>1</sup>La vərđi anik Yesu atàpla tatak à azladza la mənɣ gày Zəzagəla la aku, ŋgaha apəh à atà gay matsidəyga. Azlamadzahaga aŋa azlaməna mav tatak à Zəzagəla, la azlaməna mapàhla mapəhay ala, la azlamasiga aŋa azla Yahudiya

<sup>2</sup>tasà à waŋ à slaka aŋha tagòđal: "Pəhanula, la ndzəđa ma uwala à uwana kadàhla azlatatak uwanay tak la? Uwa à uwana avà à ka tetəvi aŋa madàh azlatatak uwanay uwa?"

<sup>3</sup>Yesu agòđ à atà: "Gi babay kà, gənav à akul tatak tekula lagwa, wùlləwgəla suwaŋ!"

<sup>4</sup>Uwa à uwana asləl Yuhana à waŋ kà madàh batem tak uwa? Zəzagəla ay, awma azladza takay?"

<sup>5</sup>Ama atà tadzəkà mabay vok gay la tataka aŋatà la abà kà atà à atà, ŋgaha tagòđ: "Baŋa məgod' Zəzagəla la uwana asləl à waŋ, 'Kà mana zlà ma kadìŋəwwal gəl à vok aw mi', adàgəđay.

<sup>6</sup>Baŋa məgod: 'Azladza la uwana tasləl à waŋ kà', maham à ahəŋ dza uwana la abanay gesina tadàtsah anu à gəl la akur aya, kà uwana tasəl kà Yuhana kà masla mapəhal gay à ahəl aŋa Zəzagəla kà mapàh à azladza ndzer."

<sup>7</sup>Ŋgaha tawulàlla: "Anu kà, məsəl dza uwana asləl à waŋ aŋa madàh batem aw."

<sup>8</sup>La abatà Yesu agòđ à atà: "Kətà kà, gi babay kà, gəpəhakulla ndzəđa uwana gəđàhla azlatatak uwanay babay zlà à ama aw."

- <sup>9</sup>Kiya uwaga Yesu adzəkà mapəh gay la gay la abà uwanay à maham à ahəŋ dza: "Dza anik atsəb gày matavəruk aŋha, asàkla uwaga la azlamagamza aŋha la ahəl, ŋgaha adà aŋha kərkər à gudəŋ anik, asàf la abatà.
- <sup>10</sup>Mok uwana adasal kà, aslèl dza aŋha à azlamagamza à tsəh, kà mavəl humà mahənay aŋa tatak guf aŋha. Ama mok uwana azlamagamza tanəŋəŋ kà, tazlābal, ŋgaha takudək la ahəl deyday.
- <sup>11</sup>Bà gotənaŋ aslèl dza anik aya. Ama atà tazlāb à gəl, ŋgaha tatsəkəkal magodəhay à gəl, la makudəkay la ahəl deyday babay.
- <sup>12</sup>Aslèl dza anik kà mamakər aya. Ama tatsəh, tadəhal amik à vok, ŋgaha taməl à tetəvi à tsəh.
- <sup>13</sup>Dza aŋa guf matavəruk agòd: 'Mana à uwana gədəhəŋ lagwa zlà ma?', agòd la gəl aŋha, 'Gəsləlla à atà bəzi gay ləv gulo, zlahaw kà, tadəsləkaw masla.'
- <sup>14</sup>Ama mok uwana tanəŋà masla, azlamagamza tatsatsəl vok gay kà atà à atà, tagòd: 'Masla la uwana masla mazuw gày, sàw à waŋ katskats, məkəd pəra, anu mədàbəd à mazuw gày à gəl!'
- <sup>15</sup>Tadùw à uda la guf la abà, takəd." "Ama kakay dza aŋa guf matavəruk adəfəhatəŋ à vok ma?
- <sup>16</sup>Adàsa à waŋ adəkəd azlamagamza maksafərga uwaga gesina, ŋgaha adàvə guf à ahəl aŋa azladza anik uwana tadəvəhal mahənay aŋa matavəruk la kaslā uwana asal gesina." Ama mok uwana tatsənà uwaga tagòd: "Kiya uwaga apakà vok aw!"
- <sup>17</sup>Ama Yesu anərəz atà la magodəy: "Uwanay tatsetsər, ma mana asal mapəhla ala tak ma? 'Akur uwana azlaməna maŋal gày tapəsəw kà, Masla la uwana adagay akur mawad gày gesina.'
- <sup>18</sup>Kəla dza uwana atəd à akur uwanay à afik kà adəkalahla. Ama baŋa akur uwanay la uwana atəd à dza à gəl kà, aslèrədəŋ ala kədəna."
- <sup>19</sup>Azlaməna mapəhla mapəhay ala la azlamadzahaga aŋa azlaməna mav tatak à Zəzagəla tayəh kà makəs Yesu la kaslā uwatà. Ama guba akəs atà kà maham à ahəŋ dza, kà uwana tasəl kà apəh gay la gay la abà uwaga kà lakəl aŋatà.
- <sup>20</sup>Kiya uwaga kà mabəz à Yesu à tsəh kà, azlaməŋga taslèl azlaməna matsəb sləm, uwana tapakà gəl aŋatà ala kà bokuba azladza dziriga, awkà bokuba azlaməna matsəb sləm pəra aw, kà mabəzal à tsəh la gay mawisiga uwana la abà, atsà à waŋ la gay aŋha la awtəy amiyaka tekula, ŋgaha kà atà aŋa mav masla à ahəl aŋa azlaməna makoray.
- <sup>21</sup>Kiya uwaga tanəval à gay ala la magodəy: "Məŋga, məsəl kà uwana kapəhay, la uwana katapla à azladza, kà dziriga, ŋgaha babay kà kakəsani dza makasay aw, ama la dziriga, la tetəvi aŋa Zəzagəla à uwana katapla à azladza.
- <sup>22</sup>Anu ma tetəvi la ahəŋ, kà mapəl hadama gami à məŋ sufəl Zəsar ay, awma mapəhay gami avà à anu tetəvi aw kəlay?"

- 23**Bokuba uwana Yesu asèl dèmfem aṅatà kà, agòd à atà:
- 24**"Pèhàwgèla akur sili uwatà dadàṅ tsi", agòd à atà. "Gəl la sləm uwanay ma aṅa uwa, la sili uwanay la afik uwa?", agòd à atà. Tagòdàl: "Aṅa Zəsar."
- 25**Kiya uwaga Yesu agòd à atà: "Kità kà, pèlāw à mən sufəl Zəsar tatak uwana aṅha, ṅgaha pèlāw à Zəzagèla uwana aṅha suwaṅ!"
- 26**Kiya uwaga kà, tabèz à gay à tsəh kà makəsla masla aw, kà uwana gay aṅha uwana apəh la huma maham à ahəṅ dza kà mawisiga la abà aw, ləv avàl atà à gay kà mawulla gay à uda aṅha, tadzà à ahəṅ titi.
- 27**Kiya uwaga azladza anik la tataka azla Sadukiya la abà, atà uwana: 'Mawul à uda la mamətsay la ahəṅ aw', tagòd, tasà à waṅ à slaka Yesu kà manaval:
- 28**"Məṅga, aganay uwana Musa apəh: Baṅa dza aməts à mis ala kokudà mabəz bəzi kà, say deda aṅha azəb mis aṅha à uda la gày kudà, ṅgaha atsizilla ala tsəhay aṅha ala.
- 29**Azladza la ahəṅ atà mədəf la azladedà aṅatà. Magolga gà azəb mis, amətsal akèlla ala kokudà mabəz bəzi.
- 30**Deda masəla ṅgaha mamakər tazàb mis uwaga à uda la gày kudà.
- 31**Kiya uwaga tazàb tsərəh à mədəf nna gesina. Gesina aṅatà tamətsàlən ala kokudà mabaz bəzi la mis uwaga.
- 32**Uwana uwaga adada à lig kà, mis aməts bay suwaṅ.
- 33**Ḷgaha ma la vudf mawul à uda la mamətsay, ma mis ma adàgəday ma à uwa, tsa atà gesina aṅatà kà tazàb uwa?"
- 34**Ḷgaha Yesu agòd à atà: "Azladza aṅa zamana uwanay la uwana tazəb vok.
- 35**Ama azlauwana Zəzagèla adətsatsamani atà kà mabəz à sifa adəv gay aw, tadàwul à uda aṅa madz à ahəṅ la sifa uwana adədəv gay aw kà, atà kà, tadàzab vok aya aw.
- 36**Kà uwana la dziriga gà kà, tadàmatsay aya aw, tadəpakahay kà bokuba azlamalika, ṅgaha tadəgahay azlabəza aṅa Zəzagèla, à kà uwana tawul à uda la mamətsay kà madz à ahəṅ la sifa.
- 37**Iyay, lakəl aṅa mawul à uda la mamətsay kà, Musa apəh lakəl aṅha la wakità la abà la paraka: "Sufəl Zəzagèla gulo, Zəzagèla aṅa Abəraham, Zəzagèla aṅa Isak, ṅgaha Zəzagèla aṅa Yakuba bay."
- 38**Zəzagèla kà Zəzagèla aṅa azlamazimnekidf aw, ama aṅa azladza uwana la sifa, kà uwana tatak gesina uwana la sifa kà aṅha."
- 39**La kità kà, uwana tatsən uwaga kà, azlaməna mapəhla wakità aṅa mapəhay ala tagòd: "Məṅga, uwaga kà lela kapəh."
- 40**Kà uwana taslà manaval gay aya aw.
- 41**Yesu agòd à atà: "Kakay tagəday kà Kristu kà Kona aṅa David ma?"

<sup>42</sup>Kà uwana David la gəl aṅha kà agòḍ à wakità aṅa Mahabay la abà kà: "Sufəl Zəzagəla agòḍ à Sufəl gulo: Dza madzay la ahəl kaf gulo lakəl

<sup>43</sup>tsəràh à uwana gəbək à ka azlaməna məzam aṅak à tsəh asik!"

<sup>44</sup>Tsa baṅa David la gəl aṅha kà azàlalla Sufəl ma, kakay apək kona aṅha ma?"

<sup>45</sup>Mok uwana maham à ahəṅ dza atsəbal sləm kà, Yesu agòḍ à azlaməna matapla la slaka aṅha:

<sup>46</sup>"Dahàw haṅkəli kà azlaməna mapəhla wakità mapəhay ala kà uwana atà kà, asa à atà mauguzahay la azladawara məṅga məṅga gà la vok, kà mapapatla dza. Ŋgaha asa à atà kà azladza tasukw atà kà la azlabarama uwana la ama mahamay dza la abatà, asa à atà madza madzay kà la slaka teraṅa la gày madəv kudà la aku, ṅgaha aya asa à atà madza madzay kà la slaka delga la tatak may lakəl.

<sup>47</sup>Atà kà, azlaməna mazaw azlamis kudà à uda aya, ṅgaha asà à atà mavakàh à madəv kudà à abà la slaka madəv kudà. Atà kà tadàbəzal seriya kà dzaṅdzaṅga."

## Luka 21

<sup>1</sup>Yesu anəṅ à slələf à gəl kà, anəṅà azlagalepi uwana tawàts sili à sahar aṅa ofərand à abà la məṅ gày Zəzagəla la aku.

<sup>2</sup>La abatà bay kà anəṅà mis kudà kudàga uwana awìts kalamay səla à abà la abatà la ləv tekula.

<sup>3</sup>Yesu agòḍ: "La dziriga, gəpəh à akul kà, mis kudà uwanay kà avà kà aduwa azladza anik uwanay gesina.

<sup>4</sup>Azladza uwanay tavà kiya uwanay kà, kà uwana adabaday la slaka aṅatà, ama mis kudà uwanay kà, azəb à uda kà uwana agà la ahəl aṅa madzadzarla gəl aṅha gesina."

<sup>5</sup>Azladza anik tapəh lakəl aṅa məṅ gày Zəzagəla kà ahəd. 'Madàhala vok à uda gà, la azlaakur delga delga gà', tagòḍ, 'Ŋgaha la azlatatak anik anik uwana tavàh à Zəzagəla.' Yesu agòḍ à atà:

<sup>6</sup>"Mavakay adàsa à waṅ, kà azlaakur uwanay adàdza à ahəṅ kiya uwanay aw, amiyaka bà akur tekula adàgəḍal à gay aw, tadàbazlah à ahəṅ gesina."

<sup>7</sup>Kiya uwaga tanàval à gay la: "Məṅga, mbà à tatak uwaga adàpaka vok ma? Tatak ma uwala à uwana adàpəhanula zlà?"

<sup>8</sup>Kiya uwaga Yesu agòḍ à atà: "Dahàw haṅkəli, dza apapat akul aw, kà uwana azladza aṅuvaw tadàsaha à waṅ la sləm gulo, à uwana 'Anu azlakristu. Lagwa kà, kaslà aṅha la uwanay adàsa à waṅ lagwa', tadàgəḍay. Ama kadànəfaw atà aw.

<sup>9</sup>Baṅa kadàtsənaw gay lakəl aṅa guvəl, la azlamawiyay aṅha kà, ləv adàval akul à gay aw, kà uwana uwaga kà say leri apaka vok dadàṅ, ama uwaga kà makəḍ gəl à ahəṅ aṅa gudəṅ à vok dadàṅ aw."

- <sup>10</sup>Kiya uwaga agòd à atà: "Azladza tsəhay anik tadàpa guvəl la azlatsəhay anik, ɲgaha makoray anik adàpa guvəl la makoray anik.
- <sup>11</sup>Azlamabəlak à vok aɲa kutso adàgahay la ahəɲ aɲuvaw, dɯvats la azlamay, la matərəbay adagahay la ahəɲ la azlaslaka anik anik. Azlatatak guba, la azlanadzipo mənɲa tadàsa à ahəɲ la zagəla."
- <sup>12</sup>"Ama kà uwaga aɲa mapak vok gesina kà tadàkasah akul, tadàtsərəkwhah akul tadàtərərbah akul la azlagəy madəv kudà la aku, ɲgaha tadàwats akul à daɲay, tadàbayàh akul à huma aɲa azlasufəl, ɲgaha à huma aɲa azlalawan kà gi.
- <sup>13</sup>Uwaga la uwana adàvə à akul tetəvi kà maz sayda gulo.
- <sup>14</sup>Lagwa kà, gədawan ɲ afik la ləv aɲkul la tsəh kà akul aɲa magogotsay kà aɲa mahəl à ahəɲ aw.
- <sup>15</sup>Kà uwana gi la gəl gulo la uwana gədəguway la paɲaw aɲkul la awtəy, kà mav à akul matsihila kà masla məzam aɲkul aɲa maməl akul gəl à ahəɲ aw.
- <sup>16</sup>Tekefika kà, bə azlababa aɲkul, la azladedə aɲkul dardarga, ɲgaha la azlaslawda aɲkul la uwana tadàtsərəkwhah akul. ɲgaha tadàzah sifa aɲa azlaanik aɲkul ala aya.
- <sup>17</sup>Azladza gudəɲ à vok gesina tadəpəsew akul kà uwana kawoyaw gi.
- <sup>18</sup>Ama bə la uwaga kà, amiyaka bə aɲidz takasagəl aɲkul tekula babay kà adàzila aw.
- <sup>19</sup>La matsizilla à ahəɲ lela aɲkul la uwana kadəbəzaw à sifa aɲkul."
- <sup>20</sup>"Mok uwana kadənəɲaw azlaməna guvəl tadəkəs gay à Urusalima à adi kà, sələw kà nekwa: 'Takal à ahəɲ adəgay', kadəgodaw.
- <sup>21</sup>Kiya uwaga azlauwana atà la Yahudiya kà, tadəhoy à gudəɲ à afik. ɲgaha azlauwana tadəgay la huɖ aɲa Urusalima kà, tadəza vok, ɲgaha azlauwana la lig gə la uda kà, tadàda à abə aya aw.
- <sup>22</sup>Ama azlamavakay uwaga kà azlamavakay aɲa seriya la mazay, ama kà magəd uwana à afik tatsetsər à wakitə Zəzagəla à abə.
- <sup>23</sup>ɲgərpa adəgay la azlamis uwana la bəza la huɖ, la azlauwana bəza vərna aga à atà la ahəl la mavakay uwaga, kà uwana matərəbay la mapak ləv aɲa Zəzagəla adəpəhla vok ala la tataka azlatsəhay uwanay la abə.
- <sup>24</sup>Tadəkədəh atà la katsakar, tadəpakah atà ala kà azlamayə la tataka azlatsəhay gudəɲ à vok la abə. Azladza uwana azla Yahudiya aw, tadəhabah Urusalima à tsəh tsəràh à uwana kaslə aɲatə adədəv à gay."
- <sup>25</sup>"Azlamasəlay, la azlanadzipo anik anik la afats la abə, la təla la abə, la azlatsetsiliɲ, ɲgaha la kutso la abə adəgay la ahəɲ. Gudəɲ à vok adəgay la mazaw la gel la abə, gəl adəkəɖ atə à vok kà mahohumay aɲa magaɲtsay aɲa azladərəv.
- <sup>26</sup>Azladza tadəməts à gay kà ɲgərpa uwana adəpaka vok la kutso la abə la vədəh, kà uwana azlandzəɖə uwana la zagəla tadəbəlak à vok.



- <sup>27</sup>Kiya uwaga kadànéhaw Kona aña dza atsa à ahəŋ la habaga zagəla la abà, la mazləbay, ŋgaha la maslay gesina.
- <sup>28</sup>Mok uwana azlatatak uwaga tadàdzəka mapakàh vok kà, dzərədàkàw vok ala, tsizilla gəl ala la matsizlla à ahəŋ lela, kà uwana mabəlay aŋkul kà nekwa.”
- <sup>29</sup>Kiya uwaga Yesu apəh à atà gay la gay la abà uwanay: "Nərəzàw gudəv la azlaahəf anik anik gesina tsi.
- <sup>30</sup>Baŋa kadànéhaw azlababasl aŋatà tadzəka mađay kà, səlàw kà madara kà nekwa.
- <sup>31</sup>La kità babay, mok uwana kadànéhaw azlatatak uwaga tadàdzəka vok kà, səlàw kà, makoray Zəzagəla kà nekwa atsa à waŋ.
- <sup>32</sup>La dziriga, gəpəh à akul: Zamana uwanay adàdəv à gay dadəŋ kà mapak vok aña azlatatak uwaga aw.
- <sup>33</sup>Zagəla la kutso tadàdəv à gay, ama gay gulo kà, adàdəv à gay aw.”
- <sup>34</sup>"Nəhàwla gel aŋkul! Kà gəl aña makəf akul à vok lakəl aña tatak masay, la tatak may, la azlatatak aña gudəŋ à vok uwanay aw! Tsa baŋa kità aw kà, mavakay aña seriya adàsa à waŋ adəgoruh akul.
- <sup>35</sup>Kà uwana mavakay uwatà kà, adàsa à waŋ kà bokuba makəs tatak aña kəda kəfu à uwana adàsa azladza à gudəŋ à vok à gəl.
- <sup>36</sup>Dzàw à ahəŋ la adi, dèvəw kudà la kaslà gesina, kà akul aña mabəz ndzəfà kà matəf uwana la gay ala atsa à waŋ gesina, ŋgaha kà akul aña matsizlla à ahəŋ dzawwa la huma aña Kona aña dza.”
- <sup>37</sup>Tekefika la afats kà, Yesu atəpla tatak à azladza la məŋ gəy Zəzagəla la aku, ama la mokokhu gə kà, ahəd, ahən à gudəŋ uwana afik: 'Gudəŋ kuvu', tagòfal.
- <sup>38</sup>Maham à ahəŋ dza gesina asà à waŋ la bəŋ la zay la tsəh kà matsəbal sləm la məŋ gəy Zəzagəla la aku.

## Luka 22

- <sup>1</sup>Mok uwana uwaga adada à lig kà, madəvaday aña Pain uwana kokudà tatak maməsləŋ ala, à uwana tazalalla Paska agay nekwa.
- <sup>2</sup>Kiya uwaga azlamadzahaga aña azlaməna mav tatak à Zəzagəla, ŋgaha la azlaməna mapəhla mapəhay ala tayəh dabaray kà makəf Yesu, ama guba akəs atà kà maham à ahəŋ dza.
- <sup>3</sup>Kiya uwaga seteni aguwà la Yudas uwana la abà, tazalalla Iskariyot, tekula aña azlaməna matapla kulo gəl aŋha səla.
- <sup>4</sup>Ŋgaha masla ahəd kà matsən vok gay la azlamadzahaga aña azlaməna mav tatak à Zəzagəla, la azlaməŋga aña azlaməna manəŋla məŋ gəy Zəzagəla, kà mav à atà Yesu à ahəl.

- <sup>5</sup>Taràb mənğa, "Mədàvà à ka sili!", tagòfal.
- <sup>6</sup>Yudas akəs la ahàl sèla, ayàh tetəvi kà maf à atà Yesu à ahàl kokudà matsənəŋ aŋa maham à ahəŋ dza.
- <sup>7</sup>Kiya uwaga mavakay aŋa Pain uwana kokudà tatak maməsləŋ ala, uwana azladza takàdàh magadzaw adada à abà.
- <sup>8</sup>La kità, kà Yesu asləl azla Piyer atà la Yuhana la magod à atà: "Dàw, kadàfahaw anu tatak aŋa madəvaday Paska à ahəŋ, kà anu aŋa mazuway!"
- <sup>9</sup>"Lala asà ka məday aŋa madəhəŋ à ahəŋ la?" tagòfal.
- <sup>10</sup>Ŋgaha agòd à atà: "Mok uwana kadabəzaw à huđ gudəŋ à abà kà, kadàgagamaw la dza uwana iyaw lakəl la tuguzl gà. Danəfàw masla à gày uwana à abà, adàda à abà.
- <sup>11</sup>Ŋgaha kadàgodaw à zil gày: 'Məŋga anav gày, uwana adàzuw tatak may aŋa Paska la aku, la azlaməna matapla la slaka aŋha la slaka aŋak.'
- <sup>12</sup>Kiya uwaga adəpəhakulla gày madəhəŋ à ahəŋ gà uwana lakəl aŋa gày anik la afik, ŋgaha kà la abatà la uwana kadàfahaw tatak may à ahəŋ."
- <sup>13</sup>Mok uwana taday kà, tabəz à tatak à gəl gesina bokuba uwana Yesu apəh à atà, ŋgaha tadzəkà madàh vok à ahəŋ kà aŋa madəvaday Paska.
- <sup>14</sup>Mok uwana kaslà adaslay kà Yesu la azlaməna matapla la slaka aŋha tadzàh à tatak may à adi,
- <sup>15</sup>Yesu agòd à atà: "Gəwoyay kà bà mawoyay kà mazuw tatak may aŋa Paska uwanay anina dadəŋ, kà gi aŋa mas ŋgərpə.
- <sup>16</sup>La dziriga gəgod à akul: Tetuw gədàzuway aya aw, tsərəh à uwana adàgay magod à afik gà la makoray aŋa Sufəl Zəzagəla dadəŋ."
- <sup>17</sup>Azəb kətsaw à ahàl la tatak masay gà, "Kikay", agòd à Zəzagəla, "Kəsàw kətsaw uwanay, kaslawwanəŋ à vok à gay la tataka aŋkul la abà.
- <sup>18</sup>Kà uwana la dziriga gəpəh à akul kà, gədàsa iyaw matavəruk uwanay aya aw, say la makoray Zəzagəla."
- <sup>19</sup>Ŋgaha azəb kaf, "Kikay", agòd à Zəzagəla, atsakəŋ ala, avà à atà la magod à atà: "Uwanay kà vok gulo [uwana mavəy gà kà aŋkul. Dahàw uwanay kà gi aŋa mawul akul à gəl."
- <sup>20</sup>La lig aŋa mazuw tatak may à gay la ahəŋ kà, avà à atà kətsaw iyaw la tatak masay la abà, agòd à atà: "Kətsaw uwanay kà, kətsaw makəs vok slawda mawga la aŋiz gulo, uwana masokw à vədàh gà kà aŋkul.]"
- <sup>21</sup>"Ama aganay à dza uwana adàta à gi kaf à gəl mədatsəp vok à ahàl à tatak may à abà anu sèla.
- <sup>22</sup>Ndzer, Kona aŋa dza adàdiy aŋha bokuba uwana tatsetsèr à wakità Zəzagəla à abà, ama ŋgərpə la dza uwana atal kaf à gəl, avà à ahàl aŋa azladza!"

- <sup>23</sup>Ɖgaha azlaanik uwanay tadzəkà manavàh vok kà atà kà atà: "Uwa à uwana adzugw madàh tsəhay gə uwaga la tataka gami la abà uwa?", tagòd.
- <sup>24</sup>Mabay vok gay atsizilla ala la tataka aŋa azlaməna matapla la abà, kà masəl dza uwana azlayla magay mənğa aŋatà.
- <sup>25</sup>Yesu agòd à atà: "Azlasufəl aŋa gudəŋ à vok takor azladza aŋatà, azlaməna ndzəda lakəl aŋatà babay asa à atà kà tazala à atà ala azladza delga.
- <sup>26</sup>Ama akul kà, kiya uwaga aw. Mənğa gə la tataka aŋkul la abà kà apakay kà masla mazəb kiwa. Ɖgaha masla makor akul aya kà, agay kà bokuba masla mazəb akul dagum.
- <sup>27</sup>La dziriga, ma dza ma uwala à uwana mənğa tak la? Uwana adza madzay la tatak may lakəl ay, awma uwana atsak tatak may à azladza, adàha à atà ala ay. Ɖodà à gi kà, dza uwana la tatak may lakəl, la uwana mənğa gə. Ama gi kà gi la ahəŋ la tataka aŋkul la abà koksikoksi bokuba masla madàhakulla tatak may.
- <sup>28</sup>Akul kà akul la ahəŋ la gi koksikoksi la ŋgərpa gulo la abà.
- <sup>29</sup>Ɖgaha bokuba gi, uwana Baba afa à gi à makoray aŋha à abà kà, gi babay kà gədàfa à akul à makoray à abà suwaŋ.
- <sup>30</sup>Kà akul aŋa mazuway la masay tatak la table gulo la afik la makoray gulo, ŋgaha kadàdzahaw madzay la azlakursi sufəl la afik kà madàh seriya à azlatsəhay kulo gəl aŋha səla aŋa Isərayel à gəl."
- <sup>31</sup>Yesu agòd à Səmon: "Səmon, Səmon, tsənəŋ tsi: Seteni adanav tetəvi kà magodzal ka kà, bokuba uwana tasəh tatak kà mavàh azlatafàr gə ala la fofulo delga gə.
- <sup>32</sup>Ama gi kà gədəv kuda kà aŋak Piyer, kà madiŋal gəl à vok aŋak aŋa maruw vok à ahəŋ aw, ŋgaha kà pəra aŋa kadàwul à tetəvi à tsəh kà, dādzərədāhà azladedə aŋak ala gesina!"
- <sup>33</sup>Piyer agòdàl: "Sufəl, gi kà dāgəd à uwali gəgod aw, amiyaka à daŋay, amiyaka tadəkəd ka, kà gi kà, gi nekwa kà mamətsay la slaka gə à anu səla."
- <sup>34</sup>Ama Sufəl Yesu agòd à Piyer: "Tsənəŋ Piyer, lakana kà mewgdzagalaŋ adawiyay dadəŋ aw, kà magodəy aŋak kà kasəl gi aw asik makər."
- <sup>35</sup>Kiya uwaga Yesu agòd à atà: "La mok uwana gəsləl akul kokudà sili, kokudà kiwa, kokudà kwimik ma, kanàwkudà aŋa tatak takay?" "Awaŋ, mənəkudà aŋa tatak aw", tagòdàl.
- <sup>36</sup>Kiya uwaga Yesu agòd à atà: "Lagonay kà, kiya uwatà aya aw, dza uwana sili aŋha la ahəŋ kà, ahəl, dza uwana kiwa aŋha la ahəŋ kà azəb, ŋgaha dza uwana katsakar aŋha la ahəŋ aw kà, aduw dəbdəbi aŋha ala kà masukw katsakar.
- <sup>37</sup>Kà uwana la dziriga kà tatak uwana tatsetsər lakəl gulo kà say agəd à afik, 'Masla kà, tatugwla la azlaməna tsakana.' La haday kà, uwana tatsetsər lakəl gulo kà adagəd à afik."

- <sup>38</sup>Azlaməna matapla la slaka aṅha tagòdál: "Sufəl, katsakar səla la uwanay ma diga aw takay?" Yesu agòd' à atà: "Diga uwà gà."
- <sup>39</sup>Bokuba uwana zagəla aṅa Yesu, asà à uda, adà aṅha à gudəṅ kuvu à afik. Azlaməna matapla la slaka aṅha tanəfà la tsəh.
- <sup>40</sup>Mok uwana tabèz à slaka uwatà à abà kà: "Dèvəw kudà kà akul aṅa matəd' à mapapatay à abà aw!", agòd' à atà.
- <sup>41</sup>Masla azà à atà vok la vok ala, zad' daməl akur, akədèd' à ahəṅ, adəv kudà.
- <sup>42</sup>"Baba, baṅa asa à ka kà, zà kətsaw ṅgərpə uwanay ala la slaka gulo. Ama kadəhaṅ kà mawoyəṅ gulo aw, say aṅak!"
- [<sup>43</sup>Kiya uwaga malika asà à ahəṅ la zagəla adzəredāṅ ala.
- <sup>44</sup>Adəv kudà la mazaw la gəl məṅga, aməts à madəv kudà à abà tsəràh à uwana aṅuf anəd'fál à adi ala, vikuza bokuba aṅiz.]
- <sup>45</sup>Mok uwana adadəv madəv kudà à gay kà, asà à waṅ à slaka azlaməna matapla aṅha, abèz atà à gəl, kà atà la madzəhal aṅa mazaw la gəl la abà.
- <sup>46</sup>Agòd' à atà: "Kà mana kadzewhal ma? Sàw à afik dèvəw kudà, kà akul aṅa matəd' à mapapatay à abà aw."
- <sup>47</sup>Uwana Yesu aləḡ la mabad'ima la abà kà, maham à ahəṅ dza azlāṅal, atà la azla Yudas, tekula aṅa azlaməna matapla kulo gəl aṅha səla, uwana tatəpəhla tatak la slaka aṅha. Tazà vok à awtəy à slaka Yesu.
- <sup>48</sup>Ama Yesu agòd'fál: "Yudas, la makəs gi à vok la uwana kaduw Kona aṅa dza ala takay?"
- <sup>49</sup>Mok uwana azladza uwana la Yesu tanəṅà uwaga adzəkà vok kà, tagòd'fál: "Sufəl, mətsəd' à atà kuda à gəl la katsakar ay?"
- <sup>50</sup>Tekula la tataka aṅa azlaməna matapla la abà ad'əd'f magamza aṅa madzahaga aṅa azlaməna mav tatak à Zəzagəla, anətsal sləm lakəl ala.
- <sup>51</sup>Ama Yesu avərə̀ gay: "Sàkàw uwaga, digiya", agòd' à atà. Yesu adəbanì sləm aṅa dza uwatà awurəṅ ala.
- <sup>52</sup>Kiya uwaga Yesu agòd' à azlamadzahaga aṅa azlaməna mav tatak à Zəzagəla, la azlaməṅga aṅa azlaməna manəṅla gəy Zəzagəla, ṅgaha la azlamasiga: "Kasàwwəṅ kà makəs gi la azlakatsakar la azlaazəva la ahəl, bokuba gi masla nabəra ṅuwà?"
- <sup>53</sup>Tekeḏika kəla mavakay kà, məgəh anina la məṅ gəy Zəzagəla la aku, uwala katəpəw gi ahəl à vok aw. Ama uwanay kà adagay kà kaslà aṅkul, la ndzəda aṅa mələs."
- <sup>54</sup>Takàs Yesu, tadàlla à mtəga aṅa məṅ madzahaga aṅa azlaməna mav tatak à Zəzagəla; Piyer anəfà à atà la tsəh zadamma.

- <sup>55</sup>La mok uwatà kà, anasl la ahəŋ, tavàts akàl à kodal à abà, Piyer adzà madzay la slaka azladza uwana la akàl la adi.
- <sup>56</sup>Masla sləray misga tekula anəŋà Piyer adzà à akàl à adi, atsəkəkal yewdi à gay la magodəy: "Zil uwanay babay kà tauguzàh atà səla."
- <sup>57</sup>Ama Piyer adəhà fida: "Gəsəl masla aw, gəgodf à ka, mis!"
- <sup>58</sup>Zwek la huma la gay dza anik anəŋəŋ, agòdàl: "Kak babay kà, kak tekula aŋatà." Ama Piyer agòd à dza uwaga: "Awan, gi tekula aŋatà aw."
- <sup>59</sup>Mok uwana tasəfàni kà, dza anik awasləŋ à afik la magodəy: "Ndzer, dza uwanay kà tauguzàh atà səla, masla babay kà zil Galili."
- <sup>60</sup>Ama Piyer agòd: "Kona, gəsəl uwana asa à ka mapəhay aw!", uwana talèg la mavats gay la abà kà, mewgdzagalaŋ awiyà.
- <sup>61</sup>Sufəl Yesu agòla vok, anəŋà à Piyer à adi, ŋgaha awùl à Piyer à gəl, à gay aŋa sufəl uwana apəhal à vok à abà uwarà: 'Gurayŋa mewgdzagalaŋ adawiyay lakana kà asik makər kà, kadəgodəy kà, kasəl gi aw.'
- <sup>62</sup>Piyer asà à uda atùw la iyaw tugwi.
- <sup>63</sup>Azladza uwana tanəŋla Yesu takədāslal, ŋgaha tazlāb.
- <sup>64</sup>Tawədàl lukut à yewdi à ama, tanəval: "Uwa à uwana adəf kà tak uwa? Səl zlà!"
- <sup>65</sup>Ŋgaha tatsəkəkal azlamagodəhay anik anik à gəl aya.
- <sup>66</sup>Uwana məl adawula kà, azlamasiga aŋa azla Yahudiya, la azlamadzahaga aŋa azlaməna mav tatak à Zəzagəla, la azlaməna mapəhla mapəhay ala, tahamà gay à vok, ŋgaha tadàla Yesu à huma à azlaməna sawaray aŋatà
- <sup>67</sup>la magodəy: "Baŋa kak Kristu kà: Pəh à anu!" Ama Yesu agòd à atà: "Gədapəh à akul bay kà, kafəwwal sləm aw,
- <sup>68</sup>à bà gənava à akul à manavay tekula bay kà, kawullaw gi ala aw.
- <sup>69</sup>Ama dagay lakana Kona aŋa dza adza madzay la ahəl kaf aŋa Baba Zəzagəla lakəl, uwana Zəzagəla adahama ala ndzədà gesina."
- <sup>70</sup>Gesina aŋatà tagòd: "Lagwa zlà ma, kak Kona aŋa Zəzagəla ay?" Kiya uwaga Yesu agòd à atà: "Iyay, kiya uwana kagodəw kà, gi masla!"
- <sup>71</sup>Kiya uwaga tagòd: "Lagwa kà, məyàh azlaməna sayda aya zlà ma aw. Anu la gəl gami kà, mədatsənəŋ paŋaw aŋha adagay."

## Luka 23

- <sup>1</sup>Ŋgaha la abatà kà, maham à ahəŋ dza gesina tatsizlla ala, tadàla Yesu à huma Pilatus.

- <sup>2</sup>Tadzəkà makallal gay à vok la magodfay: "Dza uwanay kà, masla mapəs à tsəh à gudəŋ gami à afik, 'Dza apəl hadama à Zəsar aw', agòd, ŋgaha 'Gi Kristu, gi Sufəl', agòd' aya."
- <sup>3</sup>Pilatus anàval à gay ala: "Kak la uwana kak Sufəl aŋa azla Yahudiya, hadfay ay?" "Iyay, kiya uwana kapəh", Yesu agòdɔl.
- <sup>4</sup>Pilatus agòd à azlamadzahaga aŋa azlaməna mav tatak à Zəzagəla, ŋgaha à maham à ahəŋ dza: "Dikidiki gəbəz à mawisiga aŋa dza uwanay aw."
- <sup>5</sup>Ama tazà kuda à zagəla la ndzəɔɔ. "Masla la uwana apəs à tsəh à maham à ahəŋ dza à afik la matapla aŋha. Adzəkà la Galili, la Yahudiya gesina, tsəràh à uwana adabəzla à abanay lakana."
- <sup>6</sup>Mok uwana Pilatus atsənà uwaga kà, anàv: "Konnay ma, zil Galili takay?"
- <sup>7</sup>Uwana adatsenəŋ kà, asà à waŋ kà la makoray aŋa Herod la abà kà, asləl masla à slaka Herod, kà uwana la mavakay uwatà kà, Herod kà agà la Urusalima.
- <sup>8</sup>Mok uwana Herod anəŋà Yesu kà, aràb məŋga, kà uwana ayahay aŋa manəŋəŋ kà dagay uwarà, kà uwana atsənà gay uwana tapəhay lakəl aŋha kà delga. Ŋgaha adzùgw kà Yesu, adàhalla nadzipo.
- <sup>9</sup>Anàvəhal azlamanavay aŋuvaw, ama Yesu abàɔɔalma aw.
- <sup>10</sup>Azlamadzahaga aŋa azlaməna mav tatak à Zəzagəla, la azlaməna matapla mapəhay à azladza la abatà, tapùwla gudzi à gəl la ndzəɔɔ.
- <sup>11</sup>Herod la azlaslodzi aŋha takəɔɔslal, tatərəbàŋ, tadùwal lukut delga gà à vok, ŋgaha tawùlla masla à slaka Pilatus.
- <sup>12</sup>La mok uwatà la uwana Herod atà la Pilatus takəs vok slawda, kayka uwarà kà tasà vok iyaw aw.
- <sup>13</sup>Pilatus ahamà gay azlamadzahaga aŋa azlaməna mav tatak à Zəzagəla à vok, la azlamalahaga aŋa gudəŋ uwatà.
- <sup>14</sup>Ŋgaha agòd à atà: "Akul, kasàwgəla dza uwanay à waŋ kà: 'Apəs à tsəh à gudəŋ à afik', kagodfaw. Iyay, lagonay kà gənàval gay kà la huma aŋkul gesina, ama gəbəz à mawisiga la slaka aŋha kà madukwla seriya à gəl la mapuwla gudzi à gəl uwana kapùwwal à gəl aw.
- <sup>15</sup>Amiyaka Herod babay kà, anəŋà mawisiga aŋha aw, kà uwaga à uwana asləl anu à abanay. Kiya uwaga dza uwanay adàhà mawisiga takəɔɔla aw!"
- <sup>16</sup>Pilatus agòd: "Lagwa kà gəslahəŋla pəra, ŋgaha gəduwal gəl, ada aŋha."
- [<sup>17</sup>Kəla madəvaday Paska kà, gumna adawəh gəl à masla daŋay tekula uwana asa à maham à ahəŋ dza, kà uwana uwaga kà adagay zagələ aŋha kà madaw à atà la gəl kəla madəvaday.]

- 18 Ama gesina aṅatà tawiyà la ndzəɗa: "Kèɗf kà kona uwaga, kaduwanula gəl à Barabas!"
- 19 (Tadùw Barabas à daṅay tekedika uwana apès à tsəh à gudəṅ à afik, akàɗ dza.)
- 20 Bā gotənaṅ Pilatus anavà atà gay ala aya, kà uwana asəl maduw gəl à Yesu.
- 21 Ama tazà kuda à zagəla la mawiyay: "Zləl masla à ahàf à adi, zləl masla à ahàf à adi."
- 22 Pilatus awùlla à atà la tsəh kà mamakər la magoɗf à atà: "Mawisiga ma uwala à uwana adàhàṅ la? Gəbəzà à mawisiga la slaka aṅha amiyaka bā tekula uwana takəɗla aw!", Pilatus agòɗf à atà: "Ama gəslahəṅ ala la kurpi, ṅgaha gəduwalla à gəl."
- 23 Ama tasà mawiyay à zagəla kaykay la magoɗfay: "Say mazləl masla à ahàf à adi", ṅgaha mawiyay aṅatà agèɗf à afik.
- 24 Ḑgaha kà bokuba uwana asà à atà la uwana Pilatus agəɗfāṅ à afik, kà marab ləw aṅatà.
- 25 Kiya uwaga kà, apèlla à atà masla makad dza uwana ala, tadùw à daṅay la mapès à tsəh à gudəṅ à afik la tsəh, kiya uwana maham à ahəṅ dza uwaga anàv. Ḑgaha tavà à atà Yesu à ahàl, kà atà aṅa madàhallaṅ, bokuba uwana asà à atà.
- 26 Mok uwana tadàla Yesu, tagagàm la dza anik uwana sləm aṅha Səmon, atsà à waṅ la fəta, masla kà zil gudəṅ Səren. Azlaslodzi takès, tafàl ahàf à kuda kà manəfla Yesu la tsəh.
- 27 Maham à ahəṅ dza aṅuvaw, la azlamis, tanəfà la hulolo ṅgaha la mataway kà masla, tabàk ahàl à gəl.
- 28 Yesu agòt ala à huma à gay, agòɗf à atà: "Azlamis gudəṅ Urusalima katuwaw kà gi aw, ama tūwàw à gəl aṅkul la azlabəza aṅkul,
- 29 kà uwana mavakay adàsa à waṅ à uwana tadəgəɗfay kà: 'Marabay kà la azladəgər, la azlauwana azlabəza tasà awà aṅatà aw.'
- 30 Kiya uwaga azladza tadàdzəka magoɗàh azlagudəṅ: 'Tadàw anu à gəl, ṅgaha hədàhàw anu à ahəṅ', tadəgəɗfay à azladəgəwal.
- 31 Baṅa dza adəhəṅ kiya uwanay la ahàf biyaga, ma kakay adəpaka vok la magolga ma?"
- 32 Tadàla azlaməna nakəra anik à awtày səla, kà makad atà la slaka gə.
- 33 Mok uwana tabəz à slaka uwana Golgota tagòɗfàl kà, (Uwana asal magoɗfay: slaka hərəṅ gəl), tatàslàh atà à ahàf à adi tekula la ahàl kaf, tekula la ahàl gudzay aṅha.
- 34 Kiya uwaga Yesu agòɗf: "Baba, basà à atà tsakana aṅatà, kà uwana tasəl uwana tadəhəṅ aw!" Ḑgaha tavàhà lukut aṅha la tataka aṅatà la abà, la matsal tsatsa lakəl.
- 35 Maham à ahəṅ dza la abatà, azlamasiga aṅa azla Yahudiya uwana la abatà tadzəkà makəɗaslla Yesu la magoɗfàl: "Masla uwana abàlāhà azladza anik kà, masla la gəl

aṅha kà, abèla gəl aṅha suwaṅ zlà, à baṅa masla kà Kristu, uwana Zəzagəla akèsàni tak zlà!”

<sup>36</sup>Azlaslodzi babay takə̀d̀aslal; tatə̀d̀alla iyaw hamhamga,fc

<sup>37</sup>ṅgaha tagòd̀al: "Baṅa kak la uwana sufəl aṅa azla Yahudiya kà, b̀èlla gəl aṅak zlà!”

<sup>38</sup>Aganay à uwana tatsetsèr à gəl aṅha à afik: DZA UWANAY KÀ SUFƏL AṅA AZLA YAHUDIYA.

<sup>39</sup>Tekula la tataka aṅa azladza sèla uwana la abà tatàsl à atà à ahàf à adi atà nna, akə̀d̀aslal la magòd̀ay: "Kak kà, kak Kristu aw takay? B̀èlla gəl aṅak, ṅgaha b̀èlla anu babay zlà!”

<sup>40</sup>Ama anik uwanay apìsal iyaw à tsəh la kaykay agòd̀al: "Kahoy yewdi aṅa Zəzagəla, à kà uwana kagaw la seriya tekula la abà la masla aw takay?”

<sup>41</sup>Kà aṅami kà uwanay takə̀d̀ anu kà, azlayla atà takə̀d̀ anu. Kà uwana leri mə̀b̀əzaw à masik aṅa tatak uwana mə̀d̀ahàwwàṅ. Ama masla kà, ad̀ahà mawisiga amiyaka b̀a tekula à ahàl aw.”

<sup>42</sup>Ḷgaha agòd̀al: "Kamkam Yesu, d̀afà gi à ahəṅ la sləm, à vud̀ uwana kadàgay la makoray aṅak la abà.”

<sup>43</sup>Yesu agòd̀al: "Had̀ay, gə̀pəh à ka la dziriga: Lakana uwanay kà, kadàgay la makoray gulo la abà, anu sèla.”

<sup>44</sup>La tataka afats mə̀ləs apakà vok la kutso la abà gesina tsə̀ràh afats dat magova gova gə̀rewni delga.

<sup>45</sup>Mok uwana afats adakəl mə̀ləs kà, bafta uwana la gày Zəzagəla la aku akwohà la tsə̀ràh à afik tsə̀ràh à və̀d̀ah, la tataka la abà.

<sup>46</sup>Kiya uwaga Yesu awiyà la ndzə̀d̀a agòd̀: "Baba, gəsaka masasə̀d̀ok gulo kà la ahàl aṅak." Mok uwana adapəh uwaga la gay ala kà, amə̀ts.

<sup>47</sup>Mə̀ṅga aṅa azlaslodzi aṅa azla Rom anə̀ṅà tatak uwana apakà vok gesina, adzəkà magòd̀ay: "Ndzer kà, dza uwanay kà, dza dziriga", ṅgaha adzəkà mazlə̀b Zəzagəla.

<sup>48</sup>La lig la ahəṅ kà, maham à ahəṅ dza gesina uwana tasà à waṅ kà manəṅ uwana apakà vok gesina kà, tawùl à mtəga la madad gay ləv.

<sup>49</sup>Azlaslawda aṅa Yesu la azlamis uwana tanə̀fà à waṅ dagay la Galili, tatsàzl à fə̀ta à awtày kà manə̀rəz tatak uwana apakà vok gesina.

<sup>50</sup>Dza anik la ahəṅ uwana sləm aṅha Yusufu, uwana la tataka aṅa azlamasiga la abà, masla babay kà dza dziriga.

<sup>51</sup>Masla kà adzugway kà lakəl aṅa mas à waṅ makoray Zəzagəla, masla kà atsənà sawaray aṅa azladza anik babay aw, masla kà zil gudəṅ Arimate, la kutso Yahudiya la abà.

<sup>52</sup>Ahàd, abèz à Pilatus à vok kà manaval mazimnekid aṅa Yesu.



<sup>53</sup>Uwana Pilatus adaval tetəvi kà azəb vok aŋa Yesu à ahəŋ la ahàf la adi kà, afafàdal lukut à adi. Dgaha adàlla à zəvay mawga uwana à agu talà à təhus à afik, tafà dza à agu didi dadàŋ aw.

<sup>54</sup>Vud uwatà kà, vud madàh vok à ahəŋ aŋa vud maduw ləv.

<sup>55</sup>Azlamis uwana tanəfà Yesu à waŋ la tsəh dagay la Galili, tanəfà Yusufu à waŋ, tanəŋà zəvay, ŋgaha la tsəhay maf Yesu uwana à ahəŋ tahənàŋ à ahəŋ la zəvay la aku.

<sup>56</sup>Dgaha tawùl à mtəga aŋatà, ŋgaha tadàhà vok à ahəŋ la azlaamàl, la azlamatərsin kà madàh à Yesu à vok. Dgaha la vud maduw ləv kà taduw ləv bokuba uwana mapəhay agod.

## Luka 24

<sup>1</sup>Bəŋ la zay la tsəh, vud ladu kà, azlamis uwatà tadàla azlaamàl la azlamatərsin uwana tadàhàŋ à ahəŋ kà madla.

<sup>2</sup>Azlamis tabəz à zəvay à gəl kà matakoslal bəlam la ama ala gə, zad zwek la gay zəvay.

<sup>3</sup>Tadà à agu, ama tanəŋà sləb vok aŋa Sufəl Yesu aw.

<sup>4</sup>Gəl akàd à atà à vok. Bokuba uwana atà la madzugway la abà kà, azlamalika səla tatsàkwàh à lukut medəkuga təlla gə à abà, tapəhatàla vok. Lukut aŋatà aŋərəzl atà à adi.

<sup>5</sup>Ama uwana guba adakad à atà à gay gesina kà, sasukwà tadzà à ahəŋ, azladza uwatà tagòd à atà: "Kà mana kayahaw dza uwana la sifa la tataka azlamazimnekid la abà ma?"

<sup>6</sup>Aga la abanay aw, adawula à uda la mamətsay. Dzùgwàw lakəl aŋa uwana apəh à akul la mok uwana à lig la Galili tsi.

<sup>7</sup>Say Kona aŋa dza agəy mav à ahəl aŋa azlaməna tsakanaga, ŋgaha tadàtatasl à ahàf à adi, ŋgaha awul à uda la mahənay mamakər."

<sup>8</sup>Kiya uwaga awùlla atà à gəl à gay aŋa Yesu uwana apəh à atà.

<sup>9</sup>Dgaha tatsizlla ala la gəl zəvay, tadàla gay uwaga à slaka azlaməna matapla kulo gəl aŋha tekula uwanay, ŋgaha à azladza anik gesina bay.

<sup>10</sup>Uwaga kà azla Mariyama dəg zla Magdala, Yohana, ŋgaha Mariyama iyà aŋa Yakuba, la azlamis anik uwana tahəd atà nna, tapəh gay uwaga à azlaməna matapla aŋha.

<sup>11</sup>Ama azlaməna matapla uwaga tafà sləm à gay uwaga aw, uwaga kà: 'Gay masesinay', tagòd.

<sup>12</sup>Ama Piyer atsizlla ala, ahəd à gel zəvay; anəŋà à agu kà, anəŋà kà azlagabaga pəra, ŋgaha awul à mtəga la mavalàh à zagəla kà tatak uwana apakà vok.

- 13**La mavakay uwaga Piyer awùl à lig, aganay azladza sèla la tataka azlamèna manəf Yesu la tsəh, tadà à gudəŋ uwana sləm aŋha Emawus. Tataka aŋatà atà la Urusalima kà bokuba magur mahoy pəlis zlo mala məkwa.
- 14**Tavàts gay la tetəvi la ama, lakəl aŋa tatak uwana apakà vok gesina.
- 15**Kiya uwaga mok uwana tabày vok la mavats gay kà, Yesu adasa à waŋ à slaka aŋatà, tahàd la tetəvi la ama atà nna.
- 16**La abatà tanəŋəŋ masla, ama tatak anik adəf à atà gay à ahəŋ, kà aŋa masəlay.
- 17**La abatà Yesu abadətəmà: "Lakəl ma aŋa mana ma, kabàyàw vok gay la tetəvi la ama ma?", agòd à atà. Dgaha tatsizlla à ahəŋ la mazaw la gəl.
- 18**La kità tekula aŋatà, uwana sləm aŋha Kəleyopas, agòdàl: "Kak ma, kak məlok aŋa Urusalima ay? Kasəl uwana apakà vok la mahənay uwanay la abà aw takay?" Dza uwaga anavà atà: "Mana apakà vok ma?"
- 19**"Aa, à tatak uwana apakà vok la Yesu, zil Nazaret uwana masla mapəhal gay à ahəl aŋa Zəzagəla aŋa mapàh à azladza, masla maslay, la ndzədə la gay la abà la huma Zəzagəla, ŋgaha la slaka azladza ay?
- 20**Ama azlamasiga aŋa azlaməna mav tatak à Zəzagəla, la azlaməna makoray gami tavà à ahəl aŋa azladza aŋa makəday la matatasl à ahəf à adi.
- 21**Tekefika anu mənawəŋ kà masla la uwana adəzlak Isərayel, ama lakana mahənay mamakər aŋha à uwana tatak uwanay apakà vok.
- 22**Dgaha aya kà, azlamis anik la tataka gami la abà, takəf anu gəl à vok. Kà uwana bəŋ la zay la tsəh lakana kà, tahàd à gəl zəvay.
- 23**Ama tabəzà mazimnekiƒ aŋa Yesu aw, tawùl à waŋ aŋa mapəh à anu, kà azlamalika tapəh à atà vok, ŋgaha tapəh à atà la paraka, kà Yesu la adi.
- 24**Mok uwana azlamis tapəh uwaga kà, azlaməna gami anik tahàd à gel zəvay, ŋgaha tanəŋəŋ gesina bokuba uwana azlamis tapəh, ama masla kà, tanəŋəŋ aw."
- 25**La kaslà uwatà Yesu agòd à atà: "Kayyà, akul azladza matsən sləm aw gə, akul azlanalnal aŋa makəs mapəhay aŋa azladza uwana Zəzagəla apəh à atà gay à ahəl aŋa mapàh à azladza!
- 26**Kiya uwaga Kristu asà ŋgərpa dadəŋ la uwana ada à makoray aŋha à abà?"
- 27**Kiya uwaga apəh à atà à gay uwana tatsetsèr lakəl aŋha la wakità Zəzagəla la abà gesina, la wakità aŋa Musa la abà, akədàl gəl la wakità aŋa azladza uwana Zəzagəla apəh à atà gay à ahəl kà mapàh à azladza.
- 28**Uwana tazlábèz à gudəŋ uwana à abà asà à atà maday kà, dza uwaga azəb atà asik lakəl ala.
- 29**Azladza sèla uwanay tazàlal à tsəh la magòdàl: "Mədzà à ahəŋ anina adagay vəf." Dgaha adagay kà madz à ahəŋ atà nna.

- <sup>30</sup>Kaslà aña mazuw tatak may adaslay kà, tadzəkà madz à tatak may à adi la slaka gà, uwana tadzəl à adi kiya uwaga kà, azəb kaf, "Kikay", agòd à Zəzagəla, atsakəŋ ala, avà à atà.
- <sup>31</sup>La katskats yewdi aŋatà apəzlla à ama ala, tasəl masla, ama azà à atà à adi.
- <sup>32</sup>"Agà! Mok uwana aɓadānumà, apəh à anu gay Zəzagəla la tetəvi la ama kà, ləv azlawəh kà anu à ama aw takay?"
- <sup>33</sup>La gay uwaga hahadzək tavəlāh à afik, tawul à Urusalima. Tabəz azlaməna matapla kulo gəl aŋha tekula à gəl la azlaslagama aŋatà.
- <sup>34</sup>Tagòd: "Ndzer, məŋga gami kà awul à uda la mamətsay, kà uwana Səmon Piyer anəŋəŋ.
- <sup>35</sup>Kiya uwaga azladza səla uwanay tawul à waŋ à slaka aŋatà, tapəh à atà gay uwana apakà vok la tetəvi la ama, la masəl Yesu aŋatà la mok uwana atsəkà kaf ala."
- <sup>36</sup>Mok uwana taləg la mabādma la abà aya, à uwana Yesu atsizlla à tataka aŋatà à abà, adāhà à atà 'Ayyi', agòd à atà: "Lapiya agay la akul!"
- <sup>37</sup>La abatà aŋidz ahamà à atà à gəl məŋga, kà uwana: 'Mədanəŋ tatak mavavat dza', gəl agod, agòd à atà.
- <sup>38</sup>Kiya uwaga masla agòd à atà: "Kà mana kagudəkəhəwla ala ma? Kà mana katsəw gay la ləv aŋkul la tsəh ma?"
- <sup>39</sup>Bà, gi ndzer gəvələw à ahəl gulo la azlaasik gulo tsi, dəbəwəni gi, kà uwana tatak mavavat dza kà la sləb vok, la aslasl, bokuba dza aw."
- <sup>40</sup>Uwana adapəh à atà gay uwaga, apəhatàla ahəl aŋha, la azlaasik aŋha.
- <sup>41</sup>Ama taslāla vok aŋa makəsay aw, kà uwana marabay aduwà ndzəda aŋatà; la abatà Yesu anavà atà: "Tatak may aga la akul la ahəl ay?"
- <sup>42</sup>Maslà tavəl tenma aŋa kilfi manazayga la pəhəw malpayga, la zuway mazuway.
- <sup>43</sup>Azəb, ŋgaha apəd la huma aŋatà.
- <sup>44</sup>La lig la ahəŋ agòd à atà: "Mok uwana gi la akul gəgòd à akul kà: Tatak uwana matsetserayga lakəl gulo la wakità aŋa Musa la abà la azlauwana la wakità aŋa azlaməna mapəh à atà gay à ahəl la abà kà mapəh à azladza anik, ŋgaha la uwana la mahabay aŋa David la abà gesina kà, azlayla kà vok apakà vok haday."
- <sup>45</sup>La abatà Yesu apakwà haŋkəli aŋatà, kà atà aŋa matsən wakità Zəzagəla uwaga.
- <sup>46</sup>Ŋgaha agòd à atà aya: "Aganay, à gay uwana tatsetsər à abà: 'Kristu as ŋgərpa dadəŋ, ŋgaha kà masla aŋa mawul à uda la mamətsay la mahənay mamakər.
- <sup>47</sup>Kiya uwaga azlayla vok, kazəw gay uwanay à azladza gesina la sləm aŋha, kadzaw kà la abanay la Urusalima, tsərəh à makəd gəl à ahəŋ gudəŋ à vok gesina, zəw à atà gay mapəh gay la ləv ala, la gay mabasa à atà tsakana aŋatà.'

<sup>48</sup>Akul kà, akul azlaməna sayda aŋa uwaga.

<sup>49</sup>Kiya uwaga, gi la gəl gulo gədàsləlla akul Masasəđok Zəzagəla uwana à ahəŋ, Baba gulo apəh à ahəŋ uwarà, ama say: Dzàw à ahəŋ la gudəŋ uwanay tsərəh à uwana ndzəđa aŋa Masasəđok uwaga adàsa à akul à gəl dadəŋ, la uwana kadàdaw.”

<sup>50</sup>La lig aŋa uwaga la ahəŋ gesina, Yesu asəlla atà à uda la gudəŋ la abà tsərəh à uwana tazləbəz à gudəŋ Betaniya. Mok uwana tadabəz à abatà kà adziyla ahəl à zagəla, ŋgaha apis à atà gay à vok.

<sup>51</sup>La abatà Zəzagəla azəb à slaka aŋha.

<sup>52</sup>Kiya uwaga tazləbà, ŋgaha tawùlla à Urusalima la marabay məŋga.

<sup>53</sup>Ama tadzàhà à ahəŋ koksikoksi la məŋ gày Zəzagəla la aku kà mazləb Zəzagəla.

## Yuhana

### Yuhana 1

- <sup>1</sup>Mok uwana Zəzagəla aləg madàh gudəŋ à vok dadəŋ kà, agà la ahəŋ uwana tazàlalla Gay. Gay uwatà adzà à ahəŋ la Zəzagəla. Gay uwaga kà Zəzagəla la gəl aŋha.
- <sup>2</sup>Gay uwaga agà la Zəzagəla dagay madzəka.
- <sup>3</sup>Tatak gesina uwana Zəzagəla adàhəŋ kà, kà masla; tatak anik la ahəŋ à uwana Zəzagəla adàhəŋ kokudà masla aw.
- <sup>4</sup>Sifa kà la masla la abà, sifa uwatà kà avà udàka à azladza.
- <sup>5</sup>Udàka uwaga aùd la mələs la abà, mələs aslalà vok à mamatsiŋ ala aw.
- <sup>6</sup>Zəzagəla aslèl dza anik uwana à waŋ, sləm aŋha Yuhana.
- <sup>7</sup>Asà à waŋ kà, kà maz sayda aŋa udàka. Asà à waŋ kà, kà azladza gesina kà madiŋal gəl à vok, kà madegolay uwana apàh.
- <sup>8</sup>Masla à Yuhana agà udàka la gəl aŋha aw, ama asà à waŋ kà maz sayda lakəl aŋa udàka uwaga.
- <sup>9</sup>Udàka uwaga kà agà udàka dziriga, asà à waŋ à gudəŋ à vok, uwaga aùd à azladza gesina.
- <sup>10</sup>Gay uwaga agà la gudəŋ la vok. Zəzagəla adàhə gudəŋ à vok kà la masla, ama azladza uwana la gudəŋ la vok tasəl aw.
- <sup>11</sup>Agà la tataka aŋa azladza aŋha la abà, ama azladza aŋha takweskà.
- <sup>12</sup>Ama azlauwana takəs, la azlauwana tadiŋal gəl à vok, avà à atà maslay kà mapakahay azlabəza aŋa Zəzagəla.
- <sup>13</sup>Tapàk azlabəza aŋa Zəzagəla la tetəvi aŋa azladza la mayyay aŋa vədàh, bokuba uwana azladza tatugway aw. Ama Zəzagəla la uwana, avà à atà sifa mawga.
- <sup>14</sup>Gay uwaga apàk dza la sləb vok, adzà à ahəŋ la tataka gami la abà. Ləv aŋha kà tekula la slaka azladza, adahənla la dziriga, kà aŋha kà, apəhanula mazləbay aŋha, uwana la mazləbay uwana bəzi tekula abəzal la slaka Baba aŋha.
- <sup>15</sup>Yuhana azà sayda lakəl aŋha, awiyà: "Lakəl aŋha gəpəh à akul à uwana gəgòd: 'Masla manəf gi à tsəh à waŋ atsà à waŋ, ama masla la uwana mazləbayga kà gi, masla kà agà la ahəŋ dagay uwana taləg mayyi gi, aduwa gi la maslay', gəgòd à akul."
- <sup>16</sup>Anu gesina məbəzà à masik la gorobu la abà; məbəzà à mapis gay à vok kaykay lakəl aŋa mapis gay à vok aya.
- <sup>17</sup>Zəzagəla avà à anu mapəhay la ahəl aŋa Musa, ama vok mahamay la dziriga kà tasà à waŋ kà la ahəl aŋa Yesu Kristu.

- 18**Dza adanəŋ Zəzagəla diki diki aw, ama Kona aŋha tekula gə, uwana la makəla aŋha Baba lakəl, la uwana apəhanula masla.
- 19**Aganay uwana Yuhana apəh à mok uwana azla Yahudiya la Urusalima tasləl azlaməna mav tatak à Zəzagəla la azlaməna sləray la mənə gəy Zəzagəla la aku à slaka aŋha kà manaval: "Kak ma, kak uwa?"
- 20**Akweskà mawulatàla aw, ama adzadəŋ ala la paraka la huma aŋatà gesina: "Gi kà, gi Kristu aw."
- 21**"Kak uwa zlà ma uwa? Kak Eliya, uwana tapəh uwarə ay?" "Awaŋ, gi masla aw", Yuhana agòd à atà. "Kak masla mapəhal gay ahəl aŋha Zəzagəla ay?", tagòdəl. "Awaŋ", agòd à atà.
- 22**Kiya uwaga tagòdəl: "Kak uwa zlà ma uwa? Say kapəh à anu gay ŋgaha mədəpəh à azlauwana tasləl anu à waŋ. Kak la gəl aŋak ma: 'Gi uwà' kagòd lagwa uwa?"
- 23**Yuhana agòd à atà: "Gi kà gi 'Kuda aŋha dza uwana awiyay la kəsaf la abà: Dahàw tetəvi tərta à ahəŋ kà aŋha Sufəl!" (Kiya uwaga à uwana masla mapəhal gay à ahəl Yesayya atsetsèr à wakità Zəzagəla à abà)
- 24**La tataka azlaməna masləl atà à waŋ uwatà la abà kà, azla Farisəya la abà.
- 25**Tanavà Yuhana: "Tsa aŋha kak Kristu aw, kak Eliya aw, kak masla mapəhal gay à ahəl kà mapəh à azladza aw, ma kà mana kadəh batem zlà ma?"
- 26**Yuhana agòd à atà: "Gi gədəhakullaŋ batem kà la iyaw; dza anik la ahəŋ la tataka aŋkul la abà, kasəlaw aw,
- 27**atsa à waŋ la lig gulo la ahəŋ, ama gi bay kà gəsla kà mapəl zuwid kwimik aŋha ala babay aw."
- 28**Tatak uwaga gesina adəhà vok la Betaniya, la gay dərəv uda anik aŋha mukwà Urdun, la slaka uwana Yuhana adəhà batem.
- 29**La bebəŋ gə, Yuhana anəŋà Yesu atsà à waŋ à slaka aŋha, agòd: "Aganay magadzaw aŋha Zəzagəla uwana azəb tsakana aŋha gudəŋ à vok gesina.
- 30**Lakəl aŋha la uwana gəpəh à akul, gəgòd à akul: 'Dza la ahəŋ atsa à waŋ la lig gulo. Masla la uwana mazləbayga kà gi, kà uwana masla kà, agà la ahəŋ dagay uwana taləg mayyi gi.
- 31**Gi kà gəsəl masla aw, ama gəsà à waŋ kà madəh batem aŋha iyaw à azlatsəhay Isərayel, kà atà aŋha masəl masla.' "
- 32**Yuhana agòd aya: "Gənəŋà Masasədok tsikasla atsà à ahəŋ la zagəla bokuba habakoku, adzà à gəl aŋha.
- 33**La mok uwatà gəsəl masla aw, ama Zəzagəla la uwana asləl gi kà gi aŋha madəh batem: 'Masasədok adədza madzay lakəl aŋha, masla kà adədəh batem la Masasədok Zəzagəla', agòd à gi.

- <sup>34</sup>Gədanəŋ uwaga, gəgədfiŋ à afik, kà masla la uwana Kona aŋa Zəzagəla", Yuhana agòd.
- <sup>35</sup>La bebəŋ gà aya kà, Yuhana adatsizilla à ahəŋ la abatà la azlaməna matapla la slaka aŋha səla.
- <sup>36</sup>Uwana anəŋà Yesu ada à awtày agòd: "Aganay Magadzaw aŋa Zəzagəla!"
- <sup>37</sup>Azlaməna matapla aŋha səla uwaga kà, tatsənà uwana apəh, ŋgaha tanəfà Yesu.
- <sup>38</sup>Yesu agolà vok, anəŋà à lig, anəŋàŋ kà tanəfà masla, ŋgaha anavà atà: "Mana kayahaw ma?" Tagòdál: "Rabbi, kadza à ahəŋ ma lala?" (Rabbi asal magodáy: Məŋga)
- <sup>39</sup>Agòd à atà: "Sàw à waŋ, kadànəŋawwaŋ!" Dgaha tahàd, tanəŋà slaka madz à ahəŋ aŋha. (Mok uwaga kà sa ufaɗ aŋa mokokhu) Tadəvə mavakay uwatà à gay atà nna.
- <sup>40</sup>Tekula la tataka aŋa azladza uwana la abà tatsənà sayda aŋa Yuhana, anəfà Yesu, masla la uwana Andəre, deda aŋa Səmon Piyer.
- <sup>41</sup>Terəŋa dadəŋ, Andəre agagəm la deda aŋha Səmon, agòdál: "Kay, mədanəŋ Kristu, bokuba magodáy: dza uwana Zəzagəla afəl dzakwa à gəl!"
- <sup>42</sup>Adàla Səmon à slaka Yesu. Yesu anərəz masla, agòdál: "Kak la uwana, kak Səmon kona aŋa Yuhana, la huma la gay sləm aŋak adəgay Kayfas." (Uwana asal magodáy kà dzəgla)
- <sup>43</sup>La bebəŋ gà, asà à Yesu kà mad à kutso Galili ŋgaha tagagəm la Filip, agòdál: "Nəfà à gi!"
- <sup>44</sup>Filip kà zil Betsayda, gudəŋ aŋatà tekula la Andəre la Piyer.
- <sup>45</sup>Filip tatagəm la Natanayel, ŋgaha agòdál: "Mədanəŋ dza uwana Musa apəh lakəl aŋha la wakità mapəhay la abà, baməraka azlaməna mapəh à atà gay à ahəl kà mapəh à azladza babay kà, tapəh lakəl aŋha, sləm aŋha kà, Yesu kona aŋa Yusufu uwana la gudəŋ Nazaret."
- <sup>46</sup>Natanayel agòdál: "Dziri kà tatak delga aguwa à waŋ la Nazaret ay?" Filip agòdál: "Sà à waŋ, kadànəŋəŋ!"
- <sup>47</sup>Mok uwana Yesu anəŋà Natanayel ada à awtày à slaka aŋha kà, apəh lakəl aŋha: "Aganay zil Isərayel deŋdeŋga, mawisiga la ahəŋ la masla la abà aw."
- <sup>48</sup>Natanayel anavàl: "Kakay kasəl gi ma?" Yesu agòdál: "Gənəŋà ka à mok uwana kak la tsəh gudəv, à mok uwana Filip aləg mazala ka."
- <sup>49</sup>Kiya uwaga Natanayel agòdál: "Rabbi, kak la uwana kak Kona aŋa Zəzagəla, kak Sufəl aŋa azla Isərayel!"
- <sup>50</sup>Yesu awulà ala: "Kadiŋal gəl à vok kà, kà uwana gənəŋà ka la tsəh gudəv, gəgòd à ka takay? Kadànəŋ azlatatak uwana tadəduw uwanay gesina."

<sup>51</sup>Yesu agòdál aya: "La dziriga gəpəh à akul, kadənəḡaw zagəla mapəzl à ama ala gə. Tsad tsatsad, azlamalika aḡa Zəzagəla tadàda à afik, ḡgaha tatsa à ahəḡ à gəl aḡa Kona aḡa dza."

## Yuhana 2

<sup>1</sup>Uwana mahəḡay səla adada à lig kà mamakərga, kà mazəb vok apakà vok la Kana la kutso aḡa Galili. Iyà aḡa Yesu la abata.

<sup>2</sup>Yesu atà la azlaməna matapla la slaka aḡha bay kà tazàla atà à mazəb vok uwaga à abà.

<sup>3</sup>Mok uwana iyaw matavəruk adadəv à gay. Iyà aḡa Yesu agòdál: "Tatak masay la ahəḡ aya aw!"

<sup>4</sup>Ama Yesu awulà ala: "Mis, kak la uwana kapəh à gi uwana asa à gi madəhəḡ takay? Kaslà gulo adaslay dadəḡ aw."

<sup>5</sup>ḡgaha iyà aḡha agòd à azlaməna sləray: "Dahàw tatak uwana adəpəh à akul gesina!"

<sup>6</sup>La abata agà la ahəḡ yuḡ mukwà, uwana azla Yahudiya tatadani iyaw à abà kà madāhlaḡ sləray kà mapalahla azlaasik kà uwana uwaga kà bokuba mafəla fəla aḡata, kà magay tsidəḡa. Kəla yuḡ tekula adāh tuguzl zlo, baḡaw mukwa.

<sup>7</sup>Yesu agòd à atà: "Hànəw iyaw à azlayuḡ uwanay à abà pawasl papawasl." Tahənəḡ ala bokuba uwana apəh à atà.

<sup>8</sup>Kiya uwaga Yesu agòd à atà: "Tadawni iyaw uwaga ḡuv, kadawla à məḡga aḡa madəvaday." Tatəđani, tadàlla.

<sup>9</sup>Məḡga aḡa madəvaday atapəḡ, kà apək iyaw matavəruk. Masla asəl slaka uwana aguwa à waḡ à abà aw. (Ama azlaməna matat iyaw kà, tasəl slaka uwana aguwa à waḡ la abà) Azàla masla mazəb mis,

<sup>10</sup>ḡgaha agòdál: "Azladza kà tatsəvkàh mavəhay kà iyaw matavəruk matsidəyga dadəḡ, baḡa azlaməna mazaləh atà gesina tasay kà, la lig la ahəḡ kà pəra, tavəh uwana atsid aw. Ama kak kà, kabək matsidəyga à ahəḡ dadəḡ."

<sup>11</sup>Uwaga la uwana nadzipo matera uwana Yesu adəhəḡ la Kana la kutso Galili, apəhla mazləbay aḡha ala, kà uwana à uwana azlaməna matapla la slaka aḡha tadḡḡ gəl à masla à vok.

<sup>12</sup>La lig aḡa uwaga la ahəḡ, ahəd à gudəḡ Kapernahum la iyà aḡha, la azladedə aḡha, la azlaməna matapla la slaka aḡha, tadzàni à ahəḡ la abata.

<sup>13</sup>Uwana madəvaday aḡa Paska aḡa azla Yahudiya nekwa kà, Yesu ahəd à Urusalima.

<sup>14</sup>Abèz azlaməna matsakalay à gəl, la məḡ gəy Zəzagəla la aku. Tadəw sla ala, la azlatuwaḡ, la azlahabakoku, abèz azlaməna mabadla sili à gəl bay, tadzəh madzay la huma aḡa sili aḡata, tabəđla.



<sup>15</sup>Adàhà kurpi aṅa zuwid, akudǎkàh atà à lag gesina la mənɔ gày Zəzagəla la aku, la azlatuwaŋ, la azlasla aṅatà, adakwà table aṅa azlaməna mabadla sili à vədàh anasà sili aṅatà ala.

<sup>16</sup>Ŋgaha agòd à azlaməna madaw azlahabakoku ala: "Həlàw atà ala la abanay! Kapakàw gày aṅa baba gulo ala kà gày matsakalay aw!"

<sup>17</sup>Təh, awùl à azlaməna matapla la slaka aṅha gay uwana tatsetsèr à wakità Zəzagəla à abà à gəl: 'Mawoy gày aṅak gulo kà, bokuba akàl uwana ababəhgəla ləv la tsəh.'

<sup>18</sup>Ama azlamadzahaga aṅa azla Yahudiya tanavàl: "Tsəhay nadzipo ma uwala kapəhanula kà anu aṅa masəlay kà kak la maslay kà madəhəŋ kiya uwanay la?"

<sup>19</sup>Yesu agòd à atà: "Kàlàw mənɔ gày Zəzagəla uwanay à ahəŋ, ŋgaha gədàula à afik la mahənay makər."

<sup>20</sup>Azla Yahudiya tagòdàl: "Gày uwanay taŋàl kà tadàhà mavay dzik ufaɖ gəl aṅha mukwà, kà pəra masla kadàwula à afik la mahənay makər kagod, aah..?!"

<sup>21</sup>Ama mənɔ gày Zəzagəla uwana Yesu apəh, kà lakəl aṅa vok aṅha.

<sup>22</sup>Uwana Yesu adawula à uda la mamətsay kà, təh awùl à azlaməna matapla à gəl la slaka aṅha à gay uwaga, tadìŋ gəl uwana à vok matsetserayga, ŋgaha la gay uwana Yesu apəh à atà gesina.

<sup>23</sup>Mok uwana Yesu la Urusalima, la kaslà aṅa madəvaday aṅa Paska kà, azladza aṅuvaw tadìŋal gəl à vok, kà azlanadzipo uwana adàhàtəŋ.

<sup>24</sup>Ama Yesu afà à atà gəl aw, kà uwana asəl madzugway aṅatà lela.

<sup>25</sup>Kà uwana masla kà anəkudà dza aṅa mapəhalla madzugway aw, kà uwana masla la gəl aṅha asəl uwana la ləv aṅatà la tsəh.

### Yuhana 3

<sup>1</sup>Dza anik la ahəŋ sləm aṅha Nikodemus, agà tekula aṅa azlamasiga aṅa azla Yahudiya, masla kà zil Farisəya.

<sup>2</sup>La vəd la abà vərđi anik asà à waŋ à slaka Yesu la magòdàl: "Rabbi, məsəl kà Zəzagəla asləl ka à waŋ kà matapanula, kà uwana dza la ahəŋ adəhəŋ tsəhay nadzipo uwaga kadəhəŋ aw, tsa baŋa Zəzagəla la masla aw aw."

<sup>3</sup>Yesu agòdàl: "Hadày, gəgod à ka la dziriga: Dza aslala vok manəŋ makoray Zəzagəla aw, say baŋa adayyi vok mawga dən."

<sup>4</sup>Nikodemus anavàl: "Kakay dza adagay magol gə, kà ayyi vok mawga aya ma? Aslala vok aṅa maul à huɖ aṅa iyà aṅha kà mayyay aya ay?"

<sup>5</sup>Yesu agòdàl: "La dziriga gəpəh à ka: Dza aslala vok aṅa mad à makoray Zəzagəla aw, say baŋa adayyi vok, la iyaw ŋgaha la Masasədok.

<sup>6</sup>Uwana tayyà la sləb vok, uwaga sləb vok; uwana tayyà la Masasəđok, uwaga Masasəđok.

<sup>7</sup>Ləv avàl à ka à gay kà, kà uwaga gəpəh à ka aw: 'Azlawla kà vok, say akul gesina kayyaw vok mawga.'

<sup>8</sup>Afad adəđay bokuba uwana asal; katsəna madəđay aŋha, ama kasəl slaka uwana asà à waŋ la abà aw, kasəl slaka uwana ada à abà aw. Kiya uwaga à uwana apaka vok la azladza uwana tayyà vok la Masasəđok."

<sup>9</sup>Kiya uwaga Nikodemus agəđal: "Kakay uwaga apaka vok ma?"

<sup>10</sup>Yesu agəđal: "Tsa kak masla matapla à azla Isərayel la abà, kà pəra masla kasəl uwaga aw uwà?"

<sup>11</sup>Gəpəh à ka la dziriga: Məpəhay lakəl aŋa tatak uwana məsəl, ŋgaha lakəl aŋa tatak uwana mənəŋəŋ. Ama asa à akul makəs sayda gami aw.

<sup>12</sup>Tsa kadiŋaw gəl à gay aŋa azlatatak uwana apaka vok la vəđah aw ma, ŋgaha ma, kakay zlà ma kadəkəsaw kaslawwal à vok aŋa madiŋal gəl à vok à baŋa gəpəh à akul gay aŋa azlatatak la zagəla ma?"

<sup>13</sup>Dza la ahəŋ adada à zagəla aw, tsa baŋa Kona aŋa dza uwana asà à ahəŋ la afik aw aw."

<sup>14</sup>"Kiya uwana uwarà Musa adzilà bebi aŋa adà à zagəla la ahəf la gay la fəta la abà, kiya uwaga tadədzilla Kona aŋa dza à zagəla suwaŋ.

<sup>15</sup>Ŋgaha kəla uwabeyuwi uwana adiŋ gəl à masla à vok abəz sifa adəv à gay aw.

<sup>16</sup>Kà uwana Zəzagəla awoya gudəŋ à vok kà kaykay, à uwana avà Kona aŋha tekula gə uwaga, kà dèwdèw dza uwana tadiŋal gəl à vok kà, tazila aw, ama kà, tadəbəz sifa adəv gay aw.

<sup>17</sup>Zəzagəla asləl Kona aŋha à waŋ kà, kà seriya à gudəŋ à vok à gəl aw, ama kà gudəŋ à vok aŋa mabəz mabəlay la masla."

<sup>18</sup>"Dza uwana adiŋ gəl à Kona à vok, seriya adəkəsaw aw, ama dza uwana adiŋal gəl à vok aw kà, seriya adəkəsaw, kà uwana adiŋ gəl à Kona tekula gə aŋa Zəzagəla à vok aw.

<sup>19</sup>Aganay slaka uwana seriya aguwaŋ la abà: Udəka asà à waŋ à gudəŋ à vok, ama azladza tahaya mələs kà udəka, kà uwana madəhəŋ aŋatà kà delgaw.

<sup>20</sup>Azladza gesina tadəh mawisiga kà, tapəsew dziriga aŋa udəka, ŋgaha tatsa à waŋ à udəka à abà aw, kà uwana asa à atà kà sləray mawisiga uwaga aŋa mapəhla vok ala, la udəka la abà aw.

<sup>21</sup>Ama dza uwana akəs dziriga kà, aday kà la udəka la abà, kà azladza gesina aŋa manəŋəŋ la dazuwaya, kà akəs gay aŋa Zəzagəla la masləkaway."

<sup>22</sup>La lig aña uwaga la ahəŋ Yesu atsizilla ala, ahàd à kutso aña Yahudiya à abà la azlaməna matapla la slaka aŋha. Tasàfàni la abatà atà nna, tadàhàhà batem.

<sup>23</sup>La kaslà uwatà kà Yuhana adàhàhà batem à azladza la Aynon, uwana nekwa la Salim, kà uwana iyaw la ahəŋ la abatà məŋga. Azladza tasàhà à waŋ à slaka aŋha, ŋgaha adàhà à atà batem, suwaŋ.

<sup>24</sup>(La kaslà uwatà kà, Yuhana kà tadùw à daŋay dadàŋ aw)

<sup>25</sup>Kiya uwaga azlaanik la tataka azlaməna matapla aña Yuhana la abà tadzəkà mabay vok gay la zil Yahudiya anik, lakəl aña tsəhay mapal vok aŋatà aña magay tsidàŋa.

<sup>26</sup>Tahàd à slaka Yuhana ŋgaha tagòdàl: "Rabbi, kadzugway lakəl aña dza uwana kagaw akul səla la gay dərəv uda aña mukwà Urdun, uwana kaz anu sayda lakəl aŋha takay? Lagwa kà, masla bay kà, adàh batem à azladza, azladza takəl à slaka aŋha gesina!"

<sup>27</sup>Yuhana agòd à atà: "Dza la ahəŋ aslala vok abəz tatak aw, say baŋa Zəzagəla adavàl.

<sup>28</sup>Akul la gəl aŋkul kà, akul azlaməna sayda gulo, gəgòd kà: Gi Kristu aw. Ama gi à masləl gi à waŋ gà, la huma aŋha pəra.

<sup>29</sup>Masla mazəb mis kà masla la uwana zil mis. Ama sləgud aña zil misga, adatsizilla à ahəŋ la makəla aŋha, atsəbal sləm. Baŋa adatsən kuda aña zil mis, arabay. Kiya uwaga à marabay gulo babay suwaŋ zlà. Lagwa kà, marabay gulo adahənla pawasla.

<sup>30</sup>Kà aña uwaga kà, say masla agay mazləbayga, ŋgaha mazləbay gulo atatuway."

<sup>31</sup>"Dza uwana asa à ahəŋ la zagəla, masla lakəl aña azlatatak gesina, ama dza uwana la vədàh masla dza aña vədàh, apəhay kà gay aña vədàh bay. Uwana asa à ahəŋ la zagəla aga lakəl aña tatak gesina.

<sup>32</sup>Uwana anəŋàŋ, uwana atsənàŋ la uwana apəhay, ama dza akəs mapəhay aŋha aw.

<sup>33</sup>Kəla uwabeyuwi uwana akəs mapəhay aŋha, agədaŋ à afik kà Zəzagəla kà dziriga.

<sup>34</sup>Dza uwana Zəzagəla aslèlla à waŋ apəhay gay aña Zəzagəla, kà uwana ahənəŋ ala la Masasədok aŋha.

<sup>35</sup>Baba awoya Kona aŋha, ŋgaha avàl ndzəda lakəl aña tatak gesina.

<sup>36</sup>Dza uwana adiŋ gəl à Kona à vok, abəz sifa adəv à gay aw, ama dza uwana akweska Kona, adàbəz sifa uwaga tetuwa à aw, ama mapak ləv aña Zəzagəla adza à ahəŋ lakəl aŋha."

## Yuhana 4

<sup>1</sup>Azla Farisəya tatsənàŋ kà Yesu adàh batem, ŋgaha abəz azlaməna matapla dāduwa à gay aña Yuhana.

- <sup>2</sup>(Ama Yesu la gəl aḡha kà adfahà batem à dza amiyaka tekula aw, say azlaməna matapla la slaka aḡha pəra)
- <sup>3</sup>Mok uwana Yesu atsənà uwaga tapəhay kà, asàk à kutso Yahudiya à ahəḡ, awùl à Galili.
- <sup>4</sup>Kà awùl à Galili kà, say aguwà à uda la kutso Samariya.
- <sup>5</sup>La mas à uda la Samariya abəz à gudəḡ uwana à abà sləm aḡha Səser, uwana nekwa la guf uwana Yakuba avà à kona aḡha Yusufu.
- <sup>6</sup>La abatà suwa aḡa Yakuba la ahəḡ, Yesu adəy vok la mauguzahay aḡha la abà, adzà madzay la gay suwa. Mok uwaga azlagay tataka afats.
- <sup>7</sup>Mis Samariya asà à waḡ kà matəḡ iyaw, Yesu agòḡal: "Mis təḡ à gi iyaw, gəsay!"
- <sup>8</sup>(La kaslā uwatà kà, azlaməna matapla aḡha tadà à huḡ gudəḡ kà mayàh tatak may)
- <sup>9</sup>Mis Samariya agòḡ à Yesu: "Kak, kak zil Yahudiya! Kakay kaslala vok kà manav à gi iyaw masay à gi uwana gi mis Samariya ma?" (Apəh kiya uwaga kà, kà uwana azla Yahudiya tatsənà vok la azla Samariya aw ma)
- <sup>10</sup>Yesu awulà ala: "Agayḡa kasəl tatak uwana Zəzagəla avəy kà, ḡgaha naka kasəl dza uwana anava à ka iyaw masay kà, naka kak la uwana kanaval iyaw sifa, ḡgaha naka avà kà uwaga."
- <sup>11</sup>Mis agòḡal: "Məḡga, tsa tatak matəḡla iyaw aga la kak là ahəl aw, suwa bay kà kərkər ma, kakay kabəz iyaw sifa ma?"
- <sup>12</sup>Baba gami madzidziga Yakuba avà à anu suwa uwanay; bay kà asàh la azlabəza aḡha la azlaləmana aḡha babay. Kadzugw ma, 'Gəḡuwa Yakuba', kagòḡ, takay?"
- <sup>13</sup>Yesu awulà ala: "Kəla uwabeyuwi uwana asà iyaw aḡa suwa uwanay, nəlay adəkəsay aya,
- <sup>14</sup>ama dza uwana adəsay iyaw uwana gəḡətəḡfallaḡ kà, nəlay adəkəsay aya aw. Kà uwana iyaw uwana gəḡətəḡfallaḡ kà, adəpakay la huḡ aḡha mukwà aḡa iyaw, uwana akəlay aḡa sifa adəv à gay aw."
- <sup>15</sup>Mis agòḡal: "Məḡga, təḡḡəḡ iyaw uwaga, kà nəlay aḡa makəs gi aya aw, ḡgaha kà gi aḡa manəkudā aḡa mas à waḡ aḡa matəḡ iyaw la abanay aya aw."
- <sup>16</sup>Yesu agòḡal: "Həd, kazala zil aḡak, kasawwaḡ à abanay."
- <sup>17</sup>Mis agòḡal: "Zil gulo la ahəḡ aw." Yesu agòḡal: "Dziriga à uwana kapəh: 'Zil gulo la ahəḡ aw', kagòḡ."
- <sup>18</sup>Hadəy, kadàh à zil zlo, ama uwana kak la mtəga aḡha lagwa kà, zil aḡak aw. Kapəh dziriga."
- <sup>19</sup>Kiya uwaga mis agòḡal: "Məḡga, gəsəl kà kak masla mapəhal gay à ahəl aḡa Zəzagəla.

- <sup>20</sup>Azlababa gami madzidziga tadavàh kuḏà à Zəzagəla la gudəŋ uwanay la afik, ama akul azla Yahudiya kà, kagodaw kà: 'Slaka uwana dza adəv kuḏà à Zəzagəla, kà la Urusalima', kagodaw."
- <sup>21</sup>Yesu agòḏal: "Mis, diŋ à gi gəl à vok, kaslà adàsa à waŋ à uwana kadədəvwaw kuḏà à Baba Zəzagəla la gudəŋ uwanay la afik aw, amiyaka la Urusalima aw.
- <sup>22</sup>Akul azla Samariya kasəlaw tatak uwana kadəvwawwal kuḏà aw; ama anu, anu azla Yahudiya kà, məsəl tatak uwana mədəval kuḏà, kà uwana mabəlay kà, asa à uda kà la azla Yahudiya la abà.
- <sup>23</sup>Ama kaslà adàsa à waŋ, lagwa kà adasa à waŋ lagwa, uwana azlaməna madəv kuḏà tadədəv kuḏà la Masasədök ŋgaha la dziriga, azladza uwana tadəv kuḏà kiya uwaga à ahəŋ, à uwana Baba ayahay.
- <sup>24</sup>Zəzagəla kà Masasədök gà, azlauwla kà vok kà, azlauwana tadəval kuḏà kà la Masasədök ŋgaha la dziriga."
- <sup>25</sup>Mis agòḏal: "Məsəl kà Mesi atsa à waŋ, uwana asal magodəy kà Kristu. A baŋa adàsa à waŋ, adəpəhanula tatak gesina."
- <sup>26</sup>Yesu agòḏal: "Gi gà la uwaga gəbadəkama lagwa."
- <sup>27</sup>La kaslà uwatà, azlaməna matapla la slaka aŋha tawùl à waŋ, ŋgaha ləv avàl à atà à gay kà uwana tavàts gay la mis. Ama dza aslala vok aŋa manaval aw: "Mana asal mi? Baŋaw, kà mana kabadəwma akul səla mi?", la ahəŋ aw.
- <sup>28</sup>Kiya uwaga mis asək à tuguzl aŋha à ahəŋ, ahəd à huḏ gudəŋ à abà, la abatà agòḏ à azladza:
- <sup>29</sup>"Sàw à waŋ, kà nəŋəwwəŋ dza uwana adapəh à gi tatak uwana gəḏahəhəŋ gesina. Zlahaw kà, masla Kristu aw ay?"
- <sup>30</sup>Azladza tasà à uda la gudəŋ la abà, tahəd à slaka Yesu.
- <sup>31</sup>La kaslà uwatà azlaməna matapla tadəv kuḏà à Yesu kà mazuw tatak may. "Rabbi, kamkam zùw tatak may!", tagòḏal.
- <sup>32</sup>Ama agòḏ à atà: "Gi la tatak may uwana kasəlaw aw."
- <sup>33</sup>La abatà azlaməna matapla tanəv vok kà atà kà atà: "Dza anik adasalla tatak may à waŋ kəlay?"
- <sup>34</sup>Yesu agòḏ à atà: "Tatak may gulo kà, makəs gay aŋa dza uwana asləl gi à waŋ, ŋgaha madəh sləray uwana afà à gi à ahəl kà madəhəŋ.
- <sup>35</sup>Akul kà, kagodaw kà, à lig təla ufaḏ kà matsəḏ tatak, ama gi kà gəgod à akul kà, nərəzəw guf lela tsi, hi adahəŋay, nekwa kà matsəḏəy.
- <sup>36</sup>Masla matsəḏ tatak abəz masik aŋha, ŋgaha ahama hi à ahəŋ kà aŋa sifa adəv à gay aw, ŋgaha kà masla masləkay atà la masla matsəḏəy tarabay la slaka gà.
- <sup>37</sup>'Dza anik asləkay, dza anik atsəḏəy', uwana gay la gay la abà agod kà, bà dziriga.

- <sup>38</sup>Gəsləl akul kà matsəday la guf uwana la abà kadəhaw sləray la abà aw; azladza anik tadəhà sləray gə uwana, ŋgaha kà kabəzaw à gəl kà sləray aŋatà.”
- <sup>39</sup>Azla Samariya aŋuvaw tadinjal gəl à vok la gudəŋ uwatà kà gay uwana mis apəh à atà: "Apəh à gi tatak gesina uwana gədadəhəŋ", mis agòd à atà.
- <sup>40</sup>Mok uwana tadasa à waŋ à slaka Yesu, tadəval kudà kà madzin à ahəŋ atà nna; kiya uwaga Yesu adəhà mavakay səla atà nna.
- <sup>41</sup>Gotənaŋ aŋuvaw tadinj gəl à Yesu à vok, kà gay aŋha uwana apəh à atà.
- <sup>42</sup>La abatà tagòd à mis: "Lagwa kà, mədinjal gəl à vok kà uwana kapəh à anu pəra aw, ama kà uwana anu la gəl gami mədatsəŋəŋ uwana apəh, la dziriga, məsəl kà masla la uwana masla mabəl gudəŋ à vok.”
- <sup>43</sup>Mok uwana Yesu adadza à ahəŋ la abatà mavakay səla, asək atà à ahəŋ, ahəd à kutso Galili.
- <sup>44</sup>Yesu la gəl aŋha agòd: "Masla mapəhal gay à ahəl aŋa Zəzagəla mabəz mazləbay la gudəŋ aŋha la abà aw.”
- <sup>45</sup>Ama tekedik mok uwana adabəzay à gudəŋ aŋha, azladza takəs la ahəl səla, kà uwana mok uwana tahəd à madəvaday à Urusalima, tanəŋəŋ, uwana adəhəŋ la madəvaday uwatà la abà gesina.
- <sup>46</sup>La kaslà uwatà, masla awùl à Kana, la slaka uwana apakà iyaw ala kà iyaw matavəruk. Kana uwaga agà kà la Galili la abà. Masla sləray aŋa gumna la ahəŋ la abatà, bəzi aŋha la dūvats la Kapernahum.
- <sup>47</sup>Mok uwana masla sləray uwaga atsəŋəŋ kà Yesu adasa à waŋ à Yahudiya la Galili kà, masla atsizilla ala, ahəd à slaka Yesu, adəval kudà kà manəf masla à Kapernahum, kà masla aŋa mawur bəzi aŋha ala. Kà uwana bəzi agà kà la ləv la ləv pəra.
- <sup>48</sup>Yesu agòdəl: "Akul gesina, kadinjaw gi gəl à vok aw, say baŋa kadəŋəŋaw azlanadzipo la uwana kadədinjawwal gəl à vok.”
- <sup>49</sup>Masla sləray agòdəl: "Məŋga, sà à waŋ à mtəga gulo dadəŋ, kà mamətsay aŋa bəzi gulo.”
- <sup>50</sup>Yesu agòdəl: "Həd à mtəga aŋak, bəzi aŋak aga la ahəŋ, adza à ahəŋ la sifa, awkà adəmətsay aw." Zil uwaga adin gəl à uwaga à vok Yesu apəhal.
- <sup>51</sup>Uwana agà la tetəvi la ama, kà mawul à mtəga, tagagəm la azlaməna sləray aŋha, maslà tagòdəl: "Bəzi aŋak adabəlay!”
- <sup>52</sup>Masla anəv à atà la məl, ma uwala abəzà à ŋuləm la. Tagòdəl: "Lakuhu la sa tekula, à uwana akəl vok asəlla vok ala.”
- <sup>53</sup>Kiya uwaga awùl à baba à gəl kà kalkal la kaslà uwana Yesu apəhal: "Bəzi aŋak adabəlay", agòdəl. Kà uwaga à uwana masla la azlaməna huɸ gay aŋha gesina tadinj gəl à Yesu à vok.

<sup>54</sup>Uwaga kà masèla aṅa nadzipo uwana Yesu adàhàṅ dagay la mas à uda aṅha la Yahudiya, la kutso Galili.

## Yuhana 5

<sup>1</sup>Uwana uwaga adada à lig, azla Yahudiya tadzèkà mahab madəvaday, Yesu bay ahàd à Urusalima.

<sup>2</sup>La gudəṅ uwatà la abà nekwa la gamagày aṅa azlatuwaṅ, agà la ahəṅ iyaw matsakayga uwana sləm aṅha la gay ibəranəṅkowen: Betsata. Iyaw uwatà tanudà ala à gay à abà la azlatsatsagla zlo.

<sup>3</sup>La tsəh aṅa tsatsagala uwatà, azlaməna dūvats aṅuvaw tahànàhal à tsəh: azlaguləf, azladeri, azlamagul à afik gà. [Takudàh mabəlak vok aṅa iyaw uwana abəlakàhà à vok.

<sup>4</sup>Kwà à kwà malika aṅa Zəzagəla asàh à ahəṅ aṅa mabəlakàh iyaw uwaga. Masla dūvats uwana atsa à vok à iyaw uwaga à abà abəlakay, awur ala la dūvats aṅha la abà, baməraka dūvats tsəhay gà uwala beyli gesina.]

<sup>5</sup>Masla dūvats anik la ahəṅ la abatà, adadàh mavay dzik makər gəl aṅha mtəgis.

<sup>6</sup>Uwana Yesu anəṅà dza uwatà la slaka mahən à ahəṅ, asəl kà adasafay la dūvats aṅha uwaga la abà, Yesu agòdàl: "Asa à ka mawur ala ay?"

<sup>7</sup>Masla dūvats awulà ala, anəṅal à adi agòdàl: "Məṅga, dza gulo la ahəṅ aṅa madla gi à abà la kaslà uwana iyaw abəlak vok aw. Baṅa gəwad vok à uda, gəda à abà zlà, gədagəday kà dza anik atsà à vok à abà kà gi."

<sup>8</sup>Yesu agòdàl: "Sà à afik, zəb butsi aṅak, ṅgaha dà aṅak!"

<sup>9</sup>Hadzak, asà à afik awür ala, akəl butsi aṅha à abà, adzəkà maday. Ama mavakay uwatà kà mavakay maduw ləv tekedik.

<sup>10</sup>Uwana azlamasiga aṅa azla Yahudiya tanəṅəṅ, tagòd à dza uwana awür ala: "Lakana kà vud maduw ləv, wakità mapəhay gami avà tetəvi kà mazəb butsi aṅak aw!"

<sup>11</sup>Agòd à atà: "Dza uwana awurà gi ala agòd à gi: 'Kəl butsi aṅak à abà, ṅgaha dà aṅak', agòd à gi."

<sup>12</sup>Tanavàl la gay ala: "Uwa à dza uwana 'Zəb butsi aṅak, dà aṅak', agòd à ka uwa?"

<sup>13</sup>Ama dza uwana awurà ala kà, asəl dza uwana awurəṅ ala aw. Yesu adadiy aṅha la abatà, kà uwana maham à ahəṅ dza aṅuvaw la abatà.

<sup>14</sup>Zwek, la huma la gay, Yesu agagàm à məṅ gày Zəzagəla à agu atà sèla, ṅgaha agòdàl: "Tsənəṅ lagwa kà kawür ala. Kadàhàṅ tsakana aya kà tatak mawisiga uwana adūwa uwanay aṅa mabəza kà aya aw!"

<sup>15</sup>Dza uwaga adà aṅha, ṅgaha agòd à azla Yahudiya kà Yesu la uwana awurəṅla.

- 16**Kà uwaga à uwana azla Yahudiya tadzèkà matèrèb Yesu, à kà uwana awurà dza ala la vuɔ maduw lèv.
- 17**Ama Yesu agòɔf à atà: "Baba gulo adàh slèray koksikoksi, gi bay kà gòdèhèj kiya uwaga suwaŋ."
- 18**Kà gay uwaga à uwana, azla Yahudiya tayàh kaykay kà makòɔɔy, kà uwana agòɔf kà Zəzagəla kà Baba aŋha, ŋgaha agagazləla gəl aŋha la Zəzagəla. Awkà kà, uwana apəsèw mavakay maduw lèv pəra aw.
- 19**Kà uwaga, Yesu agòɔf à atà: "Gəgòɔf à akul la dziriga, Kona aslala vok madàh tatak la gəl aŋha aw, say anəŋəŋ kà say uwana Baba adèhèj. Uwana Baba adèhèj gesina, uwaga la uwana Kona adèhèj babay.
- 20**Kà uwana Baba awoya Kona, apəhalla uwana adèhèj gesina. Adàpəhalla à azlatatak uwana aduwa uwanay aya, kà Kona aŋa madàh uwaga. Ŋgaha uwaga adaval akul ala lèv à gay.
- 21**Bokuba uwana Baba awùlla azlamazimnekid à uda la mamətsay kà mav à atà sifa kà, kiya uwaga babay Kona av sifa à uwabeyuwi uwana awoyaŋ gesina.
- 22**Baba kà adàh seriya à dza à gəl aw, ama avà maslay madàh seriya uwaga à ahàl aŋa Kona aŋha gesina,
- 23**kà azladza gesina aŋa masləkaway Kona, bokuba uwana tasləkaw Baba. Dza uwana asləkaw Kona aw, masla asləkaw Baba uwana asləl à waŋ babay aw."
- 24**"Gəpəh à akul la dziriga, dza uwana atsəb sləm à gay gulo, ŋgaha adiŋ gəl à dza uwana à vok asləl gi à waŋ kà, masla la sifa adəv à gay aw. Seriya adəkəsəy aw, aguwa à uda la mamətsay, adàbəz sifa adəv à gay aw.
- 25**Hadəy gəgòɔf à akul la dziriga, kaslà atsa à waŋ, ŋgaha kaslà uwaga aga la tataka gami la abà lagwa, uwana azlamazimnekid tadàtsenəŋ kuda aŋa Kona aŋa Zəzagəla, ŋgaha kà azlauwana tadəkəɔɔɔdəl à ahəŋ tadàdz à ahəŋ la sifa.
- 26**Iyay, bokuba uwana Baba la maslay kà mavəy sifa adəv à gay aw à azladza, kiya uwaga bay avà maslay uwaga à Kona aŋha à ahàl, kà masla aŋa mav sifa à azladza.
- 27**Avà maslay à Kona aŋha kà madàh seriya, kà uwana masla Kona aŋa Zəzagəla.
- 28**Ləv aval à akul à gay kà uwaga aw, kà uwana kaslà atsa à waŋ, à uwana azlamazimnekid uwana la zəvay la aku gesina tadàtsən kuda aŋha,
- 29**ŋgaha tadàsa à uda la zəvay aŋatà la aku. Azladza uwana tadəhàŋ delga tadəwula à uda kà mabəzal masik aŋatà uwana sifa adəv à gay aw, ama azlauwana tadəhàŋ mawisiga tadəwula à uda kà madəhàtaŋ seriya à gəl."
- 30**"Gi la gəl gulo kà gəslala vok kà madàh tatak aw, gəɔh seriya kà bokuba uwana 'Dahàŋ', Baba agòɔf à gi, seriya gulo kà dziriga, kà uwana gəyàh mawoyəŋ aŋa gəl gulo aw. Ama uwana asa à dza uwana asləl gi à waŋ pəra.
- 31**Baŋa gəz sayda aŋa gəl gulo kà, sayda gulo kà agay dziriga aw.



- <sup>32</sup>Ama say dza anik la uwana az sayda lakəl gulo, gəsəl kà sayda uwana aziṅ lakəl gulo kà dziriga.
- <sup>33</sup>Kasləlaw azlaməna matsəb sləm à slaka Yuhana, sayda aṅha uwana azaṅ kà dziriga.
- <sup>34</sup>Ama gi kà gənəkudā aṅa sayda aṅa dza aw, gəula akul à gəl kà, kà akul aṅa mabəz mabəlay pəra.
- <sup>35</sup>Yuhana kà agà kà bokuba fənəs mavatsiṅ à ahəṅ gə pəra, ṅgaha karabaw ṅuv la udfaka aṅha la abà.
- <sup>36</sup>Ama sayda gulo uwana gəziṅ kà, aduwà aṅa Yuhana uwana azəṅ, azlasləray uwana Baba gulo avà à gi kà mahənəṅla kà, taz sayda gulo. Dgaha babay kà apəhla ala kà Baba la uwana asləl gi à waṅ.
- <sup>37</sup>Baba uwana asləl gi à waṅ apəhay lakəl gulo aya. Akul kà kadətsənaw kuda aṅha didi aw, ṅgaha kadənəṅaw hud'adi aṅha babay aw.
- <sup>38</sup>Akul kafaw gay aṅha à ləv aṅkul à tsəh aw, kà uwana kadiṅawwal gəl à vok à dza uwana asləl à waṅ aw.
- <sup>39</sup>Kadzeṅaw wakità Zəzagəla la haṅkəli, kadzugwaw kà: 'La abà la uwana mədàbəz sifa adəv à gay aw', kagodəw. Bə dziri haday gə, la wakità uwaga la abà la uwana sayda gulo.
- <sup>40</sup>Ama asa à akul aṅa mas à slaka gulo aṅa mabəz sifa dziriga aw."
- <sup>41</sup>"Ama gi kà, gəyàh mazləb gi aṅa azladza aw.
- <sup>42</sup>Ama akul kà, gəsəl kà, kawoyaw Zəzagəla la ləv aṅkul la tsəh aw.
- <sup>43</sup>Gəsà à ahəṅ kà la sləm aṅa Baba gulo, ama karabaw gi à huma aw. Ama baṅa dza anik atsa à waṅ la maslay aṅa aslasl gəl aṅha kà, kakəsaw.
- <sup>44</sup>Akul asa à akul mayàh mazləbay aṅa azladza anik anik, ṅgaha kayahaw mazləbay uwana asa à ahəṅ la slaka Zəzagəla dziriga aw. Dgaha ma kakay kadiṅaw gəl à vok ma?
- <sup>45</sup>Ama kadzugwaw kà, gədàta akul kaf à gəl la slaka Baba gulo, kagodəw aw. Ama Musa la uwana adàta à akul kaf à gəl, à masla uwana kafaw manəwəṅ aṅkul à masla à afik.
- <sup>46</sup>Agayṅa ndzer, kadiṅaw gəl à Musa à vok kà, naka kadiṅaw gi gəl à vok babay, kà uwana Musa atsetsèr kà lakəl gulo.
- <sup>47</sup>Ama tsa kadiṅaw gəl à uwana à vok atsetsèr aw ma, kakay kadiṅaw gəl à gay gulo à vok zlà ma?"

## Yuhana 6

- <sup>1</sup>La lig aṅa uwaga la ahəṅ, Yesu ahəd à gay dərəv à uda anik aṅa dərəv Galili, uwana tazalalla bay dərəv Tiberiya.

- <sup>2</sup>Maham à ahəŋ dza aŋuvaw tanəfà, kà uwana tanaŋà azlanadzipo uwana adəhàhəŋ la mawar azladza ala.
- <sup>3</sup>Yesu ahəd à dadəgwal à afik la abatà, tadzà madzay la azlaməna matapla la slaka aŋha.
- <sup>4</sup>Paska, madəvaday aŋa azla Yahudiya, nekwa.
- <sup>5</sup>Uwana Yesu anəŋà maham à ahəŋ dza aŋuvaw tatsà à waŋ à slaka aŋha, Yesu atəp à Filip agòdàl: "Lala mədàbəz tatak may kà masukway, kà mav à maham à ahəŋ dza uwanay aŋa mazuway zlà?"
- <sup>6</sup>Apəh uwaga kà, kà matap Filip. Awkà, masla kà asəl tatak uwana naka adəhəŋ.
- <sup>7</sup>Filip agòdàl: "Amiyaka məsukw kaf aŋa gursu dadərmokw səla bay kà, aslay kà kəla uwabeyuwi aŋatà aŋa mabəzal ŋuv aw."
- <sup>8</sup>Tekula la tataka azlaməna matapla aŋha la abà Andəre, deda aŋa Səmon Piyer agòdàl:
- <sup>9</sup>"Bəzi kohna anik la ahəŋ la abanay, kaf gay bəsew zlo la kilfi səla la ahəl, ama uwaga ma, mana akəs à vok aŋa maham à ahəŋ dza kiya uwanay ma?"
- <sup>10</sup>Kiya uwaga Yesu agòd' à atà: "Dzàw azladza madzay gesina, slaka uwatà kà delga kà madzàh madzay, kà uwana kəsaf la ahəŋ." Ŋgaha atà tadzàhà madzay gesina aŋatà taslay zil dəbow zlo.
- <sup>11</sup>Yesu ahəl kaf uwaga, "Kikay", agòd' à Zəzagəla, atsakà kaf ala, ŋgaha avàhà à azladza. Ahəl kilfi, adəhəŋ kalkal kiya uwaga aya. Tazùw tsərəh à uwana asläh à atà.
- <sup>12</sup>Mok uwana tahànla gesina, Yesu agòd' à azlaməna matapla la slaka aŋha: "Hamàw gay à mapətsəh pətsəhga uwaga à vok, atədàl ala amiyaka tekula aw."
- <sup>13</sup>Ŋgaha tahamà gay à mapətsəh pətsəhga uwana à vok atəm a atà à ahəl, tahənəŋ ala takosà kulo gəl aŋha səla.
- <sup>14</sup>Uwana azladza tanəŋəŋ nadzipo uwana Yesu adəhəŋ, tagòd: "Kayyà, dza uwanay ndzer kà masla mapəhal gay à ahəl, uwana naka atsa à waŋ à gudəŋ à vok!"
- <sup>15</sup>Uwana Yesu asəl kà azladza tatsà à waŋ kà mafiya à sufəl à abà la ndzədà kà, kà uwaga à uwana adà aŋha à gudəŋ à afik kokudà gəl aŋha.
- <sup>16</sup>Mok uwana mokokhu adasa à waŋ kà, azlaməna matapla la slaka Yesu tadà à ahəŋ à gay dərəv,
- <sup>17</sup>tahəd à kəslah iyaw à afik, ŋgaha tadzəkà mad à uda la dərəv la abà, kà mabəziya à Kapernahum. La mok uwaga kà, vəf adasa à waŋ, Yesu aləg mabəz atà à tsəh dadəŋ.
- <sup>18</sup>Magol kular adzəkà à vok, iyaw dərəv adzəkà magaŋtsay la mavəlay lakəl.
- <sup>19</sup>Azlaməna matapla kà, taday azlatalka magur mahoyay pəlis səla la tenma baŋaw makər kà zlazladà aŋa afad. Uwana tanəŋ Yesu adà à awtəy à slaka aŋatà lakəl dərəv la asik kà, guba akəs atà.

- <sup>20</sup>Ama Yesu agòd' à atà: "Guba akəs akul aw, gi ñwà!"
- <sup>21</sup>Tayàh mazəb à tsəh la kəslah iyaw la afik nəma, la katskats tanəŋà kà kəslah iyaw adàdəbani kutso uwana asà à atà mad à abà.
- <sup>22</sup>La bebəŋ gà kà, maham à ahəŋ dza uwana tagəd' à gay dərəv à uda anik, awùl atà à gəl kà la mokokhu lakuhu kà, agà la ahəŋ pəra kà kəslah iyaw tekula, ŋgaha tasəl bay kà Yesu ahàd à kəslah iyaw à afik la azlaməna matapla la slaka aŋha aw. Ama azlaməna matapla aŋha tahàd kokudà gəl aŋatà pəra.
- <sup>23</sup>Ama pəra kà, azlakəslah iyaw anik taguwà à waŋ la Tiberiya, tasà à waŋ à slaka uwana Yesu avà kaf, à mok uwana kikay agòd' à Zəzagəla kà aŋa uwaga.
- <sup>24</sup>Uwana maham à ahəŋ dza anəŋəŋ kà Yesu la abatà aw, azlaməna matapla la slaka aŋha bay kà atà la abatà aw, tadàh à azlakəslah iyaw uwaga à afik, tada à Kapernahum kà mayahay.
- <sup>25</sup>La kiya uwaga tabəzà Yesu à vok la gay dərəv à uda anik aŋa dərəv ŋgaha tagòd' al: "Rabbi, kasà à abanay mbà?"
- <sup>26</sup>Yesu awulà à atà ala: "Haday, gəpəh à akul la dziriga, kayahaw gi kà, kà uwana kazùwàw kaf, kahànàwla, aslahà à akul, awkà kà azlanadzipo la azlasləray gulo uwana gədhəŋ aw.
- <sup>27</sup>Kadhəhaw sləray kà aŋa tatak may uwana awis ala aw. Ama dhəwàŋ kà aŋa tatak may uwana adza à ahəŋ, avà sifa adəv à gay aw. Tatak may uwaga kà, Kona aŋa dza la uwana adàv à akul la maslay, uwana abəzal la slaka Baba Zəzagəla."
- <sup>28</sup>Ŋgaha tanavàl: "Mana mədəhəŋ kà madàh sləray uwana asa à Zəzagəla zlà ma?"
- <sup>29</sup>Yesu awulà à atà ala: "Sləray uwana Zəzagəla akuday la slaka aŋkul kà, say madiŋ gəl à dza uwana à vok, Zəzagəla asləl à waŋ."
- <sup>30</sup>Tagòd' al: "Nadzipo ma uwala kapəhanula kà anu aŋa madiŋ à ka gəl à vok la? Ŋgaha ma sləray ma uwala kadəhəŋ la?"
- <sup>31</sup>Azlababa gami madzidziga tazùw manne à uwana asàhà à ahəŋ la zagəla la fəta la abà, bokuba uwana tatsetsèr à wakità Zəzagəla à abà. Masla avà à atà tatak may uwana asàh à ahəŋ la zagəla."
- <sup>32</sup>Yesu awulà à atà ala: "Haday la dziriga, gəpəh à akul, Musa la uwana avà à akul tatak may uwana asà à ahəŋ la zagəla aw. Ama Baba gulo la uwana avà à akul tatak may dziriga, uwana asà à ahəŋ la zagəla.
- <sup>33</sup>Kà uwana tatak may uwana Zəzagəla avày kà, anik la ahəŋ aw, say masla uwana asà à ahəŋ la zagəla, (Uwaga kà Yesu) ŋgaha ava sifa à azladza gudəŋ à vok gesina."
- <sup>34</sup>Kiya uwaga tagòd' al: "Kayyà Sufəl, v à anu tatak may uwaga koksikoksi kəla zlà!"
- <sup>35</sup>Yesu asà à atà ala à uda: "Gi la uwana gi tatak may aŋa sifa. Dza uwana atsa à waŋ à slaka gulo, adiŋ à gi gəl à vok kà, may adəkəs aya aw, nəlay adəkəs bay aw.

- <sup>36</sup>Ama gəpəh à akul: Kanəŋaw gi, ama bà la uwaga gesina kà, kanəŋaw gi kadiŋaw gi gəl à vok aw.
- <sup>37</sup>Mana beymi uwana Baba avà à gi, atsa à waŋ à slaka gulo, ŋgaha gədàkweska dza uwana atsa à slaka gulo aw.
- <sup>38</sup>Kà uwana gəsà à ahəŋ la zagəla kà, kà madəhəŋ mawoyəŋ aŋa dza uwana asləl gi à waŋ, awkà aŋa gəl gulo aw.
- <sup>39</sup>Aganay uwana asa à dza uwana asləl gi à waŋ: Kà gəziŋ ala tekula aŋa tatak uwana avà à gi à ahəl aw, ama kà gəula atà à uda la mamətsay la sifa la mavakay makəf gəl à ahəŋ gudəŋ à vok.
- <sup>40</sup>Aganay uwana asa à Baba gulo: Kà dèwdèw dza, uwana tanəŋà Kona aŋa Zəzagəla, ŋgaha tadiŋal gəl à masla à vok kà, tabəzal sifa adəv à gay aw, ŋgaha gədaula atà à uda la mamətsay la madəv à gay gudəŋ à vok.”
- <sup>41</sup>Azla Yahudiya taŋəŋuz lakəl aŋa Yesu, kà uwana Yesu, 'Gi tatak may uwana asà à ahəŋ la zagəla', agòf.
- <sup>42</sup>"Təga kà, Yesu kona aŋa Yusufu aw takay? Məsəl baba aŋha la iyà aŋha, ŋgaha ma kakay: 'Gəsà à ahəŋ la zagəla', agòf zlà ma?", tagòf.
- <sup>43</sup>Yesu awulà atà ala: "Sàkàw à maŋəŋuz à tsəh ala kà akul à akul.
- <sup>44</sup>Dza aslala vok aŋa mas à waŋ à slaka gulo aw, say Baba uwana asləl gi à waŋ, la uwana abiyəŋ masla à slaka gulo, ŋgaha gi gədaula à uda la mamətsay la vud makəf gəl à ahəŋ.
- <sup>45</sup>Azladza uwana Zəzagəla apəh à atà gay à ahəl kà mapəh à azladza, tatsetsèr à wakità à abà: 'Zəzagəla la gəl aŋha adàtapatala tatak gesina.' Kəla dza uwana atsəb sləm à Baba, akəs mapəhay aŋha, masla atsa à waŋ à slaka gulo.
- <sup>46</sup>Asal magofay, kà dza adanəŋ Zəzagəla aw. Dza uwana asà à ahəŋ la slaka Zəzagəla la uwana adanəŋ Baba pəra.”
- <sup>47</sup>"La dziriga gəpəh à akul, dza uwana adiŋal gəl à vok kà, adàbəz sifa adəv à gay aw.
- <sup>48</sup>Gi tatak may uwana avà sifa adəv gay aw.
- <sup>49</sup>Azlababa aŋkul madzidziga tazùw manne la fəta la abà. Bà la uwaga bay kà taməts à gay.
- <sup>50</sup>Ama uwabeyuwi uwana azuw tatak may uwana asà à ahəŋ la zagəla kà, adàmətsay aw.
- <sup>51</sup>Gi tatak may aŋa sifa, uwana asà à ahəŋ la zagəla. Baŋa dza azuw tatak may uwatà, adàdza à ahəŋ la sifa aŋa koksikoksi. Tatak may uwana gədàvəl kà vok gulo, gədàvəy, ŋgaha gudəŋ à vok aŋa madz à ahəŋ la sifa.”
- <sup>52</sup>Lakəl aŋa gay uwaga azla Yahudiya tabayà vok gay kà atà kà atà, tagòf: "Kakay dza uwanay avà à anu sləb vok aŋha aŋa mazuway ma?", tanavà vok.

- 53 Yesu agòd' à atà: "Haday, gəpəh à akul la dziriga: Baŋa kazuwaw sləb vok aŋa Kona aŋa dza aw, ŋgaha baŋa kasaw aŋiz aŋha aw kà, kadàbəzaw à sifa tetuwa aw.
- 54 Dza uwana azuw sləb vok gulo, ŋgaha as aŋiz gulo kà, abəz sifa adəv à gay aw, ŋgaha gədaula à uda la mamətsay la vud' makəd' gəl à ahəŋ gudəŋ à vok.
- 55 Kà uwana sləb vok gulo kà tatak may dziriga, ŋgaha aŋiz gulo bay kà tatak masay dziriga aya.
- 56 Dza uwana azuw sləb vok gulo, as aŋiz gulo, adza à ahəŋ la gi la abà, ŋgaha gi babay gədza à ahəŋ la masla la abà.
- 57 Bokuba uwana Baba uwana la sifa asləl gi à waŋ, ŋgaha gi gədza à ahəŋ la sifa kà masla, kiya uwaga babay dza, uwana azuw gi, adza à ahəŋ la sifa kà gi babay.
- 58 Aganay tatak may uwana asà à ahəŋ la zagəla: Masla kà bokuba uwana azlababa aŋkul tazawàh, uwana tamətsàh à gay aw. Ama dza uwana azuw tatak may uwanay, adàdza à ahəŋ la sifa aŋa koksikoksi."
- 59 Yesu apəh à atà gay uwaga kà la mok uwana atapla azladza la gəy madəv kudà la aku la Kapernahum.
- 60 Mok uwana tatsən uwana Yesu apəh kà, aŋuvaw la tataka azlaməna asik aŋha la abà tagòd': "Gay uwanay kà zlazladà, uwa aslala vok aŋa makəs uwaga uwa?", tagòd'.
- 61 Yesu asəl kà gay uwaga kà adàla maŋoŋuzay à azlaməna asik aŋha à ləv à tsəh, ŋgaha agòd' à atà: "Uwaga ma atsəd' akul à asik la tsəh ala takay?"
- 62 Kakay tak à gay kanəŋaw Kona aŋa dza, uwana ada à afik à slaka aŋha uwana à abà adzà à ahəŋ uwarà ma?
- 63 Masasədòk Zəzagəla la uwana avà sifa; vok aŋa dza kà asla tatak aw. Azlagay uwaga gəpəh à akul, la uwana Masasədòk ŋgaha sifa.
- 64 Ama azladza anik la ahəŋ la tataka aŋkul la abà kà, tadiŋal gəl à vok aw." (Kà uwana dagay madzəka kà, Yesu kà asəl azladza uwana tadàdiŋal gəl à vok aw, ŋgaha la dza uwana adàtal kaf à gəl)
- 65 Azaləŋ à gəl la magodəy: "Kà uwaga à uwana gəgod' à akul, dza aslala vok aŋa mas à waŋ à slaka gulo aw, tsa baŋa Baba abiyəŋ à waŋ, avəl tetəvi."
- 66 Dagay la mavakay uwatà aŋuvaw la tataka azlaməna manəfay aŋha la abà, tawùl à lig.
- 67 Kiya uwaga Yesu agòd' à azlaməna matapla la slaka aŋha kulo gəl aŋha səla: "Asa à akul madiŋ akul babay suwaŋ ay?"
- 68 Səmon Piyer agòd'al: "Sufəl, məday ma à slaka ma aŋa uwa? Tsa kak la azlagay uwana tav sifa adəv à gay aw uwa?"
- 69 Lagonay kà, mədiŋal gəl à vok, kak tsikaslaga uwana Zəzagəla asləl ka à waŋ."

<sup>70</sup>Yesu agòd à atà: "Akul kulo gəl aṅha səla gətsatsàmàni akul aw takay? Ama tsa tekula aṅkul kà seteni!"

<sup>71</sup>Apèh uwaga kà lakəl aṅa Yudas Iskariyot, kona aṅa Səmon, uwana agà la tataka azlaməna matapla kulo gəl aṅha səla uwaga la abà. Masla la uwana naka ata kaf à Yesu à gəl.

## Yuhana 7

<sup>1</sup>Uwana uwaga adada à lig kà, Yesu auguzàh la kutso Galili, asàl kà madz à ahəṅ la kutso Yahudiya aw, kà uwana azla Yahudiya tayàh makəday.

<sup>2</sup>Mok uwana madəvaday aṅa azla Yahudiya, uwana tazalalla madəvaday tsatsagla adagay nekwa kà,

<sup>3</sup>azladedə aṅha tagòdàl: "Zà vok la abanay, hàd à Yahudiya, kà azlaməna asik aṅak kà manəṅ sləray aṅak uwana kadəhahəṅ.

<sup>4</sup>Baṅa dza asal azladza tasəl masla kà, apəhla gəl aṅha ala. Tsa kadəhàh azlasləray anik anik kiya uwanay kà, dāhàṅ la paraka azladza aṅa manəṅ ka."

<sup>5</sup>(Amiyaka azladedə aṅha tadiṅ gəl à masla à vok bay aw)

<sup>6</sup>Yesu agòd à atà: "Kaslà gulo uwana asa à gi kà, adasa à waṅ aw. Ama kà akul kà, kəla kaslā gesina kà delga.

<sup>7</sup>Gudəṅ à vok aslala vok aṅa mapəsew akul aw, ama gi kà apəsew gi. Kà uwana gəpəh la paraka kà azlasləray aṅha uwana adəhəṅ kà mawisiga.

<sup>8</sup>Dàw aṅkul à madəvaday akul zlà. Məday anina aw, kà uwana kaslā uwana asa à gi adasa à waṅ dadàṅ aw."

<sup>9</sup>Uwana adapəh à atà gay uwaga kà, adzà à ahəṅ la Galili.

<sup>10</sup>Iyay, la mok uwana azladedə aṅha tad à madəvaday, masla babay ahàd, ama apəhla vok ala aw, la səbàh pəra.

<sup>11</sup>La abatà la madəvaday la abà azla Yahudiya tayàh masla la maham à ahəṅ dza la abà la madəvaday la abà: "Aṅala?", tagòd.

<sup>12</sup>Tavàts gay la tsəh ala la gəl à gəl lakəl aṅha, la tataka maham à ahəṅ dza la abà. Azlaanik tagòd: "Masla kà, dza delga", azlaanik tagòd bay: "Awaṅ, dza delga aw!" Tagòd: "Masla mazàh azladza ala."

<sup>13</sup>Ama dza aslala vok aṅa mapəhay gay lakəl aṅha la dazuwaya aw, kà uwana guba akəs atà kà azla Yahudiya.

<sup>14</sup>Mok uwana madəvaday adada à lig tenma kà, Yesu ahàd à məṅ gày Zəzagəla à agu, adzəkà matapla tatak à azladza.

<sup>15</sup>Ləv avàl à azla Yahudiya à gay la magòday: "Kakay dza uwanay asəl tatak tsa tapla aw ma?"

- 16**Yesu awulà à atà ala: "Matapla uwana gəpahlà ala kà, asa à waŋ kà la slaka gulo aw, ama asà à ahəŋ kà la slaka Zəzagəla, uwana asləl gi à waŋ.
- 17**Baŋa dza asal maďāh masal aŋa Zəzagəla kà, adəsəl tatak uwana gəpəhakulla kà, asa à waŋ kà la slaka Baba Zəzagəla, awkà uwaga kà gay aŋa ndzəda aŋa aslasl gəl gulo aw.
- 18**Dza uwana apəh gay aŋa aslasl gəl aŋha kà, ayàh mazləb gəl aŋha. Ama dza uwana adāh sləray kà aŋa dza uwana asləl à waŋ kà, masla kà apəhay kà uwana dziriga, ŋgaha mawisiga la ahəŋ la uwana la abà apəhay aw.
- 19**Musa avà à akul mapəhay aw takay? Ama amiyaka tekula aŋkul kà, akəs gay aŋa mapəhay aw. Kà mana kayahaw makəď gi zlà ma?"
- 20**Maham à ahəŋ dza awulà: "Kak la masasəďok mawisiga, kak masla zagəla zagəla, uwa ayàh makəď kà uwa?"
- 21**Yesu agəď à atà: "Gəďahəŋ kà sləray tekula pəra, à uwana ləv avəl akul à gay gesina!"
- 22**Musa avà à akul tetəvi kà makadav azlabəza à uda, (Amiyaka Musa la uwana adzəkà makadav azlabəza à uda babay aw, ama azlababa aŋkul madzidziga), kà uwaga à uwana kakadavaw azlabəza aŋkul à uda la vuď maduw ləv bay.
- 23**Kakadavaw dza à uda la vuď maduw ləv kà matəm mapəhay aŋa Musa à ahəŋ aw, ŋgaha ma kà mana kapakaw gi ləv à gəl, à kà uwana gəwurà dza ala səďakaka la vuď maduw ləv ma?
- 24**Sàkàw à maďāh seriya aŋa tatak uwana kanəŋawwaŋ la uda gə. Đgaha đahəw seriya la tetəvi aŋha."
- 25**Azladza anik uwana tadzà à ahəŋ la Urusalima tagəď: "Dza gə la uwanay à uwana tayahay aŋa makəďay aw takay?"
- 26**Nəŋàwwəŋ, abadma la dazuwaya la tataka azladza la abà, ama uwala gay la ahəŋ tapəhal aw. Đgaha azlaməŋga gami ma tasəl kà masla la uwana Kristu ndzer zlà ma uwa?
- 27**Ama baŋa Kristu adàsa à waŋ, dza la ahəŋ asəl slaka uwana adaguwa à waŋ la abà aw. Ama dza uwanay kà məsəl slaka uwana asà à waŋ la abà."
- 28**Yesu ataplà la məŋ gəy Zəzagəla la aku, azà kuda à zagəla agəď à atà: "La dziriga kasəlaw gi, ŋgaha kasəlaw slaka uwana gəsà à waŋ la abà ay? Gi kà, gəsà à waŋ kà la aslasl gəl gulo aw, ama dza uwana asləl gi à waŋ kà, dza dziriga. Akul kà kasəlaw aw!"
- 29**Ama gi kà, gəsəl masla, kà uwana la slaka aŋha la uwana gəsà à waŋ, ŋgaha masla la uwana asləl gi à waŋ bay."
- 30**Kiya uwaga tayàh makəs masla, ama dza aslà kà matapal ahəl à vok aw, kà uwana kaslà aŋha adaslay dadəŋ aw.

- 31** Aṅuvaw la tataka maham à ahəṅ dza la abà, tadiṅ gəl à masla à vok, tagòd: "Baṅa Kristu adàsa à waṅ kà, adàdehəṅ azlanadzipo adàduwaṅ aṅa kona uwanay ay?", tagòd.
- 32** Azla Farisəya tatsənà uwana maham à ahəṅ dza apèh la gəl à gəl lakəl aṅa Yesu, ṅgaha azlamadzahaga aṅa azlaməna mav tatak à Zəzagəla, la azla Farisəya tasləl azlakohana kà makəs masla.
- 33** Yesu apèh à atà la paraka: "Gi la ahəṅ la akul aṅa kaslà ṅuv aya, la lig la ahəṅ gədàwula à slaka dza, uwana asləl gi à waṅ.
- 34** Kadàyahaw gi ama kadàbəz gi aw, kà uwana kaslaw mad à slaka uwana gədàday aw."
- 35** Azla Yahudiya tanəv vok kà atà kà atà: "Lagwa ma masla ma adàday ma uwala à uwana: 'Kadənəṅaw gi aya aw', agòdla? Adàday ma à slaka azla Yahudiya uwana taslèh gəl à ahəṅ la tataka azla Gərək la abà, kà matapatàla azlatatak takay?"
- 36** Gay uwaga apèh ma mana asal magodəy ma? 'Kadàyahaw gi, ama kadàbəza gi aw, kà uwana kaslawwal à vok mad à slaka uwana gədàday aw. La slaka uwana gədàdza à ahəṅ babay aw', agòd ma?"
- 37** La mavakay uwana takèd gəl à mavədaday, la uwana aga delga, la vud uwatà Yesu astizlla ala la huma maham à ahəṅ dza, azà kuda à zagəla, agòd: "Uwabeyuwi uwana nəlay azəṅ, asa à waṅ, asa iyaw la slaka gulo.
- 38** Kəla uwabeyuwi uwana adiṅ gi gəl à vok, dərəv aṅa iyaw sifa adəkəlay la ləv aṅha la tsəh bokuba uwana tatsetsèr à wakità Zəzagəla à abà."
- 39** Yesu kà apəhay kà lakəl aṅa Masasədok Zəzagəla, uwana azlauwana tadiṅal gəl à vok tadàbəzal, kà uwana tabəz Masasədok dadəṅ aw, kà uwana Yesu adada à afik kà maḃəz mazləḃay la slaka Baba aṅha aw.
- 40** Azladza anik la tataka maham à ahəṅ dza la abà tatsənəṅ gay uwaga tagòd: "Ndzer kà, dza uwanay kà masla mapəhal gay à ahəl aṅa Zəzagəla kà mapəh à azladza."
- 41** Azlaanik tagòd: "Masla kà Kristu!", azlaanik tagòd: "Awaṅ, masla aw, Kristu kà aguwa à waṅ la Galili ay?"
- 42** Tatsetsèr à wakità Zəzagəla à abà kà: Kristu kà adəguwa à uda kà la mayyi à tsəh ala aṅa David, ṅgaha adəguwa à waṅ la Betelehem, la gudəṅ uwana David adzà à ahəṅ la abà."
- 43** Maham à ahəṅ dza atsək ala kà Yesu.
- 44** Azlaanik la tataka aṅatà la abà, asà à atà makəs Yesu, ama dza la ahəṅ aslələ vok aṅa matapal ahəl à vok aw.
- 45** Azlakohana tawul à slaka azlaməṅga aṅa azlaməna mav tatak à Zəzagəla la azla Farisəya, tanəv atà: "Kà mana kasəwla Yesu à waṅ aw ma?"
- 46** Azladza uwana taslèlla atà, tawulà à atà: "Dza la ahəṅ adapəh gay ku bà aṅa dza uwanay didi didi aw."



- <sup>47</sup>Azla Farisəya tanàv atà: "Akul babay kà kadànfaw mapapatay aṅha uwaga ṅwà?"
- <sup>48</sup>Məṅga la ahəṅ la tataka gami la abà, baṅaw la tataka aṅa azla Farisəya la abà, adadiṅal gəl à vok ay?
- <sup>49</sup>Ama say azladza deyday gà la uwana tadiṅal gəl à vok, kà uwana tasəl mapəhay aṅa Musa aw, atà azlamatsaflaga!"
- <sup>50</sup>Nikodemus agà la tataka aṅa azla Farisəya la abà. A masla uwana asà à waṅ à slaka Yesu la vəd vərđi anik, agòđ à atà:
- <sup>51</sup>"Hadəy, ma wakità seriya avà tetəvi kà madàh seriya à dza à gəl, la kokudà matsən uwana adahàṅ takay? Awma məsəl uwana adahàṅ aw, takay?"
- <sup>52</sup>Tawulàl ala: "Kak zil Galili ay? Dzəṅ wakità lela, ṅgaha kadàtsenəṅ kà masla mapəhal gay à ahàl aṅa Zəzagəla adəguwa à waṅ la Galili aw!"
- [<sup>53</sup>La lig la ahəṅ kəla uwabeyuwi awul à mtəga aṅha.

## Yuhana 8

- <sup>1</sup>Mok uwana uwaga adadəv à gay kà, Yesu ahàđ à gudəṅ kuvu à afik.
- <sup>2</sup>La bebəṅ gà la zay la tsəh, awul à məṅ gəy Zəzagəla à agu aya, ṅgaha maham à ahəṅ dza aṅuvaw tahamà à slaka aṅha. Adzà madzay, adzəkà matapatàla azlatatak
- <sup>3</sup>Azlaməna mapəhla mapəhay ala, la azla Farisəya tadàlla mis uwana à awtəy, takəs la mazađ zil la tsəh. Atà tatsizlləṅ à huma aṅa maham à ahəṅ dza gesina,
- <sup>4</sup>ṅgaha tanàv Yesu: "Məṅga, mis uwanay kà, takəs kà la mabila la tsəh.
- <sup>5</sup>La wakità Zəzagəla gami la abà Musa agòđ à anu kà, azlatsəhay mis uwanay kà, say makad atà la matsàh atà la akur pəra. Kak ma kakay kagod ma?"
- <sup>6</sup>Tapəh uwaga kà, kà makəsəl madiṅay à ahəṅ kà aṅa mapuwal gudzi à gəl. Ama la abatà Yesu akəsà gəl à ahəṅ, anəh à kutso à abà la gay gəl ahàl aṅha.
- <sup>7</sup>Uwana bà manaval tanavàl kà, awulà gəl à afik la magod à atà: "Dza uwana la tataka aṅkul la abà adadəh tsakana didi aw kà, atsa vok ala akur à mis uwaga zlà!"
- <sup>8</sup>ṅgaha la lig la ahəṅ, awulà gəl à vədəh kà manəhay aya.
- <sup>9</sup>Mok uwana tatsənà gay uwaga kà, tadahà aṅatà la tekula, tekula, azlamagolga dəṅ, ṅgaha azlabəza gà. Yesu agəđ à ahəṅ kokudà aṅha la mis matsizl à ahəṅ gà, uwaga la huma aṅha.
- <sup>10</sup>Kiya uwaga awulà gəl à afik agòđal: "Mis, atà la azlaməna mapuwa à ka gudzi à gəl aṅak la? Dza la ahəṅ adükw kà ka seriya à gəl aw uwa?"
- <sup>11</sup>"Dza la ahəṅ aw, məṅga", mis agòđal. Yesu agòđal: "Gi babay kà, gədukw ka seriya à gəl aw, həd, ama kadàđaha tsakana aya aw!", Yesu agòđal.]

- 12**Bà gotənaŋ Yesu apəh gay à maham à ahəŋ dza aya: "Gi la uwana gi uɔaka aŋa gudəŋ à vok. Dza uwana anəf gi kà masla adàbəz uɔaka aŋa sifa, adàday la mələs la abà aw."
- 13**Azla Farisəya tagòɔal: "Kak kà kapəhay kà sayda aŋa gəl aŋak, uwana kapəhay kà makəs vok aŋha la ahəŋ aw."
- 14**Yesu awulà à uda agòɔf à atà: "Baməraka gədaza sayda aŋa gəl gulo babay kà, mapəhay gulo kà dziriga, kà uwana gi kà gəsəl slaka uwana gəsà à waŋ, la slaka uwana gəday babay. Ama akul kà, kasəlaw slaka uwana gəsà à waŋ la slaka uwana gəday babay aw."
- 15**Akul kà kadəhaw seriya kà la mahoy yewdi, ama gi kà gədəh seriya kà kiya uwaga aw.
- 16**Bà amiyaka gədəh seriya à dza kà seriya gulo kà dziriga, kà uwana gədəh seriya kà kokudà gəl gulo aw, ama anu la Baba uwana asləl gi à waŋ.
- 17**Uwaga kà matsəserayga la wakità seriya aŋkul la abà: Sayda aŋa azladza səla uwana tapəhay kalkal kà dziriga.
- 18**Gəza sayda aŋa gəl gulo ŋgaha Baba uwana asləl gi à waŋ az sayda aŋa gəl gulo babay."
- 19**Tanəv Yesu: "Uwa à Baba aŋak uwa?" Yesu awulà à atà ala: "Akul kasəlaw gi aw, baməraka Baba gulo babay aw, agayŋa kasəlaw gi kà, naka kasəlaw Baba gulo babay."
- 20**Yesu apəh gay uwaga kà la mok uwana atəpatàla tatak la məŋ gəy Zəzagəla la aku. Apəh uwaga kà la slaka uwana tafəh sahar aŋa ofərand à ahəŋ, dza aslàla vok aŋa makəsaw aw, kà uwana kaslā aŋha adaslay dadəŋ aw.
- 21**Yesu agòɔf à atà aya: "Gəda aŋulo, kadəyahaw gi, ama akul kadəmətsaw à tsakana aŋkul à abà. Kaslawwal à vok kà mad à slaka uwana gəday aw."
- 22**Azla Yahudiya tagòɔf vok kà: "Adəkəɔf vok ay à uwana: 'Kaslawwalla vok kà mad à slaka uwana gəday aw', agòɔf?"
- 23**Yesu awulà à atà ala: "Akul kà akul azladza aŋa vədəh, ama gi kà gəsà à ahəŋ kà la zagəla. Akul azlaaŋa gudəŋ à vok uwanay, ama gi kà gi aŋa gudəŋ à vok uwanay aw."
- 24**Kà uwana à uwana gəgòɔf à akul kà kadəmətsaw à tsakana aŋkul à abà, ndzer kà, kadəmətsaw à tsakana aŋkul à abà, à baŋa kadiŋaw gi gəl à vok à gi uwana gi aw."
- 25**Tanavəl à gay zlà: "Kak uwa?" Yesu agòɔf à atà: "Gi uwana gəpəh à akul dagay madzəka."
- 26**Lakəl aŋkul gi la azlagay məŋga aŋa mapəh à akul, à gay uwana adəhakulla seriya à gəl. Ama dza asləl gi à waŋ kà dziriga, gəpəhay à azladza gudəŋ à vok kà uwana gətapla la slaka Baba pəra."
- 27**Tasəl kà Yesu apəhay lakəl aŋa Baba Zəzagəla aw.

- 28**Kiya uwaga Yesu agòd à atà: "Baṅa kadàtsizllaw Kona aṅa dza ala kà, kadàsəlaw kà gi uwana gi la ahəṅ. Kadàsəlaw kà gəḏàh tatak la gəl gulo aw, ama gəpəhay kà lakəl aṅa uwana Baba apahà à gi ala pəra.
- 29**Dza uwana asləl gi à waṅ kà, anu səla, awkà asək gi kokudà gəl gulo aw, kà uwana koksikoksi gəḏəhəṅ uwana ahəḏal à adi."
- 30**Uwana Yesu adapəhay kiya uwaga, azladza aṅuvaw tadiṅal gəl à masla à vok.
- 31**Yesu agòd à azla Yahudiya uwana tadiṅal gəl à vok: "Baṅa kakəsaw matapla à mapəhay gulo kà, kadàgaw azlaməna matapla la slaka gulo ndzer.
- 32**Kiya uwaga kà, kadàsəlaw dziriga, ṅgaha dziriga adàdala akul à makor gəl à abà."
- 33**Tawulà à uda: "Anu kà anu mayyi à tsəh ala aṅa Abəraham, ṅgaha anu azlamaya aṅa azladza dikiḏiki aw, ṅgaha ma kakay kagòd à anu kà, mədàgay la makor gəl la abà ma?"
- 34**Yesu agòd à atà: "Haday, gəpəh à akul la dziriga: Kəla uwabeyuwi uwana adàh tsakana kà, masla kà mayà aṅa tsakana.
- 35**Mayà kà, aslala vok aṅa magay masla gày aw. Ama kona kà, agay masla gày aṅa koksikoksi.
- 36**Baṅa Kona adəpəlakulla kadàgaw la makor gəl la abà ndzer.
- 37**Gəsəl kà akul mayyi à tsəh ala aṅa Abəraham. Ama kayahaw makəḏ gi aya, kà uwana kakəsaw matapakulla gulo aw.
- 38**Gəpəhay lakəl aṅa tatak uwana Baba gulo apəh à gi ala, ama akul kà kadàhaw uwana baba aṅkul tapàhəkulla, suwaṅ."
- 39**Tawulà à uda: "Baba gami kà Abəraham!" Yesu awulà à atà ala: "Agayṅa kagaw azlabəza aṅa Abəraham kà, naka kadàhaw sləray aṅa Abəraham uwana adàhàhəṅ.
- 40**Gi kà, gəpəh à akul kà dziriga, uwana gətsənəṅ la slaka Zəzagəla, la uwana gəpəh à akul, ama bə la uwaga kà, kayahaw makəḏ gi. Tsəhay gə uwaga kà, Abəraham adàhəṅ didi aw.
- 41**Akul kà kadàhawwaṅ kà sləray aṅa baba aṅkul." Atà tawulà ala: "Anu azlabəza gəl gaw aw, anu Baba gami kà la Zəzagəla, tekula pəra."
- 42**Yesu agòd à atà: "Agayṅa Zəzagəla agay Baba aṅkul ndzer kà, naka kawoyaw gi, kà uwana gəsà à waṅ la slaka aṅha, à uwana gəsà à slaka aṅkul kà masal aṅha. Gəsà à waṅ kà, la aslasl gəl gulo aw, masla la uwana asləl gi à waṅ.
- 43**Kà mana katsəbaw sləm à uwana gəpəh à akul aw zlà ma? Kà uwana kaslaw kà aṅa matsən uwana gəpəhay aw.
- 44**Akul kà, baba aṅkul kà la seteni, asa à akul madàh uwana asa à seteni kà uwana masla makəḏ dza dagay la madzəka vok aṅa tatak. Adapəh dziriga didi aw, kà uwana

dziriga la ahəŋ la slaka aŋha aw. Baŋa apəh fida, apəh la fəla aŋha, kà uwana masla fida, ŋgaha masla baba aŋa fida.

<sup>45</sup>Ama gi kà, gəpəhay kà dziriga, ŋgaha kà uwaga la uwana kadiŋaw gi gəl à vok aw.

<sup>46</sup>Uwa la tataka aŋkul la abà aslala vok agodəy kà, gədədəhəŋ tsakana uwa? Kà mana, baŋa gəpəh dziriga kà, kadiŋawwal gəl à vok aw zlà ma?

<sup>47</sup>Dza aŋa Zəzagəla kà, atsəb sləm à gay Zəzagəla. Ama akul azlaaŋa Zəzagəla aw. Gay gə la uwaga katsəbaw gi sləm aw!”

<sup>48</sup>Azla Yahudiya tagədal: "Azlayla anu à uwana: Kak zil Samariya, məgod à ka, ŋgaha kak la azlamasəsədok mawisiga aw uwà?”

<sup>49</sup>Yesu agədal à atà: "Gi la masasədok mawisiga aw, ama gi gəsləkaw Baba gulo, ama akul kà kapəsew gi.

<sup>50</sup>Gi kà gəyàh mazləbay aŋa gəl gulo aw. Dza anik la ahəŋ tekula, uwana ayàh gi mazləbay, masla la uwana masla seriya bay.

<sup>51</sup>La dziriga gəpəh à akul: Dza uwana akəs gay gulo, adàmətsay dikiđiki aw.”

<sup>52</sup>Azla Yahudiya tagədal: "Lagonay kà məsəl ndzer kà, kà kak la masasədok mawisiga, Abərahəm aməts, azlaməna mapəh à atà gay à ahəl taməts, ŋgaha kak kagodəy kà: 'Dza uwana akəs mapəhay gulo kà, adàmətsay aw', kagodə ma?"

<sup>53</sup>Baba gami Abərahəm aməts: Kadzugw ma: 'Gəduwa masla', kagodə takay? Azlaməna mapəh à atà gay à ahəl bay taməts. Ŋgaha ma kapakà gəl aŋak ala ma kà kak uwi?”

<sup>54</sup>Yesu awulà à atà ala, la magodəy: "Agayŋa gəzləb gəl gulo kà, naka mazləbay gulo, akəs vok aw. Baba gulo la uwana azləb gi, à masla à uwana: 'Zəzagəla gami', kagodəw.

<sup>55</sup>Ama kasəlaw masla dikiđiki aw. Ama gi kà gəsəl masla. Agayŋa gəgodəy kà, gəsəl masla aw kà, naka gəgay masla fida bokuba akul. Ama gəsəl masla, ŋgaha gəkəs gay aŋha.

<sup>56</sup>Abərahəm baba aŋkul kà, arəb lakəl mavakay aŋa mas à waŋ gulo, anəŋəŋ ŋgaha arəb kaykay.”

<sup>57</sup>Azla Yahudiya tagədal: "Uwala kaslay mavay dzik zlo, awkà pəra: 'Gəŋəŋə Abərahəm', kagodə ay?”

<sup>58</sup>Yesu awulà à uda: "Hadəy, gəpəh à akul la dziriga: Mok uwana taləg mayyay Abərahəm kà, gi la ahəŋ.”

<sup>59</sup>Ŋgaha tahəl akur kà matsəhla. Ama kusəh. Yesu ahadà vok à ahəŋ, asà à lag la məŋ gəy Zəzagəla la aku.

## Yuhana 9

- <sup>1</sup>Mok uwana Yesu anəfà tetəvi aṅha, anəṅàṅ dza anik uwana tayyà à ahəṅ guləf gà.
- <sup>2</sup>Azlaməna matapla la slaka aṅha tanavà: "Məṅga, kà mana dza uwanay kà tayyà à ahəṅ kà guləf gà ma? Kà tsakana aṅa gəl aṅha ay, à uwana kà tsakana aṅa azlababa aṅha ay?"
- <sup>3</sup>Yesu awulà à atà ala: "Kà tsakana aṅha aw, kà tsakana aṅa azlababa aṅha magay aw. Tayyà guləf kà, kà sləray aṅa Zəzagəla aṅa mapəhla vok ala la masla la abà pəra.
- <sup>4</sup>La afats kà, say mədàh sləray aṅa dza uwana asləl gi à waṅ. Vəd la uwaga atsa à waṅ, à uwana dza aslala vok aṅa madàh sləray aya aw.
- <sup>5</sup>La mok uwana gi la gudəṅ la vok kà, gi uɖaka aṅa gudəṅ à vok."
- <sup>6</sup>Uwana Yesu adapəh uwaga la gay ala, atəf slesliɖ à vədàh aləpàni kutso, asəfàh à yewdi aṅa guləf uwaga.
- <sup>7</sup>Ḍgaha agòɖal: "Hàd, kadàpal yewdi aṅak la mukwà Silowe la abà (Sləm uwaga asal magodəy masləlay) Guləf ahàd, apəl adi. La mok uwana awul à waṅ la tetəvi la ama, aslala vok aṅa manəṅla adagay."
- <sup>8</sup>Azlaməna magay aṅha la azladza uwana tanəṅ à ahəṅ atsatsàh tatak uwarà, tagòɖ: "Uwanay kà dza uwana adzàhah madzay kà matsatsàh tatak aw, takay?"
- <sup>9</sup>Azladza anik: "Masla", tagòɖàh. Azlaanik babay: "Masla aw", tagòɖ, "Ama maftsa à vok aṅha pəra", tagòɖ. Zil uwaga agòɖ à atà: "Kà bà, gi!"
- <sup>10</sup>Tagòɖal: "Kakay yewdi aṅak apakwà vok ma?"
- <sup>11</sup>Agòɖ à atà: "Dza uwana tazalalla Yesu aləpàni abisl, ṅgaha asəfàh gi à yewdi, ṅgaha agòɖ à gi: 'Hàd, kadàpal adi aṅak la mukwà Silowe la abà', agòɖ à gi. Ḍgaha gəhàd, mok uwana gədapal à adi, gəslàla vok aṅa manəṅla."
- <sup>12</sup>Tanavàl: "Aṅala dza uwatà la?", tagòɖal, "Gəsəl aw", agòɖ à atà.
- <sup>13</sup>Kiya uwaga tadàla guləf à slaka azla Farisəya.
- <sup>14</sup>Kà uwana Yesu aləpàni kutso, asəfàhal à yewdi kà dza uwatà la mavakay maduw ləv à uwana awurəṅ ala.
- <sup>15</sup>Kà uwaga à uwana azla Farisəya babay tanəv dza uwatà, tagòɖal: "Kakay kanəṅla lagonay adagay ma?" Kona uwaga agòɖ à atà: "Asəfàh à gi abisl à yewdi, ṅgaha agòɖ à gi: 'Hàd à mukwà Silowe à abà, kapal adi', ayà gəgòɖ, gəhàd, gəpəl adi, ṅgaha lagwa gədanəṅla."
- <sup>16</sup>Azlaanik la tataka azla Farisəya la abà tagòɖ: "Dza uwana adàhà tsəhay gə uwanay kà, asà à waṅ kà la slaka Zəzagəla aw, kà uwana afà gəl à vuɖ maduw ləv aw." Ama azlaanik tagòɖ: "Kakay dza aslala vok aṅa madàh nadzipo kiya uwanay, tsa baṅa masla tsakana ma?" Ḍgaha tatsàk ala la tataka aṅatà la abà.

- 17** Azla Farisəya tanàv à guləf uwana awùr ala aya gotənaŋ: "Kak ma uwa kagodf kà dza uwana awurà kà ala uwa?" Agòd à atà: "Masla mapəhal gay à ahàl aŋa Zəzagəla, kà mapàh à azladza", agòd à atà.
- 18** Bə gotənaŋ azla Farisəya tadiŋal gəl à vok, kà masla tayyà guləf gə aw, ŋgaha awùr ala tagòd aw, kà uwaga à uwana tazàl azlababa aŋha à waŋ aya babay,
- 19** kà tanav atà gay ala, tagòd: "Haday ma, uwanay kà kona aŋkul ay? Ndzer ma, kayyàw ma guləf gə ay? Kà kay à uwana apakà vok à uwana anəŋla lagwa adagay ma?"
- 20** Azlababa aŋha tawulà à uda, tagòd: "Məsəl kà masla kona gami, uwana məyyà guləf gə.
- 21** Ama anu kà, məsəl tatak uwana apakà vok kà manəŋla aŋha lagonay aw, ŋgaha məsəl dza uwana apəzllal yewdi babay aw. Nàvəw à masla la gəl aŋha, kà uwana masla asla manaval gay adagay."
- 22** Uwana tapəh kiya uwanay kà, kà uwana guba akəs à atà kà azla Yahudiya, kà uwana azla Yahudiya tatsatsəl vok gay kà atà aŋa makudək azladza uwana à lag la gày madəv kudà la aku, uwana: 'Yesu kà Kristu', tagoday.
- 23** Kà uwaga à uwana azlababa aŋha tagòd kà: "Masla kà asla maula gay à uda la gəl aŋha, nàvəw à masla", tagòd.
- 24** Bə gotənaŋ azla Farisəya tahəd, tazàla dza uwana awùr ala aya kà masəla, ŋgaha tagòdàl: "Pəh la dziriga la huma Zəzagəla, məsəl kà dza uwatà kà masla tsakana."
- 25** Agòd à atà: "Gəsəl aw, adagay masla tsakana, adagay masla tsakana aw kà, gəsəl aw. Ama tatak tekula uwana gəsəl kà: Gi guləf, ama lagwa kà gənəŋla!"
- 26** Tanavàl aya: "Mana kadàhàŋ ma? Kakay apəzl à ka yewdi ma?"
- 27** Awulà à atà ala: "Gədapəh à akul təga aw uwa?", agòd à atà. "Ama kafəw gi sləm aw. Kà mana asa à akul matsənəŋ aya kà masəla ma mi? Awma akul babay ma asa à akul magay azlaməna matapla la slaka aŋha babay kəla ay?"
- 28** Tatsəkəkal magodəhay à gəl la magodəy: "Kak masla matapla aŋa zil uwaga, ama anu kà anu, anu azlaməna matapla aŋa Musa.
- 29** Məsəl kà Zəzagəla abadmə la Musa, ama masla kà, bə slaka uwana asà à waŋ la abà kà, məsəl aw!"
- 30** Zil uwaga awulà à atà ala: "Lagwa kà tatak uwanay la uwana aval ləv à dza à gay zlà, kasəlaw slaka uwana asà à waŋ la abà aw, ama masla la uwana apəzl gi yewdi gulo!
- 31** Məsəl kà Zəzagəla atsəb sləm à azlaməna tsakana aw, ama atsəb sləm à dza uwana ahoy yewdi aŋha, ŋgaha akəs mapəhay aŋha.
- 32** Didi didi gədatsənəŋ tagodəy kà dza adapəzl yewdi à dza, uwana tayyà guləf gə aw.

<sup>33</sup>Agayña dza uwaga atsà à wañ la slaka Zəzagəla aw kà, naka tatak la ahəñ afehəñ aw.”

<sup>34</sup>Tagòd à guləf: "Tayyà ka à tsakana à abà, ñgaha ma asa à ka, kà matapanula tatak takay?", takudək à lag la gày madəv kuda la aku.

<sup>35</sup>Mok uwana atsənà à Yesu kà takudək à lag la gày madəv kuda la aku kà, agagàm atà səla, agòdàl: "Kadiñ gəl à Kona aña dza à vok ay?"

<sup>36</sup>"Məñga, pəhgəla, uwa à masla uwa, kà gi aña madiñ gəl à masla à vok uwa?", agòdàl.

<sup>37</sup>"Masla gà la uwaga kanəñ, à uwana abadəkama lagwa", Yesu agòdàl.

<sup>38</sup>"Gədiñal à ka gəl à vok, Sufəl gulo", zil uwaga agòdàl, ñgaha la makədəf à ahəñ la huma aña.

<sup>39</sup>Kiya uwaga Yesu agòdàl: "Gəsà à wañ à gudəñ uwanay à vok kà seriya aña madàh vok, kà azlaguləf aña manəñla, ñgaha azlaməna yewdi aña mapakàh guləf.”

<sup>40</sup>Azlaanik la tataka azla Farisəya la abà, uwana la slaka aña la abatà, tatsənà gay uwaga, ñgaha tanavàl: "Anu ma anu azlaguləf babay suwañ ay?"

<sup>41</sup>Yesu agòd à atà: "Agayña kagaw azlaguləf kà, naka kagaw azlaməna tsakana aw, 'Tsa mənəñla', kagodaw kà, tsakana añkul aləg."

## Yuhana 10

<sup>1</sup>"Gəpəh à akul la dziriga, dza uwana aguwa la gay gamagày aña gargar aña azlatuwañ aw, ama aguwa à ahəñ kà la gəl aña zlagam, bi aguway la slaka anik kà, masla kà masla gəl, masla nabəra.

<sup>2</sup>Ama dza uwana aguwa à gày la gamagày kà, masla manəñla azlatuwañ.

<sup>3</sup>Masla manəñla gamagày kà apəzlal gamagày, azlatuwañ bay tatsən kuda aña. Azàllàh azlatuwañ aña, sləm la sləm, ñgaha atsala atà à uda.

<sup>4</sup>Baņa adasa à atà à uda gesina kà, masla aguwa atà à huma, azlatuwañ tanəfay, kà uwana tasəl kuda aña.

<sup>5</sup>Ama tanəf məlok dza aw, tahoyal à ahəl, kà uwana tasəl kuda aña aw.”

<sup>6</sup>Yesu apəh à atà gay la gay la abà uwaga, ama tasəl tatak uwana apəh à atà aw.

<sup>7</sup>Yesu agòd aya: "Gəpəh à akul la dziriga, gi la uwana gi gamagày aña gargar aña azlatuwañ.

<sup>8</sup>Azlawana tatsà à vok à wañ kà gi kà, gesina kà, azlaməna gəl, azlaməna nabəra. Ama azlatuwañ tatsəb à atà sləm aw.

<sup>9</sup>Gi la uwana gi gamagày. Dza uwana adàda à gày la sləm gulo adàbelay, aslala vok ada à gày, atsa à uda, abəz tatak may.

- <sup>10</sup>Masla gəl kà, atsa à waŋ kà, kà mad à gəl pəra, makaday, la madàdasàh atà ala. Ama gi kà gəsà à waŋ kà azladza aŋa maḃəzal sifa uwana aduwa vok kaykay.”
- <sup>11</sup>"Gi masla manəŋla azlatuwaŋ delga. Masla manəŋla azlatuwaŋ delga av sifa aŋha kà azlatuwaŋ aŋha.
- <sup>12</sup>Dza uwana adàh sləray kà aŋa sili pəra, uwala azlatuwaŋ aŋha aw kà, dza aŋa azlatuwaŋ aw. Asakay azlatuwaŋ à ahəŋ, ahoy aŋha à baŋa anəŋa kəda fəta atsa à waŋ à slaka aŋha, ŋgaha kəda fəta akəs atà, adàdasàh atà gesina.
- <sup>13</sup>Ahoy aŋha kà uwana adàh sləray kà aŋa sili, ŋgaha af sləm à azlatuwaŋ aw.
- <sup>14</sup>Gi masla manəŋla azlatuwaŋ delga. Bokuba uwana Baba asəl gi, gi bay gəsəl masla. Gəsəl azlatuwaŋ gulo, atà babay tasəl gi. Ŋgaha gəv sifa gulo kà aŋa azlatuwaŋ gulo.
- <sup>16</sup>Azlatuwaŋ gulo anik la ahəŋ à uwana atà la ahəŋ la gargar uwanay la abà aw. Say gəsəlla atà à waŋ babay kà atà aŋa masəl kuda gulo lagwa. Kiya uwaga adagay maham à ahəŋ tuwaŋ tekula, la masla manəŋla atà tekula à ahəl.”
- <sup>17</sup>"Baba awoya gi, kà uwana gəvə sifa gulo, kà gi aŋa maulal à tsəh aya.
- <sup>18</sup>Dza la ahəŋ azəḃ sifa la slaka gulo la ndzəḃa aw, ama gi la uwana gəvəy la mawoyəŋ gulo. Gi la maslay kà mavəy, ŋgaha gi la maslay aŋa maulal à tsəh aya. Kiya uwaga la uwana: 'Dahəŋ', Baba gulo agòḃ à gi.”
- <sup>19</sup>Kà gay uwaga matsakla ahəd à tataka azla Yahudiya à abà aya.
- <sup>20</sup>Aŋuvaw la tataka aŋatà la abà tagòḃ: "Masla la masasəḃok mawisiga, bada, kà mana katsəḃawwal sləm ma?"
- <sup>21</sup>Azlaanik tagòḃ: "Dza uwana la masasəḃok mawisiga aslala vok aŋa madəhəŋ kiya uwanay aw. Kakay masasəḃok mawisiga aslala vok mawur guləf ala ma?"
- <sup>22</sup>Madəvaday matsikasl məŋ gəy Zəzagəla ala apakà vok la Urusalima la təla awkusa.
- <sup>23</sup>Yesu auguzàh la məŋ gəy Zəzagəla la aku la tsəh tsatsagla aŋa Salomon.
- <sup>24</sup>Kiya uwaga azla Yahudiya takəsəl gay à adi, tagòḃal: "Mbà kadəsəlla à anu à uda la madzugway gami la abà ma? Baŋa kak Kristu kà, pəh à anu la dazuwaya, lakana!"
- <sup>25</sup>Yesu agòḃ à atà: "Gədapəh à akul nəma, asa à akul matsəḃ gi sləm aw pəra. Sləray uwanay gəḃəhəŋ la ndzəḃa aŋa Baba gulo kà sayda gulo.
- <sup>26</sup>Ama akul kà, kadiŋawwal gəl à vok aw, kà uwana akul la tataka aŋa azlatuwaŋ gulo la abà aw.
- <sup>27</sup>Azlatuwaŋ gulo tatsəna kuda gulo, gəsəl atà, ŋgaha tanəfa gi.
- <sup>28</sup>Gəvə à atà sifa adəv à gay aw, tadàmətsay didi aw, dza aslala vok aŋa mahəl atà la ahəl gulo aw.
- <sup>29</sup>Tatak uwana Baba gulo abək gi atà kà, aduwaŋ azlatatak gesina, dza la ahəŋ ahəl atà la ahəl aŋa Baba gulo aw.



<sup>30</sup>Anu la Baba kà anu tekula.”

<sup>31</sup>Azla Yahudiya tahèl akur kà matsàhla aya.

<sup>32</sup>Ama Yesu agòd à atà: "Gəđàhà azlasləray dzəba aṅha səla aw gə uwanay, la huma aṅkul gesina la maslay aṅa Baba gulo uwana avà à gi, ṅgaha ma kà sləray ma uwala asa à akul matsàhgəla akur la?"

<sup>33</sup>Azla Yahudiya tawulà ala: "Asa à anu kà matsàh kà la akur kà sləray uwana kađàhəṅ aw, ama kà uwana kapəh mawisiga lakəl aṅa Zəzagəla: Tsa kak dza deyday kà pəra, kagagazləla gəl aṅak la Zəzagəla ma, məgod.”

<sup>34</sup>Yesu awulà à atà ala: "Tatsetsèr à wakità mapəhay akul à abà kà, Zəzagəla agòd à akul azlazəzagəla,fb

<sup>35</sup>məsəl la paraka kà, kà dza aslala vok aṅa mawisəṅ ala uwana matsetserayga la wakità mapəhay la abà aw. Zəzagəla azal azlazəzagəla azladza uwana takəs gay aṅha.

<sup>36</sup>Gi kà, Zəzagəla akəsàni, asləl gi à waṅ à gudəṅ uwanay à vok, ṅgaha ma kakay kagodaw kà, gəpəh mawisiga à Zəzagəla à vok ma? Tsa gəpəhla dziriga kà gi Kona aṅa aṅha ma?

<sup>37</sup>Tsa baṅa sləray aṅa Baba gulo la uwana gəđəhəṅ, awkà kadiṅaw gi gəl à vok zlə ma aw.

<sup>38</sup>Ama baṅa sləray aṅha la uwana gəđəhəṅ kà, diṅaw gi gəl à vok, kadiṅaw gi gəl à sləray gə uwana à vok tsi, kà akul aṅa masəl la paraka aw kà gi la Baba la abà, ṅgaha Baba babay la gi la abà.”

<sup>39</sup>Tatàhkà à makəsay gotənaṅ, ama atəf kà atà.

<sup>40</sup>Yesu adà aṅha à gay dərəv à uda aṅa mukwà Urdun, la slaka uwana Yuhana adàhàhà batem uwarà. ṅgaha adzà à ahəṅ la abatà.

<sup>41</sup>Azladza aṅuvaw tasàh à slaka aṅha. Tagòd: "Dikiđiki Yuhana kà, adadàh nadzipo aw, ama uwana apəh lakəl aṅa dza uwanay kà agòd à afik, ndzer.”

<sup>42</sup>La abatà azladza aṅuvaw tadiṅ gəl à masla à vok.

## **Yuhana 11**

<sup>1</sup>Dza anik la ahəṅ, sləm aṅha Lazar, agà la dūvats, adzà à ahəṅ la Betaniya, la gudəṅ uwana Mariyama atà la deda aṅha Marta tadzà à ahəṅ.

<sup>2</sup>(Mariyama uwaga kà mis uwana adzadzàb aməl matərsin à Sufəl Yesu à asik à gəl, aslasladà, aṅàlal la aṅidz gəl aṅha) Deda aṅha Lazar la uwana agà la dūvats.

<sup>3</sup>Azladeda dəgamga səla uwaga tasləl gay à Yesu à tsəh, tagòdal: "Sufəl, slawda aṅak kà la dūvats.”

- <sup>4</sup>Uwana Yesu atsənà uwaga, agòd: "Duvats aña Lazar kà, dūvats mamamətsay aw, ama uwaga kà, kà mapəhla maslay aña Zəzagəla ala, uwaga la uwana adəpəhla mazləbay aña Kona aña ala bay."
- <sup>5</sup>Yesu awoyà Marta atà la Mariyama la Lazar deda aņatà.
- <sup>6</sup>Mok uwana atsənəņ kà Lazar la dūvats kà, adzà à ahəņ la slaka uwatà mavakay səla aya gotənaņ.
- <sup>7</sup>La lig la ahəņ, agòd à azlaməna matapla la slaka aña: "Məwùl à kutso Yahudiya!"
- <sup>8</sup>Azlaməna matapla la slaka aña tawulà ala: "Məņga adasafay aw, bə nekwa nekwa azladza tayàh matsàh ka à gəl la akur, ŋgaha asa à ka mawul à abatà aya ay?"
- <sup>9</sup>Yesu agòd à atà: "Sa kulo gəl aña səla la ahəņ la mavakay la tsəh aw takay? Kà uwana baņa dza aday la afats, matekwid atsalla aw, kà uwana anəņa udàka aña gudəņ à vok uwanay.
- <sup>10</sup>Ama baņa dza aday la vəd kà, matekwid atsalla, kà uwana udàka la ahəņ la masla la abà aw."
- <sup>11</sup>Yesu apəh à atà gay uwaga ŋgaha azàtələņ à gəl: "Slawda gami Lazar kà aga la madzəhal gə, kà uwaga à uwana gəday aña madatsənəņ ala."
- <sup>12</sup>Azlaməna matapla tawulà à uda: "Sufəl, baņa adzəhal kà, adəwurla, haday!"
- <sup>13</sup>Ama Yesu kà asəl magodəy kà Lazar kà adamətsay, ama azlaməna matapla la slaka aña tadzùgw lakəl aña madzəhal deyday pəra.
- <sup>14</sup>Kiya uwaga Yesu agòd à atà la paraka kà: "Lazar adamətsay.
- <sup>15</sup>Gi la marabay kà aņkul, à kà uwana gi la abatà aw, ŋgaha kà akul aña madiņ gi gəl à vok. Ama lagwa, məhad à slaka aña."
- <sup>16</sup>Kiya uwaga Tomas uwana tazalalla vəgal, agòd à azlaməna matapla anik: "Anu babay kà, məhad kà mədəmətsay la məņga gami."
- <sup>17</sup>Mok uwana Yesu adà à awtəy kà, Lazar adadəh mahənay ufad la zəvay la aku.
- <sup>18</sup>Betaniya kà nekwa la Urusalima, kərkər aña kà bokuba magur mahoyay pəlis tekula.
- <sup>19</sup>Azla Yahudiya aņuvaw tasəhà à waņ à mtəga Marta atà la Mariyama kà mamətsay aña deda aņatà Lazar.
- <sup>20</sup>Uwana Marta atsənəņ kà Yesu atsà à waņ, ahəd kà matsədəl à ama. Ama Mariyama adzà à ahəņ à mtəga.
- <sup>21</sup>Marta agòd à Yesu: "Sufəl, agayņa kagay la abanay kà, naka deda gulo amətsay aw.
- <sup>22</sup>Ama lagonay babay kà, tatak uwana kadənavay à Zəzagəla gesina kà, adàvə à ka!"
- <sup>23</sup>Yesu agòdəl: "Deda aņak adəula à uda la sifa."

- <sup>24</sup>Marta agòdál: "Gəsəl adàwula à uda la mamətsay, la kaslà uwana azlamazimnekid tadàula à uda la vud makəđ gəl à ahəŋ."
- <sup>25</sup>Yesu agòdál: "Gi la uwana gi masla maula azladza à uda la mamətsay, ŋgaha la sifa, dza uwana adiŋ gi gəl à vok, adàdza à ahəŋ la sifa, amiyaka kà aməts,
- <sup>26</sup>ŋgaha dza uwana la sifa, ŋgaha adiŋ gi gəl à vok kà, adàmətsay dikidiki aw, kadiŋ gəl à uwaga à vok nəmay?"
- <sup>27</sup>"Iyay Sufəl", agòdál, "Gədiŋal gəl à vok, kà kak Kristu, Kona aŋa Zəzagəla, uwana naka atsà à waŋ à gudəŋ à vok."
- <sup>28</sup>Mok uwana Marta adapəh gay uwaga, ahəd, azàla deda aŋha Mariyama, agòdál la gəl à gəl: "Məŋga gami kà, agà la abanay, ayàh ka, kà mad à awtày."
- <sup>29</sup>Mok uwana Mariyama adatsən gay uwaga, asà à afik amərəà vok kà mad à slaka Yesu.
- <sup>30</sup>Mok uwatà kà, Yesu kà, adabəz à huđ gudəŋ à abà dadəŋ aw, aləg la slaka uwana tagagəm la Marta.
- <sup>31</sup>Uwana azla Yahudiya, uwana atà la kay la slaka Mariyama kà matabla gay à ahəŋ, tanəŋəŋ asà à uda la mamər vok kà, tanəfà à uda. Tadzùgw kà, adàla kà matuway à gəl zəvay tagòđ.
- <sup>32</sup>Mok uwana Mariyama adabəz à slaka uwana Yesu kà agà la abatà, atəđ à makəla asik aŋha la makədeđay, ŋgaha agòdál: "Sufəl, à magay kagay la abanay kà, naka deda gulo kà amətsay aw."
- <sup>33</sup>Uwana Yesu anəŋà, atuway la azla Yahudiya uwana tasà à waŋ atà nna bay tataway, huđ kut, ləv agòdál kà uwaga.
- <sup>34</sup>Anəv atà: "Kalàw ma uwala?" Tagòdál: "Sufəl, sà à waŋ, kanəŋa slaka uwana tallà à abà."
- <sup>35</sup>Yesu atùw.
- <sup>36</sup>Kiya uwaga azla Yahudiya tagòđ: "Nəŋàw mawoy masla aŋha tsi!"
- <sup>37</sup>Ama azlaanik la tataka aŋatà la abà tagòđ: "Masla uwana apokwàhà yewdi à azlaguləf tak ma, kà mana asla kà madəđ gay à mamətsay à Lazar la vok ala aw ma?"
- <sup>38</sup>Bà gotənaŋ kà, Yesu kà ləv aŋha adatəsl ala aw, ahəd à gəl zəvay. Uwaga kà tsakur, matsakal à ama gə la akur mabəlam bəlamga.
- <sup>39</sup>"Zəbàwwal abəlam la gay ala!", Yesu agòđ à atà. Marta, deda aŋa mazimnekid agòđ: "Sufəl, azinay adagay, kà uwana adadəh mahənay ufađ la aku."
- <sup>40</sup>Yesu agòdál: "Gəpəh à ka aw takay, kà baŋa kadiŋal gəl à vok kà, kadənəŋəŋ mazləbay Zəzagəla, gəgòđ à ka aw ay?"
- <sup>41</sup>Tazəbal abəlam la gay ala. Yesu anəŋà à zagəla la magòđay: "Baba, kikay gəgòđ à ka, kà uwana katsəb gi sləm.

- <sup>42</sup>Gəsəl kà kadatsəb gi sləm koksikoksi, ama uwana gəpəh uwanay kà, kà maham à ahəŋ dza uwanay tatsəb gi sləm lagwa, kà atà aŋa maɗiŋal gəl à vok, kà kak la uwana kasləl gi à waŋ.”
- <sup>43</sup>Mok uwana adapəh gay uwaga, awiyà la ndzəda: "Lazar, sà à lag la aku!"
- <sup>44</sup>Mazimnekid' asà à lag, azlaahàl la azlaasik aŋha matsafàd à ahəŋ à ahəŋ gà la gabaga, huf' adi aŋha mafafadàl nalbət à adi gà. Yesu agòd' à atà: "Pələwwàŋ ala, ŋgaha sàkàwwal, adà aŋha.”
- <sup>45</sup>Aŋuvaw la tataka azla Yahudiya uwana la abà tasà à waŋ à slaka Mariyama, tanəŋà tatak uwana Yesu adàhàŋ gesina, tadiŋ gəl à masla à vok.
- <sup>46</sup>Ama azlaanik la tataka aŋatà la abà, tahàd à slaka azla Farisəya, tatùgw à atà uwana Yesu adàhàŋ gesina.
- <sup>47</sup>Kiya uwaga azla Farisəya la azlamadzahaga aŋa azlaməna mav tatak à Zəzagəla la azlaməna makoray tahamà gay à vok kà matstsəzl vok gay, tagòd': "Mana mədəhəŋ la dza uwanay adàh azlanadzipo aŋuvaw mi?"
- <sup>48</sup>Baŋa məsakal kiya uwanay, azladza gesina tadiŋ gəl à masla à vok, ŋgaha azla Rom bay tadàsa à waŋ, tadàkalah anu məŋ gày Zəzagəla gami à ahəŋ la tsəhay gami.”
- <sup>49</sup>Tekula la tataka aŋatà, uwana sləm aŋha Kayyif, uwana masla agà məŋ madzahaga la mavay uwatà la tsəh, agòd' à atà: "Kasəlaw tatak aw!"
- <sup>50</sup>Kasəlaw kà ŋuləm dza tekula aməts kà gudəŋ gesina aŋa mazila aw takay?"
- <sup>51</sup>Apəh gay uwaga kà la masal aŋha aw, ama kà masla la uwana məŋ madzahaga la mavay uwatà la tsəh. Apəh à ahəŋ kà say Yesu amətsay, kà aŋa azla Yahudiya,
- <sup>52</sup>Kà aŋa tsəhay aŋatà pəra aw, ama bay kà maham gay azlabəza aŋa Zəzagəla uwana à vok, taslèh gəl à ahəŋ la uda gesina.
- <sup>53</sup>Dagay la vuf' uwatà, azlaməŋga aŋa azla Yahudiya tatsatsəl vok gay, kà makəs Yesu kà makəday.
- <sup>54</sup>Kà uwaga à uwana Yesu auguzàh la dazuwaya, la tataka azla Yahudiya la abà aya aw. Masla ahàd à gudəŋ anik à abà la fəta, uwana sləm aŋha Efərayim, adzà à ahəŋ la abatà la azlaməna matapla la slaka aŋha.
- <sup>55</sup>Madəvaday aŋa Paska aŋa azla Yahudiya nekwa. Azladza gudəŋ anik anik aŋuvaw tadà à afik à Urusalima, kà uwana asà à atà matsikasl gəl ala ŋurayŋa mavakay madəvaday atsà à waŋ.
- <sup>56</sup>Tayàh Yesu à mok, uwana atà la məŋ gày Zəzagəla la aku. Tanavà vok kà atà kà atà: "Mana kadzugwaw ma, adàsa à waŋ à madəvaday takay? Awma adàsa à waŋ aw ay?"
- <sup>57</sup>Uwana tapàh kiya uwaga kà, kà uwana azlamazdahaga aŋa azlaməna mav tatak la azla Farisəya tagòd' kà: "Baŋa dza asəl slaka aŋha kà, apəhla ala kà maday makəsay", tagòd'.

## Yuhana 12

<sup>1</sup>Mahənay mukwa adà à lig kà, kà mas à waŋ aŋa madəvaday Paska, Yesu ahàd à gudəŋ Betaniya, à slaka uwana Lazar adzà à ahəŋ, à Lazar uwana awulà à uda la mamətsay.

<sup>2</sup>La abatà tatà tatak may à Yesu. Lazar kà tekula la tataka azladza uwana la abà, tadzàh à tatak may à adi la Yesu. Marta la uwana atsàk à atà tatak may.

<sup>3</sup>Dgaha Mariyama azəb dərew aməl matərsin bəf la dərew gə matsidayga, azlà gay tenma aŋa litre. Tsakalay aŋha kà zlazladà. Adzadzàb à Yesu à asik à gəl, ŋgaha aslaslàdāŋ ala la aŋidz gəl aŋha, kà uwana abàdal à asik à gəl. Uwaga kà tadahaŋ kà la ahàf mazinayga. Mazinay aŋha azəb gày à gəl.

<sup>4</sup>Tekula la tataka azlaməna matapla aŋha la abà à Yudas Iskariyot, masla uwana ayah mat à kaf à Yesu à gəl agòd:

<sup>5</sup>"Kà mana taduw matərsin uwanay ala kà aŋa sili gursu dadərmokw makər, kà mavàh sili gə à azlaməna kudà aw ma?"

<sup>6</sup>Uwana apəh kiya uwaga kà, kà uwana awoyà azlaməna kudà magay aw, ama kà uwana masla kà masla gəl: Masla la uwana anəŋla kiwa sili, ŋgaha azabàhàni uwana tafàh à agu.

<sup>7</sup>Yesu agòdal: "Sàkal, afà matərsin uwaga à ahəŋ kà aŋa vud mal gi,

<sup>8</sup>akul, koksikoksi kadàgaw la azlaməna kudà, ama gi kà, mədàday anina koksikoksi aw."

<sup>9</sup>Mok uwana maham à ahəŋ dza asəl kà Yesu kà aga la Betaniya kà, azla Yahudiya tahàd, ama kà gay aŋa Yesu pəra aw, ama bay kà, kà Lazar uwana Yesu awùlla à uda la mamətsay bay.

<sup>10</sup>Azlaməŋga aŋa azlaməna mav tatak à Zəzagəla tatsənà vok gay kà makəd Lazar,

<sup>11</sup>kà masla à uwana azla Yahudiya aŋuvaw tasàk azlaməŋga aŋatà la tsəh ala kà madiŋal gəl à Yesu à vok.

<sup>12</sup>La bebəŋ gə, maham à ahəŋ dza, uwana tasà à waŋ à madəvaday Paska tatsənəŋ, kà Yesu atsà à Urusalima à abà.

<sup>13</sup>Kiya uwaga tasà à uda, taslāh babasl la azlaslahoy à vədāh la tetəvi la ama, kà Yesu aŋa maday maguw à ahəŋ la afik, kà magagamay atà nna la mawiyay: "Mazləbay agay la Zəzagəla, Zəzagəla apisa gay à dza uwana à vok, atsa à waŋ la sləm aŋa Sufəl. Zəzagəla apisa gay à Sufəl aŋa azla Isərayel à vok!"

<sup>14</sup>Yesu abəz à ziwŋŋu, adzà à afik la abatà, bokuba uwana wakità Zəzagəla apəh:

<sup>15</sup>'Akul azladza Siyon, guba akəs akul aw, məŋ Sufəl aŋkul kà masla la uwana atsa à waŋ, adadza madzay la bəzi ziwŋŋu à afik.'

- <sup>16</sup>Azlaməna matapla la slaka aṅha kà, tatsə̀nà godega aṅa tatak uwaga dadàṅ aw, ama mok uwana Yesu adà̀bə̀z à mazlə̀bay kà, awùl à atà à gəl uwana wakità Zəzagəla apə̀h lakəl aṅha kà uwaga dziriga, ṅgaha atà bay tagə̀d à uwaga à afik uwana apə̀h gesina lakəl aṅha la sləray aṅatà gesina.
- <sup>17</sup>Maham à ahə̀ṅ dza, uwana atà la abatà, à mok uwana Yesu awùlla Lazar à uda la mamə̀tsay kà, tapə̀h lakəl aṅa uwana tanə̀ṅaṅ gesina bay.
- <sup>18</sup>Kà uwaga à uwana, maham à ahə̀ṅ dza asà à waṅ kà magagamay la Yesu, kà uwana tasəl kà masla la uwana adà̀hà nadzipo uwaga.
- <sup>19</sup>Kiya uwaga azla Farisəya tagə̀d kà atà kà atà: "Nə̀ṅawwàṅ zlà, kaslawwal à vok kà aṅa madà̀h tatak aya zlà aw, kà uwana azladza gesina kà tanə̀fay kà masla adagay."
- <sup>20</sup>Azla Gərək anik la tataka aṅa azladza uwana la abà tasà à waṅ à Urusalima kà madə̀v kudà à Zəzagəla la madə̀vaday la abà kà,
- <sup>21</sup>tazà vok à slaka Filip, uwana asà à waṅ la Betsayda, uwana la Galili, tagə̀dɬal: "Kona, asa à anu manə̀nəṅ Yesu."
- <sup>22</sup>Filip ahàd, apə̀h à Andəre, ṅgaha tahàd à slaka Yesu, atà səla.
- <sup>23</sup>Yesu agə̀d à atà: "Lagonay kà, kaslà adaslay adagay, à uwana Kona aṅa dza mabə̀z à mazlə̀bay aṅha.
- <sup>24</sup>Haday, gə̀god à akul la dziriga: Fofulo hi tekula adza à ahə̀ṅ bawtawta, à baṅa atə̀d à kutso à abà, baṅa akəl gay aw. Ama baṅa adakəl à gay, adà̀sa à uda kà, av mayyay aṅuvaw.
- <sup>25</sup>Dza uwana awoya sifa aṅha kà, adà̀ziṅ ala. Ama dza uwana afa sləm à sifa aṅha la gudə̀ṅ uwanay la vok aw kà, adà̀bəl uwaga kà aṅa sifa adə̀v à gay aw.
- <sup>26</sup>Baṅa dza asal mazlak gi kà, say anə̀f à gi, kiya uwaga bay magamza gulo adà̀gay la slaka uwana gə̀dà̀gay suwaṅ, Baba gulo adà̀zlə̀b magamza uwana adazlak gi."
- <sup>27</sup>Yesu agə̀d lagwa kà: "Baṅbabaṅ, lə̀v agə̀d à gi, kakay gə̀goday lagwa mi? Baba tə̀f gi kà tatak uwana abə̀z à gi la kaslà uwanay? Ama kà aṅa uwaga la uwana gə̀sa à waṅ.
- <sup>28</sup>Baba và mazlə̀bay à sləm aṅak!" Kuda atsə̀nà à ahə̀ṅ la zagəla la afik agə̀d: "Gə̀dazlə̀bay, ṅgaha gə̀dà̀zlə̀bay aya gotə̀naṅ."
- <sup>29</sup>Maham à ahə̀ṅ dza uwana la abatà tatsə̀nà kuda uwatà: "Uwatà kà maslə̀h məl aṅa habaga", tagə̀d. Azlaanik tagə̀d: "Malika abadà̀lmà."
- <sup>30</sup>Ama Yesu apə̀h à atà la paraka: "Kuda uwaga atsə̀nà à ahə̀ṅ kà, kà aṅulo aw, ama kà aṅkul.
- <sup>31</sup>Lagonay kà, kaslà adaslay à uwana seriya adà̀h vok à gudə̀ṅ à vok uwanay à gəl, lagonay la uwana takudək sufəl aṅa gudə̀ṅ à vok uwanay adagay kà makələ̀ṅ à uda.
- <sup>32</sup>Gi, baṅa gə̀dà̀da à afik la və̀dà̀h kà, gə̀dà̀biy azladza gesina à slaka gulo."
- <sup>33</sup>La gay uwaga asəl mapə̀hla tsə̀hay mamə̀tsay aṅha uwana ala adàmə̀tsay.

- <sup>34</sup>Maham à ahəŋ dza agòdál: "Mədzəŋ la wakità mapəhay gami la abà kà, Kristu adàdza à ahəŋ aŋa koksikoksi. Dgaha ma, kakay kagoday, kà Kona aŋa dza adàday à zagəla ma? Uwa à Kona aŋa dza uwa?"
- <sup>35</sup>Yesu agòd à atà: "Udàka kà aga la ahəŋ la tataka aŋkul dadəŋ, aŋa kaslà ŋuv. Nəfaw tetəvi dziriga la mok uwana akul la udàka la abà, kà mələs aŋa matsak à akul à ama aw, kà uwana dza uwana aday la mələs la abà kà, asəl slaka uwana ada à abà aw.
- <sup>36</sup>Kiya uwaga kà, diŋəwwal gəl à vok à mok uwana akul la udàka la abà, kà akul aŋa magay azladza aŋa udàka." Uwana Yesu adapəh gay uwaga kà, adà aŋha la abatà, ahàd à atà vok à adi.
- <sup>37</sup>Amiyaka bà la azlanadzipo uwana adəhəhəŋ, aŋuvaw la huma aŋatà babay kà, tadŋal gəl à vok aw,
- <sup>38</sup>kà magəd uwana à afik, masla mapəhal gay à ahəl Yesayya uwana agòd: 'Sufəl uwa adiŋ gəl à gay gami à vok uwa? A uwa à uwana Sufəl Zəzagəla apəhla maslay aŋha ala uwa?'
- <sup>39</sup>Taslàla vok aŋa madiŋal gəl à vok aw kà uwana Yesayya agòd aya:
- <sup>40</sup>'Zəzagəla aguləfəh atà ala, adatsakah à atà haŋkəli à ama, kà yewdi aŋatà aŋa manəŋla aw, kà haŋkəli aŋatà aŋa masəl tatak aw. Dgaha kà atà aŋa magola vok à slaka gulo, kà gi aŋa mawur atà ala aya aw.' Zəzagəla agòd.
- <sup>41</sup>Yesayya apəh uwaga kà, kà uwana anəŋà mazləbay aŋa Yesu, à uwana apəh lakəl aŋha.
- <sup>42</sup>Aŋuvaw la tataka azlaməna gəy zil aŋa azla Yahudiya la abà, tadŋ gəl à Yesu à vok, ama la dazuwaya aw, kà uwana guba akəs atà kà azla Farisəya aŋa makudəkəh atà à lag gəy madəv kudə la aku.
- <sup>43</sup>Kà uwana asà à atà kà azladza tazləb atà, à kà mazləb atà aŋa Zəzagəla.
- <sup>44</sup>Kiya uwaga Yesu azà kuda à zagəla la magoday: "Dza uwana adiŋ gi gəl à vok, adiŋ gəl kà à gi à vok pəra aw, ama à dza uwana à vok asləl gi à waŋ babay.
- <sup>45</sup>Dgaha dza uwana anəŋa gi, anəŋa dza uwana asləl gi à waŋ babay.
- <sup>46</sup>Gi kà, gəsà à waŋ à gudəŋ à vok kà bokuba gi udàka, kəla dza uwana adiŋ gi gəl à vok kà, adz à ahəŋ la mələs la abà aw.
- <sup>47</sup>Ama baŋa dza atsəna gay gulo, ŋgaha akəs aw kà, gi la uwana gədədahla ala seriya à gəl aw, kà uwana gəsà à waŋ kà aŋa mabəl azladza gudəŋ à vok, awkà aŋa madəh seriya à gudəŋ à vok à gəl aw.
- <sup>48</sup>Dza uwana akweska gi, ŋgaha akəs gay uwana gəpəh aw kà, seriya la ahəŋ lakəl aŋha, gay uwana gəpəh la uwana adədahla ala seriya à gəl, la vud madəv à gay gudəŋ à vok.

<sup>49</sup>Gay uwanay gəpəhay kà la maslay aṅa aslasl gəl gulo aw, ama Baba uwana aslèl gi à waṅ kà, la gəl aṅha, la uwana avà à gi maslay kà gi aṅa mapəhay, aṅa matapla azladza.

<sup>50</sup>Uwana apəh à gi, la uwana atsakakulla sifa adəv à gay aw à waṅ. Uwana gəpəhay kà, gəpəhay kà bokuba uwana Baba avà à gi maslay lakəl aṅha."

## Yuhana 13

<sup>1</sup>Uwaga kà vud madāh vok aṅa madəvaday Paska. Yesu asəl kà kaslā aṅha adaslay, kà maz vok aṅha la gudəṅ uwanay la vok, ṅgaha kà madiy aṅha à slaka Baba aṅha la zagəla. Koksikoksi awoyàhà azlaməna aṅha uwana la gudəṅ la vok, adəwoya atà tsəràh à makəf gəl à ahəṅ.

<sup>2</sup>Yesu la azlaməna matapla la slaka aṅha tazùw tatak may aṅa mokokhu. La mok uwaga kà, seteni adaguway la ləv aṅa Yudas, kona aṅa Səmon Iskariyot la tsəh, kà mat kaf à Yesu à gəl.

<sup>3</sup>Yesu asəl kà masla kà asà à waṅ kà la slaka Baba, ṅgaha awulay à abatà aya, kà uwana Zəzagəla Baba avəl maslay à ahəl gesina.

<sup>4</sup>Kiya uwaga Yesu atsizilla ala la tatak may la adi, asərət dawara aṅha la vok ala, azəb gabaga aṅha, awəd à tsəh.

<sup>5</sup>Ḍgaha avəd iyaw à daraw à abà adzəkà mapalàhla asik à azlaməna matapla la slaka aṅha, adāhàh à atà iyaw la asik ala la gabaga, uwana awəd à tsəh.

<sup>6</sup>Mok uwana adabəz à slaka aṅa Səmon, Səmon Piyer agòdāl: "Sufəl, kak la uwana kapal gi asik, kagod takay?"

<sup>7</sup>Yesu awulà ala la magòdāl: "Səmon Piyer, tatak uwana gəfəhəṅ lagonay kà, kasəl dadəṅ aw, ama la huma la gay la uwana kadəsəl godega aṅha."

<sup>8</sup>Səmon Piyer agòdāl: "Awaṅ Sufəl, kapal gi asik aw!" Yesu agòdāl: "Baṅa gəpala à asik aw, kadəbəz à tatak la ahəl gulo aya aw."

<sup>9</sup>Səmon Piyer awulà ala: "Sufəl, tsa kità kà, kapal gi azlaasik pəra aw, ama pal gi azlaahəl gulo, la gəl gulo gesina!"

<sup>10</sup>Yesu agòdāl: "Dza uwana adapal vok gesina kà, anəkudā mapal vok aya aw, say azlaasik gə pəra, kà uwana vok aṅha kà kuzekaka. Akul azlakuzekaka, ama akul gesina nəma aw."

<sup>11</sup>Yesu kà asəl dza uwana adətāl kaf à gəl, kà uwaga à uwana agòd: "Akul azlakuzekaka gesina aw."

<sup>12</sup>La lig aṅa uwaga la ahəṅ, à mok uwana adapalàh à atà asik, Yesu awulà dawara aṅha à vok aya, ṅgaha adzà madzay la slaka aṅha la abà, agòd à atà: "Katsənaṅ godega aṅa uwaga gədadəhakullaṅ takay?"

<sup>13</sup>Akul kazalawgəla məṅga, ṅgaha Sufəl, azlayla akul nəma, kà uwana gi masla haday.



- <sup>14</sup>Tsa baŋa gi la uwana gi Sufəl, ŋgaha mənŋa kà, kà gədapalàh à akul asik lagwa, akul babay kà, azlayla kà vok kà kapalahaw vok asik kà akul kà akul suwaŋ babay zlà.
- <sup>15</sup>Lagwa kà gədapəhakulla mafətsa à vok aŋha, à uwana kadàhàwwàŋ bokuba uwana gədəhəŋ zlà, la slaka aŋkul.
- <sup>16</sup>Haday la dziriga gəpəh à akul: Masla sləray la ahəŋ, aduw mənŋa aŋha aw, masləlay bay, aduw dza uwana asləl aw!
- <sup>17</sup>Lagonay kà, kasəlaw uwaga, kadàgaw la marabay à baŋa kakəsaw uwaga gesina.”
- <sup>18</sup>”Gəpəhay kà lakəl aŋkul gesina aw, gəsəl azlauwana gətsatsàmànì atà. Ama say gay aŋa matsetseray uwanay agəd à afik, dza uwanay məzuw tatak may anu səla, la uwana adàguwəla à lig à vok.
- <sup>19</sup>Dagay lagonay gəpəh à akul à vok à abà, kokudà mapak vok aŋa azlatatak uwaga, ŋgaha kà baŋa azlatatak uwaga adàpaka vok kà, akul aŋa masəlay kà gi uwana gi ndzer.
- <sup>20</sup>Gəpəh à akul la dziriga: Dza uwana akəs gi, akəs dza uwana asləl gi à waŋ babay.”
- <sup>21</sup>La mok uwana Yesu adapəh gay uwaga, abək mazaw la gəl mənŋa agòd: ”Gəpəh à akul la dziriga kà: Tekula aŋkul adàta à gi kaf à gəl!”
- <sup>22</sup>Azlaməna masla matapla tanəŋà à vok à adi kà atà kà atà, tasəl dza uwana apəhay lakəl aŋha aw.
- <sup>23</sup>Tekula aŋa azlaməna matapla uwana Yesu awoyəŋ kaykay, agà la makəla aŋha.
- <sup>24</sup>Səmon Piyer anavəl la yewdi, kà masla aŋa manavay à Yesu kà masəl dza uwana apəhay lakəl aŋha.
- <sup>25</sup>Kiya uwaga, masla matapla ahùb à slaka Yesu kà manaval: ”Sufəl uwa, uwatà uwa?”
- <sup>26</sup>Yesu agòdàl: ”Aganay gədəbay aləl à kaf à gəl, dza uwana gədàvəl kà, masla gə la uwaga.” Kiya uwaga Yesu atsikànì kaf, adəbal à aləl à gəl, ŋgaha avà à Yudas, kona aŋa Səmon Iskariyot.
- <sup>27</sup>Mok uwana Yudas azəb kaf uwaga kà, seteni adà à ləv aŋha à tsəh. Yesu agòdàl: ”Uwana asa à ka madəhəŋ kà, dàhàŋ la katskats!”
- <sup>28</sup>(Ama bà dza tekula la tataka aŋa azladza uwana la abà, tadzàh à tatak may à adi kà, dza la ahəŋ agòd: 'Kà mana Yesu apəh kiya uwaga mi', la ahəŋ aw. Kà uwana tatsənəŋ aw.
- <sup>29</sup>Bokuba uwana: Kà uwana Yudas la uwana kiwa sili la ahəl kà, tadzùgw kà Yesu asal masləlay, kà masukw tatak aŋa madəvaday aya, tagòd. Baŋaw: 'Và tatak à azlaməna kudà', agòdàl, tagòd)
- <sup>30</sup>Yudas akəs kaf uwana atsəkalləŋ à ahəl, asà à uda katskats kà, adagay vəd.

<sup>31</sup>Mok uwana Yudas adasa à uda kà, Yesu agòd: "Lagonay kà, mazlèbay aña kona aña dza apèhla vok ala, ñgaha mazlèbay aña Zèzagèla adapèhla vok ala la masla la abà.

<sup>32</sup>Mazlèbay aña Zèzagèla apèhla vok ala la kona aña dza la abà, Zèzagèla bay adapèhla mazlèbay uwana ala à Kona aña dza akor la gèl aña, adàh uwaga kà zwek bà lagwa.

<sup>33</sup>Azlabèza gulo gi la ahèj la akul aña kaslà ñuv pèra. Kadàyahaw gi, ama gèpèh à akul bokuba uwana gèpèh à azla Yahudiya aya: Kaslawwal à vok aña mad à slaka uwana gèday aw.

<sup>34</sup>Gèdàvè à akul mapèhay mawga: Wòyàw vok kà akul à akul, say kawoyaw vok kà akul à akul bokuba uwana gèwoyà akul.

<sup>35</sup>Baņa kawoyaw vok kà akul à akul kà, azladza gesina tadàsèlay kà, akul azlamèna matapla la slaka gulo, hadày!"

<sup>36</sup>Sèmon Piyer anavàl à gay la: "Sufèl kaday ma à uwala?" Yesu awulà ala: "Kaslala vok aña manèf gi à slaka uwana gèday lagonay aw. Ama bawbaw kà, kadànèf gi."

<sup>37</sup>Piyer agòdàl: "Sufèl, kà mana gèsley kà manèf ka lagonay aw ma? Gi, gèdàdàh vok, kà mav sifa gulo kà aņak!"

<sup>38</sup>Yesu agòdàl: "Ndzer, kà kak kadàdàh vok aña mav sifa aņak kà aņulo ay? Gèpèh à ka la dziriga kà, gurayña mewgdzagalaņ awiyay kà asik makèr, kadàgodày asik makèr, kà kasèl gi aw!"

## Yuhana 14

<sup>1</sup>"Kazamaw la gèl aw", Yesu agòd à atà, "Dìjàw gèl à Zèzagèla à vok, ñgaha dìjàw gi gèl à vok bay.

<sup>2</sup>Slaka madz à ahèj aņuvaw la mtèga Baba gulo, gèday gèdàdàhakulla slaka à ahèj. Agayña hadày awkà, naka gèpèh à akul aw.

<sup>3</sup>Ñgaha baņa gèdaday gèdadàhakulla slaka à ahèj, kà gèdàwula à waņ, kà gi aña mahèl akul à slaka gulo, kà akul aña magay la slaka uwana gi la abà.

<sup>4</sup>Akul kà, kasèlaw tetèvi mad à slaka uwana gèday."

<sup>5</sup>Tomas agòdàl: "Sufèl, mèsèl slaka uwana kaday aw. Kakay mèsalala vok aña masèl tetèvi ma?"

<sup>6</sup>Yesu awulà ala: "Gi tetèvi, gi dziriga, gi sifa. Dza aslala vok aña mad à slaka Baba la tetèvi anik, kokudà maguway la slaka gulo aw.

<sup>7</sup>Baņa kasèlaw gi kà, kasèlaw Baba gulo babay. Dagay lagonay kà, kasèlaw masla, ñgaha kanəjawnə babay."

<sup>8</sup>Filip agòdàl: "Sufèl, pèhanula Baba, uwaga kà diga zlà."

- <sup>9</sup>Yesu agòdál: "Mèdadza à ahəŋ kà mənŋa anina kà, bà pəra kà, kasəl gi aw uwa, Filip? Dza uwana anəŋà gi kà, anəŋà Baba gulo babay, ŋgaha ma kakay kagođay pəhanula Baba ma?"
- <sup>10</sup>Kadiŋal gəl à vok, kà gi la Baba la abà, Baba la gi la abà aw uwa? Gay uwanay gəpəh à akul gesina kà, atsa à waŋ kà la slaka gulo aw, ama la slaka Baba gulo. Baba uwana adza à ahəŋ la gi la abà la uwana ahən sləray aŋha ala.
- <sup>11</sup>Diŋàw gi gəl à vok à uwana gəgod: Gi la Baba la abà, Baba bay la gi la abà. Baŋa kadiŋawwal gəl à gay uwaga à vok aw kà, diŋàw gəl à abà à sləray gə uwana à vok tsi!
- <sup>12</sup>La dziriga gəpəh à akul: Dza uwana adiŋ gi gəl à vok, adàdah azlasləray uwana gədəfehəŋ suwaŋ. Adàdah sləray uwana aduwa uwanay, kà uwana gi gədaà à slaka Baba gulo.
- <sup>13</sup>Dèwdèw tatak uwana kadànavaw la sləm gulo kà, gədàvə à akul uwaga gesina, kà Kona aŋa mapəhla mazləbay aŋa Baba aŋha ala.
- <sup>14</sup>Baŋa kanavaw tatak la sləm gulo kà, gədàvə à akul uwaga."
- <sup>15</sup>Yesu agòd: "Aŋa kawoyaw gi kà, naka kakəsaw mapəhay gulo.
- <sup>16</sup>Gədàdəv kuda à Baba, kà masla aŋa masləl à akul masla mazlak akul anik à waŋ kà, Masasədok dziriga, kà masla aŋa magay la akul koksikoksi.
- <sup>17</sup>Gudəŋ à vok kà aslala vok aŋa mabəzal aw, kà uwana aslala vok aŋa manəŋəŋ la masəlay aw. Ama akul kà kasəlaw masla, kà uwana adagay la akul ŋgaha adàdza à ahəŋ la akul la abà."
- <sup>18</sup>"Gədàsak akul à ahəŋ la matawaŋ la abà aw, gədàwula à waŋ à slaka aŋkul.
- <sup>19</sup>La kaslà ŋuv la abà, gudəŋ à vok adànəŋ gi aw, ama akul kà, kadànəŋaw gi, kà uwana gi la sifa, akul babay la sifa.
- <sup>20</sup>Baŋa mavakay uwatà adàsa à waŋ kà, la mok uwatà la uwana kadəsəlaw kà gi la Baba la abà, ŋgaha kà Baba bay la gi la abà, ŋgaha gi bay la akul la abà."
- <sup>21</sup>"Dza uwana akəs mapəhay gulo, ŋgaha anəŋla uwaga kà, masla mawoya gi zlà. Baba gulo adàwoy dza uwana awoya gi babay, gədàwoya masla, gədàpəhalla vok."
- <sup>22</sup>Yahuda (awkà Yudas Iskariyot aw), agòdál: "Sufəl, kakay uwaga adàh vok, kà kapəhanula vok kà anu pəra, awkà à gudəŋ à vok aw ma?"
- <sup>23</sup>Yesu awuləl ala, agòdál: "Dza uwana awoya gi akəs mapəhay gulo kà, Baba gulo adàwoyəŋ, anu la Baba gulo mèdàduw à awtəy à slaka aŋha, mèdàdza à ahəŋ la mtəga aŋha.
- <sup>24</sup>Dza uwana awoya gi aw kà, akəs mapəhay gulo aw. Uwana katsənaŋw gi gəpahay kà, uwaga kà asa à waŋ kà la slaka gulo aw, ama asa à waŋ kà la slaka Baba gulo uwana asləl gi à waŋ."

- <sup>25</sup>"Gədapəh à akul uwaga dagay uwarà, à mok uwana məga anina.
- <sup>26</sup>Masla mazlak akul, à Masasəđok tsikasla uwana Baba adəsləl à akul à waŋ, la sləm gulo kà, masla la uwana adətapahakulla tatak gesina, ŋgaha adəwula à akul à gəl uwana gədapàha à akul gesina aya."
- <sup>27</sup>"Gəsak à akul ala lapiya à ahəŋ, gəvə à akul lapiya gulo. Gəvə à akul kà bokuba uwana gudəŋ à vok avà à akul aw. Kazamawla gəl aw, guba akəs akul babay aya aw.
- <sup>28</sup>Katsənàw uwana gəgəđ à akul kà, gədiy aŋulo. Ama gədəwula à waŋ à slaka aŋkul. Agayŋa kawoyaw gi kà, naka karabaw à kà uwana gəda à slaka Baba gulo, gəgəđ à akul, kà uwana Baba la uwana məŋga kà gi.
- <sup>29</sup>Lagonay kà, gədapəhakulla vok à abà, kokudà mapak vok aŋa azlatatak uwaga, kà mok uwana adəzlaŋalay kà, kadədiŋawwal gəl à vok.
- <sup>30</sup>Gəslala vok aŋa mabadma məŋga anina aya aw, kà uwana sufəl aŋa gudəŋ à vok uwanay kà nekwa atsa à waŋ. Maslay aŋha la ahəŋ bə ŋuv lakəl gulo aw.
- <sup>31</sup>Ama say gudəŋ à vok asəlay, kà gəwoya Baba kəla, ŋgaha gədza à ahəŋ kiya uwana asa à Baba. Səw à afik məda aŋami la abanay lagwa!"

## Yuhana 15

- <sup>1</sup>Yesu agəđ aya: "Gi la uwana gi matavəruk dziriga, Baba gulo kà dza aŋa guf matavəruk.
- <sup>2</sup>Kəla ahəl matavəruk uwana av mayyay aw kà, asləh gi à vok ala. Ŋgaha kəla ahəl uwana av mayyay kà adədeslay, kà aŋa mav mayyay məŋga aya.
- <sup>3</sup>Kà matapla uwanay gədatapaakullla kà, kadəgaw madadeslayga.
- <sup>4</sup>Nəbàw vok la gi, bokuba uwana gi la manəb vok gə la akul. Ahəl matavəruk aslala vok aŋa mav mayyay la aslasl gəl aŋha aw, say agay manəb vok gə, à iyà gə à vok. Kiya uwaga babay Yesu agəđ: Gi matvəruk dziriga kaslawwal à vok aŋa madz à ahəŋ kokudà gəl aŋkul aw, say baŋa kanəbaw gi vok à vok."
- <sup>5</sup>"Gi la uwana gi matavəruk iyà gə, akul kà akul azlamazləzl vok gə. Dza uwana adza à ahəŋ la gi la abà, iyaw gulo akəlay la masla la abà, masla adəvə mayyay aŋuvaw, kà uwana kaslawwalla vok aŋa madəh tatak la kokudà gi aw.
- <sup>6</sup>Dza uwana adza à ahəŋ manəb vok gə la gi aw kà, taduw à uda la guf la abà, bokuba ahəl matavəruk makəđəval à vok ala gə, agula la abatà, tatsatsamay kà mabəkay à akəl à gay, ŋgaha akəl abad à gay ledə.
- <sup>7</sup>Baŋa kadənəbaw vok la gi, ŋgaha bay gay gulo adənəb vok la akul la abà, nəvəw uwana asa à akul gesina, kadəbəzawwal.
- <sup>8</sup>Baŋa kavəw mayyay aŋuvaw, kadəgaw azlaməna matapla la slaka gulo. La uwaga la uwana mazləbay aŋa Baba gulo adəpəhla vok ala la slaka azladza.

- <sup>9</sup>Gəwoya akul la ləv tekula, bokuba uwana Baba gulo awoya gi. Dzàw à ahəŋ la masal gulo la abà.
- <sup>10</sup>Baŋa kakəsaw mapəhay gulo kà, kadàdzaw à ahəŋ la masal gulo la abà, kalkal bokuba uwana gəkəsəŋ mapəhay aŋa Baba gulo, ŋgaha gədzà à ahəŋ la masal aŋha la abà babay.”
- <sup>11</sup>"Gəpəh à akul uwaga kà, kà marabay gulo aŋa magay la akul la abà, ŋgaha marabay aŋkul babay aŋa magay mahənlaga.
- <sup>12</sup>Aganay mapəhay gulo: Wòyàw vok kà akul à akul, bokuba uwana gəwoya akul bay.
- <sup>13</sup>Masal la ahəŋ aduw aŋa dza, uwana av sifa aŋha kà aŋa azlaslawda aŋha aw.
- <sup>14</sup>Akul azlaslawda gulo, à baŋa kadəhaw uwana 'Dahàwwàŋ', gəgod à akul gesina.
- <sup>15</sup>Dagay lakana kà, gədàzala akul ala azlamagamza aya aw, kà uwana magamza kà asəl tatak uwana məŋga aŋha adəhəŋ aw. Ama gədàzalla akul ala azlaslawda, kà uwana tatak uwana gətəpla la slaka Baba kà, gədatap à akul ala babay suwaŋ.
- <sup>16</sup>Akul la uwana kakəsàwni gi aw, ama gi la uwana gəkəsàni akul, gəbək akul à ahəŋ kà kadaw aŋa mav mayyay, ŋgaha mayyay uwaga adasafay aŋa koksikoksi. Kiya uwaga Baba adàvə à akul dèwdèw tatak uwana kadənavaw la sləm gulo.
- <sup>17</sup>Gay uwana gəpəh à akul à vok à abà lagwa, say kawoyaw vok kà akul à akul.”
- <sup>18</sup>"Baŋa gudəŋ à vok azinakulla vok ala kà, sələw kà atsà vok à mazin gi vok ala dadəŋ teraŋa.
- <sup>19</sup>Agay kagaw azlaaŋa gudəŋ à vok kà, naka gudəŋ à vok awoya akul kà uwana akul azlaaŋha. Ama gətsatsəmàni akul, gəhəl akul à uda la abà, lagonay kà, akul azlaaŋa gudəŋ à vok aya aw, kà uwaga à uwana gudəŋ à vok azinakullla vok ala.
- <sup>20</sup>Awula à akul à gəl, à uwana gəpəh à akul uwarə kà, magamza aduwa məŋga aŋha aw. Baŋa tatərəb gi kà, tadətərərbah akul bay, ama baŋa takəs mapəhay gulo kà, tadəkəs mapəhay aŋkul babay.
- <sup>21</sup>Ama tadəfəhakulla uwaga à vok gesina kà, kà ahəl gulo, kà uwaga à uwana tasəl dza uwana asləl gi à waŋ aw.
- <sup>22</sup>Agayŋa gətsà à waŋ kà aŋa mapəh à atə aw, kà naka tsakana aŋatə atəd à atə à gəl aw. Ama lagwa kà haŋay lakəl aŋa tsakana aŋatə la ahəŋ aya aw.
- <sup>23</sup>Dza uwana azin gi vok ala kà, azina vok à Baba gulo ala bay.
- <sup>24</sup>Agayŋa gədəh azlatatak nadzipo gə uwana dza adəhəŋ aw aw, kà naka tsakana atəd à atə à gəl aw. Ama tsa gədəfəhah azlanadzipo uwaga kà, ŋgaha bə gotənaŋ kà, tazinan vok ala la Baba gulo.
- <sup>25</sup>Ama uwaga apakə vok kà, kà magəd uwana à afik tatsetsèr à wakità mapəhay à abà: "Tadazingəŋ vok ala kà kiga pəra." Yesu agòd à atə.

<sup>26</sup>Yesu agòd à atà aya: "Baṅa masla mazlak akul adàsa à waṅ, masla la uwana Masasəḍòk dziriga, uwana adàguwa à waṅ la slaka Baba gulo, gədàsləl à akul à ahəṅ à baṅa gədada à slaka Baba gulo. Masasəḍòk uwaga adàza sayda lakəl gulo.

<sup>27</sup>Ŋgaha akul bay kadàzaw sayda gulo, kà uwana kagaw la gi dagay la madzəka."

## Yuhana 16

<sup>1</sup>"Gəpəh à akul uwaga kà, kà akul aṅa masak madiṅal gəl à vok aw.

<sup>2</sup>Tadəkudəkah akul à lag la gày madəv kuda aṅa azla Yahudiya la aku. Kaslā adàsa à waṅ à uwana azladza uwana tadəkadah akul, tadəgoday kà: 'Sləray uwana mədəhəṅ kà, akəs à Zəzagəla à gəl.'

<sup>3</sup>Tadəh uwaga kà, kà uwana tasəl Baba aw, ṅgaha tasəl gi babay aw.

<sup>4</sup>Ama gəpəh à akul uwanay kà, kà akul aṅa madzugway lakəl aṅha, kà baṅa adapaka vok kà, kà aṅa mawul à akul à gəl." "Uwana gəpəh à akul uwaga dagay madzəka aw kà, kà uwana gi la tataka akul la abà.

<sup>5</sup>Lagonay kà, gəda à slaka dza uwana asləl gi à waṅ, ama dza la ahəṅ 'Kad à uwali', agod' à gi la tataka aṅkul la abà, amiyaka tekula aw.

<sup>6</sup>Ama mazaw la gəl adakəs akul kà uwana gəpəh à akul uwaga.

<sup>7</sup>Ama gəpəh à akul la dziriga kà, aṅkul kà ṅuləm gəda aṅulo, kà uwana baṅa gəda aṅulo aw kà, masla mazlak akul atsa à ahəṅ à slaka aṅkul aw. Ama baṅa gi gəda aṅulo kà, gədàsləl à akul à ahəṅ.

<sup>8</sup>Masla kà, baṅa adàsa à ahəṅ kà, adəpəhla à azladza gudəṅ à vok madzugway mawisiga aṅatà, lakəl aṅa tsakana, lakəl aṅa dziriga, ṅgaha lakəl aṅa seriya aṅa Zəzagəla.

<sup>9</sup>Tadəvavar gəl aṅatà lakəl aṅa tsakana, kà uwana tadiṅ gi gəl à vok aw,

<sup>10</sup>tavavar gəl aṅatà lakəl aṅa tatak dziriga, kà uwana gəda à slaka Baba gulo, ṅgaha kà, kadənəṅaw gi aya aw.

<sup>11</sup>Lakəl aṅa seriya babay kà, kà uwana sufəl aṅa gudəṅ à vok uwanay kà seriya adəkəsay."

<sup>12</sup>"Gi la azlagay aṅuvaw kà mapəh à akul, ama kaslawwala vok aṅa makəsiṅ dadəṅ aw.

<sup>13</sup>Mok uwana Masasəḍòk dziriga adàzlaṅalay kà, adədala akul la dziriga la abà gesina, kà uwana adəpəhay kà lakəl aṅa maslay aṅa gəl aṅha aw, ama adəpəhay kà lakəl aṅa uwana atsənəṅ, ṅgaha lakəl aṅa azlatatak uwana atsa à waṅ la huma la gay.

<sup>14</sup>Masla adəpəhla mazləbay gulo ala, kiya uwana atsənəṅ la slaka gulo, la uwana adàzakulaṅ.

- 15**Kəla tatak uwana Baba akoray kà uwaga aṅulo, kà uwaga à uwana gəgod à akul kà, Masasədok Zəzagəla adàwula à akul tatak uwana abəzal la slaka gulo.”
- 16**Yesu agòd à atà: "Aṅa kaslà ḡuv kadàṅəṅaw gi aya aw, ama zwek la huma la gay ḡuv kadàṅəṅaw gi aya.”
- 17**Kiya uwaga azlaanik la tataka azlaməna matapla la slaka aṅha, tanàvəhà à vok kà atà kà atà: "Uwaga ma, mana asal magodəy ma? Agòd à anu kà: 'Aṅa kaslà ḡuv kà mədàṅəṅəṅ gi aw, ama zwek la huma la gay aya kà mədàṅəṅəṅ gi aya, ḡgaha babay gəda à slaka Baba', agòd aya.
- 18**Mana asal magodəy kaslà ḡuv ma? Mətsənà uwana asal mapəhay aw.”
- 19**Yesu asəl kà asa à atà manaval. Kiya uwaga agòd à atà: "Asafay à uwana gəpəh à akul uwaga aw, zwek la huma la gay kadàṅəṅaw gi aw, la lig la ahəṅ ḡuv kadàṅəṅaw gi aya. Lakəl ma aṅa uwaga à uwana kanavahaw vok takay?
- 20**Gəpəh à akul la dziriga: Katawaw, katsahahaw hulolo, ama gudəṅ à vok adàrabay, kadàzamawla gəl, ama mazaw la gəl aṅkul kà, adəpaka marabay.
- 21**Baṅa mis azlà asekw à ahəṅ kà, mazaw gəl adal à vok, kà uwana kaslà matərabay aṅha adaslay, ama baṅa adasekw à ahəṅ kà, matərabay avikaṅ, kà uwana marabay kà uwana adayyi bəzi.
- 22**Kiya uwaga babay, akul la mazaw la gəl la abà la kaslà uwanay, ama gədàṅəṅ akul aya, ḡgaha ləv aṅkul adàrabay. Dza la ahəṅ aslala vok kà mazəbakulla marabay ala tetuwa aw.”
- 23**"Baṅa mavakay uwatà adasa à waṅ kà, kadànavaw gi tatak la sləm gulo aya aw. Gəpəh à akul la dziriga: Kəla tatak uwana kanavaw la sləm gulo kà, Baba adàvə à akul uwaga gesina.
- 24**Tsəràh à lakana dadəṅ kà, kadanavaw tatak la sləm gulo aw. Nàvəw ḡgaha kabəzawwal, ḡgaha kà marabay aṅkul aṅa mahənlə.”
- 25**"Gəpəh à akul azlatatak uwaga gesina kà la gay la gay la abà, ama kaslà atsa à waṅ à uwana gədəpəh à akul kà la gay la gay la abà aya aw. Gədəpəh à akul kà la dazuwaya lakəl aṅa Baba gulo.
- 26**Baṅa mavakay uwaga adaslay kà, gədədəv kudà à Baba kà aṅkul, gəgod magay aw.
- 27**Kà uwana Baba la gəl aṅha awoya akul. Awoya akul kà, kà uwana kawoyaw gi, kà uwana kadiṅawwal gəl à vok, kà gəsa à waṅ la slaka aṅha.
- 28**Gəsà à waṅ à gudəṅ à vok kà, gəsà à ahəṅ kà la slaka Baba. Lagwa kà, gəda à slaka Baba, gəsak à gudəṅ à vok à ahəṅ.”
- 29**Azlaməna matapla la slaka aṅha tagòdəl: "Lagonay kà, kapəhay la dazuwaya, kokudà la gay la gay la abà zlà.
- 30**Lagwa kà, mədəsəlay kà kasəl tatak gesina, ḡgaha kanəkudà kà dza aṅa manav à ka tatak aw. Mədiṅəl gəl à vok kà ndzer, kasà à ahəṅ kà la slaka Baba Zəzagəla.”

<sup>31</sup>Yesu agòd à atà: "Kadiṅawwal gəl à vok adagay lagwa ay?"

<sup>32</sup>Kaslà adàsa à waṅ, lagwa kà adasa à waṅ, uwana kadàsləhaw gəl à ahəṅ uwabeyuwi adadiṅ aṅha à mtəga aṅha, kadàsakaw gi à ahəṅ kokudà gulo. Ama la dziri kà, gi kokudà gulo aw, kà uwana anu la Baba gulo.

<sup>33</sup>Uwana gəpəh à akul uwaga gesina kà, kà akul aṅa magay la lapiya la maham gay à vok la abà la gi. Akul kà, kadàsaw ṅgərpa la gudəṅ la vok, ama kurit yewdi, agòd à akul aw! Kà uwana gədakədaslla gudəṅ à vok."

## Yuhana 17

<sup>1</sup>Mok uwana Yesu adapəh gay uwaga à gay gesina kà, anəṅà à zagəla, agòd: "Baba, kaslà kà adaslay. Pəhla mazləbay aṅa Kona aṅak ala, ṅgaha Kona aṅak apəhla mazləbay aṅak ala suwaṅ,

<sup>2</sup>kà uwana kavəl maslay lakəl aṅa azladza gesina la vədəh, kà masla aṅa mav sifa adəv à gay aw à azladza uwana kabəkəkal atà gesina.

<sup>3</sup>Sifa adəv à gay aw kà, kà aṅa azlauwana tasəl ka pəra, à kak Zəzagəla dziriga gə, ṅgaha kà masəlay Yesu Kristu uwana kasləl à ahəṅ.

<sup>4</sup>Gədapəhla mazləbay aṅak ala la vədəh, gədadəvəṅ à gay sləray uwana kaf à gi à ahəl kà madəhəṅ.

<sup>5</sup>Lagwa zlə kà, Baba kà, və à gi mazləbay uwana gəgà la masla la huma aṅak mok uwana gudəṅ à vok aləg madzəka dən zlə."

<sup>6</sup>"Baba, azladza uwana kabək à gi, atà la gudəṅ uwanay la vok kà, gədapəhatàla kak, kà uwana atà tagay azlaaṅak, ṅgaha kabək à gi atà, lagwa kà, atà takəs gay aṅak.

<sup>7</sup>Lagwa kà dèwdèw tatak uwana kavà à gi kà, tasəl kà, atsà à ahəṅ la slaka aṅak.

<sup>8</sup>Kà uwana gəpəh à atà ala gay uwana kapəh à gi à ahəl kà mapəh à atà, takəs, tasəl ndzer kà gəsà à waṅ la slaka aṅak, ṅgaha kà kak la uwana kasləl gi à waṅ."

<sup>9</sup>"Baba gədəv à ka kudà kà aṅatà. Awkà gədəv kudà kà gudəṅ à vok aw, ama kà aṅa azlauwana kabək à gi atà à ahəl, kà uwana azlaaṅak.

<sup>10</sup>Dèwdèw tatak uwana aṅak kà aṅulo, dèwdèw tatak uwana aṅulo bay kà, uwaga kà aṅak, kà uwaga à uwana mazləbay gulo apəhla vok ala la azlatatak uwaga la abà gesina.

<sup>11</sup>Gi kà, gi la gudəṅ la vok aya aw, ama atà kà, atà la gudəṅ la vok. Gi kà gəda à slaka aṅak Baba tsikasla, nəṅla atà la ndzəda aṅa sləm aṅak uwana kavà à gi, kà atà aṅa magay tekula, bokuba uwana məgaw tekula anu səla.

<sup>12</sup>Mok uwana gi la slaka aṅatà gəfà à atà sləm la maslay aṅa sləm aṅak, sləm uwana kavà à gi. Gənəṅla atà, amiyaka tekula aṅatà bay kà, azàla aw. Say dza uwana naka azilà, wakità agòd kà magəd uwana à afik, wakità agòd pəra.



- <sup>13</sup>Ama lagonay kà, gèda à slaka aṅak, à uwana gəpəh kiya uwanay kà, kà uwana gələg la gudəṅ la vok dadəṅ, kà atà aṅa maḃəzal marabay gulo la huḃ aṅatà, marabay uwana mahənlaga.
- <sup>14</sup>Gi, gəvà à atà gay aṅak, ṅgaha gudəṅ à vok azin atà vok ala, kà uwana azlaaṅa gudəṅ à vok aw, bokuba gi uwana gi aṅa gudəṅ à vok bay aw.
- <sup>15</sup>Gədəv à ka kuḃa kà mahəl atà à uda la gudəṅ la vok aw, ama aṅa manəṅla atà kà mawisiga.
- <sup>16</sup>Atà kà azlaaṅa gudəṅ à vok aw, bokuba gi, uwana gi aṅa gudəṅ à vok aw.
- <sup>17</sup>Pàk atà ala kà azlaaṅak, gay aṅak kà dziriga pəra.
- <sup>18</sup>Gi gədasləl atà à gudəṅ à vok, bokuba uwana kasləl gi à ahəṅ à gudəṅ à vok.
- <sup>19</sup>Gəvà à ka sifa gulo gesina kà aṅatà, kà atà babay aṅa magay azlaaṅak la dziriga.”
- <sup>20</sup>”Gədəv kuḃa kà, kà aṅatà pəra aw, ama kà aṅa azlauwana tadàḃiṅ gi gəl à vok, à kapəhla ala aṅatà bawbaw bay.”
- <sup>21</sup>”Gədəv kuḃa kà atà gesina aṅa magay tekula. Baba, tagay tekula la anu bokuba kak la gi babay anu tekula pəra, gudəṅ à vok aṅa masəlay kà kak kasləl gi à waṅ.
- <sup>22</sup>Baba gəvà à atà mazləḃay uwana kavà à gi, kà atà aṅa tagay tekula bokuba anu səla uwana anu tekula.
- <sup>23</sup>Gəgay la atà la abà, ṅgaha kak babay məgaw anu səla, kà magay tekula la slaka gə. Ḃgaha gudəṅ à vok aṅa masəlay kà kak la uwana kasləl gi à ahəṅ haḃay, ṅgaha kà kak kawoya atà bokuba uwana kawoya gi.”
- <sup>24</sup>”Baba, kak kavà à gi atà, asa à gi kà atà tagay la slaka uwana gədəgay, ṅgaha kà atà aṅa manəṅ mazləḃay gulo, uwana kavà à gi, kà uwana kawoya gi dagay uwana kaləg maḃàh gudəṅ à vok.
- <sup>25</sup>Baba dziriga, gudəṅ à vok asəl ka aw, ama gi kà gəsəl ka, ṅgaha azlauwana babay kà tasəl ka kà kak la uwana kasləl gi à ahəṅ.
- <sup>26</sup>Lagwa gəpəhatàla kak, ṅgaha gədəpəhatàla kak aya, kà masal aṅak uwana kawoya gi aṅa magay la atà babay, ṅgaha gi babay aṅa magay la atà.”

## Yuhana 18

- <sup>1</sup>Kiya uwaga mok uwana Yesu adadəv madəv kuḃa à gay kà, ahəd la azlaməna matapla la slaka aṅha à gay dərəv à uda anik aṅa mukwà Kidəron. La abatà kà, gəy aləl la ahəṅ adà à abà la azlaməna matapla la slaka aṅha.
- <sup>2</sup>Yudas masla matal kaf à Yesu à gəl babay kà, asəl slaka uwatà, kà uwana Yesu adàha à abatà kwà à kwà la azlaməna matapla la slaka aṅha.

- <sup>3</sup>Yudas zlà, ahàd à gày alàl à abà la maham à ahəŋ slodzi, la azlaməna manəŋla gày Zəzagəla la tsəh. Azladza uwaga kà azlamadzahaga aŋa mav tatak la azla Farisəya la uwana tabəkàl à tsəh, tahəl fənəs la matəvani à akàl à ahəl.
- <sup>4</sup>Kiya uwaga Yesu kà asəl tatak uwana adàbəzal gesina, azà à vok à awtày à slaka aŋatà, agòd à atà: "Uwa, kayahaw uwa?"
- <sup>5</sup>Tawulà ala, tagòd: "Yesu, zil Nazaret." Yesu agòd à atà: "Giga la uwanay, à uwana kayahaw!" Yudas uwana atàl kaf à gəl, la abatà atà nna.
- <sup>6</sup>Mok uwana 'Gəga la uwanay', Yesu agòd à atà kà, tawul à lig, tatàd à vədah.
- <sup>7</sup>Yesu anàv à atà aya, agòd à atà aya: "Uwa, kayahaw uwa?" Tagòdàl: "Yesu, zil Nazaret."
- <sup>8</sup>Yesu agòd à atà: "Gəga la uwanay, gədagod à akul aw takay? Baŋa gi kayahaw kà, sàkàw azlaanik uwaga tada aŋatà!"
- <sup>9</sup>Kiya uwaga la uwana gay uwana Yesu apəh uwarà, agəf à afik: "Baba, azladza uwana kabək à gi à ahəl kà, amiyaka tekula aŋatà kà adazila aw."
- <sup>10</sup>Katsakar la Səmon Piyer la ahəl, abədf katsakar à lag, adədla mayà aŋa məŋ madzahaga aŋa azlaməna mav tatak à Zəzagəla, akədəval sləm ahəl kaf lakəl ala, sləm aŋa mayà uwatà kà Malkus.
- <sup>11</sup>Yesu agòd: "Hay, Piyer, wulà katsakar aŋak à gày aŋha à agu. Kadzugw kà 'Gəsa ŋərpà à uda la kətsaw uwana la abà Baba avà à gi aw', kagod takay?"
- <sup>12</sup>Maham à ahəŋ slodzi, la azlaməŋga aŋatà, la azlaməna manəŋla gày Zəzagəla aŋa azla Yahudiya tahamà à Yesu à adi, takàs, tawədfəŋ.
- <sup>13</sup>Terəŋa kà, tadàlla à mtəga aŋa Hanas dadəŋ. Hanas kà tsinay aŋa Kayyif, uwana masla la uwana məŋ madzahaga aŋa azlaməna mav tatak à Zəzagəla la mavay uwatà la tsəh.
- <sup>14</sup>Tekefik kà, Kayyif la uwana avà sawaray à azla Yahudiya: "Duləm kà dza tekula aməts à kà azladza gesina aŋa maməts à gay", agòd tekefik.
- <sup>15</sup>Səmon Piyer atà la masla matapla anik tanəfà Yesu. Masla matapla anik uwatà kà, məŋ madzahaga asəl, tahàd à gày à kodal à abà la slaka la Yesu, à kodal aŋa məŋ madzahaga uwaga à abà.
- <sup>16</sup>Ama Piyer agədf à gay gamagày. Kiya uwaga masla matapla anik uwana məŋ madzahaga asəl, asà à uda abadmà la mis uwana anəŋla gamagày kà mav tetəvi à Piyer, kà mad à gày.
- <sup>17</sup>Mis uwana anəŋla gamagày agòd à Piyer: "Kak babay kà kak masla matapla aŋa zil uwanay aw takay?" "Awaŋ, awaŋ, gi la abà aw", Piyer agòd.
- <sup>18</sup>Anasl la ahəŋ, azlaməna sləray, la azlaməna manəŋla tavatsà akàl à ahəŋ, kà madz la ahəŋ la adi. Piyer babay adzà à akàl à adi la slaka aŋatà.

- 19**Məñ madzahaga aña azlaməna mav tatak uwana anavà Yesu lakəl aña azlaməna matapla la slaka aña, lakəl aña matapla aña uwana atəpla à azladza.
- 20**Yesu agòdál: "Gəpəhàhàh gay à azladza la dazuwaya, gətəpəhàtəla azlatatak la azlagəy madəv kuda la aku, ŋgaha la məñ gəy Zəzagəla la aku, la slaka uwana azla Yahudiya tahàmàhà gay à vok gesina, gəhadà tatak à ahəñ aw.
- 21**Kà mana kanav gi tatak aya ma? Nəv à azladza uwana tatsəb gi sləm lakəl aña azlagay uwana gəpəh à atə gesina. Atə tasəl la lela lakəl aña uwana gəpəh à atə."
- 22**Uwana Yesu apəh gay uwaga kà, masla manəñla anik uwana la makəla aña, akədəval mamits à ahəl la magòdál: "Kiya uwaga la uwana kaula à məñ madzahaga aña azlaməna mav tatak à Zəzagəla à adi takay?"
- 23**Yesu agòdál: "Baña gəpəh mawisiga kà pəhgəla mawisiga uwatə. Ama baña dziriga gəpəh ma, kà mana kadəf à gi kiya uwanay ma?"
- 24**Hanas asləl masla la mawadəñga à slaka Kayyif məñ madzahaga.
- 25**La mok uwatə Səmon Piyer la abatə à vud akəl à vok. Tanavəlla gay ala: "Kak babay, kak tekula aña azlaməna matapla aña zil uwanay aw takay?" Ama Piyer awulà à uda, agòd: "Awan, awan, gi la abə aw!"
- 26**Tekula la tataka aña azlamagamza aña məñ madzahaga aña azlaməna mav tatak à Zəzagəla la abə, uwana yaga aña dza uwana Piyer akədəval sləm lakəl ala, agòdál: "Kak à uwana gənəñà ka la gəy aləl la abə, akul səla aw takay?"
- 27**"Gi aw!", Piyer agòd aya, katskats mewgdzagalañ awiyà la kaslè uwatə.
- 28**La gay bebəñ bəñ, tasəlla Yesu à uda la mtəga Kayyif, tadəlla à mtəga gumna aña azla Rom. Ama azla Yahudiya tadə à gəy la mtəga aña gumna aw, kà uwana wakità mapəhay aña atə avà à atə tetəvi aw, kà uwana baña tadə à gəy kà, adatəla əläh à vok, taslala vok aña mazuw tatak may aña madəvaday Paska aw.
- 29**Kà uwaga à uwana gumna Pilatus asə à uda à slaka aña atə, anəv à atə lakəl: "Ma aña mana kapuwəw gudzi à dza uwanay à gəl ma?"
- 30**Tagòdál: "Agayña agay dza mawsiga aw kà, naka məslala vok aña mav à ka à ahəl aw."
- 31**Pilatus agòd à atə: "Dəwla, kadəfəhawla seriya à gəl aña kul bokuba uwana wakità mapəhay aña kul apəhay." Azla Yahudiya tagòdál: "Tetəvi la ahəñ kà aña mi aña madəh seriya mamətsay à dza à gəl aw."
- 32**Uwaga apakə vok aña magəf gay aña Yesu à afik, apəh lakəl aña mamətsay aña.
- 33**Kiya uwaga Pilatus awul à gəy, azəla Yesu, agòdál: "Kak, Sufəl aña azla Yahudiya ay?"
- 34**Yesu agòdál: "Kapəh uwaga ma la gəl aña ay? Awma azlaanik tapəh à ka magay ay?"

<sup>35</sup>Pilatus agòdál: "Gi zil Yahudiya suwan ay? Azlayaga anjak dardar gà, la azlamadzahaga anja azlaməna mav tatak à Zəzagəla la uwana tavà à gi kak, mana kadəhəŋ takay ma?"

<sup>36</sup>Yesu agòd: "Makoray gulo kà anja gudəŋ à vok uwanay aw, agayŋa makoray gulo kà anja gudəŋ à vok uwanay kà, naka iyay, azlaməna sləray gulo tagodəy kà mav à gi à ahəl anja azla Yahudiya aw. Ama kiya uwaga aw, makoray gulo kà anja gudəŋ à vok uwanay aw."

<sup>37</sup>Pilatus agòdál zlà: "Lagwa ma kak Sufəl ay?" Yesu agòdál: "Bokuba uwana kapəh kà, gi Sufəl. Tayyà gi, gəsà à ahəŋ à gudəŋ à vok kà, kà mapəh dziriga. Uwabeyuwi uwana asal dziriga atsəb sləm à dziriga uwana gəpəhay."

<sup>38</sup>"Mana à dziriga ma?", Pilatus agòdál. Mok uwana adapəh gay uwaga, Pilatus asà à uda aya, kà mad à slaka azla Yahudiya, adzàdātəŋ ala, agòd à atà: "Gəbəz à tatak uwana adukwla zil uwanay à ahəŋ aw."

<sup>39</sup>Ama bokuba uwana zagəla ankul kà, gədàwa à akul gəl à masla danay tekula kəla madəvaday Paska ma. Lagwa ma asà à akul gəduwa à akul gəl à Sufəl anja azla Yahudiya ay?"

<sup>40</sup>Kiya uwaga tadzəkà mawiyay: "Awan, masla aw! Barabas la uwana asa à anu!" Tekedik Barabas uwatà kà, agà kà masla nabəra.

## Yuhana 19

<sup>1</sup>Kiya uwaga Pilatus avà à atà tetəvi kà maslāh Yesu ala la kurpi.

<sup>2</sup>Azlaslodzi taslāsləp gabaga anja atək kà mawad à Yesu à gəl, ŋgaha tatsəkwa à deri mativga gà à abà vikuza.

<sup>3</sup>Tazà à vok à slaka anha, ŋgaha tagòdál: "Ayyi, Sufəl anja azla Yahudiya!" Dgaha tazlāb la maməts à ahəl.

<sup>4</sup>Kiya uwaga Pilatus asà à uda aya, agod à maham à ahəŋ dza, agòd à atà: "Gətsakulla à uda à abanay. Kà akul anja masəlay kà tatak la ahəŋ à uwana azlayla kà madukwla seriya à gəl aw."

<sup>5</sup>Yesu asà à uda la gabaga anja atək lakəl, la deri mativga la vok vikuza. Dgaha Pilatus agòd à atà: "Aganay dza zlà!"

<sup>6</sup>Ama uwana azlamadzhaga anja azlaməna mav tatak à Zəzagəla, la azlaməna manəŋla gəy Zəzagəla tanəŋəŋ kà, tadzəkà mawiyay: "Zləl masla à ahəf à adi, zləl masla à ahəf à adi!" Pilatus agòd à atà: "Zlələw masla à ahəf à adi la gəl ankul, kà uwana gəbəzà à tatak uwana gəfəhalla seriya à gəl aw."

<sup>7</sup>Azla Yahudiya tagòdál: "La wakità mapəhay gami la abà kà, mapəhay gami agòd kà: Azlayla à vok amətsay kà uwana: 'Gi la gəl gulo kà, gi Kona anja Zəzagəla', agod."

<sup>8</sup>Mok uwana Pilatus atsənà gay uwatà, guba akəs kayak aya.

- <sup>9</sup>Awùl à gày, ñgaha anàv à Yesu: "Kasà à wañ ma la ala tak la?" Ama Yesu kà awulà gay à uda aw.
- <sup>10</sup>Kiya uwaga Pilatus agòdál: "Asà à ka mabadgëma aw ay? Kasəl kà gi la maslay aña maduwa ka gəl, ñgaha bay kà, gi la maslay aña mazləl ka à ahàf à adi aw takay?"
- <sup>11</sup>Yesu agòdál: "Kak la maslay lakəl gulo aw, say baña uwana Zəzagəla avà à ka dagay la afik pəra. Kà uwaga à uwana dza uwana avà à ka gi à ahàl la uwana aduwa ka la tsakana gesina."
- <sup>12</sup>Dagay la mok uwatà Pilatus ayàh tetəvi kà maduw gəl à Yesu. Ama azla Yahudiya tadzəkà mawiyay: "Baña kasak à dza uwaga kà, kak slawda aña məñ sufəl aya aw! Kəla dza uwana 'Gi sufəl', agòd'kà, masla məzam aña məñ sufəl!"
- <sup>13</sup>Mok uwana Pilatus atsənà gay uwaga kà, awùlla Yesu à uda aya, adzà à kursi aña seriya à afik, la slaka uwana tazalalla Pave (Uwaga asal magodfay: slaka akur madəlay gay gə, la gay Ibəranəñkowen Gabbatha, tagodál)
- <sup>14</sup>Uwaga kà, agà vud' madāh vok aña vud' madəvaday Paska, la tataka afats. Pilatus agòd' à azla Yahudiya: "Masla la uwaga à Sufəl añkul!"
- <sup>15</sup>Ama tadzəkà mawiyay: "Kəd' masla, kəd' masla, zləl à ahàf à adi!" Azlaməñ madzahaga aña azlaməna mav tatak à Zəzagəla tagòd: "Sufəl gami anik la ahəñ aw, say məñ sufəl aña azla Rom pəra."
- <sup>16</sup>Kiya uwaga Pilatus avà à atà Yesu à ahàl, kà atà aña mazləl à ahàf à adi. Kiya uwaga tadàla Yesu.
- <sup>17</sup>Yesu asà à uda la gudəñ la abà, ahàf uwana tadəzləllal à adi lakəl aña, kà mad slaka uwana tazalalla slaka aslasl takas à gəl. (Tazalalla Golgota la gay Ibəranəñkowen)
- <sup>18</sup>La abatà la uwana, azlaslodzi tazləl Yesu à ahàf à adi. La kaslà uwatà la uwana tazləl azladza səla à ahàf à adi atà nna, tekula la ahàl kaf, tekula la ahàl gudzay aña. Yesu la tataka la abà.
- <sup>19</sup>Pilatus avà à atà tetəvi kà matsetser wakità kà maf à ahàf à adi lakəl aña. Aganay matsetseray gə uwana tatsetsèr: YESU ZIL NAZARET, SUFƏL ADA AZLA YAHUDIYA.
- <sup>20</sup>Azla Yahudiya aņuvaw tadzəñəh matsetseray uwatà, kà uwana slaka uwana tazləl Yesu à ahàf à adi, kà nekwa la mad à hud' gudəñ à abà, matsetseray gə uwana tatsetsèr kà la gay Ibəranəñkowen, la gay latin, ñgaha la gay gərək.
- <sup>21</sup>Kiya uwaga azlamadzahaga aña azlaməna mav tatak à Zəzagəla uwana la tataka azla Yahudiya la abà, tagòd' à Pilatus: "Matsetseray uwanay: Gi Sufəl aña azla Yahudiya, kagod' kà kità aw, ama tsetsèr kà: Dza uwanay la uwana agòd' kà: 'Gi Sufəl aña azla Yahudiya', agòd', kagod'ay."
- <sup>22</sup>Pilatus agòd': "Uwana gədatsetseray kà, adza à ahəñ kiya uwaga pəra."

- <sup>23</sup>Mok uwana azlaslodzi tazlèl Yesu à ahàf à adi kà, tahèl lukut aḡha, tavàhàḡ ala slaslaka ufaḡ, kəla slodzi abèzal slaka tekula, tekula. Tahèl deri aḡha uwana madzəbayga vok aw, tsərəh à afik, tsərəh à vədah.
- <sup>24</sup>Azlaslodzi tagòḡ à vok kà atà kà atà: "Məkwaha deri uwanay ala aw, ama mətsà tsatsa lakəl kà anu aḡa masəl dza uwana agədàl." Uwanay apakà vok kà magəd gay uwana à afik wakità Zəzagəla apəh: 'Tavàhà lukut gulo la tataka aḡatà la abà, tatsà tsatsa la lukut gulo lakəl.' Kiya uwanay la uwana azlaslodzi tadəhàḡ zlà.
- <sup>25</sup>Nekwa la ahàf uwana tazlèllal Yesu à adi kà, iyà aḡha atsizl à abatà, atà la deda aḡha duguga, mis aḡa Kəlopas, ḡgaha Mariyama dəḡ zla Magdala.
- <sup>26</sup>Yesu anəḡà iyà aḡha, la makəla aḡha masla matapla uwana awoyàḡ kaykay. Yesu agòḡ à iyà aḡha: "Mis uwanay kà kona aḡak la uwaga."
- <sup>27</sup>ḡgaha agòḡ à masla matapla uwaga: "Iyà aḡak la uwaga." Dagay vud uwatà, masla matapla azəb à mtəḡa aḡha.
- <sup>28</sup>Uwana uwaga adada à lig gesina, Yesu asəl tatak gesina kà adadəv à gay, apəh uwaga kà mahən gay uwana ala matsetseray agod: "Nəlay aza à gi."
- <sup>29</sup>Iyaw hamhamga la ahəḡ la abatà la daraw gà dəḡəra. Azlaslodzi tadùw sawsaw à iyaw hamhamga uwaga à abà, tafà à kavak à gay kà madziyla à afik aḡa makokuzay.
- <sup>30</sup>Mok, uwana adakokuz iyaw uwaga, Yesu agòḡ: "Lagwa kà adagay diga!" Akəsà gəl à ahəḡ, aməts.
- <sup>31</sup>Uwaga kà mavakay madəh vok aḡa maduw ləv, asà à azla Yahudiya kà, azlavok adza à ahəḡ la ahàf à adi tsərəh à mavakay maduw ləv aw, kà uwana mavakay uwatà kà mavakay mapis ala gay à vok gà, tanəv à Pilatus kà, takàlähà à atà asik ala, kà mahəl vok à ahəḡ la ahàf la adi.
- <sup>32</sup>Kiya uwaga azlaslodzi tasà à waḡ takàlähà asik à matera ala, la aḡa masəla, uwana la makəla aḡa Yesu lakəl la slaka gà.
- <sup>33</sup>Uwana tabəz à Yesu à vok kà, tanəḡàḡ kà adamətsay. Kà uwaga à uwana takàlla ala asik ala aw.
- <sup>34</sup>Ama tekula aḡa azlaslodzi azlèl ala makəlla la atsəkad, batsàrà aḡiz la iyaw asà à uda.
- <sup>35</sup>Dza uwana azàḡ lakəl aḡa tatak uwaga apakà vok gesina kà, azàḡ lakəl aḡha kà dziriga, masla bay kà asəl kà uwana anəḡà, akul babay kà kaslaw aḡa madiḡal gəl à vok.
- <sup>36</sup>Uwanay apakà vok kà gay aḡa matsetseray aḡa magəd à afik ndzer: 'Tadəkəlah aslasl aḡha ala aw.'
- <sup>37</sup>La azlaslaka anik la wakità la abà agod aya kà: 'Tadənəḡ dza uwana tazlèlàn ala la ahàf la adi.'

<sup>38</sup>Uwana uwaga adada à lig, Yusufu zil gudəŋ Arimate, anəv tetəvi la slaka Pilatus kà mazəb vok aŋa Yesu. (Yusufu kà masla matapla la slaka Yesu la gəl à gəl, kà uwana guba azəŋ kà azla Yahudiya) Pilatus avəl tetəvi. Kiya uwaga Yusufu asà à waŋ, azəb vok aŋa Yesu à ahàf à adi ala.

<sup>39</sup>Nikodemus, zil uwana ahàd à slaka Yesu la vəd, asà à waŋ à slaka aŋha bay, matərsin, la azlaahàf kidzidzi uwana mahamala gay à vok gà la ahàl, mahanay aŋha kà kilo dzik makər (Bokuba tasà kulo gəl aŋha zlo)

<sup>40</sup>Tazəb vok aŋa Yesu atà səla, tafàdal bafta à adi, tafahàhal azlatatak mazinay gà à vok, uwana zagəla aŋa azla Yahudiya, kà mazəb dza à uda, à baŋa adamətsay.

<sup>41</sup>La slaka uwana tazləl Yesu à ahàf à adi kà, gəy aləl la ahəŋ la abatà. La gəy aləl uwatà la abà kà, zəvay mawga la ahəŋ, taf dza à agu didi aw.

<sup>42</sup>Bokuba uwana vuđ madāh vok aŋa vuđ maduw ləv aŋa azla Yahudiya kà, tafà Yesu à agu la abatà, kà uwana zəvay kà nekwa.

## Yuhana 20

<sup>1</sup>Bəŋ la zay la tsəh vuđ maduw ləv aŋa azla Yahudiya, Mariyama dəg zla Magdala, ahàd à gəl zəvay. Masla anəŋəŋ kà akur uwana la zəvay la gay kà, matakoslal à ama ala gà.

<sup>2</sup>Adà aŋha la mahoyay, abəz à Səmon Piyer à vok, atà la masla matapla anik uwana Yesu awoyàŋ kaykay, agòđ à atà: "Sufəl kà, tazəb à lag la zəvay la aku, məsəl slaka uwana tadàlla à abà aw."

<sup>3</sup>Piyer atà la masla matapla anik uwanay tahàd à gəl zəvay.

<sup>4</sup>Tahàd la mahoyay, tahòy, ama masla matapla anik uwanay aduwà Piyer la mahoyay, atsà vok à gəl zəvay.

<sup>5</sup>Atsòŋ gəl à agu, anəŋà bafta la vədah la aku, ama adà à agu aw.

<sup>6</sup>Səmon Piyer, uwana asà à waŋ la lig la ahəŋ, adà à agu. Masla anəŋà bəfta la vədah,

<sup>7</sup>la nalbət uwana tafafad à Yesu à gəl, masla kà, adəbanì vok la bafta aw, mafafad à abà gà la slaka anik kokudà gəl aŋha.

<sup>8</sup>La lig la ahəŋ, masla matapla uwana atsà vok à gəl zəvay, adà à agu suwaŋ. Anəŋəŋ, ŋgaha adiŋal gəl à vok.

<sup>9</sup>(Tekedika la kaslā uwatà kà, azlaməna matapla tatsənà godega aŋa wakità, uwana Yesu adəwula à uda la mamətsay agòđ, dadəŋ aw)

<sup>10</sup>Ŋgaha azlaməna matapla səla uwatà tawùl aŋatà.

<sup>11</sup>Mariyama atsizilla ahəŋ la gay zəvay la matuway. Uwana atuway kà, atsòŋ gəl à zəvay à agu kà manəwəzay,

- <sup>12</sup>ŋgaha anəŋà azlamalika səla la lukut medəkuga la vok təlla, tadzàh madzay la slaka uwana hənà Yesu à ahəŋ. Tekula adzà madzay lakəl gà, anik adzà madzay la godega gà.
- <sup>13</sup>Azlamalika uwaga tanàvalla gay: "Mis, kà mana katuway ma?" Mis agòd à atà: "Tazəb vok aŋa Sufəl gulo, gəsəl slaka uwana tadàlla à abà aw."
- <sup>14</sup>La mapəh gay uwaga la gay la, agolà vok, ŋgaha anəŋà Yesu.
- <sup>15</sup>Yesu anàvalla gay ala: "Mis, kà mana katuway ma? Uwa kayahay uwa?" Mis adzùgw kà masla sləray guf, agòd, à uwana apəhal kiya uwanay: "Baŋa kak kazəb kà, pəhgəla slaka uwana kafà à abà, kà gəday, gədàzəbay."
- <sup>16</sup>Yesu agòdàl: "Mariyama!" Fətsal, Mariyama agolà vok à slaka aŋha, ŋgaha agòdàl la gay Ibəranəŋkowen: "Rabbuni!" (Uwana asal magoday: Məŋga gulo)
- <sup>17</sup>Yesu agòdàl: "Kakəs gi à ahəŋ aw, kà uwana gədàda à afik à slaka Baba gulo aw. Ama hād, kadəgodf à azladedada gulo kà gədàda à afik à slaka Baba gulo, uwana Baba aŋkul babay, à slaka Zəzagəla gulo uwana Zəzagəla aŋkul babay."
- <sup>18</sup>Kiya uwaga Mariyama dəg zla Magdala azà gay uwaga à azlaməna matapla: "Gədanəŋ Sufəl!" Ŋgaha atùgw a atà tatak uwana apəhal gesina.
- <sup>19</sup>La gay mokokhu aŋa vuđ maduw ləv aŋa azla Yahudiya uwatà, azlaməna matapla tahamà gay à vok la gày anik la aku, tatsàkà à gamagày à ama la tsəkurum, kà uwana guba azà à atà kà azla Yahudiya. Yesu asà à waŋ, atsizl à tataka aŋatà à abà, agòd à atà: "Lapiya aga la akul!"
- <sup>20</sup>Uwana adapəh à atà uwaga, apəhatàla ahəl aŋha la makəla aŋha. Azlaməna matapla tahən ala la marabay à kà uwana tanəŋà Sufəl.
- <sup>21</sup>Yesu agòd à atà aya: "Lapiya aga la akul, bokuba uwana Baba asləl gi à waŋ kà, gi babay kà gəsləl akul suwaŋ."
- <sup>22</sup>La lig aŋa uwaga la ahəŋ, afətà à atà afadf à gəl, agòd à atà: "Bəzàw Masasəđok Zəzagəla!"
- <sup>23</sup>Uwabeyuwi uwana kamatsawwalla tsakana ala kà, adəbəz mamatsila. Azlauwana kamatsaw à atà tsakana ala aw kà, tadəbəz mamtsila babay aw."
- <sup>24</sup>Mok uwana Yesu asà à waŋ kà, Tomas, tekula aŋa azlaməna matapla kulo gəl aŋha səla, (Uwana tazalal vəgal), la uwana agà la tataka aŋatà la abà, à mok uwana Yesu asà à waŋ aw pəra.
- <sup>25</sup>Azlaməna matapla anik tagòdàl: "Mənəŋà Sufəl!" Ama Tomas agòd à atà: "Baŋa gədənəŋəŋ azlamokfak aŋa mamasamasa uwana la ahəl aŋha aw kà, gədiŋal gəl à vok aw, say baŋa gədàtap gay gəl ahəl gulo à amik, aŋa mamasamasa uwatà à abà dadəŋ, ŋgaha gətəp ahəl gulo à amik uwana à abà la makəla aŋha aw kà, gədiŋal gəl à vok aw!"



<sup>26</sup>Bà la mad à abà aña kasukwa uwatà aya kà, azlaməna matapla tahamà gay à vok la kay aya. Vudf uwatà kà, Tomas la tataka aņatà la abà. Gamagay matsakahay gà la tsəkurum, ama Yesu asà à waņ, atsizl à tataka aņatà à abà, la magoday: "Lapiya aga la akul!"

<sup>27</sup>Ŋgaha agòd à Tomas: "Tomas, tàp gay gəl ahəl aņak à abà la abanay, ŋgaha nərèz makəla gulo, sàk à matsigay, diņal gəl à vok pəra."

<sup>28</sup>Tomas agòdàl: "Sufəl gulo, Zəzagəla gulo!"

<sup>29</sup>Yesu agòdàl: "Kà uwana kadanəņ gi pəra, à uwana kadiņal gəl à vok ay? Marabay la azlauwana tadiņal gəl à vok la kokudà manəņ gi!"

<sup>30</sup>Yesu adəhà azlanadzipo anik la huma aña azlaməna matapla aņha aņuvaw, uwana tatsetsər à wakità uwanay à abà aw.

<sup>31</sup>Ama uwana agà la abà kà tatsetser kà, kà akul aña madiņal gəl à vok kà Yesu kà Kristu, ŋgaha Kona aña Zəzagəla. La madiņal gəl à vok uwaga kà akul kabəzaw sifa adəv à gay aw, la masla la abà.

## Yuhana 21

<sup>1</sup>La lig aña uwaga la ahəņ aya, Yesu apəhla vok à azlaməna matapla la slaka aņha, la gay dərəv Tiberiya, la kuba uwanay uwana apəhatàla vok:

<sup>2</sup>Səmon Piyer, la Tomas (Uwana tazalalla vəgal), Natanayel, uwana la Kana aña Galili, azlabəza aña Zebede, la azlaməna matapla səla anik aña Yesu, tahamà gay à vok.

<sup>3</sup>Səmon Piyer agòd à atà: "Gəday, gədàkas kilfi." Atà tagòdàl: "Anu babay kà, mənəfa ka", ŋgaha tahàd à kəslah iyaw à afik. Ama la hudf vədf uwatà kà, takəs tatak aw.

<sup>4</sup>Mok uwana məl azlà awulà, Yesu apəhatàla vok la gay dərəv, ama azlaməna matapla tasəl kà uwaga kà Yesu aw.

<sup>5</sup>Kiya uwaga Yesu agòd à atà: "Azlakohana, kakàsaw kilfi ay?", agòd à atà. "Awaņ", tagòdàl.

<sup>6</sup>Masla agòd à atà: "Dùwàw dzarawa aņkul à makəla à ahəl kaf aña kəslah iyaw, ŋgaha kabəzaw à kilfi!" Kiya uwaga tadùw à abà ŋgaha tabəz kilfi tsəràh à uwana taslàla vok aña mabiyəņ à uda aya aw, kà uwana adahənla la kilfi.

<sup>7</sup>Masla matapla uwana Yesu awoyàņ kaykay agòd à Piyer: "Uwaga kà Sufəl gami!" Kà uwaga, mok uwana Səmon Piyer atsənà uwaga: 'Sufəl' tagòd kà, adùw lukut aņha à vok, avəl à iyaw à abà.

<sup>8</sup>Azlaməna matapla anik tasà à waņ la kəslah iyaw, la mabiy dzarawa uwana kilfi adahən à abà. Kərkər la gay dərəv aw, bokuba zuwid tekula.

<sup>9</sup>Mok uwana tasà à vəfàh kà, tanəņà akəl, kilfi la afik la Pain.

<sup>10</sup>Yesu agòd à atà: "Kilfi uwaga kakàsaw, kasawla azlaanik à waņ à abanay."

- 11**Səmon Piyer ahəd à kəslah iyaw à afik, abiyà dzarawa à vədah la kilfi mənğa gə dzim bəzi aḡha dzik zlo gəl aḡha makər gesina aḡha. Ama la magol kilfi uwaga babay kà dzarawa akwahala aw.
- 12**Yesu agòd à atà: "Sàw à waḡ, kazuwaw!" Amiyaka bà tekula la tataka azlaməna matapla aḡha la abà kà, dza aslala vok aḡha manaval: "Kak uwa" aw, kà uwana tasəl kà masla Sufəl aḡatà.
- 13**Yesu azà vok à slaka Pain, ahəl, ḡgaha avàhà à atà, ḡgaha akàl à atà kilfi babay, bokuba uwana avàhà à atà Pain.
- 14**Uwaga kà, kà mamakər à uwana Yesu apəhla vok à azlaməna matapla la slaka aḡha, la lig aḡha mawul à uda aḡha la mamətsay.
- 15**Uwana tazùw tatak may à gay kà, Yesu agòd à Səmon Piyer: "Səmon, Kona aḡha Yuhana, kaduwà azlauwanay la mawoy gi takay?" "Iyay, Sufəl, kasəl kà gəwoya ka" Yesu agòdàl: "Nəḡla azlabəza tuwaḡ gulo."
- 16**ḡgaha agòdàl kà masəla aya: "Səmon, Kona aḡha Yuhana, kawoya gi ay?" "Iyay, Sufəl, kasəl kà gəwoya ka." Yesu agòdàl: "Fà sləm à azlabəza tuwaḡ gulo!"
- 17**ḡgaha Yesu agòdàl kà mamakər aya: "Səmon, Kona aḡha Yuhana, kawoya gi ay?" Piyer agòdàl la mazaw la gəl gə, kà uwana Yesu apəhal kà mamakər: 'Kawoya gi ay?' ḡgaha agòdàl: "Sufəl, kasəl tatak gesina, kasəl bay kà, gəwoya ka." Yesu agòdàl: "Nəḡla azlatuwaḡ gulo!"
- 18**La hadəy gəgod à ka: La mok uwana kaləg medəga, kafəh parapara aḡak à tsəh la gəl aḡak, kadəhah à slaka uwana asà à ka. Ama aḡha kadəgay makoz kà, tadəbay à ahəl aḡak ala, kà dza anik aḡha maf à ka parapara à tsəh, ḡgaha dza anik adədala ka à slaka uwana asà à ka maday aw."
- 19**(La gay uwaga kà Yesu asal mapəhla ala tsəhay mamətsayga uwana Piyer adəmətsay kà mavəy mazləbay à Zəzagəla) La lig la ahəḡ Yesu agòdàl: "Nəfà gi!"
- 20**Piyer anəḡà à lig kà, anəḡà masla matapla uwana Yesu awoyəḡ kaykay, atsà à waḡ la lig aḡatà. Masla uwana ahùb à Yesu à makəla, la mok uwana atà la tatak may lakəl uwarà, à uwana anəv à Yesu: 'Sufəl, uwa à dza uwana adàta à kaf à gəl uwa?'
- 21**Piyer anəḡà, ḡgaha agòd à Yesu: "Dza uwanay, takay Sufəl, masla ma mana à uwana adəbəzal tak ma?"
- 22**Yesu agòdàl: "Baḡa asa à gi adz à ahəḡ la sifa tsəràh à uwana gədəwula à waḡ ma, mana aḡak la abà ma? Kak kà, nəfà gi pəra."
- 23**Azlaməna maham à ahəḡ gay Zəzagəla tatsənà gay uwaga: 'Masla matapla uwanay, adəmətsay aw', tagòd. Ama, 'Adəmətsay aw', Yesu agòd à Piyer aw, ama agòd pəra kà: 'Baḡa asa à gi adza à ahəḡ la sifa tsəràh à kaslā uwana gədəwula à waḡ ma, mana aḡak la abà mi?', agòdàl pəra.
- 24**Uwaga masla matapla gə la uwanay à uwana atsetsèr gay uwanay kà, ḡgaha məsəl kà uwana atsetsèr kà dziriga.

<sup>25</sup>Yesu adahà azlaslèray anik aḡuvaw. Agay tatsetseray la tekula, tekula gesina kà, naka gudəḡ gesina aslala vok aḡa makəsiḡ azlawakità uwanay tatsetser aw.

## Sləray

### Sləray 1

- <sup>1</sup>A kak slawda gulo Tewofil. La wakità gulo matera la abà kà, gətsetser à ka lakəl aña Yesu. Gədatsetseray lakəl uwana apàhla ngaha la uwana atapàhla à azladza gesina, dagay madzəka vok aña sləray aña,
- <sup>2</sup>tsərəh à mavakay uwana Zəzagəla azəb à zagəla. Mok uwana aləg la gudəŋ la vok, akàsàni azladza kà magay azlaməna matapla aña, atàpàhàtala uwana naka tadəhəŋ, adàhà uwaga kà la ndzəda aña Masasəfok Zəzagəla.
- <sup>3</sup>La lig la ahəŋ, à mok uwana adamatsay apəhatàla vok asik dəŋ la mahanay dzik ufađ la abà, kà atà aña masəlay la dziriga kà masla la sifa. Apəh à atà gay aña makoray Zəzagəla.
- <sup>4</sup>Vərđi anik uwana tadahama gay à vok kà mazuw tatak may la slaka gə kà, agòđ à atà: "Baba gulo, apəh à akul à ahəŋ kà mav à akul tatak uwanay, à uwana gəpəh à akul, kadaw à slaka aw, dzàw à ahəŋ la abanay la Urusalima kakudaw.
- <sup>5</sup>Kà uwana Yuhana adàhà batem à azladza la iyaw, ama la huma la gay kà, akul kà, tadàdàhakullanəŋ kà la Masasəfok Zəzagəla."
- <sup>6</sup>Azlaməna matapla uwana tahamà gay à vok la Yesu tanəval: "Sufəl gami, la kaslà uwatà la uwana kadàv makor gəl à tsəhay aňak Isərayel ay?"
- <sup>7</sup>Yesu agòđ à atà: "Uwaga kà gay aňkul la abà kà masəl kaslà uwatà aw, say Baba gulo la uwana asəl uwaga pəra.
- <sup>8</sup>Ama à akul kà, Zəzagəla adàvà à akul Masasəfok aña, la ndzəda aña ngaha kadàgaw azlaməna sayda gulo, la abanay la Urusalima, ngaha la kutso Yahudiya, la Samariya ngaha tsərəh à makəđ gəl à ahəŋ gudəŋ à vok gesina."
- <sup>9</sup>La mapəh uwaga la gay ala, azəb vok à zagəla, ahàđ à slaka Baba, la huma yewđi aňatà. Ngaha azà à atà à adi, ngaha tanəŋəŋ aya aw.
- <sup>10</sup>La mok uwana atà la matsak yewđi à zagəla aya kà, azladza səla tatsizilla atà à vok la lukut mefəkuga la vok təlla.
- <sup>11</sup>Tagòđ à atà: "Akul azla Galili, kà mana kadzaw à ahəŋ tsək yewđi à zagəla ma? Yesu uwana ahàđ à zagəla asək akul à ahəŋ, adàwul à waŋ bokuba uwana kanəŋəw mad à zagəla aña."
- <sup>12</sup>La lig aña uwaga la ahəŋ, azlaməna matapla tasà à ahəŋ la gudəŋ uwana la afik, tazalalla gudəŋ kuvu, kiya uwaga tasà à ahəŋ la abatà, tahàđ à Urusalima kərkər aña kà mahoyay pəlis tekula.
- <sup>13</sup>Mok uwana tabəzà Urusalima kà, tadà à gəy uwana à agu lakəl aña gəy anik la afik tadzà à ahəŋ la aku uwarà. Azladza gə uwana kà: Piyer, Yuhana, Yakuba kona aña Alfe, Səmon uwana tazala Zəlot ngaha Yahuda kona aña Yakuba.

<sup>14</sup>Gesina aṅatà tahamàh gay à vok kà madəv kudà la slaka gà, la azlamis, la Mariyama iyà aṅa Yesu, ṅgaha la azlɔɔda aṅa Yesu.

<sup>15</sup>La vərɔɔdi anik aya, azlaməna maɔɔṅal gəl à vok tahamà gay à vok: Dza dzim bəzi aṅha dzik səla. Hadzak, Piyer atsizilla ala la tataka aṅatà la abà, agòɔɔf à atà:

<sup>16</sup>"Azlɔɔɔda, Yudas kà agà la tataka gami la abà. Masla kà tavəl sləray bokuba anu bay. Ama la mok uwana azlɔɔɔda tayàh makəɔɔf Yesu kà, aguwa azlɔɔɔda à huma, kà makəs Yesu. Dagay uwarà la matsetseray la abà, David apəh à ahəṅ lakəl aṅa Yudas uwana naka aɔɔfəhəṅ. Ndzer, say gay uwanay agəɔɔf à afik bokuba uwana apəh à vok."

<sup>18</sup>Yudas kà aɔɔfahəṅ kà mawisiga. Sili uwana tapəlal kà maguw azlɔɔɔda à huma aṅa mapəhla Yesu ala kà, asùkwla guf, ṅgaha atsà gəl à ahəṅ la guf uwatà la abà, tsəzllòh, hana aṅha gesina asà à vəɔɔfah gesina, vərɔɔfəɔɔda.

<sup>19</sup>Azlaməna madz à ahəṅ la Urusalima tasəl à uwana apakà vok gesina, gay gà la uwaga tazəlalla guf uwatà la gay gudəṅ aṅatà kà: Hakeldama, bokuba magoɔɔɔay kà: Guf aṅa aṅiz.

<sup>20</sup>Piyer awùlla à gay aṅha à tsəh, agòɔɔf aya: "Gay gà la uwaga David apəh à ahəṅ dagay uwarà lakəl aṅa Yudas la wakità aṅa Mahabay la abà: 'Gà aṅha aɔɔpakay ṅvagay tsewwa, Dza aɔɔɔɔɔda à ahəṅ la aku aṅa tetuwa.' Tatsetsər aya kà: 'Say dza anik aɔɔfəɔɔf à slaka aṅha à abà aya.'"

<sup>21</sup>"Say dza aɔɔfəɔɔf à slaka aṅha à abà kà mapak masla sayda aṅa mawul à uda aṅa Sufəl Yesu gami la mamətsay. Dza uwaga agay kəla kà tekula la tataka azlauwana la abà mauguzahàh anina la kəla slaka uwana Sufəl Yesu adahàh à abà dagay zamana uwana Yuhana aɔɔfahəlla batem tsəràh asàk anu à ahəṅ à mok uwana Yesu awul à uda la mamətsay awul à zagəla."

<sup>23</sup>Kiya uwaga tatsizilla azlɔɔɔda səla ala: Yusufu uwana tazəlalla Barsabas, sləm aṅha anik aya Yustus, atà la Matiyas.

<sup>24</sup>ṅgaha tadəv kudà à Zəzagəla gesina aṅatà, tagòɔɔf: "Sufəl, kak uwana kasəl madzugway aṅa ləv aṅa dza kà, pəhanula la uwana kakəsàni la tataka aṅatà la abà,

<sup>25</sup>kà masla aṅa maɔɔfəɔɔf à slaka asik aṅa Yudas à abà kà magay masla matapla, kà masla aṅa maɔɔfah sləray aṅha à uwana Yudas asàkal, kà masla aṅa mad à slaka uwana à abà agà aṅha."

<sup>26</sup>La lig la ahəṅ tatsà à atà goropu lakəl aṅa mazəbani tekula aṅatà. Kiya uwaga Zəzagəla azəbàni Matiyas, ṅgaha adà à matugway aṅa azlaməna matapla kulo gəl aṅha tekula gà uwaga à adi.

## Sləray 2

<sup>1</sup>Mok uwana madəvaday aṅa Pentakosta adasa à waṅ, azlaməna maɔɔṅal gəl à vok tahamà gay à vok gesina la slaka tekula la abà.

- <sup>2</sup>Katskats tatsənà maslèh məlo bokuba mahohumay aṅa məṅ kular, asa à ahəṅ la zagəla, ṅgaha ahənà gəy uwana ala, atà la aku gesina.
- <sup>3</sup>La abatà azlatatak anik tapəhla vok ala bokuba azlaaləh akəl; taslèhà gəl à ahəṅ, tadzəh à kəla uwabeyuwi aṅatà à gəl gesina.
- <sup>4</sup>Gesina aṅatà tahən ala la Masasəḍok Zəzagəla, ṅgaha tadzəkà mabadma la azlagay gudəṅ anik anik, bokuba uwana Masasəḍok avà à atà kà mapəhay.
- <sup>5</sup>La kaslā uwatà azla Yahudiya uwana tanəfà mapəhay aṅa fəla aṅatà, la ahəṅ la Urusalima, tasà à waṅ la azlakutso anik anik la abà gesina, tasà à waṅ kà madz à ahəṅ la Urusalima.
- <sup>6</sup>Mok uwana tadatsən mahohumay uwaga, tasà à waṅ, tahamà gay à vok. Ləv avələh à atà à gay gesina aṅatà, kà uwana kəla uwabeyuwi aṅatà kà atsənəṅ kà tapəh gay kà la gay gudəṅ aṅha.
- <sup>7</sup>Kiya uwaga gesina aṅatà ləv avələh à atà à gay, gəl akəḍ à atà à vok, tagòḍ: "Azladza uwanay tavats gay kà, kà azla Galili aw takay?"
- <sup>8</sup>Ḍgaha ma, uwanay ma kakay apaka vok, kà kəla uwabeyuwi gami atsəna kà tapəhay kà la gay gami uwi?
- <sup>9</sup>Tsa tekedik kà azladza uwanay tasà à waṅ la kutso Partiya, Medi, Elam, Mesopotami, Yahudiya, Kapadotsəya, tsərəh à Asəya.
- <sup>10</sup>Ḍgaha la Fərizi, Pamfiliya, Misəra, ṅgaha la kutso aṅa Libiya uwana nekwa la Səren, azlaanik la tataka gami la abà, tasà à waṅ la Rom,
- <sup>11</sup>azlauwana azla Yahudiya slilih gə la azlauwana tapakəh azla Yahudiya mapakay, azlaanik uwana tasà à waṅ la Kəreta ṅgaha azlaanik la Arabiya. Ama ku bà la uwaga bay kà, kəla uwabeyuwi gami atsəna kà tapəhay lakəl aṅa sləray məṅga aṅa Zəzagəla la gay gudəṅ aṅha!"
- <sup>12</sup>Ləv avələh à atà à gay gesina, tasəl uwana tapəhay aw, tagòḍ kà atà à atà: "Uwanay ma, mana asal magoḍay mi?"
- <sup>13</sup>Ama bà la uwaga kà azlaanik takəḍəsl azlaməna madiṅal gəl à vok la magoḍay: "Ndzer, azladza uwanay kà guzu adakəḍ atà à gay."
- <sup>14</sup>Hadzak Piyer asà à afik la azlaməna matapla kulo gəl aṅha tekula gə uwanay, azà kuda à zagəla, agòḍ à maham à ahəṅ dza: "Akul azla Yahudiya, ṅgaha kul uwana kadzaw à ahəṅ la Urusalima la abà gesina, sələw, tsəbàw sləm à gay uwanay gəpəh à kul lagwa.
- <sup>15</sup>Kay, azladza uwanay kà, guzu adakəḍ atà bokuba uwana kagoḍaw aw, kà uwana bà zil gosila bay kà, adaslay dadəṅ aw.
- <sup>16</sup>Ama kà magəḍ uwana à afik, masla mapəhal gay à ahəl Yoyel apəh:
- <sup>17</sup>Zəzagəla agòḍ: 'Kiya uwanay à uwana adəpaka vok la madəv à gay mahənay: Gəḍəsləl Masasəḍok gulo à ahəṅ à azladza à gəl gesina; azlabəza aṅkul, la azlakohana

aŋkul, la azlamakozga aŋkul masasiŋay adāsasiŋahla atà, gədàbədàhà atà à ama la abà, tapàh paŋaw gulo.

<sup>18</sup>Ndzer, haday gədàsləh Masasədok gulo à gəl aŋa azlamagamza gulo, azlazilga, la azlamisga la mavakay uwatà Ŋgaha tadàpahah à azladza.

<sup>19</sup>Gədàdàhah azlanadzipo la zagəla ŋgaha la vədàh, aŋiz, akàl ŋgaha habaga la azlakəsək tadàgahay la ahəŋ,

<sup>20</sup>Afats adətəfa zagəla, Təla adàgay mativga vikuza, bokuba aŋiz. La lig la ahəŋ kà pəra, mavakay aŋa Sufəl uwana mazləbayga, aŋa mas à waŋ.

<sup>21</sup>Kəla dza uwana atsal sləm aŋa Zəzagəla agay adàbəlay!“

<sup>22</sup>"Akul azla Isərayel, tsəbàw sləm à uwanay gəpəhay", Piyer agòd à atà. "Yesu zil Nazaret uwana Zəzagəla asləl à waŋ, apəhla maslay aŋha ala, la madàh azlanadzipo la azlamasəlay anik anik la tataka aŋkul la abà, akul babay kasəlaw.

<sup>23</sup>Zəzagəla avà à ahəl aŋkul bokuba uwana awoyàŋ kà uwana dagay uwarà, asəl uwana kadàdàhawwallaŋ à vok. Gay gə la uwaga kavàw masla à ahəl aŋa azlaməna tsakana kà mazləlay à ahàf à adi kà mamətsay.

<sup>24</sup>Ama Zəzagəla awùlla à uda la mamətsay, adzà à ahəŋ la sifa aya. Ndzer kà, masla kà agòd à ndzəda aŋa mamətsay à ahəl aw.

<sup>25</sup>David apəh lakəl aŋha kà: 'Koksikoksi gənəŋəŋ Sufəl gulo la yewdi gulo, agə la ahəl kaf gulo, kà gi aŋa magogotsay aw.

<sup>26</sup>Gay gə la uwaga, ləv gulo adahən ala la marabay, ŋgaha gay gulo uwana gəpəhay kà matsidəyga, Bamərika gi la sləb vok pəra, gədàf manəwəŋ gulo à masla à afik.

<sup>27</sup>Kadàsak gi la ahəl aŋa mamətsay aw. Kadəkəsay kà sləb vok aŋa kohana aŋak amazinla aw.

<sup>28</sup>Kak, kapəhgəla tetəvi uwana adala gi à sifa à abà, Gi la marabay kà uwana kak la gi.“

<sup>29</sup>"Azladeda gulo, azlayla gi gəpəh à akul la paraka lakəl aŋa Baba gami madzidziga David; masla kà aməts tallà, zəvay aŋha la ahəŋ la tataka gami la abà tsərəh à lakana.

<sup>30</sup>Masla mapəhal gay ahəl aŋa Zəzagəla asəl kà Zəzagəla azùwal mawadəy la magodàl: 'Gədəkəsani à uda tekula la mayyi tsəh ala aŋak la abà, gədàfa à sufəl à abà.'

<sup>31</sup>David asəl dagay uwarà lakəl aŋa mawul à uda aŋa dza, uwana mafal dzakwa à gəl gə, kà uwaga agòd: 'Gəsakal la mezewi aw ŋgaha vok aŋha azin ala aw.' Zəzagəla agòd.”

<sup>32</sup>Piyer agòd aya: "Zəzagəla awùlla Yesu uwanay à uda la mamətsay, anu azlaməna sayda aŋa uwaga gesina.

<sup>33</sup>Zəzagəla Baba atsizllàŋ à ahəl kaf aŋha, ŋgaha avəl Masasədok uwana apəh à ahəŋ, masla asləh anu à ahəŋ à gəl à uwana kanəŋàwwàŋ la uwana katsənàwwàŋ lagwa.

<sup>34</sup>David kà, masla kà ahàd à zagəla aw, ama apəh gay lakəl aña dza uwana tafal dzakwa à gəl, agòd: 'Sufəl Zəzagəla gulo agòd à sufəl gulo: 'Dzà aňak à abanay la ahəl kaf gulo lakəl.

<sup>35</sup>Tsərah à uwana gədàbək azlaməna məzam aňak à tsəh à asik aňak, kà maf asik à afik aňak."“

<sup>36</sup>"Kità gəgod à akul à azla Isərayel, ndzer kasəlaw kà, akul kazləlləw Yesu uwanay à ahàf à adi, masla la uwana Zəzagəla apakəñ ala kà Sufəl, ngaha afəl dzakwa à gəl.”

<sup>37</sup>Uwana tatsən gay uwaga kà, ləv avələh à atà à gay gesina. Tanavà Piyer la azlaməna matapla anik: "Azladeda, mana à uwana mədəhəy ma?"

<sup>38</sup>Piyer agòd à atà: "Pəhəw gay la ləv ala, ngaha kəla uwabeyuwi aňkul tadəhalla batem la sləm aña Yesu Kristu kà tsakana aňkul aña mamatsilla. Ngaha Zəzagəla adàvə à akul Masasədok aňha.

<sup>39</sup>Kà uwana mapəh à ahəy aña Zəzagəla kà aňkul, la mayyi à tsəh ala ngaha kà aña azlauwana kərkər gə, kà aña azlauwana Sufəl Zəzagəla gami adəzala à atà gesina.”

<sup>40</sup>Kiya uwaga Piyer apəh à atà azlagay anik anik aya, kà mabaz atà à tsəh, ngaha kà madzərədəh atà ala la magod à atà: "Səw à uda la tataka aña azladza uwana takəs Yesu aw, yəhəw kà Zəzagəla aña mabəl akul pəra.”

<sup>41</sup>Aňuvaw la tataka aňatà la abà tadīy gəl à gay aña Piyer à vok ngaha tadəhà à atà batem. La mavakay uwatà dza dəbow makər azà à vok à azlaməna matapla à adi.

<sup>42</sup>Tavà vok aňatà kà matsəb sləm à uwana à azlaməna matapla tapəhatàla, tadzà à ahəy la mazuw tatak may tekula la abà, ngaha tazəw tatak may la slaka tekula babay, ngaha la madəv kudà à Zəzagəla la slaka gə.

<sup>43</sup>Azlanadzipo la azlamasəlay aňuvaw tadəhəhə vok la ahəl aña azlaməna matapla, ngaha ləv avələh à azladza à gay.

<sup>44</sup>Azlaməna madiñal gəl à vok tagə tekula, ngaha tahamə gay à tatak aňatà à vok la slaka gə gesina.

<sup>45</sup>Tadawəh azlaələk aňatà ala la azlaləmana aňatà, tavəhəh sili gə la tataka aňatà la abà uwabeyuwi kəla udəra aňha.

<sup>46</sup>Kəla mavakay tahamə gay à vok la məy gəy Zəzagəla la aku, tazəwəh tatak may aňatà la slaka gə la mtəga la ləv tekula la marabay.

<sup>47</sup>Tazləbəhəh Zəzagəla, ngaha azladza gesina tawoyəhà atà. Kəla mavakay Sufəl Zəzagəla azəhà à atà ala azlauwana à adi asal mabəl atà.

### Sləray 3

<sup>1</sup>Vərdi anik, Piyer atà la Yuhana tahəd à məy gəy Zəzagəla à agu kà madəv kudà la gay mokokhu, la kaslə aña madəv kudà.



- <sup>2</sup>Deri anik la ahəŋ la gay gamagày uwana tazalalla gamagày delga, masla kà deriga dagay mayyay məŋ aŋha. Kəla mavakay azladza tadàhla à gay gamagày uwaga, kà masla aŋa matsatsàh tatak la slaka azlaməna mad à gày à agu.
- <sup>3</sup>Piyer atà la Yuhana tadà à gày kà, anavà atà à tatak.
- <sup>4</sup>Ama Piyer atà la Yuhana tatsəkəl yewdi à gay, ŋgaha Piyer agòdàl: "Nərèz anu!"
- <sup>5</sup>Dza uwaga anərèz atà la tsetsi dadàŋ, adzùgw kà abəz tatak la ahàl aŋatà.
- <sup>6</sup>Piyer agòdàl: "Tetuwa sili aga gi la ahàl aw, ama uwana gəkoray gəvə à ka. La sləm aŋa Yesu Kristu, zil Nazaret, sà à afik, hād, gəgod à ka!"
- <sup>7</sup>Dgaha akəs la ahàl kaf, atsizllàŋ ala, katskats asik la azlamatakola takola aŋha tadzərèdàhà ala.
- <sup>8</sup>Hadzak, atsizlla ala, dzaradzara, ahād, tadà à məŋ gày Zəzagəla à agu la azlaməna matapla la mavalàh à zagəla, ŋgaha la mazləb Zəzagəla.
- <sup>9</sup>Maham à ahəŋ dza anəŋà deri uwaga, aday la mazləb Zəzagəla.
- <sup>10</sup>Uwana tasəl kà, uwaga kà deri uwana adzàhà madzay kà matsatsàh tatak la gày gamagày aŋa məŋ gay Zəzagəla uwana tazala ala gamagày delga kà, bədfək, ləv avàlàhà à atà à gay kà tatak uwana apakà vok.
- <sup>11</sup>Piyer atà la Yuhana taləg la golav aŋa məŋ gày Zəzagəla uwana la abà tazalalla: Golav aŋa Salomon. Dza uwaga asək atà à ahəŋ aw. Kiya uwaga azladza tasàhà à waŋ à slaka aŋatà la mahoyay, kà uwana ləv avàlàhà à atà à gay kà uwaga.
- <sup>12</sup>Mok uwana Piyer adanəŋ uwaga kà apəh gay à maham à ahəŋ dza, agòd à atà: "Akul azla Isərayel, kà mana ləv avàlàhà à akul à gay ma? Kà mana kanərozaw anu bokuba anu la uwana matsizlla dza uwanay ala la ndzəda aŋa aslasl gəl gami ma, la manəf fəla gami lela ma?"
- <sup>13</sup>Awaŋ, Zəzagəla aŋa azlababa gami madziziga, aŋa Abəraham, aŋa Isak, ŋgaha aŋa Yakuba uwana tadaval kuḏa, avà mazləbay à Kona aŋha. Uwana akul la gəl aŋkul kavàw à ahàl aŋa azlaməna makor dza kapùwàwwalla gudzi à gəl la huma Pilatus, à mok uwana masla adzùgw maduwal à gəl.
- <sup>14</sup>Kakwèsàw kà dza dziriga, sətakaga, ŋgaha kanavàw la slaka Pilatus kà maduw à akul gəl à masla makad dza.
- <sup>15</sup>Kiya uwaga kakəḏāw Madzahaga aŋa sifa, ama Zəzagəla awùlla à uda la mamətsay, anu kà anu azlaməna sayda aŋa uwaga.
- <sup>16</sup>Ama kà aŋa dza uwanay kà, kanəŋawwaŋ; kasəlaw uwaga kà: Ndzəda aŋa Yesu la uwana avəl ndzəda uwanay, madiŋ gəl à Yesu à vok la uwana awurà dza uwanay ala la huma yewdi aŋkul."
- <sup>17</sup>"Azladeda, mok uwana azlamasiga aŋkul kapùwàw gudzi à Yesu à gəl, la azlamasiga aŋkul kà, gəsəl kà la masəl gəl gə, kadàhàw uwaga aw.

<sup>18</sup>Iyay, kiya uwanay à uwana Zəzagəla agəđəŋ gay aŋha uwana à afik, apəh à azlaməna mapəh à atə gay à ahəl aŋha uwarà, kà uwana apəh à ahəŋ kà Kristu adàs ŋgərpa, agòđ.

<sup>19</sup>La kità kà, pəhàw gay la ləv ala, gòla vok à slaka Zəzagəla, kà masla aŋa mamatsakulla tsakana aŋkul ala.

<sup>20</sup>Kiya uwaga Zəzagəla adàsak akul ala zamana lapiya à waŋ, ŋgaha adàsləl akul Kristu uwana à waŋ apəh à ahəŋ uwarà kà aŋkul, uwaga kà Yesu.

<sup>21</sup>Ama kà aŋa diŋa kà, Yesu adzà à ahəŋ la zagəla tsəràh à uwana Zəzagəla apakàh azlatatak ala kà mawga dadàŋ, bokuba uwana apəh à azlaməna mapəh à atə gay à ahəl dagay uwarà.

<sup>22</sup>Təga kà Musa agòđ kà: 'Sufəl Zəzagəla aŋkul adàsləl akul masla mapəhal gay à ahəl à waŋ bokuba gi, uwana adəgay tekula la mayyi à tsəh ala aŋkul la abà. Kadàtsəbaw sləm à uwana adàtapakulla gesina.

<sup>23</sup>Ama kəla uwabeyuwi uwana adàtsəb sləm à masla mapəhal gay à ahəl uwatà aw kà, adàdza à ahəŋ la tataka aŋa azladza aŋa Zəzagəla la abà aw, tadàkad atə.

<sup>24</sup>Amiyaka azlaməna mapəh à atə gay à ahəl anik babay kà, tapàh bokuba aŋa Musa lakəl aŋa tatak uwana adəpaka vok la zamana gami, dagay Samuyel, ŋgaha la azlauwana la lig aŋha la ahəŋ.

<sup>25</sup>Azladeda, mapəh à ahəŋ uwana Zəzagəla apəh à ahəŋ la azlaməna mapəh à atə gay ahəl kà, kà aŋkul, kiya uwaga babay à uwana Zəzagəla akəs vok slawda la Abərahəm: 'Gədàpis azlatsəhay gudəŋ à vok gesina la tsəhay aŋak,' agòđ, 'Makəs vok slawda uwaga kà, kà aŋkul.'

<sup>26</sup>Kà uwaga à uwana Zəzagəla asləl à akul Kona aŋha à waŋ, à akul tsəhay aŋha teraŋa. Asləl à akul à waŋ aŋa mapəh à akul ala dabaray, kà akul aŋa mas à uda la mawisiga aŋkul la abà, ŋgaha kà masla aŋa mapis à akul gay à vok."

## Sləray 4

<sup>1</sup>Mok uwana Piyer atə la Yuhana tapəh gay à maham à ahəŋ dza aya kà, azlaməna mav tatak à Zəzagəla tasà à waŋ, la məŋga aŋa azlaməna manəŋla məŋ gəy Zəzagəla, ŋgaha la azla Sadukiya uwana tagòđ kà: Mawul à uda la mamətsay la ahəŋ aw.

<sup>2</sup>Tapakà ləv lakəl aŋatà, kà uwana azlaməna matapla tatapla à azladza kà, azladza tadàwul à uda la mamətsay.

<sup>3</sup>Kà uwana vəđ adasa à waŋ, takàs atə kà, tawùts atə à daŋay tsəràh à bebəŋ.

<sup>4</sup>Tekedik aŋuvaw uwana tatsən mapəhay aŋatà uwaga kà, tadìŋal gəl à vok, kiya uwaga matugway aŋa azlaməna madìŋal gəl à vok azigən tsəràh azladza dəbow zlo.

<sup>5</sup>La bebəŋ gə, azlaməŋga aŋa azla Yahudiya, la azlamasiga, la azlaməna mapəhla wakità seriya ala tahamà gay à vok gesina aŋatà la Urusalima.

- <sup>6</sup>Hanas, mən mədzahaga aña azlaməna mav tatak à Zəzagəla la ahəŋ, la Kayyif, la Yuhana, la Alekəsander ŋgaha la azlauwana la huf gəy aña mən mədzahaga gesina.
- <sup>7</sup>Tadàla azla Piyer la Yuhana à huma aŋatà, ŋgaha tanavà atà gay ala: "La ndzəfà ma aña uwa, awma la sləm aña uwa kawuràwla masla dūvats ala uwa?"
- <sup>8</sup>Masasədok ahənà Piyer ala, ŋgaha agòf à atà: "Akul, azlaməŋga aña azla Yahudiya, la azlamasiga,
- <sup>9</sup>kanavàw anu gay ala lakana, kà uwana mədàhà delga la mawur deri ala. 'Kakay awùr ala mi?', kagòdàw.
- <sup>10</sup>Hadəy zlà, delga kasəlaw gesina, akul azladza Isərayel, masla uwana kazlèlèw à ahàf à adi, à Yesu zil Nazaret, Zəzagəla awùlla à uda la mamətsay.
- <sup>11</sup>Lakəl aña Yesu uwanay, à uwana wakità Zəzagəla apəh lakəl aŋha agòf: 'Akur uwana akul azlaməna maŋal gəy kadūwàwla, masla la uwana adapak akur mawaf gəy.'
- <sup>12</sup>Kiya uwaga gəgòf à akul: Zəzagəla abəl dza baməraka tekula kokudà masla aw. Dza anik la ahəŋ tetuwa à uwana Zəzagəla asləl à waŋ à gudəŋ à vok kà mabəl azladza aw."
- <sup>13</sup>Azladza uwaga ləv avàlèhà à atà à gay kà uwana tanəŋà mawaf vok à uda aña Piyer atà la Yuhana, ŋgaha bay kà, tasəl kà tadà à nekol aw, tasəl la gəl aŋatà kà atà kà azlaməna matapla la slaka aña Yesu.
- <sup>14</sup>Ama uwana tanəŋà dza uwana awurà ala atsizl à ahəŋ la makəla aŋatà kà, taslèla vok kà mapəh à atà gay aw.
- <sup>15</sup>Tavà à atà tetəvi kà mas à uda, kà atà aña makəs sawaray aŋatà kà atà kà atà.
- <sup>16</sup>Tagòf à vok: "Mana mədəhəŋ à azladza uwanay à vok ma? Kà uwana azlaməna madz à ahəŋ la Urusalima gesina tasəl la paraka kà nadzipo uwanay apakà vok ndzer, uwala anu babay à waŋ məslala vok aña magodəy aw.
- <sup>17</sup>Ama asa à anu gay uwanay atsən ala kà masəlay aña azladza aw, lagwa kà mədəf à atà gay à ahəŋ lakəl aña Yesu."
- <sup>18</sup>Ŋgaha tazàla à atà à gəy aya, tavèr à atà gay kà matapla sləm aña Yesu à azladza.
- <sup>19</sup>Ama Piyer atà la Yuhana tawùlla à atà ala: "Akul la gəl aŋkul à kà nàtsàw gay uwaga ala. Delga la huma Zəzagəla kà makəs gay aŋkul ay, awma aña Zəzagəla takay?
- <sup>20</sup>Ama anu kà, məslala vok aña masak mapəh uwana mənəŋəŋ la uwana mətəŋəŋ aw."
- <sup>21</sup>Uwana azladza uwaga taslèh à atà məl à gəl kà tasək atà. Tabəzà tetəvi kà madukw à atà seriya à gəl aw, kà uwana azladza gesina tazlèbà Zəzagəla lakəl aña tatak uwana apakà vok gesina.

- 22**Dza uwana awurà ala la nadzipo uwaga kà, mavay aṅha kà aduwa dzik ufaɗ.
- 23**Uwana tadùw à atà gəl kà, Piyer atà la Yuhana tahàd à slaka azlaməna aṅatà, ṅgaha tatùgw atà uwana azlaməṅ madzahaga aṅa azlaməna mav tatak à Zəzagəla, la azlamasiga tapəh à atà.
- 24**Uwana tatsən uwaga kà, tadəv kuɗa à Zəzagəla la ləv tekula: "Zəzagəla gami, kak la uwana kaɗàhà zagəla, la kutso, la dərəv ṅgaha la azlatatak uwana la abà gesina.
- 25**Kak la uwana kapəh à anu la Masasəɗok aṅak la paṅaw aṅa baba gami madzidziga David, magamza aṅak uwana agòɗ: 'Kà mana azladza gudəṅ à vok tapakàh, azlavalàhà ma? Kà mana azladza tadzàhkà madàh dabaray deyday gà ma?
- 26**Azlasufəl aṅa gudəṅ à vok taɗàhà vok à ahəṅ kà aṅa guvəl, Ḑgaha azlaməṅga bay tatsən vok gay Lakəl aṅa Sufəl Zəzagəla ṅgaha lakəl aṅa Kristu aṅha, (Masla mafal dzakwa à gəl gà).'
- 27**Ndzer, apakà vok la abanay la Urusalima, Herod la Ponsəyus Pilatus, la azladza à uda gà ṅgaha la azlatsəhay Isərayel tahamà gay à vok gesina lakəl aṅa Yesu, magamza tsikasлага aṅha, uwana mafal dzakwa à gəl gà.
- 28**Tahamà gay à vok kà madàh uwana kadzùgw à ahəṅ gesina dagay uwarà la mawoyəṅ aṅak la abà.
- 29**Sufəl, lagonay kà, tsən à maslah mələ aṅatà tsi, lagwa kà, və maslay à azlamagamza aṅak kà mapəh gay aṅak la mawaf vok à uda gesina zlà.
- 30**Lagwa kà, və à anu maslay aṅak kà madàh azlanadzipo anik anik la sləm aṅa Yesu, Kona aṅak zlà."
- 31**Mok uwana tadadəv madəv kuɗa à gay kà, slaka uwana atà la abà abəlàkà à vok. Tahən ala gesina aṅatà la Masasəɗok Zəzagəla, ṅgaha tapəh gay Zəzagəla la mawaf vok à uda.
- 32**Azlaməna maɗiṅal gəl à vok tagà la ləv tekula la matsən vok gay lela. Dza la ahəṅ "Ləmana kà, kà aṅulo pəra", agòɗ la tataka aṅatà la abà aw. Uwana takòr gesina kà, taɗàhà vok huṅwa à vok la tataka aṅatà la abà aw.
- 33**Azlaməna matapla tazà sayda lakəl aṅa Yesu kaykay, tagòɗ kà Yesu awùl à uda la mamətsay: "Mənəṅəṅ", tagòɗ. Ḑgaha Zəzagəla apisà gay à azlaməna maɗiṅal gəl à vok à vok.
- 34**Dza la ahəṅ la tataka aṅatà la abà, kuɗa akəs aw, kà uwana azlaməna àlək, la azlagəy la ahəṅ, tadawàh ala la tataka aṅatà la abà, ṅgaha tasàhla sili gà à waṅ.
- 35**Tabàkàh à slaka azlaməna matapla, la lig la ahəṅ tavàhàhà sili uwaga, kəla udəra aṅa dza.
- 36**Bokuba Yusufu, zil Levi la kutso Sipəre uwana azlaməna matapla tazàlal Barnabas. (Barnabas asal magoday: Masla mabəllafàh azladza ala)
- 37**Masla adùw àlək aṅha ala, asəlla sili gà à slaka azlaməna matapla gesina.

## Sləray 5

- <sup>1</sup>Ama dza anik la ahəŋ, uwana sləm aŋha Ananiyas, atà la mis aŋha Safira, tadùw àlàk aŋatà ala la matsən vok gay lela.
- <sup>2</sup>Atəm̄la sili à mtəga, ŋgaha adàla uwanay à huma aŋa azlaməna matapla la kokudà masəlay aŋatà, ama mis aŋha kà asəl uwaga.
- <sup>3</sup>Kiya uwaga Piyer agòd̄al: "Ananiyas, kà mana kavà tetəvi à seteni, ahàd à ləv aŋak à tsəh kà mavavar Masasəd̄ok Zəzagəla la matəm̄la sili aŋa àlàk aŋak, uwanaw kadù ala à mtəga ma?"
- <sup>4</sup>Mok uwana kaləg madula kà bà àlàk aŋak. Uwana kaduwla, bay sili gà bay, bà kà kak kakoray. Kà mana kadzugw la ləv aŋak kà mad̄ah tsəhay mawisiga uwanay ma? Fida kà kad̄ahàn kà à dza aw, ama à Zəzagəla."
- <sup>5</sup>Uwana Ananiyas adatsən gay uwaga kà, atəd̄f à vəd̄ah, aməts. Azladza uwana tatsənà uwaga gesina kà, guba məŋga akəs à atà.
- <sup>6</sup>Azlahohana tasà à waŋ, tafafād̄al lukut à adi, tazəb à uda, tallà.
- <sup>7</sup>Zwek, tatak aŋa sa makər adada à lig, mis aŋa Ananiyas adà à gày kokudà masəl uwana apakà vok.
- <sup>8</sup>Piyer anavàl à gay ala magod̄al: "Pəh à gi, uwanay sili aŋa àlàk aŋkul uwana kadùwàwla pəra takay?" Mis agòd̄al: "Iyay, bà masla gà la uwaga."
- <sup>9</sup>Kiya uwaga Piyer agòd̄al: "Kà mana katsənàw vok gay kà matap Masasəd̄ok Sufəl ma? Tsənàŋ, azlauwana tallà zil aŋak kà, atà la uwaga tatsà à gày la gày gamagày, ŋgaha tadəzəb ka, talla ka!"
- <sup>10</sup>La kirim yewdi, atəd̄f à makəla à asik aŋa masla matapla, ŋgaha aməts. Azlahohana tasà à gay, tabəzal à gəl kà mamətsay gà; tazəb, ŋgaha tadàla, tallà à makəla aŋa zil aŋha.
- <sup>11</sup>Guba məŋga akəs azlaməna gay Zəzagəla la azladza anik gesina uwana tatsənà gay uwaga.
- <sup>12</sup>Azlaməna matapla tad̄ahàhà azlanadzipo la masəlay anik anik la tataka azladza la abà. Azlaməna madiŋal gəl à vok gesina tahàmàhà gay à vok la ləv tekula la golav aŋa Salomon la abà.
- <sup>13</sup>Dza uwana adiŋal gəl à vok aw kà, aslàla vok kà maham gay à vok atà nna aw. Kay nəma kà, azladza tawoyà à atà!
- <sup>14</sup>Azladza aŋuvaw tasàhà à waŋ, azlazil la azlamis tad̄iŋ gəl à Zəzagəla à vok,
- <sup>15</sup>kà azlanadzipo uwana azlaməna matapla tad̄ahàhàŋ. Azladza tasàhla azlaməna d̄uvats à azlatetəvi à ama à waŋ aŋuvaw. Tahànàhà atà à azlakəslah à afik, la azlabutsi, kà makud mad à awtày aŋa Piyer, kà maguwa aŋha à kəl ala aŋa dzəgay aŋha.

- 16Azladza anjvaw tasàhà à waŋ la azlagudəŋ uwana la abà la makəla aŋa Urusalima. Tasàhla azlaməna dūvats à waŋ, la azladza uwana zagəla zagəla agà à atà lakəl, gesina aŋatà tawarà ala.
- 17Məŋ madzahaga aŋa azlaməna mav tatak à Zəzagəla la azlauwana tagà la masla, bokuba magodəy azla Sadukiya, tagà la maŋor lakəl aŋa azlaməna matapla, ŋgaha tadzəkà matərəb atà.
- 18Kiya uwaga takàs azlaməna matapla, tawùts atà à daŋay.
- 19Ama la huď aŋa vəd kà, malika aŋa Zəzagəla asà à ahəŋ, apəzl gamagəy aŋa gəy daŋay, asəlla azlaməna matapla à uda, ŋgaha agòď à atà:
- 20"Dàw à məŋ gəy Zəzagəla à agu, ŋgaha zàw gay aŋa sifa adəv à gay aw à azladza!"
- 21Azlaməna matapla takəs. Bəŋ la zay la tsəh, tahəd à məŋ gəy Zəzagəla à agu kà matapla azladza. La vuď uwatà kà, məŋ madzahaga aŋa azlaməna mav tatak à Zəzagəla, ŋgaha la uwana la abatà gesina tahamà gay à vok la azlamasiga aŋa azla Yahudiya, takəs sawaray ŋgaha tasləl azladza kà madka azlaməna matapla à daŋay.
- 22Uwana azlaməna masləlay tabəzà daŋay kà, tabəz atà aw. Tawùl, tapəh à azlaməna sawaray:
- 23"Məhəd à daŋay kà, azlagamagəy kà matsakahayga lela, azlaməna manəŋla gamagəy tagà la slaka aŋatà la abà la gay gamagəy. Ama mapəzl gamagəy kà, dza la aku aw."
- 24Uwana məŋga aŋa azlaməna manəŋla məŋ gəy Zəzagəla, la azlaməŋga aŋa azlaməna mav tatak à Zəzagəla tatsən uwaga kà, gəl akàď à atà à vok, tasəl uwana tadzugway aya lakəl aŋa azlaməna matapla aw, ŋgaha tanavàhà vok uwana adapakà vok.
- 25Kiya uwaga hazlaŋ, dza anik asà à waŋ, agòď à atà: "Tsənàwwàŋ tsi! Azladza uwana kakàsàw atà, kawàtsàw atà à daŋay kà, atà la məŋ gəy Zəzagəla la aku, tatapla azladza!"
- 26La abatà məŋga aŋa azlaməna manəŋla ahəd la azladza, ŋgaha tawùlla azlaməna matapla à waŋ. Ama la gasa aw kà uwana guba akəs à atà, kà matsàh atà la akur aŋa azladza.
- 27Mok uwana tasəlla atà à waŋ à huma aŋa sawaray kà, məŋ madzahaga aŋa azlaməna mav tatak à Zəzagəla anavà atà gay ala.
- 28Agòď à atà: "Mədəďəď à akul gay à ahəŋ kà matapla la sləm aŋa dza uwaga aw ay? Đgaha ma, kà mana kadàhàwwàŋ lagwa ma? Kaslèhàw matapla aŋkul à Urusalima à abà gesina, ŋgaha ma asa à akul aŋiz aŋha ma aŋa mawul à anu à gəl takay?!"
- 29Ama Piyer la azlaməna matapla anik tawùlla à atà ala: "Leri makəs gay aŋa Zəzagəla dāduwa à gay aŋa azladza.

<sup>30</sup>Hadây, Zəzagəla aña azlababa gami madzidziga awùlla à uda la mamətsay, dza uwaga kazlèllàw à ahàf à adi.

<sup>31</sup>Zəzagəla azəb à ahàl kaf aña à gəl, apakàŋ ala kà Sufəl, ŋgaha masla mabələŋ kà mav tetəvi à azla Isərayel kà mapəh gay la ləv ala kà atà aña mabəz mamatsila aña tsakana añaatà.

<sup>32</sup>Hadây, anu la gəl gami kà, anu azlaməna sayda kà aña uwaga, anu la Masasədok uwana Zəzagəla avà à azlauwana takəs gay aña.”

<sup>33</sup>Mok uwana tatsən gay uwaga kà tapakàh ləv, asà à atà makad azlaməna matapla.

<sup>34</sup>La tataka añaatà zil Farisəya anik, sləm aña Gamaliyel la abà, masla mapàhla mapəhay aña Musa ala. Azladza gesina tasləkaway. Uwana azladza anik tapakàh ləv, asà à afik la tataka añaatà la abà, agòd: " 'Dàw à uda', gòdàw à azladza uwanay dadàŋ.”

<sup>35</sup>Mok uwana tasà à uda, agòd: "Azladeda gulo, azla Isərayel, məfahà haŋkəli la uwana məfəhəŋ à azladza uwanay à vok.

<sup>36</sup>Dzùgwàw lakəl aña Tewudas uwana avàlla à waŋ uwarà tsi: 'Gi məŋ dza', agòd, tsəràh à uwana azladza dadərmokw ufađ tanəfà. Ama takəd, ŋgaha azlauwana tanəf à masla gesina taslèhà gəl à ahəŋ, ama tadəv à gay tərzləm.

<sup>37</sup>La lig aña la ahəŋ Yudas, zil Galili adzəkà la mok uwana tatùgw dza aya, azalàh azladza aŋuvaw kà manəf masla, ama takəd masla la azlaməna manəfay aña gesina, tərzləm.

<sup>38</sup>Lagonay kà, gəgod à akul kà, məsəlla à ahàl à azladza uwanay la tsəh ala, tada añaatà. Baña sləray añaatà uwanay tadəhəŋ atsà à waŋ kà la slaka azladza asik kà, adàzila bay,

<sup>39</sup>ama baña asà à waŋ kà la slaka Zəzagəla ndzer kà, məslala à vok kà madəfal gay à ahəŋ aw. Məfahà haŋkəli, məpà guvəl la Zəzagəla aw!" Azlaməna sawaray takəs mapəhay aña Gamaliyel.

<sup>40</sup>Tazàla azlaməna matapla à gày, tazlàbàh atà, tagòd à atà: "Kapəhaw la sləm aña dza uwaga aya aw, ama lagwa kà dàw aŋkul!"

<sup>41</sup>Azlaməna matapla tazà à vok la slaka sawaray la marabay kà uwana azlayla atà la huma Zəzagəla kà mas ŋgərpa kà sləm aña Yesu, kà uwana Zəzagəla asəl kà tabasiŋ.

<sup>42</sup>Ŋgaha kəla mahənay tadà à huma à gay la matapla gay marabəŋ à azladza lakəl aña Yesu, uwana Zəzagəla afəl dzakwa à gəl, la məŋ gày Zəzagəla la aku, ŋgaha la gày anik anik.

## Sləray 6

<sup>1</sup>La kaslà uwana azlaməna matapla tasigla kà azla Yahudiya uwana tapəh gay Gərək la azlauwana tapəh gay gudəŋ añaatà tagòd: "Azlamis kudà gami kà, tafà à atà sləm, à mok uwana tavàh tatak may aw", tagòd.

<sup>2</sup>Kiya uwaga azlaməna matapla kulo gəl aṅha səla uwaga tahamà gay à azlaməna asik à vok gesina, ṅgaha tagòd à atà: "Anu kà, akəs à anu à vok, kà anu aṅa masak à mapəh gay Zəzagəla, kà mad à gay aṅa tatak may à abà aw.

<sup>3</sup>Azladeda, tsatsàməwni azladza mədəf, uwana kasəlaw madz à ahəṅ aṅatà la tataka aṅkul la abà, mahənlaga la Masasədok Zəzagəla ṅgaha azlaməna makor haṅkəli gə lela. Ḍgaha mədàbək à atà sləray aṅa tatak may uwaga à ahəl aṅatà.

<sup>4</sup>Ḍgaha anu kà, məslala vok aṅa mav vok gami gesina à madəv kuḍa à abà la maz gay Zəzagəla à azladza."

<sup>5</sup>Gay uwaga akəsà vok à azladza uwana tahamà gay à vok gesina. Takàsəni azladza; Etiyen, uwana adahənla la madiṅal gəl à vok, la Masasədok Zəzagəla: la Filip; Pərokor; Nikanor; Timon; Parmenas; ṅgaha Nikolas, zil Antiyews uwana abəḍla vok à tsəhay Yahudiya à abà dagay uwarà.

<sup>6</sup>La lig la ahəṅ tapəhla atà à azlaməna matapla, kà atà aṅa madəv kuḍa lakəl aṅatà la mabək à atà ahəl à gəl.

<sup>7</sup>Gay Zəzagəla aslèhà gəl à ahəṅ kaykay. Matugway aṅa azlaməna madiṅal gəl à vok azigəṅ, asigla la Urusalima, ṅgaha azlaməna mav tatak à Zəzagəla aṅuvaw takəs madiṅ gəl à Yesu à vok.

<sup>8</sup>Etiyen uwana Zəzagəla apis ala gay à vok kaykay, agà la ndzəḍa məṅga la tetəvi aṅa Zəzagəla la tsəh, adàhàhà azlanadzipo anik anik la tataka azladza la abà.

<sup>9</sup>Azla Yahudiya anik tasàhà à waṅ la Səren la Alekəsandəra, la azlauwana tadəv kuḍa la gày uwana la aku, tazalalla gày aṅa azlamayà mapalla gə, la azla Yahudiya anik, uwana tasàhà à waṅ la kutso Səlisəya ṅgaha la kutso Asəya, gesina aṅatà tabayà vok gay la Etiyen.

<sup>10</sup>Ama taslala vok kà matsizllal à huma aw kà uwana Masasədok la uwana avəl haṅkəli.

<sup>11</sup>Kiya uwaga tasukw azladza kà atà aṅa magodəy kà: "Mətsənəṅ apəh mawisiga lakəl aṅa Musa ṅgaha lakəl aṅa Zəzagəla."

<sup>12</sup>La abatà tavədzàhà à tsəh azladza à afik, la azlamasiga ṅgaha la azlaməna mapəhla wakità mapəhay ala. Ḍgaha tahamà Etiyen à gəl, tadàlla à huma aṅa azlamasiga aṅatà.

<sup>13</sup>Tadàla azlaməna sayda fidaga uwatà à awtəy babay kà mapəh fida lakəl aṅha: "Dza uwanay kà; asak à mapəh mawisiga lakəl aṅa məṅ gày Zəzagəla gami, ṅgaha lakəl aṅa mapəhay aṅa Musa aw.

<sup>14</sup>Mətsənəṅ agòd aya kà: 'Yesu zil Nazaret uwaga adàkalah məṅ gày Zəzagəla gami à ahəṅ, ṅgaha adàbəḍla madz à ahəṅ uwana Musa avà à anu', agòd aya."

<sup>15</sup>Azladza uwana la gày sawaray la aku gesina tatsək yewdi à Etiyen à gay, tanəṅəṅ kà huḍ adi aṅha kà kalkal la aṅa malika aṅa Zəzagəla.

## Sləray 7



- <sup>1</sup>"Uwanay tapèh à ka vok ma haday ay?", mən madzahaga aṇa azlaməna mav tatak à Zəzagəla agòd à Etiyen.
- <sup>2</sup>Etiyen awùlla à uda: "Azladedə la azlababa gulo, tsəbàw à gi sləm. Zəzagəla uwana mazləbayga apəhla vok à baba gami madzidziga Abərahə, à mok uwana agà la kutso Mesopotami, à mok uwana aləg maday kà madz à ahəṇ la Karan.
- <sup>3</sup>Ḍgaha agòdàl: 'Sà à uda la gudəṇ aṇak, la huɸ gày aṇak, həd, kadàdza à ahəṇ la gudəṇ uwana gədàpəhakla!'
- <sup>4</sup>Kiya uwaga Abərahə asà à uda la kutso Kaldiya, ahàd kà madz à ahəṇ la Karan. La lig aṇa mamətsay aṇa Baba aṇha la ahəṇ, Zəzagəla adàlla à kutso uwanay à abà, kadzaw à ahəṇ la abà lakana lagwa.
- <sup>5</sup>La abatà kà, bə slaka madiṇ asik à ahəṇ bay, kà abəzal aw. Ama Zəzagəla apəh à Abərahə à vok à abà kà mavàl kutso uwaga, agòdàl: 'Gədàv à ka, ṇgaha mayyi à tsəh ala aṇak la uwana adàkoray' agòdàl, tekeɸika, Abərahə kà bəzi aṇha la ahəṇ à mok uwatà aw.
- <sup>6</sup>Aganay uwana Zəzagəla apəh: 'Mayyi à tsəh ala aṇak adàdza à ahəṇ la gudəṇ dza la abatà, tadàgay azlamayà, ṇgaha tadàtərərəbəh atà tsəràh à mavay dadərmokw ufaɸ.
- <sup>7</sup>Ama gədàɸah seriya à azladza uwana à gəl tadàtərəb atà. La lig la ahəṇ tadàdiy aṇatà la abatà, tadàkedəɸ à gi à ahəṇ la slaka uwanay lagwa,' Zəzagəla agòd.
- <sup>8</sup>Kiya uwaga Zəzagəla akəs vok slawda la Abərahə, agòdàl kà: 'Makədəv vok à uda la uwana masəlay aṇa makəs vok slawda uwaga.' Gay gà la uwaga, Abərahə akədəv bəzi aṇha Isak à uda la lig mahənay mtəgis la ahəṇ, kiya uwaga babay, Isak akədəv Yakuba à uda uwana akədəv azlabəza aṇha kulo gəl aṇha səla à uda bay. Atà la uwana takəslla azlatsəhay gami ala."
- <sup>9</sup>"Azlaməna makəsl anu uwaga tafahəṇ maṇor à deda aṇatà Yusufu à vok, tadùw à azla Misəra ala kà aṇa mayà. Ama Zəzagəla agà la masla.
- <sup>10</sup>Zəzagəla anəṇla la ṇgərpa uwaga la abà gesina. Avà haṇkəli à Yusufu kà masla aṇa maɸəz mawoyəṇ, la vok matsiday la huma aṇa Faruna, sufəl aṇa Misəra. Masla la uwana afà à Yusufu à ahəṇ kà gumna aṇa makoray Misəra, ṇgaha lakəl aṇa huɸ gày aṇha gesina.
- <sup>11</sup>Mok uwatà kà, may məṇga adzəkà à vok la kutso Misəra la Kanana gesina. Ḍgərpa agà məṇga, ṇgaha azlababa gami madzidziga taɸəzà tatak may kà mazuway aw.
- <sup>12</sup>Mok uwana Yakuba atsənəṇ kà tatak may la ahəṇ la makoray Misəra kà, asləl azlababa gami asik tekula dadəṇ.
- <sup>13</sup>Maday kà masəla uwana tahàd kà, Yusufu apəhla vok à azladedə aṇha, ṇgaha Faruna asəl kà azlauwaga kà huɸ gày aṇa Yusufu.
- <sup>14</sup>La abatà Yusufu asləl atà kà mazala baba aṇha Yakuba, la azladza gesina uwana la huɸ gày aṇha, gesina aṇatà taslà dza dzik mədəɸ gəl aṇha zlo.

- 15**Kiya uwaga Yakuba ahàd à kutso Misèra à slaka uwana amèts à abatà, la azlababa gami madzidziga bay.
- 16**Talàh atà kà à Sèsem à zəvay uwana à agu Abərahām asùkw la gursu, la slaka aṅa tsəhay Hemor.”
- 17**”Mok uwana kaslà adaslay, kà Zəzagəla aṅa mahən mapəhay aṅha uwana ala, afàhàṅ la Abərahām, tsəhay gami ayyà à tsəh aṅuvaw la kutso Misèra.
- 18**Ḍgaha sufəl mawga uwana asəl Yusufu aw adzəkà makor gudəṅ uwaga.
- 19**Sufəl uwatà avavàràhà tsəhay gami, afàhà à atà leri à gəl kà mamal azlabəza ala, kà azlabəza aṅa mamats à gay.
- 20**La zamana uwatà la uwana tayyà Musa, uwana bəzi mahəfayga. Zəzagəla awoyàṅ. Tanəṅla tsəràh à təla makər la hud gày aṅa baba aṅha.
- 21**Mok uwana taməl à uda, dugu aṅa Faruna azəḅ, adzadzàr bokuba mayyay aṅha.
- 22**Kiya uwaga Musa adzəṅ atsətsehà ala la azlatatak gesina uwana azla Misèra tasəl, ṅgaha agà maslay gà la gay la abà, ṅgaha la sləray aṅha la abà gesina.”
- 23**”Mok uwana mavay aṅha adaslay dzik ufaḍ kà: 'Gəday, gədànəṅ azlaməna gulo azla Isərayel à gay', Musa agòḍ.
- 24**Anəṅà zil Misèra atəṛəḅ tsəhay aṅha, abəḍ à huma kà mazlakəṅ dza uwana tatəṛəḅəṅ, apəl goder, akəḍ zil uwaga.
- 25**Musa adzùgw kà azladedà aṅha tadəsəlay kà: 'Zəzagəla akəs mapəl atà ala tadəgəfay', agòḍ, la mazlak atà aṅha, ama tatsənà godega aṅha aw.
- 26**La bəṅ gà Musa abəzà azla Isərayel səla à gəl tazlàḅ vok, asəl kà masəl à atà à vok. Agòḍ à atà: 'Azladedà, tsa akul la deda ma, kà mana katəṛəḅaw vok kà akul à akul ma?’
- 27**Ama dza uwana atəṛəḅ anik uwanay, adəkà Musa la vok ala, agòḍal: 'Uwa afà à ka à ahəṅ məṅga baṅaw kà masla seriya lakəl gami uwa?’
- 28**Awma asa à ka makəḍ gi, bokuba uwana kakəḍ zil Misèra lakuhu kəlay?’
- 29**Uwana Musa adatsən gay uwaga kà, ahòy aṅha, ahàd, adzà à ahəṅ la kutso Madiyan. La abatà abəzà azlabəza zilga səla.”
- 30**”La lig aṅa mavay dzik ufaḍ la ahəṅ, la mok uwana Musa la fəta aṅa gudəṅ Sənayyi kà, malika aṅa Zəzagəla asà à waṅ, apəhla vok à Musa la alàh aṅa akəl uwana ababəhay la tsewwagay la abà.
- 31**Uwana adanəṅ tatak uwaga kà, ləv avàlal à gay. Ama bokuba uwana azà à vok à awtày nekwa kà manəṛəziṅ ala kà, kuda aṅa Sufəl Zəzagəla atsən la abà, agòḍ:
- 32**'Gi Zəzagəla aṅa Abərahām, aṅa Isak ṅgaha aṅa Yakuba, aṅa azlababa aṅak madzidziga uwaga.' Musa adzəkà masukulay dawdadaw kà guba, ṅgaha aslala vok kà manəṛəziṅ ala aya aw.

- <sup>33</sup>Kiya uwaga Sufəl Zəzagəla agòdál: 'Sərətàh kwimik aṅak la asik ala, kà uwana slaka uwanay kak la abà kà, kutso tsikasłaga, kokudà àläh.
- <sup>34</sup>Gədanəṅ ṅgərpa aṅa azlatsəhay gulo la Misəra. Gədatsən mabas vok aṅatà ṅgaha gəsà à ahəṅ kà mapəlla atà ala. Lagwa kà, sà à waṅ, gəsləl ka à Misəra."
- <sup>35</sup>"Səlàw azladedə, azla Isərayel takweskà Musa la magòdál: 'Uwa à uwana afà ka à ahəṅ, kà mənḡa, ṅgaha kà masla seriya uwa', tagòdál. Ama bà la uwaga kà, la lig la ahəṅ Zəzagəla asləl à slaka aṅatà kà magay mənḡa aṅatà, ṅgaha kà mapəlla atà ala, la ndzəfà aṅa malika uwana apəhalla vok la tsewwagay la abà.
- <sup>36</sup>Masla la uwana asəlla azladza à uda la Misəra la madəhàh azlamasəlay la azlanadzipo anik anik la abatà, ṅgaha la gay dərəv mativga, ṅgaha la fəta la abà, tsəràh à mavay dzik ufad.
- <sup>37</sup>Bà Musa uwaga aya gotənaṅ, la uwana agòd à azla Isərayel: 'Zəzagəla adəsləl à akul masla mapəhal gay à ahəl anik à waṅ bokuba gi, uwana adàsa à uda la tsəhay aṅkul la abà.'
- <sup>38</sup>Musa gə la uwaga à uwana adzà à ahəṅ la mahəm à ahəṅ aṅa Isərayel la fəta la abà; agà la azlababa gami madzidziga, ṅgaha la malika uwana abadəlmà la gudəṅ Sənayyi la afik. La abatà la uwana abəzà à azlagay uwana tavà sifa, la slaka Zəzagəla kà mav à anu."
- <sup>39</sup>"Ama azlababa gami madzidziga takəs uwaga aw, takweskà, tayàh mawul aṅatà à Misəra.
- <sup>40</sup>Tagòd à Haruna: 'Dahà à anu azlazəzagəla uwana taguwa à anu à huma, kà uwana məsəl tatak uwana abəzà à Musa, uwana asəlla anu à uda la Misəra aw.'
- <sup>41</sup>La mavakay uwatà tadəhà vəlìk luwəluwà, ṅgaha tavəl tatak. Tarəb mənḡa lakəl aṅa sləray aṅa ahəl aṅatà.
- <sup>42</sup>Ama la lig aṅa uwaga la ahəṅ, Zəzagəla aguwa à atà ala lig à gay, asək à atà kà masləkaw azlatsəsilij uwana la zagəla, bokuba uwana tatsətsər à wakità aṅa azlaməna mapəh à atà gay à ahəl à abà: 'Akul, tsəhay Isərayel kà aṅulo, à uwana kakàdàw azlatatak anik anik la mav tatak anik takay? A mavay dzik ufad uwaga la fəta la abà ay?
- <sup>43</sup>Awaṅ, kazəbàw gày lukut aṅa Molokw mazlazlay aṅkul, ṅgaha kazəbàw maftsa à vok aṅa tsetsilij kà aṅa Refan, mazlazlay aṅkul. Azlamazlazlay uwana kà kadəhàw atà kà masləkaw atà. Gay gə la uwaga gədàza akul kərkər la Babila."
- <sup>44</sup>Gotənaṅ Etiyen adà à huma à gay, agòd: "Mok uwana azlababa gami madzidziga tadzà à ahəṅ la fəta la abà, tagà la gày lukut, uwana tadùw à sahar aṅa makəs vok slawda à gəl, kà atà aṅa masəlay kà Zəzagəla agà la tataka aṅatà la abà. Gày uwatà kà tadəhəṅ kà, bokuba uwana Zəzagəla apəhla à Musa, kà madəhəṅ kalkal la uwana anəṅəṅ.

<sup>45</sup>La lig la ahəŋ, azlababa gami tavà gày lukut uwaga à mayyi à tsəh ala aŋatà. Mayyi à tsəh ala uwaga kà Josu'e la uwana aguwà à atà à huma kà, mazaḅ kutso aŋa azlatsəhay anik, uwana Zəzagəla akudök à atà la huma aŋatà. Gay gà la uwaga, gày lukut adzà à ahəŋ la gudəŋ la abà tsərəh à zamana aŋa sufəl David.

<sup>46</sup>David aḅəzà vok mahamay aŋa Zəzagəla, adəval kudà, kà masla aŋa maḅəzal tetəvi kà maŋalal məŋ gày Zəzagəla à Zəzagəla aŋa Yakuba.

<sup>47</sup>Ama Salomon la uwana aŋàlal uwaga pəra.”

<sup>48</sup>"Tekedika Zəzagəla uwana la zagəla la afik, adza à ahəŋ la gày uwana la aku azladza taŋàlal aw. Bokuba uwana masla mapəhal gay à ahəl apəh. Sufəl Zəzagəla agòḁ kà:

<sup>49</sup>"Zagəla kà kursi gulo, kutso kà slaka maf à asik gulo à ahəŋ. Tsəhay gày ma uwala à uwana kaŋalaw à gi la? Slaka ma uwala asla kà gi aŋa maduw ləv la abà la?

<sup>50</sup>Gi la uwana gəḁahəŋ azlatatak uwaga gesina aw takay?"

<sup>51</sup>"Haḁay, akul azlaməna madzadzəŋəh gəl ala, ləv aŋkul la sləm aŋkul kà, asa à atà matsən gay aŋa Zəzagəla ḁikidiki aw! Kakwesaw kà Masasəḁök aŋa Zəzagəla koksikoksi, bokuba aŋa azlababa aŋkul.

<sup>52</sup>Azlaməna mapəh à atà gay à ahəl, azla ma uwala, azlababa aŋkul madzidziga tatərəḅəh atà aw la? Atà tatakəḁəh azlauwana, tasà à waŋ kà maz mas à waŋ aŋa dza dziriga lagonay bay, kà masla la uwanay katəwwal kaf à gəl, ŋgaha kakəḁəw.

<sup>53</sup>Tekedik kà akul kà, Zəzagəla avà à akul mapəhay la ahəl aŋa azlamalika, ama kakəsəw aw.”

<sup>54</sup>Uwana maham à ahəŋ aŋa azlaməna sawaray tatsən gay uwaga kà, tapəḁ slid la tsəh ala, tapakəh ləv məŋga lakəl aŋa Etiyen.

<sup>55</sup>Ama Etiyen uwana mahənlə ala gà la Masasəḁök Zəzagəla, adzilə yewdi à zagəla, anəŋə mazləḅay aŋa Zəzagəla, la Yesu matsizl à ahəŋ gà la ahəl kaf aŋa Zəzagəla lakəl.

<sup>56</sup>Etiyen agòḁ: "Tsəḅəwwal sləm: Gənəŋə zagəla kà zagəla mapəzlla ama ala gà, ŋgaha Kona aŋa dza dzawwa la ahəl kaf aŋa Zəzagəla lakəl.”

<sup>57</sup>Tawiyà la ndzəḁà kà makəḁəl gəl à ahəŋ la manakəh à sləm à ama. Gesina aŋatà tahaməl à gəl.

<sup>58</sup>Tabayəŋ à uda la gudəŋ la abà, ŋgaha tadzəkə matsahay la akur kà makəḁəy. Azlaməna makəḁəy tahamə lukut aŋatà à slaka bəzi kohana, uwana sləm aŋha Sawul.

<sup>59</sup>Uwana tatsahay la akur kà Etiyen, adəv kudà kiya uwanay: "Sufəl Yesu, gəmətsay kà à ahəl aŋak à afik!"

<sup>60</sup>Ŋgaha akəḁəḁ à ahəŋ, azà kuda à zagəla awiyà: "Sufəl, katugw uwaga bokuba tsakana lakəl aŋatà aw!", agòḁ. La mapəh gay uwaga la gay ala, aməts.

## Sləray 8

<sup>1</sup>Makəḍ Etiyen kà, akès à Sawul à gəl. La mavakay uwatà, matərəḅay mənğa adzəkà à vok lakəl aṅa maham à ahəṅ mənə gay Zəzagəla la Urusalima. Gesina aṅatà taslèhà gəl à ahəṅ la kutso Yahudiya ṅgaha la Samariya. Say azlaməna matapla pəra tatəm à Urusalima.

<sup>2</sup>Ama azladza dziriga talà Etiyen, ṅgaha tatùw mənğa.

<sup>3</sup>Sawul awəḍf vok à uda kà mabəzl gəl à maham à ahəṅ mənə gay Zəzagəla à abà; adàhàh gày la gày, kà makas azlaməna madiṅal gəl à vok, azlazil la azlamisga gesina, kà mawats atà à daṅay.

<sup>4</sup>Azlauwana taslèhà gəl à ahəṅ kà, tauguzàhàh la kutso gesina kà maz gay marabəṅ.

<sup>5</sup>Filip ahàd à Samariya, ṅgaha azà gay aṅa Kristu à azlaməna madz à ahəṅ la gudəṅ uwatà.

<sup>6</sup>Maham à ahəṅ dza takès gay aṅa Filip à mok uwana tatsənəṅ ṅgaha tanəṅəṅ azlanadzipo uwana adàhàhəṅ.

<sup>7</sup>La kità azlamasəḍok mawisiga tasàhà à uda la azlaməna dūvats la abà aṅuvaw la mawiyay, ṅgaha azlamagul à afik gà, la azladeri tawarà ala bay.

<sup>8</sup>Marabay mənğa apakà vok la gudəṅ uwatà.

<sup>9</sup>Dza anik la ahəṅ, dagay uwarà la gudəṅ uwatà, sləm aṅha Səmon. Masla kà avàlàh ləv à azladza à gay la Samariya la məzla aṅha. Masla kà: "Gi mən dza", agòḍ.

<sup>10</sup>Gay gà la uwaga azladza la gudəṅ uwatà gesina, azlauwana azlamənğa tagòḍ à atà, la azlabəzaga gesina, taslèkàw masla, tagòḍ kà: "Masla la uwana ndzəḍa aṅa Zəzagəla uwana tazàlalla ndzəḍa mənğa gà."

<sup>11</sup>Taslèkàwəh masla mənğa kà uwana avàlàh ləv à azladza à gay la məzla aṅha dagay uwatà.

<sup>12</sup>Ama mok uwana tadiṅ gəl à gay marabəṅ uwana à vok, Filip azəṅ lakəl aṅa makoray Zəzagəla, ṅgaha lakəl aṅa sləm aṅa Yesu Kristu kà, tabəzà batem, azlazil la azlamis.

<sup>13</sup>Səmon la gəl aṅha bay, adiṅal gəl à vok, abəzà batem, adzà à ahəṅ la slaka Filip, ṅgaha ləv avalàhal à gay mənğa la manəṅ azlamasəlay la azlanadzipo uwana Filip adàhàhəṅ.

<sup>14</sup>Azlaməna matapla la Urusalima tatsənəṅ kà azladza la Samariya takès gay aṅa Zəzagəla kà, taslèl à atà Piyer à awtày atà la Yuhana.

<sup>15</sup>Mok uwana tabəzà à Samariya kà, tadəv kudà kà aṅa azlaməna madiṅal gəl à vok kà atà aṅa mabəz Masasəḍok Zəzagəla.

<sup>16</sup>Kà uwana Masasəḍok Zəzagəla adasa à ahəṅ, baməraka à gəl aṅa tekula aṅatà dadəṅ aw, tabəzà batem la sləm aṅa Sufəl Yesu dadəṅ pəra.

- 17**Gay gà la uwaga à uwana, Piyer atà la Yuhana tabèk à atà ahàl à gəl, ñgaha mabəz Masasəđok Zəzagəla.
- 18**Mok uwana Səmon anəñà Masasəđok asà à gəl aña azlaməna madiñal gəl à vok, à mok uwana azlaməna matapla tabèk à atà ahàl à gəl kà, Səmon ayàh mabək sili à azla Piyer atà la Yuhana.
- 19**Agòđ: "Vàw à gi ndzəđa uwaga babay suwañ, kà kəla uwabeyuwi uwana gədàbəkàl ahàl à gəl aña mabəz Masasəđok Zəzagəla."
- 20**Ama Piyer awulàlla: "Zàlla la sili aña, kà uwana kadzugw kà: Mavày aña Zəzagəla kà tasukway la sili, kagòđ.
- 21**Humà gà aña la ahəñ, la gay uwanay la abà aw. Kak kà, kak la sləray gami la abà aw, kà uwana ləv aña la dziriga la huma Zəzagəla aw!
- 22**Pəh gay la ləv ala kà mawisiga aña uwaga, dəv kufa à Sufəl, zlahaw kà masla amatsakañ ala tsəhay madzugway aña uwaga tak.
- 23**Kà uwana gənəñəñ kà kadahən ala la mawisiga dəhakakga, ñgaha kak mayà aña tsakana."
- 24**Kiya uwaga Səmon agòđ à Piyer atà la Yuhana: "Kamkam, dəvəw kufa à Sufəl kà gi, kà gay uwana kapəhàw à gi aña mabəz à gi aw!"
- 25**Piyer atà la Yuhana tapàh sayda aña Sufəl Yesu la maz gay marabəñ la Samariya, ñgaha tawulà à Urusalima. La tetəvi aña atà la ama kà, tapàhàh gay marabəñ lakəl aña Yesu la azlabəza gudəñ uwana la kutso Samariya la abà gesina.
- 26**La lig aña uwaga la ahəñ, malika aña Sufəl Zəzagəla apəhla vok à Filip, agòđal: "Filip, sà à afik, wul à gəl à agu, à tetəvi uwana à ama asà à uda la Urusalima ada à Gaza." Tetəvi uwana tetəvi kəsaf.
- 27**Filip atsizlla ala, ahəd. Tagagàm à tetəvi à ama la dza anik. Dza uwatà kà zil Etiyopiya, subaga, slawpara aña Kandantse, məñ sufəl misga la Etiyopiya. Asà à Urusalima kà masləkaw Zəzagəla.
- 28**Agà la tetəvi mawul à mtəga aña la tsəh, la dərkwə aña la afik, adzeñay la wakità aña masla mapəhal gay à ahàl Yesayya la abà.
- 29**Masasəđok Zəzagəla agòđ à Filip: "Həd à slaka aña, zà à vok à slaka aña dərkwə aña!"
- 30**Filip azà à vok à slaka aña la mahoyay, ñgaha atsənà zil Etiyopiya uwaga adzeñay la wakità aña masla mapəhal gay à ahàl Yesayya la abà. Anavəl à gay la: "Katsənà uwaga kadzeñay ay?"
- 31**Kona uwaga agòđal: "Kakay gətsenəñ à baña dza adəpatgəla godega aña aw ma? Sà à wañ à slaka gulo à dərkwə la afik", agòđ à Filip.

<sup>32</sup>Aganay à slaka uwana adzèŋ la wakità la abà: 'Agà bokuba tuwaŋ uwana tadàla à makəday, bokuba bəzi tuwaŋ uwana atuway à baŋa tatsəɗ aŋidz aŋha aw. Kiya uwaga məslək, apokwà gay aŋha aw.

<sup>33</sup>Tapəsəw, takəl ala ziruwi à gəl, tadùkw ala seriya à gəl kà deyday pəra. Uwa à uwana adàslala vok aŋa matugway lakəl aŋa tsəhay aŋha uwa? Kà uwana takəɗ à gəl à sifa aŋha la gudəŋ la vok.'

<sup>34</sup>Slawpara uwaga anavà Filip: "Kamkam, pəhgəla lakəl ma aŋa uwa masla mapəhal gay à ahəl apəhay uwa? Apəhay ma lakəl aŋha, awma lakəl aŋa dza anik ay?"

<sup>35</sup>Filip adzəkà lakəl aŋa uwana dza uwaga adzəŋay la wakità la abà, azàla gay lakəl aŋa Yesu.

<sup>36</sup>Uwana taday, taday kà, tabəzà à iyaw à vok, la abatà slawpara agòɗ: "Tsa iyaw la uwanay, ma mana à uwana adəɗ à gi gay à ahəŋ kà məbəz batem ma?"

[<sup>37</sup>Filip agòɗal: "Baŋa kadiŋal gəl à vok la ləv aŋak gesina kà, kaslala vok kà, məbəz batem." Kona uwaga awulàlla: "Gədiŋal gəl à vok, kà Yesu Kristu kà Kona aŋa Zəzagəla."]

<sup>38</sup>Ŋgaha la abatà: "Tsizilla dərkwà à ahəŋ", agòɗ à magamza aŋha. Filip atà la slawpara tasà à ahəŋ, tahàd à iyaw à abà, ŋgaha Filip adəhàlla batem.

<sup>39</sup>La mok uwana tasà à uda la iyaw la abà kà, Masasəɗok Sufəl Zəzagəla azəbà Filip ala dzəgasl. Slawpara anəŋəŋ aya aw, ama adà aŋha la marabay.

<sup>40</sup>Batsàrà kà, Filip anəŋla kà agà la Azot. Kiya uwaga aguwàh la azlagudəŋ la abà gesina, kà maz gay matsidəyga la slaka gesina tsəràh uwana abəzà Zəsare.

## Sləray 9

<sup>1</sup>La mok uwatà, Sawul asakà matəɗəbəŋ la makəɗ azlaməna matapla la slaka Sufəl Yesu aw. Ahàd à slaka məŋ madzahaga aŋa azlaməna mav tatak à Zəzagəla.

<sup>2</sup>Anavà patanti, kà aŋa gəy madəv kudà la Damas, kà makas azladza uwana tanəfa Yesu, azlazil la azlamis gesina, kà madla atà à Urusalima.

<sup>3</sup>Mok uwana adabəz à patanti uwaga kà, atsizilla ala, kà mad à Damas. La tetəvi la ama, uwana azlabəzay, katskats məŋ udàka asà à ahəŋ la zagəla, aùɗ la slaka aŋha.

<sup>4</sup>Atəɗ à vəɗàh, ŋgaha atsənà kuda uwana agòɗal: "Sawul, Sawul, kà mana katəɗəb gi ma?"

<sup>5</sup>Anəv, agòɗal: "Kak uwa, Sufəl?" Kuda uwaga agòɗal: "Gi Yesu uwana katəɗəbəŋ."

<sup>6</sup>Ama agòɗal: "Sà à afik, hàd à gudəŋ à abà, la abatà la uwana tadəpəh à ka uwana kadəɗəhəŋ."

<sup>7</sup>Azlaməna mauguzahay atà nna tagudəkàhla, taslala vok kà mapokw gay aw, tatsənà məbadəma, ama tanəŋà dza aw.

- <sup>8</sup>Sawul asà à afik la vèdàh, apèzl yewdi, ama aslàla vok kà manəŋ tatak aw. Takès à ahàl kà madla à Damas.
- <sup>9</sup>Tsèràh mavakay makər, aslàla vok kà manəŋla aw, azùw ŋgaha asà tatak babay aw.
- <sup>10</sup>Masla asik anik la ahəŋ la Damas uwana sləm aŋha Ananiyas. Sufəl Zəzagəla apəhal la masasiŋay, agòdàl: "Ananiyas, Ananiyas!" "Awway, gi la uwanay, Sufəl gulo", Ananiyas agòdàl.
- <sup>11</sup>Sufəl Zəzagəla agòdàl: "Katskats, hād lagonay à bəzi barama tərrega à ama. Lakay aŋa Yudas, dza uwana sləm aŋha Sawul zil Tarsus, adəv kudà lagwa, dānāv.
- <sup>12</sup>Kiya uwaga la masasiŋay kà, Sawul anəŋà dza anik, uwana sləm aŋha Ananiyas adà à gày kà mabəkàl ahàl à gəl, kà masla aŋa manəŋla aya."
- <sup>13</sup>Ananiyas agòdàl: "Sufəl, azladza aŋuvaw tapəh à gi lakəl aŋa dza uwaga, lakəl aŋa uwana adàhàn à azlaməna manəfay aŋak à vok la Urusalima.
- <sup>14</sup>Ŋgaha asà à waŋ à abanay la patanti, uwana la ahàl azlamadzahaga aŋa azlaməna mav tatak à Zəzagəla la Urusalima tavàl, kà makas azladza uwana tatsàl sləm aŋak à gay."
- <sup>15</sup>Ama Sufəl Zəzagəla agòdàl: "Hād, kà uwana gədazəb masla, ŋgaha gədàpakəŋ ala, kà masla mapəhla gi ala, la slaka azlatsəhay anik anik, la azlasufəl aŋatà, ŋgaha la tsəhay Isərayel.
- <sup>16</sup>Gi la gəl gulo gədàpəh ala ŋgərpa uwana adàsai kà gi."
- <sup>17</sup>Kiya uwaga Ananiyas ahād, adà à gày uwatà à agu, abək ahàl à Sawul à gəl, agòdàl: "Deda Sawul, Sufəl Yesu uwana apəhakala vok la tetəvi la ama à uwana katsà à waŋ, masla la uwana asləl gi à waŋ, kà kak aŋa manəŋla aya, ŋgaha kà kak aŋa magay mahənlaga la Masasədók Zəzagəla."
- <sup>18</sup>Katskats tatak anik bokuba mafafətay aŋa kilfi anis à Sawul la adi ala, ŋgaha anəŋla aya. Hadzak, asà à afik ŋgaha tadàhalla batem.
- <sup>19</sup>La lig la ahəŋ azùw tatak may, ŋgaha abəzà à ndzəda aya. Sawul asàf la azlaməna madiŋal gəl à vok ŋuv la Damas.
- <sup>20</sup>Katskats adzəkà mapəhàh gay Zəzagəla la azlagày madəv kudà la aku, la mapəhla ala, kà Yesu kà Kona aŋa Zəzagəla.
- <sup>21</sup>Azladza uwana tatsəbal sləm gesina, ləv avàläh à atà à gay, tagòd: "Uwaga kà dza uwana atərəbàhà azladza la ndzəda la Urusalima, azlauwana takès gay aŋa Yesu aw takay? Ŋgaha asà à waŋ à abanay kà aŋa makas atà la madla atà à məŋ madzahaga aŋa azlaməna mav tatak à Zəzagəla aw takay?"
- <sup>22</sup>Ama Sawul azàŋ la ndzəda koksikoksi la mad à huma à gay, azla Yahudiya uwana tadzà à ahəŋ la Damas, tasəl uwana tawulàlla aya à mok uwana apəhatàla kà Yesu kà Kristu aw.
- <sup>23</sup>Uwana adasafni kà, azla Yahudiya takès sawaray kà makədafay.



- 24** Ama atsənà uwana tatsənànj à vok kà madàhallañ à vok. Kəla mavakay la mahəny tanəñla gay gamagay aña huđ gudəñ kà makəđay.
- 25** Kiya uwaga la vəđ vərđi anik, azlaməna asik aña tazəb, tafà à takosà à abà, tadzilà à ahəñ la gəl zlagam, uwana takəslla gay à huđ gudəñ à adi.
- 26** Mok uwana Sawul adawul à Urusalima kà, ayàh maham gay à vok la azlaməna matapla; ama guba akəs à atà gesina, kà uwana tadiñal gəl à vok, kà masla ndzer kà adapaka masla manəf Yesu aw.
- 27** Ama Barnabas akəs à tsəh, adàlla à slaka azlaməna matapla la slaka Yesu, ñgaha atügw à atà godega manəñ Sufəl Yesu aña Sawul la tetəvi la ama, ñgaha la uwana Sufəl Yesu ađadəlmà. Apəh à atà gay lakəl aña mawad vok à uda aña Sawul uwana azà gay aña Yesu la Damas aya.
- 28** Dagay kaslà uwatà kà, Sawul adà à atà à adi, tauguzàhàh la gudəñ Urusalima kà maz gay aña Sufəl Yesu.
- 29** ñgaha apàhàh à azla Yahudiya uwana tapəh gay Gərək la mabay vok gay la atà babay, ama atà kà, tayàh kà makəđay.
- 30** Mok uwana azladedà tatsən uwaga kà, talakà Sawul à Zəsare, ñgaha tasləl à Tarsus.
- 31** Kiya uwaga azlaməna madiñal gəl à vok la kutso Yahudiya, la Galili, la Samariya gesina tadzà à ahəñ la lapiya, kokudà matərəbay. Tadzərəđàh ala, tadzà à ahəñ la mahoy à adi aña masləkaw Sufəl Zəzagəla la abà, tasəg ala la mazlakay aña Masasədök Zəzagəla.
- 32** La kaslà uwatà Piyer auguzàhàh la azlagudəñ la abà gesina. Vərđi anik, ahəd à slaka azlaməna madiñal gəl à vok uwana tadzà à ahəñ la Lidda.
- 33** La abatà dza anik uwana sləm aña Ene la ahəñ. Magul à afik gə dagay mavay mtəgis agà la slaka mahən à ahəñ.
- 34** Piyer agòđal: "Ene, Yesu Kristu awur ka ala! Sà à afik, kakəl slaka mahən à ahəñ aña k à abà!" Hadzak Ene asà à afik.
- 35** La abatà azlaməna madz à ahəñ la Lidda ñgaha la azlauwana la vaday Saron tanəñàñ gesina aña tà tapəh gay la ləv ala la huma aña Sufəl Yesu.
- 36** Mis anik la ahəñ la Yope sləm aña Tabita, (Sləm uwaga la gay Gərək Dorkas, uwana asal magođay Pəkur) Masla kà adàhàhà azlasləray dzəba aña səla aw gə la mazlakay kuda.
- 37** La kaslà uwatà dūvats akəs, ñgaha aməts. La mok uwana tapəlal vok kà, tahənàñ à gəy, uwana à agu lakəl aña gəy anik.
- 38** Uwana azlaməna madiñal gəl à vok la Yope tatsənànj kà Piyer la Lidda, nekwa la gudəñ uwaga kà, tasləlal azladza səla à tsəh la gay: "Mədəv à ka kuda, sà à wañ à mtəga gami la katskats."

<sup>39</sup>Piyer anəfà à atà la katskats. Mok uwana tabəzà awtày kà, tadàla à gày uwana à afik tahənàŋ à agu. Azlamis kuđà gesina tadà à awtày à slaka aŋha la mataway; tapàhalla azlanenewi, ŋgaha la azladebdebi uwana Dorkas atsàh à mok uwana aləg la sifa.

<sup>40</sup>La abatà Piyer akudəkàh azladza à uda, ŋgaha akədèđ à ahəŋ, adəv kuđà, agolà à huma à slaka mazimnekid: "Tabita, sà à afik!", agòđal. Tabita apəzl yewdi, uwana anəŋà à Piyer à adi, asà à afik, adzà madzay.

<sup>41</sup>Piyer akəs à ahəl, ŋgaha azlakàŋ kà matsizlləŋ ala. La lig la ahəŋ Piyer azàla azlamis kuđà la azlaməna madiŋal gəl à vok, apəhatàla kà agay la sifa.

<sup>42</sup>Uwaga asəlla à vok la Yope gesina, ŋgaha azladza aŋuvaw tadiŋ gəl à Sufəl Yesu à vok.

<sup>43</sup>Piyer kà asəf məŋga la gudəŋ Yope la mtəga aŋa Səmon, masla masad' zlap.

## Sləray 10

<sup>1</sup>Dza la ahəŋ la Zəsare, sləm aŋha Korneliyus, masla kà zil Rom, məŋga aŋa azlaslodzi dzim aŋa maham à ahəŋ slodzi, uwana tazalal ala maham à ahəŋ Italiya.

<sup>2</sup>Masla awoyà Zəzagəla, asləkàw Zəzagəla la azlaməna huđ gày aŋha gesina. Azləkàh azlaməna kuđà uwana azlatsəhay Yahudiya, ŋgaha adəv kuđà à Zəzagəla koksikoksi.

<sup>3</sup>La gay mokokhu vərđi anik la sa makər, masasiŋay asasiŋla, anəŋà malika aŋa Zəzagəla adagay à slaka aŋha ŋgaha agòđal: "Korneliyus!"

<sup>4</sup>Anərəz malika la masukulay, ŋgaha agòđal: "Kak uwa, Sufəl gulo?" Malika awulàlla: "Zəzagəla adatsən madəv kuđà aŋak la mazlakàh azlaməna kuđà aŋak, ŋgaha lagwa kà kawùllal à gəl.

<sup>5</sup>Lagwa kà, sləl azladza à Yope kà mazal Səmon uwana 'Piyer', tagòđal.

<sup>6</sup>Ahənay kà la mtəga Səmon masla masad' zlap, uwana gày aŋha kà la gay dərəv."

<sup>7</sup>Mok uwana malika uwaga abadəlmà, adada aŋha kà. Korneliyus azəl azlamagamza aŋha səla, la slodzi tekula uwana anəŋlal, masla bay, awoyà Zəzagəla.

<sup>8</sup>Atùgw à atà uwana apakà vok gesina, ŋgaha aslèlla atà à gudəŋ Yope.

<sup>9</sup>Kiya uwaga tatsizlla ala, tahəd à Yope. La bebəŋ gà, mok uwana tazlabəz Yope kà, Piyer bay kà, ahəd à gəl gày à afik kà madəv kuđà la tataka afats.

<sup>10</sup>May akəs Piyer, asəl mazuw tatak may. A mok uwana tadzəkà matal tatak, à uwana masasiŋay asasiŋla.

<sup>11</sup>Anəŋà zagəla apəzlla vok, ŋgaha tatak anik asà à ahəŋ: Magol məŋ tatagà bokuba peteli gay dzika ufađ mawađ à ahəŋ ala gà, afà à vok à vəđah.

<sup>12</sup>La huđ aŋha kà kəla tsəhay tatak asik ufađ la abà gesina, la azlatatak uwana taday la huđ, ŋgaha la azlatsəhay tatak uwana tahoyay gesina.

<sup>13</sup>Ama Zəzagəla agòđal: "Sà à afik, kakəd, ŋgaha pəđ zlà, Piyer!"

- 14 Ama Piyer agòd: "Awaŋ, kiya uwaga aw, Sufəl gulo, kà uwana dikidiki gədapad tatak àlàhga aw, aslèh!"
- 15 Agòdál aya: "Kapakàŋ ala bokuba àlàhga à uwana Zəzagəla adapakəŋ ala tsidəŋa aw."
- 16 Uwaga adàhà vok asik makər, ŋgaha la lig la ahəŋ la kirim yewdi tatak uwaga awùl à zagəla.
- 17 Piyer adzùgw godega aŋa uwana masasiŋay uwaga asàl mapəhalla. Ama la kaslà uwatà kà, azlaməna masləlay aŋa Korneliyus tanavahay la slaka azladza: "Lala à gày aŋa Səmon masla masad zlap la?", tagodəy. Tsa mok uwaga kà, atà la gay gamagày aŋha.
- 18 Tazàlàh, ŋgaha tanəv: "La abanay à Səmon uwana tazalalla Piyer ahənay ay?"
- 19 Piyer aləg la madzugway aŋa masasiŋay uwaga la abà, uwana Masasədök Zəzagəla agòdál: "Nəŋəŋ, azladza makər la uwaga tayàh ka la gay gamagày la uda.
- 20 Sà à afik, dà à ahəŋ, kadaw akul nna, kokudà matsurəkway, kà uwana gi la uwana gəsləlla ka atà à waŋ!"
- 21 Piyer asà à ahəŋ à slaka azladza uwaga, ŋgaha agòd à atà: "Gəga la uwanay à uwana kayahaw gi. Mana kasawka à waŋ ma?"
- 22 Tagòdál: "Məsà à waŋ kà, Korneliyus məŋga aŋa azlaslodzi dzim, la uwana aslèlla anu à waŋ. Masla kà dza dziriga, uwana azləb Zəzagəla, uwana azla Yahudiya gesina kà: 'Dza', tagòdál. Malika aŋa Zəzagəla apəhal gay, kà masla aŋa mazala à ka, kà kak aŋa mapəhal uwana asa à ka mapəhal."
- 23 Ŋgaha Piyer adàla atà à gày, avà à atà slaka mahən à ahəŋ. La bebəŋ gà, takəs tetəvi, tahəd atà nna. Azladedə anik, la tataka azladza la abà la Yope, talakà à atà.
- 24 La bebəŋ gà aya tabəzà Zəsare. Korneliyus babay kà adahama gay azladza à vok la azlahud gày aŋha gesina kà makud atà.
- 25 Uwana Piyer adà à gày kà, tagagəm la Korneliyus, atəd à huma aŋha, akədədál à ahəŋ.
- 26 Ama Piyer akəs à afik la magòdál: "Sà à afik, gi kà bà gi dza kiya kak bay."
- 27 Kiya uwaga tadà à huma à gay la mabadma la abà la Korneliyus, ŋgaha tsərəh à uwana tahamə gay à vok takuday.
- 28 Agòd à atà: "Kasəlaw kà zil Yahudiya aŋa madz à ahəŋ la azlatsəhay anik, kà zlazladà, ama Zəzagəla apəh à gi kà gəpak tsəhay dza anik ala kà àlàhga, gəda à gày aŋha aw, gəgodəy aw.
- 29 Gay gà la uwaga mok uwana kazàlàw gi kà, gəsa à waŋ kokudà madzurəkway. Lagwa ma, kà mana kazàlàw gi mi?"

- <sup>30</sup>Korneliyus awulàlla: "Adagay mahənay ufaɗ lakana, bà la kaslà uwanay gədəv kuɗa la mtəga gulo la sa makər aŋa mokokhu. La kirim yewdi kà, dza anik adatsakwàh la lukut mawutsəɗay gà la vok la huma gulo.
- <sup>31</sup>Ŋgaha agòɗ à gi: Korneliyus, Zəzagəla atsənà madəv kuɗa aŋak, ŋgaha mazlakay aŋak uwana kazlakàh à azlaməna kuɗa adawullal à gəl.
- <sup>32</sup>Lagwa kà, sləl azladza à Yope kà mazal Səmon uwana tazalalla Piyer. Adza à ahəŋ la mtəga Səmon, masla masaf zlap, uwana gày aŋha la gay dərəv.
- <sup>33</sup>Katskats gəsləl azladza à awtày, kà mazal à ka. Kadàhàŋ delga la mas à waŋ aŋak. Lagonay kà, anu la uwanay gesina gami la huma aŋa Zəzagəla, kà matsəb sləm à uwana Sufəl apəh à ka, kà mapəh à anu gesina zlà."
- <sup>34</sup>Piyer adzəkà mabadma, agòɗ: "Lagwa kà, gədasəlay kà Zəzagəla kà avàh à dza mavahay aw.
- <sup>35</sup>Kəla dza tsəhay uwala beyli uwana adiŋal gəl à vok, ŋgaha adàh dziriga kà, ahəɗal à adi.
- <sup>36</sup>Haday, kasəlaw kà Zəzagəla asləl gay aŋha à slaka azla Isərayel, uwaga kà gay matsidəyga à uwana məslalà vok aŋa magla lapiya la Zəzagəla, kà madegolay Yesu, uwana asəlla anu vok la Zəzagəla, uwana Sufəl aŋa dza gesina.
- <sup>37</sup>Gay matsidəyga uwanay adzəkà vok la Galili, la lig aŋa batem uwana la ahəŋ Yuhana azàŋ, ŋgaha aslèhà gəl à ahəŋ la kutso Yahudiya.
- <sup>38</sup>Kasəlaw à uwana Zəzagəla asləl Masasəɗok aŋha à ahəŋ, à Yesu zil Nazaret à gəl, ŋgaha kasəlaw babay, à uwana Yesu auguzàhàh la azlagudəŋ la abà gesina la madəhəŋ delga la mawar azladza uwana ala, atà la ahəl aŋa seteni. Ndzer kà, Zəzagəla agà la masla.
- <sup>39</sup>Gesina gami kà, anu azlaməna sayda aŋa tatak uwana adàhàhàŋ la Urusalima, la kutso aŋa azla Yahudiya la abà gesina. Takəɗ masla la mazləl à ahàf à adi.
- <sup>40</sup>Ama Zəzagəla awùlla à uda la mamətsay la mahənay makər, ŋgaha avəl ndzəɗa kà mapəhla vok ala.
- <sup>41</sup>Ama azladza gesina tanəŋàŋ aw, anu uwana atsatsàmàni anu la madzəka, kà anu aŋa magay azlaməna sayda pəra, mənəŋàŋ. La lig aŋa uwana Zəzagəla awùlla à uda la mamətsay kà, məzùw, məsà la slaka gə anina.
- <sup>42</sup>Ŋgaha apəh à anu à vok à abà kà maz gay marabəŋ à azladza, ŋgaha kà mapəhla ala kà Zəzagəla afà Yesu à ahəŋ, kà masla seriya lakəl aŋa azladza uwana la sifa, ŋgaha lakəl aŋa azlauwana tamatsay.
- <sup>43</sup>Azlaməna mapəh à atà gay à ahəl kà mapəh à azladza gesina tapəh lakəl aŋha: Kəla dza uwana adiŋ gəl à Yesu à vok kà, Zəzagəla adàmatsalla tsakana aŋha ala, kà sləm aŋa Yesu."

<sup>44</sup>Mok uwana Piyer alæg la mabafma la abà kà, Masasəđok Zəzagəla asà à gəl aŋa azladza uwana tatsəb sləm à gay aŋha gesina.

<sup>45</sup>Azla Yahudiya uwana tadiŋ gəl à Yesu à vok, azlauwana tanəfà Piyer à waŋ kà, ləv avàläh à atà à gay, kà Masasəđok, uwana Zəzagəla avà à azladza uwana azla Yahudiya aw bay.

<sup>46</sup>Kà uwana tatsənà atà tazləb maslay aŋa Zəzagəla la azlagay məlok gə, uwana tatəpla aw. Piyer agòđ:

<sup>47</sup>"Lagwa ma məslala vok aŋa madəđ gay à azladza uwanay à ahəŋ kà madəhatəŋ batem aŋa iyaw, tsa tabəzà Masasəđok Zəzagəla bokuba anu ay?"

<sup>48</sup>Ŋgaha avà tetəvi kà madəh à atà batem la sləm aŋa Yesu Kristu. Ŋgaha tanavàl à masla aŋa madzin à ahəŋ atà nna.

## Sləray 11

<sup>1</sup>Azlaməna masləlay la azlaməna madiŋal gəl à vok uwana tadzà à ahəŋ la Yahudiya tatsənəŋ kà azladza uwana azla Yahudiya aw babay takəs gay Zəzagəla.

<sup>2</sup>Uwana Piyer adawul à Urusalima kà, azla Yahudiya uwana tadiŋ gəl à Yesu à vok taslähàla vok.

<sup>3</sup>Tagòđal: "Kahàd à tataka aŋa azladza uwana à abà, makadav atà à uda gə aw, ŋgaha kazùw aw tatak may akul nna?!"

<sup>4</sup>Kiya uwaga Piyer adzəkà matugw à atà godega aŋha takwatokw lakəl aŋa uwana apakà vok gesina. Agòđ à atà:

<sup>5</sup>"Gi, kà gi la Yope, mok uwaga gi la madəv kudà la abà kà, masesiŋay asesiŋla gi. Gəŋəŋà tatak anik asà à ahəŋ la zagəla, asà à slaka gulo. Tatak uwatà kà bokuba magol peteli, mawad à ahəŋ ala gə, kəla gay dzika ufad nna, asà à ahəŋ la zagəla, asà à slaka gulo.

<sup>6</sup>Gəŋərəz huđ aŋha la haŋkəli kà, gəŋəŋà azlatatak uwana la asik ufad, azlatatak fəta la azlauwana taday la huđ, ŋgaha la azlauwana tahoyay la zagəla.

<sup>7</sup>Ŋgaha gətsənà kuda aŋa Zəzagəla agòđ à gi: 'Piyer, sà à afik, kəđ ŋgaha pàđ!'

<sup>8</sup>Ama gəwulàlla: 'Awaŋ, kiya uwaga aw, Sufəl gulo, đikidiki tatak àlähga adada à gay gulo à awtəy aw, asləh!'

<sup>9</sup>La abatà kuda uwaga atsən à ahəŋ aya: 'Kapakà tatak uwana ala Zəzagəla adapakəŋ ala tsidəŋa kà àlähga aw!'

<sup>10</sup>Adəhà vok asik makər, ŋgaha la lig la ahəŋ, tatak uwaga awul à zagəla gesina.

<sup>11</sup>La kaslà uwatà azladza makər tasà à waŋ à gəy, uwana à abà gi lakay. Tasləlla atà à waŋ kà dagay la Zəsare kà mayəh gi.

- <sup>12</sup>La abatà Masasəđok Zəzagəla agòđ, gənəfà atà, kakwes aw. Kiya uwaga azladede mukwà talaka gi babay à Zəsare, gesina gami mədà à gày la mtəga Korneliyus.
- <sup>13</sup>Uwana Korneliyus adanəŋ anu kà, adzəkà matugw anu gay lakəl aŋa malika uwana adà à mtəga aŋha, atsizilla à ahəŋ, agòđal: 'Sləl azladza à Yope, kà mazalay à Səmon uwana tazalalla Piyer.
- <sup>14</sup>Adəpəh à ka ala gay uwana kadəbəla la azlaməna huđ gày aŋak gesina.'
- <sup>15</sup>La abatà gədzəkà mapəh à atà. Masasəđok Zəzagəla asà à atà à gəl bokuba uwana asà à anu à gəl babay suwaŋ, dagay uwarà.
- <sup>16</sup>La abatà kà, awùl à gi à gəl lakəl aŋa uwana Sufəl Zəzagəla apəh: 'Yuhana adəhəŋ batem la iyaw, ama akul kadəbəzaw batem kà la Masasəđok Zəzagəla.'
- <sup>17</sup>Ndzer, Zəzagəla avà à atà Masasəđok aŋha bokuba uwana avà à anu à mok uwana mədih gəl à Sufəl gami Yesu Kristu à vok. Đgaha ma, gi ma gi uwa, kà madəđ gay à Zəzagəla à ahəŋ uwa?"
- <sup>18</sup>Mok uwana tatsən gay uwaga kà, tadzà à ahəŋ titi, ŋgaha tazləbà Zəzagəla la magodəy: "Hadəy kà, Zəzagəla adavà tetəvi à azladza uwana azla Yahudiya aw babay, kà atà aŋa mapəh gay la ləv ala, kà atà mabəzal sifa adəv gay aw, hadəy."
- <sup>19</sup>Azlaməna madiŋal gəl à vok tasləhà gəl à ahəŋ kà makəđ Etiyen, uwana takəđ. Azlaanik la tataka aŋatà la abà tadà à Fenesəya, ŋgaha à Sipəre, ŋgaha à Antiyews. Ama tazà gay Zəzagəla kà à azla Yahudiya pəra.
- <sup>20</sup>Ama azlaməna madiŋal gəl à vok anik uwana la Sipəre la azlauwana la Səren, tahəd à Antiyews, ŋgaha tazà gay marabəŋ lakəl aŋa Yesu Kristu à azlauwana azla Yahudiya aw.
- <sup>21</sup>Ndzəđa aŋa Sufəl Zəzagəla agà la atà, azladza aŋuvaw tapəh gay ləv ala, tadiŋ gəl à Sufəl Yesu à vok.
- <sup>22</sup>Mok uwana gay uwaga adatsən à azlaməna madiŋal gəl à vok la Urusalima kà, tasləl à atà Barnabas à awtəy à Antiyews.
- <sup>23</sup>Uwana adada à awtəy kà, arəb məŋga, kà uwana Zəzagəla apisà gay à azlaməna madiŋal gəl à vok à vok, kiya uwaga Barnabas adzərəđəh atà ala, kà atà aŋa mahoy yewdi aŋa Zəzagəla la manəfay la ləv tekula.
- <sup>24</sup>Barnabas kà dza delga gə, mahənlaga la ndzəđa aŋa Masasəđok Zəzagəla, ŋgaha la madiŋal gəl à vok. Azladza aŋuvaw tanəfà Sufəl Zəzagəla.
- <sup>25</sup>Barnabas ahəd kà mayəh Sawul la Tarsus.
- <sup>26</sup>Uwana adabəzal, asəlla à Antiyews. Atà səla nna, tadzà à ahəŋ mavay tekula la abatà, kà atà səla aŋa matapla azlaməna gay Zəzagəla la matsetsehəh atà ala aŋuvaw la Antiyews. La uwana, azlaməna matapla tadzəkà mazalalla la sləm: Azlaməna madiŋal gəl à vok.

<sup>27</sup>La zamana uwatà azlaməna mapəh à atà gay à ahàl aṅa Zəzagəla kà mapəh à azladza, tasàhà à waṅ la Urusalima, tadàh à Antiyews.

<sup>28</sup>Tekula aṅatà uwana sləm aṅha Agabus, atsizilla ala, la ndzəda aṅa Masasədok Zəzagəla agòd: "Magol may atsa à waṅ à gudəṅ à vok gesina." (Apakà vok la zamana makoray aṅa məṅ sufəl Kələd)

<sup>29</sup>Kiya uwaga azlaməna matapla tatsənà vok gay kà kəla uwabeyuwi aṅatà avà uwana aslāla vok kà masləl à azladedə uwana la may la abà la kutso Yahudiya.

<sup>30</sup>Uwana tadàh uwaga, tasləl Barnabas atà la Sawul kà madla sili uwaga à slaka azlamasiga la kutso Yahudiya.

## Sləray 12

<sup>1</sup>La zamana uwatà Sufəl Herod adzəkà matərəb azlaməna madiṅal gəl à vok,

<sup>2</sup>akədf Yakuba, deda aṅa Yuhana la katsakar.

<sup>3</sup>Uwana anəṅəṅ kà, akəs à azla Yahudiya à gəl kà, akəs Piyer aya. (Kaslà uwaga agà mavakay aṅa Pain uwana tatak makəsliṅ la tsəh aw)

<sup>4</sup>Bokuba uwana akəs à azla Yahudiya à gəl, à uwana Herod akəs Piyer, aduw à daṅay. "Nəṅəwla!", agòd à azlaslodzi. Atà azlaslodzi tatsək ala madzəga ufad, kəla slaka kà, slodzi ufad ufad, kà uwana asəl madalla à huma aṅa azladza à baṅa madəvaday Paska adədəv à gay.

<sup>5</sup>Azlaslodzi tanəṅla Piyer la daṅay, ama azlaməna madiṅal gəl à vok tada à huma à gay la madəv kudà à Zəzagəla la ləv tekula kokudà masakal.

<sup>6</sup>La mahənay uwana naka Herod adala Piyer à huma à azladza, Piyer la madzəhal gə la tataka azlaslodzi səla la abà, mawodəṅ à ahəṅ gə la mazakazak səla, ṅgaha azlaməna manəṅla bay atà la slaka aṅatà la abà la gay gamagəy.

<sup>7</sup>La kirim yewdi, malika aṅa Sufəl Zəzagəla apəhla vok ala, magol udfaka aùd la gəy daṅay la aku. Malika afetekà Piyer, atsənəṅ ala, agòdál: "Sà à afik, katskats!" Azlamazakazak tanəsal à ahàl ala.

<sup>8</sup>Ḍgaha malika agòdál: "Wàd parapara aṅak à tsəh, ṅgaha wàdàhà kwimik aṅak!" Piyer adàhəṅ kiya uwaga, ṅgaha malika agòdál: "Dùw dəbdebi aṅak à vok, ṅgaha kà nəfà gi!"

<sup>9</sup>Piyer asà à uda la gəy daṅay la aku la manəf malika. Asəl kà uwaga malika adəhəṅ kà dziriga aw. Gəl aṅha agòd kà: 'Masesiṅay la uwana asesiṅla à gi', agòd.

<sup>10</sup>Tatsəd à azlaslaka azlaməna manəṅla teraṅa la vok ala, azlamasəla la vok ala, ṅgaha tabəzà à gay gamagəy aṅa adà à vok, adà à huđ gudəṅ. Gamagəy uwaga apəzlla vok la ahàl aṅha la huma aṅatà, ṅgaha tasà à uda. Tadà à barama à ama. La abatà malika asək à Piyer à ahəṅ.

- 11**Uwana Piyer adavàh gəl ala lakəl aṅa uwana apakà vok kà, agòd: "Ndzer, Zəzagəla asləl malika aṅha à waṅ kà mapəl gi ala la ahəl aṅa Herod, ṅgaha la mawisiga uwana la abà gesina azla Yahudiya tayàhla gi kà madàhgəṅ à vok gesina."
- 12**Uwana adavàh gəl ala kà, ahəd à mtəga Mariyama, iyà aṅa Yuhana uwana tazalalla Mark, la slaka uwana azladza aṅuvaw tahamà gay à vok kà madəv kudà.
- 13**Piyer atsizilla à gay gamagày adəđəṅ, ṅgaha masla sləray misga, uwana sləm aṅha Rode, azà vok à gay gamagày à huđ kà mapəzlay.
- 14**Katskats asəl kuda aṅa Piyer, arəb məṅga, ama apəzl gamagày aw adùw vok à gày, kà mapəh à azladza kà Piyer la uda la gay gamagày.
- 15**"Kak kusoṅu!" Ama masla kà, agəđəṅ afik ndzer kà, bə masla. Dgaha tagòdal: "Uwaga malika aṅha!"
- 16**Tekedik Piyer asək à madəđ à gay gamagày aw. Uwana tapəzl gamagày tanəṅəṅ kà, tsa masla, ləv avàläh à atà à gay gesina.
- 17**Piyer adzilà ahəl à zagəla, akokòt à atà à ahəl à adi, kà atà aṅa madz à ahəṅ titi, ṅgaha adzəkà matugw à atà uwana Sufəl Zəzagəla adahəṅ kà masəla à uda la daṅay la abà. Agòd à atà aya: "Kadəpəhaw à Yakuba, ṅgaha à azladedə anik aya babay." La lig la ahəṅ, asà à uda, adà aṅha à slaka anik.
- 18**Uwana məl adawulla kà, gəl akəd à azlaslodzi à vok: "Kakay Piyer adà aṅha ma?", tagòdàh à vok.
- 19**Herod ayàh, ama aḃəzal aw. Anavàh azlaməna manəṅla la gay ala, ṅgaha avà tetəvi kà makad atà. La lig la ahəṅ masla à Herod ahəd, adzà à ahəṅ la Yahudiya ṅgaha la Samariya.
- 20**La mok uwatà kà, azlaməna gudəṅ Tir la azla Sədon tayàh matsən vok gay la Herod, kà uwana la abatà la uwana tabəz tatak may aṅatà. Kà uwana Herod la mapak ləv gə lakəl aṅatà. Tasà à waṅ, takəs dza anik uwana à ahəl, masla manəṅla huđ gày aṅa Sufəl, uwana sləm aṅha Bəlastus. Dgaha tahəd à slaka Herod kà manav məsəl vok.
- 21**La abatà Herod akədəv à atà kaslà à ahəṅ, kà mapəh à atà gay. La mavakay uwatà, atsòkw à lukut sufəl aṅha à abà, ṅgaha adzà madzay la kursi sufəl aṅha la afik, ṅgaha apəh à atà gay la kudà zləkkà.
- 22**Maham à ahəṅ dza agòd: "Uwaga kà mabadma aṅa dza asik aw", tagòd, "Ama aṅa zəzagəla."
- 23**Uwana Herod atsənà uwaga kà, adəđ à gay ləv. Gay gə la uwaga malika aṅa Zəzagəla adùwal dūvats à gəl, maduwari azùw à gay, ṅgaha aməts, kà uwana azləbà gəl aṅha bokuba Zəzagəla.
- 24**Kiya uwaga gay aṅa Sufəl Zəzagəla azigəṅ kaykay aya.
- 25**Mok uwana Barnabas atà la Sawul tadəvla sləray aṅatà à gay la gudəṅ Urusalima, tawùl à lig ṅgaha tazəb Yuhana uwana à tsəh, tazalalla Mark.



## Sləray 13

- <sup>1</sup>La tataka maham à ahəŋ məna gay Zəzagəla la abà la Antiyews kà, azlaməna mapəh à atà gay à ahəl la ahəŋ kà mapəh à azladza, ŋgaha la azlaməna matapla: Barnabas, Səmeyyon uwana sləm aŋha marsiga, Lutsəyus zil Səren, la Manayen uwana tazigən la slaka gə la Herod sufəl, ŋgaha Sawul.
- <sup>2</sup>La vərđi anik, uwana tadəv kudà à Zəzagəla la makəs nəlay, Masasəđok Zəzagəla agòđ à atà: "Bəkàw gi, azla Barnabas atà la Sawul à fəta à awtày kà mahənəŋ sləray uwana ala, gəzàlla atà ala."
- <sup>3</sup>Uwana takòđ gəl à madəv kudà la makəs nəlay, tabək atà à ahəl à gəl, ŋgaha tasləl atà à sləray à abà.
- <sup>4</sup>Bokuba uwana Masasəđok Zəzagəla asləl azla Barnabas atà la Sawul, tahəd à gudəŋ Səloyseya, la abatà tahəd à kəslah iyaw à afik kà maday à gudəŋ uwana à afik la tataka iyaw la abà, sləm aŋha Sipəre.
- <sup>5</sup>Mok uwana tabəzay à Salamin, tadzəkà mapəh gay Zəzagəla la azlagəy madəv kudà aŋa azla Yahudiya la aku, Yuhana, uwana tazalalla Mark, azlək atà la sləray.
- <sup>6</sup>Taguwà à uda la gudəŋ uwatà la abà tsəràh à Pafos. La abatà tabəzà məzla anik à gəl uwana sləm aŋha Bar-Yesu, zil Yahudiya. "Gi masla mapəh à gi gay à ahəl", agòđ, ama tsa fida.
- <sup>7</sup>Masla kà tasəl vok lela la sufəl aŋa gudəŋ uwatà. Sləm aŋa sufəl uwatà kà Sergiyus Pawlus, masla makor haŋkəli. Sufəl uwaga azàla Barnabas atà la Sawul kà matsən gay Zəzagəla la slaka aŋatà.
- <sup>8</sup>Ama məzla uwatà (Uwana tazalalla Elimas la gay Gərək) akəs atà aw. Ayàh madəđ gay à sufəl à ahəŋ kà matsən gay Zəzagəla, kà masla aŋa madiŋal gəl à vok aw.
- <sup>9</sup>Kiya uwaga Sawul uwana tazalalla Pol babay, agà mahənlaga la Masasəđok Zəzagəla, atsək yewdi à məzla uwaga à gay.
- <sup>10</sup>Ŋgaha agòđ: "Kak dēmdēm kahənla la makəsafər, kak kona aŋa seteni. Kak masla məzam aŋa tatak delga aŋa Zəzagəla gesina, kadàsakal à tsəh ala, ma mbà à mawis dziriga aŋa Sufəl Zəzagəla ala ma?"
- <sup>11</sup>Gəgod à ka, tsənəŋ lagwa Sufəl Zəzagəla adəđ kà: Kapək guləf, kanəŋla aw la tataka mahənay anik la abà aya aw." Katskats yewdi aŋa Elimas apək mərəzlakka tabadamma bokuba la vəd, taptap ayàh dza kà makəs à ahəl.
- <sup>12</sup>Uwana sufəl anəŋà uwaga apakà vok kà, adìŋ gəl à Zəzagəla à vok. Gay aŋa Sufəl Zəzagəla adəl à ləv à tsəh kaykay.
- <sup>13</sup>La abatà azla Pol tasà à uda la gudəŋ Pafos, tahəd à kəslah iyaw à afik kà mad à Perge la kutso Pamfiliya. La abatà la uwana Yuhana, uwana tazala Mark bay, asək atà à tsəh ala, awul à Urusalima.

- 14**Tatsilla ala la asik, dagay la Perge tahàd à Antiyews la kutso Pisədiya. La vudf maduw ləv tahàd à gày madəv kudà à agu, tadzàhà madzay.
- 15**Mok uwana tadzeṅay la wakità mapəhay aṅa azlaməna mapəh à atà gay à ahàl la abà, məṅga aṅa gày madəv kudà azàl à atà: "Azladeda, baṅa akul la gay kà mapəh à maham à ahəṅ dza, kà madzərədāh atà ala kà kaslawwalla vok aṅa mapəhay lagwa à dagay."
- 16**Pol atsizilla ala, adziyla ahàl à zagəla, agòd à atà: "Akul azla Isərayel la azlatsəhay dza anik uwana kasləkawaw Zəzagəla, tsəbàw gi sləm!"
- 17**Zəzagəla aṅa tsəhay gami Isərayel uwana atsatsàmànì azlababa gami madzidziga, azigənà tsəhay aṅha, mok uwana atà la mələk la Misəra, kiya uwaga asəlla atà à uda la Misəra la ndzədà aṅha məṅga.
- 18**Adzadzàr atà la kəsaf la abà mavay dzik ufad.
- 19**Azàṅ ala makoray mədəf la kutso Kanana, avà kutso uwatà à tsəhay aṅha.
- 20**Uwaga gesina adəhàṅ bokuba mavay dadərmokw ufad bəzi aṅha dzik zlo." "La lig aṅa uwaga la ahəṅ, Zəzagəla abək azlaməna seriya à azlababa gami madzidziga à ahəṅ, tsərəh à zamana aṅa masla mapəhal gay à ahàl Samuyel.
- 21**La lig la ahəṅ kà, tanavà maf à atà sufəl à ahəṅ ṅgaha Zəzagəla af à atà Sawlu à ahəṅ, kona aṅa Kis, uwana asà à uda la tsəhay aṅa Benyamin la abà, akòr mavay dzik ufad.
- 22**La lig la ahəṅ, Zəzagəla akweskà Sawlu, afà à atà David à ahəṅ kà sufəl. Apəh gay lakəl aṅha, agòd: 'Gedaḃəzal David kona Isay, dza uwana asà à ləv gulo, ṅgaha adədāhgəṅ uwana asa à gi gesina.'
- 23**Tekula la mayyi à tsəh ala aṅa David kà Yesu, à uwana Zəzagəla apakəṅ ala kà masla mabəl azlatsəhay aṅha Isərayel, kiya uwaga à uwana apəh à ahəṅ dagay uwarà.
- 24**Mok uwana Yesu à lig mas à waṅ kà, Yuhana agòd: 'Azla Isərayel, pəhàw gay la ləv ala, ṅgaha tadəhakullaṅ batem!', agòd à atà.
- 25**La kaslà uwatà à uwana, Yuhana adəḃəz makəd gəl à ahəṅ sifa aṅha kà, agòd à atà: 'Gi uwa, kagodāw uwa? Gi kà, gi dza uwana kakudaw aw. Ama fàw à sləm à abà, kà masla anəfa gi à tsəh à waṅ ṅgaha baməraka gi kà gəsla kà mapəl suwidf kwimik aṅha uwana ala, la asik aw.'
- 26**Azladeda, akul mayyi à tsəh ala aṅa Abəraham la azladza anik uwana kasləkawaw Zəzagəla. Gay aṅa mabəlay uwanay asəlla kà à slaka gami.
- 27**Ama azlaməna madz à ahəṅ la Urusalima, la azlaməṅga aṅatà kà, tatsənà godega aṅa Yesu aw, ṅgaha bay tatsənà mapəhay aṅa azlaməna mapəh à atà gay à ahàl uwana tadzəṅàh la azlagày madəv kudà la aku kəla vudf maduw ləv aw. Ama tagədà gay uwaga à afik la makəd Yesu.

- <sup>28</sup>Amiyaka tabəzà tetəvi kà madfukwlanj à ahəŋ kà makəɗay aw, bay kà tanavà Pilatus kà makəɗay.
- <sup>29</sup>Uwana tadəv uwana à gay tadəhàllàn à vok wakità Zəzagəla apəh lakəl aŋha gesina kà, tazəb à ahəŋ la ahàf la adi, tafà à zəvay à agu.
- <sup>30</sup>Ama Zəzagəla awùlla à uda la mamətsay.
- <sup>31</sup>Azlamavakay aŋuvaw apàhla vok à azlauwana tanəfà à waŋ la Galili tsərəh à Urusalima. Lagwa kà, atà la uwana azlaməna sayda aŋha la slaka azla Isərayel.
- <sup>32</sup>Anu la gəl gami mədasa à akul ala gay marabəŋ uwanay. Zəzagəla apəh à azlababa gami madzidziga, azla Yahudiya à ahəŋ.
- <sup>33</sup>Adagəɗəŋ à afik lagonay kà, anu azlamayyi à tsəh ala aŋha. La mawulla Yesu à uda la mamətsay, bokuba uwana tatsətsər à wakità aŋa mahabay masəla la abà: 'Kak bəzi gay ləv gulo, Lakana gədayyi ka.'
- <sup>34</sup>Aganay babay uwana Zəzagəla apəh à ahəŋ lakəl aŋa mawulla à uda aŋha la mamətsay, kà masla aŋa mazinla aw. 'Ndzer, gədàpisakulla gay à vok la ahəl gulo bokuba Uwana gəpəh à David à ahəŋ uwarà.'
- <sup>35</sup>Gay gə la uwaga David agòɗ la azlaslaka anik la abà: 'Iyay, kadəsaka dza aŋak la slaka mamətsay aw, kà mazinla aŋa dza aŋak aw.'
- <sup>36</sup>David kà, masla kà adəhà uwana asà à Zəzagəla tsərəh à mamətsay aŋha, tallà à makəla aŋa azlababa gami madzidziga ŋgaha azin ala.
- <sup>37</sup>Ama dza uwana Zəzagəla awùlla à uda la mamətsay kà, azin ala aw.
- <sup>38</sup>Azladeda, delga kasəlaw, anu məzakullaŋ kà, kà la Yesu la uwana Zəzagəla aməts tsakana à azladza ala. La masla la uwana Zəzagəla agəŋ azlauwana tadiŋ gəl à masla à vok sətaka, kà uwana mapəhay aŋa Musa kà aslā aw.
- <sup>40</sup>Lagwa kadəhaw haŋkəli lakəl aŋa uwana azlaməna mapəh à atà gay à ahəl tapəh kà aŋa mazəb akul aw:
- <sup>41</sup>'La kaslā aŋkul gədəɗəhəŋ sləray anik. Akul uwana kapəsewaw gay aŋa Zəzagəla, nərəzəw zlà, akul azlaməna mapəsew gay Zəzagəla, ləv aval à akul à gay, kamətsaw à gay kà sləray uwana gədada à ahəŋ la zamana aŋkul, kà uwana amiyaka tatapəhakulla godega aŋha bay kà naka kakəsaw aw.'"
- <sup>42</sup>Mok uwana Pol atà la Barnabas tasà à lag la gəy madəv kuɗa la aku kà, tagòɗ à atà kà, tadəwul à waŋ la vuɗ maduw ləv anik aya kà mapəh à anu lakəl aŋa uwaga aya gotənaŋ, tagòɗ à atà.
- <sup>43</sup>Mok uwana azladza tasləh ala, aŋuvaw la tataka azla Yahudiya la abà, ŋgaha la azlauwana tabəɗla vok à tsəhay Yahudiya à abà, tanəfà Pol atà la Barnabas. Azla Pol tadzərəɗəhàtəla kà matsizl à delga uwana à afik, Zəzagəla asəl madəhatəŋ.
- <sup>44</sup>La vuɗ maduw ləv azladza la gudəŋ uwatə gesina tahamà gay à vok kà matsən gay Sufəl Zəzagəla.

<sup>45</sup>Uwana azla Yahudiya tanəŋà maham à ahəŋ dza kiya uwaga kà, atà maŋor akəsà atà, tafà guvəl à uwana à adi Pol apəh, ŋgaha tatsəkəl magodəhay à Pol à gəl.

<sup>46</sup>Pol atà la Barnabas tagòd à atà la paraka: "Azlayla kà vok, kà gay Zəzagəla agay mapəh à akul gà dadəŋ. Ama tsa kakwesawka gay sifa adəv gay aw kà, məday mədàziŋ à azladza uwana azla Yahudiya aw zlà.

<sup>47</sup>Aganay mafəh akur à ahəŋ, uwana Sufəl Zəzagəla afəhà à gi à lig, agòd: 'Gəfà à ka à ahəŋ, kà ka aŋa magay udəka aŋa azladza, kà ka aŋa maz gay mabəlay à azladza uwana la makəf gəl à ahəŋ gudəŋ à vok gesina.'"

<sup>48</sup>Mok uwana azlauwana azla Yahudiya aw tatsən uwaga kà tarəb. Tadzəkà mazləb gay aŋa Sufəl. Azlauwana Zəzagəla atsatsəmàni atà gesina kà, atà aŋa mabəz sifa adəv gay aw kà, tadiŋal gəl à vok.

<sup>49</sup>Gay Sufəl Zəzagəla asləhà gəl à ahəŋ la kutso uwatà la abà gesina.

<sup>50</sup>Ama azla Yahudiya tavətsəhəhə azlamis uwana ala sləm aŋatà la ahəŋ, azlauwana tasləkəw Zəzagəla, la azlagadamola aŋa gudəŋ uwatà gesina, ŋgaha tayəh azla Pol la magazlay tsərəh à uwana takudəkəh atà à uda la makoray aŋatà la abà.

<sup>51</sup>Azla Pol atà la Barnabas tagòd: "Gay gami la abà aw", tagòd. Tadēf à atà burburu aŋa gudəŋ aŋatà à adi, ŋgaha tahəd aŋatà à Ikoniyum.

<sup>52</sup>Baməraka takudəkəh azla Pol la Antiyews bay kà, azlaməna matapla la gudəŋ uwatà tagà la marabay, ŋgaha tahənà ala la Masasəfok Zəzagəla.

## Sləray 14

<sup>1</sup>Uwana Pol atà la Barnabas tabəzà Ikoniyum, tahəd à gəy madəv kudà à agu, bokuba uwana tadəhəŋ la Antiyews babay, tsərəh à uwana gay məŋga aŋa azla Yahudiya la azlauwana azla Yahudiya aw tadiŋal gəl à vok.

<sup>2</sup>Ama azla Yahudiya uwana takweskà madiŋal gəl à vok, tavədzəhəhə azladza uwana ala, atà azla Yahudiya aw, kà atà aŋa madzugw mawisiga lakəl azladedə uwaga.

<sup>3</sup>Pol atà la Barnabas tadzà à ahəŋ məŋga la Ikoniyum, tapəh gay Sufəl Zəzagəla la dazwaya. Tazə gay lakəl aŋa vok mahamay aŋha, ŋgaha Sufəl avà à atà ndzədə kà madəh azlamasəlay la azlanadzipo, kà mapəhla ala kà gay aŋatà kà dziriga.

<sup>4</sup>Azladza gudəŋ uwaga tatsək ala. Azlaanik tagà aŋa azla Yahudiya, ŋgaha azlaanik tagà aŋa azlaməna asik.

<sup>5</sup>Azla Yahudiya la azladza uwana azla Yahudiya aw, la azlasufəl aŋatà, tadəhà vok à ahəŋ kà matərəb azla Pol kà aŋa makəf atà la matsəh atà la akur.

<sup>6</sup>Uwana azla Pol tadatsən uwaga kà, tahòy aŋatà, tanəfà tetəvi uwana adà à Lisətəra la Derbe, la makoray aŋa Likawoniya la abà.

<sup>7</sup>Tadzəkà maz gay marabəŋ à azladza la abatà.

- <sup>8</sup>La Lisətəra dza anik la ahəŋ adzà à ahəŋ kà la slaka madza madzay, kà uwana magul à afik gə dagay mayyay, aslāla vok adaday la asik aŋha, amiyaka asik tekula aw.
- <sup>9</sup>Vərdi anik kà, atsəḅ sləm à uwana Pol apəhay. Pol atsəkəl yewdi à gay ŋgaha anərəz kà masla la madiŋal gəl à vok, aslāla vok kà mawurla.
- <sup>10</sup>Kiya uwaga agòḍal, la kuda zləkkà: "Sà à afik, tsizilla à asik aŋak à gay, dzawwa!" Hadzak, dza uwaga atsizilla à asik aŋha à gay, adzəkà maday.
- <sup>11</sup>Uwana maham à ahəŋ dza adanəŋ uwaga Pol adəhəŋ kà, tadzəkà mawiyay la gay gudəŋ aŋatà, gay Likawoniya: "Azlazəzagəla kà, tadapakəh azladza gə adagay, ŋgaha tasà à tataka gami à abà la vədəh!"
- <sup>12</sup>Tazàla à Barnabas Tsoys, sləm aŋa mazlazlay aŋatà, ŋgaha Pol bay kà, Herməs tagòḍal, kà uwana masla kà masla mapəh gay.
- <sup>13</sup>Masla mav tatak à Zəzagəla Tsoys, uwana la slaka mazlazlay kà, la gay gamagəy aŋa mad à gəy à huḍ gudəŋ, asəlla azlakokur à waŋ, tatsafəḍəh atà gəl à uda la azlamawuratatay à gay gamagəy aŋa gəy mazlazlay, asəl kà maham à ahəŋ dza takəḍ tatak à azla Barnabas atà la Pol.
- <sup>14</sup>Mok uwana tatsən uwaga, takohəhə lukut à vok, tahòy à tataka maham à ahəŋ dza à abà la mawiyay:
- <sup>15</sup>"Azlaslawda, kà mana kadəhəw uwanay mi, anu bay kà anu azladza asik bokuba akul miya! Məsà à akul ala gay marabəŋ à waŋ kà mawulla akul à gəl kà akul masak azlamazlazlay deydayga uwana kanəfaw lagwa, ŋgaha kà akul magola vok à slaka Zəzagəla, uwana la sifa, masla uwana adəhə zagəla la kutso, la azlamukwə ŋgaha la azlatatak uwana la abà gesina!fa
- <sup>16</sup>La zamana uwana uwarə kà, asək azlatsəhay gesina kà manəf tetəvi aŋa gəl aŋatà.
- <sup>17</sup>Tekedik kà, apəlla vok à azladza la azlasləray aŋa dzəḅa aŋa səla aw gə uwana adəhəŋ: Asùw akul iyaw, kaləw tatak la kaslā aŋha, avà à akul tatak may ŋgaha ahənà ləv akul ala la marabay."
- <sup>18</sup>Baməraka la mapəhay kiya uwaga babay kà, la zlazladə tadəḍf gay à maham dza à ahəŋ kà makəḍ tatak.
- <sup>19</sup>La kaslā uwatà, azla Yahudiya anik tasà à waŋ la gudəŋ Antiyews la kutso Pisədiya ŋgaha la Ikoniyum. Tavədzəh à tsəh azlamaham à ahəŋ dza à afik, tatsəh Pol la akur kà makaday, ŋgaha tasəpəḗr à uda la gudəŋ la abà kà uwana tadzùgw kà: 'Adamətsay', tagòḍ.
- <sup>20</sup>Ama uwana azlaməna madiŋal gəl à vok tahamə gay à vok lakəl aŋha kà, asà à afik, awùl à gudəŋ à abà. La bebəŋ gə kà, tahəḍ à Derbe atà la Barnabas.
- <sup>21</sup>Pol atà la Barnabas tazə gay marabəŋ la Derbe la slaka uwana tabəzà azladza aŋuvaw kà aŋa Yesu. Ŋgaha tawùl à Lisətəra, à Ikoniyum, à Antiyews uwana la kutso aŋa Pisədiya la abà.

<sup>22</sup>Kəla gudəŋ uwana tadàhà à abà kà, tadzərə̀dàhà azlaməna madiŋal gəl à vok ala, kà matsizl à madiŋal gəl à vok à afik. "Haday kà, mad à makoray Zəzagəla kà, say maguw à uda kà la azlamagol ŋgərpa la abà dadàŋ."

<sup>23</sup>La kəla maham à ahəŋ məna gay Zəzagəla kà, tatsatsàmàhàni azladza kà mapak atà ala kà azlamasiga. Ŋgaha takəs nəlay, tadəv kudà kà aŋa azlaməna madiŋal gəl à vok, ŋgaha tabək à atà à ahàl aŋa Sufəl Zəzagəla, à uwana tadiŋal gəl à vok, tadà aŋatà.

<sup>24</sup>Tagùw à uda la kutso Pisədiya la abà ŋgaha tabəzà kutso Pamfiliya.

<sup>25</sup>Tazà gay Zəzagəla la Perge, la lig la ahəŋ tahàd à Ataliya.

<sup>26</sup>Dagay la abatà tadà à kəslah iyaw à afik, tahàd à Antiyews la gudəŋ uwatà la uwana tabək à atà à ahàl aŋa Zəzagəla, kà masla mav à atà vok mahamay kà aŋa sləray aŋha, sləray uwaga kà tahənàŋ ala lagwa.

<sup>27</sup>Mok uwana tabəzay à Antiyews, tahamà gay azlaməna madiŋal gəl à vok à vok gesina, ŋgaha tatùgw à atà uwana apakà vok la atà gesina, uwana Zəzagəla adàhàŋ la atà, la mapəzl tetəvi à azladza uwana azla Yahudiya aw, kà atà aŋa madiŋal gəl à vok babay.

<sup>28</sup>Tadzà à ahəŋ mənŋa la azlaməna madiŋal gəl à vok la abatà.

## Sləray 15

<sup>1</sup>Azladza anik tasà à waŋ la Yahudiya, tahàd à Antiyews, tagòd à azladedà: "Kaslawwalla vok kà mabəlay aw, say baŋa kakədəwaw vok à uda, bokuba uwana mapəhay aŋa Musa apəh dāŋ."

<sup>2</sup>Pol atà la Barnabas takəs aw, tabayà vok gay lakəl aŋa uwaga. Tasləl Pol atà la Barnabas ŋgaha la azladedà anik la Antiyews, kà madla atà à Urusalima kà mapəhay lakəl aŋa gay uwaga la azlaməna matapla la slaka aŋa Yesu, la azlamasiga.

<sup>3</sup>Kiya uwaga azlaməna madiŋal gəl à vok tasləl atà. Taguwà à uda la Fenesəya la Samariya la mapàhla ala gay magola vok aŋa azlauwana azla Yahudiya aw à slaka Zəzagəla. Gay mawga uwaga kà, avà marabay à azladza gesina.

<sup>4</sup>Mok uwana tabəz à Urusalima, azlaməna matapla la slaka aŋa Yesu, la azlamasiga, ŋgaha la azlaməna madiŋal gəl à vok takəs atà la ahàl səla, ŋgaha azla Pol tapəh à atà tatak uwana Zəzagəla adàhàŋ la atà gesina.

<sup>5</sup>Ama azlaməna madiŋal gəl à vok anik, uwana taguwà à uda la maham à ahəŋ aŋa azla Farisəya la abà kà, tagòd kà: "Say makadav azlaməna madiŋal gəl à vok uwana à uda azla Yahudiya aw, ŋgaha mətapatàla aya makəs mapəhay aŋa Musa dadàŋ kəla."

<sup>6</sup>La abatà azlaməna matapla la slaka aŋa Yesu, la azlamasiga tahamà gay à vok kà manərəz gay uwaga.

<sup>7</sup>La lig mavats gay mənŋa uwaga la ahəŋ, Piyer asà à afik, agòd: "Azladedà, kasəlaw kà Zəzagəla akəsàni gi la tataka aŋkul la abà dagay uwarà, kà gi aŋa maz gay marabəŋ

à azladza uwana azla Yahudiya aw. Kà atà aña matsənəŋ, ŋgaha kà atà aña madiŋal gəl à vok bay.

<sup>8</sup>Zəzagəla uwana masla masəl madzugway aña ləv aña azladza gesina, apəhla ala kà awoyà azladza uwaga babay, avà à atà Masasəfok aña bokuba uwana avà à anu babay.

<sup>9</sup>Zəzagəla avàhànula la atà aw: Agà ləv aña atà sətaka, kà uwana tadiŋal gəl à vok.

<sup>10</sup>Ŋgaha ma, kà mana lagonay kà, katàpàw Zəzagəla la maf atà magol mahanay mənğa à gəl ma? Baməraka anu, la azlababa gami madzidziga kà məslàla vok aña mazəbay tekedik aw ma?

<sup>11</sup>La madiŋal gəl à Sufəl Yesu à vok kà, vok mahamay aña la uwana mədàbəlay, kiya uwaga babay la atà aw takay?"

<sup>12</sup>Kiya uwaga maham à ahəŋ dza adzà à ahəŋ titi, tatsəb sləm à Barnabas atà la Pol uwana tapəh à atà azlanadzipo uwana Zəzagəla adàhàhəŋ la ahəl aña atà la tataka aña azladza uwana la abà, azla Yahudiya aw.

<sup>13</sup>Mok uwana takəd f gəl à mabadma, Yakuba abəd f à gay à gay agòd: "Azladeda, tsəbàw sləm dən!"

<sup>14</sup>Səmon atùgw lakəl aña Zəzagəla bokuba uwana akəs azladza uwana azla Yahudiya aw, dagay la mok uwana Zəzagəla akàsàni azladza anik aña atà, kà atà magay azlaaŋha.

<sup>15</sup>Ŋgaha mapəhay aña azlaməna mapəh à atà gay à ahəl agagəm la uwaga. Kiya uwana matsetseray agòd:

<sup>16</sup>'La lig aña uwaga la ahəŋ, Sufəl Zəzagəla agòd: 'Gədàwul à waŋ, Gədəŋal ŋvagay aña David uwana akàläh à ahəŋ, Gədətsizl uwaga ala.

<sup>17</sup>Ŋgaha kà pəra, azladza gesina kà mayàh gi.' Sufəl Zəzagəla agòd. 'Tsəhay gesina uwana gəzàl atà, atà magay azlagulo.'

<sup>18</sup>Kiya uwaga à uwana Sufəl Zəzagəla agòd, à uwana apəhla uwaga ala dagay uwarà la viyaŋu."

<sup>19</sup>Gay gà la uwaga Yakuba azàlən à gəl, agòd: "Gi kà madzugway gulo kà, asa à gi makad gəl à azlatsəhay anik uwanay à vok tagolà vok à slaka Zəzagəla aw.

<sup>20</sup>Ama ŋuləm mətsetser à atà, kà tapad sləb uwana tadàhla matuwlay la mazlazlay aw, kà uwana uwaga kà mawisiga, tafàhàh mabila aw, tapad tatak uwana tasufàŋ ala masufay aw, tasa aŋiz aw, kà uwana uwaga kà mawisiga.

<sup>21</sup>Kay dagay uwarà kà, azladza tapəh mapəhay aña Musa la kəla gudəŋ aña tadzəŋàh la kəla vud maduw ləv la gəy madəv kudà la aku!"

<sup>22</sup>Kiya uwaga azlaməna matapla la slaka aña Yesu, la azlamasiga, la azlaməna madiŋal gəl à vok takəs matsatsamani azladza anik la tataka aña atà la abà kà, kà masləl atà la azla Pol la Barnabas à Antiyews. Yahuda uwana tazàlalla Barsabas atà la Silas, atà səla nna azlaməna madiŋal gəl à vok masəl atà gà.

- <sup>23</sup>Taslèl atà la wakità uwaga la ahàl: "Anu azlaməna matapla la slaka aña Yesu, la azlamasiga la uwana mətsetser à akul. 'Ayyi', məgodf à akul, akul azlaməna madiŋal gəl à vok, uwana akul azla Yahudiya aw la Antiyews ŋgaha la azlauwana la kutso Səriya la Səlisəya.
- <sup>24</sup>Mətsənəŋ kà azladza anik tasà à uda la tataka gami la abà la abanay, tadà à awtày kà makadəkulla gəl à vok, ŋgaha la mav à akul madzugway la gay aŋatà. Anu kà, məpəh à atà gay à ahàl lakəl aña uwaga aw.
- <sup>25</sup>Gay gə la uwaga, gesina gami, məkàsàni azladza kà masləl à akul à awtày, talakà azladedə gami mawoy atà gə uwaga à awtày Barnabas atà la Pol,
- <sup>26</sup>uwana tadùw sifa aŋatà ala kà sləray aña Sufəl Yesu Kristu.
- <sup>27</sup>Məsləl akul azla Yahuda atà la Silas à awtày, tadəpəh à akul lakəl aña uwana mədətsetseray la abanay lagwa.
- <sup>28</sup>Akəs à Masasəđok tsikasla la gəl anu gesina gami, məkəs kà manəf akul, akəs à maham à ahəŋ anik à gəl aya aw, say uwanay məpəh la uwana akəsà vok pəra.
- <sup>29</sup>Kapadaw sləb matulay aw, la aña mazlazlay aw; kasaw aŋiz aw, kapadaw sləb aña tatak uwana tasufaŋ ala masufay aw, kadaw à gəl gaw aw. Baŋa kasakaw uwaga la tsəh ala gesina kà, kà kadàhàw delga. Mədzà à ahəŋ wurwur zlà!"
- <sup>30</sup>Mok uwana tavà à atà wakità uwaga: "Dàw zlà!", tagòd à atà. Azlaməna masləlay tahəd, tabəzà à Antiyews. La abatà tahamə gay azlaməna madiŋal gəl à vok à vok gesina, ŋgaha tavà à atà wakità uwatà.
- <sup>31</sup>Atà tadzəŋ, ŋgaha adzərəđàhàtəla, tarəb kaykay lakəl aŋha!
- <sup>32</sup>Yahuda atà la Silas tagə azlaməna mapəh à atà gay à ahàl kà mapəh à azladza, la gəl aŋatà tavəts gay məŋga la azladedə kà madzərəđàh atà ala la mav à atà ndzəđà.
- <sup>33</sup>Uwana tasafay la abatà, azladedə talakà atà: "Dàw la wurwur zla!", tagòd à atà, ŋgaha tawùl à slaka azladza uwana taslèlla atà à waŋ.
- [<sup>34</sup>Ama Silas kà, kà ayəh madz à ahəŋ la abatà.]
- <sup>35</sup>Tekedik Pol atà la Barnabas tasəf la Antiyews, La azladza anik aŋuvaw, tapəhəhla azladza la maz gay aña Sufəl Zəzagəla.
- <sup>36</sup>Uwana tadadza à ahəŋ ŋuv, Pol agòd à Barnabas: "Məwùləw, mədànaŋaw azladedə à gay la azlaslaka uwana məzəhəw gay aña Sufəl Zəzagəla, kà anu aña masəl madz à ahəŋ aŋatà."
- <sup>37</sup>Barnabas kà, asəl madla Yuhana uwana tazalalla Mark la tsəh.
- <sup>38</sup>Ama Pol akəs kà madalla aw, kà uwana vərđi anik kà, asək atà à ahəŋ la kutso Pamfiliya, awùlla atà à tsəh ala la sləray aŋatà la abà.
- <sup>39</sup>Mapak ləv adà à tataka aŋatà à abà. Tavəhəla tsərəh à uwana Barnabas azəb Mark, tahəd à kəslah iyaw à afik kà maday à Sipəre.



<sup>40</sup>Pol azèb Silas. Ìgaha azlamèna madiṅal gəl à vok tadèv kudà kà atà, kà Zəzagəla aṅa mavàhàh à atà vok mahamay aṅha, ṅgaha tatzilla ala.

<sup>41</sup>Pol ahàd à kutso Səriya la Səlisəya, adzərèdàhà azlamèna madiṅal gəl à vok ala la madiṅal gəl à vok la abà.

## Sləray 16

<sup>1</sup>Pol abəzà Derbe ṅgaha à Lisətəra. La abatà masla madiṅal gəl à vok anik la ahəṅ, sləm aṅha Timotawus. Iyà aṅha kà dæg zla Yahudiya, masla madiṅal gəl à vok. Ama baba aṅha kà tsəhay zil Gərək.

<sup>2</sup>Azladeda uwana la Lisətəra ṅgaha la Ikonyum gesina kà, tafà madzugway aṅatà kà à masla à afik.

<sup>3</sup>Pol asəl mazəb Timotawus kà magay manalay aṅha. Kà maday atà səla kà, akədèv à uda dadàṅ. Adàhàṅ kiya uwaga kà, kà uwana azla Yahudiya uwana tadzà à ahəṅ la abatà gesina kà, tasəl kà baba aṅa Timotawus kà zil Yahudiya aw.

<sup>4</sup>Kəla gudəṅ uwana tagùwàh la abà kà, tapàh à azlamèna madiṅal gəl à vok, tatak uwana azlamèna matapla la slaka aṅa Yesu, la azlamasiga la Urusalima tapèh, ṅgaha tafàh à atà akur à lig kà makəs mapəhay uwatà lela.

<sup>5</sup>Kiya uwaga mənə madiṅal gəl à vok tadzərèdàhà ala la madiṅal gəl à vok la abà, ṅgaha matugway aṅatà azàhàla vok à gəl kəla mahəṅay.

<sup>6</sup>Ama Masasəfok Zəzagəla adəf à atà gay à ahəṅ kà maz gay Zəzagəla la kutso Asəya, kà uwaga à uwana taguwà à uda la Fərizi la Galatiya.

<sup>7</sup>Mok uwana tabəzà Misiya kà, asà à atà mad à kutso Bitiniya à abà, ama Masasəfok aṅa Yesu avà à atà tetəvi gotəṅaṅ aw.

<sup>8</sup>Kà uwaga taguwà la Misiya, ṅgaha tadà à ahəṅ à gay dərəv la Tərowas.

<sup>9</sup>La huɸ aṅa vəd masesiṅay asesiṅla Pol. Anəṅà zil Makeduniya atsizilla à ahəṅ, adəval kudà: "Guwà à waṅ la Makeduniya kà mazlak anu!", agòdàl.

<sup>10</sup>Katskats la lig aṅa masesiṅay uwaga la ahəṅ, məyàh tetəvi kà maday à Makeduniya. Məsəl kà Zəzagəla azàla anu kà maz gay marabəṅ à azladza la kutso uwatà la abà haɸay.

<sup>11</sup>Mətsizilla ala la gudəṅ Tərowas la kəslah iyaw, tərəra, məhàd à gudəṅ uwana à afik la tataka iyaw la abà, sləm aṅha Samotəras, la bebəṅ gà məzlaṅàl la Neyapoləs.

<sup>12</sup>Dagay la abatà la uwana, məhàd à Filipiya uwana gudəṅ teraṅa la makoray Makeduniya, slaka madz à ahəṅ aṅa azla Rom. Mədzà à anu à ahəṅ la abatà.

<sup>13</sup>La vuɸ maduw ləv mədà à uda la gudəṅ la abà kà mayàh slaka madəv kudà aṅa azla Yahudiya la gay mukwà. Mədzàhà madzay ṅgaha mətapla azlamis uwana tahamà gay à vok la abatà.

**14** Tekula la tataka aña azlamis uwatà la abà, sləm aṅha Lidiya, asà à waṅ la gudəṅ Tiyatir, masla matsakal azlasana, uwana iyaw aṅha zlazlada, masla mahoy adi aña Zəzagəla babay. Atsəb anu sləm, ṅgaha Sufəl Zəzagəla azàla haṅkəli kà masla aña maf sləm à uwana Pol apəhay.

**15** La abatà tadàhalla batem la azlaməna huɸ gay aṅha gesina, azàla anu à mtəga aṅha la magodāy: "Bokuba uwana tsa kasəlaw kà gədadiṅal gəl à Zəzagəla à vok la dziriga kà, sàw à waṅ, kadzaw à ahəṅ la mtəga gulo", agòɸ à anu. Afà anu leri à gəl.

**16** Vərđi anik la ahəṅ uwana mədà à slaka madəv kudà kà, məgagəm la dugu mayà gə, uwana la masasədok mawisiga lakəl. Apàhàh tatak uwana adàpaka vok la huma la gay, la mapàh tatak uwaga kà, adabəz sili kà aña məṅga aṅha.

**17** Adzəkà manəf anu la tsəh, awiyaa agòɸ: "Azladza uwanay kà, azlaməna sləray aña Zəzagəla uwana kərkər la afik! Tapəhakulla tetəvi uwana Zəzagəla adàbəla akul!"

**18** Apəhàh uwaga mavakay dəṅ. La makəɸ gəl à ahəṅ, Pol adāy vok, agolà vok à slaka aṅha, agòɸ à masasədok mawisiga: "Kak masasədok mawisiga, la sləm aña Yesu: Sà à uda la masla la abà, gəgòɸ à ka!" La kirim yewdi masasədok asà à uda.

**19** Mok uwana azlaməṅga aña dugu mayà uwaga tanəṅəṅ kà tabəz sili aya aw kà, takàs azla Pol atà la Silas ṅgaha tabayà atà à vadavaday kasukwa à afik tsərah à huma aña azlaməṅga aña gudəṅ.

**20** Tadàla atà à slaka azlagumna aña azla Rom ṅgaha tagòɸ: "Azladza uwanay kà, tatsàlla magazlay à gudəṅ gami à abà, atà kà, azla Yahudiya.

**21** Ḷgaha tapàhla mapəhay uwana ala wakità seriya gami avəra gay à azladza, anu uwana anu azla Rom, kà manəfay la makəsay."

**22** Maham à ahəṅ dza ahamà atà à gəl. Azlagumna tahəl lukut aña Pol atà la Silas, ṅgaha tavà tetəvi kà mazlabàh atà la kurpi.

**23** Uwana tazlèbàh atà la kurpi kà, tawits atà à daṅay, ṅgaha tafàhà akur à azlaməna manəṅla à atà à lig kà, kà manəṅla atà lela.

**24** Uwana masla manəṅla atà adatsən gay uwaga kà, awits atà à daṅay huɸ gə à agu, ṅgaha abək atà sasala à asik.

**25** La huɸ aña tataka vəɸ azla Pol atà la Silas tadəv kudà, ṅgaha tahəb kà mazləb Zəzagəla; azlaməna daṅay anik tatsənà atà babay.

**26** Katskats kutso abəlàkà vok məṅga məṅga, baməraka matatukway aña gày kà abəlàkà vok, katskats azlagamagày tapàzlla vok, ṅgaha la kità bay, azlasasala la azlamazakazak tapallàhà à vok à azlaməna daṅay la vok ala kokudà gəl aṅatà.

**27** Masla manəṅla azlaməna daṅay atsənà ala. Uwana anəṅəṅ kà gamagày aña gày daṅay mapazl vok gə, abəɸ katsakar aṅha kà makəɸ vok, kà uwana adzùgw kà, azlaməna daṅay tahoyay.

**28** Ama Pol awiyà la ndzəɸa: "Kay, kakəɸ vok aṅak aw, anu gesina gami la ahəṅ!"

- <sup>29</sup>Masla manəŋla uwaga anəv akəl, ahəd à gày daŋay à agu la katskats la masəkulay la abà kà guba, atəď à makəla asik aŋa azla Pol atà la Silas.
- <sup>30</sup>Ŋgaha asəlla atà à uda, anavà atà: "Azlaməŋga gulo, mana gədehəŋ kà gi aŋa mabəlay ma?"
- <sup>31</sup>Tawulàlla: "Dìŋ gəl à Yesu à vok, ŋgaha kabəlay, kak la huď gày aŋak gesina!"
- <sup>32</sup>Ŋgaha tazàla gay aŋa Sufəl Zəzagəla la azlaməna huď gày aŋha gesina.
- <sup>33</sup>Masla manəŋla gày daŋay uwaga, ahəl atà à uda la vuď uwatà, ŋgaha apəlàh azlaamik aŋatà. La lig la ahəŋ tadàhalla batem la azlaməna huď gày aŋha gesina.
- <sup>34</sup>Adàla azla Pol la Silas à gày aŋha à agu, ŋgaha avà à atà tatak may. Zil uwaga la azlaməna huď gày aŋha gesina tahən ala la marabay, kà uwana tadiŋ gəl à Zəzagəla à vok.
- <sup>35</sup>Mok uwana məl adawula, azlagumna aŋa azla Rom, tasləl dza à slaka masla manəŋla gày daŋay la magodəl: "Sàk azladza uwaga, tahəd aŋatà", tagòďal.
- <sup>36</sup>Masla manəŋla asà à waŋ, apəh à azla Pol, agòď à atà: "Azlagumna tav tetəvi kà mawits akul à gəl. Kaslawwalla vok aŋa mas à uda, kà madiy aŋkul la lapiya."
- <sup>37</sup>Ama Pol agòď à azlaməna masləlla atà à waŋ: "Lakuhu tazləbàh anu la vadavaday kasukwa la afik, ŋgaha kà pəra tawits anu à gəl kokudà madàh seriya gami, tsa anu babay kà, anu azla Rom kà pəra, tawits anu à gəl, la gəl à gəl ma kà mana mi?! Kiya uwaga aw! Say atà la gəl aŋatà tatsa à waŋ kà mapəl anu ala, kəla!"
- <sup>38</sup>Azlaməna masləllay tawùlla à gay uwaga à azlagumna Rom. Ama guba akəs atà kaykay kà uwana tatsənəŋ kà Pol la Silas kà azla Rom.
- <sup>39</sup>Kiya uwaga, atà tasà à waŋ tadəv atà kudà, ŋgaha tasəlla atà à lag la gày daŋay la aku, ŋgaha aya tadəv atà kudà kà mas à uda la kutso aŋatà la abà.
- <sup>40</sup>Uwana Pol atà la Silas tadasa à uda la daŋay, tahəd à mtəga Lidiya dadəŋ. Uwana tanəŋ azladeda la abatà tadzərəďàhàtəla, ŋgaha tahəd aŋatà.

## Sləray 17

- <sup>1</sup>Tanəfà tetəvi uwana aguwà la Amfipolis la Apoloniya ŋgaha tabəzà Tesaloniki. Gày madəv kudà aŋa azla Yahudiya la ahəŋ la abatà.
- <sup>2</sup>Bokuba uwana adagay zagəla aŋa Pol, ahəd à gày madəv kudà à agu. Mavakay maduw ləv makər, Pol atsanà vok gay atà nna lakəl aŋa wakità Zəzagəla.
- <sup>3</sup>Atəpàhàtəla la madzərəďàhàtəla, kà akəsà vok kà Kristu asà ŋgərpa, ŋgaha awùl à uda la mamətsay, Pol agòď à atà: "Yesu uwanay gəpəh à akul kà, Kristu gə la uwaga."
- <sup>4</sup>Azladza anik la tataka aŋatà la abà takəs uwaga, tanəfà Pol atà la Silas. Azla Gərək uwana tahòy yewdi aŋa Zəzagəla la azlamis huď gudəŋ uwana sləm aŋatà la ahəŋ aŋuvaw.

- <sup>5</sup>Ama azla Yahudiya tahèn ala la mañor. Kiya uwaga tahamà gay azlabudfaray à vok, tawiyà kà maf à tsəh à maham à ahəŋ dza à afik la magazlay la huɔ gudəŋ. Tahàd à mtəga Yason kà mayàh azla Pol atà la Silas, kà madla atà à huma aña azlaməna sawaray.
- <sup>6</sup>Uwana tabèz azla Pol la abatà aw kà, tabayà Yason la azladedà anik à huma aña azlaməŋga aña gudəŋ, ŋgaha tadzəkà mawiyay: "Azladza uwana tawis gudəŋ à vok ala kà, atà, la uwanay tabəzà à abanay lakana.
- <sup>7</sup>Yason akəs atà à mtəga aña, azladza uwaga gesina tapəsèw mapəhay aña sufəl aña Rom, kà uwana tapəhay kà məŋ sufəl anik la ahəŋ, uwana sləm aña Yesu", tagòɔ.
- <sup>8</sup>Gay uwaga avədzhàhà à tsəh à maham à ahəŋ dza à afik la azlaməŋga aña gudəŋ.
- <sup>9</sup>Kiya uwaga azlaməŋga tafà leri à azla Yason à gəl kà tapəl sili dən kà maduw atà à gəl.
- <sup>10</sup>Uwana vɔɔf adasa à waŋ, azladedà tagòɔ à Pol atà la Silas: "Dàw aŋkul à Bere!", tagòɔ à atà. Mok uwana tabəzà abatà kà, tahàd à gày madəv kudà aña azla Yahudiya à agu.
- <sup>11</sup>Azlauwanay kà madzugway aŋatà kà delga, kà azla Yahudiya aña Tesaloniki, takəs gay Zəzagəla la ahəl səla, kəla mavakay tamədzèdàh huɔ aña wakità, kà masəlay à baña uwana Pol apəhay kà dziriga.
- <sup>12</sup>Ŋgaha aŋuvaw la tataka aŋatà la abà tadiŋal gəl à vok. Azla Gərək la azlamis uwana sləm aŋatà la ahəŋ, la azlazil tadiŋal gəl à vok.
- <sup>13</sup>Ama uwana azla Yahudiya uwana la Tesaloniki tatsənəŋ kà Pol apəh gay Zəzagəla la Bere kà, tasà à waŋ la maham à gay azladza à vok, kà mavədzhàh azladza ala.
- <sup>14</sup>Kiya uwaga azladedà tadàla Pol à gay dərəv, ama Silas atà la Timotawus tagòɔ à Bere.
- <sup>15</sup>Azlauwana talakà Pol, tabəzla tsəràh à Atena. La lig la ahəŋ tawùlla aŋatà à Bere la gay uwana la ahəl Pol, apəh à atà kà mapəh à azla Silas atà la Timotawus, kà tabəzalla vok la katskats.
- <sup>16</sup>Mok uwana Pol akùd azla Silas atà la Timotawus la Atena kà, ləv azəŋ məŋga kà manəŋ gudəŋ uwaga adahənla la azlamazlazlay.
- <sup>17</sup>Tabayàhà vok gay la azla Yahudiya la gày madəv kudà la aku, la azlauwana azla Yahudiya aw, ama tahòy yewdi aña Zəzagəla, la azlauwana la vadavaday kasukwa la afik, ŋgaha la azlauwana tagagàmàh la masla.
- <sup>18</sup>Azlaməna matapla azladza anik azla Epikuriya ŋgaha la azla Sətoyisəya tavàts gay la masla. Azlaanik tagòɔ: "Mana masla gay zlawzlawga uwanay agòɔ lagwa zlà ma? Zlahaw kà apəhay kà gay aña azlazəzagəla mələk gə." Tapəh uwaga kà, kà uwana Pol apəhay lakəl aña Yesu, ŋgaha lakəl mawul à uda la mamətsay.

- <sup>19</sup>Kiya uwaga takès, tadàlla à gudəŋ uwana à afik Arewopez la huma aŋa azlaməna sawaray, ŋgaha tagòdàl: "Lagwa asa à anu masəlay matapla, ma uwala asa à ka matapanula?"
- <sup>20</sup>Kà uwana asa à ka matapanula azlatatak mələk gà, ŋgaha bay asa à anu masəl godega aŋha zlà."
- <sup>21</sup>(Azla Atena la azlamələk dza uwana tadzà à ahəŋ la tataka aŋatà la abà, tadàhà tatak aw, say matsən azlagay mawga uwana tavàts pəra)
- <sup>22</sup>Hadzak, Pol atsizilla ala la tataka aŋa azlaməna sawaray la abà ŋgaha agòd: "Azla Atena, gədzùgw kà akul kanəfaw azlatsəhay zəzagəla anik anik gərgagər.
- <sup>23</sup>Hadfay, bokuba uwana gədauguzahay la huɗ gudəŋ aŋkul la abà kà, gənəŋà azlaskama mazlazlay aŋkul. Dgaha gənəŋà anik aya uwana tatsetsèral à vok: 'Slaka uwana kà aŋa zəzagəla dza asəl sləm aŋha aw.' Iyay zlà! Kasləkawaw kokudà masəlay, ama gi kà gəsəl, uwana gəsà à waŋ kà mapəhakulla.
- <sup>24</sup>Masla la uwana adàhəŋ gudəŋ à vok, la azlatatak uwana la huɗ aŋha gesina, ama masla kà adza à ahəŋ la azlagay uwana la aku, ahəl aŋa dza aŋəl aw.
- <sup>25</sup>Masla kà anəkudà kà dza aŋa madàhalla tatak aw, kà uwana masla la uwana av sifa à dza la masafay gesina.
- <sup>26</sup>La dza tekula la abà, la uwana mayyi à tsəh ala apakà vok gesina, ŋgaha abək atà à ahəŋ la gudəŋ uwanay la vok. Dagay uwana aləg madàh vok, afàh azlakaslà à ahəŋ la azlamakwi aŋa madz à ahəŋ aŋatà babay.
- <sup>27</sup>Adàhà à atà kà atà mayàh masla təzlatəzł, kà atà aŋa mabəzal. Ama la dziriga kà, Zəzagəla kà kərkər la uwabeyuwi gami aw,
- <sup>28</sup>Kà uwana: 'La masla anu la sifa masla la vok aŋa masafay anu la ahəŋ.' Delga à uwana azladza anik aŋkul tahàb, ŋgaha tagòd: 'Anu babay kà anu azlabəza aŋha.'
- <sup>29</sup>Tsa anu azlabəza aŋa Zəzagəla kà, məslala vok məgagazləla la madzugway kà, Zəzagəla kà bokuba luwàluwà, sili, baŋaw akur aw. Kà uwana aŋa azlatatak uwaga kà, dza adàhà à atà la haŋkəli aŋha, kà azlamazlazlay aŋha. Azlatatak uwaga kà azlaaŋa Zəzagəla aw.
- <sup>30</sup>Iyay, kà uwana Zəzagəla atugw tsakana aŋa uwarà aya aw, kà uwana azladza tadza à ahəŋ kà la mawur gəl aw la abà. Ama lagonay kà, adazala azladza baməraka leli gesina, kà mapəh gay la ləv ala.
- <sup>31</sup>La hadfay gà kà, afà mavakay tekula à ahəŋ, à uwana adàdàh seriya à gudəŋ à vok à gəl la dziriga. La ahəl aŋa dza tekula uwana akəsàni, ŋgaha apəhanula masla la mawul à uda la mamətsay."
- <sup>32</sup>Uwana tatsənà, kà Pol apəh lakəl aŋa mawul à uda la mamətsay kà, azladza anik takədàslal, azlaanik tagòd: "Iyay, lagwa kà, asa à anu aŋa mədàtsəbal sləm vərđi anik aya zlà!"

<sup>33</sup>Kiya uwaga à uwana, Pol asà à uda la tataka aṅatà la abà.

<sup>34</sup>Azlaanik tadà à atà à adi, tadiṅal gəl à vok. La tataka aṅatà la abà kà Denəs tekula la tataka maham à ahəṅ sawaray, uwana la abà la gudəṅ la afik, mis anik uwana sləm aṅha Damarəs, ṅgaha la azladza anik aya.

## Sləray 18

<sup>1</sup>La lig aṅa uwaga la ahəṅ, Pol atsizlla ala la Atena ṅgaha ahàd à Korintiya.

<sup>2</sup>Zil Yahudiya anik la ahəṅ la abatà, sləm aṅha Akilas, tagagàm la Pol. Pol ahàd à mtəga aṅha kà manəṅ atà à gay. Masla kà, tayyà kà à makoray aṅa Pontiya à abà, ama asafay la abatà aw. Asà à waṅ kà la Italiya la ahàl à ahàl atà la mis aṅha Pərəskila, kà uwana sufəl Rom, uwana sləm aṅha Kələd, akudəkàh azla Yahudiya gesina la Rom.

<sup>3</sup>Sləray aṅatà kà tekula la Pol, (Mataf gày lukut) adzà à ahəṅ la mtəga aṅatà, ṅgaha tadahàhà sləray la slaka gə.

<sup>4</sup>Kəla vuḍ maduw ləv, Pol abayàhà vok gay la azla Yahudiya la gày madəv kuḍa la aku, kà atà tadiṅal gəl à vok, baməraka azla Gərək bay.

<sup>5</sup>Ama mok uwana azla Silas atà la Timotawus tasà à waṅ la Makeduniya kà, Pol adahà sləray anik aya aw, say azàṅ kà gay Zəzagəla la mapàhla à azla Yahudiya, kà Yesu kà masla uwana Zəzagəla afəl dzakwa à gəl.

<sup>6</sup>Ama uwana azla Yahudiya tafà gəl à gay aṅha aw, tatsəkəl magodəhay à gəl Pol adəḍ à atà burburu aṅa gudəṅ aṅatà à gəl, agòḍ à atà: "Baṅa kadəzahawla kà, mawisiga kà adagay kà aṅkul, gay gulo la abà aw. Dagay lagonay lagwa gəgola vok gulo à slaka azladza uwana azla Yahudiya aw adagay."

<sup>7</sup>Kiya uwaga adà aṅha la abatà, ahàd à mtəga aṅa dza anik uwana sləm aṅha Titiyus Yustus, uwana ahòy yewdi aṅa Zəzagəla, ṅgaha gày aṅha kà agà la makəla aṅa gày madəv kuḍa.

<sup>8</sup>Kirəspus, məṅga aṅa gày madəv kuḍa, adiṅ gəl à Sufəl Yesu à vok la huḍ gày aṅha gesina. Azla Korintiya uwana tatsənà gay uwaga, tadiṅal gəl à vok, ṅgaha tadahà à atà batem.

<sup>9</sup>La vəḍ la abà vərđi anik masesiṅay asesiṅla Pol, Sufəl Zəzagəla agòḍal: "Guba akəs ka aw, dà à huma à gay la mapəh gay gulo, kadza à ahəṅ titi aw!

<sup>10</sup>Kà uwana gi la ahəṅ la kak. Dza la ahəṅ aslala vok kà makəs ka, kà madəha à ka mawisiga à vok aw, kà uwana azlauwana tadagəhay azlaaṅulo kà, atà ṅuv la gudəṅ uwanay la abà aw."

<sup>11</sup>Pol adzà à ahəṅ la Korintiya mavay la tenma, atapàhla gay Zəzagəla à azladza.

<sup>12</sup>Mok uwana Galiyon apək gumna aṅa kutso Akayya, azla Yahudiya tahamà gay à vok, takəs Pol, tadàlla à huma seriya,

- 13** Tagòd: "Dza uwanay kà apapat azladza kà atà makòdef à Zəzagəla anik à ahəŋ, la azlatetəvi anik anik, uwana adəb vok la mapəhay gami aw."
- 14** Pol asəl mabadma, à mok uwana Galiyon agòd à azla Yahudiya: "Baŋa dza uwanay akòd dza, baŋaw adəh mawisiga anik zlazladaga naka gəbasin, gətsəb akul sləm."
- 15** Ama tsa kabayaw vok gay kà lakəl aŋa azlagay, lakəl aŋa azlasləm, ŋgaha lakəl aŋa wakità seriya aŋkul kà, say akul la gəl aŋkul kakədəvwaw uwaga ala, gi kà, gədàh seriya aŋa tsəhay gə uwaga aw."
- 16** Ŋgaha akudəkàh atà la huma seriya.
- 17** La abatà gesina aŋatà takàs Sostenus, məŋga aŋa gəy madəv kudà, tazlāb la huma seriya. Ama Galiyon afəl sləm aw.
- 18** Uwana Pol adadzin à ahəŋ la Korintiya aya kà, la lig la ahəŋ, asək azladedə à ahəŋ, ahəd à Kenkeriya atà la Pərəskila la Akilas. La abatà afəts gəl à ahəŋ kà maslaf vok aŋha uwana aslāf la huma Zəzagəla. La lig la ahəŋ ahəd à kəslah iyaw à afik, kà mad à kutso Səriya.
- 19** Uwana tabəzà Efesus, Pol asakà Akilas à ahəŋ atà la Pərəskila, ŋgaha ahəd à gəy madəv kudà à agu, kà matsən vok gay la azla Yahudiya.
- 20** Atà tanavəl masafani la abatà, ama akəs aw.
- 21** Asək atà à ahəŋ la magod à atà: "Baŋa asa à Zəzagəla kà, gədawul à waŋ à slaka aŋkul aya", ŋgaha adə aŋha à Efesus la kəslah iyaw.
- 22** Mok uwana adabəz à Zəsare kà, ahəd à Urusalima kà madəh ayyi à azlaməna gay Zəzagəla la abatà. La lig la ahəŋ, adə à ahəŋ à Antiyews.
- 23** Uwana adadzən à ahəŋ la abatà kà, awul aŋha aya, aguwà à uda la makoray aŋa Galatiya la abà, ŋgaha la Fərizi la madzərədəh azlaməna madiŋal gəl à vok ala.
- 24** La zamana uwatà kà, zil Yahudiya anik la ahəŋ, sləm aŋha Apolos tayyà à Alekəsandəra, abəzà à gudəŋ Efesus. Masla la haŋkəli aŋa mabadma, asəl wakità Zəzagəla lela.
- 25** Asəl tetəvi aŋa Sufəl Zəzagəla lela. La mabadma delga apəhla gay aŋa Yesu à azladza la dziriga. Ama batem tsəhay gə aŋa Yuhana la uwana asəl pəra.
- 26** Adzəkà mapəh gay la gəy madəv kudà la aku la kokudà guba. Mok uwana Pərəskila atà la Akilas tatsən mapəhay aŋha, tadàla masla à mtəga aŋatà, tapəhalla tetəvi aŋa Zəzagəla la dziriga.
- 27** Kiyə uwaga Apolos akəs tetəvi kà mad à kutso Akayya. Azladedə məna madiŋal gəl à vok tadzərədəŋ ala, tatsetsəral wakità à ahəl, kà mav à azlaməna madiŋal gəl à vok la kutso uwatà, kà atà makəsay la ahəl səla. Mok uwana adabəz à abatà kà, azlək azlaməna madiŋal gəl à vok la vok mahamay uwana Zəzagəla avəl.

<sup>28</sup>Apèh à azla Yahudiya la huma azladza gesina, tsèràh à uwana dza apèzl gay maslèk aw, apèhatàla la wakità Zèzagèla la abà, kà Yesu la uwana dza uwana Zèzagèla afàl dzakwa à gəl, Kristu.

## Sləray 19

<sup>1</sup>Mok uwana Apolos la Korintiya, Pol aguwà la gudəŋ la afik, abəzà à Efesus. La abatà la uwana abəzà azlaməna madiŋal gəl à vok anik à vok.

<sup>2</sup>Anavà atà: "Kabəzaw Masasədök Zèzagèla, à mok uwana kadiŋàwwal gəl à vok ay?" Tawulàlla, tagòd: "Tetuwa mədatsənəŋ tapəhay lakəl aŋa Masasədök Zèzagèla aw."

<sup>3</sup>Kiya uwaga Pol anavà atà: "Tsəhay batem ma uwala tadəhàkullàŋ la?" Tawulàlla: "Tsəhay gə aŋa Yuhana", tagòdàl.

<sup>4</sup>Pol agòd à atà: "Yuhana adəhà batem à azlauwana tapəh gay la ləv ala, ŋgaha agòdàh à azla Isərayel kà, say tadiŋ gəl à dza uwana à vok adənəfal à tsəh à waŋ, uwaga kà Yesu."

<sup>5</sup>Mok uwana tatsən uwaga tadəhàtəŋ batem la sləm aŋa Sufəl Yesu.

<sup>6</sup>Pol abək à atà ahàl à gəl, gesina aŋatà tabəzal Masasədök Zèzagèla. Tadzəkà mabadma la azlagay mələk gə, ŋgaha tazə sayda uwana tabəzal la slaka Zèzagèla.

<sup>7</sup>Gesina aŋatà kà taslay kulo gəl aŋha səla.

<sup>8</sup>Təla makər Pol adəhàŋ kà matapatàla la gəy madəv kudà aŋa azla Yahudiya la aku, apəhla azladza kokudà guba, kà atà tatsənà vok gay, awàd vok à uda kà mapəhatàla gay aŋa makoray Zèzagèla.

<sup>9</sup>Ama azlaanik aŋatà tadzadzəŋhàhà gəl ala, takweskà, tapəh mawisiga lakəl aŋa tetəvi aŋa Sufəl Zèzagèla la huma maham à ahəŋ dza. Kà uwaga à uwana Pol ahəl azlaməna madiŋal gəl à vok, tahəd aŋatà. Kəla mavakay atəpla azladza la gəy nekol aŋa Tiranus la aku.

<sup>10</sup>Anəfà madəh uwaga tsèràh à mavay səla, tsèràh à uwana azladza la kutso Asəya, la azla Yahudiya, ŋgaha la maham à ahəŋ dza anik gesina tatsənà gay aŋa Sufəl Zèzagèla.

<sup>11</sup>Zèzagèla adəhàhà azlanadzipo tsəhay anik anik la ahàl aŋa Pol.

<sup>12</sup>Azlalukut uwana tadabani vok aŋa Pol la azlanalbət gesina kà tawarəhà azlaməna dıvats ala gesina.

<sup>13</sup>La kaslà uwatà azla Yahudiya anik la ahəŋ uwana tauguzəhàh, tawul à abanay, tawul à abatəy kà makudəkàh azlamasasədök mawisiga à azlaməna dıvats lakəl ala, tazəb kà sləm aŋa Sufəl Yesu kà makudəkàhla azlamasasədök mawisiga uwaga. Tagòdàh à azlamasasədök uwaga: "Məgòd à akul: Sàw à uda la sləm aŋa Yesu uwana Pol apahay!"



- 14**Uwaga azlabəza aṅa məṅ madzahaga aṅa mav tatak à Zəzagəla, uwana sləm aṅha Seva, tadəhà uwaga atà mədəf.
- 15**Ama masasədök mawisiga agòd à atà: "Gəsəl Yesu, Pol babay gəsəl, ṅgaha ma akul ma, akul azla uwa tak uwa?"
- 16**Masla zagəla zagəla avəl à atà à adi, aduwà à atà gesina. Azlábàh à atà à gay, adəhàh à atà amik à vok, tavàläh à uda, tahòy aṅatà la godega deyday.
- 17**Azla Yahudiya la azlamaham à ahəṅ dza anik anik, uwana tadzà à ahəṅ la Efesus gesina, tatsənà uwaga. Ləv avəl à atà à gay tsərəh à uwana azladza tazəṅ mazləbay sləm aṅa Sufəl Zəzagəla à gəl kaykay aya.
- 18**Aṅuvaw la tataka azlaməna madiṅal gəl à vok la abà tasàhà à waṅ, tapəh gay la ləv ala lakəl aṅa uwana tadadəhaṅ la huma azladza gesina.
- 19**Aṅuvaw la tataka aṅa azlauwana la abà tadəh məzla, tasàhla wakità aṅatà à waṅ, tadəwal à akəl à tsəh la huma aṅa azladza gesina. Tatùgw sili aṅa wakità gə, uwana kə adəh gursu dəbow dzik zlo.
- 20**Kiya uwaga à uwana gay aṅa Sufəl Zəzagəla aslèhà gəl à ahəṅ la ndzədə la mapəhla ndzədə aṅha ala.
- 21**Mok uwana uwaga adada à lig gesina, Pol akəs tetəvi uwana aguwa la Makeduniya, la Akayya kə masla aṅa mad à Urusalima. "Baṅa gədabəzay kə, gədàd à gudəṅ Rom babay", agòd.
- 22**Aslèl azlaməna mazlakay aṅha səla à Makeduniya, Timotawus atà la Erastus, ama masla kə adzənì à ahəṅ la Asəya dadəṅ.
- 23**La kaslè uwatà kə, gay məṅga atsizlla ala la Efesus lakəl aṅa tetəvi aṅa Sufəl Zəzagəla.
- 24**Dza anik la ahəṅ la abatà, sləm aṅha Demetəriyus, uwana avàtsàh azlamaftsa à vok aṅa gəy uwana azladza tasləkàwàh, uwanay gəy aṅa mazlazlay Arəteməs misga, akəs atà à vok la azlaməna sləray aṅha gesina kə madawla.
- 25**Azàläh azlaməna sləray aṅha, la azladza uwana sləray aṅatà tekula, ṅgaha agòd à atà: "Azlakona, kasəlaw kə, la sləray gami akəs à anu aw takay,
- 26**kanəṅawwaṅ, ṅgaha katsənawwaṅ uwana Pol uwanay adəhəṅ aw takay? Agòd à azladza kə: Azlamazlazlay uwana mədəhəṅ la ahəl kə, azlazəzagəla delga aw, agòd. Ḷgaha azladza takəs gay aṅha kə la abanay la Efesus pəra aw, ama la makoray aṅa Asəya la abà gesina bay.
- 27**Baṅa kiya uwanay kə, azladza tadəpəh mawisiga lakəl aṅa sləray gami, ṅgaha tadəpəsew məṅ gəy mazlazlay Arəteməs baməraṅa Arəteməs bay, kə tadəhoy yewdi aṅha aya aw. Tekedik kə, masla la uwana azla Efesus tasləkaway la azladza gudəṅ à vok gesina!"

<sup>28</sup>Mok uwana tatsèn gay uwaga kà, tapakà lèw kaykay, tadzəkà mawiyay, tagòd: "Arəteməs aña azla Efesus kà mənğa, Arəteməs aña Efesus kà mənğa!"

<sup>29</sup>Gay uwaga aslèhà gəl à gudəŋ à abà gesina, awisà gəl à azladza à vok, takàs azlaməna manəf Pol səla, Gayyus atà la Arəstarkus uwana tasà à waŋ la Makeduniya, tabayà atà, tadàla atà à vadavaday aña marazlay à afik.

<sup>30</sup>Pol bay kà asal aña mad à abà, ama azlaməna madiŋal gəl à vok tadəfəl gay à ahəŋ.

<sup>31</sup>Azlamənga aña kutso Asəya uwana azlaslagama aña tasləl gay à slaka aña, tadəval kudà kà masla aña mad à vadavaday marazlay à afik aw.

<sup>32</sup>La mok uwaga kà, maham à ahəŋ gesina hohodà gəl à vok, kəla uwabeyuwi awiyay deyday pəra, kà uwana aŋuvaw la tataka aŋatà la abà, tasəl gay uwana ahamà atà gay à vok aw.

<sup>33</sup>Zil Yahudiya anik la ahəŋ la abatà la tataka azladza la abà, sləm aña Alekəsander, tadàlla à awtày à huma aña maham à ahəŋ dza kà uwana azla Yahudiya tasəl masla, kà mapəhla godega aña gay uwaga à azladza.

<sup>34</sup>Ama uwana tasəl kà masla babay zil Yahudiya kà, tazà mawiyay à zagəla la kuda tekula, tasəf la mawiyay la abà azlagay sa səla: "Arəteməs aña azla Efesus kà mənğa, Arəteməs aña azla Efesus kà mənğa!"

<sup>35</sup>"Dzàw à ahəŋ titi!", məŋ səkəreter aña gudəŋ uwaga agòd à atà kà kudà kudà: "Haday, akul azla Efesus kà uwabeyuwi asəl kà gudəŋ aña Efesus kà masla manəŋla məŋ gày aña Arteməs, ŋgaha la maftsa vok tsikaslaga aña, uwana asà à ahəŋ la zagəla, kəla dza uwala beyli asəl uwaga.

<sup>36</sup>Dza la ahəŋ ats gadzewi lakəl aña aw. Gay gà la uwaga say kadzaw à ahəŋ titi, ŋgaha kadəhaw haŋkəli lakəl aña uwana kadəhawwaŋ bay.

<sup>37</sup>Haday, səlàw kà, azladza uwana kasàwla atà à abanay kà, tadà à gəl la məŋ gày mazlazlay gami la aku aw, uwala tapəh mawisiga lakəl aña mazlazlay gami bay aw.

<sup>38</sup>Baŋa gay la Demetərius lakəl, la azlaməna sləray aña, kà mapuw gudzi à dza à gəl kà, kaslā la ahəŋ à uwana dza ada à seriya la mok uwatà à huma aña azlamənga, la abatà la uwana tadəvah atà ala.

<sup>39</sup>Baŋa akul la azlagay anik aya babay kà, say kadawla à huma à azlaməna sawaray, kà makədəvəŋ ala la abatà.

<sup>40</sup>Ama kà aña uwanay lakana kà, akəs anu vok aw, kà uwana tagod à anu kà, akul la uwana mədatsizl gay ala, tagod à anu, kà uwana akəs anu vok kà maham gay à vok kiya uwanay aw!"

<sup>41</sup>Ŋgaha mok uwana adakəd gəl à gay uwaga kà: "Dàw aŋkul!", agòd à atà.

## Sləray 20

- <sup>1</sup>Mok uwana gay ataslèla kà, Pol ahamà gay à azlamèna madiḡal gəl à vok à vok. Adzèrèdàhàla la azlagay, agòd à atà: "Gi kà, gèda à Makeduniya."
- <sup>2</sup>Aguwà à uda la kutso uwatà la abà la madzèrèdàh azlamèna madiḡal gəl à vok ala, la mazàh à atà gay Zèzagèla, ḡgaha ahàd à Akayya.
- <sup>3</sup>Adzà à ahəḡ la abatà tèla makèr, adàhà vok à ahəḡ kà mad à Sèriya la kəslah iyaw, ama atsənəḡ kà azla Yahudiya tatsən vok gay kà makəḡay, gay gà la uwaga awùl à Makeduniya.
- <sup>4</sup>Sopatèr, kona aḡa Pirus, zil Bere alakəḡ, ḡgaha bay Arèstarkus atà la Sekundus, uwana azla Tesaloniki, Gayyus zil Derbe, Tisik atà la Tèrofim ḡgaha bay Timotawus, uwana atà azla Asəya, tahàd atà nna gesina.
- <sup>5</sup>Tatsà vok à huma kà anu, tahàd à Tèrowas, takudà anu la abatà.
- <sup>6</sup>Anu la gəl gami məḡəḡ à Filipiya, uwana madəvaday aḡa pain uwana tatak maməslèla la tsəh aw adada à lig kà, la mahənay zlo kà məbèzà atà à vok la Tèrowas la kəslah iyaw. Məḡàhà kasukwa tekula la abatà.
- <sup>7</sup>La mokokhu gà, vud səḡdu kà, maham gay à vok kà mazuw tatak may tsikaslaga. La abatà Pol apəh gay à azladza. Apəh gay tsèrəh à tataka vəḡ, kà uwana la bebəḡ gà kà, asal mad aḡha.
- <sup>8</sup>La gəy uwatà la aku lakəl aḡa gəy uwatà la afik, məhəm à agu kà, azlafənəs aḡuvaw dzadzàhà la ahəḡ.
- <sup>9</sup>Bèzi kohana uwana sləm aḡha Antikus adzà madzay la gay fenetèr. Pol adà à huma à gay la mapəh gay Zèzagèla tsèrəh à uwana Antikus ayi vok, adzehàl. Tsəḡurəsl, atəḡ à ahəḡ, dagay la kəl gəy mamakèr la afik, tazəḡ à afik kà adamətsay.
- <sup>10</sup>Ama Pol asà à ahəḡ, ahùbal à gəl, akəs à vok, agòḡ: "Katawaw aw, mamətsayga aw!"
- <sup>11</sup>ḡgaha Pol awùl à gəy uwatà à afik, azəḡ Pain atsəkəḡ ala, ḡgaha tazùw gesina aḡatà la slaka gà. Apəh à atà gay uwaga tsèrəh à gay bebəḡ, la lig la ahəḡ adà aḡha.
- <sup>12</sup>Tadàla bèzi kohana uwaga à mtəga la sifa, tarəb mənḡa kà uwaga, tadzèrèdàhà ala.
- <sup>13</sup>Anu kà, mətsà vok à huma, kà Pol aḡa maday à kəslah iyaw à afik uwana adàla anu à Asos. La abatà la uwana mədzùḡw mazəḡ Pol à tsəh à kəslah iyaw à afik, kà uwana masla kà anəfà tetəvi à asik.
- <sup>14</sup>Mok uwana adabəz anu vok la Asos kà, məzəḡ à tsəh à kəslah iyaw à afik, məhàd à Mitilen.
- <sup>15</sup>Mətsizilla ala la abatà aya, məhàd à huma aḡa Tsiyo. La bebəḡ aḡha aya kà, məbèzà à Samos, ḡgaha la bebəḡ aḡha aya kà maufad kà, məbèzà à Milet.
- <sup>16</sup>Asà à Pol kà matsəḡ à Efesus lakəl ala, kà uwana asəl matsizl à ahəḡ kà maz kaslà ala la kutso Asəya aw, kà uwana av vok kà mabəz à Urusalima gurayḡa madəvaday Pentakosta, adàh vok kəla.

- 17**Mok uwana Pol adabəz à Milet kà, asləl gay à slaka azlamasiga aña maham à ahəŋ məna gay Zəzagəla la Efesus: "Sàw à waŋ à abanay!", agòd à atà.
- 18**Mok uwana tadùw à awtày à slaka aŋha kà: "Kasəlaw kakay à madz à ahəŋ gulo uwana gədzà à ahəŋ la makoray aña Asəya la abà", agòd à atà.
- 19**"Gəfahà sləray aña Sufəl Zəzagəla la ləv tekula, ŋgaha la iyaw tugwi la adi, la ŋgərpa, la tataka aŋkul la abà kà matsən vok gay la azla Yahudiya.
- 20**Sələw babay kà, gəhadàhəkulla tatak uwana à vok akəsà akul à vok aw. Gəpəh à akul uwaga gesina, ŋgaha gətəpakulla la dazuwaya, ŋgaha baməraka la azlahudf gày aŋkul.
- 21**Gəzàlla azla Yahudiya ŋgaha la azlauwana azla Yahudiya aw kà mapəh gay la ləv ala, kà atà magola vok à slaka Zəzagəla, ŋgaha atà aña madin gəl à Sufəl Yesu à vok.
- 22**Ama lagonay kà, gəday à Urusalima, kà uwana Masasəfok Zəzagəla afà à gi leri à gəl kà maday, lagwa kà, gəsəl tatak uwana adəbəz à gi la abatà aw.
- 23**Kəla kà, kəla huf gudəŋ uwana gəguwà à uda la abà kà, Masasəfok Zəzagəla agòd à gi, kà tadàduw gi à daŋay, gədàsa ŋgərpa.
- 24**Ama kà gi kà gədəmətsay, gədàdza à ahəŋ la sifa kà, bə tatak tekula, baŋa gədəkəf gəl à madahay gulo, la sləray uwana Sufəl Zəzagəla afà à gi à gəl kà diga, uwaga kà mapəhla ala gay marabəŋ lakəl aña vok mahamay aña Zəzagəla."
- 25**"Gəuguzàhàh la tataka aŋkul la abà gesina, gəzà gay aña makoray Zəzagəla. Lagwa kà, gəsəl kà kadənəŋaw gi aya aw.
- 26**Kà uwaga à uwana gəpəh à akul la paraka lakana: Baŋa tekula aŋkul azalla kà: Gay gulo aw.
- 27**Kà uwana gəzàla masal aña Zəzagəla gesina, gəhadàhəkulla tatak à vok aw.
- 28**Nəŋàwla gəl aŋkul, nəŋàwla maham à ahəŋ məna gay Zəzagəla, uwana Zəzagəla asùkw atà la mamətsay aña Kona aŋha.
- 29**Kà uwana baŋa gədàda aŋulo kà, azladza tadəsahah à waŋ bokuba azlakəda fəta à tataka aŋkul à abà, tadəsaka azlatuwaŋ aw.
- 30**Baməraka la tataka aŋkul la abà bay kà, tadəpahla vok ala kà madàh fida kà azlaməna madinjal gəl à vok aña manəf atà bay.
- 31**Kiya uwaga kà, nəŋàwla gəl aŋkul, awulla à akul à gəl gədapaha à akul mavay makər, mavakay la mahanay gesina, la iyaw tugwi la adi."
- 32**"Lagonay kà, gədàbək akul à ahəl aña Zəzagəla, ŋgaha à ahəl aña vok mahamay aŋha. Aslala vok kà aña mazigəŋ akul, aslala vok kà aña mapis à akul gay à vok la ləmana uwana adəhəkuləŋ gesina.
- 33**Gənavà sili la lukut la slaka dza aw.

<sup>34</sup>Akul la gəl aṅkul babay kà kasəlaw, kà gəɖəhàhà sləray la ahəl gulo, kà gi aṅa madàhla tatak uwana gənəkudà aṅha la azladza uwana anina.

<sup>35</sup>La azlatatak gesina la abà, gəpəhakulla kà say kazlakaw azlaməna kudà la tsəhay sləray uwanay gesina. Tawulla anu gəl babay à gay aṅa Sufəl Yesu uwana agòɖ la gəl aṅha: 'Marabay agay la dza uwana avày, marabay uwanay aduwa marabay aṅa dza uwana akəsay pəra', Yesu agòɖ."

<sup>36</sup>Mok uwana Pol adadəv gay aṅha à gay kà, akəɖ à ahəṅ, adəv kudà atà nna la slaka gà gesina.

<sup>37</sup>Gesina aṅatà tataw, la makas masla à vok ṅgaha: "Hàd, zla!", tagòɖəl la maɖak ahəl à kudà.

<sup>38</sup>Tapakàh ləv məṅga, kà uwana 'Kadənəṅaw gi aya aw', agòɖ à atà. Ŋgaha talakàṅ à kəslah.

## Sləray 21

<sup>1</sup>La abatà 'Maday', məgòɖ à atà, məhàd la kəslah iyaw à afik, məbəz à Kos. La bebəṅ gà, məbəz à Rodəs. Dagay la abatà məhàd à Patara.

<sup>2</sup>La abatà la uwana məbəzà à kəslah iyaw, kà mad à Fenesəya. Mədà à afik, məhàd,

<sup>3</sup>Katskats mənəṅà gudəṅ Sipəre, uwana la tataka dərəv la abà, məfəl à ahəl gudzay, kà mad à Səriya. Məsà à vəɖəh la Tir kà matsək kazlaṅa aṅa kəslah iyaw à ahəṅ.

<sup>4</sup>Məbəz azlaməna maɖiṅal gəl à vok la abatà, ṅgaha mədzà à ahəṅ kasukwa tekula anina. Masasəɖək Zəzagəla apəhatàla tatak uwana adəbəz Pol, kiya uwaga kà: 'Kadà à Urusalima aw', tagòɖəl.

<sup>5</sup>Ama uwana kasukwa uwatà adada à liḡ kà, mətəsiṅzlla ala, məhàd la azlamis aṅatà la azlabəza aṅatà gesina, talakà anu à uda la huɖ gudəṅ la abà. Məkəɖəɖəh à ahəṅ la gay dərəv məṅga, madəv kudà.

<sup>6</sup>Mok uwana: 'Mədzà à ahəṅ wurwur', mədagòɖ à vok kà, məhàd à kəslah iyaw à afik, atà babay tawùl à mtəga aṅatà.

<sup>7</sup>Kiya uwaga mədəvə mauguzahay gami à gay la iyaw lakəl la mad à Tir, tsərəh à Potolemawus. La abatà babay, azladedə takəs anu, məvakà à abatà à slaka aṅatà.

<sup>8</sup>La bebəṅ gà məhəl vok, məhàd à Zəsare. La abatà məhàd à mtəga aṅa Filip masla mapəh gay Zəzagəla, məhən à mtəga aṅha. Masla kà tekula la tataka azladza məɖəf uwana la abà, tatsatsəmàni atà la Urusalima.

<sup>9</sup>Azladəgam aṅha la ahəṅ, uwana tadàh à zil dadàṅ aw, tapəhàh gay uwana Zəzagəla apəh à atà à ahəl kà mapəh à azladza.

<sup>10</sup>Uwana mədahəni à abatà kà, masla mapəhal gay à ahəl aṅa Zəzagəla kà mapəh à azladza, uwana sləm aṅha Agabus, asà à waṅ la Yahudiya.

- 11**Asà à waŋ à slaka gami, azèb parapara aŋa Pol, awàdla asik à ahəŋ la azlaahàl aŋha, agòd: "Aganay uwana Masasədok Zəzagəla agòd: 'Azla Yahudiya la Urusalima tadàwad' dza aŋa parapara uwanay kiya uwanay, tadàfa masla à ahàl aŋa azladza uwana azla Yahudiya aw.' "
- 12**Mok uwana mədatsən gay uwaga, anu la azladza uwana la Zəsare kà: "Kamkam, kahad à Urusalima aw!", məgòd' à Pol.
- 13**Ama awùlla à uda: "Kà mana katawaw ma? Asa à akul kà mav à gi guba takay? Ama gi kà, gədàvə vok gulo kà mawad' gi la Urusalima pəra aw, ama kà mamətsay kà Sufəl Yesu Kristu bay."
- 14**Uwana məslàla vok kà madəfal gay à ahəŋ aw kà, mədza à ahəŋ titi: "Bokuba uwana asa à Zəzagəla pəra zlà", məgòd' al.
- 15**Uwana mədadza à ahəŋ la abatà kà, mədàhà vok kà mad à Urusalima.
- 16**Azlaməna madiŋal gəl à vok anik la Zəsare talakà anu. Tadàla anu à mtəga aŋa Manason, uwana asà à waŋ la Sipəre, masla madiŋal gəl à vok dagay uwarà, kà mahən anu à ahəŋ.
- 17**Mok uwana mədabəzay à Urusalima kà, azlamadiŋal gəl à vok la abatà, takəs anu la ahàl səla.
- 18**La bebəŋ gə, məhəd, la azla Pol, à mtəga aŋa Yakuba, à slaka uwana azlamasiga aŋa maham à ahəŋ məna gay Zəzagəla gesina tahamàh gay à vok.
- 19**Pol adàhà à atà 'Ayyi', ŋgaha apəh à atà sləray, uwana Zəzagəla adàhà la ahàl aŋha la tataka aŋa azladza uwana azla Yahudiya aw.
- 20**Mok uwana tatsən uwaga la slaka aŋha kà, tazlèbà Zəzagəla, tagòd' à Pol: "Deda à kanəŋà uwana apakà vok la abanay la slaka azla Yahudiya tsi. Azla Yahudiya dəbow dəbew tapakà azlamadiŋal gəl à vok. Ama gesina kà tanəfa gay aŋa wakità seriya aya.
- 21**Tatsənàŋ kà, katàpla azla Yahudiya uwana tadzà à ahəŋ la tataka aŋa azla tsəhay dza anik la abà, kà atà aŋa magola vok à uda la wakità seriya aŋa Musa la abà, ŋgaha kagòd' à atà kà, tasàkal makadav azlabəza aŋatà à uda, ŋgaha tasàk à madz à ahəŋ aŋa azla Yahudiya la tsəh ala babay.
- 22**Mana mədəhəŋ ma? Kà uwana ndzer tasəlay kà, kadasa à waŋ.
- 23**Lagwa dāhà kà uwana məpəhaha à ka: Azladza ufaɖ la ahəŋ la abanay, à uwana asà à atà masəɖ vok.
- 24**Nəfà atà, ŋgaha kadəsəɖaw vok akul nna, bokuba uwana wakità seriya apəhay, pəl sili aŋa mafəts gəl à ahəŋ aŋatà. Baŋa kadàdāh uwaga gesina kà, azladza tadəsəlay kà uwana tapəh à ka à vok, kà fida, ŋgaha atà kà masəlay kà kanəfa mapəhay aŋa Musa lela!
- 25**Ama kà aŋa azlauwana azla Yahudiya aw kà, masla tapakà azlaməna madiŋal gəl à vok kà mətsetsèr à atà wakità kà mapəh à atà uwana məkəs: Təga kà, məgòd' à atà

kaslawwalla vok mapad sləb matulay, sləb mazlazlay, mas aniz la mapad sləb anja tatak masewfla gə, kadahaw mabila aw, uwaga gesina kà delga aw, mətsetsèr à atà.”

<sup>26</sup>Kiya uwaga la bebəŋ gə, Pol ahəd la azladza ufad uwaga, tasədf vok, kà magay sətaka, ŋgaha tahəd à məŋ gəy Zəzagəla à agu. La abatà agòdf: 'Baŋa mahənay mədəf adaslay kà, madəv sləray anja magay sətaka anja kəla uwabeyuwi anjata.' (Bokuba magodəy kà sartà anja makad tatak kà anjata adaslay)

<sup>27</sup>Mok uwana mavakay mədəf uwaga azladəv à gay kà, azla Yahudiya uwana la makoray Asəya tanəŋà Pol la məŋ gəy Zəzagəla la aku kà, ŋgaha tavədzàhà maham à ahəŋ dza ala, ŋgaha takès Pol,

<sup>28</sup>la mawiyay: "Azlatsəhay gami Isərayel zlakàw anu! Aganay dza à uwanay auguzàhəhay la slaka gesina, atùgw delga aw à azladza gesina lakəl anja azla Isərayel lakəl anja wakità seriya anja Musa, ŋgaha lakəl anja məŋ gəy Zəzagəla babay! Bə gotənaŋ babay asəlla azlakirdi à gəy Zəzagəla gami à agu, tadàhla àlèh à slaka tsidəŋa gami à vok.”

<sup>29</sup>(Uwana tapəh kiya uwaga kà, kà uwana tanəŋəŋ Tərofim zil Efesus atà la Pol tauguzàh la hud gudəŋ la abà, tadzùgw kà tahəd à məŋ gəy Zəzagəla à agu, gəl agod à atà)

<sup>30</sup>Gay uwaga atsàn à hud gudəŋ à abà gesina, azladza gesina tahamà gay à vok. Takès Pol, tabayəŋ à lag la gəy Zəzagəla la aku, ŋgaha tatsàkəh azlagamagəy à ama gesina.

<sup>31</sup>Maham à ahəŋ dza asà à atà makədf Pol, ama gay uwaga atsən à mənŋa anja azlaslodzi anja azla Rom, tagòdàl kà azladza Urusalima gesina gəl adawis à atà à vok.

<sup>32</sup>Katskats mənŋa anja azlaslodzi ahəl azlaslodzi la azlamənŋa anjata, tahəd à maham à ahəŋ dza à abà la mahoyay. Uwana azladza tanəŋəŋ azlaslodzi tasà à wəŋ kà, tasàk à mazləb Pol.

<sup>33</sup>Kiya uwaga mənŋa anja azlaslodzi azà vok à slaka Pol, akès: "Wàdāwəŋ kà la mazakazak səla!", agòdf. Ŋgaha anavà atà: "Uwanay ma, mana adəhəŋ ma?", agòdf à atà.

<sup>34</sup>Azladza la maham à ahəŋ dza la abà tapəh azlagay anik anik deydayga. Takàdla gəl à gay uwaga à vok, ŋgaha asəl uwana adəhəŋ kà gay uwauwaga uwaga aw, ŋgaha agòdf kà: "Dàwla Pol à mtəga azlaslodzi!", agòdf.

<sup>35</sup>Mok uwana tabəzà maslək à ahəl gamagəy, azlaslodzi tazəb mazəbay kà mav dzəhla anja maham à ahəŋ dza,

<sup>36</sup>kà uwana azladza tanəfà la tsəh dukwdadukw la mawiyay: "Məkədf, məkədf, məkədf!”

<sup>37</sup>Mok uwana tazlādàla Pol à gəy anja azlaslodzi uwatà à agu kà, Pol agòdf à mənŋa anja slodzi: "Gəbəzal tetəvi kà mabədfma ay?" Mənŋa anja azlaslodzi agòdf: "Tsa kasəl gay Gərək aw nna?"

<sup>38</sup>Tsa kak kà zil Misèra, uwana azlèl guvèl la azladza la kaslà uwanay adada à lig aw takay, uwana adàla azladza dèbow ufaɗ à kəsaf à abà kà magay azlaməna nabəra aw ay?"

<sup>39</sup>Pol agòd: "Gi zil Yahudiya, tayyà gi à Tarsus uwana la Səlisəya, gi bəzi huf gudəŋ mənğa gə. Kamkam, gəgod à ka, vā à gi tetəvi kà gi aŋa mabadma à maham à ahəŋ dza uwanay!"

<sup>40</sup>Mənğa aŋa azlaslodzi avàl tetəvi. Kiya uwaga Pol atsizilla à maslək ahàl gamagày à afik, akokòt à atà ahàl à adi kà madz à ahəŋ titi, uwana tadzà à ahəŋ titi kà, Pol apəh à atà gay, la gay Yahudiya:

## Sləray 22

<sup>1</sup>"Azladede la azlababa, lagwa kà, tsèbàw sləm à gay mazlayla gi gulo uwana gəpəh à akul lagwa!"

<sup>2</sup>Mok uwana tatsənəŋ, kà apəh à atà kà la gay aŋatà kà, dziriya tadzà à ahəŋ titi ŋgaha Pol agòd à atà:

<sup>3</sup>"Gi zil Yahudiya, tayyà gi à Tarsus la Səlisəya, ama gəzigèn kà la abanay la Urusalima, ŋgaha bay kà, masla matapgəla tatak kà, Gamaliyel, masla la uwana apəhgəla masəl mapəhay aŋa azlababa gami madzidziga. Gədəhà sləray aŋa Zəzagəla kà mənğa bokuba aŋkul uwanay kadəhàwwəŋ lakana.

<sup>4</sup>Kasəlaw kà gətəbəhà azlaməna madiŋ gəl à Yesu à vok tsərəh à makaf atà. Gəkəsəh azlazil la azlamis, gəwàts atà à daŋay.

<sup>5</sup>Kiya uwaga madzahaga aŋa azlaməna mav tatak à Zəzagəla, la azlamasiga tanərəz kà delga à uwana gədəhəŋ, tavà à gi wakità kà azladede gami azla Yahudiya uwana la Damas, gəhàd à abatà kà makas atà, ŋgaha kà madla atà à Urusalima à huma seriya."

<sup>6</sup>"Mok uwana gi la tetəvi la ama, kà mad à Damas, uwana azləgay tataka afats kà, katskats magol uɗaka mənğa asà à ahəŋ la zagəla, aùɗ la makəla gulo.

<sup>7</sup>Gətəɗ à vəɗah, ŋgaha gətsənà mabadma agòd à gi: 'Sawul, Sawul, kà mana katərəb gi ma?'

<sup>8</sup>Gənàv: 'Kak uwa, Sufəl?' Agòd à gi: 'Gi Yesu, zil Nazaret uwana katərəbəŋ.'

<sup>9</sup>Azladza uwana la slaka gulo tanəŋà uɗaka, ama tatsənà kuda uwana abadgəmà aw.

<sup>10</sup>Kiya uwaga gənàv: 'Sufəl, mana gədəhəŋ ma?' La abatà Sufəl Yesu agòd à gi: 'Sà à afik, hād à gudəŋ Damas à abà, la abatà la uwana tadəpəhakala tatak gesina uwana asà à Sufəl Zəzagəla kadəhəŋ.'

<sup>11</sup>Uwana gədəpaka guləf kà magol uɗaka uwana aŋərəzl gi à adi, azladza uwana mədəy anina takəs gi à ahàl, ŋgaha tadàla gi à Damas."

<sup>12</sup>"Dza anik la ahəŋ la abatà, uwana sləm aŋha Ananiyas, masla kà asəl Zəzagəla, akəs wakità seriya gami lela, sləm aŋha la ahəŋ la tataka azla Yahudiya aŋa Damas la abà.



- 13**Asà à waŋ à slaka gulo, atsizl gi gəl, agòd' à gi: 'Sawul, deda gulo, nəŋ ala aya à dagay!' La kaslà uwatà gənəŋ ala, ŋgaha gənəŋà masla.
- 14**Agòd' à gi: 'Zəzagəla aŋa azlababa madzidziga akəsàni ka, kà mapəhla mawoyəŋ aŋha ala la kak, kà manəŋ dziriga aŋa Kona aŋha, ŋgaha kak aŋa matsən gay aŋha la dziriga.
- 15**Kà uwana say kagay masla sayda aŋha la huma aŋa azladza gesina lakəl aŋa uwana kanəŋəŋ ŋgaha katsəŋəŋ.
- 16**Lagonay ma, mana kakudəy aya ma? Kəs batem!', agòd' à gi, 'Kà Zəzagəla aŋa mazlak ka, kà aŋa mapal ka la tsakana aŋak la abà gesina, la mazal sləm aŋha!'."
- 17**"Gəwul à waŋ à Urusalima. La mok uwana gədəv kudu la məŋ gəy Zəzagəla la aku kà, masesiŋay asesiŋla gi.
- 18**Gətsənà Sufəl Yesu agòd' à gi: 'Hadzak gòd, sà à uda la gudəŋ uwanay la abà, kà uwana azlaməna gudəŋ uwanay kà tadəkəs gay uwana kadəpəh à atà lakəl gulo aw.'
- 19**Gəwulàlla, gəgòd: 'Hadəy, Sufəl, tasəl la paraka kà gədàh à azlagəy madəv kudu à agu, gəkàsàh atà, gəwàtsàh atà à daŋay, ŋgaha gəzlàbàh azlauwana tadiŋ gəl à gay aŋak à vok ndzer.
- 20**Ŋgaha aya, mok uwana takəs Etiyen, masla sayda aŋak kà, gi bay kà gi la abatà. Gəkəs makədəy, gənəŋla lukut aŋa azlaməna makədəy.'
- 21**Kiya uwaga Sufəl Zəzagəla agòd' à gi: 'Həd, kà uwana gəsləl ka kərkər à slaka azladza uwana azla Yahudiya aw!'."
- 22**Maham à ahəŋ dza atsəb sləm à Pol tsəràh à uwana apəh gay uwaga, ama la lig la ahəŋ kà tadzəkà mawiyay: "Zàwwəŋ ala à dza uwaga, kədāw, azlayla adza à ahəŋ la sifa aw."
- 23**Tawiyà la makwahàh lukut la vok ala, la matak kutso à zagəla.
- 24**Kiya uwaga məŋga aŋa azlaslodzi avà tetəvi kà madla Pol à gəy uwatà à agu, kà maslahəŋ ala, ŋgaha kà masla mapəh dziriga lakəl aŋa mana uwana azla Yahudiya tawiyay mi à məŋga.
- 25**Ama mok uwana tawadəŋ kà mazlabay kà, Pol agòd' à məŋga aŋa azlaslodzi uwana la abatà: "Dziri ma, tetəvi la ahəŋ kà mazlaḅ zil Rom kokudà matsən seriya aŋha takay?"
- 26**Mok uwana adatsən uwaga kà, ahəd, apəh gay uwaga à məŋga aŋatà suwaŋ: "Kakay kadəgod' aŋak ma? Zil uwanay kà zil Rom."
- 27**Məŋga aŋa azlaslodzi asà à waŋ à slaka Pol anavàl: "Pəh à gi, kak zil Rom ay?" "Iyay", Pol agòd' al.
- 28**Kiya uwaga məŋga aŋa azlaslodzi agòd' al: "Gi kà, gəpəl kà magol tebeləm aŋa sili kà gi aŋa mapak zil Rom." Pol awulàlla: "Gi kà dagay mayyi gi."

<sup>29</sup>La lig la ahəŋ azlauwana asà à atà mazlabay, kà masla aŋa mapəh dziriga kà, tawùl aŋatà à lig. Bamərakà məŋga aŋa azlaslodzi bay kà, guba akəs à uwana adatsenəŋ kà Pol kà zil Rom, à kà uwana awadəŋ la kadərtsi.

<sup>30</sup>Məŋga aŋa azlaslodzi asàl kà masəlay, kà mana azla Yahudiya tayəh makəf Pol mi. Gay gə la uwaga, la bebəŋ gə kà apəzlla Pol ala la kadərtsi la abà. Agòf kà azlamadzahaga aŋa azlaməna mav tatak à Zəzagəla la azlamasiga gesina tahamà gay à vok, agòf. Kiya uwaga asəlla Pol à waŋ, à huma aŋatà gesina.

## Sləray 23

<sup>1</sup>Pol atsək yewdi à azlamasiga à gay agòf: "Azladedə, gənəfà gay aŋa Zəzagəla kà kokudà mawisiga dagay uwarə tsərəh à lakana."

<sup>2</sup>Məŋ madzahaga uwana sləm aŋha Ananiyas avà tetəvi à azladza uwana la makəla aŋa Pol lakəl, kà madəf à paŋaw à abà.

<sup>3</sup>Kiya uwaga Pol agòfal: "Ndzer, Zəzagəla adədəf ka, kak zlagam medəkuga. Kagòf kà: 'Gədəh seriya kà la tetəvi aŋa wakità seriya', kagòf, 'Tsa tekedik kanəfà aw'."

<sup>4</sup>Azlauwana la makəla aŋa Pol lakəl tagòfal: "Kagodəh à məŋ madzahaga aŋa Zəzagəla ŋuwà?"

<sup>5</sup>"Azladedə, gəsəl kà məŋ madzahaga aŋa mav tatak à Zəzagəla à masla aw. Hadəy kà wakità agòf kà, 'Kapəh mawisiga à məŋga aŋkul à gəl aw', agòf."

<sup>6</sup>Uwana Pol asəl kà azla Sadukiya uwana: Mawul à uda la mamətsay la ahəŋ aw tagòf, la tataka azla Farisəya la abatà kà, apəh gay à azladza la kuda zləkkà: "Azladedə, gi kà, gi zil Farisəya, kona aŋa zil Farisəya, uwana tasəlla gi à abanay kà, kà uwana: 'Mawul à uda la mamətsay la ahəŋ', gəgòf, à uwana tasəlla gi à huma seriya."

<sup>7</sup>Uwana adapəh gay uwaga kà, azla Farisəya la azla Sadukiya tadzəkà mabay vok gay la tataka aŋatà, ŋgaha maham à ahəŋ atsək ala.

<sup>8</sup>(Kà uwana azla Sadukiya tagòf la paraka kà: 'Mawul à uda la mamətsay la ahəŋ aw, malika la ahəŋ aw, masasədök la ahəŋ babay aw', tagòf. Tekedik kà azla Farisəya kà, tadiŋal gəl à uwaga à vok, kà aga la ahəŋ)

<sup>9</sup>Uwana mawiyay uwaga adazalla vok à gəl kà, azlaanik la tataka azlaməŋga aŋa wakità seriya la abà, uwana la maham à ahəŋ aŋa azla Farisəya la abà tasà à afik, tavədzəhətàla tagòf: "Kiya uwanay kà, məbəza mawisiga amiyaka tekula la slaka zil uwanay aw, zlahaw malika, baŋaw masasədök apəhalla ala uwaga la dziriga à məŋga."

<sup>10</sup>Magazlay atsizlla ala məŋga kaykay tsərəh à uwana guba akəs məŋga aŋa azlaslodzi kà maslāh Pol à ahəl aw. Gay gə la uwaga avà tetəvi à azlaslodzi kà mad à tataka maham à ahəŋ dza à abà, kà atà aŋa madla Pol à mtəga aŋatà à agu.

- 11**Kiya uwaga la hud' aṅa vɔf uwatà Zəzagəla agòd' à Pol: "Guba akəs ka aw, kaz sayda gulo la Urusalima la abanay, ŋgaha bay kà, kaz sayda gulo la Rom aya babay."
- 12**La bebəṅ gà, azla Yahudiya anik anik tahamà gay à vok, tagòd' kà: "Məzùw tatak may, məs iyaw aw say baṅa mədakəf' Pol", tagòd', la mazuw mawadāy.
- 13**Azlaməna madāh sawaray uwaga kà, taduwà dza dzik ufad'.
- 14**Tahàd à slaka azlamadzahaga aṅa azlaməna mav tatak à Zəzagəla la azlamasiga, tagòd' à atà: "Anu kà, mədazuw mawadāy kà: 'Məzùw tatak aw, say baṅa mədakəf' Pol dāṅ', məgòd'.
- 15**Akul lagwa, akul azlaməṅga, nàvaw à məṅga aṅa azlaslodzi, kà asəkulla Pol à waṅ kà manəraz gay aṅha lela, gòdāwwal. Ŋgaha mədādāh vok à ahəṅ kà makəday la tetəvi la ama, à baṅa atsa à waṅ."
- 16**Ama bəzi duguma aṅa Pol atsənà uwana tapəh, ahàd à mtəga aṅa azlaslodzi, apəh uwaga à Pol à vok à abà.
- 17**La abatà Pol azàla məṅ slodzi tekula, agòd'al: "Lakà kona uwanay à slaka məṅga aṅkul, kà uwana gay lakəl, kà mapəhal."
- 18**Slodzi uwaga alakəṅ à slaka məṅga aṅatà, agòd'al: "Masla daṅay Pol azəl gi, agòd' à gi kà, gəlakà kona uwanay à slaka aṅak, kà uwana gay lakəl kà mapəh à ka."
- 19**Məṅga aṅa azlaslodzi akəs kona uwaga la ahəl, tahàd à fəta à awtəy kokudā gəl aṅatà, kà manaval gay uwaga. "Gay mana asa à ka mapəh à gi ma?"
- 20**Agòd'al: "Azla Yahudiya tatsən vok gay kà manav à ka Pol kà madalla lebəṅ à huma seriya, kà masəl dziriga aṅha.
- 21**Ama kadādiṅal gəl à vok aw, kà uwana azladza dzik ufad' anik tadəgoḃa à fəta à abà kà makəf' Pol, kà uwana tazùw mawadāy, kà tazuw tatak may aw, tas iyaw aw say baṅa takəf' Pol dāṅ, tagòd'. Tadāh vok à ahəṅ, takuday kà say gay aṅak pəra adagay."
- 22**Kiya uwaga məṅga aṅa azlaslodzi afāh akur à kona uwaga à lig, kà masla aṅa mapəhay à dza anik aw, "Dà aṅak!", agòd'al.
- 23**La lig la ahəṅ, məṅga aṅa azlaslodzi azəl azlat à səhga aṅha səla, agòd' à atà: "Hàmaw gay azlaslodzi guvəl à vok dadərmokw səla, mənə pəlis dzik mədəf, dza dadərmokw səla la atsəkaf' la ahəl aṅatà. Dahaw vok kà mad à Zəsare la sa ladəga aṅa mokokhu.
- 24**Dahaw azlapəlis à ahəṅ babay, kà madla Pol la sətaka à huma gumna Felikəs!"
- 25**Ŋgaha atsetsèr à atà wakità à ahəl.
- 26**"Gi Kəlod Lisəyas, à kak Felikəs, la dzəḃa aṅha səla aw aṅak, 'Ayyi', gəgod' à ka!"
- 27**Hadāy, zil uwanay kà, asà à azla Yahudiya kà makəday, ama uwana gətsənəṅ kà zil Rom kà, gəhàd la azlaslodzi kà matafəṅ, masla gà la uwaga masləl à akul à awtəy.

<sup>28</sup>Gəyàh masəl godega aña gay uwana tapùwalla gudzi à gəl, gay gà la uwaga gədàlla à slaka azlaməna sawaray aña.

<sup>29</sup>Gənəñàñ kà, gay la ahəñ aslà kà maduw à dañay bañaw aña makəday aw, tapùwal gudzi à gəl kà lakəl aña mapəhay aña.

<sup>30</sup>Ɖgaha aya kà, gətsənàñ kà azla Yahudiya tazùw mawafay kà makəday, gay gà la uwaga à uwana, gəsləl à slaka aña katskats. Gəgòd à azlaməna mapuwal gudzi à gəl kà, say tapuwal gudzi à gəl kà la slaka aña pəra.”

<sup>31</sup>Kiya uwaga azlaslodzi tazəb Pol, tadàlla la vəd uwatà bokuba uwana mənğa aña azlaslodzi apəh, tadàlla à Antipaterəs.

<sup>32</sup>La bebəñ gà, azlaslodzi uwana la asik tawùl à mtəga, ama azlauwana la pəlis kà, tadàlla Pol.

<sup>33</sup>Tadàlla à Zəsare, tavà wakità uwatà à gumna, tasakà Pol la ahəl aña.

<sup>34</sup>Gumna adzəñ wakità uwatà, anavà Pol: "Kutso ma uwala kadzà à ahəñ la abà la?" Uwana adasəlay kà zil Səlisəya kà,

<sup>35</sup>agòdàl: "Mədàtsən gay aña la vud uwana azlaməna mapuw à ka gudzi à gəl tadasa à wañ." Ɖgaha agòd à azlaslodzi kà tanəñla Pol la gày uwana la aku, Herod aña kà mahamàh gay à vok la aku.

## Sləray 24

<sup>1</sup>Uwana mahəñay zlo adada à lig kà, Ananiyas, madzahaga aña azla Yahudiya abəzà Zəsare, la azlamasiga anik anik, ñgaha la Tertulus uwana asəl manəfay aña azla Rom gesina, kà mazlak atà. Mok uwana tabəzà huma gumna Felikəs kà, tapuwà gudzi à Pol à gəl.

<sup>2</sup>Mok uwana tazəlal kà, Tertulus adzəkà mapuw gudzi kiya uwanay: "Kumani, kumani, Felikəs mənğa, kà kak la uwana anu la lapiya la abà, kutso gami dzəba aña səla aw kà, kà matsihila aña.

<sup>3</sup>Uwaga gesina kà, la slaka aña la uwana məbəzal, kikay aña mənğa.

<sup>4</sup>Ama asa à gi gəzaka kaslà ala aw. Gay gà la uwaga, kamkam, tsəb anu sləm à uwana mədàpəhay lagwa.

<sup>5</sup>Mənəñàñ dza uwanay, kà masla matsən sləm aw gà, kà uwana masla la uwana atàz magazlay ala la tataka azla Yahudiya aña gudəñ à vok gesina, ñgaha kà masla la uwana mənğa aña maham à ahəñ aña azla Nazaret aya.

<sup>6</sup>Ɖgaha aya kà, adàhà àläh à mən gày Zəzagəla gami à vok babay, kà uwaga à uwana məkəs. [Asà à anu kà madàhalla seriya à gəl ma aña mi.

<sup>7</sup>Ama Lisəyas, mənğa aña azlaslodzi azəb à uda la tataka gami la abà la ndzəfa.

<sup>8</sup>Gay gà la uwaga Lisəyas avà à anu tetəvi à azlaməna mapuwal gudzi à gəl, kà mas à waŋ à huma aŋak.] Lagwa kà, baŋa kanaval gay ala kà, kasəl tatak uwana mapuwalla gudzi à gəl kà dziriga.”

<sup>9</sup>Azla Yahudiya gesina tagəđāŋ à afik kà uwana Tertulus apəh kà ndzer.

<sup>10</sup>Kiya uwaga takəm, gumna agòđ à Pol kà mabəđma, ŋgaha Pol agòđ: "Gəsəl kà kak masla seriya aŋa tsəhay uwanay dagay mavay dəŋ. Gay gà la uwaga gəslalà vok aŋa matsizl à huma aŋak kà mapəh uwana azlayla gi.

<sup>11</sup>Kà uwana aduw mahənay kulo gəl aŋha səla à mad à Urusalima gulo, kà masləkaway Zəzagəla gulo, aw, baməraka kak la gəl aŋak kaslala vok aŋa masəl godega aŋa uwaga.

<sup>12</sup>Tetuw tabəz gi gəl məgazlay la dza la məŋ gəy Zəzagəla la aku, baməraka la uwabeyuwi aw, baməraka la maftsa à gəl à maham à ahəŋ dza à afik la gəy madəv kuđa la aku aw, baməraka la azaslaka anik anik la huđ gudəŋ la abà bay aw.

<sup>13</sup>Ŋgaha dza la ahəŋ la tataka aŋatà la abà, agəđ gay mapuw gudzi aŋatà à gəl uwanay à afik aw.

<sup>14</sup>Ama aganay uwana gəsək ala à uda: Gi la ahəŋ la masləkaway Zəzagəla aŋa azlababa gami, la manəf tetəvi mawga 'Uwana fida', kagodaw. Ama tekeđik gədiŋ gəl à uwana à vok la wakità seriya la abà gesina, la aŋa azlaməna mapəh à atà gay à ahəl kà mapəh à azladza.

<sup>15</sup>Kà uwaga, gi gəgəđāŋ à afik kà Zəzagəla adawulla azladza dziriga à uda ala la azlamawisiga la mamətsay, bokuba uwana tagəđā à uwaga à afik.

<sup>16</sup>Gay gà la uwaga gədawad vok à uda kà madz à ahəŋ la ləv tekula la huma Zəzagəla ŋgaha la huma azladza bay.”

<sup>17</sup>"La lig aŋa mauguzahay gulo mavay dəŋ la uda, aŋa mawul à Urusalima kà, gəwulla sili mazlakay à azlatsəhay gulo à waŋ, ŋgaha kà mav tatak à Zəzagəla bay.

<sup>18</sup>Mok uwana gədadəh uwaga kà, tabəz gi gəl la məŋ gəy Zəzagəla la aku, tabəz gi vok, kà mok uwana gədadəv masəđ vok gulo à uda. Maham à ahəŋ dza la ahəŋ la slaka gulo baməraka magazlay aw.

<sup>19</sup>Ama azla Yahudiya aŋa kutso Asəya pəra la abatà, naka atà la uwana tatsà à waŋ à huma aŋak kà mapuw gi gudzi à gəl, agay tanəŋ mawisiga gulo.

<sup>20</sup>Baŋaw akul azladza uwanay bay, pəhàw mawisiga gulo, uwana gəđahəŋ à uwana tadàla gi à huma azlamasiga zlà.

<sup>21</sup>Gay tekula pəra gəpəh la kuda zləkkà, à mok uwana gi la huma aŋatà. Kà uwana gədiŋal gəl à vok kà mawul à uda la ahəŋ, à uwana gəsà à waŋ à huma aŋak lakana.”

<sup>22</sup>Bokuba uwana Felikəs asəl gay lakəl aŋa azlaməna manəf Kristu kà, azà gay uwaga à huma à gay agòđ: "Baŋa Lisəyas, məŋga aŋa azlaslodzi adàsa à waŋ kà, gəđapəh gay aŋak: Dàw aŋkul!", agòđ à atà gesina.

<sup>23</sup>Kiya uwaga: "Nèṅàwla Pol lela!", agòd à mənḡa aṅa azlaslodzi. "Ama v̀awal mas afad, v̀aw tetəvi à azlaslawda aṅha tanəṅal à gay!", agòd à atà aya.

<sup>24</sup>La lig azlamahanay anik la ahəṅ, Felikəs asà à waṅ la mis aṅha Dərusəla, uwana tsəhay Yahudiya. Azàla Pol kà matsəbal sləm lakəl aṅa madinḡ gəl à Yesu Kristu à vok.

<sup>25</sup>Uwana Pol adzəkà mapəhay lakəl aṅa madz à ahəṅ dziriga, lakəl aṅa makəl gəl, ṅgaha lakəl aṅa seriya uwana adàsa à waṅ kà, ləv avàl à Felikəs à gay, agòd: "Kayyà, lagwa kà, dà aṅak, vud uwana gədàbəz kaslà kà gədàzalla ka aya!"

<sup>26</sup>Adzùgw kà Pol avàl sili. Gay gə la uwaga azàlāhal, kà mabəfāhma atà səla.

<sup>27</sup>La lig mavay səla la ahəṅ, Portsəyus Festus abə̀d à slaka aṅa Felikəs à abà. Ama Felikəs asàl marab ləv à azla Yahudiya adùw gəl à Pol aw.

## Sləray 25

<sup>1</sup>Uwana mahəṅay makər adada à lig, Festus abə̀zà kutso uwatà à abà, atsizilla ala la Zəsare, ahàd à Urusalima.

<sup>2</sup>La abatà la uwana azlamadzahaga aṅa azla Yahudiya la azlamasiga anik uwana sləm aṅatà la ahəṅ, tavà mapuw gudzi aṅatà, uwana tapuwà à Pol à gəl à Festus,

<sup>3</sup>kà mav à atà tetəvi kà madla Pol à Urusalima, kà uwana la madzugway aṅatà la abà kà, tatsən vok gay lakəl aṅha kà makə̀d à tetəvi à ama.

<sup>4</sup>Ama Festus awùlla à atà ala: "Pol kà, aga la daṅay la Zəsare, gi bay kà nekwa gəwul à abatà.

<sup>5</sup>Tsa kətà kà, azlamadzahaga aṅkul tanəfa gi à abatà kà mapuwalla gudzi à gəl à baṅa adāhākulla mawisiga à vok zlà."

<sup>6</sup>Festus adāhà mahəṅay mtəgis, bi kulo, la tataka aṅatà la abà pəra, ṅgaha awùl à Zəsare. La bebəṅ gə, adà à gay seriya à agu, tadàla Pol à huma aṅha.

<sup>7</sup>Uwana Pol adaduw à awtày kà, azla Yahudiya uwana tasà à waṅ la Urusalima takəsəl gay à adi, tapùwalla gudzi zlazladāga à gəl deyday, ama agə̀d à atà à gay aw, kà uwana fida.

<sup>8</sup>Ama Pol apə̀h dziriga aṅha, agòd: "Gəfahaṅ mawisiga lakəl aṅa mapəhay aṅa azla Yahudiya aw, baməraaka lakəl aṅa məṅ gəy Zəzagəla babay aw, amiyaka à məṅ sufəl à vok aw."

<sup>9</sup>Festus uwana asàl marabəṅ azla Yahudiya agòd à Pol: "Asa à ka nəma aṅa mad à Urusalima, kà madfāh à ka seriya la huma gulo nəmay?"

<sup>10</sup>Pol agòdāl: "Gədàtsizlay kà à huma seriya aṅa gumna, say la abanay la uwana seriya gulo adāh vok. Gəfahà mawisiga à azla Yahudiya à vok aw, kak babay kà kasəl.

<sup>11</sup>Baṅa azlayla gi aw, gəfahà mawisiga, uwana azlayla gi mamətsay kà, gəkəs mamətsay. Ama baṅa gay la ahəṅ la mapuw gi gudzi à gəl aṅatà uwanay la abà aw kà,

dza aslala vok aṅa mav à atà gi à ahàl aw. Kamkam dàla gi à huma mən̄ sufəl la Rom, adàdàh seriya.”

<sup>12</sup>Kiya uwaga à uwana, Festus atsən̄ vok gay la azlaməna sawaray aṅha agòd: "Tsa kanàv mad à huma seriya aṅa mən̄ sufəl Rom kà, bà kaday zlà.”

<sup>13</sup>La lig azlamahanay ḡuv, sufəl Agəripa asà à waṅ, atà la Berenəs, à Zəsare kà madàh 'Ayyi' à Festus.

<sup>14</sup>Uwana tasàfàni kà, Festus apəh gay aṅa Pol à sufəl uwaga, agòd: "Dza anik la ahəṅ, Felikəs asàkal la daṅay la abanay.

<sup>15</sup>Mok uwana gəhàd à Urusalima kà, azlamadzahaga aṅa azlaməna mav tatak, la azlamasiga aṅa azla Yahudiya tapuwal gudzi à gəl, ḡgaha tanavà gi, kà gi aṅa madukwalla seriya à gəl.

<sup>16</sup>Gəwùlla atà ala kà azla Rom kà atà la tetəvi kà madukw seriya à dza à gəl kiya uwanay kokudà seriya la yewdi yewdi la huma aṅa azlaməna mapuw gudzi à dza à gəl aw.

<sup>17</sup>Məsà à abanay anina. Katskats la bebəṅ gà kà, gəhàd à gəy seriya à agu, gəvà tetəvi kà masəlla dza uwaga à waṅ.

<sup>18</sup>Azlaməna məzam aṅha bay atà la abatà, ama tasəlà mapuw gudzi à waṅ, kà mawisiga bokuba uwana gədzugw aw.

<sup>19</sup>Say tabayà vok gay kà lakəl aṅa madz à ahəṅ aṅatà, ḡgaha lakəl aṅa dza anik uwana sləm aṅha Yesu, uwana Pol agòd kà aga la ahəṅ la sifa pəra.

<sup>20</sup>Kiya uwaga, gi babay kà, uwana gəbəz à mawisiga aṅha aw kà: 'Kakəsay kà madà Urusalima kà madàhla ka seriya la abatà ay?', gəgòdàl.

<sup>21</sup>Ama Pol adəv gi kudà kà madàhla seriya la Rom, ḡgaha nəṅàwla tsəràh à uwana gədəsləlay à slaka mən̄ sufəl Rom, gi magòd à atà.”

<sup>22</sup>Agəripa agòd à Festus: "Gi babay kà, asa à gi matsən̄ gay aṅa dza uwaga bay." Festus agòdàl: "Kadàtsəbal sləm lebəṅ zlà!”

<sup>23</sup>La bebəṅ gà, sufəl Agəripa la Berenəs tasà à waṅ la makoray. Azladza tahàb atà dəs, tahàd à slaka seriya la azlaməṅga aṅa azlaslodzi la azlaməṅga aṅa gudəṅ. "Sàwla Pol à waṅ!" Festus agòd, ḡgaha tadàla Pol à awtəy.

<sup>24</sup>Festus agòd: "Kak, sufəl Agəripa, la azladza uwanay azla Yahudiya uwana la abanay la uwana la Urusalima gesina, tapuwlà gudzi à gəl la slaka gulo, atà gesina tagòd kà, say maz sifa aṅha ala.

<sup>25</sup>Ama gi kà, gəbəzà tatak uwana asla makədlà aw. Iyay, ama dza masla la gəl aṅha ayàh, madàhalla seriya la huma mən̄ sufəl aṅa Rom kà, gəvà tetəvi kà masləl à abatà.

<sup>26</sup>Ama gəsəl tatak uwana gətseter à mən̄ sufəl lakəl aṅha aw. Gay gà la uwaga gəsəl à waṅ à huma aṅkul, kaykay kà à slaka aṅak à kak sufəl Agəripa, baṅa mədàtsən̄ godega aṅa gay aṅha kà pəra, gədàtsetseray lakəl aṅha.

<sup>27</sup>Kà uwana asa à gi kà maslèl masla dañay à huma seriya kokudà madzad gay uwana ala lakèl aṅha aw."

## Sləray 26

<sup>1</sup>Kiya uwaga Agəripa agòd à Pol: "Tetəvi la ahəṅ kà mabadma aṅak." Kiya uwaga Pol abiyà ahàl ala kà mapəh dziriga aṅha uwana azlawla:

<sup>2</sup>"Haday, sufəl Agəripa, gi la marabay lakana kà, mapəh gay uwana azla Yahudiya tapùw gi ala gudzi à gəl gesina.

<sup>3</sup>Kà uwana kasəl madz à ahəṅ aṅa azla Yahudiya, ṅgaha la azlamanəfay aṅatà gesina. Kamkam, tsəb gi sləm lela."

<sup>4</sup>"Azla Yahudiya tasəl madz à ahəṅ gulo dagay uwana gi bəziga. Tasəl babay madz à ahəṅ gulo la tataka azladza gulo la abà, ṅgaha la uwana la Urusalima bay.

<sup>5</sup>Dagay uwarà gənəfà manəfay aṅa azla Farisəya, tetəvi aṅa manəfay zlazladaga, aṅatà tasəl uwaga dagay uwarà, tazà sayda aṅa uwaga bay à baṅa asa à atà.

<sup>6</sup>Lagonay kà, gi la huma seriya kà, mapəhay uwana Zəzagəla akəsla vok slawda la azlababa gami madzidziga.

<sup>7</sup>Tsəhay gami kulo gəl aṅha səla tafà gəl à uwana adapaka vok, gay gə la uwaga taslèkàw Zəzagəla vud mavakay gesina kà manəwəṅ, uwaga à uwana azla Yahudiya tapùw gi gudzi à gəl!

<sup>8</sup>Akul, azla Yahudiya, kà mana kagədawwaṅ à afik kà Zəzagəla adawulla azlamazimnekid à uda aw ma?"

<sup>9</sup>"Tekedik kà, gi la gəl gulo kà, gəyàh mawis sləm aṅa Yesu zil Nazaret uwaga ala la dabaray anik anik.

<sup>10</sup>Gədhà uwaga kà la Urusalima. Azlamadzahaga aṅa azla Yahudiya tavà à gi tetəvi kà madaw azladza uwana tanəf tetəvi uwaga à dañay gesina, azlauwana tadəhàhà atà seriya mamətsay à gəl. Gi bay, gəkəs uwaga bay.

<sup>11</sup>La azlagəy madəv kudà la aku gesina kà, gədhà à agu kà makas atà la matəərb atà tsəràh à uwana tapəsəw sləm aṅa Yesu Kristu. Gəfà à atà guvəl à adi, kà atà aṅa masak à tetəvi aṅa madiṅal gəl à vok aṅatà, gədhà tsəràh à azlagudəṅ uwana la uda gə kà matəərb atà la abatà bay."

<sup>12</sup>"Kiya uwana gədhà à Damas la patanti la ahàl, uwana azlamadzahaga aṅa azlaməna mav tatak à Zəzagəla tavà à gi.

<sup>13</sup>Mok uwana gi la tetəvi la ama, la tataka afats kà, udaka asà à ahəṅ la zagəla aṅəràzl gi à adi, anudà gi à abà la azladza uwana anina gesina.

<sup>14</sup>Kuratata məsòkw à vədah gesina, gətsənà kuda uwana atsən la gay ibəranəṅkowen: 'Sawul, Sawul, kà mana katəərb gi ma? Uwaga kà azakà à kak ndzer, bokuba kokur uwana akweska mabəlakəṅ aṅa dza aṅha la azəva la gay.'



- 15**Gənav: 'Kak uwa, Sufəl?' Sufəl agòd à gi: 'Gi Yesu uwana katəərbəh.
- 16**Ama lagwa kà, sà à afik, tsizlla ala, kà uwana gəkèsàni ka, kà kak aña magay kohana gulo, uwana gəpəhakala vok. Kadàgay masla sayda gulo kà uwana kanəh gi lakana, ngaha kadàza à atà uwana gədàpəhakala aya.
- 17**Gədətəf ka la ahəl aña azla Isərayel ngaha la ahəl aña azla tsəhay dza anik gesina babay, azlauwana gədàsləl ka à slaka aņatà,
- 18**kà kak aña mapəzlla atà yewdi, kà kak aña masəlla atà à uda la mələs la abà, ngaha kadala atà à uđaka à abà, katəf atà la ndzəda aña seteni la abà, kà atà aña mad à masal aña Zəzagəla à abà, kà atà aña mabəz mamatsila tsakana aņatà. Kà slaka aņatà aña magay la tataka aña azlauwana la abà, tadiņ gəl à Yesu à vok à uwana Zəzagəla adatsatsamani atà', Yesu agòd."
- 19**"Iyay, sufəl Agəripa, gəkès kà tatak uwana Zəzagəla afətəgəla à adi ala la zagəla.
- 20**Terəña dadəh kà, gəzəh kà azlaməna madz à ahəh la Damas, ngaha la Urusalima, azlauwana la kutso Yahudiya gesina, kà atà mapəh gay la ləv ala, la mabəđla vok à slaka Zəzagəla, ngaha kà atà madəh azlasləray delga, la uwaga azladza aña masəlay kà tagola ləv aņatà la dziriga.
- 21**Kà uwaga à uwana azla Yahudiya takəs gi la məh gəy Zəzagəla la aku, tawoyà makəđ gi,
- 22**Ama tsəràh à lakana Zəzagəla anəhla gi, gədatsizl à ahəh aña mapəhla ala dziriga la huma azladza gesina, la azlamənga la azladza anik gesina. Gəpəh tatak anik aw, say uwana Musa la azlaməna mapəh à atà gay à ahəl tapəh adəpaka vok pəra:
- 23**Kristu adàsa ngərpə, adəgay matera aña mawul à uda la mamətsay, kà mapəhla uđaka aña mabəlay azla Yahudiya ala, la azlatsəhay anik anik gesina bay, tagòd."
- 24**Bokuba uwana Pol apəh dziriga aņha kà, Festus agòđal la kuda zləkkà: "Pol, kak utsi, mapatla, madzeņay aņak uwaga kà apakàkala kà kusoņu!"
- 25**Pol agòđal: "Gi la lig aņak, gi kusoņu aw! Uwanay kà gay dziriga, uwana azladza takəsay la uwana gəpəh gesina.
- 26**Hadəy sufəl Agəripa, guba akəs gi, kà mapəh à ka aw, kà uwana kasəl gay gulo, tatak la ahəh mahadəkaņ à adi gə la uwanay la abà gesina aw, kà uwana uwanay kà apəhla vok ala kà la dazuwaya.
- 27**Sufəl Agəripa, kadiņ gəl à uwana à vok, azlauwana azlaməna mapəh à atà gay à ahəl tapəhà ay? Gəsəl kà kadiņal gəl à vok!"
- 28**Agəripa agòđ à Pol: "Tsa baņa kiya uwaga kà, fà à gi, wəđ vok à uda kà mapak gi ala, kà masla madiņal gəl à vok zlà!"
- 29**Pol agòđ: "Adagay lagwa, ku bà la huma la gay, gədəv kudà à Zəzagəla, kà kak la azlaməna matsəb gi sləm uwana la abanay gesina, kà akul magay kiya gi, uwana gi masla manəfay, ama la kokudà mazakazak!"

<sup>30</sup>La lig aña uwaga la ahəŋ, sufəl, gumna, la Berenəs gesina tasà à afik la azladza uwana la abatà kà uwana kaslà adaslay.

<sup>31</sup>Uwana tadà à fəta à awtày, tagòd kà: "Dza uwanay kà, adahàŋ mawisiga uwana asla makədlà, baməraka maduw à daŋay aw."

<sup>32</sup>La abatà Agərīpa agòd à Festus: "Naka məsləlla vok aña maduw gəl à dza uwanay, agay ayàh madiya seriya à huma aña sufəl Rom aw."

## Sləray 27

<sup>1</sup>Mok uwana agòd à afik kà maday à Italiya la kəslah iyaw kà, tafà Pol la azlaməna daŋay anik, à ahəl aña mənğa aña azlaslodzi aña sufəl Rom, uwana sləm aŋha Yuliyus, masla tekula aña azlaməna manəŋla mən sufəl.

<sup>2</sup>Məhəd à kəslah iyaw uwana à afik asà à waŋ la Adəramit kà, uwana atsizilla à ahəŋ la azlabəza gudəŋ uwana la abà la gay dərəv uwana la kutso Asəya la abà. Arəstarkus, zil Makeduniya alakà anu.

<sup>3</sup>La bebəŋ gà, məbèz à Sədon. Vok aham à Yuliyus kà Pol, avəl tetəvi kà maday manəŋ azlaslawda aŋha à gay, kà manəŋal à adi.

<sup>4</sup>Dagay la abatà mətsizilla ala, məguwà la makəla aña gudəŋ Sipəre, uwana la iyaw la abà, la gay uwana afaɸ la ahəŋ aw, kà uwana afaɸ awùl anu à adi la azlaslaka anik anik la abà.

<sup>5</sup>Məguwà à uda la dərəv uwana la abà la makəla aña Səlisəya la Pamfiliya, məbèz à gudəŋ Mira uwana la kutso Lisəya la abà.

<sup>6</sup>La abatà mənğa aña azlaslodzi abəzà kəslah iyaw anik uwana atsizilla ala la Alekəsandəra, uwana adiyà à Italiya. Abək anu à uwatà à afik.

<sup>7</sup>Mədà à huma la ŋuv ŋuv la azlamahanay anik anik la abà: La kudà kudà məbèzà à Sənid, à kà uwana afaɸ adəɸ à anu gay à ahəŋ kà maday à huma, məguwà la makəla aña Kəreta, uwana afaɸ la ahəŋ aw, mətsədà à Salmone lakəl ala.

<sup>8</sup>Məzləl gərdza la zlazladà, məbèz à slaka uwana tazalalla slaka matsizl à ahəŋ delga, uwana kərkər la kutso Lase aw.

<sup>9</sup>Mədzà à ahəŋ mənğa la abatà kà uwana maday la kəslah iyaw kà zlazladà, tsəràh à uwana təla awkuza adà à lig.

<sup>10</sup>Gay gà la uwaga Pol apəh à azladza anik à vok à abà la magod à atà: "Mauguzahay gami kà, adagay zlazladà ŋodəgi, kà uwana mən kular la ahəŋ, azlatatak uwana la kəslah iyaw la abà, bə la gəl kəslah iyaw gə bay kà, tadəwis ala. Bə uwaga pəra aw, bə sifa gami babay kà, tadətafay ŋodəgi aw."

<sup>11</sup>Ama mənğa aña azlaslodzi akəs gay aña masla mabiy kəslah iyaw la mənğa aña kəslah iyaw, kà gay aña Pol.

- 12**Mətsizilla à ahəŋ la abanay la viya la abà kà delga aw. Gay gà la uwaga, gay mənğa aŋa azladza tayàh kà maday kà mabəz Fenikəs, la abatà la uwana slaka matsizl à ahəŋ aŋa azlakəslah iyaw la gay tər gərdza aŋa Kəreta uwana agola à huma à mas à afik afats, ŋgaha la matəf à ahəŋ afats à gay, kà uwana slaka uwatà kà adzà à afad à ama.
- 13**Bokuba uwana bəzi afad adzəkà vok kà madəfəy fewfafew kà, delga tagòf à kà uwarà afad adika atà, ŋgaha mauguzahay gami kà adagay delga tagòf, ŋgaha tapàlla tatak uwana tawəfàh ala à kəslah iyaw à ahəŋ, la maday la manəf gay gərdza aŋa Kəreta.
- 14**Ama asəf aw, katskats magol afad gədgədgəga uwana sləm aŋha maul à ahəŋ aŋa mas à afik afats, asà à ahəŋ la gudəŋ uwana la afik la tataka iyaw la abà.
- 15**Aduwà ndzəfà aŋa kəslah iyaw, dza aslala vok aŋa madla aw. Məsək afad, adàla anu bokuba uwana asəl.
- 16**Məguwà la makəla gudəŋ uwana la iyaw la abà, sləm aŋha Kawda, uwana adzà à anu à ama ŋuv. La abatà la kudà kudà məwadà bəzi kəslah iyaw à ahəŋ, kà mazila aw.
- 17**Tazəb kəslah iyaw bəziga uwaga, tafà à mənğa à afik. Ŋgaha tatsefəfəfə mənğa à ahəŋ la azlazuwid, kà uwana guba akəs atà kà mazləl wuyyaŋ, uwana la gay gərdza aŋa Libiya. Gay gà la uwaga tazəb lukut uwana à ahəŋ adàla kəslah iyaw, taməl à iyaw à abà, tasək à kəslah iyaw afad adàla.
- 18**La bebəŋ gə, afad bə madəfəy adəfəy, kà tadzəkà matsikla kazlaŋa uwana la kəslah iyaw la afik.
- 19**La bebəŋ gə aya kà, tawəts ala azlazuwid la azlalukut la azlaahəf uwana tadàla kəslah iyaw la ahəl aŋatà.
- 20**Mavakay dəŋ kà mənəŋə afats la azlatsetsiliŋ aw. Kà uwana afad adəfəy la ndzəfà, tsəràh à uwana məfà madzugway kà mətəfay aya aw.
- 21**Azladza uwana la kəslah iyaw la afik tazùw tatak may dagay uwatà aw, Pol atsizilla ala, agòf à atà: "Azladeda, agayŋa kakəsàw gay gulo kà à uwana madz à ahəŋ la Kəreta, gəgòf kà, naka ŋuləm, naka mətəfay la nassara uwanay la abà adazuw anu la mazila uwanay mədàzila.
- 22**Ama lagwa kà, dəfəw gay ləv, kà uwana dza la ahəŋ adàzila la tataka gami la abà aw, say kəslah iyaw pəra.
- 23**Kà uwana la vədfà kà, Sufəl Zəzagəla gulo uwana gənəfay, asləl malika aŋha à waŋ à slaka gulo.
- 24**Agòf à gi: 'Pol, guba akəs ka aw! Ndzer, kadàtsilay à huma aŋa sufəl aŋa Rom. Aganay, vok adahama à Zəzagəla adəbəl sifa aŋak la azladza uwana la kəslah iyaw la afik gesina.'
- 25**Gay gà la uwaga guba akəs akul aw, gəfa madzugway gulo à Zəzagəla à afik, kà adəfəhəŋ bokuba uwana apəh à gi!

- <sup>26</sup>Ama afad adàdala anu à gudəŋ anik à afik la iyaw la abà.”
- <sup>27</sup>Adadàh mahənay kulo gəl aŋha ufad à uwana afad adzəkà madla anu à dərəv à abà. La tataka vəd, masla mabəlak kəslah iyaw adzùgw kà: 'Mədàbəz à kutso à abà', gəl agòdal.
- <sup>28</sup>Tazəb zuwid uwana tadəbal adà à agay kà magur zəŋzəŋ aŋha dərəv. Zəŋzəŋ aŋa kà, kà kulaslay dzik səla. Tadà à huma zwek kà kulaslay kulo.
- <sup>29</sup>Guba akəs atà kà afad aŋa madla atà à gudəŋ à afik, gay gà la uwaga tatsək adà ufad à iyaw à abà, la lig kəslah iyaw, ŋgaha takudà kà afad aŋa madla aw tsərəh à məl maulla.
- <sup>30</sup>Azlaməna mabəlak kəslah iyaw kà, asà à atà mas à ahəŋ la kəslah iyaw la afik kà madiŋ atà. Tazəb bəzi kəslah iyaw à ahəŋ à iyaw à gəl, ŋgaha tadzùgw kà mamalay adà, mawad ala kəslah iyaw à vok la huma gà bay.
- <sup>31</sup>Ama Pol agòd à azlaslodzi la azlaməŋga aŋatà: "Baŋa azlaməna mabəlak kəslah iyaw tadza à ahəŋ la kəslah iyaw la afik aw kà, məbəlay aw.”
- <sup>32</sup>La abatà azlaslodzi tanətsàhà zuwid uwana ala tadabəla kəslah iyaw bəziga gà, tasàkal, adà aŋha kokudà gəl aŋha.
- <sup>33</sup>Mok uwana məl adawula à waŋ dadaŋ aw kà, Pol adəv atà kudà kà mazuw tatak may, agòd à atà: "Dagay mahənay kulo gəl aŋha ufad kazuwaw tatak aw, kakùdàw.
- <sup>34</sup>Delga kazuwaw tatak may ŋuv, à baŋa asa à akul məbəlay. Ama baməraka aŋidz gəl aŋkul azila aw!”
- <sup>35</sup>Uwana adapəh uwaga, azəb tatak may, atsàkəŋ ala, kikay agòd à Zəzagəla la huma azladza gesina, ŋgaha tadzəkà mazuway.
- <sup>36</sup>Kiya uwaga haŋkəli aŋatà gesina adza à ahəŋ titi, tazùw.
- <sup>37</sup>Matugway aŋa azladza uwana la kəslah iyaw la afik kà dadərmokw səla bəzi aŋha dzik mədəf gəl aŋha mukwa.
- <sup>38</sup>Mok uwana tadahən ala tatsək nalkama à iyaw à abà kà matetuw mahanay aŋa kəslah iyaw.
- <sup>39</sup>Mok uwana məl adawulla kà, azlaməna mabəlak kəslah iyaw tasəl slaka uwana atà la abà aw, ama tawùl à slaka wuyyaŋ gà, kà uwana tanəŋà dzəluŋ aŋa dərəv. Tayəh madla kəslah iyaw à abatà kà magəd à abà à baŋa abəzà vok, tagòd.
- <sup>40</sup>Gay gà la uwaga tanətsàhà zuwid adà uwana tawədhəla à ahəŋ, tasàkal la iyaw la abà. Dgaha tatsizlləŋ ala lukut, uwana la huma kəslah iyaw, kà afad aŋa madla à wuyyaŋ uwatà à afik.
- <sup>41</sup>Ama kəslah iyaw abəzà slaka uwana iyaw slemslem gà, atsà gay tər à wuyyaŋ à abà. Tetuwa abəlakà vok aw. Dgaha godega gà kà magaŋtsay aŋa iyaw akələhəŋ ala gesina.

<sup>42</sup>Azlaslodzi tawoyà makad' azlaməna daŋay, kà tekula aŋatà aŋa matəfay la magosagosa aw.

<sup>43</sup>Ama mənŋa aŋa slodzi aŋa Rom uwana asəl matəf Pol, adəf à atà gay à ahəŋ kà magəd' mapəhay aŋatà à afik. Avà tetəvi à azlauwana tasəl magosagosa kà mavalàh à iyaw à abà kà mats à vok à kutso à abà.

<sup>44</sup>Azlaanik aŋatà takàs azlaahəf aŋa kəslah iyaw à ahəl kà mas à uda, azlaanik tadəh à uda la makas azlamakalahla aŋa ahəf uwaga, kiya uwaga gesina aŋatà tasà à kutso à abà la wurwur.

## Sləray 28

<sup>1</sup>Uwana mədabəz à kutso à abà la wurwur, mətəənəŋ kà sləm aŋa gudəŋ uwatà tazalalla Malta.

<sup>2</sup>Azladza la abatà takəs anu la ahəl səla. Uwana iyaw adadzəka masuway, anasl adzəkà vok babay, tavətsəh à anu akəl à ahəŋ.

<sup>3</sup>Pol ayəh tsetsema kà mabək à akəl à gay, akəl akudək bebi makəsafər gə à uda la tsetsema uwatà la abà, atsà Pol.

<sup>4</sup>Mok uwana azladza uwana la abatà tanəŋà bebi adagəd' à Pol à ahəl tadzəbərta kà, tagòd': "Paraka, zil uwanay kà masla makad' dza. Baməraka adatəfay la iyaw uwanay la abà bay kà, mazlazlay gami uwana mənəfay, sləm aŋha dziriga kà, adəsakal la sifa aw."

<sup>5</sup>Ama Pol akotsək bebi à akəl à abà, atsənà mazəŋ aŋha amiyaka ŋuv ŋuv aw.

<sup>6</sup>Madzugway aŋatà kà ahəl akəsəlal à gəl baŋaw amətsay, tagòd'. Ama uwana adasafay, tanəŋà uwana adəhəlla tatak aw, tagòd': "Iyay, masla kà zəzagəla."

<sup>7</sup>Guf aŋa Pubəliyus, sufəl aŋa azladza gudəŋ uwatà la ahəŋ nekwa la slaka uwatà. Akəs anu la ahəl səla aŋa diŋa, mədzà à ahəŋ la mtəga aŋha mahənay makər.

<sup>8</sup>Baba aŋa Pubəliyus la slaka mahən à ahəŋ, akəl la vok atəh hudzay aŋiz. Pol ahəd à slaka aŋha, adəv kuda, abəkəh ahəl à gəl, awurəŋ ala.

<sup>9</sup>La lig la ahəŋ, azladza uwana la kutso uwatà la abà atà la dūvats, tasəhà à waŋ à slaka Pol, awarà atà ala.

<sup>10</sup>Tavəhà à anu azlatatak deyday kà aŋuvaw. La mok uwana məday à kəslah iyaw à afik kà madiy aŋami babay kà, tavəhà à anu azlatatak uwana mənəkudà aŋha la mauguzahay gami la abà gesina.

<sup>11</sup>La lig aŋa təla makər la ahəŋ mətəzəlla ala, mədà à kəslah iyaw uwana à afik aguwà à waŋ la Alekəsandəra tazəlalla: 'Fəla vəgal', uwana adzà à ahəŋ la gudəŋ uwatà la abà la təla zlazladəga.

<sup>12</sup>Məhəl vok la abatà, məbəz à gudəŋ uwana sləm aŋha Sərakusa, mədəhəŋ mahənay makər la abatà.

- 13**Mətsizlla ala la abatà aya, məbèz à gudəŋ uwana sləm aŋha Redziyo. La bebəŋ gə, afad aŋa gəl à agu adzəkà vok. La mahəŋay səla la abà à məbèzà à Pusol.
- 14**La gudəŋ uwatà la abà kà, məbèzà à deda à vok uwana: "Dahàw à waŋ kasukwa tekula la abanay", agòd à anu. Mətsilla ala, məhàd la asik. La kiya uwaga à uwana məbèzà à Rom.
- 15**Mok uwana azladede la Rom tatsənà gay lakəl gami, tasà à waŋ à kasukwa aŋa Apiyus à slaka matsekw à ahəŋ, uwana barki makər la abatà bay kà magagamay anina. Uwana Pol adanəŋ atà, 'Kikay', agòd à Zəzagəla, adzərədà vok ala, arəb mənğa.
- 16**Mok uwana mədabəz à Rom kà, tavà tetəvi à Pol kà madz à ahəŋ kokudà gəl aŋha la slodzi tekula uwana anəŋla.
- 17**Uwana mahəŋay makər adada à lig kà, Pol azàläh azlamənğa aŋa azla Yahudiya uwana la Rom. Tahamà gay à vok, agòd à atà: "Haday, azladede, gəfahà mawisiga à azladede gami à vok baməraka lakəl aŋa azlababa gami madzidziga gami aw, ama takəs gi la Urusalima, tafà gi à azla Rom à ahəl.
- 18**Azla Rom tanavà gi tatak uwana gəfahəŋ. La abatà asà à atà maduw gi gəl kà uwana tanəŋà mawisiga uwana gəfahəŋ kà makədlə gi aw.
- 19**Ama uwana azla Yahudiya takəs kà, tadùw gi gəl aw, gay gə la uwaga leri gulo, gəgòd kà, say tadàh gi seriya kà la huma aŋa sufəl Rom, awkà gəpuwà gudzi azlatsəhay gulo à gəl magay aw.
- 20**Gay gə la uwaga gəyàh akul aŋa manəŋ akul la mapəh à akul gay uwanay babay, tawàdà gi, kà gay aŋa dza uwana azla Isərayel tafà manəwəŋ aŋatà à afik, à uwana tawàdà à gi la mazakazak uwanay zlà."
- 21**Tagòdal: "Məbèzal wakità tatsətsər à waŋ la Yahudiya babay aw, dza la ahəŋ asà à waŋ la abatà aŋa mapəh à anu tatak uwana apakà vok babay lakəl aŋak aw.
- 22**Ama lagwa asà à anu matsən madzugway aŋak lagwa zlà, kà uwana məsəl kà baməraka la mali kà, tapəsəw azladza uwana tanəf uwanay kak la abà lagwa."
- 23**La abatà tafà afats à ahəŋ, kà maham gay à vok aya la azla Pol. Uwana mavakay uwaga adaslay, azlauwana tahamà gay à vok la slaka Pol aduwà uwana uwarà. Lis, Pol avək à mapəhatàla à gəl matapatàla gay makoray Zəzagəla. Awàd vok à uda kà magəd à atà à gay aŋa Yesu à afik adzəd à atà gay aŋa Yesu ala la wakità aŋa Musa la abà, la uwana azlaməna mapəh à atà gay à ahəl tapəhla à abà.
- 24**Azlaanik aŋatà takəs uwana Pol apəh, ama azlaanik takəs aw.
- 25**Uwana tavəh vok ala kokudà matsən vok gay la tataka aŋatà la abà, Pol apəh à atà kà gay tekula pəra: "Tatak uwana Masasədok Zəzagəla apəh à azlababa aŋkul la ahəl aŋa masla mapəhal gay à ahəl Yesayya kà, agəd à afik haday!
- 26**Zəzagəla agòd: 'Hàd, gòd à azladza gulo: Katsənawwaŋ lela, ama bokuba katsənawwaŋ aw. Kanəŋawwaŋ, ma bokuba kanəŋawwaŋ aw.

<sup>27</sup>Azladza uwanay tadzadzàh gəl aṇatà ala. Tanakàh à sləm aṇatà à ama. Tatsakàh à yewdi aṇatà à ama. Tsa baṇa kità kà, atà aṇa manəṇla la yewdi, atà aṇa matsən la sləm aw. Dgaha kà ləv aṇatà aṇa masəl tatak aw. Dgaha kà atà aṇa mawul à slaka gulo kà gi gədàwur atà ala aya aw.' Zəzagəla agòd."

<sup>28</sup>Pol agòd aya: "Haday, sèlàw kà Zəzagəla aslèl gay aṇha à slaka azlatsəhay anik bay lakana, kà atà aṇa matsənəṇ!"

[<sup>29</sup>La lig aṇa uwaga la ahəṇ azla Yahudiya tadà aṇatà la mabay vok gay la tataka aṇatà la abà.]

<sup>30</sup>Mavay səla Pol adzà à ahəṇ la gày hayyà la aku. Akàsàh dza uwana tadàh à awtày à slaka aṇha la ahəl səla.

<sup>31</sup>Azahà gay aṇa Zəzagəla, apàhla gay aṇa Sufəl Yesu Kristu à azladza, apəh la mawad vok à uda, dza la ahəṇ adəfdal gay à ahəṇ aw.

## Rom

### Rom 1

- <sup>1</sup>Gi Pol, la uwana gətsetser wakità uwanay, gi uwana gi mayà aña Yesu Kristu. Zəzagəla akəsàni gi, kà gi aña magay masla matapla aña, kà gi aña maz gay marabəñ à azladza.
- <sup>2</sup>Gay marabəñ uwanay kà, Zəzagəla apəh à anu à ahəñ, kà masləl à anu à wañ la pañaw aña azlaməna mapəh à atà gay ahəl la awtày dagay uwarà, bokuba uwana matsəterayga la wakità Zəzagəla la abà.
- <sup>3</sup>Apəhay lakəl aña Kona aña, Sufəl gami Yesu Kristu, la kaslà uwana asà à gudəñ à vok, agà mayyi à tsəh ala aña David.
- <sup>4</sup>Ama la kaslà uwana Zəzagəla awùlla à uda la mamətsay agədāñ à afik kà Kona aña, la ndzəda ngaha ahənəñ ala la ndzəda aña Masasədok aña.
- <sup>5</sup>Kà madəgolay masla aya à uwana Zəzagəla apakà gi ala kà masləlay aña, kà gi aña mad maz gay aña à azladza tsəhay gesina, kà atà aña madiñal gəl à vok, ngaha kà atà makəs masla gay aña, kà atà aña masləkaw Yesu Kristu.
- <sup>6</sup>Akul, azla Rom babay akul la abà, à uwana Zəzagəla azalà à akul, kà akul aña magay azlaaña Yesu Kristu.
- <sup>7</sup>Gay gə la uwaga, gətsetser à akul, akul gesina uwana la Rom: "Zəzagəla awoya akul, Zəzagəla azalà à akul, kà akul aña magay azlaaña. Zəzagəla Baba, la Sufəl gami Yesu Kristu, kà vok ahamà atà kà akul, ngaha tavà à akul lapiya."
- <sup>8</sup>A dadəñ kà, kikay gəgod à Zəzagəla gulo kà aña gesina, kà uwana azladza la gudəñ la vok gesina kà, tapəhay lakəl aña madiñ gəl à Yesu Kristu à vok aña. Kikay gəgod à Zəzagəla kà Yesu Kristu.
- <sup>9</sup>Bamərika mbaw, uwana gədəv kudà à Zəzagəla kà, gədəv kudà kà aña, gi la madəv kudà la abà. Uwanay gəpəhay kà, Zəzagəla kà asəl kà dziriga, gədehəñ sləray aña ndzer la ləv tekula, ngaha gəz gay marabəñ lakəl aña Kona aña.
- <sup>10</sup>Gədəv kudà koksikoksi kà masla aña mav à gi tetəvi lagonay, à baña asal kà gi aña mad à awtày à slaka aña.
- <sup>11</sup>Asa à gi, kà gi aña maduw à awtày à slaka aña ndzer, kà anu aña makal tatak, uwana Masasədok Zəzagəla av à gi, ngaha kà madzərədəh akul ala aya.
- <sup>12</sup>Gədagoday, gəgod kà anu gesina mədzərədəh vok ala. Kadzərədəwəla kà uwana kadiñaw gəl à Kristu à vok, ngaha gədzərədəhakulla kà uwana gədiñ à masla à vok babay.
- <sup>13</sup>Azladeda, sələw kà, gədzagəh mad à awtày manəñ akul à gay, ama gəbəzà à tetəvi aw. Asà à gi mad à awtày kà madəh sləray la tataka aña la abà bokuba uwana gədehəñ la azlatsəhay dza anik la abà babay.



- <sup>14</sup>Zəzagəla afà à gi sləray uwanay à gəl. La kità leri gulo gəz gay marabəŋ à azladza uwana tawur gəl, la azladza uwana tasəl tatak aw, gəzəŋ à azlauwana tadzeŋay la azlauwana tadzeŋay aw gesina.
- <sup>15</sup>Gay gà la uwaga, gəyàh tetəvi la iyaw tugwi kà mazakullaŋ gay marabəŋ à akul azladza la Rom babay.
- <sup>16</sup>Ziruwi aza à gi kà maz gay marabəŋ aw. Gəđəđ gay ləv kà mazaŋ gay marabəŋ, kà uwana ndzəda aŋa Zəzagəla la gay uwaga la abà, kà mabəl azlauwana tadiŋ gəl à Yesu à vok gesina. Teraŋa azla Yahudiya dadàŋ, ŋgaha azlauwana azla Yahudiya aw.
- <sup>17</sup>Gay marabəŋ uwaga la uwana apəhla ala kà, kakay Zəzagəla apaka kəla azladza ala dziriga la huma aŋha mi. Tetəvi uwaga adzəka vok kà la madiŋ gəl à masla à vok pəra. Bokuba uwana tatsətsəŋ à wakità Zəzagəla à abà kà: Dza uwana Zəzagəla apakəŋ ala dziriga la huma aŋha, kà uwana adiŋ gəl à Yesu à vok, kà masla la uwana la sifa dziriga.
- <sup>18</sup>Ndzer, Zəzagəla apəh à anu la paraka kà masla la mapak ləv gà dagay la zagəla kà tsakana gesina uwana azladza tadəhəŋ, ŋgaha kà uwana tasləkaway Zəzagəla aw. Adàdaha à atà seriya à gəl, kà uwana la tatak mawisiga uwaga tadəhəŋ kà adəđ gay à azladza à ahəŋ kà masəl dziriga.
- <sup>19</sup>Zəzagəla adàdukw à atà seriya à gəl, kà uwana tetəvi uwana à naka tasəla masla kà dazuwaya, kà uwana Zəzagəla la gəl aŋha kà, adapəhatàla, ama tanəfà aw.
- <sup>20</sup>Dza adanəŋ masla dikiđiki aw. Ama la maŋal gudəŋ à vok tsəràh à lakana la uwana, azladza taslala vok aŋa masəlay lakəl aŋa tatak uwana adəhəŋ. Uwaga paraka, masla la ndzəda uwana atətuway dikiđiki aw. Ŋgaha adzəda ala babay, kà masla kokudà gəl aŋha la uwana Zəzagəla. Kà uwaga à uwana Zəzagəla adəbasatəŋ aw, tetuwa.
- <sup>21</sup>Tekeđika tasəl, kà Zəzagəla la ahəŋ nəma, ama tasləkaw masla, bokuba uwana azlayla kà vok aw, kikay tagodəl aw. Madzugway aŋatà kà deydayga pəra, tasəl uwana tadəhəŋ aw, tadza à ahəŋ kà la mələs la abà.
- <sup>22</sup>Madzugway aŋatà kà: 'Anu azlamatsihila gə', tagodə, ama tsa tatsaha ala aw,
- <sup>23</sup>kà aŋa masləkaw Zəzagəla uwana la mazləbəy, ŋgaha uwana amətsay dikiđiki aw. Kà atà kà, tasak à uwaga, tasləkaw kà azlamazlazlay. Tadəhəŋ kà azlatatak uwana la maftsa vok aŋa azladza uwana tamatsay, azlaanik bokuba azlatatak uwana taday la huđ la vədəh, ŋgaha azlaanik bokuba azlatatak mahoyay la zagəla, kà tasləkaw kà azlauwaga pəra.
- <sup>24</sup>Kà madəhəŋ aŋatà uwaga à uwana Zəzagəla askətàla à ahəl la tsəh ala, kà atà aŋa madəh azlatatak mawisiga, uwana asa à ləv aŋatà, la kità tadəhəŋ azlatatak ziruwi gə, kà atà à atà.
- <sup>25</sup>Dziriga aŋa Zəzagəla kà tasəkəl, tanəfa fida. Tasləkaw kà azlatatak uwana Zəzagəla aŋaləh la ahəl aŋha, ama tasləkaw masla uwana aŋəl tatak gesina aw. A naka tasləkaway kà masla aŋa koksikoksi la uwana. Amen.

<sup>26</sup>Gay gà la uwaga à uwana, Zəzagəla asakətəla à ahəl la tsəh ala, kà atà aña madəhəŋ azlatatak uwana asa à ləv aŋatà. Azlamis tasək azlazil, ŋgaha tatsatsəläh vok kà atà kà atà mis mis, uwana naka azlayla kà vok aw.

<sup>27</sup>Azlazil babay tadəhaŋ kalkal la uwaga, tasək azlamis la tsəh ala kà matsatsəläh vok kà atà kà atà zil zil. Azlazil tadəha tatak ziruwi gà kà atà, tabiya seriya à gəl aŋatà, la tsakana aŋatà uwana tadəhaŋ.

<sup>28</sup>Uwana azladza uwanay takweska masəl Zəzagəla kà, Zəzagəla asakətəla la ahəl la tsəh ala, ŋgaha kà madzugway aŋatà aña magay mawisiga kaykay, kà atà madəh azlatatak uwana azlayla kà vok kà madəhəŋ aw.

<sup>29</sup>Azlatatak mawisiga gesina adahən ləv aŋatà ala, takəɸ yewdi à tatak aña azladza anik à vok, azlamaksafər, tadəh maŋor, azlaadi, takəɸ dza, tabay vok gay, azladəmdəm bokuba azlahayyaŋ, tadala dza la gay.

<sup>30</sup>Takal dza ala, atà azlaməna məzam aña Zəzagəla, tatsək magodəhay à azladza anik à gəl, azlazlapay takəslay, bə gotənaŋ tayyi à tsəh azlatsakana anik anik aya, takəs gay aña azlababa aŋatà dikidiki aw.

<sup>31</sup>Tasəl gəl aya aw, tagədəŋ gay aŋatà à afik aw, tasəl mawoy dza aya aw, vok ahamaà atà kà azladza anik aw.

<sup>32</sup>La paraka azladza uwaga tasəl kà mapəhay aña Zəzagəla la ahəŋ, ŋgaha kəla dza uwana adəh tsəhay sləray mawisiga uwanay kà, mamətsay atədəl à gəl, ŋgaha bə uwaga tada à huma à gay la madəh mawisiga, ŋgaha tazləba azladza uwana tadəh mawisiga uwaga babay.

## Rom 2

<sup>1</sup>Kak uwana 'Gi masla madəh seriya à azladza anik à gəl', kagod, kasəl la gəl aŋək kà, kadətəfay la huma seriya aña Zəzagəla aw, baməraka kadəgay uwi. Ndzer, la gay aŋək la uwana kədabiyla vok seriya à gəl.

<sup>2</sup>Məsəl kà delga à baŋa Zəzagəla adəh seriya à azlaməna madəh mawisiga uwaga à gəl.

<sup>3</sup>Kak dza, uwana kadəh seriya à azladza anik uwana à gəl tadəh tsəhay mawisiga uwaga, tsa kak babay kadəhəŋ kà kiya aŋatà ma? 'Gədətəfay la huma seriya Zəzagəla', kagod takay?

<sup>4</sup>Awma kapəsew Zəzagəla, kà uwana masla kà dza delga, ŋgaha akuday la tsetsi dadəŋ aŋha. Səl kà, baŋa adəhaŋ kiya uwanay kà, kà uwana asal kà kapəh gay la ləv ala aw takay?

<sup>5</sup>Ama kak dzaŋdzaŋ, asa à ka mapəh gay la ləv ala aw. Kak la gəl aŋək kasəg vok seriya à gəl. Zəzagəla adədukw à ka seriya à gəl. La kità kà, seriya aŋha adəkəs ka, la kaslə uwana mapək ləv aŋha adəpəhla vok ala la mavakay uwana adədəh seriya dziriga aŋha la huma azladza gesina.

- <sup>6</sup>Adàpəl masik aṅha à uwabeyuwi la kəla sləray aṅha.
- <sup>7</sup>Azladza tawàdàh vok à uda, asa à atà kà Zəzagəla adala atà à mazləbay aṅha à abà, ṅgaha Zəzagəla aṅa masəl atà, la masəl atà kà, masla avà à atà sifa adəv à gay aw. Sifa adəv à gay aw uwaga kà, Zəzagəla adàvày kà à tsəhay atà uwaga.
- <sup>8</sup>Ama azladza anik uwanay tafa asik à Zəzagəla à gəl, takweskà dziriga, say mawisiga la uwana tanəfa. Ndzer, kà aṅa azlatsəhay dza uwaga kà Zəzagəla adàpaka à atà ləv à gəl aṅatà, ṅgaha adàdukw à atà seriya à gəl.
- <sup>9</sup>Kà aṅa azladza gesina uwana tadàh mawisiga kà, tadàsa ṅgərpə zlazladàga; teraṅa dadàṅ kà azla Yahudiya, ṅgaha la lig la ahəṅ azlatsəhay anik anik gesina aya.
- <sup>10</sup>Ama azlauwana tawàdàh vok à uda kà madàh delga kà, masla adàvà à atà mazləbay, Zəzagəla adàsəl atà, adàvà à atà lapiya; teraṅa adàvày à azla Yahudiya dadàṅ, la lig la ahəṅ à azlatsəhay anik anik gesina babay.
- <sup>11</sup>Kà uwana Zəzagəla kà avàh dza mavàhay aw.
- <sup>12</sup>Azlauwana azla Yahudiya aw kà, atà kà, tasəl mapəhay uwana Zəzagəla apəh à Musa à ahəl aw. Baṅa atà tadàha tsakana kà, tadàzila kiya uwaga, kokudà magur atà la mapəhay uwaga. Ama azla Yahudiya kà tasəl mapəhay aṅa Musa, azlauwana tadàha tsakana la masəl mapəhay uwaga, seriya adàkəs atà, kà la uwaga suwaṅ.
- <sup>13</sup>Kà uwana Zəzagəla adàpaka dza ala dziriga la huma aṅha la masəl mapəhəy pəra aw, say la madàh uwana apəh à abà, kiya uwaga kà agay dziriga la huma Zəzagəla.
- <sup>14</sup>Iyay nəma, azlatsəhay anik uwana azla Yahudiya aw kà, tasəl mapəhay aṅa azla Yahudiya aw, ama vərđi anik anik la gəl aṅatà tadəhəṅ azlatatak uwana la tetəvi aṅa mapəhay uwatà la ama. La madəhəṅ kiya uwaga, baməraka tasəl madàh tatak dzəba aṅha səla aw gà.
- <sup>15</sup>Uwanay asal magodəy la madz à ahəṅ aṅatà la abà kà, Zəzagəla afà mapəhay uwanay à ləv aṅatà à tsəh, kà atà aṅa masəlay uwana naka tadəhəṅ. Kiya uwana ləv aṅatà apəhatàla, kà uwana vərđi anik awul atà à gəl kà tadàhàṅ delga, ṅgaha vərđi anik awul atà à gəl kà tadàhàṅ mawisiga.
- <sup>16</sup>Ama lakəl aṅa azlatatak uwana gəpəh à akul la abanay kà, adàsa à uda la dazuwaya la mavakay uwana Zəzagəla adàsləl Yesu Krīstu à waṅ kà madàh seriya à azladza à gəl. Adàdàh seriya à azlatatak mahadəhəṅga uwana la ləv aṅatà la tsəh. Uwana gəpəh à akul la abanay kà, asa à uda kà la gay marabəṅ uwanay la abà gəzaṅ.
- <sup>17</sup>Akul azla Yahudiya uwana: 'Anu azla Yahudiya', kagodəw, kafaw gəl aṅkul kà à mapəhay uwanay à afik, katsaw zlapay la magodəy kà: 'Anu kà, məsəl Zəzagəla', kagodəw.
- <sup>18</sup>Ḷgaha kasəlaw mawoyəṅ aṅa Zəzagəla, ṅgaha la mapəhay uwana atapakulla, kà akul aṅa mayahani uwana delga.
- <sup>19</sup>Madzugway aṅkul kà: 'Anu azlaməna makas azlaguləf à ahəl', kagodəw.

<sup>20</sup>Ŋgaha kagodāw aya kà: 'Mapəhay aṅa Zəzagəla, kà aṅa azladza uwana tasəl tatak aw', kagodāw. Kagodāw aya kà: 'Mədāh à azladza uwana à ahəṅ azlaguḅguḅ la tetəvi aṅa Zəzagəla la tsəh'. Kagodāw aya kà: 'Mapəhay aṅa Zəzagəla atapanula masəlay, la dziriga aṅha gesina', kagodāw.

<sup>21</sup>Iyay zlà, kà mana kapəhawla tetəvi à azladza anik à ama kà, mana kapəhawla à gəl aṅkul aw zlà ma? Kazaw sayda à azladza kà mad à gəl aw, ama kà mana akul kà kadaw à gəl ma?

<sup>22</sup>'Kadaw à gəl gaw aw', kagodāw à azladza, kà mana akul kà, kadaw à gəl gaw ma? Akul kafahaw akur à ahəṅ kà madāh mazlazlay, ama kà mana akul kahəlaw azlatatak, uwana la gày mazlazlay la aku ma?

<sup>23</sup>Kayyà, katsaw zlapay kà kaykay la magodāy kà: 'Məsəl mapəhay aṅa Zəzagəla', kagodāw, ama kà kalawla mapəhay aṅha ala, kiya uwaga kà, kawisaw sləm aṅa Zəzagəla ala.

<sup>24</sup>Kà uwaga à uwana tatsetsèr à wakità aṅa Zəzagəla à abà, kà azlatsəhay dza anik tawis sləm aṅa Zəzagəla ala kà, kà madəhəṅ aṅkul, akul azla Yahudiya.

<sup>25</sup>Akul azla Yahudiya kà, kadavaw vok à uda, kà mapəhla ala kà akul aṅa Zəzagəla. Ama baṅa kanəfaw mapəhay lela aw kà, makədəv vok à uda aṅkul kà deyday pəra.

<sup>26</sup>Baṅa dza uwana makədəv à uda gà aw, ama anəfa kà mapəhay, masla kà kalkal bokuba makədəv à uda gà.

<sup>27</sup>Dza uwana makədəv à uda aw gà, ama anəfa mapəhay, adəkəlla à akul ala ziruwì à gəl, à akul uwana kasəlaw mapəhay la gay aṅa makədəv vok à uda nəma, ama kanəfaw aw.

<sup>28</sup>Hadāy ma, magay zil Yahudiya ma la gay gà pəra takay? Awaṅ, say la makədəv vok à uda, uwana aṅa Zəzagəla, awkà gay makədəvani sləḅ vok à vədāh, uwana azladza tanəṅəṅ la yewdi pəra aw.

<sup>29</sup>Ama magay zil Yahudiya kà, aguwa à uda kà la ləv la tsəh, ṅgaha makədəv vok à uda kà agay kà aṅa ləv uwana Masasədok Zəzagəla, apəhla ala awkà la mapəhay uwana tatsetser aw, uwaga anəkudā mabəzal mazləḅay la slaka azladza aw, ama la slaka Zəzagəla.

### Rom 3

<sup>1</sup>Baṅa kiya uwaga ma, magay zil Yahudiya ma, mana akəs vok ma? Makədəv vok à uda ma, azlak anu takay?

<sup>2</sup>Hadāy, aduwa vok gesina, teraṅa dadāṅ kà, Zəzagəla afà gay aṅha kà atà à ahàl.

<sup>3</sup>Iyay zlà, kakay mədagodāy la lagwa ma? Tsa azlaanik la tataka aṅatà la abà kà, tanəfa gay uwaga aw ma? Kadzugwaw ma Zəzagəla kà adədāh uwana apəh aw takay?

<sup>4</sup>Awaṅ! Bā amiyaka azladza gesina azlaməna fida babay kà, ndzer Zəzagəla adədāh dziriga aṅha. Bokuba uwana tatsetsèr à wakità aṅa Zəzagəla abà kà: 'Kak Zəzagəla:

Baŋa kabadmà à azladza gesina tasəlay kà kapèh dziriga, amiyaka tapuwa à ka gudzi à gəl kà kadəkəfasl atà.’

<sup>5</sup>Lagwa zlahaw azladza anik tagodəy kà, 'Mawisiga uwana mədəhəŋ kà, azlaka à azladza' tagodəy, 'Kà Zəzagəla kà adəhəŋ mawisiga aw'. Gay ma uwala à uwana mədəwulla atà ala la? Məgodəy kà Zəzagəla kà adəhəŋ mawisiga la matərəbay, mədəgodəy ay? Uwanay gəpəh kà bokuba uwana azladza tapəhay.

<sup>6</sup>Aŋa kiya uwaga ma, Zəzagəla ma dziriga aw zlà ma ay? Awaŋ, kiya uwaga aw. Agayŋa Zəzagəla agay dziriga aw kà, naka aslala vok aŋa madəh seriya à gudəŋ à vok à gəl takay?

<sup>7</sup>Zlahaw, azladza anik tagodəy babay kà: 'Fida uwana mədəhəŋ kà, azlaka kà azladza aŋa masəl dziriga aŋa Zəzagəla, kiya uwaga kà tadəzləb masla kà uwaga. Tsa baŋa kiya uwanay kà, anu azlaməna tsakana ma, la tetəvi uwali zlà ma li?’

<sup>8</sup>Kiya uwaga azlaanik tagod: 'Mədəh mawisiga kà masəlay kà Zəzagəla kà masla mawoyəŋ, ma adəhəŋ mi?', tagod. Azlaanik tatugw à gi mawisiga à vok, tagod kà: Gi babay kà, gi gədzugway kà kiya uwaga. Zəzagəla adədah seriya à azladza uwaga à gəl, kà uwana seriya uwaga kà azlayla à atà kà madukwatəŋ à gəl aŋa Zəzagəla.

<sup>9</sup>Lagwa ma, anu azla Yahudiya ma mədūwa azladza anik takay? Awaŋ. Tetuwa mədūwa azladza anik aw. Gədapəha à akul, kà azla Yahudiya la azladza anik anik gesina, kà anu la tsəh makoray aŋa tsakana.

<sup>10</sup>Iyay, bokuba uwana tatsətsèr à wakità Zəzagəla à abà: 'Dza dziriga la ahəŋ la huma Zəzagəla amiyaka tekula aw.

<sup>11</sup>Dza la ahəŋ asəl dziriga aw Dza la ahəŋ amiyaka tekula à uwana ayəh Zəzagəla aw

<sup>12</sup>Azladza gesina tagola à lig à Zəzagəla à gay, tawis ala gesina. Dza la ahəŋ amiyaka tekula, adəh delga à azladza aw.

<sup>13</sup>Kay, gay uwana atsa à afik la kuda aŋatà la ahəŋ kà, mawisiga bokuba mazinay aŋa zəvay mapəzlla à ama ala gə. Aləh aŋatà kà avavar azladza. Uwana atsa à waŋ la paŋaw aŋatà la awtəy kà, kalkal la magur aŋa bebi uwana akəd dza.

<sup>14</sup>Sləray aŋatà kà say matsafla dza pəra, ŋgaha gay dəhakakga pəra atsa à waŋ la gay aŋatà la awtəy koksikoksi.

<sup>15</sup>Tavay kà makəd dza.

<sup>16</sup>Kəla slaka uwana taday kà, say gay atsən atà à tsəh ala.

<sup>17</sup>Tasəl madz à ahəŋ la tələmma la abà la azladza aw.

<sup>18</sup>Dikidiki tahoy yewdi aŋa Zəzagəla aw.’

<sup>19</sup>Tekedika kà mapəhay aŋa Zəzagəla kà, apəhay kà azladza uwana mapəhay uwaga aga la atà la ahəl, kà maməts gay à gəl aŋa magay la ahəŋ, ŋgaha kà azladza gesina aŋa masəlay, kà atà azlaməna tsakana la huma Zəzagəla.

- <sup>20</sup>Tsa aña kiya uwaga kà, dza la ahəŋ adàgay dziriga la huma Zəzagəla la manəf mapəhay aw, kà uwana mapəhay aña Zəzagəla apəhla ala kà masəl tsakana.
- <sup>21</sup>Ama lagonay kà, tetəvi uwana azladza tadəgəla dziriga la huma Zəzagəla kà, Zəzagəla adapəhla ala: Gay aña mapəhay la abà à tetəvi uwatà aw. Ama la wakità mapəhay aña Zəzagəla la abà, ŋgaha azladza uwana Zəzagəla apəh à atà gay à ahàl, kà mapəh à azladza, tapəhàh lakəl aña tetəvi uwatà dagay uwarà la magodəy kà: Zəzagəla adəpəhla tetəvi anik mawga ala.
- <sup>22</sup>Tetəvi gə, uwana Zəzagəla apakla azladza dziriga ala la huma aŋha kà, la madiŋ gəl à Yesu Kristu à vok, Zəzagəla adapəzl tetəvi à azlauwana tadiŋ gəl à Yesu à vok, awkà azla Yahudiya pəra aw. Zəzagəla kà avàh dza aw.
- <sup>23</sup>Dza gesina tadəhaŋ tsakana, ŋgaha tabəzà mazləbay uwana naka Zəzagəla avà à atà aw.
- <sup>24</sup>Ama Zəzagəla apis à atà gay à vok kà deyday, apakà atà ala dziriga la huma aŋha. Adəhàŋ uwaga kà la ahàl aña Yesu Kristu, à uwana apəlla atà ala la tsakana la abà.
- <sup>25</sup>Zəzagəla afà à ahəŋ, kà masla aña mamətsay kà aña azladza, kà aŋiz aŋha aña mazəb à atà tsakana lakəl ala. Tetəvi uwaga kà, Zəzagəla apəzl à azladza, uwana tadiŋal gəl à Yesu à vok. Uwana adəhà uwaga kà, kà azladza aña masəlay kà masla kà dziriga. Bokuba magodəy kà, tsakana uwana uwarà tadəhàhàŋ kà, Zəzagəla afal sləm aya aw.
- <sup>26</sup>Abasəŋ ndzer, ama lagonay apəhla à azladza, kà masla kà dziriga. Masla asal madəhəŋ kà uwana dziriga, ŋgaha asal aya magəŋ azladza, uwana tadiŋ gel à Yesu à vok dziriga la huma aŋha bay.
- <sup>27</sup>Tsa baŋa kiya uwanay kà, tatak la ahəŋ mətsalla zlapay takay? Awaŋ, tatak la ahəŋ aya aw. Zəzagəla adapaka anu ala dziriga kà, kà uwana madiŋ gel à Yesu Kristu à vok. Awkà apakà anu ala dziriga kà, kà uwana mənəfa mapəhay aw. Tsa aña kiya uwaga kà, tatak la ahəŋ kà matsalla zlapay gami aya aw.
- <sup>28</sup>Məsəl kà Zəzagəla apakà azladza ala kà dziriga la huma aŋha, à baŋa tadiŋ gəl à Yesu à vok, awkà kà uwana tanəfa mapəhay aw.
- <sup>29</sup>Zəzagəla ma aña azla Yahudiya pəra takay? Awaŋ, aña azla Yahudiya pəra aw, ama Zəzagəla aña dza gesina.
- <sup>30</sup>Kà uwana Zəzagəla kà tekula pəra. Baŋa azla Yahudiya tadiŋ gəl à Yesu à vok, adəpaka atà ala dziriga la huma aŋha. Kà aña azladza tsəhay anik, uwana tadiŋ gəl à masla à vok bay kà, bə adəpaka atà ala dziriga la huma aŋha suwaŋ
- <sup>31</sup>Zəzagəla apaka azladza ala dziriga, kà uwana tadiŋ gəl à Yesu à vok, uwana məgodə ma? Məpəsew mapəhay takay? Tetuwa kiya uwaga aw! Məgəda mapəhay à afik kà la uwaga.

## Rom 4

- <sup>1</sup>Lagwa kà, mædzugw lakəl aṅa Abərahāma baba gami, uwana akəsilla anu ala. Mana məpəhay lakəl aṅha ma? Mana Abərahāma abəzəl ma?
- <sup>2</sup>Baṅa Zəzagəla apakəṅ ala dziriga la huma aṅha kà, kà uwana adəhəhəṅ azlatatak dzəba aṅha səla aw gə, kiya uwaga naka azlayla kà Abərahāma atsə zlapay. Ama atsə zlapay la huma Zəzagəla aw.
- <sup>3</sup>Kiya uwanay à uwana tatsetsèr à wakità Zəzagəla à abà: 'Kà Abərahāma adiṅ gel à Zəzagəla à vok, kà uwaga à uwana Zəzagəla azalà ala dza dziriga la huma aṅha.'
- <sup>4</sup>Səlāw kà baṅa dza adəh sləray delga, ṅgaha tavəl tatak kà madegolay sləray aṅha, tatak uwaga tapəlal kà masik aṅha, awkà deyday tavəl aw.
- <sup>5</sup>Baṅa dza adiṅ gəl à Zəzagəla à vok, uwala adzugw magay dziriga la huma Zəzagəla kà, sləray uwana adəhəṅ aw, la kità Zəzagəla adəpakəṅ ala kà dza dziriga kiya uwanay. Zəzagəla kà, la maslay kà mapak masla tsakana ala kà dziriga la huma aṅha, ṅgaha adəh uwaga kà deyday.
- <sup>6</sup>Kalkal à uwana David apəh babay. Apəh lakəl aṅa azladza, uwana Zəzagəla apakətàla kà azladza dziriga la huma aṅha. Sləray aṅa ahəl aṅatà à uwana atugw aw. Azladza uwaga kà atà la marabay.
- <sup>7</sup>David agòd' kà: 'Marabay agay la azladza uwana Zəzagəla adəmats atà tsakana aṅatà ala, marabay agay la azlauwana masla adətsak atà mawisiga aṅatà ma.'
- <sup>8</sup>Marabay agay la dza uwana Sufəl atugw tsakana aṅha aw.'
- <sup>9</sup>Məwùl à gay aṅa David à tsəh. Marabay ma, la azladza uwana makadav atà à uda gə pəra takay? Awaṅ, marabay kà la azlauwana makadav atà à uda gə aw babay. Mətsənəṅ kà Abərahāma agə dziriga la huma Zəzagəla, kà uwana adiṅ gel à masla à vok.
- <sup>10</sup>Mok uwala Abərahāma agə dziriga la huma Zəzagəla la? Mok uwatà ma akədəv vok à uda ay? Awma à lig la sudə gə ay? La mok uwatà kà, aləg aṅa makədəv vok à uda dəṅ.
- <sup>11</sup>Makədəv vok à uda, uwana Abərahāma akədəv vok à uda kà, uwaga kà, agə madiya kà mapəhla ala kà, adadiṅ gəl à Zəzagəla à vok, ṅgaha Zəzagəla apakə masla ala kà dza dziriga, à mok uwana aləg makədəv vok à uda dadəṅ. Kà uwaga à uwana Abərahāma apakə baba aṅa azlauwana kokudə makədəv vok à uda, ama tadiṅ gəl à Zəzagəla à vok. Kiya uwaga masla adəpaka atà ala dziriga la huma aṅha, bokuba uwana apakə Abərahāma ala babay.
- <sup>12</sup>Masla ndzer kà baba aṅa azlaməna makadav vok à uda gə bay. Ama gesina azlabəza aṅha aw, say azlauwana tanəfa madiṅal gəl à vok aṅha, kiya masla uwana adiṅal gəl à vok, la mok uwana aləg makədəv vok à uda.
- <sup>13</sup>Dagay uwana Zəzagəla apəhà Abərahāma à ahəṅ la mayyi à tsəh ala aṅha kà, adəvə à atà gudəṅ à vok tadəkoray. Uwana Zəzagəla apəh uwaga kà, kà uwana Abərahāma

anəfà mapəhay aŋa wakità seriya aw, ama apəhal kiya uwaga kà, kà uwana adiŋ gəl à Zəzagəla à vok, ŋgaha apakà dziriga la huma aŋha.

<sup>14</sup>Iyay, agayŋa azlauwana tadiŋ gəl à mapəhay aŋa wakità seriya à vok, tabəz tatak uwana Zəzagəla apəh à ahəŋ kà, naka azlauwana tadiŋ gəl à Zəzagəla à vok tagay deyday, ŋgaha naka tatak uwana Zəzagəla apəh à ahəŋ kà mavà y bay, naka agay deyday aya.

<sup>15</sup>Haday, kà uwana mapəhay kà atsala kà mapak ləv aŋa Zəzagəla à waŋ à gəl aŋa azladza uwana tanəfa aw, ama la slaka uwana mapəhay la ahəŋ aw kà, mapəsew mapəhay la ahəŋ babay aw.

<sup>16</sup>Gay gə la uwaga à uwana, Zəzagəla apəh kà, apəh à ahəŋ kà aŋa azlauwana tadiŋ gəl à masla à vok. Adəhəŋ kiya uwanay, kà masla aŋa mav à atà tatak uwanay deyday. Asal mavà y à mayyi à tsəh ala aŋa Abəraham gesina. Avà y à azlaməna manəfay pəra aw, ama à azlatsəhay anik gesina, uwana tadiŋ gəl à Zəzagəla à vok bokuba à Abəraham, kà uwana Abəraham kà baba gami gesina.

<sup>17</sup>Bokuba uwana tatsətsèr à wakità Zəzagəla à abà, Zəzagəla agòd à Abəraham: 'Gəfa ka à ahəŋ kà kagay baba aŋa azlatsəhay aŋuvaw.' Abəraham apakà baba gami la huma Zəzagəla, kà uwana adiŋ gəl à Zəzagəla à vok. Zəzagəla masla mav sifa à azlamazimnekid, ŋgaha agəŋ la ahəŋ la afad gay aŋha azlatatak uwana amiyaka tagəhəh la ahəŋ aw.

<sup>18</sup>La kità, Abəraham ahəd à huma à gay la madiŋ gəl à Zəzagəla à vok. Amiyaka uwana azladza tadzugw à tetəvi uwatà, kà Zəzagəla adəh uwana apəh à ahəŋ aya, aw. Abəraham ahəd à huma à gay la maf manəwəŋ aŋha à Zəzagəla à afik. La lig la ahəŋ Zəzagəla adəhəlləŋ uwana apəhəl à ahəŋ la abatà, apakà baba aŋa azlatsəhay aŋuvaw, bokuba uwana Zəzagəla apəhal: 'Mayyi à tsəh ala aŋak adagay aŋuvaw.'

<sup>19</sup>Mok uwana Zəzagəla apəh uwaga kà, Abəraham mavay aŋha kà azlatalka dzim. Asəl kà adagay makoz gurdza gurdza, ŋgaha bay mis aŋha Sara bay kà degər aya, ama tayà vok la madiŋal gəl à vok la abà aw, kà uwana asəl kà Zəzagəla adadəh, uwana apəh à ahəŋ.

<sup>20</sup>Masla babay asəl kà adəbəz tatak uwana Zəzagəla apəhal à ahəŋ, abək gəl à ahəŋ səla aw. Madiŋal gəl à vok aŋha adzərəd ala kaykay, asləkəw Zəzagəla.

<sup>21</sup>Ndzer, asəl la lela kà Zəzagəla la maslay kà madəh uwana apəhal à ahəŋ.

<sup>22</sup>Gay gə la uwaga à uwana Zəzagəla, azalà ala: Dza dziriga la huma aŋha.

<sup>23</sup>Gay uwana Zəzagəla atəgwla Abəraham la dziriga la afik kà tatsətsèr kà aŋa Abəraham kokudə aŋha pəra aw.

<sup>24</sup>Tatsətsèr uwaga kà aŋami babay. Baŋa madiŋ gəl à Zəzagəla uwana à vok awùlla Sufəl Yesu à uda la mamətsay la abà, masla adəpaka anu ala dziriga la huma aŋha babay!



<sup>25</sup>Zəzagəla avà Yesu à ahàl aña azladza kà makəday kà tsakana gami. Dgaha aya, Zəzagəla awùlla à uda la mamətsay, kà anu aña magay azladza dziriga la huma Zəzagəla kà masla.

## Rom 5

<sup>1</sup>Tsa bà, uwana Zəzagəla adapaka anu ala dziriga la huma aña, kà uwana mədiñ gəl à masla à vok, lagonay kà, gay la ahəñ la tataka gami la abà la Zəzagəla aya aw, kà uwana Sufəl Yesu Kristu adasəlla anu vok la mamətsay aña.

<sup>2</sup>Yesu Kristu apəzlla anu tetəvi, kà anu aña mabəz mapis gay à vok la slaka Zəzagəla, kà uwana mədiñ gəl à masla à vok. Mətsizlla à mapis gay à vok uwaga à afik, ñgaha mərəb la mavalàh à zagəla, kà uwana mənawañ kà mədàbəz humà mazləbay gami la huma Zəzagəla.

<sup>3</sup>Mərəbay la mavalàh à zagəla kà aña uwaga pəra aw, məvalàh à zagəla babay kà baməraka anu la mas ñgərpa la abà, kà uwana ndzer məsəl kà ñgərpa azlaka anu kà aña magur mabasiñ.

<sup>4</sup>Baņa məsla mabasiñ, mədàhənay, baņa mədàhənay kà, mədàfa manəwəñ gami à gay Zəzagəla à afik, adàvə anu bokuba uwana agòd.

<sup>5</sup>Baņa mənawañ kiya uwanay, mədàməts à vədah deyday aw, kà uwana Zəzagəla apəh à anu kà, awoya anu kà kaykay. Masasədok aña uwana avà à anu, apəhanula masal aña.

<sup>6</sup>Iyay uwarə kà, ndzədə gami la ahəñ aw məslàla vok aña matəf gəl gami aw. La kaslà uwatà Yesu asà à wañ, aməts kà aña azlaməna tsakana, à kaslà uwana Zəzagəla afà à ahəñ.

<sup>7</sup>Ndzer, məsəl kà zlazladà kà dza aña mamətsay kà aña masla gamagəy aña, bà amiyaka masla anəfa mapəhay bay kà, zlazladà. Bi dza anik kà aslala vok aña makəs mamətsay kà madegolay dza uwana asəl dza.

<sup>8</sup>Ama Zəzagəla apəhanula kaykay à mawoy anu aña mi, avà Yesu Kristu, aməts kà aña mi à mok uwana mələg azlaməna tsakana gə dadəñ.

<sup>9</sup>Yesu Kristu aməts kà aña mi, Zəzagəla apakà anu ala dziriga la huma aña la aña aña. Tsa aña kiya uwanay, hadəy ndzer zlà kà, Yesu Kristu adətəf anu la mapak ləv aña Zəzagəla la abà.

<sup>10</sup>Dagay uwarə məgə azlaməna məzam aña Zəzagəla, masla asəlla anu vok la mamətsay aña Kona aña. Bà uwana adasəlla anu vok la uwaga kà, məsəl ndzer kà adàbəl anu aña koksikoksi kà uwana Yesu avà sifa aña.

<sup>11</sup>Adadəv à gay kiya uwanay pəra aw. La kaykay kà, mərəbay la mavalàh à zagəla lakəl aña uwana Zəzagəla adəhanəñ. Sufəl gami Yesu Kristu arabà anu ləv la uwana adàla anu à slaka Zəzagəla kà mapak anu ala azlaslawda aña.

<sup>12</sup>Aganay godega aña gay uwanay: Tsakana asà à gudəŋ à vok kà, kà dza tekula uwana sləm aña Adama, ŋgaha la tsakana aña uwatà la abà la uwana, mamətsay aslèhà à gəl aña dza gesina, kà uwana dza gesina tadahà tsakana, kà madegolay tsakana aña dza tekula uwaga.

<sup>13</sup>Amiyaka mok uwana Zəzagəla aləg mav mapəhay aña kà, tsakana kà agà la ahəŋ la gudəŋ la vok. Ama Zəzagəla atugw tsakana lakəl aña aw, kà uwana mapəhay aña Zəzagəla la ahəŋ dadəŋ aw.

<sup>14</sup>Amiyaka la uwaga bay, dādzəkà vok aña Adama, tsərəh à Musa kà, mamətsay akòr lakəl aña azladza gesina, amiyaka tsakana aña adəbanì aña Adama uwana akweskà mapəhay aña Zəzagəla bay aw kà tamətsàh. Adama kà maftsa vok aña dza uwana atsa à waŋ.

<sup>15</sup>Ama mavəy uwana Zəzagəla avà à anu la dza uwanay kà, adəbanì vok la tsakana aña Adama dīkidiki aw. Hadəy, aņuvaw taməts kà tsakana aña dza tekula, ndzer, ama dzəba aña səla aw aña Zəzagəla aduwa uwaga la məŋga, kiya uwaga babay mavəy deyday uwaga aviyà à azladza aņuvaw, kà madegolay dza tekula Yesu Kristu.

<sup>16</sup>Ama uwana Zəzagəla avəy bay kà godega aña kà gərgər dəŋ awkà kiya tsakana aw. Tsakana uwana dza tekula uwatà adəhəŋ kà adukw ala seriya à gəl. Tekedika, baña Zəzagəla apis gay à azladza à vok deyday, amiyaka tadəh tsakana aņuvaw kà adəpaka atà ala kà azladza dziriga la huma aña, ŋgaha kà seriya matəd à atà à gəl aw.

<sup>17</sup>Ndzer kà, dza tekula adəhà tsakana, ŋgaha tsakana akəs dza à gay gesina kà madegolay dza tekula uwaga. Ama dza anik, à Yesu Kristu adəhəŋ kà sləray anik. Kà madegolay masla, Zəzagəla avà mapis gay à vok la maduw à vok aña. Dgaha tadəbəz sifa, tadəkoray koksikoksi, kà madegolay Yesu Kristu.

<sup>18</sup>Kà tsakana aña dza tekula Adama, à uwana tsakana asà à azladza gesina à gəl, ŋgaha seriya atəd à atà à gəl bay. Dgaha kà sləray dziriga aña dza tekula, Yesu Kristu bay la uwana adapəlla azladza ala la seriya aña Zəzagəla la abà, ŋgaha adəv à atà sifa adəv à gay aw.

<sup>19</sup>Kà dza tekula Adama uwana akweskà mapəhay aña Zəzagəla, la uwana azladza gesina tapakà azlaməna tsakana, ŋgaha kà dza tekula Yesu Kristu bay, la uwana azladza aņuvaw tadəpaka dziriga la huma Zəzagəla, kà uwana masla kà akəs gay aña Zəzagəla.

<sup>20</sup>Ama baña mapəhay adənazila kiya uwanay kà, kà tsakana aña azladza aña maņazila kaykay. La kità, baña tsakana aña azladza adənazihla, mapis gay aña Zəzagəla aņazəhla kaykay bay.

<sup>21</sup>Bokuba uwana tsakana la uwana akoray lakəl aña mamətsay kiya uwaga la dziriga, mapis gay à vok aña Zəzagəla aga la maslay aña mapak dza ala dziriga la huma aña kà mapis gay à vok, uwatà kà akoray, kà anu aña magay la sifa, uwana adəv à gay aw la ahəl aña Sufəl gami Yesu Kristu.

## Rom 6

- <sup>1</sup>Mana mēdàgoday lagwa mi? Mēdza à ahəŋ la tsakana la abà, ŋgaha mapis gay à vok aŋa Zəzagəla adəŋazila takay?
- <sup>2</sup>Awaŋ, kiya uwaga aw, mēmèts kà ahəl tsakana, ŋgaha ma kakay mēda à huma à gay la tsakana la abà aya zlà ma?
- <sup>3</sup>Hay! Kasəlaw kà, mok uwana mēdahà batem kà, mēgà à maham à gay à vok gə la Yesu Kristu la abà, la mok uwaga kà, bokuba magoday kà, mēmèts la masla babay aw takay?
- <sup>4</sup>La batem kà, məkəs mamətsay la masla, kà mal anu la masla, kà anu aŋa masak à madz à ahəŋ maviyaga, bokuba uwana Zəzagəla awùlla Yesu à uda la ndzəda aŋa mazləbay aŋha.
- <sup>5</sup>Haday, anu azlamamatsay gə bokuba masla. Kiya uwaga mēdahama gay à vok la masla, tsa kiya uwanay kà ndzer, mēdàwul à uda bokuba uwana masla awul à uda babay.
- <sup>6</sup>Məsəl kà, la mok uwana Yesu Kristu amèts à ahəf à adi kà, Zəzagəla atatəsl madz à ahəŋ maviyaga gami à adi la abatà bay, kà vok tsakana gə uwanay aŋa mamətsay, kà anu aŋa magay azlamayà aŋa tsakana aya aw,
- <sup>7</sup>kà uwana tsakana aŋa magay la ndzəda la dza mamətsay gə aya aw.
- <sup>8</sup>Kà uwana mok uwana Kristu amèts kà, mēmèts la slaka gə la masla, kiya uwaga, məsəl kà anu la masla, mēdàdza à ahəŋ la sifa bay la masla.
- <sup>9</sup>Ŋgaha aya, məsəl babay, kà Yesu Kristu awul à uda la mamətsay adəmətsay aya aw, kà uwana ndzəda aŋa mamətsay la ahəŋ lakəl aŋha aya aw.
- <sup>10</sup>La mamətsay aŋha kà, avàhalla la tsakana aŋa tetuwa. Lagwa aga la ahəŋ la sifa kà aŋa Zəzagəla aŋa koksikoksi.
- <sup>11</sup>Iyay zlà, akul babay kà, kiya uwaga, sələw kà, kamətsəw kà ahəl tsakana. Lagwa akul la ahəŋ la sifa la huma aŋa Zəzagəla, kà uwana kahaməw gay à vok la Yesu Kristu.
- <sup>12</sup>Tsa aŋa kiya uwanay lagwa zlà kà, kasakaw à tsakana akor akul aw. Kanəfaw mabila aŋa vok aŋkul, uwana adàzakulla vərđi anik aw.
- <sup>13</sup>Kakəsaw kà tsakana abəza tetəvi à tsəh aŋa madukw akul à ahəŋ, kà mawis akul ala aw. Tsa baŋa kiya uwaga zlà kà, vəw vok aŋkul à Zəzagəla, kà uwana akul azladza uwana kamətsaw, ŋgaha kawullaw à uda, vəw vok aŋkul à masla gesina, sàkəwwal adəhla akul sləray bokuba akul azlakazlaŋa sləray delga gə.
- <sup>14</sup>Kiya uwaga kà, tsakana adàdza à akul à gəl aya aw kà uwana akul la tsəh aŋa mapəhay aw, kà magay la dziriga la huma Zəzagəla kà, dzəw à ahəŋ la mapis gay à vok aŋha la abà.

<sup>15</sup>Uwaga ma, mana asal magodɔy lagwa mi? Məkor gəl kà madəhəŋ tsakana, kà uwana anu la tsəh aŋa mapəhay aya aw, kà uwana anu la mapis gay à vok aŋa Zəzagəla la abà takay? Tetuwa kiya uwaga aw!

<sup>16</sup>Kasəlaw kà, baŋa kaduwaw vok aŋkul à dza anik ala, ŋgaha kagodəwwal kà kakəsaw gay aŋha kà, kapakaw mayà aŋha aw takay? Baŋa tsakana la uwana adza à akul à gəl, ndzer, akul azlamayà aŋa tsakana, ŋgaha kabiyaw mamətsay à gəl. La kità, baŋa kakəsaw kà gay aŋa Zəzagəla, kiya uwaga kagaw azlamayà aŋha, ŋgaha adəpaka akul ala kà azladziriga la huma aŋha.

<sup>17</sup>Hadəy aw ay, uwarà kagəw mayà aŋa tsakana, ama lagonay kà, kiya uwaga aya aw. Kakəsəw gay uwana atəpakulla, kakəsəw azlatatak uwana atəpakulla la ləv tekula, kikay məgod à Zəzagəla kà uwaga.

<sup>18</sup>Mapəlla, uwana kapələwla la tsakana la abà, kà kapəkəwla azlamayà aŋa dziriga adagay, kà akul aŋa madəh dziriga.

<sup>19</sup>Gəpəh à akul la gay zil kiya uwanay kà, kà uwana akul azlaguɓguɓ dadəŋ, kà matsən azlatatak uwanay. Dagay uwarà kavəw vok aŋkul gesina à mawisiga, kaŋazəhəw tsakana ala. Kà uwana kadəhəhəw mawisiga. Ama lagonay kà, vəw vok aŋkul à Zəzagəla aŋa dikidiki. Dahəw dziriga, ŋgaha kà madz à ahəŋ aŋkul aŋa magay sətaka.

<sup>20</sup>Dagay uwarà, à mok uwana kaləgəw azlamayà aŋa tsakana, tatak la ahəŋ afà à akul leri à gəl, kà manəf dziriga aŋa Zəzagəla aw.

<sup>21</sup>Mok uwana kadəhəhəw azlatatak ziruwi gə uwaga ma mana kabəzəwwal la abà lagwa zlə mi? Lakana kà kakələw ziruwi à azlatatak mawisiga uwaga à gəl mədətsalah à gay, kà uwana madəv à gay aŋa uwaga kà mamətsay.

<sup>22</sup>Lagonay kà, kapələwla la tsakana la abà, kagaw azlamayà aŋa Zəzagəla. Lagwa tatak delga uwana kabəzəwwal la abà, kà madz à ahəŋ aŋkul adəgay sətaka la huma Zəzagəla, ŋgaha aya, akul kadəbəzəwwal sifa adəv à gay aw la makəf gəl à ahəŋ.

<sup>23</sup>Ndzer, masik aŋa tsakana kà uwaga mamətsay, ama mavəy deyday aŋa Zəzagəla kà sifa adəv à gay aw, kà uwana mədahama gay à vok la Sufəl gami Yesu Kristu.

## Rom 7

<sup>1</sup>Azladeda gulo, gəpəh à akul kà, kà uwana kasəlaw mapəhay, kasəlaw kà mapəhay kà la ndzəda lakəl aŋa dza, uwana la sifa dadəŋ.

<sup>2</sup>Bokuba magodəy, baŋa mis adada à zil. La mok uwana zil aŋha aləg la sifa kà, tetəvi la ahəŋ kà aŋa mad à zil anik aw, kà uwana mapəhay avà à tetəvi aw. Ama baŋa zil aŋha adamətsay kà, tetəvi la ahəŋ adagay, kà mad à zil anik.

<sup>3</sup>Kay, ama baŋa zil aŋha aləg la sifa, nəma pəra ada à zil anik aya, masla azaɓ zil. Ama baŋa zil adamətsal à akəl ala masla la tetəvi, baməraaka ada aŋha à zil, agay masla mazaɓ zil aw, kà uwana kà akəlla mapəhay ala aw.

<sup>4</sup>Kiya uwaga kà, aŋkul babay azladede. Kadzaw à ahəŋ la ahəl aŋa mapəhay kà, bokuba akul azlamamatsay gə, kà uwana kamətsaw la slaka gə la Yesu Kristu. Kità akul azlaaŋha, masla la uwana Zəzagəla awùlla à uda la mamətsay. Kà anu aŋa madəhallaŋ sləray uwana akəsa à vok gesina.

<sup>5</sup>Mok uwana uwarə kà, mədza à ahəŋ kà bokuba uwana asà à gəl gami, ama mapəhay aŋa Zəzagəla la uwana: Uwanay la uwanay kà tsakana, agodəh à anu. Kiya uwaga à uwana apəh à anu ala tsakana, uwana mədəhahəŋ tekidik. Azlatatak mawisiga uwaga takor gəl aŋatà la anu la abà, ŋgaha tadək anu à mamətsay à abà.

<sup>6</sup>Uwarə kà, mapəhay afà à anu à ahəŋ bokuba azladaŋay. Lagonay kà, mədamətsal à adi ala à mapəhay uwaga, ndzəfə aŋha la ahəŋ lakəl gami aya aw. Lagonay adagay kà, mədəh sləray aŋa Zəzagəla la madz à ahəŋ mawga la abà, la tetəvi aŋa Masasədok aŋha la ama, awkà la tetəvi maviyaga, uwana tatsetsər à mapəhay à abà aya aw.

<sup>7</sup>Kakay gəgodəy mi? Mapəhay aŋa Zəzagəla ma tsakana takay? Awaŋ, tsakana dikidiki aw. Ama agayŋa mapəhay agay la ahəŋ, awkà naka gəsəl tsakana aw. Agayŋa mapəhay agodəy: Kadəhaw adi aw, awkà naka gəsəl adi aw.

<sup>8</sup>Hay, ama la mok uwana gətsənəŋ mapəhay uwaga kà, tsakana abəzà gi à tsəh, ŋgaha gədzəkà madəh adi à azlatatak gesina à tsəh. Mok uwana mapəhay la ahəŋ aw kà, tsakana kà agə tsafəsaf.

<sup>9</sup>Mok uwana uwarə gəsəl mapəhay à dadəŋ aw kà gəgod kà: 'Gi la sifa.' Ama mok uwana gədotsən mapəhay kà, tsakana aŋazà gay ala.

<sup>10</sup>Ŋgaha gəsəl kà tsa gi mamətsayga. Zəzagəla avə mapəhay uwaga kà, kà mapəhgəla tetəvi sifa, ama adàla gi kà à mamətsay.

<sup>11</sup>Mok uwana gətsənə mapəhay uwaga kà, tsakana abəzà gi à tsəh, apapət gi, kà gi aŋa madəh tsakana, ŋgaha agəd kà uwana gədəhà tsakana.

<sup>12</sup>Kiya uwaga kà, mapəhay atsa à waŋ kà la ahəl aŋa Zəzagəla, ŋgaha kəla mapəhay aŋha bay kà tsikasla gesina, dziriga.

<sup>13</sup>Baŋa kiya uwanay ma, tatak uwana delga la uwana adapaka gi matsapa vok takay? Awaŋ masla aw! Uwaga kà tsakana la uwana apaka matsapa kà makəd gi. Tsakana abəz gi à tsəh kà makəd gi ala, tatak delga uwaga kà masəlay, kà tsakana kà bə tsakana ndzer, ŋgaha kà uwana mapəhay la ahəŋ, tsakana apəhla tsakana ala kà mawisiga la tetuwa.

<sup>14</sup>Məsəl kà mapəhay kà atsà à waŋ kà la slaka Zəzagəla, ama gi kà gi dza deyday gə pəra, gəgə bokuba mayə aŋa tsakana.

<sup>15</sup>Gətsənə uwana gədəhəŋ aw, gədəhəŋ kà uwana asà à gi aw, hərəzka aŋa uwana asà à gi aw, la uwana gədəhəŋ aya.

<sup>16</sup>Baŋa gədəhəŋ, kà uwana asà à gi aŋa madəhəŋ aw, uwaga apəhla ala kà mapəhay aŋa Zəzagəla kà delga.

- <sup>17</sup>Ama mawisiga uwaga kà gi la uwana gədehəŋ aw. Tsakana uwana la gi la abà la uwana adàh uwaga.
- <sup>18</sup>Gəsəl kà delga la ahəŋ la gi la abà aw, à gi dza uwana gi dza asik aw. Kay kà, asa à gi madàh delga nəma, ama gəslala vok aw, kà uwaga.
- <sup>19</sup>Tatak delga, uwana asa à gi madəhəŋ kà, gədehəŋ aw, ama tatak mawisiga uwana asa à gi madəhəŋ aw, la uwana gədehəŋ.
- <sup>20</sup>Baŋa gədehəŋ kà tatak, uwana asa à gi aw kà, uwaga kà gi la uwana gədehəŋ aw, tsakana uwana la gi la abà, la uwana adəhəŋ.
- <sup>21</sup>Kiya uwaga à uwana gədehəŋ koksikoksi, baŋa gəfàh delga zlà, gi gəgoday kà, tsakana la uwana atsavok gi à huma.
- <sup>22</sup>La madzugway gulo la abà kà, mapəhay aŋa Zəzagəla kà akəs à gi gəl ndzer.
- <sup>23</sup>Ama la madz à ahəŋ gulo la abà kà, gənəŋəŋ kà tatak anik la ahəŋ à uwana apa guvəl la madzugway delga uwana la gi la abà. Tatak mawisiga uwaga la gi la abà kà, asal mapak gi ala kà mayà aŋha.
- <sup>24</sup>Yayatsiya, uwa à uwana adəpəl gi ala la madz à ahəŋ mawisiga gulo uwanay la abà, adala gi à mamətsay uwa?
- <sup>25</sup>Kikay gəgod à Zəzagəla la ləv tekula, kà uwana masla la uwana adapəl gi ala kà ahəl aŋa Sufəl gami Yesu Kristu. Gəgod la madzugway gulo la abà kà, gədehəŋ kà mapəhay aŋa Zəzagəla. Ama dza sləb vok kà, asal kà gənəfay kà tsakana.

## Rom 8

- <sup>1</sup>Lagwa kà Zəzagəla adàdukw seriya à azladza uwana à gel, tahama gay à vok la Yesu Kristu aya aw.
- <sup>2</sup>Kà uwana ndzəda aŋa Masasədok Zəzagəla uwana avà à anu sifa la ahəl aŋa Yesu Kristu, adapəl gi ala la ndzəda aŋa tsakana la abà la mamətsay.
- <sup>3</sup>Mapəhay aŋa wakità seriya asla mav sifa à azladza aw, kà uwana anu azladza asik məslala vok aŋa madàh uwana asa à mapəhay aw. Ama uwana mapəhay aslala vok aw kà, Zəzagəla kà ahənəŋ ala. Zəzagəla adəhəŋ uwaga la masləl Kona aŋha à waŋ à gudəŋ à vok, la sləb vok kiya aŋa aŋami azlaməna tsakana. Masla asà à waŋ aŋa mazəb anu tsakana lakəl ala. Kiya uwaga Zəzagəla adukwà seriya aŋa tsakana aŋa azladza à gəl aŋha.
- <sup>4</sup>Zəzagəla adəhəŋ uwaga, kà anu aŋa maslala vok, kà madàh delga uwana mapəhay ayahay kà uwana məkəsa gəl à ahəŋ la tsəh aŋa uwana asa à Masasədok Zəzagəla, awkà uwana asa à sləb vok gami aw.
- <sup>5</sup>Azlauwana tadzadzar vok bokuba uwana asa à gəl aŋatà kà, tatuway kà à uwaga à tsəh koksikoksi. Ama azlauwana tadzadzar vok bokuba uwana asa à Masasədok kà, atà bay tatuway kà à uwana à tsəh, asa à Masasədok uwaga bay.

- <sup>6</sup>Baŋa anu mətuw à uwana à tsəh asa à sləb vok gami kà, abiyan mamətsay à gəl, ama baŋa mətuguay kà à uwana à tsəh asa à Masasəđok kà, mədàbəza sifa la lapiya.
- <sup>7</sup>Azlawana tatuway kà à uwana à tsəh, asa à vok aŋatà kà azlaməna məzam aŋa Zəzagəla. Atà tanəfa mapəhay aŋa Zəzagəla đikidiki aw. Ndzer kà, taslala vok aŋa makəsaw aw.
- <sup>8</sup>Azlawana tadzadzar vok bokuba uwana asa à gəl aŋatà kà, taslala vok aŋa mahəd à Zəzagəla à adi aw.
- <sup>9</sup>Ama akul kà kadzadzaraw vok kà la makəs gəl à ahəŋ la tsəh aŋa Masasəđok Zəzagəla, kà uwana Masasəđok uwaga aga la ahəŋ la ləv aŋkul la tsəh. Dza uwana la Masasəđok uwaga aw kà, masla kà dza aŋa Yesu Kristu aw.
- <sup>10</sup>Baŋa Yesu Kristu la akul la abà kà, baməraka kamətsaw kà madegolay tsakana babay kà, bə Masasəđok aŋha uwana avà à akul adzadzar akul, kà uwana Zəzagəla adapakakulla dziriga la huma aŋha.
- <sup>11</sup>Baŋa Masasəđok aŋa Zəzagəla uwana awùlla ala Yesu Kristu à uda la mamətsay la akul la abà, la kità bay ndzer kà, Zəzagəla uwaga adàwulla ala akul à uda la mamətsay babay. Adàđah uwaga kà la ndzəđa aŋa Masasəđok aŋha, uwana la akul la abà.
- <sup>12</sup>Azladeda, tsa kiya uwanay kà, goder aga anu lakəl, kà aŋa madzadzar vok, bokuba uwana Masasəđok Zəzagəla ayahay, awkà bokuba uwana asa à sləb vok gami aw.
- <sup>13</sup>Baŋa kanəfaw kà tetəvi uwana asa à vok aŋkul kà, kadàmətsaw. Ama baŋa kavàw tetəvi à Masasəđok Zəzagəla, kasaw à uda la azlatatak mawisiga uwaga la abà kadəhawwan kà, kadàbəzaw sifa.
- <sup>14</sup>Azlawana takəsà gəl à ahəŋ la tsəh aŋa Masasəđok Zəzagəla, gesina kà azlabəza aŋa Zəzagəla.
- <sup>15</sup>Masasəđok uwana Zəzagəla avà à akul kà, apəkakulla kà azlamayà, ŋgaha avà à akul guba aya aw. Ama apəkakulla kà azlabəza aŋha. Avà à anu gay kà magođay à Zəzagəla: "Baba, kak tsuŋulo!"
- <sup>16</sup>Kiya uwaga Masasəđok uwaga abadānumà la ləv la tsəh: Ndzer, anu azlabəza aŋa Zəzagəla.
- <sup>17</sup>Tsa bə uwana anu azlabəza aŋa Zəzagəla adagay kà, mədàbəza azlatatak dzəba aŋha səla aw gə, uwana adafa à anu à ahəŋ. Ama kà Yesu Kristu la uwana mədàbəza azlatatak uwaga, kità mədàbəza mazləbay uwaga, kà uwana məs ŋgərpa anina la slaka gə bay.
- <sup>18</sup>Aganay gəgod à akul kà, ŋgərpa uwana məsaw la abanay la vəđah la sa uwanay kà, uwaga kà apaka kà bokuba tatak deyday. Tetuwa adətsizilla à mazləbay aŋa Zəzagəla, uwana à huma adavà à anu aw.
- <sup>19</sup>Tatak gesina uwana Zəzagəla adəhəŋ, takuday la tsetsi dadəŋ à mavakay uwana Zəzagəla adəpəhla à azlabəza aŋha ala la dazuwaya, kà masla aŋa mapəhla mazləbay aŋatà ala.

- 20** Azlatatak uwana Zəzagəla adəhà à atà kà, tagahay kà bokuba azlatatak deyday. Atà la gəl aṅatà kà, tawoyàṅ kiya uwanay aw. Zəzagəla la gəl aṅha la uwana asakàtala à ahàl la tsəh ala, ama atà tafà manəwəṅ aṅatà à azlatatak anik à tsəh gotənaṅ.
- 21** Kà uwana vərđi anik kà, Zəzagəla adətəf azlatatak uwana adəhà à atà, ṅgaha tadəgay kiya azlamayà aya aw. Tadəzinla aya aw. Atà babay tadəkor gəl, tadəbəza mazləbay bokuba uwana azləbəza aṅa Zəzagəla tadəbəzal bay suwaṅ.
- 22** Məsəl kà dagay madzəka tsəràh à lakana kà, kəla tatak uwana Zəzagəla adəhàṅ kà, tabàs vok bokuba mis uwana hud' bəzi azəṅ ay ṅuwadāw?
- 23** Atà kokudà gəl aṅatà pəra tabasay aw, baməraka anu, uwana Zəzagəla avà à anu Masasədök aṅha bokuba tatak matapiṅ aṅa diṅa kà, məbas vok la ləv gami la tsəh bay. Məkuday la iyaw tugwi la adi, kà Zəzagəla aṅa madəpaka anu ala, kà anu azləbəza aṅha, adəsəlla anu à uda la mabas vok gami la abà aṅa tetuwa.
- 24** Ndzer mədəbəlay lagwa, ama mədənəṅ azlatatak gesina dadəṅ aw, anu la manəwəṅ lakəl aṅha aṅa manəṅəṅ. Ama mok uwana mədənəṅ azlatatak uwaga mənawəṅ la yewdi gami kà, mədənəwəṅ aya aw. Uwa à uwana anaw tatak uwana adanəṅəṅ la yewdi aṅha zlà ma uwa?
- 25** Hadəy gə, mənaw tatak uwana mədənəṅiṅ dadəṅ aw. Kità məkuday la tsetsi dadəṅ kiya uwanay.
- 26** Kiya uwaga bay Masasədök Zəzagəla atsà à waṅ kà mazlak anu, anu uwana anu azlagubgub la tetəvi aṅa Zəzagəla la tsəh, kà uwana məsəl madəv kudà, bokuba uwana naka akəs vok aw. Masasədök la gəl aṅha abəd' à huma kà aṅami, adəv kudà à Zəzagəla la makəs aṅuf la adi ala. Daduwa à gay madəv kudà la gay.
- 27** La paraka kà, Zəzagəla asəl uwana la tsəh ləv aṅa azladza, ṅgaha babay asəl uwana Masasədök aṅha adzugway, kà uwana Masasədök abəd' à huma kà aṅa azladza aṅha, adəv kudà à Zəzagəla bokuba uwana akəsəl à gəl.
- 28** Azladza uwana tawoya Zəzagəla kà, azlauwana masla azala atà kà atà madəhalla tatak uwana ahədəl à adi, məsəl kà dèwdèw tatak uwana abəza atà, kà Zəzagəla adəh tatak uwaga à ahəṅ, kà makəd' gəl à ahəṅ aṅha aṅa magay delga.
- 29** Azlauwana Zəzagəla adatsatsamani atà dagay uwarà kà, adabək atà, afà atà awtəy kà magay bokuba azləbəza aṅha, kà bəzi gay ləv aṅha aṅa magay malkwoy la tataka aṅa azləbəza dəṅ la abà.
- 30** Abək atà, afà atà à awtəy pəra aw, azalà atà pəra aw, apakà atà ala kà azladziriga la huma aṅha. Babay kà, atà aṅa magay azladza aṅha. Azalà atà pəra aw, apakà atà ala kà azladziriga la huma aṅha, ṅgaha avà à atà mazləbay aya.
- 31** Tsa aṅa kiya uwanay ma, mana à uwana atəm kà anu à ahəṅ aṅa mapəhay ma? Tsa Zəzagəla kà awul kà à anu ma, uwa à uwana adəvədzah anu gəl aya uwi?



<sup>32</sup>Zəzagəla kà akweslà bəzi aŋha aw, asləl à waŋ kà masla aŋa mamətsay kà, kà aŋami gesina. Tsa Zəzagəla avà à anu Kona aŋha ma, sakoraka azlatatak anik la uwana avà à anu aw takay?

<sup>33</sup>Uwa à uwana aslala vok kà mat kaf à azladza uwana à gəl, Zəzagəla adatsatsamani atà uwa? Kà uwana Zəzagəla adapaka atà ala kà azladza dziriga la huma aŋha.

<sup>34</sup>Uwa à uwana aslala vok aŋa madukw à atà seriya à gəl uwa? Yesu Kristu la gəl aŋha aməts kà aŋami, Zəzagəla awùlla à uda la mamətsay, adzaŋà madzay la ahəl kaf aŋha lakəl, ŋgaha masla la uwana abəda à humù gami, la huma Zəzagəla.

<sup>35</sup>Uwa à uwana adàvah anu ala la Yesu Kristu kà masla aŋa mawoy anu aya aw uwa? Matərabay à uwana adàvah anu ala ay, awma mabas vok ay? Awma azlauwana tasa à anu zladà la uwana adàvah anu ala ay? Awma may la uwana adàtugw anu ala ay? Awma kudà ay? Bamərika anu la zlamtsa la abà, amiyaka katsakar, awma mamətsay la uwana adàvahanula la Yesu Kristu ay? Awaŋ, tatak la ahəŋ, à uwana adəf gay à masal aŋha ahəŋ, kà aŋa makweska anu aw.

<sup>36</sup>Uwaga kà bokuba uwana tatsətsər à wakità Zəzagəla à abà kà: 'Kà uwana anu azlaaŋak à kak Zəzagəla, à uwana anu la zlamtsa aŋa mamətsay la abà, kà uwana azladza tayàh makad' anu koksikoksi. Anu kà mədagay la yewdi aŋa azladza kà kalkal la azlatuwaŋ, uwana tadala atà makad' atà.'

<sup>37</sup>Ama mədaf asik à azlamatərabay uwaga à gəl gesina, mədadu w atà la ndzəda aŋa dza uwana awoya anu.

<sup>38</sup>Ndzer, gəsəl kà tatak la ahəŋ à uwana avàhanula la masla, kà masla aŋa mawoy anu aw, aw. Amiyaka baŋa məmətsay, amiyaka anu la adi taslala vok aŋa madəf à anu gay à ahəŋ aw. Azlamalika la azlatatak uwana takor ndzəda la zagəla gesina bay kà, taslala vok, kà madàh tatak kà masla aŋa mawoy anu aw, aw. Azlatatak uwana abəza anu lagonay, la azlatatak uwana adàbəza anu la huma la gay bay kà, taslala vok madəf à anu gay à ahəŋ aw.

<sup>39</sup>Azlauwana, la ləv zagəla la abà, ŋgaha azlauwana la tsəh iyaw bay kà, taslala vok aŋa madàh tatak aw. Dəwdəw tatak uwana Zəzagəla adàhəŋ taslala vok aŋa mədəf gay à Zəzagəla à ahəŋ kà aŋa mawoy anu aw. Mawoy dza uwaga kà apəhanula kà la ahəl aŋa Sufəl gami Yesu Kristu.

## Rom 9

<sup>1</sup>Uwanay gəpəhay lagwa kà dziriga, kà uwana gi aŋa Kristu, gədaŋ fida aw. Masasədok tsikasla la madzugway gulo taza sayda aŋa uwaga babay.

<sup>2</sup>Gi la mazaw la gəl gə kaykay la ləv gulo la tsəh, ŋgaha la mazay məŋga

<sup>3</sup>kà tsəhay gulo Isərayel, uwana gəwoyaŋ. Agayŋa Zəzagəla akəd' à atà gi à uda la tataka kà aŋatà ŋuləm, la mavahanula la Kristu, kà uwana azladedə gulo.

<sup>4</sup>Atà mayyi à tsəh ala aŋa Isərayel. Zəzagəla atsatsəmàni atà, kà atà aŋa magay azlabəza aŋha, apəhatàla mazləbay aŋha, ŋgaha akəs vok slawda la atà, avà à atà

mapəhay. Dgaha apəhatàla tetəvi kà masləkawla masla, ngaha apəh à atà azlagay, uwana avà à vok aṅatàà abà, asal kà madəhəṅ bay.

<sup>5</sup>Atà mayyi à tsəh ala aṅa Abəraham la azlabəza aṅha, Isak la Yakuba uwana tadzà à ahəṅ uwarà. Yesu Kristu la sləb vok aṅha la abà kà mayyi à tsəh ala aṅatà bay. Kristu uwanay kà Zəzagəla agəṅ lakəl aṅa tatak gesina məzləbà masla koksikoksi. Amen.

<sup>6</sup>Mədzugw kà uwana Zəzagəla apəh à azlatsəhay aṅha à ahəṅ, adəhəṅ kiya uwatà məgod aw. Ama kəla kà, azla Isərayel gesina la uwana taga tsəhay aṅha aw, say aṅa gay gà pəra.

<sup>7</sup>Mayyi à tsəh ala aṅa Abəraham kà dəṅ, ama atà tagà azlabəza gay ləv aṅha gesina aw. Zəzagəla apəh à Abəraham à vok à abà dagay uwarà: 'Fofulo aṅak dziriga kà, adàsa à uda kà la mayyi à tsəh ala aṅa Isak la abà.'

<sup>8</sup>Uwaga asal magodəy kà, azlabəza aṅa Abəraham gesina kà, atà tagà azlabəza aṅa Zəzagəla aw. Zəzagəla agòd kà, azlabəza aṅha dziriga kà, say azlauwana pəra tayyà à vok la uwana la afik, apəh à ahəṅ.

<sup>9</sup>Uwana Zəzagəla apəh à ahəṅ kà: 'Baṅa mavakay uwana gəpəh à ahəṅ adəslay kà, gədəwul à awtəy, ngaha la mok uwatà la uwana Sara adəyya bəzi zilga',fb agòd.

<sup>10</sup>Dgaha kà uwaga pəra aw, ama mənərəz lakəl aṅa vəgal, uwana Rebeka ayyà bay. Baba aṅatà kà la baba gami madzidziga Isak.

<sup>11</sup>Mok uwana aləg mayyàh atà kà Zəzagəla agòdàl: 'Madəvla à ahəṅ adəfəw uwana adatsa vok à ahəṅ.' Mok uwana apəh kiya uwanay kà, tadəh tatak delga bamərika tatak mawisiga dadəṅ aw, Rebeka bay adəyyah atà aw.

<sup>12</sup>Zəzagəla adəhəṅ kiya uwanay kà, kà uwana zagəla aṅha kà madəh uwana asal. Akəsàni dza aṅha la tataka azladza anik la abà, kà huma à gay sləray delga aṅha uwana adəhəṅ aw.

<sup>13</sup>Uwaga apakà vok bokuba uwana tatsetsər à wakità à abà, Zəzagəla agòd: 'Gi Zəzagəla, la uwana gəkəsàni Yakuba, ngaha gi la uwana gəkweskà Esaw bay.'

<sup>14</sup>Baṅa kiya uwanay ma, mana mədàgodəy zlà ma? Kità ma Zəzagəla kà adədehəṅ kà la tetəvi aṅha aw məgod ay? Tetuwa kiya uwaga aw.

<sup>15</sup>Hadəy dagay uwarà agòd à Musa: 'Gədəfəh delga à dza, uwana asa à gi madəhalla ala delga, vok mahamay adəkəsa à gi kà aṅa dza uwanay vok adəhama gi kà masla.'

<sup>16</sup>Kiya uwaga, baṅa Zəzagəla akəsàni dza kà, bə akəsàni pəra, kà uwana asal madəhalla ala delga. Awkà kà, à huma à gay dza la mawad vok à uda aṅha, ngaha sləray aṅha pəra aw.

<sup>17</sup>Kità mədzeṅay la wakità Zəzagəla la abà babay kà, Zəzagəla agòd à Faruna: 'Gəfà ka à sufəl à abà kà deyday aw, ama kà gi aṅa mapəhla ndzəfà gulo ala la kak la abà, ngaha kà sləm gulo aṅa matsinla la gudəṅ la vok gesina.'

- 18** Ìḡaha Zəzagəla adāh delga à dza uwana asal, ḡaha adzadzəḡ gəl ala la dza uwana asal babay.
- 19** Zlahaw tagod' à gi: 'Baḡa Zəzagəla akəsəḡ azladza kiya uwanay ma, kà mana ma masla apakàtəla kà azlamawisiga aya mi? Uwa la uwana atsizlliya à mawoyəḡ aḡha à huma uwi? Say azladza tadehəḡ kà uwana afà à ahəḡ la gəl aḡha pəra.'
- 20** Kayyà, zil! 'Gi uwa', kagod', kà mabay vok gay la Zəzagəla uwa? Tak ma abisl maḡalay gə, agod' à dza uwana aḡal kà, 'Kà mana kaḡal gi kiya uwanay mi ay?', agodəy takay?
- 21** Masla maḡal masik kà, aga la ndzəda lakəl aḡa abisl aḡha aw takay? La abisl tekula aslala vok maḡaləh masik səla, aḡal anik uwana asa à ləv aḡha kaykay, ḡaha anik bay aḡalay bokuba azlamasik anik anik gesina.
- 22** Iyay, agayḡa Zəzagəla asal magay bokuba masla maḡal masik uwaga ma abəz kakay? Asal kà azladza tasəlay kà masla la mapak ləv gə lakəl aḡa azlaməna tsakana, ḡaha masla la maslay. Kità abasətəḡ baməraka tadəhəhla ləv à Zəzagəla à hud', kay, kà atə kà azlayla à atə à mamətsay.
- 23** Adəhəḡ kiya uwanay kà, kà azladza aḡa masəlay, kà masla la mazləbay məḡga, ḡaha kà masla aḡa mahəl atə à mazləbay uwaga à abə suwaḡ, atə uwana asal madəha à atə delga. Masla adəha à atə à ahəḡ dagay uwarə, kà atə aḡa mad à mazləbay aḡha à abə.
- 24** Gesina gami kà Zəzagəla adazalla anu adagay kà mad à mazləbay aḡha à abə. Akəsəni kà azla Yahudiya à uda pəra aw, ama azalə azlatsəhay gesina.
- 25** Uwaga bokuba uwana masla agod' la wakitə aḡa Hosəya la abə kà: 'Azladza uwaga tagə azladza gulo aw uwarə, lagwa akul azladza gulo gədəgod' à atə. Azlauwanay gəwoyà atə uwarə aw kà, tadəgay azlabəza gay ləv gulo adagay.
- 26** La slaka uwana la abə: 'Akul, azlatsəhay gulo aw', tagod' à atə kà, zvek la huma la gay tadəzala atə ala 'Azlabəza aḡa Zəzagəla uwana la sifa.'
- 27** Yesayya apəh la paraka lakəl aḡa azla Isərayel kà: 'Baməraka tsəhay Isərayel aḡuvaw kiya wuyyaḡ, uwana la mukwà la tsəh kà, sələw kà, azlauwana Zəzagəla adəbəl atə kà, atə dəḡ aw.
- 28** Sufəl Zəzagəla kà anəl gəl à ahəḡ, kà mas à waḡ à gudəḡ à vok, kà madəh uwana apəh gesina, aw.'
- 29** Kiya uwanay Yesayya uwanay adapəhay uwarə: 'Baḡa Sufəl Zəzagəla uwana akor tatak gesina kà, asakə azlauwana tsəhay gami anik la uda aw kà, mədəməts à gay bokuba azladza la gudəḡ Sodom la Gomor!'
- 30** Mana məgodəy lagwa ma? Azladza uwana azla Yahudiya aw kà, tayəh tetəvi kà magay dziriga la huma Zəzagəla aw, ama lagonay kà tagahay dziriga la huma aḡha, kà uwana tadəḡ gəl à masla à vok.

<sup>31</sup>Kà aṅha azla Yahudiya kà tayàh madək vok à mapəhay à afik kà atà magay dziriga la huma aṅha la uwatà, ama taslala vok kà makədāl gəl à ahəṅ aw.

<sup>32</sup>Kay, kà mana takədāl gəl à ahəṅ aw ma? Kà uwana tadzugw kà 'Mədàgay dziriga la madəhəṅ gami', tagòd. Dgaha tadiṅ gəl à Zəzagəla à vok aw. Kità kà, akur uwatà atsala atà matekwid.

<sup>33</sup>Bokuba uwana tatsetsèr à wakità Zəzagəla à abà: 'Nərèzàw, gətsəb akur matsàhla matekwid à azladza à ahəṅ la Siyon. Dzəgla uwaga la uwana adàdukw à azladza à ahəṅ. Ama azladza uwana tadiṅ gəl à dzəgla uwaga à vok kà, adàvavar atà aw.'

## Rom 10

<sup>1</sup>Azladeda, asa à gi kà azlatsəhay gulo azla Yahudiya tabəlay gesina, gəsak à madəv kudà à Zəzagəla kà atà aw.

<sup>2</sup>Kà aṅatà kà gi la uwana gəza sayda lakəl aṅatà. Asa à atà ndzer mav vok aṅatà à Zəzagəla, ama tetəvi uwana tavəlla vok aṅatà kà masla aw.

<sup>3</sup>Atà, tatsənà godega aṅa tetəvi uwana Zəzagəla apàkla azladza dziriga ala la huma aṅha aw, tanəfà kà tetəvi aṅatà anik. Kità kà tavəlla à Zəzagəla à ahəṅ lakəl à adi, kà uwana takəs tetəvi uwana Zəzagəla asal mapakla azladza ala kà azladza dziriga la huma aṅha aw.

<sup>4</sup>Uwana gəpəhay kiya uwanay kà, à mok uwana Yesu, uwana mafal dzakwa à gəl gə, asà à waṅ kà, anatsà ndzədà aṅa mapəhay ala. Uwana adəhəṅ kiya uwanay kà, kà azladza uwana tadiṅ gəl à masla à vok kà, kà atà la uwana Zəzagəla apakà atà ala kà azladziriga la huma aṅha.

<sup>5</sup>Musa atsetsèr lakəl aṅa manəf mapəhay dagay uwarà. Kakay mədàgay dziriga la manəf uwaga mi? Agòd: 'Dza uwana anəfa mapəhay uwaga gesina adəbəz sifa kà uwaga. Kəla kà, say baṅa dza anəfa uwaga la deṅdaṅ' agòd.

<sup>6</sup>Ama tetəvi aṅa mapakla dziriga la huma Zəzagəla, la madiṅal gəl à vok kà, gərgər. Tatsetsèr à wakità Zəzagəla à abà lakəl aṅa tetəvi uwaga kà: 'Kadzugw la ləv aṅak la tsəh, 'Uwa à uwana adàda à zagəla à uwi?', kagod' aw.' (Bokuba magodəy: Uwa à uwana adàda mazalla Kristu uwana à ahəṅ, mafal dzakwa à gəl uwi?)

<sup>7</sup>Kadzugw babay la ləv aṅak la tsəh, 'Uwa à uwana adàda à mezewi uwa', (Bokuba magodəy: kà mazalla Kristu à uda la tataka azlamazimnekid' la abà), kagod' babay aw.

<sup>8</sup>Mana wakità Zəzagəla agod' ma? 'Nekwa la kak à gay uwaga, la paṅaw aṅak la awtəy, ṅgaha la ləv aṅak la tsəh!' Gay uwaga kà, gay uwana məziṅ à azladza la magodəy: "Diṅàw gəl à Zəzagəla à vok", mөгòd' à atà.

<sup>9</sup>Baṅa dza apəhay la dazuwaya: "Yesu kà, dza uwana Zəzagəla afal dzakwa à gəl", agodəy, ṅgaha adiṅal gəl à vok kà, Zəzagəla awùlla Sufəl Yesu à uda la mamətsay, Zəzagəla adəbələṅ.

- <sup>10</sup>Baṅa mēdiṅ gəl à Yesu à vok la ləv gami, ṅgaha mēziṅ la paṅaw gami kà masla kà Sufəl, Zəzagəla adàpaka anu ala azladza dziriga la huma aṅha, ṅgaha adàbəl anu.
- <sup>11</sup>Haday, kiya uwaga tatsetsèr à wakità à abà: 'Uwabeyuwi uwana adiṅ gəl à masla à vok kà, adàts gay à ahəṅ aw.'
- <sup>12</sup>Adàgay zil Yahudiya adàgay tsəhay anik, Sufəl uwaga kà, masla Sufəl aṅa azladza gesina. Apis gay à azladza uwana à vok, tadəval kudà gesina.
- <sup>13</sup>Uwaga bokuba uwana tatsetsèr à wakità Zəzagəla à abà: 'Uwabeyuwi uwana adəv kudà à Sufəl Zəzagəla, adàbəlay.'
- <sup>14</sup>Kay, gay kà aganay zlakodà: Kakay mədəval kudà, kokudà madiṅ gəl à masla à vok ma? Ḍgaha kakay mēdiṅ gəl à masla à vok, kokudà matsən gay lakəl aṅha ma? Ḍgaha aya kakay mədàtsənəṅ, à baṅa masla mapəh à anu gay uwaga la ahəṅ aw ma?
- <sup>15</sup>Ḍgaha à baṅa azlaməna gay Zəzagəla tasləl à atà azladza aw, la tetəvi ma uwala azladza taday aṅa mapəhatàla gay la? Uwaga kalkal bokuba uwana tatsetsèr à wakità Zəzagəla à abà: 'Nərəzàw, marabay aṅa azladza uwana tarab lakəl aṅa azladza, uwana tasà à waṅ aṅa maz à atà gay marabəṅ tsi.'
- <sup>16</sup>Ama la tataka azlaməna matsəb sləm à gay uwanay kà, dza dəṅ à uwana takəs gay uwaga aw. Masla mapəhal gay ahəl Yesayya agòd kà: 'Sufəl, uwa à uwana adiṅ gəl à mapəhay gami à vok uwa? Dza dəṅ aw!
- <sup>17</sup>Kità, sələw kà, dza atsən gay marabəṅ dadəṅ la uwana adiṅ gəl à vok. Ama kà dza aṅa matsən gay marabəṅ kà, say dza anik apəhal lakəl aṅa Yesu Kristu dadəṅ.
- <sup>18</sup>Aganay manavay gulo: La dziriga kà, azla Yahudiya kà, tatsənà gay uwaga aw takay? Ndzer, tatsənəṅ! La wakità Zəzagəla la abà tatsetsèr, tagòd kà: 'Azladza tadəh kà mapəh gay Zəzagəla la gudəṅ la vok gesina, mapəhay aṅatà atsən ala gesina, tsərəh à makəf gəl à ahəṅ gudəṅ à vok!'
- <sup>19</sup>Bà gotənaṅ gənavà akul manavay anik aya: La dziriga ma, azla Yahudiya tatsənà gay uwatà aw takay? Tatsənəṅ, ama asa à atà matsəbal sləm aw pəra. Teraṅa dəṅ Musa apəh à atà: 'Zəzagəla agòd: 'Gədàpaka akul ala kà azlamaṅor lakəl aṅa tsəhay uwana madziyikw atà gə. Gədàpaka akul ala ləv gə lakəl aṅa tsəhay uwana tasəl gəl aw', agòd.'
- <sup>20</sup>Ḍgaha la lig aṅa uwaga la ahəṅ, guba akəs Yesayya kà mapəhay aw. Kiya uwana mapəhay aṅa Zəzagəla, uwana apəh, Yesayya agòd: 'Aganay azladza uwana tayəh gi aw kà, tanəṅ gi ṅgaha gədəpəhatàla vok à azladza uwana tadəv gi kudà aw.'
- <sup>21</sup>Ama kà aṅa azla Isərayel kà Zəzagəla apəh la paṅaw aṅa Yesayya kà: 'Lis gəvak à mafatakəh à atà gəl kà mazala atà kà, ama tasa à waṅ aw. Takəs gay gulo aw, takwes gi à gəl.'

## Rom 11

<sup>1</sup>Kità kà, gənava manavay anik aya: Tsa kiya uwanay ma, Zəzagəla aməl azla Isərayel ala ay? Awaŋ, aməl atà ala aw. Gi la aslasl gəl gulo bay kà, gi zil Isərayel. Gəsà à uda la tsəhay aŋa Benyamin uwana mayyi à tsəh ala aŋa Abəraham.

<sup>2</sup>Zəzagəla aməl azladza aŋha uwana ala, atsatsəmàni atà dagay madzəka aw. Kasəlaw kà tatsetsèr kiya uwaga à wakità Zəzagəla à abà lakəl aŋa Eliya aw ay? Apuwà gudzi à azla Isərayel à gəl, la huma Zəzagəla agòd:

<sup>3</sup>Sufəl, azladza uwana takədhà azlaməna mapəh à atà gay ahəl aŋak, tabazllàh azlaslaka makəf tatak à ahəŋ. Say gi kokudà gəl gulo pəra à uwana gətəm à ahəŋ aŋa manəf ka, ŋgaha asa à atà makəf gi bay.'

<sup>4</sup>Mana Zəzagəla awùlla ala ma? Agòdal: 'Kak kokudà gəl aŋak pəra aw. Gəbək à ahəŋ azladza dəbow mədəf, uwana atà kà takədèd' à Bal à ahəŋ aw.' Zəzagəla agòdal.

<sup>5</sup>Lagwa kà, kasəlaw gay uwanay təga aw ay? Kà aŋami kà kiya uwanay babay zlà, atəm à ahəŋ azladza uwana Zəzagəla atsatsəmàni atà la vok mahamay aŋha.

<sup>6</sup>Baŋa Zəzagəla atsatsəmàni atà kà, kà sləray aŋatà uwana tadəhàŋ aw. Tsa baŋa kità aw kà, vok mahamay aŋha kà, adagay kà vok mahamay aya aw.

<sup>7</sup>Uwaga asal magodəy kà, azla Isərayel tabəza uwana tayəh aw, say azlauwana Zəzagəla atsatsəmàni atà la uwana tabəzal. Ama azlauwana tatəm à ahəŋ kà tadzadzàŋhà gəl aŋatà ala.

<sup>8</sup>Uwaga kà bokuba uwana tatsetsèr à wakità Zəzagəla à abà: 'Zəzagəla apakà atà ala dadəgzləka bokuba azlamadagazlam, atsəkàh à atà à yewdi à ama, anakàh atà à sləm à ama tsəràh à lakana kà: 'Təh sləm', agòd' à atà aw.'

<sup>9</sup>David agòd babay kà: 'Mazuw tatak may aŋatà kà adəpaka atà maləkaw à ahəŋ, adətsahla à atà matekwid, ŋgaha adədukw atà à ahəŋ. Kità à uwana Zəzagəla adəvə à atà ŋgərpə.

<sup>10</sup>Zəzagəla atsəkàh à atà à yewdi à ama, kà atà aŋa manəŋla ala aya aw, kà atà aŋa madz à ahəŋ la ŋgərpə la abà koksikoksi, kà makalàh atà à vədàh,' David agòd.

<sup>11</sup>Tsa kiya uwanay kà, gənava akul manavay anik aya. Mok uwana matekwid' atsàla à azla Yahudiya ma, tatəd' à ahəŋ aŋa tetuwa takay? Awaŋ, aŋa tetuwa aw. Ama kà uwana matekwid' atsàla atà la uwana azlatsəhay anik tabəzà gəl aŋatà, tabəl. Zəzagəla adəhàŋ kiya uwanay kà, kà azla Yahudiya aŋa makəf ala yewdi à tsəh.

<sup>12</sup>Mok uwana matekwid' atsàla azla Yahudiya kà, azladza gudəŋ à vok gesina, tabəzà mabəlay kà madəgolay uwaga. Mok uwana azla Yahudiya tatəd' à ahəŋ la tetəvi aŋa Zəzagəla la tsəh, Zəzagəla avə mabəlay à azlatsəhay anik. Kay, baŋa Zəzagəla adadəh dzəba aŋha səla aw à azladza anik la kaslà uwatà, adədhataŋ ma dādūwa à gay uwaga aw takay, la mok uwana azla Yahudiya tadəwul à waŋ à tetəvi aŋha à tsəh?

<sup>13</sup>Lagonay kà, gəpəhay kà akul, uwana akul azla Yahudiya aw. Gi kà, gi masləlay aŋa Zəzagəla uwana asləl gi à slaka aŋkul, uwana akul azla masla Yahudiya aw. Kà uwaga à uwana, gədəd' gay ləv kà sləray uwana avə à gi.

- 14**Kità, asa à gi kà tsəhay gulo, azla Yahudiya, tanəŋ gi, kà azlaanik la tataka aŋatà aŋa makəd atà à adi, kà atà aŋa mas à waŋ, kà Zəzagəla maβəl atà la sləray gulo.
- 15**Hadəy, mok uwana Zəzagəla aməl azla Yahudiya ala, asəl vok à azladza gudəŋ à vok. Ama mok uwana Zəzagəla adəwulla atà à tsəh aya, ma adəgay ma, kakay ma? Uwaga kà adəgay kà dzəba aŋha səla aw, adəvə sifa à azladza mamatsay gə.
- 16**Mats kaf matera, uwana dza atsəkay à fəta à awtəy tsikasla kà aŋa Zəzagəla, ŋgaha kaf gesina kà tsikasla bay. Baŋa godega ahəf aŋa Zəzagəla azlasləm gə bay kà, azlaaŋha.
- 17**Ahəf delga la abatà takədəval sləm anik la vok ala, ŋgaha tahəd kà makədəvani tsəhay aŋa ahəf uwatà la fəta kà maβədla à slaka uwana à abà, takədəvalla vok ala. Uwaga kà apəhay kà à kak, uwana kak zil Yahudiya aw. Kà uwana tatak delga uwana azla Yahudiya tabəzəl kà, lagonay kà, kak babay kaβəzal bokuba azlasləm ahəf uwana tabəzal ndzədə kà madegolay iyə gə.
- 18**Kà uwaga zlà kà, kapəsew azlasləm ahəf uwana takadaval à vok ala aw. Kà mana kats zlapay ma? Kak kà, sləm ahəf pəra, ndzədə aŋa sləm ahəf kà atsa à uda kà la iyə gə la abà pəra, awkà sləm ahəf avə ndzədə à iyə gə aw.
- 19**Zlahaw, dza la tataka aŋkul la abà agod: "Zəzagəla adakadaval azlasləm ahəf anik la vok ala, ŋgaha kà maβədla gi à abà la abatà", agodəy.
- 20**Hadəy, uwaga kà kità, Zəzagəla akədəvalla vok ala, kà uwana tadiŋ gəl à masla à vok aw. Ama kà aŋak kà, avə à ka slaka, kà uwana kadiŋ gəl à masla à vok, kità kà. Kazigəna gəl aw, hōy yewdi aŋa Zəzagəla!
- 21**Kà uwana baŋa Zəzagəla asək azlasləm ahəf dziriga gə, uwana asəlla à uda la vok aw, adəsak à kak babay, à kak aw.
- 22**Kay, fəl sləm lela, Zəzagəla kà delga, ŋgaha dzaŋdzaŋ babay. Masla kà dzaŋdzaŋ lakəl aŋa azladza, uwana tatəd à ahəŋ la tetəvi aŋha la tsəh, ama kà aŋak kà, adəhà à ka delga à kak uwana kada à huma à gay la madəh uwana ahədəl à adi, tsa baŋa kità aw, adənats ka à ahəŋ babay.
- 23**Ama azla Yahudiya kà, baŋa tadza à ahəŋ la dzaŋdzaŋ aŋatà la abà aw, Zəzagəla adətsəv atà à gəl məŋ aŋatà à gay, kà uwana masla la maslay kà matsəv atà à gəl məŋ aŋatà à gay aya.
- 24**Kak uwana kak zil Yahudiya aw kà, kak bokuba kak sləm ahəf fəta manatsin à waŋ gə, uwana tatsəv à ahəf delga à gay la mtəga. Baŋa Zəzagəla adəhəŋ kiya uwaga ma, kadzugw kà zlazladə kà aŋha aŋa mawulla azla Yahudiya à gəl məŋ aŋatà, uwana à gay uwarə takay? Atà uwana azlasləm ahəf dziriga gə?
- 25**Azladeda, asa à gi kà kasəlaw nasiri dziriga uwana Zəzagəla afətəlla à ama ala, kà akul aŋa magay azlazlapay aw. Gəgəd kà, azlaanik la tataka azla Isərayel la abà kà, asà à atà madiŋ gəl à Zəzagəla à vok aw bə la dziriga. Say baŋa azlatsəhay dza anik, uwana azla Yahudiya aw, uwana Zəzagəla atsatsəmənì atà, tadiŋ gəl à Zəzagəla à vok dən, ŋgaha la lig la ahəŋ azla Isərayel tadədiŋal gəl à vok.

<sup>26</sup>Ɖgaha Zəzagəla adàbəl Isərayel. Bokuba uwana tatsetsèr à wakità Zəzagəla à abà: 'Masla mabəl azladza kà, adàsa à uda kà la Siyon. Adàzəb tsakana à mayyi à tsəh ala aṇa Yakuba lakəl ala.

<sup>27</sup>Uwanay la uwana makəs vok slawda gulo la atà, à mok uwana gədàzəb atà tsakana lakəl ala,' Zəzagəla agòd.

<sup>28</sup>Kiya uwaga kà, azla Yahudiya, kà takweskà gay marabəṇ, gay gà la uwaga à uwana, tapakà azlaməna məzam aṇa Zəzagəla. Uwaga apakà vok kà, kà akul uwana akul azla Yahudiya aw, aṇa mabəz gəl la abà. Ama kà aṇatà babay kà, Zəzagəla atsatsàmànì atà, ṅgaha awoyà atà, kà uwana apəh à azlababa aṇatà madzidziga à vok à abà dagay uwarà.

<sup>29</sup>Zəzagəla kà, baṇa adazalla ka kà, bà adazalla ka. Ɖgaha baṇa adavà à ka kà bà adavà, abədlà vok aw.

<sup>30</sup>Akul uwana azla Yahudiya aw kà, kakwesàwkà paṇaw aṇa Zəzagəla dagay uwarà. Ama lagonay kà azla Yahudiya takweskà Zəzagəla, gay gà la uwaga kabəzàw vok mahamay aṇha.

<sup>31</sup>Ama azla Yahudiya kà, kiya uwaga babay, lagonay kà takweskà Zəzagəla, ṅgaha kabəzaw à gəl la slaka aṇatà la abà. Ama uwaga apakà vok kà, kà atà mabəz vok mahamay babay.

<sup>32</sup>Zəzagəla asàkla à ahəl à azladza la tsəh ala gesina, kà atà aṇa makweska masla, adahəṇ kiya uwaga kà, kà vok aṇa mahamal kà atà gesina.

<sup>33</sup>Kay ndzer, dzəba aṇha səla aw aṇa Zəzagəla kà məṅga, matsihila aṇha kà zəṅzəṅ, aduwa azlatatak gesina, asəl tatak gesina bay. Madzugway aṇha kà dza abəz kà aw. Zlazlada kà dza matsən madəhəṅ aṇha.

<sup>34</sup>Uwaga bokuba uwana tatsetsèr à wakità Zəzagəla à abà: 'Uwa asəl, uwana Sufəl Zəzagəla adzugway uwi, 'Dahà uwanay!', ma uwa à uwana agodəl uwi? Dza la ahəṅ aw.

<sup>35</sup>Uwa adàvəl tatak à adi uwi, kà masla aṇa magay la goder aṇha la vok uwi? 'Dza la ahəṅ aw', tagòd.'

<sup>36</sup>Hadəy ndzer kà, dza la ahəṅ aw, kà uwana masla la uwana adahà tatak gesina. Tatak uwaga gesina tadza à ahəṅ la sifa kà, kà masla, masla la uwana Sufəl lakəl aṇatà. Məzləbà masla aṇa koksikoksi. Amen!

## Rom 12

<sup>1</sup>Azladeda, tsa aṇa kiya uwanay vok adahama à Zəzagəla kà aṇami zlà kà, gədəv à akul kuda: Vəwwal vok aṅkul la deṇdaṇ. Vəw vok aṅkul à masla, bokuba tatak uwana takəd à Zəzagəla la ləv tekula, baməraka akul la sifa babay. Gəw azlaaṇha kà makəsəl à gəl. Uwaga la uwana tetəvi dziriga kà masləkawla Zəzagəla.



<sup>2</sup>Kanəfaw madz à ahəŋ aŋa azladza gudəŋ à vok aw. Ama la uwaga kà, vaw tetəvi à Zəzagəla, avà à akul azlamadzugway mawga kà masla aŋa maβəɗla akul. Kiya uwaga kà, kadàsəlaw tatak uwana asa à Zəzagəla, uwana delga, uwana ahəɗal à adi, ŋgaha akəsa à vok la tetəvi aŋha la ama bay.

<sup>3</sup>Ndzəɗa aŋa Zəzagəla, uwana avà à gi kà mapəhakulla kà à aganay; gəgod à kəla uwabeyuwi aŋkul kà kazigənaŋ gəl aw, ama sələw madz à ahəŋ aŋkul. Nərəzəw kà mavəy uwana Zəzagəla avà à akul aŋa masəl slaka uwana akul la abà.

<sup>4</sup>Vok aŋa dza kà tekula pəra gesina, ama vok uwaga kà la azlamanabay anik anik, ŋgaha kəla manabay kà la sləray aŋha.

<sup>5</sup>La anu babay kà kità. Anu dəŋ, ama kiya anu la sləb vok tekula, kà uwana mədahama gay à vok la Kristu. Anu gesina kà mədanab vok à gay bokuba manabay aŋa vok.

<sup>6</sup>Zəzagəla avàhà à anu mavəy aŋa sləray aŋha kà la aŋha, la aŋha. Kiya uwana asal mav à anu uwabeyuwi adàhà sləray la mavəy uwana Zəzagəla avà. Kasəl kà, baŋa Zəzagəla avà à ka mavəy aŋa mapəh gay aŋha kà: Zàŋ, bokuba kasəl, kà uwana Zəzagəla avà à ka maslay.

<sup>7</sup>Baŋa Zəzagəla avà à ka maslay aŋa madàh sləray à azladza: Zlək à atà. Baŋa Zəzagəla avà à ka mavəy aŋa matapla à azladza, kiya uwaga tàpatàla, la tetəvi aŋha.

<sup>8</sup>Baŋa Zəzagəla avà à ka à mavəy kà madzərəɗàh azladza ala, dzərəɗàhatàla. Baŋa Zəzagəla avà à ka à mavəy kà mavàh tatak à azladza, vàh la ləv tekula. Baŋa Zəzagəla avà à ka à mavəy kà manəŋla azladza, nəŋla atà la tetəvi aŋha. Baŋa Zəzagəla avà à ka à mavəy kà madàhla delga à azladza, ɗàhà uwaga la marabay.

<sup>9</sup>Kawoyaw dza la gay gə pəra aw, wəyàw dza la ləv tekula, həyàw à mawisiga à ahəl. Nəfàw kà uwana delga.

<sup>10</sup>Wəyàw vok akul azlaməna manəfay, kà uwana akul azlaməna huɗ gəy tekula, sləkàwàw azladedà aŋkul ɗàɗuwa à gay gəl aŋkul.

<sup>11</sup>Vàw vok à sləray la ləv aŋkul gesina, kagaw azlaməna mas aw, zləkàw Sufəl Zəzagəla la ləv aŋkul gesina.

<sup>12</sup>Fàw yewdi kà à uwana à gay Zəzagəla apəh à akul à ahəŋ. Kità kà, rabàw koksikoksi. Basàw ŋgərpa uwana kasaw. Dəvəw kudà à Zəzagəla kokudà masakal.

<sup>13</sup>Baŋa azlaməna madiŋal gəl à vok anik la kudà la abà kà, kàləw tatak uwana tanəkudà aŋha. Kəsàw azlaməlok dza uwana tatsa à mtəga aŋkul la ahəl səla.

<sup>14</sup>Dəvəw kudà à Zəzagəla kà azladza uwana tatərəb akul, katsafaw la atà aw.

<sup>15</sup>Rabàw la slaka gə la azladza uwana tarabay. Tawàw la slaka gə la azladza uwana tataway babay.

<sup>16</sup>Tsənàw vok gay la azlaməna magay aŋkul, kazigənaŋ gəl aw, baməraka sləray uwali ɗàhəŋ bəziga aŋa sləray la ahəŋ aw. Kadzugwaw aw 'Anu azlaməna matsihilaga', kagodəw aw.

<sup>17</sup>Baṅa dza adāhakulla mawisiga à vok kà, kawulawwalla mawisiga à adi aw. Dahàw haṅkəli kà madəhəṅ, kà uwana ahəḍ la slaka azladza gesina.

<sup>18</sup>Wādāw vok à uda la uwana la abà kaslaw gesina, kà akul aṅa madz à ahəṅ la lapiya la abà, la kəla uwabeyuwi à baṅa akəsa à vok.

<sup>19</sup>Akul azlaməna gay ləv gulo kawulawla mawisiga à azladza à adi aw, ama sàkəwla kà la Zəzagəla la ahəl, à mapak ləv uwaga kokudā gəl aṅha pəra. Kà uwana tatsətsər à wakità Zəzagəla à abà: "Tatak mawisiga uwana azladza tadāhakullaṅ à vok kà, gi la uwana gədəpəlla à akul goder aṅha', Sufəl Zəzagəla agòḍ.'

<sup>20</sup>Wakità Zəzagəla agòḍ aya kà: 'Baṅa masla məzam aṅak la may gə, vəl tatak may, baṅa la nəlay gə, tədalla iyaw. Baṅa kadāhalaṅ kiya uwaga, masal aṅak adādāhalla sləray ṅgaha adəpəh gay la ləv ala.'

<sup>21</sup>Kavà tetəvi à mawisiga kà makəḍasl à ka aw, kəḍasl à mawisiga la madāh delga.

### Rom 13

<sup>1</sup>Kəsàw gay aṅa azlaməna makor kutso, kà uwana azlauwana la ndzəḍa gesina kà Zəzagəla la uwana avà à atà, ṅgaha masla la uwana abək atà à ahəṅ.

<sup>2</sup>Kità kà, dza uwana adzadzəṅ gəl ala la huma aṅa azladza, uwaga kà adzadzəṅa gəl ala kà la tatak uwana la afik Zəzagəla afà à ahəṅ, azlauwana tadəhəṅ kiya uwanay kà tadəbiy seriya à gəl aṅatà.

<sup>3</sup>Ama baṅa azladza, uwana tadāh delga kà, guba aza atà kà azlaməna makor kutso aw, say azlaməna madāh mawisiga la uwana guba az atà pəra. Baṅa asa à akul kà guba aṅa maz akul la huma aṅatà aw kà, ḍahàw delga, kà akul aṅa mahəḍ à atà à adi.

<sup>4</sup>Kà uwana azlauwana takoray kà, tadəhəṅ kà sləray uwana Zəzagəla afà à atà à ahəl kà mazlak ka aṅa madāh delga. Baṅa kadādāhaw mawisiga kà, guba akəs akul kà atà, kà uwana ndzəḍa uwana Zəzagəla avà à atà kà, avà à atà kà deyday aw. Atà kà, azlaməna sləray aṅa Zəzagəla, kà mapəhla mapak ləv aṅa Zəzagəla ala lakəl aṅa azlauwana tadāh mawisiga, kà madāh à atà seriya à gəl.

<sup>5</sup>Tsa baṅa kiya uwanay kà, say məkəsəy gay aṅa azlaməna makor kutso, kà huma yewdi pəra aw, ṅgaha la seriya uwana la abà atəḍ anu à gəl aw. Ama kəsàw gay aṅatà, kà uwana kasəlaw la ləv la tsəh kà, tetəvi uwaga kà asa kà à Zəzagəla babay.

<sup>6</sup>Gay gə la uwaga à uwana, kapəlaw hadama babay. Zəzagəla abək à azlaməna mazəḍ hadama à ahəṅ, kà atà aṅa madāhla sləray uwaga lela.

<sup>7</sup>Pəlāw à azladza uwaga gesina tatak uwana tanava à akul. Pəlāw hadama à azlaməna mazəḍ hadama, pəlāw duwan à azlaməna mazəḍ duwan. Kəsàw gay à azladza uwana la ahəl ala takor kutso lela.

<sup>8</sup>Kadzaw à ahəṅ la goder aṅa dza la vok aw. Goder aṅkul kəla kà, say mad à huma à gay la mawoy à azladza anik la abà. Kà uwana dza uwana awoya azlaməna magay aṅha kà, anəfa mapəhay aṅa Zəzagəla lela.

<sup>9</sup>Haday, Zəzagəla agòd à anu: 'Kada à gəl gaw aw, kakəd dza aw, kada gəl aw, kakəda yewdi à azlatatak aṅa azladza anik à vok aw.' Azlamapəhay uwaga, la azlaanik gesina kà, tahama à abà à uwana agod: 'Wòyàn masla magay aṅak, bokuba uwana kawoya gəl aṅak bay.'

<sup>10</sup>Dza uwana awoya masla magay aṅha kà, adàhalaṅ mawisiga à vok aw. Kità kà baṅa kawoya azlaməna magay aṅak kà, kanəfa mapəhay à uda gesina.

<sup>11</sup>Wàdāw vok à uda, tsa kasəlaw mavakay uwaga lagwa kà, tsənàwla adagay kà uwana kaslā uwana Zəzagəla adàbəl anu aṅa tetuwa kà nekwa. Uwaga kà kərkər bokuba la mavakay uwana mədiṅ gəl à Yesu Kristu à vok dadāṅ aw.

<sup>12</sup>Vədf la uwaga adà à lig, afats la uwaga atsa à afik. Lagwa kà mənəfa à sləray aṅa mələs aya aw. Mətsokw azlatatak guvəl uwana à abà, məpala guvəl la afats.

<sup>13</sup>Məhàd lela, azlauwana taday la udāka la abà. Məgà azlaməna mas guzu aw, mələlim lakəl aṅa tatak may aw, mədāhà mabila baməraka la mana mi aw, mədāhà magazlay la azladza aw, ṅgaha məkadā yewdi à tatak aṅa azladza anik à vok aw.

<sup>14</sup>Mətsòkw Yesu Kristu à vok bokuba tatak guvəl gami. Kadzugwaw à azlatatak mawisiga, uwana asa à vok aṅkul kà madəhəṅ aw.

## Rom 14

<sup>1</sup>Kèsàw azlauwana taruw vok ahəṅ la tetəvi aṅa Zəzagəla la tsəh la ahəl səla, kadzedzinaw madzugway aṅatà aw.

<sup>2</sup>Uwaga gəpəh à akul kà, lakəl aṅa tatak may kaykay. Azladza anik kà, tatak may uwanay kà, asləh kà mazuway tasəl magodāy aw bə mazuway pəra, ama dza uwana aləg mahəṅay la tetəvi aṅa Zəzagəla la tsəh kà, apad sləb aw, azuway kà bəsla agər à abà pəra.

<sup>3</sup>Ama dza uwana amanay gesina kà, apəsew dza anik uwana apad sləb uwaga aw. Ḍgaha dza uwana apad sləb aw kà, adziyukw à masla mapad sləb babay aw, kà uwana Zəzagəla kà akəs masla maman tatak uwaga gesina.

<sup>4</sup>Kak ma, kak uwa, kagod kà madziyukw à magamza aṅa dza anik, uwana adāh sləray mawisiga uwa? Say məṅga aṅha la uwana apəhaalla, à baṅa adāhaṅ kà delga aw ma mana aṅak la abà ma? Adətədf à ahəṅ aw kà uwana məṅga aṅha uwana la afik, adānəṅla kà masla aṅa matədāy à tetəvi aṅha la tsəh ala aw.

<sup>5</sup>Azladza anik tadzugway kà mavakay anik aduwa azlaanik la huma yewdi aṅatà, ama la yewdi aṅa azladza anik mavakay gesina kà kalkal. Say dza asəl uwana adzugway la ləv aṅha la tsəh la paraka.

<sup>6</sup>Dza uwana adzugway kà, mavakay anik aduwa azlaanik adzugw kiya uwanay kà, asləkawla Sufəl Yesu. Dza uwana apad sləb tasləkaw, kikay agodiya à Zəzagəla lakəl aṅa uwana azuway. Dza uwana apad sləb bay adāhaṅ kiya uwaga kà masləkaw Sufəl babay, ṅgaha kikay agod à Zəzagəla lakəl aṅa uwana azuway babay.

- <sup>7</sup>Kità kà dza la ahəŋ, adza à ahəŋ kà aslasl gəl aŋha aw ŋgaha dza la ahəŋ amətsay kà aŋa aslasl gəl aŋha babay aw.
- <sup>8</sup>Kà uwana baŋa anu la sifa kà, anu la sifa kà aŋa mədàh sləray aŋa Sufəl, uwana aŋal anu, ŋgaha baŋa məmətsay kà, məmətsay mamətsay gesina kà, kà anu azlaaŋa Sufəl Yesu Kristu.
- <sup>9</sup>Kà uwana Sufəl Yesu Kristu aməts, ŋgaha awùl à uda la mamətsay, kà masla aŋa magay Sufəl aŋa azlamazimnekid' la azladza uwana la sifa bay.
- <sup>10</sup>Tsa aŋa kiya uwanay ma, kak ma kak uwa, à uwana kapəsew deda magay aŋak uwa? Ŋgaha ma kak ma kak uwa? Məsəl gesina gami kà, mədàda à huma seriya aŋa Zəzagəla.
- <sup>11</sup>Uwaga kà bokuba uwana tatsətsèr à wakità Zəzagəla à abà. Sufəl Zəzagəla agòd: 'Gəgod' la dziriga: Kəla dza adəkədəf à ahəŋ la huma gulo. Ŋgaha kəla uwabeyuwi adəpəhay la paraka kà: Kak Zəzagəla la uwana la maslay gesina,' tadəgodəy.
- <sup>12</sup>Uwabeyuwi adətugw uwana adəhəhəŋ la huma Zəzagəla, la paŋaw aŋha la paraka.
- <sup>13</sup>Tsa baŋa kiya uwanay kà, məsak à madziyukw à vok à dagay. Dahəw haŋkəli kà akul aŋa madəh uwana atsala matekwid' à deda aŋkul, ŋgaha kà madukw masla à tsakana à abà aw.
- <sup>14</sup>Gi dza aŋa Sufəl Yesu, ndzer kà, tatak gesina kà masləhay gə la ahəŋ aw, ama baŋa dza anik adzugway kà, tatak anik masləhay gə la ahəŋ, kità uwaga kà, afa à gay aw, kà uwana kà aŋha kà, asləh hadəy.
- <sup>15</sup>Baŋa katafad' ləv à deda aŋak la tatak may, uwana kazuway kà, kiya kawoyaŋ aw. Kà uwana Yesu Kristu kà aməts kà aŋha babay. Səl kà, uwana kazuway kà, atafad'alla ləv la tetəvi aŋa Zəzagəla la tsəh aw.
- <sup>16</sup>Ama kà aŋak kà, tatak gesina kà masləhay gə la ahəŋ la huma aŋak aw, ama baŋa kasəl kà azladza tadəpəh mawisiga lakəl aŋha kà sàkal, ŋgaha kà atà aŋa matugw mawisiga aw.
- <sup>17</sup>Makoray Zəzagəla kà gay aŋa mazuway la masay aw. Ama uwaga kà gay aŋa dziriga ŋgaha la marabay, uwana Masasədək Zəzagəla avəy la lapiya, awkà gay aŋa tatak uwaga la abà aw.
- <sup>18</sup>Dza uwana adəh sləray aŋa Yesu Kristu kiya uwanay kà, Zəzagəla adəwoyəŋ, ŋgaha azladza tadəsləkaway babay.
- <sup>19</sup>Tsa baŋa kiya uwanay kà, məwəf' vok à uda kà madəh uwana azlaka à azladza kà madz à ahəŋ la lapiya, la maham à gay à vok gami la abà, ŋgaha uwana adazigəŋ azladza anik la tetəvi aŋa Zəzagəla la tsəh.
- <sup>20</sup>Kawisà sləray aŋa Zəzagəla ala la tatak uwana kà manay aw. Kay kà, tatak masləhay gə la ahəŋ nəma kà, ama baŋa azladedə aŋak tadəsokw à tsakana abà kà, uwaga kà delga kà manay aw.

<sup>21</sup>Ama uwana delga kà, kadàha tatak uwana adàdukw deda aṅak à ahəṅ, adàgay mapad sləb uwaga baməra adàgay mas guzu, adàgay bà mana beymi uwana adukw deda aṅak à ahəṅ kà, kafa gay aw.

<sup>22</sup>Uwana kasəl lakəl aṅa uwaga kà, fà uwaga à tsəh kuvəl aṅak, uwaga kà la tataka aṅkul la Zəzagəla pəra. Marabay agay la dza uwana adàhaṅ tatak la kokudà mabək gəl à ahəṅ səla.

<sup>23</sup>Ama dza, uwana abək gəl à ahəṅ səla, lakəl aṅa tatak may, azuway la mabək gəl à ahəṅ, səlà kà seriya adəkəsəy, kà uwana bà la mabək gəl à ahəṅ səla aṅha kà, asakal à tsəh ala kà mazuway aw. Kà uwana kəla tatak uwana mədəhəṅ la mabək gəl à ahəṅ səla la huma Zəzagəla kà tsakana.

## Rom 15

<sup>1</sup>Anu uwana mədahəṅay la tetəvi aṅa Zəzagəla la tsəh kà, məzlaka azlauwana tahəṅay dadəṅ aw, mədahəṅ kà uwana akəsə à anu à gəl pəra aw.

<sup>2</sup>Say mədahəṅ kà uwana akəsə vok kà aṅa azladedə gami, məzlak atà kà atà aṅa mazigəṅay la tetəvi aṅa Zəzagəla la tsəh.

<sup>3</sup>Yesu Kristu la gəl aṅha bay kà, ayəh tetəvi kà madəh uwana asà à gəl aṅha aw. Ahəṅə gay uwana ala, tatsətsər à wakità Zəzagəla à abà: 'Magodəhay aṅa azlaməna matsək à ka magodəhay à gəl kà, awul à gəl gulo,' agòd.

<sup>4</sup>Tekedik, kəla tatak uwana tatsətsər à wakità Zəzagəla à abà kà, tatsətsər uwaga kà matapanula dziriga, kà anu aṅa makəd yewdi à uwana à abà, Zəzagəla apəh à ahəṅ kà madəhəṅ kà uwana la wakità Zəzagəla la abà adzərədəh anu ala, ṅgaha kà anu aṅa matsizilla à ahəṅ lela.

<sup>5</sup>Zəzagəla adzərədəh anu ala kà uwana apakənula kà anu magay mazlaməna mabasiṅ, ṅgaha anu aṅa magay la paṅaw tekula, bokuba uwana Yesu Kristu adəhəṅ bay,

<sup>6</sup>kà akul gesina aṅa mazləb Baba aṅa Sufəl gami Yesu Kristu la paṅaw tekula.

<sup>7</sup>Kità kà, kəsəw vok kà akul à akul bokuba uwana Yesu Kristu akəs akul. Dahəwwəṅ kiya uwaga, kà azladza aṅa mazləb Zəzagəla.

<sup>8</sup>Gi, gəpəh à akul la paraka, Yesu Kristu apakə magamza aṅa azla Yahudiya, kà masla aṅa mapəhatàla kà Zəzagəla kà adəh fida aw. Asəl mahəṅ uwana ala Zəzagəla apəh à azlababa aṅatà à ahəṅ.

<sup>9</sup>Asà à waṅ babay, kà azlauwana azla Yahudiya aw aṅa mazləbay, kà azlatatak dzəba aṅha səla aw gə uwana adəhəṅ. Uwaga kà bokuba uwana tatsətsər à wakità Zəzagəla à abà lakəl aṅha: 'Kà gay uwanay gədəzləb kà la tataka azladza la abà, gədəzləb kà la azlamahabay.

<sup>10</sup>Gay Zəzagəla agòd aya kà: 'Akul uwana akul azla Yahudiya aw, rabəw la slaka gə, la azlatsəhay aṅa Zəzagəla uwana akəs atà dagay uwarə.'

- 11**La slaka anik la abà aya tagòd: 'Akul uwana akul azla Yahudiya aw, zləbàw Sufəl Zəzagəla. Dza atəm à uda aw, zləbàw masla gesina.
- 12**Yesayya, masla mapəhal gay ahəl aña Zəzagəla agòd' babay: 'Dza anik adàsa à uda la tsəhay aña Yese la abà, adàsa à wañ kà makor azladza uwana azla Yahudiya aw, tadàfay manəwəñ aña atà à masla à afik kà mabəl atà.
- 13**Zəzagəla uwana av manəwəñ, ahənəkulla la marabay, ngaha akul aña mabəz lapiya la ləv la tsəh, kà uwana kadiñaw gəl à masla à vok kà, manəwəñ añkul lakəl aña adahən ala pawasla, la ndzəda aña Masasədok tsikasla.
- 14**Azladeda gulo, gi la aslasl gəl gulo kà, gəsəl kà kadàhàwwàñ kà la tetəvi aña, kasəlaw dziriga gesina, ngaha kasəlàw tetəvi aña mawalla kà vok hañkəli à gəl.
- 15**Ama bà la uwaga, la azlaslaka anik la wakità uwanay la abà, gətsetsèr à atà kà, la maz kuda à zagəla lakəl aña azlatatak anik anik, kà aña mavika akul aw. Gətsetser bokuba uwanay, kà dzəba aña səla aw uwana Zəzagəla adahagəñ.
- 16**Bokuba magodəy kà, afà gi à ahəñ kà magamza aña Yesu Kristu la tataka azladza uwana azla Yahudiya aw. Gəvə vok gulo à Zəzagəla tetuwa, kà maz gay marabəñ, gay gə à uwana atsà à wañ la slaka aña. Gəziñ kà à azlauwana azla Yahudiya aw, kà atà aña madiñ gəl à masla à vok, ngaha kà uwana Masasədok tsikasla afà à fəta à awtəy kà aña.
- 17**Kà sləray aña Zəzagəla uwana gədehəñ kà, gədeɸ gay ləv, kà uwana gi la ahəl aña Yesu Kristu.
- 18**Kà uwana gəpəhay lakəl aña tatak anik aw, say uwana Yesu afà à gi à ahəl. Masla avà à gi ndzəda, kà madla azladza uwana azla Yahudiya aw à huma Zəzagəla, kà atà aña makəs masla. Adahəñ kiya uwanay kà, kà azlagay uwana gəpəh, ngaha azlatatak uwana gədañ.
- 19**Adahà azlanadzipo tsəhay anik anik la ndzəda aña Masasədok tsikasla babay. Kiya uwaga gəsləhà gay marabəñ à azladza ala gesina lakəl aña Yesu Kristu, adzəkà à vok dagay la Urusalima tsərəh à gudəñ Iliriya.
- 20**Ama gi kà gəhika kaykay maz gay marabəñ kà la slaka uwana azladza tatsən gay lakəl aña Yesu Kristu dadəñ aw, kà uwana asa à gi maziñ la slaka uwana azladza tatsənəñ aw kà gi asa à gi mabəɸ sləray aña dza anik à gay dzəgov aw.
- 21**Gi kà, gədehəñ bokuba uwana tatsetsèr à wakità Zəzagəla à abà: 'Azlauwana tapəh à atà tatak lakəl aña aw kà, atà kà tadənəñəñ. Azlauwana tatsən tatak lakəl aña aw bay tadatsən gay marabəñ,' Zəzagəla agòd'.
- 22**Asik dəñ gədaɸəzɸ ala kà manəñ akul à gay, ama gəbəzà tetəvi aw.
- 23**Mavay dəñ à uwana gədayah tetəvi la iyaw tugwi kà manəñ akul à gay, ama sləray akəs à gi à ahəñ. Lagwa kà, sləray gulo la kutso uwanay la abà kà, adakəɸ gəl à ahəñ.

<sup>24</sup>Gədzugw mad à awtày à slaka aṅkul, gədàdza à ahəṅ ṅuv la slaka aṅkul kà manəṅ vok. La lig la ahəṅ kà pəra, gədàda à Espaniya. Asa à gi kà kadàzłakaw gi la mauguzahay gulo uwaga la abà gədàdéhəṅ.

<sup>25</sup>Ama lagonay kà, gəwul à Urusalima dadəṅ, kà madla tatak mazlakay à azladza aṅa Zəzagəla la abatà.

<sup>26</sup>Kà uwana azlaməna gay Zəzagəla uwana la abanay la Makeduniya, la azlauwana la Akayya tarəb kà maham gay à sili à vok kà masləl à azlaməna kuḏa la tataka maham à ahəṅ məna gay Zəzagəla la Urusalima.

<sup>27</sup>Uwaga kà, atà tadzùgw la gəl aṅatà, ama uwaga kà azlayla kà vok aṅa madéhəṅ kiya uwaga. Haday, kà uwana azla Yahudiya tazłak azladza uwana azla Yahudiya aw, kà atà aṅa mabəz mapis gay à vok aṅa Zəzagəla məṅga. Kità kà delga, kà azladza uwana azla Yahudiya aw, tazłaka atà la azlatatak uwana tabəzəl la gudəṅ la vok babay suwaṅ.

<sup>28</sup>Baṅa gədàdəv uwaga à gay, gədàbək atà tatak uwana tabək gi à ahəl gesina, gədàwul à lig, kà mad à Espaniya, ama gədəguway kà la gudəṅ aṅkul, la Rom dadəṅ.

<sup>29</sup>Gəsəl kà aṅa gədàzłanjal à slaka aṅkul kà, Yesu Kristu adəpis anu gay à vok məṅga, la maham gay à vok gami la abà.

<sup>30</sup>Azładeda, kamkam, gəgodf à akul la sləm aṅa Yesu Kristu, kà uwana Masasəfok tsikasla apakà anu ala kà məna mawoy vok kà anu à anu. Kamkam złəkàw gi la madəv kuḏa à Zəzagəla, dəvəwwal kuḏa kà aṅulo la ləv tekula,

<sup>31</sup>kà azlaməna kutso Yahudiya uwana tasəl Yesu Kristu aw, kà gi aṅa mad à ahəl aṅatà aw. Dəvəw kuḏa à Zəzagəla babay, kà tatak uwana la ahəl gulo aṅa makəs à vok à azladza la abatà la Urusalima.

<sup>32</sup>Kità kà, baṅa asa à Zəzagəla kà, gədàsa à waṅ à slaka aṅkul kà la hazłakhazłak. Dəgaha mədàhama gay à vok la marabay məṅga la abà.

<sup>33</sup>Zəzagəla masla aṅa mavəh lapiya afa à akul sləm. Amen!

## Rom 16

<sup>1</sup>Iyay, gəpəh à akul lakəl aṅa deda gami misga, Febe, uwana adəhà sləray la tataka maham à ahəṅ məna gay Zəzagəla la abà la Kenkeriya.

<sup>2</sup>Kamkam, mok uwana adəbəza à slaka aṅkul kà, dəkəsəw masla la ahəl səla la sləm Sufəl gami Yesu, bokuba uwana azlayla azlaməna gay Zəzagəla tadéhahəṅ. Złəkàw masla la azlatatak uwana anəkudà aṅha gesina, kà uwana masla kà, azłakà à azladza aṅuvaw baməraka gi babay.

<sup>3</sup>'Ayyi' gəgodf à Pərəskila atà la zil aṅha Akilas. Atà uwana mədàhà sləray aṅa Sufəl gami Yesu Kristu la slaka gà.

- <sup>4</sup>Mok uwana uwarà azladza tatərèbà gi kà, tasà à waŋ kà aŋa matəf gi, tafà à gəl aŋatà aw, 'Kikay' gəgod à atà mənŋa, gi pəra à uwana 'Kikay' gəgod à atà aw, azlaməna madiŋal gəl à vok, uwana azla Yahudiya aw gesina babay kà: 'Kikay', tagod à atà.
- <sup>5</sup>'Ayyi' gəgod à azlaməna gay Zəzagəla uwana tahaməh gay à vok kà madəv kudà la mtəga aŋatà aya. 'Ayyi' gəgod à slawda gulo Epaynet, uwana atsəv vok à madiŋal gəl à Yesu à vok à abà la kutso Asəya.
- <sup>6</sup>'Ayyi' gəgod à Mariyama, uwana adəhà sləray mənŋa kà aŋkul.
- <sup>7</sup>'Ayyi' gəgod babay à Andəronikus atà la Yuniyas uwana la tsəhay gulo. Mədzà à ahəŋ la daŋay anina. Atà uwana azlazəbzəb gə la tataka aŋa azlaməna matapla la abà. Atà la uwana tatsəv vok à madiŋ gəl à Yesu à vok kà gi.
- <sup>8</sup>'Ayyi' gəgod à slawda gulo Ampəliyatus uwana anu tekula la ahəl aŋa Sufəl.
- <sup>9</sup>'Ayyi' gəgod à Urban, slagama gami la sləray aŋa Yesu Kristu la abà atà la Sətəkəs slawda gulo.
- <sup>10</sup>'Ayyi' gəgod à Apel, uwana asà ŋərpə kà sləm aŋa Yesu Kristu, ŋgaha agəd à afik ndzer, ŋgaha 'Ayyi' gəgod à hud' gəy aŋa Arisətobul.
- <sup>11</sup>'Ayyi' gəgod à tsəhay gulo Herodiyon, 'Ayyi' gəgod à azlaməna gay Zəzagəla la hud' gəy aŋa Nartsəs.
- <sup>12</sup>'Ayyi' gəgod à Tərifən atà la Tərifos, azladedə gami misga uwana tadəh sləray aŋa Sufəl Yesu. 'Ayyi' gəgod aya babay à Persəda, deda gami misga uwana adəh sləray la ndzədə kà aŋa Sufəl.
- <sup>13</sup>'Ayyi' gəgod à Rufus, dza dziriga gə, uwana la tetəvi aŋa Sufəl la tsəh. 'Ayyi' gəgod à iyà aŋha uwana afà à gi sləm bokuba gi bəzi manədəl aŋiz à gəl aŋha bay.
- <sup>14</sup>'Ayyi' gəgod à Asənkərit, à Felegon, à Herməs, à Patərobas, à Hermas, la azlaməna madiŋal gəl à vok anik gesina, uwana atà nna la abà gə.
- <sup>15</sup>'Ayyi' gəgod babay à Filolog atà la Yuliya, Nere misga atà la deda aŋha duguga. 'Ayyi' gəgod à Olimpas la azlaməna gay Zəzagəla anik gesina uwana atà nna la abà gə bay.
- <sup>16</sup>Dahəhəw vok 'Ayyi' kà akul à akul. Maham à ahəŋ dza gesina uwana tadiŋ gəl à Yesu Kristu à vok, 'Ayyi', tagod à akul.
- <sup>17</sup>Azladedə, 'Kamkam' gəgod à akul, dəhəw haŋkəli kà azladza uwana tatsəd' gay à gay uwana à tsəh tatəpakulla. Kà atà tatsəlla kà mavəhla à waŋ, ŋgaha tanis akul à ahəŋ la tetəvi la tsəh, atà kà kagagamawla vok ahəl akul nna aw.
- <sup>18</sup>Kà uwana tsəhay dza uwaga kà, tadəh sləray aŋa Sufəl gami Yesu Kristu aw, tatuway kà vok aŋatà pəra. Tapapat azladza la azlagay namnamga, uwana atsa à waŋ la paŋaw aŋatà la awtəy. Kità à uwana tavavar azladza uwana kokudə masəl godega aŋa gay uwaga.



<sup>19</sup>Kà aṅkul kà, dza gesina tasəlay kà, kakəsàw gay aṅa Sufəl gami. Gi la marabay mənḡa kà akul, ḡgaha asa à gi babay kà kagaw azlamahanay gà, kà madàh uwana delga kà akul aṅa mahoy à mawisiga à ahàl.

<sup>20</sup>Zəzagəla masla mavàh lapiya à azladza, adàdzam gəl à seteni ala la tsəh à asik aṅkul la huma la gay. Sufəl gami Yesu Kristu apis akul à gay à vok.

<sup>21</sup>Bà gotənaṅ kà 'Ayyi' Timotawus, uwana mədàh sləray anu səla, agod' à akul. Azlatsəhay gulo Lutsəyus la Yason la Sosəpatər kà 'Ayyi', tagod' à akul babay.

<sup>22</sup>'Ayyi' gəgod' à akul, à gi Tertsəyus uwana gətsetser gay aṅa Pol uwanay à wakità uwanay à abà, 'Ayyi' gəgod' à akul babay, la sləm aṅa Sufəl gami.

<sup>23</sup>'Ayyi' Gayyus agod' à akul babay. Gi la azlaməna gay Zəzagəla gesina madz à ahəṅ kà la mtəga aṅha la abanay. Erastus, masla makəs sahar aṅa huđ gudəṅ uwanay, atà la deda gami Kwartus tadàha à akul 'Ayyi'.

[<sup>24</sup>Sufəl gami Yesu Kristu apis à akul gay à vok lela! Amen.]

<sup>25</sup>Məzłəbà Zəzagəla uwana avà à akul ndzədà kà madz à ahəṅ lela la tetəvi aṅha la tsəh. Bokuba uwana apəh à azladza la mok uwana gəzà à atà gay marabəṅ lakəl aṅa Yesu Kristu. Gay mahad' vok à ahəṅ gà aṅa Zəzagəla bay kà, apəhay à anu kà kalkal la uwaga. Kà uwana tatak uwaga kà, Zəzagəla afətàla à azladza la adi ala dagay uwarà aw.

<sup>26</sup>Ama lagonay kà, Zəzagəla adafətala à azladza la adi ala la dazuwaya. Apəhatàla kà la maz à atà uwana azlaməna mapəh à atà gay à ahàl tatsetsər lakəl aṅa Yesu Kristu. Zəzagəla uwana adəv à gay aw kà, asal kà azladza tsəhay gesina tadiṅal gəl à masla à vok, takəs gay aṅha.

<sup>27</sup>Məzłəbà Zəzagəla aṅa tsəràh à awtày. Masla kokudà gəl aṅha la uwana akor matsihila dziriga, məzłəbà masla la sləm aṅa Sufəl gami Yesu Kristu. Amen!

## 1 Korintiya

### 1 Korintiya 1

<sup>1</sup>Gi Pol uwana Zəzagəla akəsàni gi, la mawoyəŋ aŋha, kà gi aŋa magay masləlay aŋa Yesu Kristu, gətsetser wakità uwanay la ahəl gulo la slaka gə, anu la Sostenus, deda gami.

<sup>2</sup>Mətsetseray kà akul azlaməna masla gay Zəzagəla, uwana la Korintiya, azlauwana matsatsamani atə gə, kà atə aŋa madz à ahəŋ kà ahəl aŋa Zəzagəla Baba, ŋgaha uwana azlaaŋa la Yesu Kristu la abà, ŋgaha azlauwana tatsəl sləm aŋa Sufəl gami Yesu Kristu à gay gesina, uwana Sufəl gami babay suwaŋ.

<sup>3</sup>Zəzagəla Baba gami, la Sufəl Yesu Kristu tapis à akul à gay à vok la mav à akul lapiya.

<sup>4</sup>Kikay gəgod à Zəzagəla gulo koksikoksi lakəl aŋkul, kà vok mahamay uwana avà à akul la Yesu Kristu la abà.

<sup>5</sup>Ama la maham gay à vok aŋkul la abà la Yesu Kristu, kabəzəw à gəl la azlatatak delga delga gə uwana la abà, tavà à akul gesina, hadəy, la azlamavəy aŋa tatak, aŋa gay aŋha, ŋgaha la masəlay aŋha gesina.

<sup>6</sup>Ndzer, gay lakəl aŋa Kristu uwana tazəŋ kà, adàla slilih la akul la abà.

<sup>7</sup>Kà uwaga mavəy aŋa Zəzagəla gesina kabəzəwwal, akul uwana kakudaw kaslà mas à waŋ aŋa Sufəl gami Yesu Kristu.

<sup>8</sup>Masla kà aga la ahəŋ azlaka akul, kà akul magay matsizl à ahəŋ gə tsərəh à mavakay uwatə, kà dza aŋa mabəz tetəvi aŋa masləh akul à vok, la vud seriya aŋha aw.

<sup>9</sup>Zəzagəla la gəl aŋha, la uwana azalà akul, kà akul magay tekula la Kona aŋha la abà, Yesu Kristu, Sufəl gami. Zəzagəla la uwana dziriga.

<sup>10</sup>Azladedə gulo, gədəv à akul kudə la sləm aŋa Sufəl gami Yesu Kristu: Dzəw à ahəŋ la matsən vok gay la abà, mavəhla apaka vok la tataka aŋkul la abà aw, gəw la maham gay à vok la abà, la madzugway tekula la abà ŋgaha la paŋaw tekula.

<sup>11</sup>Azladedə gulo, gəpəh à akul kiya uwanay kà, kà uwana azlaməna hud' gəy aŋa Kəlowe, misga, tasà à waŋ kà mapəh à gi kà magazlay la ahəŋ la tataka aŋkul la abà, tagòd à gi.

<sup>12</sup>Uwana gəpəh à akul uwanay kà, kà uwana kəla uwabeyuwi aŋkul kà, apəhay kà paŋaw gərgər. Anik agod: 'Gi aŋa Pol', anik: 'Gi aŋa Apolos', anik aya: 'Gi aŋa Piyer', ŋgaha anik aya: 'Gi aŋa Kristu'.

<sup>13</sup>Ŋgaha ma, kadzugwaw ma, vok aŋa Kristu ma aslaha vok ala gərgər dəŋ, kagodəw takay? Awma Pol la uwana aməts à ahəf à adi kà aŋkul takay? Awma tadəhəkulla batem la sləm aŋa Pol kəla ay?

- 14**Kay, kikay gəgoday à Zəzagəla, kà uwana gəfahà batem à dza aw, say Kirəspus atà la Gayyus pəra.
- 15**Ŋgaha à dza agədiŋ à afik kà adahà batem la sləm gulo aw.
- 16**Iyay, hadəy təga, avikà gi, gəfahà batem à hud' gəy aŋa Estefanas təga, ama gəfahəŋ à dza anik aya, gəl agod à gi aw.
- 17**Ama gi kà, Zəzagəla asləl gi à waŋ kà madəh batem aw, asləl gi à waŋ kà maz gay marabəŋ, ŋgaha gəzəŋ kà la kokudà haŋkəli aŋa sləb vok, ŋgaha gi aŋa mapəsew mamətsay aŋa Kristu la ahəf à adi aw.
- 18**Gay lakəl aŋa maməts à ahəf à adi aŋa Kristu apakà bokuba tatak deyday la huma yewdi aŋa azladza, uwana takəs tetəvi aŋa gəy akəl. Ama kà aŋami uwana Zəzagəla abəl anu kà, məsəl kà gay uwaga kà la ndzəda aŋa Zəzagəla.
- 19**Bokuba uwana tatsetsər à wakitə Zəzagəla à abà, agod kà: "Gədakaləh haŋkəli aŋa azlaməna masəl tatak à ahəŋ, gədawits masəlay aŋa azlaməna matsihila ala."
- 20**Tsa kiya uwaga ma, mana azlaməna haŋkəli tapəhay aya zlà ma? Baŋaw azladza mawur gəl gə, la azlaməna mats gay la gudəŋ uwanay la vok ma? Zəzagəla apəhla ala kà, masəlay aŋa gudəŋ à vok uwanay kà magay kusoŋu.
- 21**Azladza gudəŋ à vok la haŋkəli, tanəŋa tatak uwana Zəzagəla adahəŋ la matsihila aŋha, ama tasəl masla aw. Gay gə la uwaga à uwana, Zəzagəla adəhla sləray la azlagay uwana məpəhay, kà uwana atà tagod kà: "Uwanay kà azlatatak kusoŋu gə pəra." Zəzagəla akəs kà uwaga kà, mabəl azlauwana tadiŋ gəl à masla à vok.
- 22**Azla Yahudiya kà, asa à atà manəŋ azlanadzipo, ŋgaha kà atà aŋa masəlay kà sayda gami kà dziriga. Azla Gərək kà, tayəh kà atà masəl Zəzagəla la aslasl gəl aŋatà.
- 23**Kà aŋami kà, məziŋ kà lakəl aŋa Yesu Kristu uwana tazləl à ahəf à adi. Baŋa azla Yahudiya tatsən uwaga kà, azin à atà à gəl, ŋgaha azladza anik kà tagod: "Kà gay kusoŋu!"
- 24**Ama azladza uwana Zəzagəla atsatsəmàni atà, kà atà aŋa magay azlaaŋha kà, amiyaka tadagay azla Yahudiya, amiyaka tadagay azlatsəhay azla Yahudiya aw bay, kà aŋatà kà, gay uwanay kà gay deyday aw, kà uwana tasəl kà Yesu Kristu kà apəhla ndzəda aŋa Zəzagəla la matsihila aŋha ala babay.
- 25**Azlaanik tagod kà, uwana Zəzagəla adahəŋ kà kusoŋu, ama tasəl kà kusoŋu uwaga aduwa haŋkəli aŋa dza la kayak aw. Tadzugw kà guɓguɓ uwaga aduwa ndzəda aŋatà la kayak gesina aw.
- 26**Azladeda, nərəzəw gəl aŋkul, akul uwana Zəzagəla azalà akul tsi. La yewdi aŋa azladza kà akul məna makor haŋkəli, la maslay, la masləkaway la ahəŋ məŋga aw.
- 27**Ama Zəzagəla atsatsəmàni azlauwana azladza tazalà à atà ala azlakusoŋu, kà atà aŋa makəl ziruwi à azlamatsihila gə à gəl. Atsatsəmàni azlaguɓguɓga, kà makəl ziruwi à azlandzəda-ndzəda aŋa gudəŋ à vok uwanay à gəl.

<sup>28</sup>Atsatsàmàni aya azlauwana, azladza gudəŋ à vok tanəŋà atà bokuba azlatatak mapəsew atà gə, kà atà makəl ziruwi à azlaməŋga à gəl.

<sup>29</sup>Kiya uwaga kà dza la ahəŋ: 'Gi', agodəy la huma Zəzagəla kà mats zlapay aw.

<sup>30</sup>Ama akul kà, Zəzagəla azalà akul, kà maham gay à vok la Yesu Kristu la abà. Kà uwana Kristu la uwana aga matsihila gami, uwana asà à ahəŋ la zagəla la afik, mədapaka azladza aŋa Zəzagəla, sà sətaka adagay, mədapəlla la ndzədà aŋa mamətsay la abà babay.

<sup>31</sup>Asa à Zəzagəla kà uwaga apakà vok bokuba uwana tatsətsèr à wakità aŋha à abà: 'Baŋa dza asal mats zlapay kà, atsa zlapay kà, kà azlatatak uwana Zəzagəla adəhəŋ.'

## 1 Korintiya 2

<sup>1</sup>Azladeda gulo, uwarà uwana gədà à awtəy kà maz à akul ala gay mahədəŋ à ahəŋ gə, uwana Sufəl Zəzagəla afətà à anu à ama ala, gəpəh uwaga la azlagay namnamga aw, ŋgaha babay gəpəh la haŋkəli aŋa dza aw.

<sup>2</sup>La kaslā uwana gədà à mtəga aŋkul kà, gəgədəŋ à afik kà gi aŋa mapəhay kà lakəl aŋa Yesu Kristu pəra, gədapəhay lakəl aŋa azlatatak anik aw, ama gəpəh kà lakəl aŋa mamətsay, uwana aməts à ahəf à adi pəra.

<sup>3</sup>Mok uwana gəgà la Korintiya, gəgà guḅguḅ, guba akàs gi, gəsukùlāh.

<sup>4</sup>Mapəh gay Zəzagəla gulo la sayda gulo uwana gəzəŋ kà, agà kà la maslay aŋa azladza aŋa gudəŋ à vok aw. Ama la mapəhla ala aŋa Masasədök Zəzagəla, ŋgaha la maslay aŋha,

<sup>5</sup>kà madiŋal gəl à vok aŋkul aŋa matsizl à masəlay aŋa azladza à afik aw, say à maslay aŋa Zəzagəla à afik pəra.

<sup>6</sup>Aŋa azladza uwana tasafay la tetəvi aŋa Zəzagəla la tsəh, gətəpakulla matsihila dziriga à uwana haŋkəli aŋa gudəŋ à vok uwanay aw, ŋgaha haŋkəli aŋa azlaməna makoray la gudəŋ à vok uwanay, uwana tadəmatəts à gay aw.

<sup>7</sup>Matsihila uwana gəpəhay kà, matsihila aŋa Zəzagəla. Uwaga kà tatak mahad vok à ahəŋ gə, uwana Zəzagəla atsatsàmàni dagay uwarà, à mok uwana gudəŋ à vok uwaga la ahəŋ dāŋ aw, kà anu aŋa mad à slaka mazləbay aŋha à abà.

<sup>8</sup>Aga la ahəŋ, amiyaka tekula, la tataka aŋa azlaməna makor gudəŋ à vok uwanay la abà, asəl uwaga tetuwa aw. Agay tasəlay kà, anaka tazləl Sufəl gami, uwana la mazləbay, à ahəf à adi kà makədəy aw.

<sup>9</sup>Ama bokuba uwana tatsətsèr à wakità Zəzagəla à abà, la uwana adəhəŋ: 'Uwana dza adanəŋəŋ adatsənəŋ didi aw, tatak uwana adada à aresl aŋa dza à abà dadəŋ aw, la uwana Zəzagəla adəhəŋ à ahəŋ, kà aŋa azlauwana tawoya masla.'

<sup>10</sup>Hadəy, anu la uwana Zəzagəla apəhanula nasiri uwaga la Masasədök tsikasla aŋha. Ndzer Masasədök aslala vok aŋa masəl madzugway aŋa Zəzagəla uwana la gəl aŋha la afik.

<sup>11</sup>Ama dza asəl uwana dza anik adzugway aw, say masasədök aña dza uwatà pəra asəl. Kiya uwaga babay, dza la ahəŋ asəl madzugway aña Zəzagəla aw, say Masasədök Zəzagəla kokudá gəl aña pəra asəl.

<sup>12</sup>Anu la Masasədök, uwana gudəŋ à vok avà à anu aw, asà à ahəŋ kà la slaka Zəzagəla. Zəzagəla la uwana asləl à anu uwaga à ahəŋ la gəl aña, kà anu aña masəl dèwdèw tatak uwana avà à anu gesina.

<sup>13</sup>Gi kà, gəpəh gay uwana azladza tapəhgəla aw. Ama gəpəh à akul, kà uwana Masasədök Zəzagəla apəh à gi. Dgaha gətəpla à azlauwana tatsəb sləm à Masasədök uwaga.

<sup>14</sup>Dza uwana la Masasədök Zəzagəla aw kà, aslala vok aña mabəz dziriga aña Masasədök uwaga aw. Kà aña kà, uwaga apakà kà bokuba azlatatak kusoŋu gə, masla aslala vok aña matsən godega aña aw, say la mazlakay aña Masasədök la uwana atsenəŋ.

<sup>15</sup>Dza uwana la Masasədök Zəzagəla, aslala vok aña mavàh tatak gesina ala, ama dza aslala vok aña madəhalla seriya à gəl aw.

<sup>16</sup>Bokuba uwana tatsetsèr à wakità Zəzagəla à abà: 'Uwa à uwana asəl madzugway aña Sufəl Zəzagəla uwa? Uwa à uwana aslala vok aña mawulla ala matsihila uwa? Ama anu, anu la madzugway aña Kristu.'

### 1 Korintiya 3

<sup>1</sup>Ia dziriga azladede gulo, mok uwana gi la Korintiya, gəslàla vok aña mapəh à akul bokuba uwana gəpəhay à azladza, uwana la Masasədök Zəzagəla aw. Gəpəh à akul kà bokuba uwana gəpah à azladza gudəŋ à vok, bokuba azlabəza uwana la madiŋal gəl à vok la abà.

<sup>2</sup>Kà uwaga à uwana, gəvəhà à akul kà awà, awkà tatak may dzaŋdzaŋga aw, kà uwana la mok uwaga kà kaslāw dadəŋ aw. Bā lagonay babay kà, kaslaw aw.

<sup>3</sup>Kà uwana tsəràh à lakana kà, kanəfaw kà madəhəŋ aña gudəŋ à vok. Kadəhaw vok maŋor à vok, kagazlahaw, tsa baña kiya uwaga ma, kanəfaw kà madəhəŋ aña gudəŋ à vok kiya aña azladza anik aw takay?

<sup>4</sup>Baња dza agod: 'Gi aña Pol', dza anik aya: 'Gi aña Apolos', uwaga kà manəf madəhəŋ aña azladza aw takay?

<sup>5</sup>Uwa Apolos uwa? Dgaha ma, gi Pol ma gi uwa? Anu səla nna, kà anu azlaməna sləray aña Zəzagəla pəra, uwana Zəzagəla asləl à akul atà à waŋ, kà akul aña madiŋ gəl à Kristu à vok. Anu kà mədàh sləray uwana: 'Dahəwwaŋ', Zəzagəla agod à anu.

<sup>6</sup>Gi gəsləkà, Apolos atədāl iyaw, ama Zəzagəla la uwana azigəŋ uwaga.

<sup>7</sup>Hadəy, dza uwana asləkay, la dza uwana atədāl iyaw kà, atà tasla tatak aw, Zəzagəla la uwana asla tatak, kà uwana masla la uwana azigəŋ uwaga.

<sup>8</sup>Dza uwana aslōka, la dza uwana atadāl iyaw kà, atà kà kalkal. Zəzagəla adavà à kəla uwabeyuwi aṅatà masik aṅa sləray, la madəhəṅ aṅha uwana adāhəṅ,

<sup>9</sup>anu kà anu tekula la sləray aṅa Zəzagəla la abà, ama akul kà, akul kà bokuba guf uwana Zəzagəla apəsay. Ŋgaha aya kà, akul bokuba gày, uwana Zəzagəla aṅalay.

<sup>10</sup>La maslay uwana Zəzagəla avà à gi, gədzəkà la sləray la slaka aṅkul. Gəgà bokuba dza uwana aṅal gày, uwana asəl maf matatukway à ahəṅ lela. Gətətəkwəṅ lela, lagonay azladza anik taṅal gày uwaga. Delga kà azlauwana taṅalay, tadāh haṅkəli kà atà aṅa maṅal gày lela.

<sup>11</sup>Zəzagəla afà Kristu à ahəṅ kà bokuba masla la uwana matatukway. Dza aslala vok aṅa madāh matatəkw gày anik aya aw.

<sup>12</sup>La matatukway uwatà la gay, azladza tadzəkà maṅalahal à gày, azladza anik la luwəluwə, azlaanik la gursu, azlaanik la azlaakur uwana sləm aṅatà la ahəṅ kà maṅaləhla à matatukway uwaga à gay. Azlaanik tadəhəṅ la azlaahəf, azlaanik la kəsaf, ṅgaha azlaanik la veviz.

<sup>13</sup>Ama kəla sləray aṅa uwabeyuwi adəpəhla vok ala la huma seriya, kà uwana la mavakay uwatà la uwana, Zəzagəla adəgur sləray aṅa uwabeyuwi la akəl, ṅgaha anu la gəl gami mədənəṅ sləray gami à baṅa delga.

<sup>14</sup>Baṅa dza aṅal à matatukway uwana à gay, ṅgaha atəf akəl la gay ala kà, dza uwatà adəbəza masik aṅha.

<sup>15</sup>Ama baṅa dza uwana akəl apədf sləray aṅha à gay kà, dza uwatà kà, adəbəza masik aṅha aw, ama masla la gəl aṅha kà adəbəlay, ama bokuba dza uwana atəfa à akəl la gay ala la zlahha à masla.

<sup>16</sup>Kasəlaw kà akul kà kagaw bokuba məṅ gày Zəzagəla, à uwana Masasədok Zəzagəla adzà à ahəṅ la aku aw takay?

<sup>17</sup>Iyay zlà, baṅa dza akal məṅ gày Zəzagəla à ahəṅ kà, Zəzagəla adəkalah dza uwaga à ahəṅ suwəṅ. Kà uwana məṅ gày Zəzagəla kà tsidəṅa, ṅgaha məṅ gày Zəzagəla kà akul.

<sup>18</sup>Tsa kità zlà kà, dza avavara gəl aṅha zlà ma aw! Baṅa dza la tataka aṅkul la abà, asal aṅa magay masla haṅkəli aṅa gudəṅ à vok uwanay kà, say agay bokuba dza masəl tatak aw gə dadəṅ, la uwana agay masla haṅkəli la tetəvi dziriga la ama.

<sup>19</sup>Uwana gəpəh kiya uwanay kà, azlatatak uwana azladza gudəṅ à vok uwanay asa à atà magay la haṅkəli, uwaga kà, azlatatak deyday la yewdi aṅa Zəzagəla pəra. Uwaga kà bokuba uwana tatsetsèr à wakità Zəzagəla à abà, tagòdf kà: 'Zəzagəla adəbəza azlamatsihilaga uwaga à tsəh la dəmdəm aṅatà la abà.'

<sup>20</sup>La slaka anik babay aya kà, tatsetsèr kà: 'Zəzagəla asəl madzugway aṅa azladza, asəl kà deyday.'

<sup>21</sup>Kà uwaga à uwana gəgodf à akul kà: Dza atsa zlapay la dza anik la afik aw, kà uwana azlatatak gesina kà, akul kakoraw.

<sup>22</sup>Gi Pol, Apolos, Piyer, anu gesina gami kà, anu azlaan̄kul. Amiyaka azlatatak lakana, la azlauwana taləg aw à waŋ la huma la gay gesina kà, azlaan̄kul.

<sup>23</sup>Akul kà, akul azlaan̄a Kristu, ŋgaha Kristu babay kà aŋa Zəzagəla.

## 1 Korintiya 4

<sup>1</sup>Asa à gi kà azladza tasəlay kà anu azlaməna sayda aŋa Yesu Kristu, kà anu azlaməna sləray aŋha. Zəzagəla afà à anu nasiri dziriga aŋha uwana à ahəl uwarà, kà anu aŋa masəlla à udaka ala.

<sup>2</sup>Akul kà, sələw uwaga adagay, dza, uwana mən̄ dza afal tatak à ahəl kà, masla kà say dza dziriga pəra.

<sup>3</sup>Kà aŋulo kà, baməraaka kakəlaw gi gay à vok, bay kà dagədawali gəgodəy aw, amiyaka bə azladza takəl gi gay à vok lakəl aŋa azlatatak anik anik babay kà dagədawali, gəgodəy aw. Bə gi babay kà, gədfəh seriya aŋa gəl gulo aw.

<sup>4</sup>Gəsəl tatak mawisiga gulo dadən̄ aw. Ama uwaga asal magodəy kà, gi sətaka dadən̄ magay aw. Sufəl Zəzagəla la uwana masla madəh à gi seriya à gəl pəra.

<sup>5</sup>Kà uwaga kà, kadəhaw seriya à azladza à gəl dadən̄ aw, say kakudaw mavakay uwana Zəzagəla akədəv à ahən̄ dadən̄. La vud uwana Sufəl Kristu adəzlaŋalay, adəsəlla à uda à udaka ala azlatatak uwana la mələs la abə lakana. Uwana azladza tadzugway la ləv aŋatà la tsəh kà, adəsəlla à uda babay. Kiya uwaga kà, Zəzagəla adəzləb kəla uwabeyuwi lakəl aŋa sləray aŋha uwana adəhən̄. Baŋa dza adəhən̄ mən̄ga, azləb masla mən̄ga suwaŋ, ama baŋa dza adəhən̄ kay aw, mazləbay atsəhal suwaŋ.

<sup>6</sup>Azladeda gulo kà, akul la uwana gəpəh uwaga gesina, lakəl gulo, ŋgaha lakəl aŋa Apolos. Asa à gi kà kasəlaw la slaka gami uwana gay uwanay asal magodəy. Dza atsəd̄ à makwi uwana lakəl ala tatsətsər aw: Dza anik aŋkul akədəf̄ à dza anik à ahən̄, ŋgaha kà mapəseway dza anik.

<sup>7</sup>Kak uwana: 'Gəduwa azladza anik', kagod̄, kak uwa? Awma Zəzagəla la uwana avà à ka azlatatak uwaga gesina aw takay? Baŋa Zəzagəla la uwana avà à ka uwaga, ma kà mana katsala zlapay zlà ma? Kà mana kagod̄ kà: Gəbəzà uwaga kà la aslasl gəl gulo zlà ma?

<sup>8</sup>Kayyà, kadəbəzaw tatak gesina. Akul azlagorobu adagay la tetəvi aŋa Zəzagəla la tsəh, kazəwəw sufəl, bə amiyaka anu kà mədəzuw sufəl dadən̄ aw. Naka agay delga à baŋa akul azlasufəl ndzer, la yewdi aŋa Zəzagəla, ŋgaha anu azlaməna maz gay aŋha məkəh azlasufəl babay suwaŋ.

<sup>9</sup>Ama anu azlaməna masəlay kà, gədzugw kà Zəzagəla kà adagolla anu la lig. Anu kà mədagay kà bokuba azladza uwana seriya mamətsay adatəd̄ à atà à gəl, la yewdi aŋa azladza la vadavaday la afik. Bokuba marəzlay uwana azladza gesina tanən̄aŋ gesina la gudən̄ uwanay la vok, la slaka azladza, ŋgaha la slaka azlaməlika babay.

<sup>10</sup>Azladza tadzugw kà anu azlakusonju, tagodf, kà uwana mēz gay lakəl aṅa Yesu Kristu. Ama kà akul kà, azlamatsihilaga, kà uwana kahamàw gay à vok la Kristu. Anu kà, azladza tadzugw kà anu azlaguḅguḅ, ama akul kà, akul azlandzəḏa ndzəḏa. Anu kà azladza tapəsew anu, ama akul kà, azladza tasləkaw akul.

<sup>11</sup>Tsəràh à lakana may la nələy aza anu babay, lukut aga anu la vok babay aw, ṅgaha tazlabàh anu aya, ṅgaha gày gami la ahəṅ aw.

<sup>12</sup>Məḏàh sləray kà aṅuf dà à uda la gūday, kà mazlakla gəl gami, la mok uwana azladza tadzək à anu magodəhay à gəl kà, məḏəv kudà à Zəzagəla kà mapis atà à gay à vok. La mok uwana azladza tatərəḅ anu babay kà, məbasin.

<sup>13</sup>La mok uwana tatugw à anu gay mawisiga à vok kà, məwulatàla kà la ləv tələmma. Tapakànula lagonay kà bokuba anu azlaàlāh aṅa gudəṅ à vok, bə tsəràh à lakana babay kà bokuba anu azlahuyiv aṅa gudəṅ à vok uwanay.

<sup>14</sup>Uwana gətsetser kiya uwanay kà, kà aṅa makəlakulla ziruwi à gəl lakəl aṅa uwana kadəhàwwàṅ, gəgodf magay aw. Uwana gətsetser à akul uwanay kà, kà gi aṅa masləhakulla vok pəra, akul azlabəza gay ləv gulo.

<sup>15</sup>Amiyaka baṅa kabəzaw azlaməna matapakulla dəbow kulo, azlauwana tadala akul la tetəvi aṅa Kristu la ama, baba aṅkul kà bə tekula pəra. La mok uwana gəsa à akul ala sifa uwana kahamaw à gay à vok la Yesu Kristu la abà.

<sup>16</sup>Kà uwaga à uwana gəḏəv à akul kudà: Kamkam pakàw bokuba gi.

<sup>17</sup>Kà uwaga à uwana gəsləl Timotawus à slaka aṅkul babay. Masla kà bəzi gay ləv gulo, uwana ahoy yewdi aṅa Sufəl Zəzagəla. Masla adəwulakulla azlatatak uwana à gəl, gəpəhakulla la tetəvi aṅa azlaməna manəf Yesu la tsəh, la tataka azlaməna madiṅal gəl à vok la abà gesina.

<sup>18</sup>Azladza anik anik la tataka azladza aṅkul la abà tats zlapay, tadzugw kà, gəḏa à awtəy aya aw, gəl agodf à atà.

<sup>19</sup>Ama baṅa asa à Sufəl Zəzagəla kà, gəḏa à awtəy kà nekwa. Baṅa gəḏàda à awtəy, asa à gi aṅa masəl azlaməna zlapay uwaga, ama gay aṅatà pəra aw, ama maslay aṅa ndzəḏa aṅatà babay.

<sup>20</sup>Kà uwana makoray aṅa Zəzagəla kà aṅa gay pəra aw, ama la ndzəḏa aṅa Zəzagəla.

<sup>21</sup>Mana à uwana asa à akul lagwa ma? Gəḏa à awtəy ma la azəva la ahəl ay, awma la masal ṅgaha la ləv tələmma ay?

## 1 Korintiya 5

<sup>1</sup>Kəla slaka gesina gətsən tapəhay gay lakəl aṅa mabila uwana la tataka aṅkul la abà, mabila uwana amiyaka azlauwana tasəl Zəzagəla aw bay kà, tadəhəṅ aw. Gətsənəṅ azladza tapəhay kà dza anik la tataka aṅkul la abà kà, adabədf mis aṅa baba aṅha à gəl.



<sup>2</sup>Ɖgaha aya kà, akul azlazlapay aya! Kayyà, ñuləm naka kagaw la mazaw la gəl la abà, ñgaha zil uwana adàh tsəhay gə uwaga la tataka aᅅkul la abà kà, kəsàw à uda la tataka aᅅkul la abà.

<sup>3</sup>Gi kà kərkər la akul la sləb vok la abà, ama la masasədök la abà kà, gi nekwa la akul, ñgaha gədadàh seriya à dza, uwana adàh tsəhay sləray mawisiga uwaga la tataka aᅅkul la abà à gəl bokuba gi nekwa la akul.

<sup>4</sup>Gədadəv seriya uwaga à gay, la sləm aᅅa Sufəl gami Yesu. Gəgod à akul kà, la mok uwana kadàhamaw gay à vok kà, madzugway gulo adàgay la tataka aᅅkul la abà, ñgaha ndzəda aᅅa Sufəl gami Yesu adàgay la tataka aᅅkul la abà babay.

<sup>5</sup>La mok uwana kahamaw gay à vok kà, vāv dza uwaga à ahəl aᅅa seteni, kà seteni aᅅa mawisəᅅ ala. Kà uwana seteni kà, aga la ndzəda kà lakəl aᅅa sləb vok pəra. Ɖgaha Zəzagəla adàbəl masasədök aᅅha, la makəd gəl à ahəᅅ, aᅅa mavakay uwana Sufəl adàwul à waᅅ.

<sup>6</sup>Tatak la ahəᅅ, à uwana katsawla zlapay aw. Kasəlaw kà tatak makəsl tatak ᅅuv, akəsl magol pəhàw à gay aw uwà?

<sup>7</sup>Zəbàw tatak makəsl tatak maviyaga à uda la tataka aᅅkul la abà, uwaga kà tsakana, kà akul aᅅa magay sətaka kokudà tsakana. Gāv kalkal bokuba pəhaw mawga uwana tatak makəslᅅ la tsəh aw, kiya uwaga à uwana kagaw, kà uwana Kristu magadzaw aᅅa madəvaday Paska aga makədāyga kà aᅅami.

<sup>8</sup>Kità kà, məhab madəvaday Paska. Ama mətà Pain la tatak makəslᅅ aw, məgà kuzakaka, mənəfà tetəvi aᅅa Zəzagəla la ləv tekula. Məsək azlatatak mawisiga, uwana taga bokuba azlatatak makəslᅅ, uwaga kà tsakana, ñgaha kà mabila. Ama mətà Pain la tatak makəslᅅ aw, uwaga Pain aᅅa sətaka, ñgaha aᅅa dziriga.

<sup>9</sup>La teraᅅa aᅅa wakità gulo, uwana la abà gətsetsèr à akul kà, gəgòd à akul kà: 'Kahamaw gay à vok aw la azladza uwana tadza à ahəᅅ la mabila la abà aw', gəgòd à akul.

<sup>10</sup>Baᅅa gəpəh kiya uwanay kà, gəpəhay kà azladza uwana tasəl Zəzagəla aw, kagodāw aw. Awaᅅ, ama gəpəhay kà akul uwana kasəlaw. Azladza uwana tadàh mabila, la azlaməna mawoy tatak aᅅa azladza anik, la azlaməna madàh gəl, la azlaməna manəf mazlazlay, uwana à ahəᅅ la gudəᅅ la vok, məhəlla à ahəᅅ kà azlatatak uwaga gesina, ñuləm mas à uda la gudəᅅ à vok uwanay la abà.

<sup>11</sup>Asa à gi kà magòd à akul kà: 'Kahamaw gay à vok la azlatsəhay dza uwaga aw'. Baᅅa dza agòd kà: 'Gi masla madiᅅal gəl à vok', ama adàh mabila, baᅅaw masla agay masla mawoy tatak aᅅa azladza anik, baᅅaw masla manəf mazlazlay, baᅅaw masla agay masla matsak magodàhay à azladza anik à gəl, baᅅaw agay masla guzu, ñgaha agay masla gəl, kadzaw à ahəᅅ la slaka gà la masla aw, amiyaka tatak may bay kà, kazuwaw la slaka gə aw.

<sup>12</sup>Gi kà gəslala vok aᅅa madàh seriya à azlaməna à uda à gəl aw, akul kadàhaw seriya kà azlaməna hud gāy à gəl.

<sup>13</sup>Kà uwana azlaməna à uda kà, Zəzagəla la uwana adàdāha à atà seriya à gəl. Kudəkàw à uda dza uwana adāh mawisiga la tataka aṅkul la abà, bokuba uwana wakità Zəzagəla apəhay.

## 1 Korintiya 6

<sup>1</sup>Baṅa dza la tataka aṅkul la abà tabay vok gay la dza anik, ma delga à baṅa apuwla gudzi à gəl kà la huma azladza uwana tasəl Zəzagəla aw takay? Akəsa à vok kà apuwla gudzi à gəl kà la huma aṅa azlaməna madiṅal gəl à vok.

<sup>2</sup>Kasəlaw kà, azladza aṅa Zəzagəla la uwana tadàdāh seriya à azladza gudəṅ à vok uwanay à gəl aw takay? Iyay, hadāy zlà, baṅa ndzer kadàdāhaw seriya à gudəṅ à vok uwanay à gəl ma, kakay, kaslawwalla vok aṅa matāh azlabəza gay uwana ala la tataka aṅkul la abà aw zlà ma?

<sup>3</sup>Kasəlaw babay kà mədàdāh seriya à azlamalika à gəl aw takay? Tsa kiya uwaga, ma baməraka azlatatak bəzaga aṅa gudəṅ à vok uwanay zla ama uwà?

<sup>4</sup>Ama akul, baṅa akul la magazlay lakəl aṅa tatak anik la tataka aṅkul la abà ma, kakay kaslawwalla vok aṅa mapəh tatak uwaga à azlaməna à uda, uwana atà la matsən vok à gay anina aw ma, kà atà aṅa madāh seriya aṅa tatak uwaga ma?

<sup>5</sup>Ziruwī aza à akul aw takay? Aga la ahəṅ la tataka aṅkul la abà à bā dza haṅkəli gā, bā tekula aṅa matahāh azlabəza gay uwana alaa la tataka aṅkul la abà, akul azlaməna madiṅal gəl à vok aw takay?

<sup>6</sup>Iyay zlà, uwaga ma, akəsa vok ndzer kà mapuw gudzi à deda aṅkul anik à gəl, la huma aṅa azladza uwana tasəl Zəzagəla aw takay?

<sup>7</sup>Baṅa tatak mapuwla vok gudzi à gəl la ahəṅ, la tataka aṅkul la abà, uwaga la uwana adukwakulla tsakana à gəl, uwana kadāhaw à waṅ. Kà mana kabasaw vok tsakana aw ma? Kà mana kasakawwal ada à akul à gəl à tsəh pəra aw ma? Dūləm mabasiṅ.

<sup>8</sup>La dziriga kà, akul la uwana kanəfaw mawisiga la mad à gəl, ṅgaha kadāhaw uwaga kà la slaka azladedda aṅkul məna madiṅal gəl à vok aya bay.

<sup>9</sup>Səlāw la dziriga kà, azlaməna makəsafər tadàda à makoray Zəzagəla aw. Akul, kavavaraw gəl aṅkul aw. Azlaməna mabila, azlaməna manəf mazlazlay la azlaməna gəl gaw, ṅgaha la azlaməna matsatsəl vok kà atà kà atà zil zil kà, tadàda à makoray Zəzagəla tetuwa aw.

<sup>10</sup>Dgaha la azlaməna gəl aṅa tatak aṅa azladza anik, la azlaməna makad yewdi à azlatatak aṅa azladza anik à tsəh, la azlaməna guzu, la azlaməna matsak magodāhay à azladza anik à gəl, ṅgaha la azlaməna mazaḅ tatak aṅa azladza anik la ndzəda, azlatsəhay dza uwaga gesina kà, tadàbək asik à abatà babay aw.

<sup>11</sup>Kiya uwaga à madz à ahəṅ aṅa azladza anik aṅkul uwarà. Ama lagonay kà, Masasədok Zəzagəla uwana mənəfay kà adapal akul la tsakana gami la abà gesina sətaka adagay, akul mabək akul à fəta à awtāy gā, kà ana Zəzagəla, kagaw dziriga la

huma Zəzagəla kà sləm aña Sufəl Yesu Kristu uwana kasəlaw, ɲgaha kà Masasədok aña Zəzagəla gami.

<sup>12</sup>Iyay, azladza aɲuvaw la tataka aɲkul la abà tagod kà: 'Tatak gesina kà, tetəvi la ahəɲ kà aɲami', tagod. Iyay dziriga nəma, ama tatak gesina kà, akəsa à akul vok aw. Ama gi kà, asa à gi kà tatak anik afà à gi asik à gəl, kà gi aña magay mayà aɲha aw.

<sup>13</sup>Madzugway aɲatà bay kà: 'Zəzagəla adàha tatak may kà aña hud', tagod. 'Ŋgaha hud babay kà aña maf tatak may à abà', tagod aya. Iyay nəma. Ama Zəzagəla adàkalah à ahəɲ vərđi anik səla nna. Ama kà aña mabila kà, Zəzagəla adàhà vok gami kà aña uwaga aw, ama Zəzagəla adàhà kà anu aña madàhla sləray, uwana asa à Sufəl Yesu, kà uwana masla la uwana akor vok gami.

<sup>14</sup>Zəzagəla awùlla Sufəl Yesu à uda la mamətsay, ɲgaha masla adàwulla anu à uda la mamətsay la ndzəda aɲha aya babay.

<sup>15</sup>Kasəlaw kà vok aɲkul kà manəbay aña vok aña Yesu Kristu aw takay? Gəsləhàni manəbay aña vok aña Yesu, ɲgaha gi aña madla à slaka aña masla mazaḅ zil takay? Awaɲ! Akəs vok aw!

<sup>16</sup>Kasəlaw kà baɲa dza agagamla à vok maləv la masla mazaḅ zil kà, tagay sləḅ vok tekula aw takay? Haḍay, tatsetsər à wakità à abà kà: 'Atà səla nna, tagay sləḅ vok tekula.'

<sup>17</sup>Ama dza uwana avà vok aɲha à Sufəl Yesu kà, masla la Yesu kà, atà tekula suwaɲ.

<sup>18</sup>Tsa kità zlà kà, kahoyaw à mabila à ahà! Azlatsakana anik anik uwana azladza tada à ahəɲ gesina kà, abəz à hud gə aw. Ama dza uwana adàh mabila kà, awis vok aɲha ala la gəl aɲha.

<sup>19</sup>Kasəlaw kà, vok aɲkul kà hud gày aña Masasədok Zəzagəla aw takay? Zəzagəla la uwana avà à akul Masasədok uwanay à uwana la ləv aɲkul la tsəh, kà uwana vok aɲkul kakoraw aw, Zəzagəla akoray.

<sup>20</sup>Zəzagəla apəl tatak kà məɲga aña mavavarla akul. Kiya uwaga dāhàw sləray la vok aɲkul kà mazləḅla Zəzagəla pəra.

## 1 Korintiya 7

<sup>1</sup>Lagwa kà, gəwula à gay aña manavay aɲkul uwana à tsəh, kanàvəw à gi, la wakità aɲkul la abà zlà. Gədzugw kà delga nəma, kà dza aña mazəḅ mis aw.

<sup>2</sup>Ama la madzugway gulo la abà aya kà, ɲuləm mazəḅ mis, gəl agod à gi, kà dza aña matəd à mabila à abà. Delga kà uwabeyuwi aña magay la mis, ɲgaha kà azlamis bay tagay kità.

<sup>3</sup>Kiya uwaga kà, zil avà à mis aɲha à tatak uwana mis aɲha ayahay, ɲgaha bay, mis avà à zil aɲha à tatak uwana zil aɲha ayahay.

<sup>4</sup>Mis aslala vok aṅa mahən, uwana ala asa à vok aṅha aw: Say zil aṅha. Zil babay aslala vok aṅa mahən, uwana ala asa à vok aṅha bay aw, say mis aṅha la uwana ahənallaṅ ala.

<sup>5</sup>Kiya uwaga zlà kà, kakwesawla kà vok mahən à ahəṅ kà akul à akul aw, say akul katsənaw vok à gay kà aṅa kaslà ṅuv lakəl aṅha, kà akul aṅa mazəḅ kaslà aṅa madəv kudà à Zəzagəla. Ama la lig la ahəṅ hamàw gay à vok aya. Tsa baṅa kità aw kà, kadàslawwalla vok aṅa masləh vok à vok aṅkul aya aw, kà akul aṅa mav tetəvi à seteni kiga aw.

<sup>6</sup>Ama: 'Dahàwwàṅ uwanay', gəgod' à akul, la magay zlà ma, aw. Ama agayṅa kadəhawwàṅ kiya uwanay kà naka delga, gəgod' pəra.

<sup>7</sup>Kəla kà, agay la madzugway gulo kà, naka delga azladza tadza à ahəṅ kokudà mis bokuba gi, gəgod'. Ama kəla uwabeyuwi kà, aḅəzà mavàṅ gərgər la slaka Zəzagəla. A azladza anik kà, avà à atà maslay aṅa madz à ahəṅ kiya uwanay kokudà mis, à dza anik avàl maslay aṅa madz à ahəṅ la mis.

<sup>8</sup>Lagonay kà, gədàgola à huma kà à slaka azlamagamza la azlamis kudà kà mapəh à atà gay. Gəgod' à atà, kà delga, kà atà tadza à ahəṅ bokuba gi.

<sup>9</sup>Ama baṅa kaslaw aw, kazəḅaw mis. Dələm kà mis, kà akul aṅa mahəl gəl à ahəṅ la madzugway aṅkul la abà.

<sup>10</sup>Lagwa kà, gəpəhay kà azlauwana la azlamis adagay zlà, la tataka aṅa azlaməna madiṅal gəl à vok la abà. Mapəhay uwanay kà gi gəpəh aw, ama Sufəl Zəzagəla la uwana apəh. Mis uwana adada à zil, aslala vok aṅa mavàh vok ala la zil aṅha aya aw, ama baṅa avàh vok ala kà, ada à zil anik aya aw, tsa baṅa kətà aw kà, tawul à vok à tsəh la zil aṅha.

<sup>11</sup>Dgaha bay zil aslala vok aṅa makudək mis aṅha aw.

<sup>12</sup>Lagonay kà, gəpəhay kà à azlaməna à uda adagay zlà, uwanay kà gay gulo, awkà gay aṅa Sufəl Yesu aw. Baṅa masla madiṅal gəl à vok la mis, uwana adiṅal gəl à vok aw, ama asal madz à ahəṅ la zil aṅha, uwaga kà akudək aw.

<sup>13</sup>Kà aṅa mis uwana masla madiṅal gəl à vok babay kà, kiya uwanay bay. Baṅa zil aṅha adiṅal gəl à vok aw, ama asal madz à ahəṅ atà səla kà, ada aṅha aw.

<sup>14</sup>Uwana gəpəh uwanay kà, kà uwana zil masla madiṅal gəl à vok aw gə uwanay kà, Zəzagəla akəs kà, kà mis aṅha, uwana masla madiṅal gəl à vok. Dgaha mis masla madiṅal gəl à vok gə aw gə, uwanay aya kà Zəzagəla akəs kà, kà zil aṅha uwana adiṅal gəl à vok aya suwàṅ. Tsa aṅa kità aw kà, naka azlabəza aṅatà kà, naka tagay kà bokuba azlabəza aṅa azladza uwana tasəl Zəzagəla aw gə zla, ama lagwa kà Zəzagəla adakəs atà.

<sup>15</sup>Ama dza uwana adiṅal gəl à vok aw, asal mavàhla la masla madiṅal gəl à vok kà, vàwwal tetəvi. Dgaha kà masla madiṅal gəl à vok uwaga, adagay zilga, adagay misga kà, aga la mapəlla la abà adagay zlà. Zəzagəla azalà akul kà, kà madz à ahəṅ la lapiya, la tələmna la abà.

- 16**Kak mis, kasəl ma kadətəf zil aṅak ay? Ɖgaha kak zil babay ma kadətəf mis aṅak tak ay? Kasəlaw aw!
- 17**Uwaga kà kəsàw, say kəla uwabeyuwi anəf madz à ahəṅ aṅha uwana Zəzagəla avəl lela, ṅgaha manəf madz à ahəṅ aṅha uwana uwarà Zəzagəla azaləl la abà lela. Uwaga la uwana gəpəhay à azlamaham à ahəṅ mənə gay Zəzagəla gesina.
- 18**Baṅa dza makədəv à uda gà, la mok uwana Zəzagəla azaləl kà: Kà mana mi, agod aw. Baṅa dza kokudà makədəv à uda gà, à mok uwana Zəzagəla azaləl kà, ayàh makədəv à uda aya aw.
- 19**Magay makədəv à uda baṅaw magay kokudà makədəv à uda kà tatak tekula, makəs vok aṅatà la ahəṅ aw. Tatak uwana akəs vok kà, say makəs mapəhay aṅa Zəzagəla pəra.
- 20**Akəsa vok, kà kəla uwabeyuwi adza à ahəṅ la uwana la abà uwarà, la slaka uwana la abà Zəzagəla azaləl à mok uwana atsənà mazalal aṅa Zəzagəla.
- 21**Iyay, mayà uwana Zəzagəla azaləl kà, adzugw gəl aya aw, ama baṅa mas à afik la ahəl apəhla vok ala, kà aṅak aṅa magay la makor gəl la abà babay kà bà delga,
- 22**mayà uwana Zəzagəla azaləl adàgay à makor gəl la abà, kà uwana adagay tekula la Sufəl gami Yesu Kristu. Kiya uwaga babay, dza makor gəl gà, uwana Zəzagəla azaləl, adàgay mayà aṅa Zəzagəla, kà uwana adagay aṅha aya.
- 23**Zəzagəla avavarà akul la tatak mənṅa, kità kà, kagaw azlamayà aṅa azladza aya aw.
- 24**Azladeda gulo, kamkam, kəla uwabeyuwi adza à ahəṅ la slaka Zəzagəla bokuba uwana adzà à ahəṅ à mok uwana Zəzagəla azaləl.
- 25**Lakəl aṅa azlamagamza kà, gi la gay aṅa Sufəl kà mapəh à atà aw. Ama madzugway gulo la uwana gəpəh à akul, delga katsəbaw sləm à gay gulo, kà uwana gi kà, gi masla mabədla gay aw, kikay kà maslay aṅa Sufəl Yesu Kristu.
- 26**Madzugway gulo təbà: Baṅa dza adazəb mis didi aw kà, ṅuləm kà masla adza à ahəṅ à kà matərbay aṅa lakana uwanay.
- 27**Baṅa kak la mis bay kà, kakudək aw. Baṅa kak magamza gà babay kà, dzà à ahəṅ kiya uwaga, kayàh mis aw.
- 28**Iyay zlà, amiyaka gəpəh kiya uwanay babay kà, baṅa kazəb mis kà tsakana, gəgod magay aw. Ɖgaha baṅa dugu ada à zil babay kà, tsakana, gəgod aw. Ama səlàw kà, azlauwana la azlamis la uwana tas ṅgərpa mənṅa la gudəṅ uwanay la vok lakana, ṅgaha kà asa à gi kà akul aṅa mad à mas ṅgərpa uwaga à abà aw.
- 29**Aganay uwana asa à gi mapəhay zlà, azladeda: Kaslà kà desl adagay. Dagay lakana kà, azladza uwana la azlamis kà, taga kà bokuba atà la azlamis aw kəla.
- 30**Azlauwana tataway kà, taga bokuba atà la iyaw tugwi la adi aw, azlauwana la makədəsly la gay kà, tanərəz kà bokuba atà la makədəsly la gay aw, azlaməna masukw tatak babay kà, tanərəz kà bokuba takor tatak uwana tasukw aw.

<sup>31</sup>Azladza uwana takəs vok la azlatatak aṇa gudəṇ à vok uwanay kà, tanə̀rə̀z kà bokuba takəs vok la uwaga aya aw, kà uwana gudəṇ à vok uwana kanəṇawwan lagonay kà, adàzila, tuwiz.

<sup>32</sup>Lagwa kà, asa à gi kà kahəlaw gəl à ahəṇ kà madzugw gəl. Dza uwana azə̀b mis aw kà, afa gəl kà à sləray aṇa Sufəl Zəzagəla pəra, ayə̀h mahə̀day kà Sufəl à adi pəra.

<sup>33</sup>Ama dza uwana adazə̀b mis kà, afa gəl kà azlatatak aṇa gudəṇ à vok uwanay, asal mahə̀day kà à mis aṇha à adi suwan.

<sup>34</sup>Kiya uwaga ləv aṇha adavahla səla, kiya uwaga la mis babay. Mis uwana zil aṇha la ahəṇ aw baṇaw dahalay uwana la zil aw kà, tafa gəl kà à sləray aṇa Sufəl Zəzagəla. Tavà vok aṇatà la ləv aṇatà gesina à Zəzagəla, ama mis uwana la zil kà, adzugway kà lakəl aṇa azlatatak aṇa gudəṇ à vok uwanay, kà uwana asal mad' à ahəṇ kà uwana akəs à zil aṇha à gəl.

<sup>35</sup>Uwana gəpə̀h uwanay kà, kà uwana asa à gi mazlak akul. Gəyə̀h mad'ə̀f akul gay à ahəṇ aw, asa à gi kadəhawwan kà uwana delga, dəhə̀w sləray aṇa Sufəl Zəzagəla la ləv tekula.

<sup>36</sup>Lagwa, gədzugw lakəl aṇa azlamawudà uwana asa à atà mazə̀b vok aya aw. Baṇa dahalay atà la mawudà aṇha, tadzugw kà atà aṇa mazə̀b vok aya aw, la lig la ahəṇ kohana adzugway aya kà à mawudà aṇha, ṇgaha kà madzugway aṇha gesina kà la masla la tsə̀h kà, akə̀sa vok kà mazə̀bay kà, tazə̀b vok bokuba uwana asa à atà, uwaga kà tsakana aw.

<sup>37</sup>Ama baṇa agə̀dāṇ à afik kà, uwala tatak la ahəṇ atə̀rə̀bəṇ aw, ṇgaha mabila azəṇ aw kà, kità kà, agə̀d' à madzugway aṇha à afik, azə̀b mawudà aṇha uwaga aw.

<sup>38</sup>Dza uwana azə̀b mawudà aṇha kà, adə̀ha delga, ama dza uwana azə̀b aw adə̀ha sləray kà dzə̀ba aṇha səla aw, aduwa vok kaykay aya.

<sup>39</sup>Mis uwana la zil, masla aga la sasala la abà, kà uwana zil aṇha la ahəṇ la sifa. Ama baṇa zil adamə̀tsay, mis adapə̀lla. Baṇa asal, ada à zil anik, ama say aday kà à mtə̀ga masla madiṇal gəl à vok.

<sup>40</sup>Ama baṇa adza à ahəṇ kokudà aṇa mad zil kà, marabay aṇha kà ada à zagəla. Kə̀la kà, uwaga kà madzugway gulo zlà. Ama gi babay kà, gi la Masasə̀d'ok aṇa Zəzagəla à uwana apə̀hgəla.

## 1 Korintiya 8

<sup>1</sup>Lagwa mənə̀rə̀z gay lakəl aṇa azlaslə̀b uwana takə̀d' à azlamazlazlay à ahəṇ zlà: Akul kà kagodə̀w kà: 'Anu gesina la haṇkə̀li', kagodə̀w. La dziriga kà, haṇkə̀li tsə̀hay gə̀ uwaga kà adala dza kà à zlapay à abà pəra. Masal la uwana adzə̀rə̀də̀h azlamə̀na madiṇal gəl à vok ala.

<sup>2</sup>Dza uwana: 'Gəsəl tatak', agod' kà, asəl tatak bokuba uwana anaka, asəl dadə̀ṇ aw.

<sup>3</sup>Ama dza uwana awoya Zəzagəla kà, Zəzagəla asəl masla.

<sup>4</sup>Aganay gay gà uwana: Dza aslala vok aña mapad sləb, uwana takàd à azlamazlazlay takay? Məsəl kà, mazlazlay kà tatak deyday la gudəŋ uwanay la vok. Məsəl kà say Zəzagəla kokudà gəl aña tekula pəra.

<sup>5</sup>Haday gà, azlatatak la ahəŋ la zagəla ŋgaha la vədāh à uwana azladza tasləkaw tatak uwatà bokuba zəzagəla. Azlatatədiya la ahəŋ, kiya uwaga à uwana azladza tasləkaway, tapakahatàla kà azlaməŋga aña təkula bokuba zəzagəla.

<sup>6</sup>Ama kà aña mi kà, Zəzagəla kà tekula ahəl pəra. Masla la uwana Baba gami. Tatak uwana la gudəŋ la vok gesina kà, aguwa à uda kà la ahəl aña. Adāhà anu babay, kà anu aña magay azlaaŋha. Sufəl gami babay kà tekula pəra, uwaga kà Yesu Kristu. Tatak gesina atsà à uda la ahəl aña, məbəzà sifa babay kà la ahəl aña.

<sup>7</sup>Ama azladza gesina tasəl dziriga uwaga aw. Kà uwana azladza aŋuvaw tadāhla slilih kà la manəf azlamazlazlay, ŋgaha lakana aya baña tapad azlasləb uwana takàd à mazlazlay à aya kà, ndzer tanərəz bokuba sləb aña mazlazlay la dziriga, kà uwana tabəz ndzəda la tetəvi aña Zəzagəla la tsəh dadəŋ aw, guba aza à atà, kà madāh àlāh à vok aña təkula à vok la mapad sləb uwaga.

<sup>8</sup>Ama la dziriga kà, tatak may adāha à anu àlāh la slaka Zəzagəla aw. Baña məzuw azlatatak anik aw babay kà məgogolay aw, baña məzuw babay kà, agagis anu aw.

<sup>9</sup>Ama kamkam dāhəw haŋkəli, kà uwana akul la makor gəl la abà, kà mazuw tatak gesina. Ama zlahaw kà, uwaga adala dza, uwana azlaguḡguḡ la tetəvi aña Zəzagəla la tsəh, à tsakana à abà, kà delga aw.

<sup>10</sup>Haday kà, baña dza anik guḡguḡga anəŋa ka, à kak uwana kasəl tatak, kadadza madzay la gəy mazlazlay la aku kà mazuw tatak kà, masla bay kà, adəzuway suwaŋ, kà uwana kadəkadalla gəl à vok.

<sup>11</sup>Dgaha deda aña maruw vok à ahəŋ gà, uwana Kristu aməts kà aña kà, masla azila la tsəh aña məsəl tatak aña uwana kadāhəŋ.

<sup>12</sup>Madāh tsakana tsəhay uwaga kà, delga aw. Katsalla matekwid à deda aña, azəŋ la madzugway aña la abà, ŋgaha bay kà, kadāh tsakana kà à Kristu à vok la gəl aña babay.

<sup>13</sup>Tsa baña tatak may la uwana atsala matekwid à deda gulo kà, kà mad à tsakana à abà kà, ŋuləm gəpad azlasləb uwana takàd à azlamazlazlay à ahəŋ dikiḡiki aw, ŋgaha kà, gi aña matsala matekwid à deda gulo aw.

## 1 Korintiya 9

<sup>1</sup>Gi kà, gi la makor gəl la abà aw takay? Gi masləlay aw ay? Dgaha gəŋəŋə Yesu Kristu la yewdi gulo. Akul uwanay kà akul mayyi à tsəh aña sləray gulo uwana gədaḡəŋ aw takay?

<sup>2</sup>Iyay, amiyaka azladza anik takəs gi bokuba gi masləlay aw kà, akul kà, kasəlaw gi, kà gi masla masləl gi gà, kà maham gay à vok aña kul, uwana la Yesu la abà, apəhla kà, gi masləlay ndzer, kà uwana gi la gəl gulo la uwana gəpəh à akul gay marabəŋ.

- <sup>3</sup>Aganay tatak uwana gəpəh à azladza uwana taslaha gi məl à gəl.
- <sup>4</sup>Azlayla gi kà gəbəzal tatak may la tatak masay kà aña sləray gulo aw takay?
- <sup>5</sup>Azlayla gi kà, gi aña mazəb mis masla madijal gəl à vok gə, kà mauguzahay anu səla, bokuba uwana azlaməna masləlay anik, la azladedə aña Sufəl gami, la Piyer aw takay?
- <sup>6</sup>Awma anu la Barnabas la uwana mədāh sləray kà anu aña madzadzər gəl gami pəra takay?
- <sup>7</sup>Slodzi uwana la guvəl la gay, ma masla adzadzər gəl aña takay? Awma dza ma uwala à uwana azuw mayyay tatak aña guf aña, uwana asləka aw la? Masla manəŋla azlaləmana, ma asa awà aña aw takay?
- <sup>8</sup>Ama kadzugwaw kà mapəhay gulo kà, apəhay aña azladza pəra, kagodaw aw, awaŋ, wakità seriya aña Zəzagəla babay kà apəh kiya uwaga.
- <sup>9</sup>Aganay uwana tatsətsər à wakità Zəzagəla à abà: 'Kawadaw gay à kokur uwana à ahəŋ, azlaḃ hi aw.' Zəzagəla ma adzugw ma lakəl aña kokur, kagodaw takay?
- <sup>10</sup>Kasəlaw kà, la dziriga kà, apəh kà anu aw takay? La dziriga kà, gay uwatà kà tatsətsər kà aña, akəsà vok kà masla mapəs guf, la masla mazlaḃ tatak kà, say tadəv sləray aña à gay lela kəla, la maf madzugway aña à ahəŋ kà humà gə aña la tatak uwaga la abà suwaŋ.
- <sup>11</sup>Anu mətəsəd makəs vok aña tatak gudəŋ à vok la slaka aŋkul, ma uwaga ma tatak delga aw takay?
- <sup>12</sup>Baŋa azlawla azlaanik kà mabəz tatak la ahəl aŋkul ma, anu la uwana azlawla anu kaykay aw takay? Adagay kiya uwaga babay kà anu, kà mədāhəŋ kiya uwaga aw, bə kəla ŋgərpa uwana abəz anu kà, anu kà məbasin kà anu aña madāh tatak uwana adəd gay à azladza anik à ahəŋ aña matsən gay marabəŋ lakəl aña Yesu Kristu aw.
- <sup>13</sup>Səlāw la dziriga kà, azlauwana tadāh sləray la məŋ gəy Zəzagəla la aku kà, tabəz tatak may aña la aku la abatà. Ŋgaha azlaməna makad tatak la aku la abatà, tabəz humà gə aña la azlatatak uwatà la abà takaday.
- <sup>14</sup>Kiya uwaga babay, Sufəl Yesu apəh kà azlauwana taz gay marabəŋ kà, tadzadzər vok la uwatà suwaŋ, agòd.
- <sup>15</sup>Amiyaka adagay kiya uwanay babay kà, gəḃà à ahəŋ kiya uwaga aw. Gətsətsər kà masləl gi tatak à awaŋ, gəgòd à akul, aw. Kà uwana ŋuləm gəməts kà manav tatak à kà dza aña makəl gi marabay gulo ala aw.
- <sup>16</sup>Gi, gəts zlapay kà maz gay marabəŋ aw, kà uwana kà leri gə kà aŋulo kà madəhəŋ. Baŋa gi gəz gay marabəŋ uwaga aw kà, matərəbay agay la gi.
- <sup>17</sup>Agayna gi la uwana gəkəsənì sləray uwaga la ahəl gulo kà madəhəŋ kà, naka gəkud mabəz masik. Iyay, tsa uwaga kà, sləray gulo kà madəhəŋ kà, say gəduw yewdi kà à abà sləray, uwana Zəzagəla afà à gi à ahəl la gəl aña.



- <sup>18</sup>Gi ma mana à masik gulo zlà ma? Aganay masik gulo: Gəz gay marabəŋ kà deyday, kà uwana gənava aŋuf aŋa sləray sayda uwana gədəhəŋ aw, ama naka azlayla gi nəma.
- <sup>19</sup>Gi la makor gəl la abà, gi mayà aŋa dza aw. Ama gi la gəl gulo la uwana gəpakà gəl gulo ala kà mayà, ŋgaha gi aŋa masəlla azladza à slaka Kristu.
- <sup>20</sup>Mok uwana gədəh sləray la tataka azla Yahudiya la abà kà, gədzà à ahəŋ bokuba gi zil Yahudiya, kà gi aŋa mabəz atà, ama gi la gəl gulo kà, gi la tsəh aŋa mapəhay aŋa Musa aw. Gədzà à ahəŋ la tataka azlauwana tanəfa mapəhay, gədzà à ahəŋ bokuba aŋatà, kà gi aŋa mabəz atà.
- <sup>21</sup>Kiya uwaga, mok uwana gədzà à ahəŋ la tataka azlauwana la abà tasəl mapəhay aŋa Musa aw, gədzà à ahəŋ bokuba aŋatà, la kokudà maf gəl à mapəhay uwaga, kà gi aŋa mabəz atà la kokudà maf gəl à mapəhay uwaga, kà gi aŋa mabəz atà suwaŋ. Ama uwaga kà, asal magodəy kà, gəkəs mapəhay aw, magay aw, awaŋ, gənəfa mapəhay aŋa Yesu Kristu.
- <sup>22</sup>La huma aŋa azlauwana atà maruw vok à ahəŋ gə kà, gi babay gəga aŋa mabəz atà. Uwaga gədəhəŋ gesina kà, kà gi aŋa mabəz atà, ŋgaha atà aŋa mabəlay, amiyaka tekula aŋatà aŋa mazilaw.
- <sup>23</sup>Uwana gədəh uwaga gesina kà, kà gay marabəŋ aŋa mad à huma à gay lela, kà gi aŋa mabəz masik la azladza anik bay.
- <sup>24</sup>Kasəlaw la dziriga kà, azladza uwana tagor mahoyay, gesina aŋatà tahoyay, ama dza tekula la uwana adəbəza masik uwana tapəh pəra. Kità kà, gərəw mahoyay, kà akul aŋa mabəz masik.
- <sup>25</sup>Dza uwana asal magor mahoyay kà, say atsətsəh vok ala dagay uwarà dadəŋ, kà masla aŋa mabəz masik. Ama masik uwatà adəbəzal la gudəŋ uwanay la vok, kà adəwisla. Kəla kà, kà aŋami kà, mətsətsəh vok ala kà, kà anu aŋa mabəz masik uwana adəv à gay aw, akəl adəsəl à adi ala aw.
- <sup>26</sup>Kà uwaga à uwana gədəgəy la matsək yewdi, kà say à huma à gay kabaw. Kà uwaga à uwana gədəgəy kà bokuba masla madəf kotəpa uwana azlab afad deyday aw.
- <sup>27</sup>Gəsəl vok gulo lela, kà gi aŋa makor vok gulo, kà la marabəŋ makəf gəl à ahəŋ, kà Zəzagəla aŋa magolla gi la lig à gi uwana gəzà gay marabəŋ aŋha à azladza anik aw.

## 1 Korintiya 10

- <sup>1</sup>Azladeda, delga awul à akul à gəl, lakəl aŋa azlababa gami madzidziga uwana tauguzəh la Musa. Zəzagəla adək à atà magudu gudu à gəl gesina, atsakà atà à ama, ŋgaha gesina aŋatà taguwà à uda la mukwà mativga la abà aya.
- <sup>2</sup>Atà gesina aŋatà kà tabəzà batem la magudu gudu, ŋgaha la mukwà mativga la abà. Atà gesina aŋa tahamà gay à vok la Musa.
- <sup>3</sup>Atà gesina aŋatà tazùw tatak may uwana asà à ahəŋ la slaka Zəzagəla babay.

- <sup>4</sup>Tasàh iyaw uwana akalàh à uda la dzøgla la abà, uwana Zəzagəla avàh à atà dzøgla, uwana Zəzagəla avà à atà kà, kà Yesu Kristu uwana aguwà à huma.
- <sup>5</sup>Bà la uwaga gesina kà, Zəzagəla akweskà madəhəŋ aŋatà, kà uwaga à uwana gesina aŋatà tamàts à kəsaf à abà.
- <sup>6</sup>Azlatatak uwaga kà tazlaka anu lakana, kà anu aŋa madəh à adi la mabila mawisiga uwana atà tadəhəhəŋ aw.
- <sup>7</sup>Kasləkawaw azlamazlazlay bokuba uwana azlaanik aŋatà tadəhəhəŋ aw. Wakità agod lakəl kà: 'Azladza tadzà madzay, tazùw tatak, tasəhəh tatak, ŋgaha tasà à afik kà mahab dəs azlamazlazlay.' Kamkam, kà aŋkul kà kasləkawaw azlamazlazlay aw.
- <sup>8</sup>Kadəhaw mabila bokuba azlaanik aŋatà, uwana dza dəbow dzik səla gəl aŋha makər tamatsà à gay la mavakay tekula la tsəh aw.
- <sup>9</sup>Digiya katapaw Sufəl Zəzagəla, bokuba azladza anik aŋatà aw. Atà tamatsəh à matsəh atà aŋa bebi à abà.
- <sup>10</sup>Kaŋoŋuzaw lakəl aŋa Zəzagəla bokuba azlaanik aŋatà uwana tadəhəhəŋ aw. Malika aŋa mamətsay azahà atà ala. Akul kà kadəhawwaŋ kiya aŋatà aw.
- <sup>11</sup>Uwana Zəzagəla adəhəhə azlatatak uwaga gesina kà, kà azladza aŋa masəl azlatatak la uwaga la abà, ŋgaha kà atà aŋa madəh haŋkəli. Tatsetsər uwaga à wakità à abà, kà atà aŋa matapanula azlatatak à anu azladza aŋa zamana uwanay azladəv à gay.
- <sup>12</sup>Kà uwaga, dzàw à ahəŋ dzawwa. Dza uwana adatsizlla à ahəŋ kà, say adəha haŋkəli kà masla aŋa matəd à ahəŋ aw.
- <sup>13</sup>Azlamatərəbay uwana tabəza akul kà, tabəza azladza gesina babay. Ama Zəzagəla, uwana agədīŋ dziriga aŋha à afik kà, asak à matərəbay kà matərəb akul la azlatatak uwana la abà, aduwa ndzədə aŋkul aw. Masla adàvə à akul ndzədə kà mabasiŋ, ŋgaha kà mas à uda la abà aya babay.
- <sup>14</sup>Kà uwaga azladedə gay ləv gulo, hòyàw à azlamazlazlay à ahəl.
- <sup>15</sup>Gəpəhay kà akul azladza matsən sləm gə, nərəzàw lakəl aŋkul à uwana gəpəhay tsi, kà uwana dziri à uwana gəpəhay.
- <sup>16</sup>Akul dzùgwàw lakəl aŋa tatak may aŋa Sufəl uwana məzuwahay tsi. La mok uwana məzuway la slaka gə, à tatak may aŋa Sufəl, kasəlaw kà anu la Kristu mədahama gay à vok la aŋiz tekula la abà aw takay? Mok uwana mətsək kaf ala kà mazuway kà, kasəlaw kà mədaham gay à vok la sləb vok aŋa Yesu Kristu la abà tekula aw takay?
- <sup>17</sup>Kaf kà tekula pəra à uwana anu gesina məzuway, kaf tekula gə uwaga kà apəhla ala kà mədagay tekula, kà uwana məzùw kà kaf tekula uwatà.
- <sup>18</sup>Dzùgwàw lakəl aŋa tsəhay Isərayel dadəŋ tsi. Takədəh azlatatak à Zəzagəla kà, azlauwana tapədəh sləb uwaga kà, atà tekula la Zəzagəla.
- <sup>19</sup>Mana à uwana mafafad bəga la gay uwaga la abà ma? Sləb uwana dza akəd à azlamazlazlay la azlamazlazlay ma, tatak dziriga takay? Awaŋ!

- 20** Ama uwana azlaməna makad tatak uwana tasəl Zəzagəla aw kà, takaday kà à azlamazlazlay, awkà à Zəzagəla aw ama à seteni. Dgaha asa à gi kà kahamaw gay à vok la azlamasasədok mawisiga aw.
- 21** Kà uwana kaslawwalla vok aña matsəp gay à masakwa aña Sufəl la abà la aña azlamasasədok mawisiga la abà aw. Dgaha babay kaslawwalla vok aña madz madzay la tatak may aña Sufəl Yesu la adi, ngaha kadzaw madzay la aña masasədok mawisiga la adi aya babay aw.
- 22** Awma asa à anu madla ləv à Sufəl Zəzagəla à hud takay? Dgaha ma məduwa masla la ndzəda takay?
- 23** Haday, azladza anik la tataka aŋkul la abà tagod kà: 'Anu la makor gəl la abà kà tatak gesina'. Iyay nəma, ama tatak gesina kà azlaka anu aw pəra. Tagod aya kà: 'Anu la tetəvi kà madāh tatak gesina', ama la azlatatak anik kà, mədāzigəŋla magay la tetəvi aña Zəzagəla la tsəh aw.
- 24** Kayahaw kà azlatatak uwana akəsa akul à vok pəra aw, ama yəhəw kà uwana akəsa vok à azladza anik babay suwaŋ.
- 25** Kəla tatak uwana tadəw ala la kasukwa, bokuba azlasləb kapadaw, kokuda mabək gel à ahəŋ səla la ləv aŋkul la tsəh.
- 26** Haday, bokuba uwana tatsetsèr à wakitə Zəzagəla à abà kà, agod kà: 'Sufəl Zəzagəla la uwana akor gudəŋ à vok gesina, la azlatatak uwana la abà gesina.'
- 27** Baña masla madiŋal gəl à vok aw anik, azala akul kà mazuw tatak may la mtəga aŋha kà, zùwəw kəla tatak gesina uwana adəfa à akul à huma à gay, la kokuda manaval lakəl aña mabək gəl à ahəŋ səla aŋkul.
- 28** Ama kəla kà, baña dza agod à akul kà, sləb uwanay kà sləb mazlazlay kà, uwaga kà kazuwaw zlə ma aw, kà uwana adapəhakulla, ngaha kà kak aña makadla gəl à vok, la ləv aŋha la tsəh aw.
- 29** Madzugway aña ləv aŋkul gəgod aw, ama aña ləv aŋha. La dziri madzugway aña ləv aña dza aslala vok aña madāh seriya à madzugway aña makor gəl aña ləv gulo à gəl aw.
- 30** Baña kikay gədagod à Zəzagəla kà tatak may gulo aya ma, kakay dza apəsew gi lakəl aña tatak may uwana kikay gəgod à Zəzagəla gulo aya ma?
- 31** Uwana gəpəh kà kiya uwanay, kadəzuw mana babey mi, kadəsa mana babey mi, kadəfəh mana babey mi, dəhəŋ kà la tetəvi uwana sləm aña Sufəl Zəzagəla aña maday à huma à gay la maziŋəy pəra.
- 32** Kadəhawwaŋ kà la makad gəl à azladza à vok aw: Adagay zil Yahudiya, adagay zil Yahudiya aw, adagay azlaməna madiŋal gəl à Zəzagəla à vok.
- 33** Dahəwwəŋ bokuba uwana gi gədəhəŋ. Gi gədawad vok à uda, kà gi aña mawoy uwabeyuwi gesina, gəyəh uwana akəs gi vok aw, say uwana akəs vok à azladza, kà atə aña mabəlay.

## 1 Korintiya 11

- <sup>1</sup>Dzàw à ahəŋ bokuba uwana gədza à ahəŋ, nəfàw gi, bokuba uwana gənəfa Kristu.
- <sup>2</sup>Azladeda gəzləb akul, kà uwana kadzugwaw lakəl gulo koksikoksi, ŋgaha kà uwana kanəfaw azlatatak uwana gətəpakulla gesina aya.
- <sup>3</sup>Ama bà la kità kà, asa à gi kà kasəlaw uwanay: Səlàw kà Kristu kà Sufəl gà aŋa azladza gesina. Zil kà mənŋa aŋa mis, ŋgaha Zəzagəla kà masla kà mənŋa aŋa Kristu.
- <sup>4</sup>Kà uwaga baŋa zil adəv kudà, baŋaw apəha gay Zəzagəla la gày la aku la maf tatak à gəl gà kà, kiya uwaga kà masla apəsew mənŋa aŋha.
- <sup>5</sup>Kiya uwaga babay baŋa mis adəv kudà baŋaw apəh gay Zəzagəla la gày la aku la gəl deyday gà kà, apəsew zil aŋha. Apakay kà bokuba masla mafəts gəl à ahəŋ gà.
- <sup>6</sup>Tsa baŋa mis awad nalbət à gəl aw, ma kà mana afəts gəl à ahəŋ pəra aw zlà ma? Ama masl aŋidz aŋa mis la mafəts gəl à ahəŋ kà uwaga kà ziruwi, say awadəh nalbət à gəl.
- <sup>7</sup>Ama zil kà afa tatak à gəl aw, kà uwana masla maftsa vok aŋa Zəzagəla. Masla apəhla mazləbay aŋa Zəzagəla ala, ama mis kà apəhla kà mazləbay aŋa zil aŋha ala suwaŋ.
- <sup>8</sup>Hadəy kà, zil kà asà à uda kà la mis la abà aw, ama mis la uwana, asà à uda la zil la abà.
- <sup>9</sup>Zəzagəla aŋəl zil kà aŋa mis aw, ama aŋəl mis kà aŋa zil.
- <sup>10</sup>Kà uwaga à uwana mis ahad gəl à ahəŋ la nalbət, kà masləkaway zil aŋha, ŋgaha kà azlamalika babay.
- <sup>11</sup>Amiyaka adagay kiya uwanay kà, kà aŋami uwana mədagay tekula la Sufəl Yesu Kristu kà, məsəl kà mis aslala vok aŋa madz à ahəŋ la aslasl gəl aŋha aw, ŋgaha zil babay aslala vok aŋa madz à ahəŋ la aslasl gəl aŋha babay aw. Say atà səla nna.
- <sup>12</sup>Iyay, bokuba uwana mis kà asa à uda kà la zil la abà kà, kiya uwaga kà, lakana mis la uwana ayyi zil lagwa, ama atà səla nna kà tasà à waŋ la slaka Zəzagəla, masla maŋal tatak gesina.
- <sup>13</sup>Nərèzàw la gəl aŋkul dadəŋ: Baŋa mis adəv kudà à Zəzagəla la gày madəv kudà la aku la gəl deyday, ma akəsa vok takay? Wùllàw à gi ala tsi!
- <sup>14</sup>Bà la madz à ahəŋ la abà kà, ziruwi kà aŋa zil kà masak aŋidz ziŋziŋga lakəl.
- <sup>15</sup>Ama baŋa mis azigəŋəŋ aŋidz aŋha à gəl kà, uwaga kà tatak dzəba aŋha səla aw gà. Abəz aŋidz aŋha ziŋziŋga bokuba tatak mahadla gəl à ahəŋ.
- <sup>16</sup>Ama baŋa dza asal mats gay lakəl aŋa uwaga kà, səlàw kà, anu kà məsəl madz à ahəŋ anik aw, amiyaka azlaməna gay Zəzagəla babay kà tasəl tetəvi anik babay aw.

- 17Tatak uwana asa à gi aña mapəh à akul kà mazləb anu kagodaw aw. Kà uwana mok uwana kahamaw gay à vok kà aña masləkaw Zəzagəla kà, tatak delga kadāhawwan aw, ama kadāhawwan kà mawisiga, delga aw, gəgod à akul.
- 18Terəña kà, mok uwana kahamahaw gay à vok, kà aña masləkaw Zəzagəla kà, katsakahawla gərgər, tagod à gi, uwaga ma dziri ay? Wùllaw à gi ala tsi!
- 19(Duli matsakla agay la tataka aňkul la abà, ngaha kà masəlla ala azlauwana azlaəña Sufəl Yesu dziriga)
- 20Uwana kamahaw gay à vok kà kazawaw tatak may aña Sufəl aw.
- 21Kà uwana kəla uwabeyuwi aňkul kà av vok aña mazuw aňha, ngaha azlaanik tagəd à ahəñ la may gə, ngaha azlaanik aya kà guzu adakad atà zlà, gəgod.
- 22Tsa baña kiya uwaga kadāhawwan, ma kà mana kazawaw tatak may la mtəga aňkul aw ma? Asa à akul aña mapəsew maham à ahəñ məna madiñal gəl à vok kəla ay? Awma kà, makəl ziruwi à azlauwana à gəl tatak may aňatà la ahəñ aw, kagodaw kəla ay? Mana gəpəh à akul lagwa zlà ma kagodaw ma? Gəzləb akul, kagodaw ay? Awan, gəzləb akul aw!
- 23Aganay matapla uwana Sufəl Yesu atəpgəla, à uwana gətəpakulla: Sufəl Yesu la vəd uwana tatəl kaf à gəl kà mavay à ahəl aña azladza kà, azəb kaf à ahəl,
- 24kikay agòd à Zəzagəla kà kaf, atsəkà kaf uwaga ala, agòd: 'Uwanay kà vok gulo uwana aga matsəkəñ ala gə kà aňkul, zùwaw uwaga kà gi aña mawul à akul à gəl.'
- 25La lig aña mazuw tatak may aňatà la ahəñ, azəb kətsaw à ahəl, agòd: 'Tatak masay uwana la kətsaw uwanay la abà kà, makəs vok slawda mawga la aňiz gulo, uwana adəsokw à vədah. Kəla kaslà uwana kadəsahaw uwanay kà, kà gi aña mawul à akul à gəl.'
- 26Mapəhay aña Sufəl Yesu uwanay apəhla ala kà, la kəla kaslà uwana kazuwaw kaf uwanay, la mas tatak masal à gəl uwanay kà, kapəhaw kà gay mamətsay aňha à azladza, tsərah à kaslà uwana Sufəl adəwul à wan.
- 27Kà uwaga kà baña dza azuw kaf, ngaha as tatak masay à uda la kətsaw aña Sufəl Yesu la abà la kokuda, mavəh gəl aňha ala kà, adəh tsakana à vok aña Sufəl Yesu à gəl, ngaha à aňiz aňha à gəl aya.
- 28Kità kà, kəla uwabeyuwi agur gəl aňha dadəñ, ngaha masla aña mazuw kaf, la mas tatak à uda la kətsaw uwaga la abà.
- 29Kà uwana baña avaha uwaga ala la tatak may deyday gə aw kà, abiy seriya à gəl aňha la mazuway aňha la masay aňha.
- 30Kà uwaga à uwana aňuvaw la tataka aňkul la abà takəlāh à vədah, tapakəh magudu, tapakəh azlaməna dūvats ngaha aňuvaw taməts à gay aya bay.
- 31Baña anu məgur gəl gami dadəñ kà, Zəzagəla adəfaha à anu seriya à gəl aw.

<sup>32</sup>Baṅa Sufəl Yesu aslèha à anu à vok kà, kà matsatsəh anu ala la tatak uwana la abà kà, seriya aṅa madàkəs anu kiya aṅa azladza anik aw.

<sup>33</sup>Kà uwaga azladedda gulo, baṅa kadàhamaw gay à vok, kà mazuw tatak may aṅa Sufəl kà, kudàhàw vok kà akul aṅa magay la ahəṅ gesina.

<sup>34</sup>Baṅa dza la may gà kà, say azuw kaf à huf la mtəga aṅha, kà maham gay à vok aṅkul aṅa mabiyakulla seriya aṅa Zəzagəla à gəl aw. Kà aṅa azlagay anik, say baṅa gədàda à awtày la uwana, gədàdəvəṅ à gay zlà.

## 1 Korintiya 12

<sup>1</sup>Lagwa adagay kà məpəh gay aṅa mavày aṅa Masasədök Zəzagəla. Azladedda gulo, asa à gi kà kasəlaw uwaga lela.

<sup>2</sup>Azladedda, mok uwana kaləgaw aṅa madiṅ gəl à Yesu à vok kà, kanəfàhàw azlamazlazlay badaga uwana takòràh akul.

<sup>3</sup>Kà uwaga à uwana, asa à gi kà kasəlaw uwaga: Baṅa Masasədök Zəzagəla adakəs dza kà, dza uwatà kà aslala vok aṅa magodày kà: 'Yesu kà matsafla gà!', agodày aw. Kiya uwaga babay: 'Yesu kà Sufəl Zəzagəla', dza agodày aw, say baṅa Masasədök Zəzagəla la masla la abà.

<sup>4</sup>Aga la ahəṅ azlamavày anik anik gərgagər aṅuvaw, ama Masasədök tekula la uwana avà à atà tetəvi gesina aṅatà.

<sup>5</sup>Aga la ahəṅ azlatatak anik anik aṅuvaw, ama Sufəl Yesu tekula, la uwana avà à atà tetəvi aṅa mavày uwaga gesina.

<sup>6</sup>Aga la ahəṅ azlamaslay aṅa madàh sləray anik anik gərgagər aṅuvaw, ama Zəzagəla kokudà gəl aṅha la uwana avày à kəla uwabeyuwi maslay aṅa sləray uwaga.

<sup>7</sup>Masasədök apəhla ala kà, aga la kəla uwabeyuwi aṅkul la abà, kà akul aṅa mazlakla maham à ahəṅ məna gay Zəzagəla la mavày uwaga.

<sup>8</sup>Masasədök avày à dza matsihila, ṅgaha bà la Masasədök uwaga avà à dza anik aya maslay aṅa mapəhla madzugway aṅa Zəzagəla ala.

<sup>9</sup>Kà aṅa dza anik aya kà, Masasədök avəl ndzədə kà madiṅ gəl à Yesu à vok la dziriga. Ḍgaha avà à dza anik maslay kà mawar azlaməna dūvats ala.

<sup>10</sup>Uwaga avà à azladza anik maslay kà madàh azlanadzipo, à azladza anik aya avà à atà maslay kà mapəh paṅaw aṅa Zəzagəla, uwana apəh à atà, à azladza anik aya avà à atà maslay kà mabàdma la azlagay anik anik, à azladza anik aya avà à atà maslay kà mapalla godega aṅa azlagay uwaga ala.

<sup>11</sup>Uwaga kà bà Masasədök tekula gà, gà la uwaga à uwana adàh uwaga gesina, masla avà maslay à dza gərgagər bokuba uwana asal.

- 12**Məsəl kà vok aña dza kà tekula, ama azlamanabay la ahəŋ gərgagər. Amiyaka azlamanabay la vok aña dza kà gərgagər ama vok kà tekula pəra. La Kristu bay kà kità.
- 13**Ŋgaha anu azla Yahudiya la azlauwana azla Yahudiya aw, azlamayà baŋaw azladza uwana takor gəl, tadəhà anu batem kà, kà anu aña magay vok tekula la Masasədok tsikaslağa uwaga la abà, ŋgaha Zəzagəla avà à anu maslay la Masasədok tekula uwaga la abà.
- 14**Vok kà, aga la manabay tekula pəra aw, ama manabay dəŋ.
- 15**Iyay zlahaw kà, asik agodəy kà: 'Gi manabay aña vok à gi aw, kà uwana gi ahəl aw', agodəy, 'Kità kà, gi aña vok aw', bə la uwaga gesina kà masla manabay aña vok, ndzer.
- 16**Zlahaw sləm agodəy kà: 'Gi kà gi yewdi aw, gay gə la uwaga gəga manabay aña vok aw', agodəy, bə la dziriga uwaga adəd gay à sləm à ahəŋ aña magay manabay aña vok aw.
- 17**Agayña vok gesina kà naka agay kà yewdi pəra, ma naka kakay atsən sləm ma? Ŋgaha agay, agay kà sləm, pəra ma naka kakay azin tatak ma?
- 18**Ndzer, Zəzagəla abək azlamanabay à vok à vok bokuba uwana asal.
- 19**Agayña vok gesina agay kà manabay tekula pəra kà, uwaga kà naka agay vok aw.
- 20**Ama lagwa kà, azlamanabay aŋuvaw la vok tekula la vok.
- 21**Kiya uwaga kà, yewdi aslala vok aña magod à ahəl kà: 'Gəyah ka aw!', agodal aw. Ŋgaha takasagəl babay aslala vok aña mapəhay uwaga à asik babay aw.
- 22**Tetuwa kiya uwaga aw! Azlamanabay aña vok, uwana kanəŋ atà, bokuba takəsa kà vok aw, kà atà la uwana takəsa kà vok ndzer.
- 23**Azlamanabay uwana takəsa à anu vok aw, məgod kà, atà la uwana məfa à atà sləm kaykay, manabay ziruwi gə uwana məhad atà à ahəŋ la huma yewdi aña azladza kà, məkəs atà kà la ahəl səla.
- 24**Azlamanabay uwana takəs anu à gəl kaykay, atà kà mənəkudə aña mahad atà à ahəŋ aw. Zəzagəla ahamə gay à vok à vok gesina, avəh à azlamanabay bəzaga masləkaway gesina.
- 25**Kà uwana asal kà maŋoŋuzay aña magay la ahəŋ la vok aw. Ama kà matsən vok gay aña magay la ahəŋ la tataka azlamanabay aña vok la abə gesina aŋatà.
- 26**Baŋa manabay tekula azay kà, azlamanabay gesina tazay la slaka gə. Baŋa tekula aŋatà la marabay la abə, gesina aŋatà tarabay la slaka gə suwaŋ, bay.
- 27**Akul gesina kà, akul vok aña Kristu, ŋgaha kəla uwabeyuwi aŋkul kà manabay aña vok uwaga.

<sup>28</sup>Kiya uwaga à uwana, Zəzagəla avəh sləray à azladza la maham à ahəŋ məna gay Zəzagəla. Teraŋa: azlaməna masləlay, masəla: azlaməna mapəh à atà gay à ahəl aŋa Zəzagəla, kà mapəh à azladza, ŋgaha mamakər aŋha: azlaməna matapla tatak à azladza anik, la lig la ahəŋ: azlaməna madəh azlanadzipo, ŋgaha: azlauwana la maslay kà mawar azlaməna dıvats ala, ŋgaha: azlaməna mazlak à azladza anik anik, ŋgaha: azlauwana tadala azladza anik anik la tetəvi delga la ama, ŋgaha: azlauwana la maslay kà mapəh azlagay məlok gə, uwana azladza anik tasəl aw.

<sup>29</sup>Gesina aŋatà kà azlaməna masləl atà, baŋaw azlaməna mapəh à atà gay à ahəl aw, baŋaw azlaməna matapla à azladza aw. Gesina aŋatà kà atà la maslay kà atà aŋa madəhəh azlanadzipo aw,

<sup>30</sup>baŋaw kà mawar azlaməna dıvats ala, ŋgaha la mapəh azlagay məlok gə aw, baŋaw la masəh ala godega aŋa azlagay uwaga à uda aw.

<sup>31</sup>Kiya uwaga kà yəhəwəni mavəy uwana aduwa vok zlə. Ama lagonay kà, gəpəhakulla tetəvi uwana aduwa vok gesina.

## 1 Korintiya 13

<sup>1</sup>Iyay, agayŋa gəsəl azlagay gudəŋ aŋa azladza gesina, amiyaka bə aŋa azlamalika, ŋgaha mawoy dza gulo la ahəŋ aw kà, kiya uwaga kà gəpaka kà kalkal la mahohumay aŋa dewdəw uwana azay la sləm la abə pəra.

<sup>2</sup>Amiyaka gədəgay la maslay kà maz paŋaw aŋa Zəzagəla à azladza, amiyaka bə gədəsəlay tatak gesina, gədəsəlay godega aŋa nasiri aŋa Zəzagəla, gədədiŋ gəl à Zəzagəla à vok la tsəhay gə, uwana gəslala vok aŋa magodəy à gudəŋ: Bədə vok ala la abanay, ama baŋa gəwoyaŋ azladza anik aw kà, gədəpaka tatak deyday pəra.

<sup>3</sup>Gədəvəh azlatatak gulo à uda gesina babay, amiyaka bə gəl gulo bay kà məbək à gay la akəl, ama baŋa gəwoyaŋ azladza anik aw kà, makəs vok gulo la ahəŋ aw, gədəpaka tatak deyday.

<sup>4</sup>Dza uwana la masal, masla abasiŋ azladza anik, masla adəh delga, adəh adi aw, ats zlapay aw, azigəŋ gəl aw.

<sup>5</sup>Masla masal kà, adəh sləray ziruwı gə aw, masla afa à gəl kà vok aŋha pəra aw, masla ləv aw, apəh gay lakəl aŋa mawisiga aŋa dza aw, la maf dza à ləv aw.

<sup>6</sup>Masla arabay kà sləray mawisiga aw, ama arabay kà, kà sləray delga.

<sup>7</sup>Masla uwana la masal kà, abas tatak gesina, madiŋal gəl à vok aŋha, la manewəŋ aŋha, la məbasiŋ aŋha atetuway diki diki aw.

<sup>8</sup>Masal kà adəv à gay aw, mapəhay aŋa Zəzagəla uwana apəh à azladza à ahəl kà mapəh à atà kà, adədəv à gay à baŋa məlo aŋha adəslay. Azlagay gudəŋ aŋa azladza gesina, uwana məpəhay kà, adədəv à gay babay, bə masəl tatak gami uwana məsəl tatak babay kà adəzahla.



<sup>9</sup>Kà uwana masəlay gami, la mapəhay gami kà uwana məz paŋaw aŋa Zəzagəla uwana apəh à anu à ahəl kà ahən ala babay aw.

<sup>10</sup>Ama mok uwana tatak ahən ala gə adàsa à waŋ kà, tatak uwana ahən ala aw kà, adàziyla gesina.

<sup>11</sup>Mok uwana gi bəziga kà, gəpəhəh gay bəzi, gədzùgwəh ŋgaha gənawəhəŋ mabəzi bəzi, ama mok uwana gədagay magolga, gəsək à tatak azlabəza la tsəh ala gesina.

<sup>12</sup>Lagonay kà, mənəŋəŋ kà bokuba fatew uwana la kutərum la abà, mənəŋəŋ la dziriga aw. Ama kaslè adàslay à uwana mədənəŋ Zəzagəla yewdi la yewdi. Lagonay kà, gəsəl kà gəl gə gəl gə pəra, ama la kaslè uwatà kà, gədàsəlay la lela bokuba uwana masla uwana asəl gi babay.

<sup>13</sup>Lagonay kà, tatak makər uwaga la uwana tagədəŋ à afik: Madiŋal gəl à vok, manewəŋ, ŋgaha masal. Ama masal la uwana aduwa azlatatak anik anik gesina la kaykay.

## 1 Korintiya 14

<sup>1</sup>Wədāw vok à uda kà akul aŋa magay la masal, wòyàwwəŋ la ləv tekula! Mavəy uwana Masasədök Zəzagəla avəhà à azladza, kà akul aŋa mabəzal suwaŋ. Uwana wòyàwwəŋ, gəgodf à akul, kaykay kà, maslay aŋa mapəhla gay Zəzagəla à azladza uwana Zəzagəla apakullaŋ.

<sup>2</sup>Masla mapəh gay mələk gə, uwana azladza anik tasəl aw kà, say apəhay kà à Zəzagəla pəra, kà uwana dza asəl gay uwaga aw. La ndzədə aŋa Masasədök Zəzagəla dza apəh nasiri.

<sup>3</sup>Ama dza uwana az paŋaw aŋa Zəzagəla, uwana apəhal kà, azigənəŋ kà azladza la madiŋal gəl à vok la abà, kà madzərədāh atà à uda, ŋgaha kà mataslāh atà à gay à ahəŋ.

<sup>4</sup>Dza uwana abadma la azlagay mələk gə, uwana azladza anik tasəl aw, adzərədīŋ kà madiŋal gəl à vok aŋha à uda pəra. Ama dza uwana az paŋaw aŋa Zəzagəla, uwana apəhal kà mapəh à azladza kà, avà ndzədə à mənə madiŋal gəl à vok la maham à ahəŋ mənə gay Zəzagəla gesina.

<sup>5</sup>Asa à gi, kà akul gesina kà kavatsaw gay la azlagay mələk gə, uwana azladza anik tasəl aw. Ama uwana gəyahay kaykay aya kà, akul aŋa mabəz maslay aŋa maz paŋaw aŋa Zəzagəla uwana apəh à azladza à ahəl. Haday kà, dza uwana av sayda uwaga kà, uwaga la uwana akəsa vok à dza, uwana asəl azlagay mələk gə, ŋuləm kà say masla mawulla à uda aga la ahəŋ, kà madzərəd azlaməna madiŋal gəl à vok ala.

<sup>6</sup>Azladeda, gənava akul: La mok uwana gədàda à awtəy à slaka aŋkul, la mana gədəkəs à akul à vok, à baŋa gədāvats gay kà la azlagay mələk gə uwana azladza tasəlaw ma? Gədəkəs akul à vok aw, say baŋa gədàsa akul à uda dziriga aŋa Zəzagəla, baŋaw gəpəhakulla tatak anik anik, baŋaw masəlay anik anik, baŋaw sayda uwana mabəzal gə la slaka Zəzagəla, baŋaw matapla anik anik.

- <sup>7</sup>Dzùgwàw lakəl aṅa azlatatak matsay kà aṅa marəzlay tsi, bokuba talakway baṅaw ṅiziṅ, baṅa masla matsay la masla maḍəḍay tava kuda aṅha aw ma kakay dza asəl mahabal à tsəh lela ma?
- <sup>8</sup>Baṅaw, baṅa masla mats mazlazliṅ aṅa guvəl atsay lela aw ma, uwa ada à guvəl uwa?
- <sup>9</sup>Kiya uwaga la slaka aṅkul babay, baṅa kapəhaw gay mələk gə, uwana dza asəl aw, kakay dza atsən uwana kapəhaw ma? Aṅa kiya uwaga, kà gay aṅkul uwana kapəhaw kà, adagay gay deyday bokuba maḍəḍay aṅa afad.
- <sup>10</sup>Aga la ahəṅ azlagay gərgagər la gudəṅ la vok, kəla tsəhay uwala beyli kà la gay aṅha.
- <sup>11</sup>Ama baṅa gətsəna gay uwana dza apəh à gi aw kà, dza uwana apəh à gi gay uwaga kà gədəpakīṅ ala kà, kà dza mələk gə la slaka gulo, ṅgaha gi babay gədəgay mələk gə la huma aṅha suwaṅ.
- <sup>12</sup>Tsa akul kà, kavàw ndzəḍa à azlamavəy uwaga zlə kà, yàhàw aṅa magay gorobu kà aṅa azlauwana tadala maham à ahəṅ mənə gay Zəzagəla à huma à gay la maḍiṅəl gəl à vok la abà zlə.
- <sup>13</sup>Kà uwaga baṅa dza la maslay kà mavats gay la azlagay mələk gə, uwana azladza anik tasəl aw kà, say dza uwaga anav maslay la slaka Zəzagəla, kà mav maslay kà masəlla godega aṅa azlagay uwaga à uda kəla babay suwaṅ.
- <sup>14</sup>Baṅa gədəv kudà la gay mələk gə uwaga kà, ləv gulo adəv kudà ndzer, ama haṅkəli gulo adəv kudà aw.
- <sup>15</sup>Tsa baṅa kiya uwaga ma, mana gədəhəṅ zlə ma? Gədəv kudà la masasəḍək gulo, gəhab uwaga kà la haṅkəli gulo babay aya.
- <sup>16</sup>La kità, baṅa kadəv kudà à Zəzagəla la masasəḍək ma, kakay dza masla matsəbal sləm uwana la maham gay vok aṅkul la abà, adəslala vok à magəḍay: 'Amen!' à madəv kudà aṅak ma? Kà uwana asəl à uwana kapəhaw tetuwa aw.
- <sup>17</sup>Amiyaka madəv kudà aṅak adagay dzəḍa aṅha səla aw babay kà, akəsa la vok aw.
- <sup>18</sup>Kikay gəgod à Zəzagəla kà uwana gədūwa akul gesina la masəl gay mələk gə, uwana azladza anik tatsənaṅ aw.
- <sup>19</sup>Ama la huma maham à ahəṅ mənə gay Zəzagəla kà, asa à gi maṅəh gay zlo uwana tatsəna, kà gi aṅa madzadzaṅ azladza anik ala, à kà maṅəh gay dəbow dəbow, uwana azladza anik tasəl aw.
- <sup>20</sup>Azladeda, kadzugwaw bokuba akul azlabəza aw, à uwana dzùgwàw bokuba akul azlamagol dza. Kà maḍəh mawisiga kà, gəw bokuba azlabəza uwana tasəl maḍəh mawisiga aw.

- <sup>21</sup>Agay uwana tatsetsèr à wakità Zəzagəla à abà: 'La azlagay məlok gə uwaga à uwana gədāsahla à tsəhay gulo à uda. Ama bà la uwaga kà, tatsinqəŋ la ahəl aw',fa Sufəl Zəzagəla agòd.
- <sup>22</sup>Kà uwana mabadma la azlagay məlok gə kà, adəpakay kà bokuba nadzipo la slaka azladza uwana tadiŋal gəl à vok aw, kà atà aŋa masəlay kà, atà la maham gay à vok la abà, la azlaməna madiŋal gəl à vok aw. Ama maz gay Zəzagəla, kà mapəhla paŋae aŋa Zəzagəla ala la slaka aŋa azlaməna madiŋal gəl à vok, ama kà aŋa azladza gesina suwaŋ babay aw.
- <sup>23</sup>Bokuba magodəy kà, maham à ahəŋ məna gay Zəzagəla gesina adahama gay à vok, ŋgaha gesina aŋatà tadzəka mavats gay kà la azlagay məlok gə pəra: Baŋa azladza deydayga, uwana tadiŋal gəl à vok aw, tada à awtəy à maham gay à vok aŋkul à abà, ŋgaha tatsən uwaga kà, tanərəz akul kà bokuba akul azlakusoŋu aw, takay?
- <sup>24</sup>Ama baŋa kəla uwabeyuwi az sayda aŋa Zəzagəla, ŋgaha dza deydayga, uwana masla madiŋal gəl à vok aw, ada à awtəy babay kà, kiya uwaga kà, kəla gay uwana adətsənəŋ kà, adəpəhla tsakana aŋha. Gay uwaga gesina kà, adəkəsəy lakəl.
- <sup>25</sup>Ŋgaha madzugway uwana la tsəh ləv aŋha gesina, adəsa à uda à udəka ala, ŋgaha adəwulla à gəl à vədəh kà masləkaw Zəzagəla la magodəy kà: 'Ndzer, Zəzagəla la ahəŋ la tataka aŋkul la abà!', agodəy.
- <sup>26</sup>Azladeda, mana à uwana gəpəh à akul lagwa ma? Mok uwana kahamaw gay à vok la slaka gə, dza anik azəb mahabay, ahab. Dza anik atapla gay Zəzagəla à azladza anik. Dza anik atsala à atà tatak uwana à uda, Zəzagəla apəhla. Dza anik aya à masla mabadma la azlagay məlok gə, ŋgaha dza anik atsala godega aŋa gay uwaga à uda apəhay. Kəla tatak uwana kadəhawwaŋ kà, say agay delga, azlaməna gay Zəzagəla tazigənay la masla kəla.
- <sup>27</sup>Kà aŋa azlagay məlok gə kà, səkəw kà azladza səla pəra tapəh, ama dza awulla à uda uwana tapəhay, ŋgaha la manəf vok lela, aduwa dza makər aŋa mapəhay aw.
- <sup>28</sup>Ama baŋa masla mawulla gay uwaga à uda la ahəŋ aw kà, masla mabadma uwaga adza à ahəŋ titi, apəh uwaga kà la ləv aŋha la tsəh, atà la Zəzagəla aŋha pəra.
- <sup>29</sup>Ama kà aŋa azlaməna maz paŋaw aŋa Zəzagəla, uwana apəh à atà kà, azladza səla baŋaw makər tapəh gay uwaga, ama say azladza tamədzedəŋ ala uwana tapəhay.
- <sup>30</sup>Zlahaw kà, la kaslā uwana dza abadma la uwana, dza anik uwanay abəza gay la slaka Zəzagəla kà, ŋuləm matera adza à ahəŋ dadəŋ.
- <sup>31</sup>Akul gesina kaslawwalla vok aŋa maz gay aŋa paŋaw aŋa Zəzagəla la manəf vok la tekula tekula, ŋgaha azlaməna madiŋal gəl à vok gesina aŋa masəlay, ŋgaha madiŋal gəl à vok aŋa uwabeyuwi aŋa mazigənay.
- <sup>32</sup>Azlaməna mazəh paŋaw aŋa Zəzagəla tanəŋla gəl aŋatà la huma aŋa Masasədok, uwana Zəzagəla avà à atà.

<sup>33</sup>Zəzagəla kà asal anu mədza à ahəŋ la sehseh la abà aw, ama mədza à ahəŋ la lapiya la abà. Bokuba uwana adapaka zagəlà à azlaməna madiŋal gəl à Zəzagəla à vok gesina,

<sup>34</sup>kiya uwaga la maham gay à vok aŋkul la abà babay. Say azlamis tadza à ahəŋ titi, atà la tetəvi kà mavats gay aw, bokuba uwana tatsətsèr à wakità mapəhay aŋa Zəzagəla à abà: Say tasləkaway pəra.

<sup>35</sup>Baŋa asa à atà matsən tatak anik kà, say tanàvəh à zil aŋatà la mtəga, kà uwana uwaga kà, ziruwi kà aŋa mis aŋa mavats gay la huma maham à ahəŋ məna madiŋ gəl à Zəzagəla à vok.

<sup>36</sup>Iyay, awma la slaka aŋkul la uwana gay Zəzagəla asa à uda kagodəw takay? Awma kà aŋkul pəra à gay uwanay kagodəw ay?

<sup>37</sup>Baŋa dza adzugw kà masla aŋa magay masla maz sayda aŋa Zəzagəla, baŋaw adzugw kà, kà adabəza ndzədə aŋa Masasədök Zəzagəla, delga, masla asəlay kà uwanay gətsetser à akul, kà mapəhay aŋa Sufəl Zəzagəla.

<sup>38</sup>Ama baŋa asəl aw kà, kafaw sləm à masla aya aw.

<sup>39</sup>Kiya uwaga azladedə gulo, mawoyəŋ aŋkul kà aga kà aŋa maz sayda aŋa Zəzagəla. Ama kasakawwalla tsəh ala aŋa mapəh azlagay məlok gə aw.

<sup>40</sup>Say tatak gesina ada à vok la tetəvi aŋha, bokuba uwana akəsa vok lela.

## 1 Korintiya 15

<sup>1</sup>Azladedə gulo, vaw gi tetəvi kà gi aŋa mawulla à akul ala gay marabəŋ uwana à gəl gəzakullaŋ, kakəsaw uwaga, madiŋal gəl à vok aŋkul atsizl kà à uwaga à afik.

<sup>2</sup>La uwaga la uwana kabəlləw, baŋa kakəsawwaŋ bokuba uwana gəzakulaŋ aw kà, madiŋal gəl à vok aŋkul apakay kà tatak deyday pəra.

<sup>3</sup>Gay uwana aga la gi lakəl kà, gədapəha à akul à vok à abà suwaŋ. Aganay gay uwana gəpəh à akul dadəŋ: Kristu kà aməts kà, kà à ahəl tsakana gami bokuba uwana tatsətsèr à wakità à abà.

<sup>4</sup>Tallà masla, ŋgaha awùl à uda la mamətsay la mahənay mamakər, bokuba uwana tatsətsèr à wakità Zəzagəla à abà aya.

<sup>5</sup>Masla apəhla vok à Piyer, ŋgaha à azlaməna matapla kulo gəl aŋha səla uwatà bay.

<sup>6</sup>La lig la ahəŋ apəhla vok à azlaməna asik, uwana aduwa dadərmokw zlo. Azlaanik aŋatà kà atà la ahəŋ tsərah à lakana, ama azlaanik aŋatà kà tamatsay.

<sup>7</sup>La lig aŋa uwaga la ahəŋ, apəhla vok à Yakuba, ŋgaha à azlaməna matapla gesina.

<sup>8</sup>Ŋgaha la lig aŋatà la ahəŋ gesina, apəhgəla vok bay, à gi uwana gəga bokuba bəzi mahənay aw gə.

- <sup>9</sup>Aya gəga matsihila gə aŋa azlaməna matapla anik uwanay gesina. La dziriga kà, gəsła aŋa magay masła matapla aŋha aw, kà uwana gi la uwana gətərèbàhà azlaməna matsalah sləm aŋa Sufəl Zəzagəla à gay gesina.
- <sup>10</sup>Ama la vok mahamay aŋa Zəzagəla adapakagəla, à dza uwana kanəŋàwwàŋ lagwa, la vok mahamay aŋha lakəl gulo kà apakà deyday aw. Gədəhà sləray aŋuvaw dāduwa à gay aŋa azlaməna matapla anik gesina, uwaga kà gi gədəhàŋ aw, ama vok mahamay aŋa Zəzagəla uwana la gi la abà.
- <sup>11</sup>Adagay gi, adagay atà, anu azlaməna matapla gesina, anu məzà gay marabəŋ bokuba uwana gəpəh à akul, kiya uwana kadīŋàwwalla gəl à vok babay.
- <sup>12</sup>Aganay maz sayda gami uwana məpəhay. Zəzagəla awùlla Yesu à uda la mamətsay. Dgaha ma kakay azlaanik aŋkul tagodəy kà: Azlamazimnekid tadàwul à uda aw, tagod ma?
- <sup>13</sup>Baŋa mawul à uda la mamətsay la ahəŋ aw kà, kità kà Yesu Kristu babay kà awul à uda zlà ma aw.
- <sup>14</sup>Baŋa Kristu awul à uda aw kà, məpəhay gami babay kà apakà tatak deyday, ŋgaha madiŋal gəl à vok aŋkul babay kà deyday suwaŋ.
- <sup>15</sup>Uwana azay aduwa uwaga kà, madàh fida gami à Zəzagəla à vok, à uwana məgod kà, awùlla Kristu à uda la mamətsay. Haday, baŋa azlamazimnekid tawul à uda aw kà, kità kà awulà à uda suwaŋ zlà ma aw.
- <sup>16</sup>Kà uwana baŋa azlamamatsay tawul à uda aw kà, kità kà Kristu kà awulà à uda babay aw.
- <sup>17</sup>Kà uwana baŋa Kristu awùlla à uda aw kà, madiŋal gəl à vok aŋkul akəs sləray aw, akul azlamazàhla gə la tsakana aŋkul la abà, tsəràh à lakana.
- <sup>18</sup>Tsa kità kà, azlauwana tamàts à madiŋal gəl à vok à abà babay kà, tazàhla.
- <sup>19</sup>Baŋa manewəŋ gami kà lakəl aŋa Yesu, kà aŋa sifa uwanay anu la abà lakana kà, kità kà, anu la uwana vok ahama azladza anik uwanay gesina, kà anu.
- <sup>20</sup>La dziriga kà, Kristu awulà à uda la mamətsay, kà uwaga à uwana azladza gesina tadàwul à uda.
- <sup>21</sup>Kiya uwaga à uwana mamətsay asà à waŋ à gudəŋ à vok kà dza tekula, kiya uwaga babay mawul à uda la ahəŋ kà dza tekula aya suwaŋ.
- <sup>22</sup>Azladza gesina tamatsay, kà uwana anu tekula la Adama. Gesina aŋatà tadàwul à uda kà maham gay à vok aŋatà la Yesu suwaŋ.
- <sup>23</sup>Ama kəla mana beymi la tetəvi aŋha: Kristu la uwana aga matera aŋa mawul à uda. La mok uwana adàsa à waŋ, azlaməna madiŋal gəl à vok gesina tadàwul à uda.
- <sup>24</sup>Kiya uwaga kà, makəf gəl à ahəŋ adàsa à waŋ: Kristu adàkalah azlandzəda ala la maslay gesina, ŋgaha la azlamaslay aŋa azlaməna məzam aŋa Zəzagəla gesina bay. Dgaha adàvə makoray à ahəl aŋa Zəzagəla Baba,

- 25** kà uwana leri Kristu adàkoray kà say baŋa Zəzagəla adàbək azlaməna məzam à tsəh aŋha dən.
- 26** Masla məzam makəɸ gel à ahəŋ, kà uwana Zəzagəla adàkalah à ahəŋ, kà uwaga kà mamətsay.
- 27** Kà uwana tatsətsèr à wakità Zəzagəla à abà, tagòɸ kà: 'Zəzagəla abək tatak gesina à tsəh asik, kà maf asik à afik aŋha.' Baŋa tagòɸ kiya uwanay kà, ndzer kà, Zəzagəla kà aga la tsəh aŋa Kona aŋha aw, kà uwana masla la uwana abək azladza à tsəh asik aŋa Kristu.
- 28** Baŋa Kona aŋa Zəzagəla adagay masla makoray à azlatatak gesina kà, masla aga la tsəh aŋa Baba aŋha, uwana afəl tatak gesina à ahəl, kiya uwaga kà Zəzagəla Baba adàkoray tatak gesina.
- 29** Dzùgwàw lakəl aŋa azlagay anik tsi. Azladza anik la ahəŋ la maham à ahəŋ aŋkul la abà, uwana tadàhà à atà batem kà aŋa azlamazimnekiɸ uwana tamatsay tsi. La dziriga, baŋa azlamazimnekiɸ tadàwul à uda aw, ma mana madàh batem uwaga akəs vok ma?
- 30** Anu ma, kà mana mēda à huma à gay koksikoksi la ahəl aŋa mamətsay zlà ma?
- 31** Azladedə gulo, gəzləb akul kà, kà uwana akul la ahəl aŋa Sufəl gami Yesu Kristu, ama gi kà, kəla mavakay gesina kà, gi la kuda mamətsay.
- 32** La gudəŋ Efesus kà, gəpà slagəla mənŋa bokuba map slagəla la azlatatak fəta makəsafərga. Agayŋa gəgay la manewəŋ aŋa mawul à uda aw kà, naka uwaga akəs gi vok aw, haday! Baŋa azlamazimnekiɸ tadàwul à uda aw kà, ŋuləm mənəfa tetəvi uwanay: 'Məzùw, məsà kà uwana lebəŋ kà mamətsay atsa à waŋ.' Gay la gay la abà agod.
- 33** Kapapataw gəl aŋkul aw, mēdza à ahəŋ la dza mawisiga awis madz à ahəŋ delga aŋkul ala.
- 34** Wulàw à waŋ à dziriga à abà bokuba uwana Zəzagəla ayahay, ŋgaha sàkàw à madàh tsakana, gəpəh uwaga kà ziruwi aŋa makəs akul, uwana gəpəh uwanay kà, azladza anik la ahəŋ la tataka aŋkul la abà tasəl Zəzagəla aw.
- 35** Zlahaw dza anavay: 'Kakay azlamamatsay tadàwul à uda ma? Vok ma uwala tadàkoray la?'
- 36** Kayyà, kak la haŋkəli aw! Baŋa kaslək fofulo, ŋgaha fofulo uwatà amətsay dadən, la uwana à uwana atsa à uda.
- 37** Fofulo uwana kasləkay adagay hi, adagay uwala beyli, kasləka kà fofulo gə pəra, awkà kasləka kà mas à uda gə aw.
- 38** ŋgaha Zəzagəla atsalla à uda, av tsəhay à fofulo gesina tsəhay bokuba uwana asal. Kəla fofulo gesina abəza tsəhay vok aŋha.

- <sup>39</sup>Sləb vok aña azlatatak uwana la sifa kà gərgəgər. Vok aña azladza kà gərgər la vok aña azlatatak fəta, ɲgaha babay vok aña azlatatak mahoyay kà gərgər la vok aña azlatatak fəta, ɲgaha babay vok aña azlatatak mahoyay kà gərgər la aña azlakilfi.
- <sup>40</sup>Azlatatak uwana la zagəla la afik la azlauwana la vədāh babay la ahəŋ. Mazləbay aña azlatatak uwana la zagəla kà gərgər la aña azlatatak uwana la vədāh babay.
- <sup>41</sup>Afats kà la mahədāy aña kokudā gəl aña, təla babay la aña, ɲgaha azlatsetsilin babay la aña, ama azlamahədāy aña kà gərgəgər.
- <sup>42</sup>Kiya uwaga la uwana adapaka vok la azlaməna mawul à uda la mamətsay. Uwana tala kà azinla, ama uwana awul à uda kà azinla aya aw.
- <sup>43</sup>Uwana talà kà maŋəratata gə ɲgaha mawisiga. La mok uwana adawul à uda kà la ndzəda ɲgaha la mahədāy kaykay.
- <sup>44</sup>Uwana talà kà vok uwana la sləb vok, ama uwana awul à uda, kà vok aña Masasədok. Baña sləb vok aña vok la ahəŋ, vok aña Masasədok la ahəŋ babay.
- <sup>45</sup>Kà uwana wakità Zəzagəla agòd kà: 'Adama teraŋa, aga la sifa',fa ama Adama masəla, uwaga kà Kristu, aga Masasədok uwana avà sifa.
- <sup>46</sup>Uwana aña Masasədok la uwana atsa vok à waŋ aw, ama aña vok. La lig la ahəŋ aña Masasədok asa à waŋ.
- <sup>47</sup>Adama matera kà, agə maŋalay gə kà la kiriniŋ aña kutso, ama Adama masəla kà, asə à ahəŋ kà la zagəla.
- <sup>48</sup>Azladza aña vədāh kà kalkal bokuba Adama, uwana asa à uda la kiriniŋ aña kutso la abà. Azladza aña zagəla kà, atà kalkal la dza uwana asə à ahəŋ la afik babay suwaŋ.
- <sup>49</sup>Lagwa kà mədəbani à vok la dza uwana taŋəl la kutso, kiya uwaga bay mədədebani à vok la dza uwana asə à ahəŋ la zagəla la afik.
- <sup>50</sup>Aganay uwana asa à gi mapəhay azladedə: Tatak uwana tadāhəŋ la sləb vok, ɲgaha la aña taslala vok aña mad à makoray aña Zəzagəla aw, ɲgaha vok uwana amətsay babay, aslala vok aña madz à ahəŋ la sifa aw.
- <sup>51</sup>Gəpəh à akul nasiri anik: Gesina gami mədəməts à gay aw, ama mədəgohla vok pəra.
- <sup>52</sup>La katskats, la kirim yewdi, à mok uwana mazlazliŋ adətsənay, hadāy, la mok uwana adətsənay, azlamazimnekid tadəwal à uda kà aña sifa la vok, uwana amətsay aya aw. ɲgaha anu uwana la sifa bay mədəbədla vok.
- <sup>53</sup>Bokuba magodāy kà, vok gami mamətsay gə uwanay, kà adətsokw vok, uwana à abà amətsay aya aw.
- <sup>54</sup>Baña uwaga adəpaka vok kiya uwanay kà, gay aña masla mapəhal gay ahəl adagəd à afik: 'Mamətsay la ahəŋ aya aw, takədāsl à mamətsay adagay, tsewwa.

<sup>55</sup>Kak mamətsay aŋala ndzəda aŋa uwana la? Kak mamətsay aŋala ndzəda aŋa matsəh gi aŋak uwana ala?’

<sup>56</sup>Ndzəda aŋa mamətsay kà la tsakana la abà, ŋgaha ndzəda aŋa tsakana kà asa à uda, kà la mapəhay la abà.

<sup>57</sup>Ama mazləbay aga la Zəzagəla uwana avà à anu maduwiŋ la Sufəl gami Yesu Kristu.

<sup>58</sup>Kiya uwaga zlà, azladede gay ləv gulo, tsizllàw à ahəŋ lela lela, rəɖ kagodaw aw, faw gəl à sləray aŋa Sufəl Zəzagəla koksikoksi, kà uwana kasələw kà, mabasiŋ aŋkul uwana la Sufəl Zəzagəla la abà kà, adətəɖ à vəɖah deyday aw.

## 1 Korintiya 16

<sup>1</sup>Lagwa kà, gəzalaŋ à gəl gay ŋuv, lakəl aŋa sili uwana mətsatsəh kà aŋa azladede gami la Urusalima: Bokuba uwana gəpəh à azlaməna manəfay la kutso Galatiya bay.

<sup>2</sup>Kəla ladu gesina, delga, kà kəla uwabeyuwi aŋkul afa sili à fəta à awtəy bokuba uwana asla. Dahəwwaŋ à ahəŋ lela tsərəh à uwana gəda à awtəy. Kiya uwaga kà, mədànekudà aŋa mahamala gay à vok la kaslā uwatà aya aw.

<sup>3</sup>Baŋa gədàda à awtəy gədàsləl azladza aŋkul uwana katsatsamawani atà à Urusalima la wakità la ahəl, kà madla sili uwana kazlakawla atà.

<sup>4</sup>Baŋa mazlakay aŋkul kà asla kà gi aŋa maday la gəl gulo kà, mədàday anina pəra zlà.

<sup>5</sup>Kà mabəz à slaka aŋkul kà, gədzugw maguway la Makeduniya dadəŋ, kà manəŋ azladede anik à gay la abatà.

<sup>6</sup>Zlahaw gədàdzan à ahəŋ la slaka aŋkul ŋoɖegi la təla awkusa gesina, kiya uwaga kà, kadàzlakaw gi la tatak uwana gənəkudà aŋha gesina, asa à gi maday.

<sup>7</sup>Gi kà, asa à gi aŋa madz à ahəŋ la slaka aŋkul, awkà asa à gi aŋa manəŋ akul la tetəvi la ama pəra aw. Gədzugw madz à ahəŋ la tataka aŋkul la abà, à baŋa asa à Zəzagəla.

<sup>8</sup>Kəla kà, asa à gi madz à ahəŋ la abanay la Efesus tsərəh à mavakay aŋa Pentakosta,fa

<sup>9</sup>kà uwana la abanay kà, gəbəzà maslay kà madəh sləray uwana akəs vok. Bə amiyaka azlaməna məzam la ahəŋ aŋuvaw babay.

<sup>10</sup>Baŋa Timotawus adàda à awtəy kà, kəsàw masla la ahəl səla, kà masla aŋa madz à ahəŋ la tataka aŋkul la abà kokudà guba. Kà uwana masla babay masla sləray aŋa Sufəl Zəzagəla bokuba gi.

<sup>11</sup>Kamkam, dza apəsew aw, zlakəw tsərəh à uwana adəv mauguzahay aŋha à gay gesina, ŋgaha kà masla aŋa mawul à waŋ à slaka gulo la marabay. Gi, la azladede la abanay kà, məkud mas à waŋ aŋha.



- <sup>12</sup>Ama kà aṅa deda gami Apolos kà, gèdàdzèrèdèṅla kaykay, kà masla la azladede anik aṅa mad à awtày à slaka aṅkul, ama asàl mad à awtày lagonay aw, say la huma à gay ṅuv, à baṅa adàbèza kaslà.
- <sup>13</sup>Kadzewhal aw, dzàw à ahəṅ la adi lela la madiṅal gəl à vok la abà. Gàw mabəlafala la ndzəfà.
- <sup>14</sup>Uwana kadàhawwanṅ gesina kadàhawwanṅ kà la masal.
- <sup>15</sup>Azladede kasəlaw Estefanas la huɖ gày aṅha. Atà kà azlaməna madiṅal gəl à vok teraṅa la kutso Akayya. Dgaha atà tadàh sləray aṅa Sufəl Zəzagəla la ləv tekula, kà mazlak azlaməna madiṅal gəl à vok.
- <sup>16</sup>Kamkam azladede, gədəv akul kuɖa, kà akul aṅa makəs azlaməna sləray uwaga la ahəl səla. Atà la azladza uwana tadàh sləray atà nna kasləkawaw atà.
- <sup>17</sup>Gi la marabay məṅga kà mas à waṅ aṅa Estefanas la Fortunatus, ṅgaha Akayyikus à slaka gulo. Baṅa gədanəṅ atà, kà bokuba akul gesina aṅkul la slaka gulo.
- <sup>18</sup>Atà tadukwəṅ ləv à ahəṅ, bokuba uwana tadukwakullaṅ à ahəṅ babay. Kəsàw tsəhay dza uwaga la ahəl səla.
- <sup>19</sup>Azlaməna madiṅal gəl à vok la makoray aṅa Asəya gesina 'Ayyi', tagoɖ à akul. Akilas la Pərəskila, la maham à ahəṅ mənə gay Zəzagəla, uwana tahamàh gay à vok atà nna tadàhakulla 'Ayyi', la sləm aṅa Sufəl gami Yesu.
- <sup>20</sup>Azladede uwana la abanay gesina tadàhakulla 'Ayyi'. Dahàhàw vok 'Ayyi', kà akul à akul gesina la məṅga məṅga, ṅgaha la ahəl səla.
- <sup>21</sup>Aganay uwana gətsetseray la ahəl gulo à gi Pol, 'Ayyi', gəgoɖ à akul.
- <sup>22</sup>Baṅa dza awoya Sufəl Yesu aw kà, matsafla gà! Marana tha, (Asal magoɖay: Sufəl gami: Sà à waṅ!)
- <sup>23</sup>Sufəl Yesu Kristu avà à akul vok mahamay aṅha.
- <sup>24</sup>Mawoy akul gulo gesina agay koksikoksi la akul, akul uwana la Yesu Kristu la abà.

## 2 Korintiya

### 2 Korintiya 1

<sup>1</sup>Gi Pol uwana Zəzagəla akəsàni gi, kà gi aña magay masləlay aña Yesu Kristu kà, gi la uwana gətseter wakità uwanay la ahəl gulo, anu la deda gami Timotawus, à akul mənə gay Zəzagəla uwana la Korintiya, ngaha à azlaməna masla madiḡal gəl à vok anik anik gesina, uwana la kutso Akayya la abà.

<sup>2</sup>Zəzagəla Baba gami, atà la Sufəl gami Yesu Kristu tapis akul gay à vok la mav à akul lapiya.

<sup>3</sup>Kikay à Zəzagəla Baba, la Yesu Kristu, Sufəl gami. Masla Baba aña vok mahamay, masla madzərədāh azladza ala koksikoksi la mataslaha atà ləv ala.

<sup>4</sup>Amiyaka mədāgay la ngərpa mənḡa la abà kà, masla kà adzərədāhanula koksikoksi. Kà uwaga à uwana məslala vok aña madzərədāh azladza anik uwana ala, atà la azlaḡərpa anik anik la abà suwaḡ, mətaslatàla bokuba uwana anu məbəzəl la slaka Zəzagəla.

<sup>5</sup>Aganay uwana gəpəh à akul: Kristu kà asà ngərpa kà mənḡa, kiya uwaga anu babay kà, məsa ngərpa mənḡa. La kità kà, Zəzagəla adzərədāhanula kaykay, kà uwana anu la maham gay à vok la Kristu la abà.

<sup>6</sup>Baḡa məsa ngərpa kà, kà akul aña madzərədāh ala, ngaha Zəzagəla aña məbəl akul. Baḡa Zəzagəla adavà à anu mawad vok à uda kà, kà akul aña madzərədāh vok ala, kà akul aña mabas tsəhay ngərpa uwanay məsay.

<sup>7</sup>Məsəl ndzer kà, akul la maday kokudā maruw vok à ahəḡ la tetəvi aña Zəzagəla la tsəh, ngaha mədahama à ngərpa à abà anina la slaka tekula, ama bə la uwaga bay kà, Zəzagəla adzərədāh akul ala bokuba anu suwaḡ.

<sup>8</sup>Azladeda, la kità bay kà, asa à anu kasəlaw lakəl aña tsəhay ngərpa, uwana məsà la kutso Asəya la abà. Ŋgərpa uwatà kà, azà à anu haday, kà uwaga aga kà bokuba mən dzəgla la kuda gami, ndzer, uwatà kà mədzugw kà mətəfay la abà aw.

<sup>9</sup>La abatà mədzugw la ləv gami la tsəh kà mavakay gami adadəv à gay la abanay lakana, məgədf. Ama uwaga atəp à anu kà, kà anu aña maf madzugway gami à gəl gami à afik aw, ama kà anu aña maf madzugway gami kà à Zəzagəla uwana à afik, masla mawulla azladza à uda la mamətsay.

<sup>10</sup>Kà uwana masla la uwana apəlla à anu ala la zlamtsa aña mamətsay zlazladaga la abà, ngaha bay kà, masla la uwana adəpəlla anu ala aya gotənaḡ. Ndzer, à masla la uwana adəpəlla anu ala.

<sup>11</sup>Akul kà, kadəzlakaw anu kiya uwaga, kà azladza aḡuvaw tadəv kudā kà anu, kiya uwaga kà, la mok uwana Zəzagəla adatsən madəv kudā uwaga kà: 'Kikay', azladza aḡuvaw, tadəgəfal, kà vok mahamay aḡha uwana avà à azladza aḡuvaw.

<sup>12</sup>Madzugway aña ləv gami az sayda lakəl aña madz à ahəŋ gami la gudəŋ uwanay la vok, agay la ləv tekula la maduwal Yesu, ŋgaha ma baməraka la tataka aŋkul la abà zlà ma ay? La dziriga, uwana akəs Zəzagəla à gəl kà, mənəfa masəlay aña dza aw, say vok mahamay aña Zəzagəla uwana azlaka anu.

<sup>13</sup>La hadəy gə, kà tatak mahadəŋ à ahəŋ gə la ahəŋ la matsetseray gami la abà aw, uwaga bokuba uwana kadzeŋaw pəra, amiyaka katsənawwaŋ babay aw kà. Mədzugw kà, la huma la gay kà, kadətsənawwaŋ lela gesina, bə uwana katsənawwaŋ gəl gə gəl gə lagonay babay kà. Ama mok uwana Sufəl gami Yesu Kristu adəsa à waŋ kà, akul kadəsəlaw tatak gesina, ŋgaha kadərabaw kà anu, bokuba anu uwana mədərəbay kà akul.

<sup>15</sup>Hadəy la teraŋa kà, gəyàh mad à awtəy à slaka aŋkul dadəŋ, ŋgaha kà gi aña mad à Makeduniya. Mok uwana gədətsizlla ala la Makeduniya, naka gəwul à slaka aŋkul, kà aŋkul aña mazlak gi la mauguzahay gulo la abà, baməraka la mana beymi gesina, kà maday à kutso Yahudiya. Kiya uwaga kà, naka asik səla gəpis à slaka aŋkul, la abata kà naka gəzlaka akul kà masəla. Ama gəbəzà à awtəy aw.

<sup>17</sup>Mok uwana gədzəgw uwaga, ma gədzəgw ma la haŋkəli gulo aw takay? Awma la paŋaw deyday, bokuba aña azladza gudəŋ à vok pəra takay? Awma 'Iyay', gəgod' tsa 'Awaŋ', tatak?

<sup>18</sup>Ndzer kà, Zəzagəla kà, masla masəlay, masla dziriga. Uwana gəpəh à akul kà, 'Iyay' la baŋaw la 'Awaŋ', gəpəh tatak la paŋaw səla kəla ay.

<sup>19</sup>Yesu Kristu Kona aña Zəzagəla uwana məpəhakulla, Silas, Timotawus ŋgaha gi babay kà, 'Iyay', məgod', baŋaw 'Awaŋ', aw, məgod' aw, say 'Iyay' pəra.

<sup>20</sup>Hadəy gə kà, masla aga 'Iyay', à Yesu uwana agəd à map à ahəŋ aña Zəzagəla à afik gesina. Tsa kità kà, la Yesu Kristu la uwana, 'Amen' məgodəy, kà anu aña mazləb Zəzagəla.

<sup>21</sup>Zəzagəla la gəl aŋha la uwana adzərədəhànula la tetəvi aña Yesu Kristu la tsəh, ŋgaha adzərədəhakulla babay, masla la gəl aŋha la uwana atsatsəmàni anu, abək anu à fəta à awtəy,

<sup>22</sup>kà anu magay azlaaŋha. Dadəŋ kà, avà à anu Masasədok aŋha kà anu masəlay kà masla adəvə à anu azlatatak anik anik gesina à uwana afà à ahəŋ, kà masla aña mav à anu.

<sup>23</sup>Baŋa fida la uwana gədəhəŋ kà, Zəzagəla la uwana masla masəlay, adəha à gi seriya à gəl, à baŋa fida gəpəhay. Kà mana à uwana gədada à awtəy à Korintiya aw mi, kagodəw takay? Kà uwana agayŋa gədada à awtəy kà, naka gəbasakullaŋ aw.

<sup>24</sup>Kà uwana asa à anu aña maf leri à madiŋal gəl à vok aŋkul à gəl aw, ndzer katsizlaw kà à madiŋal gəl à vok à afik hadəy. Ama asa à anu mədəh sləray anina kà akul aña məbəz namnam la ləv aŋkul la tsəh.

## 2 Korintiya 2

- <sup>1</sup>Kà uwaga à uwana gəyàh kà mad à awtày à slaka aŋkul, kà matazakulla iyaw tugwi à adi aya aw.
- <sup>2</sup>Baŋa gədatazakulla iyaw tugwi à adi kà, gi babay kà iyaw tugwi adataz à gi à adi suwaŋ, kiya uwaga kà, dza la ahəŋ adadzərədgəla aya aw, kà uwana akul gesina akul la iyaw tugwi la adi.
- <sup>3</sup>Kà uwaga à uwana gətsetser à akul bokuba uwana gəfàhəŋ. Uwana asa à gi mad à awtày à slaka aŋkul la kaslè uwatà, awkà naka iyaw tugwi ataz à gi à adi kà akul. Tsa naka akul la uwana karabaw gi, la dziriga, uwana gəfà madzugway gulo à afik gesina, kà uwana gəsəl kà baŋa gi la marabay la abà kà, akul gesina babay kà akul la marabay la abà.
- <sup>4</sup>Iyay, wakità gulo uwatà kà, gətsetser kà la iyaw tugwi la adi mənŋa, la matərəbaw mənŋa, ləv aza à gi kaykay. Ama gətsetser kà, kà matazakulla iyaw tugwi à adi aw. Kəla kà, kà akul aŋa masəlay kà gəwoya akul kaykay.
- <sup>5</sup>Baŋa dza abək mazaw la gəl à azladza kà, abək mazaw la gəl kà à gi aw, ama à akul gesina, awma az à azladza anik anik la tataka aŋkul la abà. Ama asa à gi aŋa mapəh uwaga mənŋa aw.
- <sup>6</sup>Gay mənŋa aŋkul, tadəhalla seriya à gəl kiya uwaga kà diga adagay.
- <sup>7</sup>Lagonay kà, say kamatsawwalla kà taslawla gay à ahəŋ kà ləv aŋa mavalal à gay aw, kà masak tetəvi la tsəh aw.
- <sup>8</sup>Kà uwaga à uwana, kamkam gəgəf à akul kà: Pəhəwalla mawoy vok aŋkul!
- <sup>9</sup>Uwana gətsetser à akul kà, kà akul aŋa masəl dziriga aŋha, kà gi aŋa masəlay à baŋa kakəsaw gay gulo aŋa tetuwa.
- <sup>10</sup>Baŋa akul kadamatsawwaŋ à zil uwaga ala kà, gi babay gədàmatsalaŋ ala suwaŋ, -à baŋa gi la gay aŋa mamatsiŋ ala- la dziriga, gəmatsallaŋ ala la dziriga, kà madegolay akul, uwana la huma aŋa Sufəl Yesu Kristu.
- <sup>11</sup>Kà seteni aŋa makəfəsl anu aw, kà uwana məsəl kà, la azladabaray anik anik gesina.
- <sup>12</sup>Gətsizlla ala la abatà kà mad à Tərowas, kà maz gay marabəŋ lakəl aŋa Yesu Kristu. Mok uwana gəbəzà à abatà kà, gənəŋəŋ kà Sufəl Yesu adafəhgəŋ tetəvi à ahəŋ, kà maz gay marabəŋ.
- <sup>13</sup>Ama la abatà kà, gədzà à ahəŋ la titi aw, kà uwana gəbəzà Titus la abatà aw. Kà uwaga à uwana: 'Mad aŋulo', gəgəf à azlaməna madiŋal gəl à vok la abatà, ŋgaha gəhəd à kutso Makeduniya.
- <sup>14</sup>Kiya uwaga mazləbaw agay la Sufəl Zəzagəla, kà uwana masla adàla anu à maday aŋa maduwiŋ aŋha à abà, ŋgaha kikay kà maham gay à vok gami la Kristu la abà, kà uwaga abək anu à sləray aŋha à abà, kà anu aŋa mapəhla gay lakəl aŋa Kristu ala, la azlaslaka gesina. Masəlay aŋha adahən gudəŋ à vok ala bokuba tatak uwana slaslərra azinay.

<sup>15</sup>Mədagay bokuba tatak mazinay gə uwana slaslərri, Kristu adakəf à Zəzagəla. Slaslərri aday à slaka azladza la tetəvi aŋa məbəlay la tsəh, azladza uwana atə la tetəvi aŋa mazila la tsəh gesina.

<sup>16</sup>Kà aŋa azladza uwana Zəzagəla adabəl atə kà, slaslərri uwaga kà delga, tabəzà sifa uwana adəv à gay aw la abà. Ama kà aŋa azladza uwana tazəhla kà, slaslərri uwaga kà delga aw, atsa à atə ala kà mamətsay à waŋ. Lagwa ma uwa à uwana asla kà aŋa sləray uwaga uwa?

<sup>17</sup>Azladza aŋuvaw tanərəz gay Zəzagəla kà bokuba tatak matsakalay, uwana tabəza riba la abà, ama anu kà kiya uwaga aw. Kà uwana Zəzagəla la uwana asləl anu aŋa məpəhay kà la ləv tekula la huma aŋha, kà uwana anu mədahama gay à vok la Kristu la abà.

## 2 Korintiya 3

<sup>1</sup>Lagwa ma mədzəka mazləb gəl gami takay? Awma mənəkudə bokuba azladza anik uwana tapəhakulla wakità aŋa sayda, uwana apəhla dza ala ay, awma məbəz tsəhay gə uwaga la slaka aŋkul dadəŋ takay?

<sup>2</sup>Akul la gəl aŋkul la uwana kadapakaw azlawakitə sayda gami, uwana matsəseray gə la ləv gami la tsəh, ŋgaha kà azladza gesina aŋa masəl madz à ahəŋ gami gesina la Sufəl la abà.

<sup>3</sup>Iyay, uwaga kà adzəf ala kà, akul la uwana akul azlawakitə gami, uwana Kristu atsetsər à ləv gami à tsəh, ŋgaha asləlla anu. Atsetsər uwaga la tatak matsəseray aw, ama la Masasəfok aŋa Zəzagəla uwana la sifa. Atsetsər uwaga à akur kəslatsats gə à adi aw, ama à ləv aŋa azladza à tsəh.

<sup>4</sup>Məpəh uwaga kà, kà uwana məgəfəŋ à afik la huma Zəzagəla kà madəgolay Yesu Kristu.

<sup>5</sup>Hadəy, kà anu la gəl gami kà, məsla kà madəh sləray uwanay aw, kà uwana maslay gami gesina kà, atsa à waŋ kà la slaka Zəzagəla.

<sup>6</sup>Kà uwana masla la uwana avà à anu maslay kà məpəhla ala makəs vok slawda mawga aŋha ala la slaka gesina. Uwaga agəf kà à məpəhay uwana à afik tatsətsər aw, ama à Masasəfok aŋha à afik, kà uwana məpəhay uwana tatsətsər kà adəla dza kà à mamətsay, ama Masasəfok kà adala dza à sifa à abà.

<sup>7</sup>Uwarə kà, tatsətsərəh məpəhay kà à akur kəslatsats gə à adi, la mok uwana adəhəhəŋ uwaga kà, azladza tanaŋə mazləbay aŋha kà, udəka aŋha à uwana audə huɸ adi aŋa Musa ala, kà udəka uwatə kà, azla Isərayel tasləla vok aŋa manərəz huɸ adi aŋha aw, kà uwana aŋərəzl atə à adi. Tekedika kà, udəka uwatə asəf aw. Məpəhay kà adəla azladza kà à mamətsay à abà. Baŋa məpəhay uwaga adəla azladza à mamətsay à abà, apəhla à mazləbay məŋga aŋa Zəzagəla kà à azladza ala, à mok uwana adapəhla vok ala.

<sup>8</sup>Adaməraka sləray aña Masasəđok, uwana adala dza à sifa à abà takay, masla adàpəlla mazləbay uwana ala aduwa uwanay gesina.

<sup>9</sup>Mapəhay kà, asal kà Zəzagəla akəs azladza la seriya. Tsa baña tatak uwaga adala anu à seriya, la uwana apəhanula mazləbay aña Zəzagəla, ma adaməraka makəs vok slawda mawga, uwana agəñ anu dziriga la huma aña Zəzagəla ay, apəhanula mazləbay aña Zəzagəla, uwana aduwa uwana gesina aw takay?

<sup>10</sup>Mazləbay aña mapəhay maviya gə kà ndzəđa aña la ahəñ aya aw, kà uwana mazləbay aña mapəhay mawga adapəhla vok ala, uwana aduwa aña maviyaga.

<sup>11</sup>La dziriga kà, makəs vok slawda maviyaga kà, Zəzagəla avà kà aña kaslā ñuv pəra, à uwana apəhla mazləbay aña ala. Tsa baña kiya uwaga zlà ma, makəs vok slawda mawga, uwana adza à ahəñ aña koksikoksi ma aduwan aw ay?

<sup>12</sup>Məpəhay la dazuwaya la huma azladza gesina, kà uwana məfa manewəñ gami à azlatatak uwanay à afik kà, uwaga kà dziriga.

<sup>13</sup>Anu kà məđəhəñ bokuba aña Musa, uwana ahadā huđ adi aña à ahəñ la gabaga, kà azla Isərayel aña manəñ madəv à gay aña mawutsəđay la huđ adi aña aw.

<sup>14</sup>Bà hañkəli añaatà kà aslāla vok kà matsənəñ aw. Baña tadzəñ gay aña makəs vok slawda maviyaga kà, gabaga uwatà atsək atà à ama tsərəh à lakana. Uwaga kà, adəv à gay aw, say baña tagola vok à slaka Kristu.

<sup>15</sup>Bà tsərəh à lakana babay, baməraka mbaw, uwana tadzəñ mapəhay aña Musa kà, tatsənəñ aw, kiya gabaga uwatà adzakàhà atà à hañkəli añaatà à ama.

<sup>16</sup>Ama baməraka mbaw, baña dza apəh gay la ləv ala, atsà à wañ à slaka Sufəl kà, gabaga uwaga adəv à gay la adi aña.

<sup>17</sup>Kà uwana kà Sufəl Kristu, kà atà tekula la slaka gə, la kətsaw tekula la abà, la Masasəđok Zəzagəla. La slaka uwana Masasəđok aña Sufəl la ahəñ kà, azladza uwana la abatà kà, atà la makor gəl la abà, awkà azlamayà aya aw.

<sup>18</sup>Haday, anu gesina uwana məđiñ gəl à masla à vok kà, məwad gabaga uwaga à adi aw. Mənəñ mazləbay aña Sufəl Yesu, ñgaha mazləbay uwaga abəđla anu koksikoksi tsərəh à uwana məgay bokuba masla. Sufəl la uwana adāh sləray uwanay la Masasəđok aña tsikasłaga.

## 2 Korintiya 4

<sup>1</sup>Kà uwaga kà məy vok aw, kà uwana la dziriga aña vok mahamay aña, la uwana avà anu sləray uwanay.

<sup>2</sup>Məđakweska sləray à gəl la ziruwi gə gesina; məđāh sləray la dəmdəm, məgola gay Zəzagəla babay aw. Ama məpəhla godega aña dziriga aña ala, kà kəla uwabeyuwi uwana av ləv aña à Zəzagəla kà, adəgəđ anu à afik.

<sup>3</sup>Azladza anik kà, tatsənà gay marabəñ uwanay məzàtəñ aw. Kiya gabaga atsakà atà à yewdi à ama. Səlāw kà, uwaga kà, kà aña azlauwana la tetəvi aña mazila la tsəh.

- <sup>4</sup>Atà kà, seteni sufəl aña gudəŋ à vok uwanay, adaguləfàh atà ala la madzugway aŋatà la abà, ŋgaha kà atà aña makəs udàka uwana audəy lakəl aŋatà aw. Udàka uwaga kà, apəhla kà mazləbay aña Kristu ala. La Kristu la abà kà, Zəzagəla apəhla vok ala.
- <sup>5</sup>Məpəhay kà gay aña aslasl gəl gami aw, say gay aña Yesu Kristu. Masla la uwana Sufəl, anu kà, anu kà azlaməna madàhal à akul sləray, kà madegolay Yesu Kristu.
- <sup>6</sup>Mok uwana Zəzagəla adàhà gudəŋ à vok kà, agòd kà: "Udàka apaka vok, aza mələs ala." Bə Zəzagəla gə la uwaga, asək udàka aŋha aña maudəy la ləv gami la tsəh bay. Udàka uwaga apəhanula mazləbay aña Zəzagəla la hud'adi aña Yesu Kristu.
- <sup>7</sup>Anu kà bokuba anu azlamasik abisl deydayga pəra, ama tatak dzəba aŋha səla aw gə uwaga kà, aga la anu la abà. Uwaga apəhla ala kà maslay məŋga, uwaga atsà à wəŋ kà la slaka aŋha, awkà la slaka gami aw.
- <sup>8</sup>Məs ŋgərpa anik anik, ama taduw anu aw, gəl akàd' anu à vok, ama məbas ləv.
- <sup>9</sup>Azladza tətəərb anu, ama Zəzagəla asakànula à ahəl la tsəh ala aw, tasəpəràh anu la vədàh, ama takàdanula aw.
- <sup>10</sup>Koksikoksi kà mokfak aña mamətsay aña Yesu uwana aməts kà, aga la anu la vok, ŋgaha sifa aŋha aña mapəhla vok ala la anu la abà la dziriga.
- <sup>11</sup>La madz à ahəŋ gami la abà gesina kà, anu la zlamtsa aña mamətsay aga anu la vok, kà uwana mənəfa Yesu. Vok gami kà guɓguɓ, ama məmətsay dadəŋ aw, ŋgaha uwaga la uwana apəhla à azladza ala kà, Yesu la ahəŋ la sifa.
- <sup>12</sup>Uwaga asal magodəy kà mamətsay aña Yesu adàhà sləray la anu la abà, ama sifa aŋha adàh sləray la akul la abà.
- <sup>13</sup>Tatsetsèr à wakità Zəzagəla à abà, agòd kà: 'Gədiŋ gəl à Sufəl Zəzagəla à vok, kà uwaga à uwana gəpəh gay marabəŋ!' Mədiŋ gəl à Zəzagəla à vok babay kà, kità anu babay kà maz gay marabəŋ.
- <sup>14</sup>Məsəl kà Zəzagəla awùlla Sufəl Yesu Kristu à uda la mamətsay, adàwulla anu à uda babay, kà uwana mədagay tekula la Yesu. Masla la uwana adəpəhla anu ala la huma aña Zəzagəla la gəl aŋha.
- <sup>15</sup>Uwaga gesina kà adapaka vok kà aŋkul, ŋgaha vok mahamay aña Zəzagəla aña mabəz à slaka azladza gesina, ŋgaha kà matugway aña azladza aña mazala vok à gəl kaykay. Kiya uwaga à uwana, azlauwana 'Kikay', tagodəy à Zəzagəla, tasləkaw masla aña maziŋəy.
- <sup>16</sup>Kà uwaga à uwana madzugway gami aruw vok à ahəŋ aw. Məsəl kà vok gami kà agogolay la ŋuv ŋuv, ama sifa uwana Zəzagəla avà à anu kà, aday kəla mavakay la anu la abà.
- <sup>17</sup>La dziriga kà, ŋgərpa uwana lagonay kà, adàdəv à gay vərđi anik, uwanay kà aña disa pəra. La lig aña azlaŋgərpa uwaga la ahəŋ kà, adàdàh anu à mazləbay məŋga uwana à ahəŋ, uwana adàdəv à gay aw kà madegolay azlaŋgərpa uwanay. Mazləbay

uwaga kà, aduwa tatak gesina. Baŋa mædzugway lakəl aŋa mazləbay uwatà kà, ŋgərpa kà bokuba tatak deyday la gay yewdi gami.

<sup>18</sup>Məfa madzugway gami à azlatatak aŋa vədah uwanay à gəl aw, azlatatak uwana mənəŋà atà la vədah kà, tadàdza à ahəŋ aw, ama azlauwana mənəŋa atà aw kà, atà la uwana tadàdza à ahəŋ aŋa koksikoksi.

## 2 Korintiya 5

<sup>1</sup>Məsəl kà, baŋa gày gami aŋa lakana, uwana vok kutso adàkal à ahəŋ kà, gày gami anik la ahəŋ la zagəla uwana Zəzagəla la gəl aŋha la uwana aŋəl. Gày uwatà kà adàdza à ahəŋ aŋa koksikoksi.

<sup>2</sup>Mok uwana la gudəŋ uwanay la vok kà, məbas vok la madzugway la abà, mətuw à gày gami uwatà à tsəh kà mad à agu la zagəla.

<sup>3</sup>Baŋa mədàbəza vok mawga kà, ŋgaha masasədok gami auguzahay kokudà sləb vok aw.

<sup>4</sup>Mok uwana mədza à ahəŋ la vok kutso aləg anu la vok kà mətərəbay, məbas vok, kà huma à gay asà à anu vok uwanay aw, ama asà à anu, kà avà à anu vok mawga, ŋgaha kà vok mawga uwaga adugw vok maviyaga à gay.

<sup>5</sup>Zəzagəla la uwana adəh sləray la anu la abà la gəl aŋha kà uwaga aŋa mapak vok kiya uwanay, avà à anu Masasədok tsikasлага aŋha kà mapəh à anu à vok à abà kà, adəfah dzəba aŋha səla aw aŋha uwana apəh à ahəŋ.

<sup>6</sup>Kà uwaga à uwana, anu mərūw vok à ahəŋ aw. Məsəl kà mok uwana anu la sləb vok uwanay la abà dadəŋ kà, anu kərkər la Sufəl Zəzagəla.

<sup>7</sup>Məslala vok aŋa manəŋ masla dadəŋ aw, ama məda à huma à gay kà la madiŋal gəl à vok.

<sup>8</sup>Ama mədahənla la mabəlafə, ŋgaha asa à anu masak sləb vok uwanay à ahəŋ, kà mad à madz à ahəŋ nekwa la Zəzagəla.

<sup>9</sup>Ama terəŋa dadəŋ kà, asà à anu kà məkəsəl à gəl, amiyaka mədàgay la abanay amiyaka mədàgay la slaka aŋha.

<sup>10</sup>Kà uwana uwaga kà leri gami, kà anu aŋa magay la huma aŋa Kristu, kà madəhla à anu seriya à gəl, kà kəla uwabeyuwi aŋa mabəz humà masik aŋha, lakəl aŋa uwana adəhəŋ gesina, adagay mawisiga, adagay delga, à mok uwana agà la vok uwanay la abà.

<sup>11</sup>Kà uwaga kà, məhoy guba aŋa Sufəl Zəzagəla, ŋgaha məyah mabəz azladza à tsəh, la gay dziriga uwanay məzətəŋ babay. La paraka kà, Zəzagəla asəl anu, ŋgaha gədzugw kà, bə akul la madzugway aŋkul kà, kasəlaw anu babay.

<sup>12</sup>Asà à anu məzləb gəl gami la huma aŋkul aw. Asa à anu kà katsənaw godega aŋa tatak uwana asa à akul masləkawla anu, ŋgaha kà akul aŋa mawulla à azlauwana tadzidziŋ akul, la tatak uwana la vok tanəŋəŋ la uda gà, awkà uwana la ləv la tsəh aw.



<sup>13</sup>Uwana anu azlakusonju, kagodaw kà, kà uwana mēdavà vok gami à Zəzagəla. Ama anu azlakusonju aw, kà uwana asà à anu mazlak akul pəra.

<sup>14</sup>Kristu apəhanula masal aŋha, masal uwaga kà lakəl aŋa sləray gami gesina. La dziriga kà, baŋa dza aməts kà ahəl aŋa azladza gesina kà,

<sup>15</sup>gesina aŋatà kà tagahay kà bokuba azlamamatsay gə. Aməts kà, kà aŋatà, kiya uwaga atà takor sifa la gəl aŋatà aya aw. Ama tadza à ahəŋ la sifa kà, kà ahəl aŋha, aməts babay kà aŋatà, awul à uda la mamətsay bay kà aŋatà.

<sup>16</sup>Tsa baŋa kiya uwanay kà, məkàsàni dza makasay la manərazay huf adi aya zlà ma aw. Uwarà kà, məpakà Kristu ala kà kiya uwaga, ama lagonay kà, mēfahəŋ kiya uwatà aya aw.

<sup>17</sup>Baŋa dza la Kristu la abà kà, adapakay maŋalay mawga, madəhəŋ maviyaga adada à lig, dēwdēw tatak adapaka mawga.

<sup>18</sup>Tatak uwaga gesina kà, atsà à waŋ kà la slaka Zəzagəla, uwana asəlla anu vok la Kristu la abà la masla. Avà à anu sləray à ahəl, kà anu aŋa madla à azladza anik à masəlla atà vok à abà la masla.

<sup>19</sup>Bokuba magodəy kà: Zəzagəla asləl Kristu à waŋ, kà masəlla anu à vok, anu azladza gesina, la masla. Atugw tsakana aŋatà aya aw. Afà anu sləray matsidəyga uwanay à ahəl kà maziŋ à azladza.

<sup>20</sup>Kà uwaga à uwana mēdapakah azlaməna masləlay aŋa Kristu. Zəzagəla azəl azladza la magoy la paŋaw gami la awtəy. Kamkam, mēdov akul kudà, la sləm aŋa Yesu Kristu: 'Kəsàw makəs vok slawda, uwana Zəzagəla adəhəŋ la akul!'

<sup>21</sup>Kristu kà adəhəŋ tsakana tetuwa aw. Ama Zəzagəla adükwla tsakana gami à gəl gesina, kà anu aŋa mabəz vok mahamay la maham gay à vok la Kristu, la uwana Zəzagəla agəŋ anu azladziriga.

## 2 Korintiya 6

<sup>1</sup>Iyay, anu kà anu azlaməna madəh sləray la Zəzagəla, lagwa kà mēgod à akul kà: 'Kabəzàw vok mahamay aŋa Zəzagəla, ama dəhəw haŋkəli kà uwaga aŋa matəfa kà akul aw.'

<sup>2</sup>Tatsetsèr à wakità Zəzagəla à abà, agodə à tsəhay aŋha kà: 'Mok uwana kaslà adaslay kà, gi aŋa madəh delga à azladza kà, gətsəb à ka sləm, ŋgaha la mok uwana kaslà asla kà, mabəl azladza kà gəzlak à ka.' Azladedə, lagonay la uwana kaslà uwana asà à Zəzagəla kà madəha à anu delga, lagonay la uwana asal mabəl azladza.

<sup>3</sup>Asa à anu kà dza atsəd gay à sləray gami à tsəh aw, kà uwaga à uwana mēdəh haŋkəli, kà anu aŋa madəd gay à madiŋal gəl à vok aŋa dza à ahəŋ aw.

<sup>4</sup>Ama la tatak la abà gesina kà, məpəhla ala, kà anu azlaməna sləray aŋa Zəzagəla. Mədəgay la matərebay la abà, mēdəgay la mazaw la gəl la abà amiyaka azlaŋgərpa taduw à anu bay kà, məbasin kiya uwaga pəra.

- <sup>5</sup>Azladza taslahahanula, tawats anu à daŋay, tamaham à anu azladza à gəl. Sləray babay kà aduwa anu, vərđi anik babay kà mədzehahal aw, məbaza tetəvi kà mazuw tatak may babay aw.
- <sup>6</sup>Mapəhla uwaga ala, kà anu azlaməna madāh sləray aŋa Zəzagəla la ləv tekula, məsəl dziriga, anu azlaməna mabasiŋ, anu azlahayhay. La mazlakay aŋa Masasədok tsikaslağa kà, məwoy azladza anik la ləv tekula.
- <sup>7</sup>La maz sayda dziriga, Zəzagəla avà à anu ndzəda aŋha. Maday lela gami kà bokuba kazlaŋa guvəl, uwana məpalla guvəl la huma azlaməna məzam gami, kà mahəlla à ahəŋ.
- <sup>8</sup>Azladza anik tasləkaw anu, ŋgaha azlaanik tapəsew anu babay. Tapəh gay delga lakəl gami, ŋgaha tapəh mawisiga babay aya. Azladza anik tanərəz anu bokuba anu azlaməna fida, baməraka dziriga məpəhay.
- <sup>9</sup>Tanərəz anu kà bokuba tasəl anu aw, ama la dziriga kà, tasəl anu. Tanərəz anu bokuba anu azlamazimnekid, ama anu la sifa. Taslähəhanula, ama taslala vok aŋa makadānula aw.
- <sup>10</sup>Amiyaka mədagay la mazaw la gəl la abà məŋga kà, məda à huma à gay la marabay. Məkor tatak məŋga la gudəŋ uwanay la vok aw, ama aŋuvaw məpak azladza ala kà azlagorobu la tetəvi aŋa Zəzagəla la tsəh. Haday kà, bokuba məkor tatak aw, ama tatak gesina kà, anu məkoray la huma aŋa Zəzagəla.
- <sup>11</sup>Akul azla Korintiya, məpəh à akul uwanay, kà bə la paraka, tatak la ahəŋ məhadəŋ à ahəŋ la tsəh ləv gami aw.
- <sup>12</sup>Anu kà məwoy akul la ləv tekula, ama akul la uwana kawoyaw anu aw.
- <sup>13</sup>Gəpəh à akul gay bokuba akul azlabəza gulo: Dahəwnəŋ bokuba uwana mədāhakullaŋ suwaŋ, pəkwəw ləv aŋkul la paraka.
- <sup>14</sup>Azladza, uwana tasəl Zəzagəla aw kà, kahamaw à sləray à abà akul nna aw, maham gay à vok uwaga kà akəsa vok aw. Kakay dziriga aham gay à vok la mawisiga ma? Kakay udaka aham gay à vok la mələs ma?
- <sup>15</sup>Kakay azla Kristu la seteni taslala vok aŋa matsən vok gay la slaka gə ma? Tsa baŋa kitə ma, kakay masla madiŋal gəl à vok, atsən vok gay la dza uwana adiŋal gəl à vok aw ma?
- <sup>16</sup>Mana ma à uwana aham gay à məŋ gəy Zəzagəla, uwana la sifa à vok, la gəy mazlazlay ma? La dziriga kà, anu kà, anu azlaməŋ gəy aŋa Zəzagəla. Kà uwana Zəzagəla agòd: 'Gədàdza à ahəŋ la tataka aŋatà la abà, gədəgay la atà, gədəgay Zəzagəla aŋatà, tadəgay azladza gulo.'
- <sup>17</sup>Kà uwaga à uwana Sufəl Zəzagəla agòd à azladza aŋha: 'Səw à uda la tataka aŋatà la abà, kadzaw à ahəŋ akul la atà nna aw. Katapaw ahəl à tatak àlähga aŋatà, uwana à vok tadehəŋ aw, kiya uwaga kà, gədəkəs akul.

<sup>18</sup>Gədəpaka Baba aṅkul, akul babay kadàpakaw azlakohana gulo la azladəgam gulo.' Kiya uwaga à uwana Zəzagəla uwana asla à tatak gesina à vok, agòd' à atà.

## 2 Korintiya 7

<sup>1</sup>Azlamanalay gulo, Zəzagəla apəh à anu tatak uwanay à ahəṅ gesina, kà uwaga kà, məgà gəl gami sətaka, məbəd' tatak uwana à uda, adàhànula àläh à vok. Madzugway gami la abà kà say məgay kà azlasətaka aṅa ndzer, kà uwana məsləkaw Zəzagəla.

<sup>2</sup>Wòyàw anu la ləv tekula. Kà uwana mədadāh à mawisiga à dza anik aṅkul à vok aw, mədàtsla matekwid' à dza anik aṅkul aw, ṅgaha kà mədapapat tekula aṅkul à bada à abà babay aw.

<sup>3</sup>Uwana gəpəh kiya uwaga kà, kà mapuwakulla gudzi à gəl kà makəlakulla ziruwì à gəl, kagodāw aw. Awaṅ, bokuba uwana gəgòd' à akul kà, məwoy akul kà aṅuvaw. Tatak la ahəṅ avahanula anina aw. Mədàmətsay, mədàgay la sifa kà anu la slaka gə.

<sup>4</sup>Gənwà akul manaway aw, gi la marabay məṅga kà akul. Gədəsa ṅgərpə məṅga, ama ləv adaval gi à gay aw, bə la uwaga bay kà, gi la marabay məṅga.

<sup>5</sup>Uwana asa à gi mapəhay kà, amiyaka mok uwana mədabəza à Makeduniya kà, məbəza kaslā kà anu aṅa maduw ləv aw. Məgagamàh la azlaṅgərpə anik anik uwana tabəzà anu la azlaslaka gesina. Azladza tadzàh kà magazlay, ṅgaha vok gami bay kà adzà à ahəṅ la huyuk huyuk, guba akàs anu.

<sup>6</sup>Ama Zəzagəla uwana atasläh gay à azladza uwana à ahəṅ, gəl adàkad' atà à vok kà atàsl anu ləv à ahəṅ la mas à waṅ aṅa Titus.

<sup>7</sup>Mas à waṅ aṅha pəra atàsl anu gay à ahəṅ aw, ama masla la uwana apəh à anu gay madzərədāhla aṅkul. Masla la uwana apəh à gi kà katàwàw gi à tsəh kà manəṅəṅ gi babay, ṅgaha bay kà kadzikwàw madəhəṅ aṅkul uwana uwarà, kawàdāw vok à uda, kà mazlak gi babay, uwaga la uwana arəb gi kaykay.

<sup>8</sup>Gəsəl kà, wakità gulo uwana gətsetsèr à akul kà, abək à akul mazaw la gəl la dziriga, naka gədzugway nəma. Ama, dāgəd' à uwali gəgòd' aw, kà uwana gəsəl kà gəbək à akul mazaw la gəl la wakità uwatà, kà aṅa kaslā ṅuv.

<sup>9</sup>Ama lagonay kà, gi la marabay la abà, kà uwana gətsetsèr à akul wakità uwaga, gərabay kà, kà uwana gəbək à akul mazaw à gəl aw, gərabay kà, kà uwana katùwàw lakəl aṅa madəhəṅ mawisiga aṅkul, ṅgaha kà kadapəhaw gay la ləv ala. Mazawla gəl aṅkul kà, apakà kà mawoyəṅ aṅa Zəzagəla, kà akul aṅa mapəh gay la ləv ala, kiya uwaga kà wakità gami adàhakulla mawisiga à vok aw.

<sup>10</sup>Kà uwana baṅa anu la mazaw la gəl uwana la abà, asà à Zəzagəla kà, mazaw la gəl uwaga kà adàla anu à mapəh gay la ləv ala à abà, kiya uwaga kà Zəzagəla atəfà dza la tsakana uwana la abà adàhəṅ. Tsəhay mazaw la gəl uwaga kà, aza anu aw, ama tsəhay mazaw la gəl aṅa azladza gudəṅ à vok uwanay kà adala dza à mamətsay la huma yewdi aṅa Zəzagəla.

<sup>11</sup>Nèhàw uwana Zəzagəla adahàn la mazaw la gəl aṅkul tsi. Nèhàw mabəɖla vok aṅkul tsi, nèhàw maval vok aṅkul la madzugway aṅkul tsi. Lagonay kà, asa à akul mapəhla ala kà kakwesaw kà mawisiga aṅkul kà, kapakahàw vok ləv à gəl kà akul à akul. Guba adakəs akul kà azlatatak uwana adapaka vok lakəl aṅa uwana naka abəzà akul. Asa à akul manəhəṅ gi la iyaw tugwi aya, kavàw vok aṅkul kà madəhəṅ uwana asa à Zəzagəla, ṅgaha kadahàw seriya à mawisiga à gəl, ṅgaha kapəhàwla ala kà kadapallaw ahəl aṅkul la mawisiga la abà.

<sup>12</sup>Gətsetser wakità uwanay kà, kà dza uwana adahà tsakana, baṅaw kà aṅa masla madàh tsakana magay aw. Ama gətsetser uwanay kà, kà masləhakulla sləm ala, kà mapəhla masəlay aṅkul ala kà kawadaw vok à uda la huma Zəzagəla kà aṅami.

<sup>13</sup>Kà uwaga à uwana madəhəṅ akul adzərəɖànula. Iyay, uwana adzərəɖànula kaykay kà uwaga pəra aw. Məràb kaykay kà la manəṅ Titus, uwana agà la marabay, kà uwana akul gesina kà kdzərəɖàwla ləv ala.

<sup>14</sup>Gətsà zlapay lakəl aṅkul la huma aṅha, akul babay kà kakəlàw à gi ziruwi à gəl aw. Uwana məpəh à akul gesina kà dziriga. Kiya uwaga tatak uwana gətsàlla zlapay la huma aṅa Titus kà, agà dziriga, apakà vok kiya uwaga.

<sup>15</sup>Mok uwana adà à awtày à slaka aṅkul kà, kakəsàw masla la ahəl səla, kasləkàwàw gesina aṅkul, kakəsàw gay aṅha. Baṅa adzugway lakəl aṅa uwaga kà, mawoy akul aṅha kà azalà vok à gəl.

<sup>16</sup>Gi la marabay kà akul kà, kà uwana gənawà akul manaway aw.

## 2 Korintiya 8

<sup>1</sup>Azladeda, asa à anu mapəhakulla vok mahamay aṅa Zəzagəla uwana apakà vok la slaka azladza la kutso Makeduniya.

<sup>2</sup>Madiṅal gəl à vok aṅatà kà adzəkà vok kà la matap atà aṅa azlaṅgərpa la afik məṅga, ama bà la uwaga bay kà, tagà la marabay məṅga məṅga, baməraka takor tatak aw babay kà tahamà gay à tatak à vok məṅga.

<sup>3</sup>La dziriga kà, tavà bokuba uwana taslàla vok. Uwana tavà kà, aduwà à vok; kà uwana tavà kà, kà la mawoyəṅ aṅatà.

<sup>4</sup>Kamkam tagòɖ à anu, tadəv à anu kudà kà atà aṅa mabəz tetəvi aṅa mad maham gay à vok aṅa mazlakay à abà babay kà aṅa azlaməna madiṅ gəl à Zəzagəla à vok, la kutso Yahudiya.

<sup>5</sup>Tatak uwana tahàmla gay à vok kà, aduwà madzugway gami uwana mədzùgw. Teraṅa dadəṅ kà tavà vok aṅatà à Sufəl Yesu, ṅgaha takəs kà anu aṅa maham gay à vok babay, uwana Zəzagəla ayàh babay.

<sup>6</sup>Kà uwaga à uwana mədzərəɖà Titus ala kà maf sləm à sləray uwaga, adzəkà la tataka aṅkul la abà, lagwa masla adadəv sləray uwaga à gay la tataka aṅkul à sləray dzəba aṅha səla aw uwaga.

- <sup>7</sup>Akul kà kagaw azlagorobu la azlatatak gesina la abà, akul la madiṅal gəl à vok, la maslay aṅa azlagay anik anik, la maslay la mawad vok à uda, ṅgaha la mawoy anu aṅkul. Asa à anu kà, kà kagaw azlagorobu la sləray uwanay la abà babay.
- <sup>8</sup>Gəpəh à akul uwanay kà, bokuba la leri aw, ama la gay mawad vok à uda aṅa azladza anik, la uwana asa à gi: Magur sətaka aṅa masal aṅkul.
- <sup>9</sup>Kasəlaw vok mahamay aṅa Sufəl gami Yesu Kristu. Masla kà gorobu, ama akəs magay kudà kà akul. Uwana adàhà, uwaga apakà gəl aṅha ala, kà masla kudà kà, kà akul aṅa magay azlagorobu la madiṅal gəl à vok la abà gesina.
- <sup>10</sup>Iyay, uwanay gəpəh à akul kà madzugway aṅa gəl gulo, koksi kà kagaw azlateraṅa la sləray aṅa sili uwaga la abà, lagonay kà. hənàw sləray gə uwana ala.
- <sup>11</sup>Dahàwwàṅ la marabay uwana kadzaw kəla, bokuba uwana kawadaw vok à uda la madzəka, kiya uwaga babay kà wadəw vok à uda kà madəvla à gay, vaw bokuba uwana ndzəda aṅkul aslay.
- <sup>12</sup>Baṅa kawadaw vok ala kà aṅa mav tatak à Zəzagəla la marabay kà, Zəzagəla akəs mavəy aṅkul la ahəl səla, bokuba uwana kakoraw kà mavəy. Ama baṅa tatak la ahəṅ aw kà, Zəzagəla kà asəl.
- <sup>13</sup>Ama asa à gi aṅa magodəy kà, kapakahaw azlaməna kudà magay aw, ṅgaha azladza aṅa mabəz gəl gəgod aw. Ama asa à gi kà kagaw kalkal gesina.
- <sup>14</sup>La kaslā uwanay kà, azlayla vok kazlakaw atà la kudà aṅatà la abà. La huma la gay kà, baṅa kadànwakudà suwəṅ kà, tadəzlak akul. Kiya uwaga la uwana kadəgaw tekula la slaka gə.
- <sup>15</sup>Uwaga kà kalkal la uwana tatsetsèr à wakità à abà: 'Dza uwana ahàmla gay à vok məṅga kà, aduwà vok aw, ṅgaha dza uwana ahàmla gay à vok ṅuv babay kà aslal.' tatsetsèr.
- <sup>16</sup>Kikay, məgod à Zəzagəla uwana avà mabəlafə à Titus kà mazlak akul, bokuba uwana məyàh bay.
- <sup>17</sup>Titus akəs manavay gami kà mawulay à slaka aṅkul. Ama kà uwaga pəra aw, kà mawad vok à uda aṅha à uwana akəs mawulay à slaka aṅkul la gəl aṅha.
- <sup>18</sup>Məsləl à awtəy, atà la deda anik à uwana azlaməna madiṅal gəl à vok tasəl gesina, kà uwana az gay marabəṅ la tetəvi aṅha,
- <sup>19</sup>kà uwaga pəra uwana məsləl à awtəy aw, ama maham à ahəṅ məna madiṅal gəl à vok la uwana akəsàni masla, kà masla aṅa mauguzahay anina, la kaslā uwana mədala sili uwanay à Yahudiya. Sləray delga uwaga adəpəhla mazləbay aṅa Sufəl Zəzagəla ala, ṅgaha adəpəhla ala kà məwoya azladza hadəy.
- <sup>20</sup>Hadəy kà, sili uwana tavà à anu à ahəl kà məṅga, say məfal sləm kà azladza aṅa matsəd anu gay à tsəh lakəl aṅha, la madz à ahəṅ gami la abà babay aw.

<sup>21</sup>Asa à anu madfehəŋ kà uwana delga la huma aŋa Sufəl Zəzagəla, ŋgaha la huma aŋa azladza gesina babay.

<sup>22</sup>Məsləl atà deda anik à tsəh aya. Masla kà mədagur mawad vok à uda aŋha asik dəŋ, ŋgaha mənəŋəŋ kà masla kà azlaka dza. Lagonay kà, asal mazlak akul aya babay, kà uwana afla kà gəl à ahəŋ la akul.

<sup>23</sup>Titus kà, masla kà manalay gulo la sləray la abà, kà masla aŋa mazlak akul. Ama azladza anik səla uwanay tanəfa Titus à awtəy kà, maham à ahəŋ mənə gay Zəzagəla la uwana tasləl atà à awtəy, kà uwana baŋa azladza tanəzəz sləray aŋkul kà, tazləb Zəzagəla la Yesu Kristu.

<sup>24</sup>Pəhəw atà ala mawoy atà aŋkul la ləv tekula, ŋgaha maham à ahəŋ mənə gay Zəzagəla tasləl atà à awtəy aŋa magəđəŋ à afik ndzer, ŋgaha kà atà aŋa masəlay kà azlayla anu mats zlapay la akul la afik, kà uwana məpəh dziriga.

## 2 Korintiya 9

<sup>1</sup>La madzugway gulo la bà kà, gay la ahəŋ aŋa matsetser akul lakəl aŋa mazlakay, uwana tazlakla azlaməna madiŋal gəl à vok la kutso Yahudiya aya aw, kà uwana kasəlaw uwaga gesina.

<sup>2</sup>Gəsəl kà, akul la gəl aŋkul babay kà, asà à akul mazlak atà. Lakəl aŋkul la uwana gəts zlapay la huma azlaməna Makeduniya, la magod à atà: Azladedə la gudəŋ uwana la kutso Akayya kà, tadəh vok à ahəŋ kà dagay koksī, kà mazlak azlaməna madiŋal gəl à vok la Yahudiya. Mawad vok à uda aŋkul uwaga, kà atsənà azladza ala kaykay la tataka aŋatà la abà aya.

<sup>3</sup>Lagonay bay kà, gəsləl azladedə makər uwaga à awtəy, kà maham gay à tatak à vok, bokuba uwana: 'Dahəwwəŋ', gəgod à azladza anik, kà atà aŋa mədəbəza à awtəy kà, kà tatak uwana gətsà zlapay lakəl aŋha kà adəpaka vok.

<sup>4</sup>Agayŋa azlaməna Makeduniya tanəfa gi à awtəy, ŋgaha məbəza akul à vok kà kadəđəhaw vok à ahəŋ aw kà naka aŋidz ahama anu à gəl la huma aŋatà, kà uwana məgod kà mənəwa akul manəway aw, tadəh vok à ahəŋ, məgod kaykayga, ma kakay adəpaka vok la akul ma? Akul babay kà aŋidz adəhama à akul à gəl.

<sup>5</sup>Gədzəgw dziriga kà, azladedə uwaga tatsa vok à awtəy à slaka aŋkul, kà tatak gesina uwana à ahəŋ tavà la ləv tekula. ŋgaha kà, la mok uwana mədədə à awtəy tatak uwaga adəđəh vok à ahəŋ lela, kà bà la dziri kà mavəy la ləv tekula aŋa dza, awkà la leri aw.

<sup>6</sup>Gəpəhakulla la gay la gay la abà uwanay: Dza uwana asləkay ŋuv yewdi kà, adətsəđay babay kà ŋuv yewdi, ama dza uwana asləkay məŋga kà, adətsəđay məŋga babay.

<sup>7</sup>Tsa baŋa kiya uwaga kà, dza avà bokuba uwana ləv aŋha arab kà mavəy. Vəw la ləv tekula awkà la leri aw, kà uwana Zəzagəla arabay lakəl aŋa dza, uwana avəy la marabay, ŋgaha la ləv tekula.

<sup>8</sup>Zəzagəla la maslay kà mav à akul tatak gesina, kà akul aña mabəz kəla tatak, uwana kanawkuḏa aña gesina, ɲgaha atəm akul à ahàl aya aña madàhla sləray dzəba aña səla aw gà kiya uwanay.

<sup>9</sup>Uwaga kà bokuba uwana tatsetsèr à wakità Zəzagəla à abà: 'Dza delga av tatak à azlaməna kuḏa la ləv tekula. Mawoy dza aña kà, aga la ahəŋ koksikoksi.'

<sup>10</sup>Zəzagəla la uwana masla mav fofulo à masla masləkay, ɲgaha la tatak may aña madzadzarla akul. Adavà à akul fofulo gesina uwana kanawkuḏa aña, ahənəŋ kà fofulo masigla, ɲgaha masəl dza aŋkul aña magay məŋga.

<sup>11</sup>Adəpis akul gay à vok la tatak gesina la abà kà masəl dza aŋkul, ɲgaha azladza aŋuvaw aña 'Kikay', kà magoḏ à Zəzagəla, kà sili uwanay kafaw anu à ahàl, mədala.

<sup>12</sup>Ndzer, mavəy aŋkul uwanay kà, adəzlaka azladza aŋuvaw la sləray aña Zəzagəla la abà. Ama uwana aduwa uwaga kà, 'Kikay', azladza aŋuvaw tadəgoḏ à Zəzagəla.

<sup>13</sup>Kà uwana mavəy uwanay kà, adəpəhla madz à ahəŋ dziriga aŋkul ala, kiya uwaga kà, azladza tadəsləkaw Sufəl Zəzagəla, kà uwana kakəsaw mapəhay aña gay marabəŋ aña Yesu Kristu, ɲgaha tadəsləkaway aya kà masəl dza aŋkul, uwana katsakaw tatak la slaka gà la azladza gesina.

<sup>14</sup>La mok uwana tadənəŋ vok mahamay aña Zəzagəla adəgay məŋga lakəl aŋkul kà, tadədəv kuḏa kà aŋkul, ɲgaha tadəwoy akul məŋga.

<sup>15</sup>Lakəl aña uwanay gesina kà, 'Kikay', məgoḏ à Zəzagəla kà mavəy aña, uwana aduwa vok gesina.

## 2 Korintiya 10

<sup>1</sup>Gi Pol la uwana asa à gi mapəh à akul gay aña aslasl gəl gulo lagwa, azladza anik kà: 'Gi tələmma à baña gi la tataka aŋatà la abà', tagoḏ, ama: 'Gi dzaŋdzaŋ', tagoḏ, 'A baña gi kərkər la atà.' Kamkam gədəv à akul kuḏa la sləm aña Yesu Kristu à masla uwana tələmma, ɲgaha dziriga.

<sup>2</sup>Kamkam bədəwla madzugway aŋkul kadəfaw gi leri à gəl, kà gi aña madəpəhla à akul ala ndzəḏa gulo à baña gədàda à awtəy à slaka aŋkul aw. Kà uwana aŋuvaw azladza la slaka aŋkul tagoḏ kà, gədəh sləray kà bokuba aña dza uwana asəl Zəzagəla aw, tasəl kà, gəsla kà mapəhatàla ndzəḏa gulo nəma.

<sup>3</sup>La dziri kà, anu kà anu azladza asik nəma pəra, ama məpay kiya aña azladza asik aw, say la tetəvi aña Zəzagəla la tsəh.

<sup>4</sup>Kà uwana kazlaña guvəl uwana məpala guvəl kà aña sləb vok aw. Ama kazlaña guvəl aña Zəzagəla, uwana la ndzəḏa. La masla la uwana məbazlähla azlazlagam uwana à ahəŋ, azlaməna mazam aña Zəzagəla tahədəh vok à abà, ɲgaha la azlamadzugway fidaga aña azladza gesina.

- <sup>5</sup>Uwana dza atsalla zlapay lakəl aṅa matsihila aṅa Zəzagəla kà, mədàkwəṅ à ahəṅ gesina, mədàtsərkwah azlamadzugway mawisiga aṅa azladza gesina aṅa makəs gay aṅa Kristu.
- <sup>6</sup>Anu kà mədàdāh vok à ahəṅ kà matsərkwəh azlauwana takəs gay aw, à baṅa akul kà akul azlaməna makəs dziriga aṅa Zəzagəla.
- <sup>7</sup>Nərèzàw dadəṅ tsi. Baṅa dza afa gəl aṅha à azladza aṅa Kristu à adi kà, say adzugway lela kəla zlà, kà uwana anu babay kà, anu azladza aṅa Kristu.
- <sup>8</sup>Ndzer, kà uwana ziruwi akəs gi aw, gədats zlapay la Sufəl Yesu Kristu kà, kà uwana masla la uwana avà à gi ndzəfà, kà madla akul à huma à gay la madiṅal gəl à vok la abà, awkà kà mazàhakulla aw.
- <sup>9</sup>Ama asa à gi kà kadzugwaw kà gətəw akul la wakità gulo aw,
- <sup>10</sup>kà uwana azladza aṅuvaw tagof kà, wakità aṅa Pol kà zlazladà ṅgaha dzaṅdzaṅ. Ama baṅa gəl masla la tataka gami la abà kà, arùw vok à ahəṅ, asəl mapəh gay aw.
- <sup>11</sup>Dza uwana adzugw kiya uwaga kà, aganay à uwana gəpəhal: Tatak gesina uwana gətsetsèr à akul kà, gədəpəh à akul aya, à mok uwana gədəgay la tataka aṅkul la abà.
- <sup>12</sup>La dziriga kà, məslala vok aṅa magazləla gəl gami la azlaməna mazigən gəl aṅatà, uwana tagur gəl aṅatà kà la aslasl gəl aṅatà aw, uwana tagur gəl aṅatà kà la aslasl gəl aṅatà kà azlakusonju.
- <sup>13</sup>Ama anu kà, mətə zlapay kiya uwaga aw, anu kà mədūw makwi uwana Zəzagəla akədəv à anu à ahəṅ aw. Abəzla anu à slaka aṅkul la gay marabəṅ aṅa Yesu Kristu, uwaga la uwana makwi aṅa sləray gami.
- <sup>14</sup>Baṅa kità kà, mədūwla makwi aw, kà uwana la dziriga məbəzàwəṅ kà la tetəvi aṅa gay marabəṅ lakəl aṅa Yesu Kristu.
- <sup>15</sup>Ama anu kà, mətə zlapay lakəl aṅa azladza anik uwana tadzəkà aw, kà uwana uwaga kà gay gami aw. Ama kəla kà, madzugway gami kà, kadàw à huma à gay la madiṅal gəl à Yesu à vok la abà, ṅgaha kà sləray gami, uwana la tataka aṅkul la abà aṅa mad à huma à gay, la makwi gami uwana la abà Zəzagəla akədəv à anu à ahəṅ babay.
- <sup>16</sup>Zlahaw la huma la gay kà, mədàbəza tetəvi kà maz gay marabəṅ à kutso anik, uwana la abà kərkər la akul. Uwaga kà məslala vok aṅa mats zlapay la slaka uwatà aw, kà uwana slaka uwatà adagay guf aṅa dza anik.
- <sup>17</sup>Ama bokuba uwanay à uwana tatsetsèr à wakità Zəzagəla à abà: 'Baṅa dza asal mats zlapay kà, atsa zlapay kà la azlatatak uwana Sufəl adahəṅ kəla.'
- <sup>18</sup>Iyay ndzer kà, dza agay masəlay gà la huma aṅa Sufəl kà, kà uwana Zəzagəla awoyà masla, awkà la mazləb gəl aṅha la gəl aṅha aw.

## 2 Korintiya 11



- <sup>1</sup>Lagwa kà, asa à gi kà basàwgeṅ, kavàw à gi tetəvi gəbadma ṅuv makusoṅu kusoṅu gulo uwatà. La kità kà, kamkam basàwgeṅ.
- <sup>2</sup>Maṅor aza à gi lakəl aṅa akul, azlauwana tavavàr akul bokuba uwana azà à Zəzagəla, kà uwana gədadà akul mawdà à ahəṅ la Kristu, ṅgaha asa à gi kà kadzaw à ahəṅ la sətaka, kà gi aṅa mapəhla akul ala, kiya dahalay uwana tavà à zil sətaka.
- <sup>3</sup>Gi la guba vok la abà, kà uwana gədzugway lakəl aṅkul, kà dza aṅa marəhla akul à uda, kà masak à Yesu Kristu la tsəh ala aw. Dzùgwàw lakəl aṅa uwana bebi asà à waṅ arəhèla Hawwa à uda la dəmdəm aṅha tsi.
- <sup>4</sup>Baṅa masla matapla fidaga anik asà à waṅ à slaka aṅkul, kà mapəhakulla Yesu anik, gərgər la uwana məzàkuləṅ, ayyà kagodāw. Ama masasədok uwana apəhay kà uwaga kà, masasədok Zəzagəla uwana kabəzàwwal uwarà aw, ṅgaha babay kà, azəṅ kà gay marabəṅ uwana kadiṅàwwal gəl à vok aw. Ama bà la uwaga kà katsəbàwwal sləm!
- <sup>5</sup>La madzugway aṅkul la abà kà, dza uwanay kà: 'Məṅ dza' kagodāw, ndzer. Ama la dziriga kà, aduwa gi aw.
- <sup>6</sup>Iyay, zlahaw kà gəsəl mabadma kiya aṅha aw. Ama kà aṅa dza haṅkəliga kà, gi la haṅkəli, kà uwana asik dəṅ dəṅ, gədapəh à akul uwaga la dazuwaya.
- <sup>7</sup>Dagay uwarà, mok uwana gəzəkulla gay marabəṅ aṅa Zəzagəla kà, gənəv akul tatak bà ṅuv babay aw. Gəzìgənà gəl aw, kà uwana asa à gi kà akul kazìgənàw, gəgod. Dṅaha ma uwaga ma, gədəhəṅ ma mawisiga takay?
- <sup>8</sup>Mok uwana gədəh sləray la tataka aṅkul la abà kà, gəbazà à tatak uwana gənukudà aṅha la slaka aṅa azladza gudəṅ anik ndzer, gədàla atà à kudà à abà kà akul.
- <sup>9</sup>Mok uwana gi anina la abà gə kà, gəfà mahanay à dza anik aṅkul à gəl aw, kà uwana azladedə məna madiṅal gəl à vok dagay la Makeduniya tanaṅàh à gi à adi la kudà gulo la abà, kà uwana asà à gi maf à akul mahanay à gəl aw, bà tsəràh à huma à gay babay kà, asà à gi tetuwa aw.
- <sup>10</sup>La dziriga kà, gəgod à akul kà, gi la madəf gay ləv, kà uwana gəfà tatak aṅkul à gay, aṅkul uwana la kutso Akayya tetuwa aw. La dziriga kà, fida gəpəh aw, kà uwana Kristu la gi la abà ṅgaha masla kà fida aw.
- <sup>11</sup>Kà mana à uwana apəh uwaga mi kagodāw takay? Kà uwana gəwoya akul aw, kagodāw ay? Awaṅ! Zəzagəla kà asəl kà, gəwoya akul la ləv tekula.
- <sup>12</sup>Lagonay kà, gəda à huma à gay la madəhəṅ kiya uwaga, kà maham aṅidz à azlaməna matapla fida gə uwaga à gəl, uwana asa à atà mazəb à anu humà ala, la mazləb gəl aṅatà, ṅgaha kà atà aṅa masəlay kà sləray gami kà gərgər la aṅatà.
- <sup>13</sup>Kà uwana atà kà, azlaməna masləlay dziriga aw, azlaməna fida, ṅgaha azladəmdəm uwana tapəkàh gəl aṅatà ala bokuba azlaməna masləlay dziriga aṅa Kristu.
- <sup>14</sup>Uwaga kà nadzipo aw, kà uwana seteni babay kà, apaka gəl aṅha ala kà malika aṅa udàka.

- 15**Uwaga kà, apaka tatak maval anu ləv à gay aw, à baŋa azlaməna sləray aŋha tagoday kà: 'Anu azlaməna masləlay dziriga'. Ama la vud makəf gəl à ahəŋ kà, tadàbəza seriya kəla aŋa sləray aŋatà uwana tadàhəŋ.
- 16**Bà gotənaŋ gəpəhay aya, asa à gi kà dza aŋa manərəz gi bokuba gi kusoŋu aw. Ama baŋa asa à akul kà aŋa mapakgəla kiya kusoŋu, kità zlà kà, fəw à gi à ahəŋ bokuba gi kusoŋu, kà gi aŋa mats zlapay makusoŋu kusoŋu suwaŋ zlà.
- 17**La dziriga kà, uwana gəpəh la abanay kà, mapəhay aŋa Sufəl aw. Baŋa gədəkəs mats zlapay, gəbafma makusoŋu kusoŋu zlà.
- 18**Tsa azladza aŋuvaw tats zlapay kà azlatatak uwana la gudəŋ uwanay la vok kà, tsa kətà gi babay kà, gəts zlapay suwaŋ kiya aŋatà.
- 19**'Anu kà anu azlaməna haŋkəli', kagodaw, kà uwaga à uwana kabasawwaŋ azlakusoŋu aw ay!
- 20**Iyay, akul kà kakəsaw kà azladza tafa à akul asik à gəl, bokuba akul azlamayà, tazaw akul à gay tsərəh à aslasl adi, takad à akul dəmdəm à gəl, tapəsew akul ŋgaha tadafa à akul ahəl à gəl, tatərəb akul.
- 21**Haday, la dziriga kà, aŋidz ahama gi à gəl kà mapəhay kiya uwaga, ndzer kà, gi guḡguḡ. Ama lagonay kà, tsa aŋidz aham azladza à gəl aŋa mapəhay makusoŋu kusoŋu aw, kà gi babay kà, kità gədəpəhay suwaŋ.
- 22**Tadagay azla Ibəranəŋkowen, gi babay kà bà gi atà, tadagay azla Isərayel, gi babay bà gi atà aya, tadagay mayyi à tsəh ala aŋa Abəraham, gi babay kà bà gi mayyi à tsəh ala aŋha suwaŋ, ŋgaha ma taduwa gi ma la mana zlà ma?
- 23**'Anu azlaməna sləray aŋa Yesu Kristu', tagod. Gi babay kà, gədàh sləray aŋha bay, gədàh sləray uwaga la maduwa atà aya. Iyay, uwaga gəpəhay kà, kamkam bokuba gəl à gi la vok aya aw. Ama ndzer kà, gədàh sləray dəduwa à atà zewk à zewk, tadaw gi à daŋay dəduwa à atà. Tazlabəh gi dəduwa à atà, mamətsay kà gi gəuzuzəhla kà la gay gəl ahəl.
- 24**Asik zlo azlamasiga aŋa azla Yahudiya taslāhgəla la kurpi, kəla maslahgəla kà, tapəs gi la kurpi dzik makər gəl aŋha ladəga, ladəga.
- 25**Asik makər azla Rom tazlāb gi la azəva. Tatsəh gi la akur kà makəf gi asik tekula. Asik makər kəslah iyaw aguwaŋhgəla à gəl à abà aya. Asik tekula gəvək à iyaw à abà gəhən à abà.
- 26**La mauguzahay gulo uwana la abà, aŋuvaw kà gəsəh ŋgərpa la azlamukwà la abà, la ahəl aŋa azlaməna gəna, la ahəl aŋa azlatsəhay anik anik, amiyaka bà la ahəl aŋa tsəhay gulo babay. Gəsəh ŋgərpa la azlaslaka gesina, la azlahud gudəŋ gesina la abà, ŋgaha la ahəl aŋa azlauwana: 'Anu azladeda aŋak', tagod à gi, ama kà aŋa gay gə.
- 27**Gədàhəh sləray dəgdəgga tsərəh à uwana naka gəməts à abà, bà madzəhal babay kà, gədzəhəhəl aw. Gəbàz tatak may la tatak masay aw, zwek à zwek gəkəs nəlay, anasl akədàh gi, kà uwana gəgəh la vok deyday.

<sup>28</sup>Dodfegi kà, azlatatak anik anik la ahəŋ babay kà, gəslala vok aŋa matugw uwaga à uda aya aw. Ama tatak tekula la ahəŋ atəŋəb gi kəla mavakay: Gi la madzugway la abà kà lakəl aŋa azlaməna madiŋal gəl à vok la kəla maham à ahəŋ məna gay Zəzagəla, kà masla gə.

<sup>29</sup>Magay guɓguɓ aŋa dza kà, apakgəla kà guɓguɓ suwaŋ. Baŋa dza atəf à tsakana à abà kà, ləv aza à gi məŋga.

<sup>30</sup>Azlayla vok kà gəts zlapay, ama kəla kà, gəts zlapay kà lakəl aŋa tatak uwana apəhla guɓguɓ gulo ala.

<sup>31</sup>La haɗay kà, Zəzagəla Baba aŋa Sufəl gami Yesu Kristu asəl kà gədàh fida aw, mazləbay agay kà la masla koksikoksi.

<sup>32</sup>Mok uwana gi la Damas kà, lawan aŋa məŋ sufəl Aretas, abàk azladza à gay gamagay aŋa huɗ gudəŋ gesina, kà atà aŋa makəs gi.

<sup>33</sup>Ama la abatà kà, azladedda anik tafà gi à takosà à abà, tadzilà gi à ahəŋ la gəl zlagam uwana takəsla gay à huɗ gudəŋ à adi. Kiya uwaga la uwana gətəf la ahəl aŋatà.

## 2 Korintiya 12

<sup>1</sup>Amiyaka bà akəsa vok la slaka azladza aw, babay kà say gəts zlapay kà mapəhay lakəl aŋa tatak uwana Sufəl apəhgəla ŋgaha la azlauwana masesiŋay apəh à gi gesina.

<sup>2</sup>Gəsəl masla madiŋal gəl à vok anik uwana la Kristu la abà, dagay uwatà kà adadàh mavay kulo gəl aŋha ufaɗ, masla kà ahəd à zagəla mamakər matsekakaday gə uwatà à afik. (Adà à afik ma la sləb vok kà, à bi masesiŋay pəra asasiŋla à məŋga kà, gəsəl aw, say Zəzagəla kokudà gəl aŋha pəra asəl)

<sup>3</sup>La dziriga kà, dza uwatà kà ahəd kà à slaka mazləbay uwana à abà la slaka Zəzagəla. (Bi la sləb vok à uwana Sufəl adala masla à abà kà, gəsəl aw, masla masəl uwaga kà say Zəzagəla pəra)

<sup>4</sup>La abatà la uwana atsanà azlagay nasiriga, uwana azladza taslala vok aŋa mabəɗal à tsəh aw, uwaga kà tetəvi la ahəŋ kà aŋa dza la sləb vok aŋa mapəhay babay aw.

<sup>5</sup>Lakəl aŋa dza uwatà la uwana gəts zlapay, awkà la ndzəɗa aŋa gəl gulo aw. Kiya uwaga la uwana kà, gəpəhla guɓguɓ gulo ala.

<sup>6</sup>Baŋa asa à gi mats zlapay aw, gəhəl à ahəŋ kà uwaga, kà uwana asa à gi kà, dza asləkaw gi lakəl aŋa tatak uwana anəŋəŋ la uwana atsənəŋ la slaka gulo aw.

<sup>7</sup>Naka azlayla gi gətsa zlapay, kà uwana Zəzagəla apəh à gi azlatatak dzəɓa aŋha səla aw gə aŋuvaw. Kiya uwaga babay kà avà à gi tatak anik aya, uwana azà à gi, kà gi aŋa magay zlapay aw. Tatak uwaga kà Zəzagəla agòlla la ahəl aŋa seteni kà matsəhla gi yəs kà gi aŋa magay zlapay aw.

<sup>8</sup>Asik makər gədəv kudà à Sufəl Zəzagəla lakəl aŋa dɩvats uwaga, kà masla aŋa mapəlgəla la uwaga la abà.

<sup>9</sup>Ama masla awùlgəla agòd: 'Vok mahamay gulo kà diga kà aṅak gesina. Mok uwana kak guḅguḅ kà, ndzəda gulo adàhà sləray la kak la abà.' Lagonay kà, gi la marabay kà mabas guḅguḅ gulo kà uwana ndzəda aṅa Kristu la gi la abà.

<sup>10</sup>Kà uwaga à uwana, gəvalàh à zagəla lakəl aṅa guḅguḅ gulo, amiyaka azladza tatsək à gi magodàhay à gəl, tatərab gi babay kà, gəbasiṅ kà Kristu. Baṅa azlamatərabay anik la mazaw la gəl tawàdàh gi à ahəṅ kà, la mok uwatà la uwana gəbəza ndzəda.

<sup>11</sup>La dziriga kà, gəpəh kà gay makusoṅu kusoṅu, ama akul la uwana kafaw gi gasa à gəl aṅa mapəhay kiya uwaga. Kà uwana naka akul la uwana katsàw zləbàw gi, amiyaka bə gədagay tatak aw, babay kà azlaməna masləlay mawga uwaga kà tadūw gi la magay nəma aw.

<sup>12</sup>Sləray uwana apəhla ala kà gi masləlay kà, adàhàhà vok la tataka aṅkul la abà, gəpəhakulla la mabasiṅ uwana akəd gəl à ahəṅ aw, gədàhàhà azlanadzipo la azlatsəhay tatak anik anik, uwana la ndzəda gesina la huma aṅkul.

<sup>13</sup>Awma tatak anik la ahəṅ gəfahəṅ à azlaməna masla gay Zəzagəla anik, masla gəfahəkulləṅ aw takay? 'Vàw gi tatak', gəgod à akul magay aw: 'Basəwgəṅ kamkam!'

<sup>14</sup>Lagwa kà, gəzlàda à awtəy à slaka aṅkul ka mamakər adagay. Baṅa gədàda à awtəy kà, gədàfa à akul mahanay à gəl aw. Akul la uwana gəyàh akul awkà sili aṅkul aw. La haday gə kà, azlabəza la uwana tadzadzar baba aw, ama baba la uwana adzadzar azlabəza.

<sup>15</sup>Gi kà la marabay, gəvə à tatak uwana gəkoray gesina, adagay aslasl gəl gulo babay, kà gi aṅa mazlak akul. Lagwa ma katetuwwaw mawoy gi, à kà uwana gəwoya akul kaykay takay?

<sup>16</sup>Gəfa à akul mahanay à gəl aw gadzewi la abà aw. Zlahaw kà, dza gə agod à akul kà, gəfahəkulla dēmdēm à vok, la mabəz akul à tsəh, la dabaray agodəy kà, haday zlə ma aw.

<sup>17</sup>Azladza gulo uwana gəslàlah atà à awtəy ma, tazawəh akul à uda kəla ay?

<sup>18</sup>Gəsləl Titus la azladedə anik à slaka aṅkul. Lagwa ma, Titus la uwana azūw akul à uda zlə ma ay? Tsa, gəgod kà, anu səla kà mədàh sləray kà tekula, madzugway la manəfay gami kà tsa tekula ma, kakay zlə ma aw gə ma?

<sup>19</sup>Zlahaw dagay uwarə kà akul la madzugway uwaga, 'Asa à anu matsad gəl gami ala la huma aṅkul', kagodaw. Awaṅ! Kiya uwaga aw. Məpəh uwaga kà la dziriga aṅa Zəzagəla, kà uwana anu azlaaṅa Kristu. Azladedə gami, uwana məwoya akul uwaga gesina kà, kà uwana asa à anu kazigəṅaw la madiṅal gəl à vok la abà.

<sup>20</sup>Guba aza à gi kà, kà mok uwana gədàda à awtəy à slaka akul babay, kadənəṅaw gi bokuba uwana kayahaw babay kəla. Guba aza à gi, kà mabəz akul à gəl la magazlay, la maṅor, la mapak ləv, la matsən vok a gay aw, la azlagay wadzaw wadzawga, la azlakaskas, la azlazlapay ṅgaha la azlamasàh gəl anik anik la abà gesina, à uwana asa à gi aw.

<sup>21</sup>Baṅa gədàda à awtày kà, asa à gi kà Zəzagəla gulo awulgəla gəl à vədàh, kà gi aṅa matuway lakəl aṅa azlaməna madz à ahəṅ la tsakana la abà, kà uwana, la haday gà kà, tapəh gay la ləv ala aw. Tasak tatak mawisiga la tsəh ala aw, tadàh mabila la dèwdèw tatak mawisiga.

## 2 Korintiya 13

<sup>1</sup>Mamakər aṅha la uwaga gəda à awtày à slaka aṅkul. Iyay, bokuba uwana tatsetsər à wakità Zəzagəla à abà kà: 'Kəla dza uwana apuw gudzi kà, say agay la azlaməna sayda səla baṅaw makər.'

<sup>2</sup>Gay aṅa mapəh à azladza uwana à vok à abà tadàhəṅ tsakana la tataka aṅkul la abà, ṅgaha azlamatəm à ahəṅ gə gesina kà, gəpəh à akul bokuba uwana gəpəh à akul dagay la madzəka à mok, uwana gəgə la slaka akul kà masəla. Baṅa gədàda à awtày kà, gədàdaha à atà seriya à gəl la paraka.

<sup>3</sup>Kiya uwaga kadàbəzaw sayda uwana kayahaw. Kasəlaw kà Kristu apəh gay la gi la abà təga aw uwa. Ḳgaha sələw kà, Kristu uwana adàh sləray la tataka aṅkul la abà kà, guḅguḅ aw, ama apəhla maslay aṅha ala la akul la abà.

<sup>4</sup>La mok uwana tatatəsl à ahəf à adi kà, la mok uwatə kà, agə guḅguḅ. Ama lagwa kà, aga la ahəṅ la sifa kà ndzəda aṅa Zəzagəla. Kà maham gay à vok gami la Kristu, anu bay kà anu azlaguḅguḅ, ama kà maslay aṅha kà anu la sifa bay, ṅgaha la mok uwana mədàda à awtày la slaka aṅkul kà, mədàdàh sləray la maslay aṅa Zəzagəla.

<sup>5</sup>Lagonay kà gùrəw gəl aṅkul dən zlà. Akul la madiṅal gəl à vok la abà nəma ay? Say kasəlaw uwaga la aslasl gəl aṅkul: Kasəlaw ma, Yesu Kristu ma aga la akul la abà nəma ay? Tsa baṅa kitə aw kà, kazawla.

<sup>6</sup>Ama la haday kà, baṅa akul kagəfəwwan aṅha kà kadiṅaw gəl à Yesu à vok kà, gəsəl la dziriga kà, kadəsəlaw kà anu azlaməna masləlay aṅa Kristu haday.

<sup>7</sup>Mədəv kudà à Zəzagəla kà akul aṅa madàh mawisiga aw. 'Ama məyah magəf dziriga gami à aṅha pəra', kagəfəw aw. Awan, ama kəla kà, asa à anu kadàhawwan kà say uwana akəs à vok pəra, amiyaka məsəla kà madàh delga babay aw.

<sup>8</sup>Anu kà məsəla vok aṅa matsak dziriga aṅa Zəzagəla à ama aw, say mədza à ahəṅ kà, kà ahəl aṅha pəra.

<sup>9</sup>Anu kà, anu la marabay à baṅa anu azlaguḅguḅ, ṅgaha akul la ndzəda. Kà uwaga à uwana mədəv kudà à Zəzagəla, kà masəla aṅa mapakakulla kà azlazil.

<sup>10</sup>Wakità uwanay gətsetser kà, la mok uwana gələg mabəz à slaka aṅkul dadəṅ. Kà uwana baṅa gədàda à awtày kà, asa à gi aṅa matsətsəhakulla la gay dzaṅdzaṅga aw. Kà uwana Sufəl Zəzagəla avà à gi ndzəda aṅha kà makaləhla akul à vədàh aw, ama say kà matsizilla akul ala pəra.

<sup>11</sup>Iyay zlà azladedə, lagonay kà: 'Dzəw à ahəṅ wurwur zlà', gəgəf à akul. 'Gəw azlamahanay gə la tetəvi aṅa Zəzagəla la tsəh, kəsəw gay gulo uwana gəpəh à akul,

tsènàw vok gay, dzàw à ahəŋ la lapiya la abà, kà Zəzagəla uwana awoya dza, ŋgaha avàh lapiya, adza à ahəŋ la akul la abà aŋa tsəràh à awtày!’

**12**Dahàw vok 'Ayyi', kà akul à akul, la ləv tekula! 'Ayyi!' azlaməna madiŋal gəl à vok la abanay gesina tagod à akul.

**13**Vok mahamay aŋa Sufəl gami Yesu Kristu, la masal aŋa Zəzagəla, ŋgaha la maham gay à vok aŋa Masasədök Zəzagəla agay la akul gesina.

## Galatiya

### Galatiya 1

- <sup>1</sup>Wakità uwanay asa à uda kà la ahàl gulo à gi Pol, maslèlay aña Yesu Kristu. Dza asik taslèl gi aw. Zəzagəla Baba, uwana awùlla Yesu Kristu à uda la mamətsay, la Yesu Kristu la gəl aña, la uwana taslèl gi.
- <sup>2</sup>Gi la azladedə uwana la abanay gesina, 'Ayyi', məgod à akul, akul azlaməna masla madijal gəl à vok la kutso Galatiya gesina.
- <sup>3</sup>Zəzagəla Baba gami, la Sufəl Yesu Kristu tavà à akul vok mahamay, la lapiya.
- <sup>4</sup>Yesu Kristu avà sifa aña kà tsakana gami, ngaha kà Zəzagəla aña mamatsinəŋla. Kà tatak mawisiga aña gudəŋ à vok uwanay aña magay la ndzəda lakəl gami aw. Adəhəŋ kiya uwana asa à Baba Zəzagəla kà madəhəŋ.
- <sup>5</sup>Mazləbay agay la Zəzagəla aña koksikoksi. Amen.
- <sup>6</sup>Kà kadəw gi gəl à vok. Zəzagəla azalà akul la vok mahamay, kà akul aña magay azlaaŋha. Ama katskats kasəkəw uwaga la tsəh ala, kanəfaw tetəvi anik uwana: 'Delga kà la uwatà', kagodəw.
- <sup>7</sup>La dziriga kà, tetəvi delga anik la ahəŋ aw. Ama azladza anik la ahəŋ, à uwana takəd akul ala gəl vok. Tayəh mabəda gay marabəŋ aña Kristu kiga.
- <sup>8</sup>Baŋa dza anik azakulla gay marabəŋ gərgər, la uwana məzəkulləŋ kà, masla kà matsaflaga la slaka Zəzagəla. Adagay anu, adagay malika anik uwana asa à ahəŋ la zagəla bay.
- <sup>9</sup>Mədapəh à akul təga aw kà, lagonay gəwulla akul ala à tsəh aya: Baŋa dza azakulla gay marabəŋ gərgər la uwanay məpəhakulla ala kà, Zəzagəla asafla ala seriya à gəl.
- <sup>10</sup>Hadəy, la matsetser gay uwanay kà, asa à gi kà, azladza tazləb gi aw. Asa à gi, kà Zəzagəla pəra azləb gi. Awma kadzugwaw ma, kà gi aña mahəf azladza à adi takay? Awaŋ, agay asa à gi kà azladza aña mazləb gi kà, naka gəgay masla sləray aña Kristu aw.
- <sup>11</sup>Azladedə gulo, asa à gi məpəhakulla ala la paraka kà, gay marabəŋ uwana gəzəkulləŋ kà, aguwa à waŋ la slaka dza asik aw.
- <sup>12</sup>Gəbəza uwaga la slaka dza aw, dza atəpgəla uwaga babay aw. Ama Yesu Kristu la uwana apəhgəla, ngaha afətəgəla uwaga à ama ala.
- <sup>13</sup>Kasəlaw madz à ahəŋ aña uwarə gulo, à mok uwana gənəfa tsəhay manəfay aña azla masla Yahudiya. La kaslə uwatà la uwana, gətərbəhə azlaməna gay Zəzagəla kaykay. Gəyəh mazəh atə ala gesina.
- <sup>14</sup>Gənəfə məpəhay aña makoray, ngaha la məpəhay aña azlababa gami madzidziga la ləv tekula, dādūwa à gay azlamanalay gulo gesina.

- <sup>15</sup>Ama vok ahamà à Zəzagəla, akəsà gi dagay uwana taləg mayyi gi. Azala gi, kà gi aṇa madàhla sləray, bokuba uwana akəsàl à gəl.
- <sup>16</sup>Kiya uwaga apəhgəla Kona aṇha, kà gi aṇa maz gay aṇha la tataka azladza uwana azla Yahudiya aw. La kaslà uwatà kà, gəhàd à slaka dza kà manav matsihila la slaka aṇha aw.
- <sup>17</sup>La kità, gəhàd à Urusalima babay, kà madz à ahəṇ la azlaməna masləlay teraṇa à gi aw, ama gəvə vok kà mapiyay kà à kutso Arabiya, dagay la abatà la uwana gəwùl à Damas.
- <sup>18</sup>Uwana mavay makər adada à lig kà, gəwùl à Urusalima kà gi aṇa manəṇ à Piyer à gay. Kasukwa səla mədza à ahəṇ anu səla pəra.
- <sup>19</sup>La abatà kà, gənəṇà azlaməna masləlay anik aw, say Yakuba à deda aṇa Sufəl Yesu pəra.
- <sup>20</sup>Uwanay gətsetser akul kà fida la abà aw, Zəzagəla asəl kà gəfàh uwaga aw.
- <sup>21</sup>La lig aṇa uwaga la ahəṇ, gəhàd, gəuguzàh la kutso aṇa Səriya, ṅgaha la Səlisəya.
- <sup>22</sup>La mok uwaga, azlaməna madiṇ gəl à Kristu à vok la makoray aṇa Yahudiya, tasəl huđ adi gulo dadəṇ aw.
- <sup>23</sup>Tatsənəṇ kà uwana azladza tapəhay pəra: 'Kay, masla matərəbàh anu uwana uwarà, lagwa kà, masla az madiṇal gəl à vok, uwana lakəl aṇa Yesu à azladza adagay, kay kà, ayàh mabəzləṇ à abà uwarà.'
- <sup>24</sup>Kà uwaga kà, tazlèbà Zəzagəla kà azlatatak uwana gəfahəṇ.

## Galatiya 2

- <sup>1</sup>Kiya uwaga à uwana, mavay kulo gəl aṇha ufađ adada à lig, gəwùl à Urusalima aya, Barnabas anəfà gi, ṅgaha gəkəs Titus à tsəh aya babay.
- <sup>2</sup>Gəwùl à abatà kà, kà uwana Zəzagəla agòđ à gi: 'Hàd à abatà.' Məhamà gay à vok kokuđà gəl gami la azlamadzahaga aṇa azlaməna manəfay, gəpəh à atà gay marabəṇ uwana gəzàh à azladza, uwana azla Yahudiya aw, kà uwana asa à gi kà sləray gulo aṇa mawis à vəđah aw.
- <sup>3</sup>Masla mazlak gi, Titus, masla kà zil Gərək, ama tafəl ndzəđà à gəl, kà makədəv à uda aw.
- <sup>4</sup>Ama azlaməna magolla dza la ahəṇ tasà à tataka gami à abà la dabaray la magođay: 'Masla mamakədəv à uda gə takay?' Asà à atà masəl madz à ahəṇ gami, uwana anu la makor gəl la abà, kà uwana mədagay tekula la Kristu. Asà à atà aṇa mawulla anu à mayà aṇa mapəhay aṇatà à abà.
- <sup>5</sup>Ama məkəs atà gəl à ahəṇ, amiyaka ṇuv aw, kà uwana asa anu kà gay marabəṇ dziriga, adza à ahəṇ kiya uwanay kà akul aṇa masəlay.



<sup>6</sup>Iyay, azlauwana tazala atà ala azlaməŋga uwarà ndzer, -gay gulo la abà aw, kà uwana Zəzagəla avàh azladza ala aw-, uwana tazala atà ala azlaməŋga, uwaga abədlə madiŋal gəl à vok gulo aw, ŋgaha matapla gulo kà uwala delga aw, tagòd aw.

<sup>7</sup>Tasəl pəra kà, kà Zəzagəla afà à gi à gay marabəŋ à ahəl kà maziŋ azladza uwana makədəv atà à uda gà aw, bokuba uwana Zəzagəla afa à gay marabəŋ à Piyer à ahəl kà maziŋ à azla Yahudiya babay.

<sup>8</sup>Zəzagəla agədfà Piyer à afik, kà masla aŋa magay masləlay à tataka azla masla Yahudiya à abà, bokuba uwana agədfà à gi afik kà gi aŋa magay masləl gi à tataka azlatsəhay anik à abà suwaŋ.

<sup>9</sup>Haday, Yakuba, Piyer ŋgaha Yuhana, -tanəroz atà kà bokuba azlamaŋoləv gà la tataka azlamaham à ahəŋ la abà-, atà tasəl kà Zəzagəla la uwana avà à anu sləray uwanay. Gay gà la uwaga tavà à anu matsən vok gay la Barnabas, kà anu aŋa madàh sləray la tataka azlatsəhay anik la abà, ŋgaha atà aŋa madàh sləray la tataka azla Yahudiya la abà.

<sup>10</sup>Ama tadəv à anu kudà kà madəhəŋ kà tatak tekula pəra: Maf sləm à azlaməna kudà, uwana la maham à ahəŋ dza la abà la Urusalima. Uwaga la uwana məwəd vok à uda kà madəhəŋ.

<sup>11</sup>Mok uwana Piyer adasa à waŋ à Antiyews, gəsləhal mələ à gəl la huma aŋa azladza, kà uwana adàhà sləray la tetəvi aŋha aw.

<sup>12</sup>Terəŋa dadəŋ, tazùw tatak may la slaka gà, la azladza uwana kokudà makədav atà à uda gà. La lig la ahəŋ, mok uwana azladza aŋa Yakuba tasà à waŋ, atà uwana tadàla slilih la makədəv vok à uda la abà, guba akəs Piyer, avahà ala la azladedə uwatà, asək à mazuw tatak may atà nna.

<sup>13</sup>La abatà azla Yahudiya anik tabək gəl à ahəŋ səla səla, bokuba aŋa Piyer babay. Baməraaka Barnabas bay kà, anəfà madəhəŋ aŋatà.

<sup>14</sup>Mok uwana gənəŋəŋ, kà tawis tetəvi aŋa gay marabəŋ ala kà, gəgòd à Piyer la huma aŋa azladza uwatà gesina: 'Kak, uwana kak zil Yahudiya, kadzà à ahəŋ la abanay kà bokuba kak zil Yahudiya aw, kadzà à ahəŋ kiya kak zil Yahudiya aw, kayyà, kà mana kagof à azladza uwana azla Yahudiya aw kà tadza à ahəŋ bokuba azla Yahudiya zla ma?'

<sup>15</sup>Ndzer, anu kà, anu azla Yahudiya dziriga, kà uwana azlababa gami kà azla Yahudiya dagay la slilih, anu azlatsəhay dza à uda aw, anu azlaməna masəl tetəvi aŋa Zəzagəla aw aw.

<sup>16</sup>Amiyaka adagay bokuba uwaga, məsəl kà, dza uwana dziriga la huma Zəzagəla kà, say dza uwana adiŋ gəl à Yesu Kristu à vok, awkà dza uwana anəfa mapəhay aŋa azla Yahudiya aw. Mədiŋ gəl à Yesu Kristu à vok bay kà, kà Zəzagəla aŋa mav à anu tetəvi kà anu magay sətaka la huma aŋha kà, kà uwana mədiŋ gəl à masla à vok, awkà, kà uwana mənəfa mapəhay aŋa azla Yahudiya aw. Dza aslala vok aŋa magay sətaka la huma Zəzagəla la manəf tetəvi aŋa mapəhay aw.

<sup>17</sup>Kiya uwaga babay anu azla Yahudiya, mēhoy guba aṅa Kristu bay, anu mēbèz dziriga la huma Zəzagəla kà uwana anu la maham gay a vok là Kristu la abà, ama anu azlaməna tsakana kalkal la aṅa azlatsəhay anik gesina. Baṅa kiya uwaga ma, Kristu adzərədā tsakana ala takay? Awaṅ, tetuwa kiya uwaga aw!

<sup>18</sup>Naka aḡay kiya uwaga nəma, ama mapəhay aslala vok kà mag gi sətaka aw, ṅgaha gəgola aya, gənəf mapəhay bokuba tatak uwana akəsa vok aya, aṅa kità kà, gədādāh mawisiga la huma aṅa Zəzagəla.

<sup>19</sup>Ama kà aṅulo kà, lakəl aṅa mapəhay kà, gi mamətsay gə. Mapəhay kà, kà aṅulo kà, adapaka tatak deyday, uwaga gesina kà adada à lig, kà gi aṅa magay la sifa la huma aṅa Zəzagəla. Dagay uwana tatatəsl Kristu à ahəf à adi, gəga tekula la masla, məməts à slaka gə à abà anu səla.

<sup>20</sup>Gi kà, sifa uwanay gədza la ahəṅ kà, la gəl gulo aw, Kristu la uwana adza à ahəṅ la gi la abà. Sifa uwana gədza la ahəṅ la gudəṅ uwanay la vok kà, gədalla kà la madiṅ gəl à Kristu à vok, à masla uwana Kona aṅa Zəzagəla, uwana awoya gi, ṅgaha uwana avà vok aṅha kà aṅulo.

<sup>21</sup>Tetuwa, gədəpəsew delga aṅa Zəzagəla dikiḡiki la mawulay à mapəhay à abà aw. Baṅa dza adagay dziriga la huma aṅa Zəzagəla kà, kà uwana adāh tatak uwana mapəhay apəhay la manəf mapəhay kà, baṅa kiya uwaga kà, Kristu kà aməts kà deyday pəra zlà.

### Galatiya 3

<sup>1</sup>Azla Galatiya, kusoṅu aṅkul uwanay haḡay! Uwa adasləb akul aresl lakəl ala uwa? Tsa gəpəhakulla Yesu Kristu, uwana aməts à ahəf à adi uwi?

<sup>2</sup>Wùlāw gi ala gay tekula pəra: Zəzagəla avà à akul Masasəḡok aṅha ma kà uwana kanəfāw mapəhay ay, awma kà uwana katsənāw gay marabəṅ, ṅgaha la madiṅ gəl à Kristu à vok takay?

<sup>3</sup>Kà mana katsənāw sləm aw ma? Uwana Masasəḡok adzəkà la vok aṅkul ma, asa akul madəv uwaga à gay la ndzəḡa aṅa vok aṅkul takay?

<sup>4</sup>Uwana apəkakulla vok gesina ma, uwaga ma deyday takay? Tetuwa tatak məṅga bokuba uwanay apakay deyday aw!

<sup>5</sup>Zəzagəla avà à akul Masasəḡok aṅha, ṅgaha adāh azlanadzipo la tataka aṅkul la abà babay. Adāh uwaga ma, kà uwana kakəsāw gay aṅa mapəhay ay? Awma kà uwana katsənāw gay marabəṅ ṅgaha kadiṅāw gəl à Kristu à vok ay?

<sup>6</sup>Iyay, dzūgwāw lakəl aṅa Abəraham bokuba uwana wakità apəhay, aḡòḡ: 'Abəraham afā madzugway aṅha à Zəzagəla à afik, kà uwaga à uwana aḡà dziriga la huma aṅha.'

<sup>7</sup>Tsa baṅa kiya uwanay kasəlaw kà, say azladza uwana tadiṅ gəl à Zəzagəla à vok la dziriga, la uwana tadəḡay mayyi à tsəh ala aṅa Abəraham.

<sup>8</sup>Dagay uwarà tatsetsèr à wakità Zəzagəla à abà kà, azlauwana azla Yahudiya aw, tadàpaka dziriga la huma aṅha, kà la madiṅal gəl à vok aṅatà. Gay gà la uwaga mapəhiya à Abəraham à vok à abà dagay uwarà à gay marabəṅ: 'Zəzagəla adàpis gay à azladza gudəṅ à vok gesina kà, kà kak à kak Abəraham.'

<sup>9</sup>Abəraham adiṅ gəl à Zəzagəla à vok. Azlaməna madiṅ gəl à Zəzagəla à vok bokuba aṅa Abəraham tadàbəza mapis gay à vok bokuba aṅha uwana abəzàl babay.

<sup>10</sup>Ama kà aṅa azlauwana tadzugway kà tadagay dziriga la huma Zəzagəla kà, kà uwana tadàh uwana mapəhay apəhay kà, Zəzagəla adàkas atà la seriya. Kiya uwaga tatsetsèr à wakità Zəzagəla à abà kà: 'Kəla dza, uwana anəfa azlamapəhay gesina uwana tatsetsèr à wakità Zəzagəla à abà aw kà, seriya aṅa Zəzagəla adàtəf à atà à gəl.'

<sup>11</sup>Ama bà la uwaga gesina kà, dza la ahəṅ dziriga la huma Zəzagəla la manəf mapəhay aw, kà uwana wakità agod babay: 'Masla madiṅ gəl à Zəzagəla à vok abəza dziriga, adza à ahəṅ la sifa.'

<sup>12</sup>Ama mapəhay kà, abəza kà madiṅal gəl à vok aw, bokuba uwana matsəterayga: 'Dza uwana akəs mapəhay lela kà, adàdza à ahəṅ kà la masla.'

<sup>13</sup>Kiya uwaga kà, Zəzagəla adukwaṅ seriya à gəl, kà uwana məkəs gay aṅa mapəhay tetuwa aw. Ama Kristu asà à ahəṅ, abəd à slaka gami à abà, kà Zəzagəla aṅa madukw ala seriya à gəl. La madəhəṅ kiya uwanay, avavàrà anu la seriya uwaga la abà. Uwaga bokuba uwana tatsetsèr à wakità Zəzagəla à abà: 'Dza uwana tatatàsl à ahəf à adi kà, matsafla gə.'

<sup>14</sup>Kristu adàhəṅ kiya uwanay kà, kà azlatatak delga uwana Zəzagəla apəh à Abəraham à ahəṅ, kà azladza uwana azla Yahudiya aw aṅa mabəzal la ahəl aṅha suwaṅ. Dgaha kà anu aṅa mabəzal Masasəfok, uwana Zəzagəla apəhəhà à ahəṅ aṅa mav à anu, kà uwana mədavəl ləv gami.

<sup>15</sup>Azladeda, say gəpəh à akul la gay la gay la abà, bokuba uwana zagəla aṅa azladza. Baṅa azladza səla tahamà gay à vok ṅgaha tatsən vok gay, ṅgaha tafà à ahəl à afik, kiya uwaga kà, dza aslala vok aṅa mazalaṅ à gəl babay aw.

<sup>16</sup>Haday, Zəzagəla akəs vok slawda la Abəraham kà aṅha, ṅgaha la mayyi à tsəh ala aṅha. Ama wakità Zəzagəla agod: Azladza dəṅ, agod aw, ama à mayyi à tsəh ala aṅha, dza tekula pəra: Kristu.

<sup>17</sup>Tatak uwana asa à gi aṅa mapəhay kà, bokuba uwana Zəzagəla akəs vok slawda la Abəraham, agədāṅ à afik. Mavay dadərmokw ufaḍ bəzi aṅha dzik makər la lig aṅha la ahəṅ, la uwana mapəhay azlāṅal. Uwaga aslala vok aṅa mapəl makəs vok slawda uwaga ala, ṅgaha la tatak uwana Zəzagəla apəh à Abəraham à ahəṅ aw.

<sup>18</sup>Agayṅa Zəzagəla avà tatak à azladza, kà uwana tanəfà mapəhay kà, uwaga asal magoday kà: Avà kà, kà uwana apəh à ahəṅ aw, tsa tekefik kà, Zəzagəla apisà gay à Abəraham à vok, kà uwana apəhal à ahəṅ kiya uwaga pəra.

<sup>19</sup>Tsa baṅa kiya uwanay ma, kà mana Zəzagəla avà mapəhay à azla Yahudiya ma? Zəzagəla avà à anu, kà anu aṅa masəlay azlatatak ma, uwala mawisiga la huma

Zəzagəla la? Avà kà aṅa dənṅa pəra, tsəràh à uwana mayyi à tsəh ala aṅa Abərahān tatsàw à waṅ à masla à uwana Zəzagəla apəhəl azlatatak uwaga à ahəṅ. Zəzagəla apəh uwaga à azlamalika, tazàṅ à azladza, masla masəlla anu vok la ahəṅ la tataka gami la abà la Zəzagəla.

<sup>20</sup>Masla masəlla vok à azladza kà, adza à ahəṅ kà, la tataka aṅa azladza səla la abà. Ama la mok uwana Zəzagəla apəh à azlatatak uwaga à Abərahān, masla la gəl aṅha adəhəṅ bokuba masla masəl vok à azladza.

<sup>21</sup>Iyay, uwaga ma asal magodəy, kà mapəhay kà awoya tatak uwana Zəzagəla apəh à ahəṅ aw, takay? Tetuwa kiya uwaga aw! Agayṅa mapəhay tekula uwana naka aslala vok, avà sifa à azladza kà, naka agəṅ dziriga la huma Zəzagəla babay. Ama mapəhay la ahəṅ kiya uwaga aw.

<sup>22</sup>Tekedika wakità Zəzagəla agod kà: Azladza gudəṅ à vok gesina kà, atà la tsəh aṅa tsakana, uwaga bokuba makəf gəl à ahəṅ aṅha, à uwana Zəzagəla apəh à azlauwana à ahəṅ, tadiṅ gəl à Yesu Kristu à vok. Avà à atà kà, kà uwana tadiṅ gəl à masla à vok.

<sup>23</sup>Dagay uwarà, mok uwana tetəvi la ahəṅ dadəṅ kà azladza aṅa madiṅ gəl à Kristu à vok dadəṅ aw kà, mapəhay aga bokuba masla manəṅla, uwana anəṅla anu la daṅay aṅha la abà. Mənəfà masla tsəràh à uwana Zəzagəla apəhanula tetəvi kà anu aṅa madiṅ gəl à Yesu à vok.

<sup>24</sup>Kiya uwaga mapəhay aga masla manəṅla anu, tsəràh à uwana Kristu asà à waṅ. Zəzagəla agəhà anu azladziriga la huma aṅha, kà uwana madiṅ gəl à masla à vok.

<sup>25</sup>Lagonay kà, tetəvi la ahəṅ, kà anu aṅa madiṅ gəl à Kristu à vok, anu la tsəh aṅa mapəhay aya aw.

<sup>26</sup>Akul gesina kà, akul azlabəza aṅa Zəzagəla, kà uwana kadiṅaw gəl à Yesu Kristu à vok, bokuba magodəy kà, akul la ahəl aṅa Yesu Kristu adagay.

<sup>27</sup>Tadəhəkulla batem, kà akul aṅa maham gay à vok la Kristu. Lagonay kà, kazəbàw madz à ahəṅ aṅa Kristu babay.

<sup>28</sup>Kadəgay zil Yahudiya, kadəgay zil Yahudiya aw, kadəgay mayà, kadəgay mayà aw, kadəgay zilga, kadəgay misga, -gay la ahəṅ aw-, akul kalkal gesina. Akul gesina kà, kahamàw à Yesu à abà, kapakàw tekula.

<sup>29</sup>Baṅa akul azlaaṅa Kristu, akul azlamayyi à tsəh ala aṅa Abərahān. Kità kà, kadəbəzaw azlatatak uwana Zəzagəla apəh à ahəṅ gesina, uwana: 'Gədàvə à Abərahān la mayyi à tsəh ala aṅha', agòd.

## Galatiya 4

<sup>1</sup>Uwana asa à gi aṅa mapəhay kà kiya uwanay: Bəzi uwana adəzuw gəy baba aṅha, mok uwana aləg bəzi dadəṅ, kà bokuba mayà, bamərika masla adəzuw gəy.

<sup>2</sup>Mok uwana aləg bəzi dadəṅ kà, atsəb sləm à gay aṅa azlaməna mafal sləm uwana tanəṅla azlatatak tsəràh à kaslà, uwana baba aṅha akədəval à ahəṅ.

- <sup>3</sup>Kà aŋami babay kà, apakà vok kiya uwaga, mok uwana mægà bokuba azlabəza dadàŋ, mədza à ahəŋ la ahəl aŋa azlamasasəfok mawisiga, uwana takor gudəŋ à vok uwanay.
- <sup>4</sup>Kaslà uwana Zəzagəla anàts à ahəŋ adaslay, Zəzagəla asləl Bəzi aŋha à ahəŋ à gudəŋ à vok, agòlla la huf aŋa mis, kà masla aŋa makəs mapəhay aŋa azla Yahudiya.
- <sup>5</sup>Ŋgaha kà masla aŋa mapəlla azlauwana ala, atà la tsəh aŋa mapəhay uwaga, kà Zəzagəla aŋa mapakanula kà azlabəza aŋha.
- <sup>6</sup>Iyay, tatak uwaga apəhanula, kà akul azlabəza aŋha. Zəzagəla asləl Masasəfok aŋa Kona aŋha à ləv gami à tsəh, awiya: 'Abba, Baba gulo!'
- <sup>7</sup>Uwaga kà asal magodəy kà: Akul azlamayà aya aw, akul kagaw azlabəza aŋa Baba. Tsa kagaw azlabəza aŋha kà, adàvə à akul tatak gesina, uwana afà à ahəŋ kà aŋa azlabəza aŋha.
- <sup>8</sup>Uwarà, à mok uwana kasəlaw Zəzagəla dadàŋ aw kà, kagahàw mayà aŋa azlamazlazlay.
- <sup>9</sup>Ama lagonay uwana kadasəlaw Zəzagəla, bokuba uwana Zəzagəla asəl akul, kayyà, kà mana kawulàw à azlatatak deydayga aŋkul uwana à abà, kadàhàwwàŋ aya ma? Kà mana asa à akul magay azlamayà aŋatà aya, tsa ndzəda aŋatà la ahən aw ma?
- <sup>10</sup>Kafàw madzugway aŋkul kà azlamavakay anik à afik, la azlatəla, ŋgaha azlamavay anik à afik babay.
- <sup>11</sup>Kay, guba akəs gi kà akul, kà sləray gulo aŋa mapakay deyday la tataka aŋkul la abà.
- <sup>12</sup>Azladeda, gədəv akul kudà kamkam, pəkàw bokuba gi, gi babay gəpakay bokuba akul. Tetuwa kadàhàw à gi mawisiga à vok aw.
- <sup>13</sup>Kasəlaw, à mok uwana gədzà à ahəŋ la tataka aŋkul la abà kà, dūvats akəd f gi. Bə la kità bay kà, gəzəkulla gay marabəŋ.
- <sup>14</sup>Iyay kay kà, kasàw gi la madəkgəla vok ala aw. Ama kakəsàw gi kà la ahəl səla, bokuba uwana kakəsàw malika aŋa Zəzagəla, ŋgaha kakəsàw gi bay bokuba uwana kakəsàw Yesu Kristu.
- <sup>15</sup>La kaslà uwatà kà, kahənàwla la marabay. Lagwa ma aŋala zlà à ama la? Gəsəl la dziriga kà agay, kabəzàw tetəvi kà, naka bə yewdi aŋkul babay kà naka kabadàw à gi.
- <sup>16</sup>Ŋgaha ma lagwa ma kapakàwgəla ma, bokuba gi masla məzam aŋkul, kà uwana gəpəh à akul dziriga takay?
- <sup>17</sup>Azladza uwaga kà, asa à atà kà akul aŋa manəf madəhəŋ aŋatà. Ama madzugway aŋatà kà delga aw. Asa à atà kà mavàhanula anina, kà akul aŋa makəs gay aŋatà.
- <sup>18</sup>Delga kà, azladza takəs vok gay la azladza anik, à baŋa madzugway aŋatà kà delga. Gədəgay la akul, baməraka gədəgay la akul aw, kà uwana gəpəhay la uwana dziriga pəra.

- <sup>19</sup>Azlabəza gay ləv gulo, gəs ɲgərpa bokuba mis uwana huɖ bəzi adakəsay, say gəsə ɲgərpa kiya uwanay tsəràh à uwana asa à gi kà kagaw azlaməna masləlay aɲa Kristu.
- <sup>20</sup>Lagonay asa à gi madz à ahəɲ la slaka aɲkul, kà ma uwala kà vok gay à gəl. Gəl adakaf gi à vok, gəsəl uwana gəɖahakullaɲ aya aw.
- <sup>21</sup>Iyay, akul kà, asa à akul aɲa madz à ahəɲ la tsəh aɲa mapəhay, gənaɋa akul: Katsənàw uwana mapəhay aɲa Musa apəhay aw takay?
- <sup>22</sup>Tatsetsər à wakità Zəzagəla à abà kà: 'Abəraham kà, azlabəza aɲha kà atà səla. Bəzi tekula kà aɲa dugu mayà, anik uwanay kà aɲa mis makor gəl gə.
- <sup>23</sup>Bəzi aɲa dugu mayà kà, ayyà kà bokuba uwana tayyàh azlabəza anik, ama mis makor gəl gə uwanay kà, ayyà kà kiya uwaga aw. Zəzagəla apəhal gay mayyi bəzi aɲha à ahəɲ dagay uwarà.'
- <sup>24</sup>La gay uwaga la abà, Zəzagəla asal mapəhanula gay anik bokuba uwanay, azlamis səla uwaga, Agar atà la Sara, apəhanula gay makəs vok slawda gərgər səla uwana Zəzagəla adahəɲ. Agar dugu mayàga, apəhla ala kà makəs vok slawda uwana Zəzagəla adahəɲ la Musa la gudəɲ Sənyayi la afik, bəzi aɲha kà ayyà kà à mayà à abà.
- <sup>25</sup>Baɲa tapəhay lakəl aɲa Agar kà, tapəhay kà lakəl aɲa gudəɲ Sənyayi la kutso aɲa Arabiya la abà, masla babay kà, bokuba Urusalima aɲa lakana. Kà uwana azladza uwana tadza à ahəɲ la abà gesina kà, azlamayà aɲa mapəhay.
- <sup>26</sup>Ama Urusalima dziriga aɲa Zəzagəla, uwana la zagəla la afik kà, masla la makor gəl la abà, masla la uwana bokuba iyà gami.
- <sup>27</sup>Bokuba uwana wakità Zəzagəla agod: 'Ràb, à kak dəgər, uwana kadaslah godega ala aw, wiyà la marabay à kak, uwana katsən mazay aɲa huɖ bəzi à adi aw, kà uwana mis makudəkay gə, adəgay la azlabəza aɲuwaw ɖadɖuwa à gay aɲa mis uwana la zil la tsəh.'
- <sup>28</sup>Azladeda, akul kà, akul azlabəza uwana tayàhà atà à tsəh aɲa makəs vok slawda aɲa Zəzagəla, akul gesina bokuba Isak.
- <sup>29</sup>Dagay uwarà, bəzi uwana Agar ayyà bokuba azlabəza anik kà, atə̀rə̀b bəzi uwana Sara ayyà, la ndzəɖa aɲa Masasəɖok. Lakana babay kà bə kiya uwaga aya gotənaɲ.
- <sup>30</sup>Ama mana wakità agod ma? 'Kudək dugu mayàga la bəzi aɲha gesina, kà uwana bəzi aɲa dugu mayàga kà, azuw gəy aw, say bəzi aɲa mis makor gəl gə pəra.'
- <sup>31</sup>Azladeda gulo, anu, anu azlabəza aɲa dugu mayàga aw, ama kà anu azlabəza aɲa mis makor gəl gə.

## Galatiya 5

- <sup>1</sup>Kristu apəlla anu ala la tsəh aɲa mapəhay aɲa azla Yahudiya, kà anu aɲa madz à ahəɲ la makor gəl la abà aɲa tetuwa. Kità kà, wəɖəw vok à uda, kavəw tetəvi à dza awulla akul à mayà à abà aya aw.

- <sup>2</sup>Lagwa, gi Pol gəpəh à akul la paraka, kà baŋa dza asal makədəv vok à uda kà, kà uwana Kristu adàhàh kà aŋkul kà, adàpakay kà deyday zlà!
- <sup>3</sup>Gəpəh à akul aya kà, kəla dza uwana asal makədəv vok à uda kà, akəsa vok kà manəf mapəhay la tetəvi aŋha gesina.
- <sup>4</sup>Iyay, akul azladza, uwana kadzugwaw kà Zəzagəla adaga akul dziriga la huma aŋha, à kà uwana kanəfaw mapəhay aŋa azla Yahudiya kà, akul la Kristu kà kavàhàw ala, kaslawalla vok aŋa mabəz tatak delga aŋa Zəzagəla aya aw.
- <sup>5</sup>Ama anu kà, məfa manəwəŋ gami kà à Zəzagəla uwana à afik adàga anu dziriga la huma aŋha, la ndzəda aŋa Masasədok tsikasla, uwana adàh sləray kà madiŋal gəl à vok gami.
- <sup>6</sup>Tatak uwana agəf à anu ŋuləm kà, say madiŋ gəl à masla, madiŋ gəl à vok uwaga la uwana, avà à anu ndzəda kà mawoy azladza anik babay.
- <sup>7</sup>Hadəy, kadzàw kà tetəvi aŋkul delga. Uwa adəd à akul gay à ahəŋ aŋa manəf dziriga uwa?
- <sup>8</sup>Uwana tapəh à akul kà mabəz akul à tsəh uwaga kà, aguwà à waŋ kà la slaka Zəzagəla, uwana azalà akul, aw.
- <sup>9</sup>Tatak makəsliŋ ŋuv akəsl pəhàw, bokuba uwana azladza tapahay.
- <sup>10</sup>Kà uwana anu gesina kà, anu la Sufəl Yesu Kristu la abà. Ndzer, ŋodəgi kà, kadəzugwaw bokuba aŋulo, ŋgaha gəsəl babay kà, dza uwana akàdàkulla gəl à vok, adàgay uwi kà, Zəzagəla adàdukwa ala seriya à gəl.
- <sup>11</sup>Azladeda, kà aŋulo kà, gəda à huma à gay kà maziŋ gay makədəv à uda ŋgaha kà Zəzagəla aŋa makəs anu aw. Agayŋa gəziŋ kà kiya uwaga kà naka azladza tatərəb gi aw, ŋgaha naka takweska mamətsay aŋa Kristu la ahàf la adi aw.
- <sup>12</sup>Azladza uwaga takəd à akul ala gəl à vok la makədəv vok à uda kà, tadədəslah vok aŋatà, vàhàwla akul nna tetuwa.
- <sup>13</sup>Azladeda, akul kà, tazalà akul, kà akul aŋa madz à ahəŋ la makor gəl la abà. Baŋa akul la makor gəl la abà, kiya uwanay kà, kadzugwaw kà madàh tatak uwana asa à vok aŋkul pəra aw, ama wəyàw vok kà akul à akul, ŋgaha zlàkàw vok kà akul à akul.
- <sup>14</sup>Mapəhay gesina ahamà mafàh akur ahəŋ tekula à afik: 'Wəyà masla magay aŋak, bokuba gəl aŋak.'
- <sup>15</sup>Ama baŋa katsahaw vok, kapadàhaw vok à gay bokuba akul azlatatak fəta kà, dàhàw haŋkəli kà akul aŋa mawas vok ala kà akul à akul aw.
- <sup>16</sup>Aganay à gay uwana asa à gi mapəh à akul: Sàkàw à Masasədok Zəzagəla akor akul, kanəfaw mabila aŋa vok aŋkul aw.
- <sup>17</sup>Tatak uwana asa à sləb vok aŋa dza adəhəŋ kà, asa à Masasədok Zəzagəla aw, ŋgaha tatak uwana Masasədok adəhəŋ bay kà, asa sləb vok aŋa dza aw. Guvəl la ahəŋ la tataka aŋatà la abà, kiya uwaga kà, məslala vok mədàh, uwana asa gəl gami aw.

- <sup>18</sup>Ama baŋa Masasəḍok Zəzagəla adala akul kà, mapəhay aga la ndzəḍa lakəl aŋkul aya aw.
- <sup>19</sup>Azlatatak uwana asa à sləḅ vok aŋa dza kà madəhəŋ kà, adzəḍ ala: Mabila, sləray àläh gà, kəla sləray mawisiga,
- <sup>20</sup>tasləkaw azlamazlazlay, tasəh nalkokodzi, fəh vok guvəl à adi, tagazlay, azlamaŋor, azlaməna ləv, tadzugw kà à gəl aŋatà pəra, tatsakla, tatsəna vok à gay aw.
- <sup>21</sup>Ŋgaha azlaməna à adi, azlaməna guzu, azlaməna marazlay mawisiga la azlasləray anik tsəhay gà uwaga. Gəpəh à akul à vok à abà bokuba uwana gədapəh à akul dagay uwarà kà: Azlaməna madəh tsəhay gà uwaga kà, tadəbəza slaka la makoray aŋa Zəzagəla aw.
- <sup>22</sup>Ama mayyay aŋa Masasəḍok tsikasla kà: Masal, marabay, lapiya, mabasiŋ delga, dzəḍa aŋha səla aw, madəh delga à dza anik, azladza dziriga,
- <sup>23</sup>ləv tələmna, makəs ləv. Mapəhay adəḍ gay à uwaga à ahəŋ aw.
- <sup>24</sup>Azladza uwana azlaaŋa Kristu kà, azlatatak mawisiga gesina uwana tatuwal à tsəh, uwaga bokuba tatatasl à ahəf aŋa Kristu à adi.
- <sup>25</sup>Masasəḍok Zəzagəla avà à anu sifa, say məkəs gay aŋa Masasəḍok uwaga, la sifa gami babay gesina.
- <sup>26</sup>Mədəhà zlapay aw, mətəfəḍəhà ləv à azladza anik aw, məfə maŋor à azladza anik à adi aw.

## Galatiya 6

- <sup>1</sup>Azladeda gulo, baŋa kanəŋaw dza anik uwana adada madəh mawisiga à abà kà, akul uwana akul la Masasəḍok Zəzagəla kà zlakəwwəŋ, kà masla aŋa mawulay à tetəvi à tsəh ala, ama dəhəwwəŋ kà la ləv tələmmaga. Gəgodf à kəla uwabeyuwi aŋkul, dəhəw haŋkəli kà akul la gəl aŋkul aŋa matəḍal à tsəh bay suwaŋ aw.
- <sup>2</sup>Zəḍəw vok mahanay kà akul à akul, kiya uwanay la uwana kà, kakəsay mapəhay aŋa Kristu.
- <sup>3</sup>Baŋa dza anərəz gəl aŋha 'Gi məŋga', agodəy, ama dza məŋga aw, kiya uwaga kà adəz gəl aŋha ala.
- <sup>4</sup>Say kəla uwabeyuwi anərəz sləray aŋha. Baŋa ada à vok kà, aslala vok azləḅ uwana adəhəŋ la gəl aŋha. Manəkudə magagazləla la ahəŋ la sləray aŋa dza anik aw,
- <sup>5</sup>kà uwana leri, kəla uwabeyuwi azəḅ mahanay aŋha.
- <sup>6</sup>Dza uwana atapla gay Zəzagəla, aslala vok mav à ahəŋ dèwdèw tatak delga la masla matapla.
- <sup>7</sup>Kapapataw gəl aŋkul aw! Zəzagəla kà, asaka dza uwana adəhla marazlay aw. Kəla tatak uwana dza asləka, la uwana atsəḍəy suwaŋ.



- <sup>8</sup>Baŋa dza aslɛka mawoyɛŋ aŋa vok aŋha kà, mawoyɛŋ aŋa vok aŋha uwaga la uwana adàtsɛɗay, uwaga mamɛtsay. Ama baŋa aslɛkay kà uwana asa à Masasɛɗok kà, adàtsɛɗay kà sifa adɔv à gay aw, Masasɛɗok avà uwana.
- <sup>9</sup>Tetuwa mɛsak à madàh delga la tsɛh ala aw, kà uwana baŋa mɛwad vok à uda kà, mɛdàtsɛɗay la vud uwana kaslà adàslay.
- <sup>10</sup>Lagonay kà, mɛdàhà delga à azladza gesina, ama kaykay kà, à azlauwana azlaaŋa Yesu Kristu.
- <sup>11</sup>Nɛrɛzàw uwana gɛtsetsɛr akul lagonay, gɛtsetseray kà mɛŋga mɛŋga la ahàl gulo dziri.
- <sup>12</sup>Azladza uwana asa à atà mahɛɗay à azladza à adi la slɛray aŋa vok deyday, la uwana tatɛrɛb akul la gay aŋa makadav vok à uda, ama tadàh uwaga gesina kà, kà azla Yahudiya aŋa matɛrɛb atà, à baŋa taza Kristu uwana la ahàf la adi aw.
- <sup>13</sup>Bamɛraka tadagay azlamakadav à uda gà bay kà tadinjal gɛl à mapɛhay à vok aw. Asa à atà kakadav vok à uda kà, kà atà aŋa mamats ala zlapay la akul pɛra.
- <sup>14</sup>Gi kà, gɛts zlapay, kà la ahàf aŋa Sufɛl Yesu, uwana amɛtsal à adi. Gɛts zlapay la tatak anik aw. Kà mamɛtsay aŋha uwana amɛts à ahàf à adi kà, tatak aŋa gudɛŋ à vok gesina kà, adapakay kà mamɛtsay gà la slaka gulo, gi bay kà, gɛdapakay kà bokuba mamɛtsay gà la huma tatak aŋa gudɛŋ à vok.
- <sup>15</sup>Baŋa dza makadɔv à uda gà, adagay makadɔv à uda gà aw kà, gɛrgɛr la ahɛŋ aw. Tatak mɛŋga kà, magay dza mawga, uwaga la uwana aduwa à vok.
- <sup>16</sup>Dɛwdɛw dza, uwana tanɛf maw tetɔvi uwaga, ŋgaha azladza uwana tsɛhay aŋa Zɛzagɛla la dziriga babay kà, Zɛzagɛla avà à atà lapiya, ŋgaha adàha à atà delga.
- <sup>17</sup>La huma la gay kà, dza adàpapata gi aw. Gi kà gi mayà aŋa Yesu, azlamokfak, uwana la vok gulo kà, tapɛhla uwaga ala.
- <sup>18</sup>Azladeda gulo, vok mahamay aŋa Sufɛl gami Yesu Kristu, agay la akul gesina. Haday gà! Amen.

## Efesəya

### Efesəya 1

<sup>1</sup>Gi Pol la uwana gətsetser wakità uwanay, à gi uwana Zəzagəla akəsàni gi, kà gi ana magay masləlay aña Yesu Kristu. Gəsləl à akul à awtày, akul azlaməna masla gay Zəzagəla la Efesus, akul uwana kadiñaw gəl à Yesu Kristu à vok, ñgaha akul uwana kagaw tekula la masla la abà.

<sup>2</sup>Zəzagəla Baba gami, la Sufəl gami Yesu Kristu tapisakulla gay à vok ñgaha la mav à akul lapiya.

<sup>3</sup>Məzləbà Zəzagəla Baba aña Yesu Kristu gami! Uwana apis à anu gay à vok la mav à anu tatak gesina, uwana la zagəla, la makoray aña la abà, avà à anu uwana kà, kà uwaga mədahama gay à vok la Yesu Kristu.

<sup>4</sup>Zəzagəla atsatsàmàni anu la Yesu Kristu dagay uwarà, à mok uwana aləg madəh gudəñ à vok kà, kà anu aña magay azlaaña, kokudà mawisiga la huma aña bay.

<sup>5</sup>Kà uwana awoya anu, akəs kà mapakanula kà azlabəza aña kà sləray uwana Yesu Kristu adəhəñ. Akəsəl à gəl, à uwana adəhəñ kiya uwaga.

<sup>6</sup>Adəhəñ kiya uwanay kà, kà anu aña mazləbay kà vok mahamay aña, kà uwaga dzəba aña səla aw. Avà à anu kà deyday pəra, kiya uwaga kà, uwana mədagay tekula la bəzi gay ləv aña ndzer.

<sup>7</sup>Kà uwana adapalla anu la aña Kona aña uwaga, adamatsan tsakana gami ala, ñgaha apəhanula məñ vok mahamay aña.

<sup>8</sup>Avà à anu vok mahamay la mahənla la pawasla, bokuba magodəy kà, apakànula kà azlaməna matsihila gə, adəhəñ kiya uwaga kà, kà anu aña masəlay hañkəli aña à tsəh.

<sup>9</sup>Apəhanula tatak mahad vok à ahəñ gə, uwana uwarà asəl madəhəñ, tatak uwana adzəgw madəhəñ la Yesu Kristu.

<sup>10</sup>Madzugway aña kà, mok uwana kaslà adəslay kà, adahama gay azlatatak uwana à vok la zagəla la uwana la vədəh, kà Yesu Kristu aña magay Sufəl lakəl aña.

<sup>11</sup>Zəzagəla adəhəñ azlatatak gesina bokuba uwana asal madəhəñ, kiya uwaga atsatsàmàni anu dagay uwarà, bokuba uwana asa à gəl aña, kà anu aña magay azlaaña. Kiya uwanay mədahama gay à vok la Kristu, mədəbəza humà mazuw gəy gami,

<sup>12</sup>kà azladza aña mazləb məña aña. Anu, anu azladza matera uwana məvə ləv gami à Yesu Kristu,

<sup>13</sup>kà aña kà, kiya uwaga babay. Katsənəw gay dziriga, uwana gay marabəñ, la uwana Zəzagəla abəlla akul, kavəw ləv aña kà Yesu Kristu, kadəhəwəwəñ kiya uwaga kà, kà uwana kahaməw gay à vok la masla. Zəzagəla adanah à akul masəlay aña à vok, masəlay uwaga kà, kà Masasədok tsikasla uwana apəh à ahəñ uwarà.

<sup>14</sup>Avà à anu Masasəfok dagay uwarà, ngaha apèlla ala kà mədàbəz dèwdèw tatak, uwana apèh à azlatsəhay aḡha à ahəḡ. Mədàbəzal la vuɸ uwana Zəzagəla adàbəl anu aḡa tetuwa. Məzləbà Zəzagəla uwana məḡga!

<sup>15</sup>Kà uwaga à uwana, kikay gəḡodəy à Zəzagəla kà aḡkul. Gətsənà mad à huma à gay aḡkul la madiḡ gəl à Sufəl Yesu Kristu à vok à abà, gətsənà mawoy azlaməna madiḡ gəl à Zəzagəla à vok aḡkul bay.

<sup>16</sup>'Kikay', gəḡod à Zəzagəla koksikoksi kà aḡkul, à baḡa gədəval kuɸa.

<sup>17</sup>Gədəv kuɸa à Zəzagəla Baba məḡga, Zəzagəla gə, la uwaga à uwana Sufəl Yesu Kristu adàhla sləray aḡha, gədəval kuɸa, kà masla aḡa matapakakulla matsihila aḡha, ngaha masla aḡa mav à akul maslay la ḡuləm aḡa masəl masla.

<sup>18</sup>Gədəv kuɸa à Zəzagəla kà masla mapəzl akul haḡkəli aḡkul la uɸaka aḡha, kà akul aḡa manəḡ makəɸ gəl à ahəḡ aḡa tetəvi, uwana akul kadàbəzaw à abatà, katsənaw magay məḡga aḡa makoray aḡha, la azlanadzipo uwana adàhəḡ à ahəḡ, kà aḡa azladza aḡha gesina.

<sup>19</sup>Asa à gi babay kà, kasəlaw məḡga aḡa ndzəɸa aḡha, kà aduwa tatak gesina, bokuba uwana ndzəɸa aḡha adàh sləray la anu la abà, anu uwana mədiḡ gəl à masla à vok. Ndzəɸa kà bə uwatà.

<sup>20</sup>A uwana adàh sləray la Yesu la abà, awùlla à uda la mamətsay. Mok uwana adawùlla à uda la mamətsay kà: "Adzà madzay la ahəl kaf gulo lakəl", Zəzagəla aḡòɸal "la zagəla.

<sup>21</sup>Kagay Sufəl lakəl aḡa azlatatak gesina, lakəl aḡa azlamalika la azlasufəl aḡatà, ngaha lakəl aḡa azlatatak gesina, uwana atà la ndzəɸa la zagəla bay." Masla la uwana aduwa atà. Aga Sufəl lakəl aḡa azladza gesina, baməraaka tadagay azlauwi, aga lakəl aḡa azlauwana la gudəḡ uwanay la vok babay, ngaha lakəl aḡa gudəḡ à vok, uwana adàsa à waḡ la huma aya bawbaw.

<sup>22</sup>Zəzagəla abək tatak gesina à tsəh asik aḡha, apakəḡ ala kà Sufəl lakəl aḡa tatak gesina, ngaha aḡəḡ madzahaga aḡa azlaməna gay Zəzagəla.

<sup>23</sup>Maham à ahəḡ məna gay Zəzagəla kà, vok aḡa Kristu, la uwaga la abà la uwana, masla apəhla vok ala la paraka, ngaha azlatatak delga gə gesina kà, aga kà la masla la abà.

## Efesəya 2

<sup>1</sup>Mok uwana uwarà kà, akul kà bokuba akul azlamamatsayga la sifa aḡkul la abà, kà uwana kadahàhàwwəḡ kà tsakana.

<sup>2</sup>Kanəfəw madəhəḡ aḡa azladza gudəḡ à vok uwanay, kanəfəw sufəl aḡa azlamasəfok mawisiga uwana seteni, aga la ndzəɸa la tataka aḡa zagəla la abà la kutso. Masla la uwana adàh sləray la azladza uwana la abà takweska Zəzagəla.

- <sup>3</sup>Anu gesina kà, mægà bokuba atà babay à uwarà, mædàhàṅ kà dèwdèw tatak mawisiga, uwana asà à ləv gami koksikoksi. Məzləbàh kà gəl gami pəra. Kà uwana mægà kiya uwaga kà, anaka seriya aṅa Zəzagəla atəf à anu à gəl bokuba à azladza anik babay.
- <sup>4</sup>Ama lagwa kà, kiya uwaga aya aw. Həraz kà, vok ahamà Zəzagəla mənğa kà, anu kà mapəlla vok mahamay aṅha ala.
- <sup>5</sup>Baməraka mədagay bokuba azlamamatsayga la tsakana gami la abà, masla kà avà à anu sifa adəv à gay aw, uwana la Yesu Kristu la abà. Abəl akul kà deyday pəra.
- <sup>6</sup>Kà uwana mədagay tekula la Yesu Kristu, awùlla anu à uda la mamətsay, abək anu à zagəla, kà anu aṅa makoray la slaka gə la Kristu.
- <sup>7</sup>Adàhàṅ dzəba aṅha səla aw, kiya uwanay kà, kà ahəl aṅa Yesu Kristu, kà mapəlla ala la azlaskà uwana la abà, adàsa à waṅ la huma la gay, kà vok mahamay aṅha kà mənğa. Aduwa tatak gesina.
- <sup>8</sup>Zəzagəla abəl akul, kà uwana kadiṅaw gəl à masla à vok. La madəhəṅ kiya uwaga, abəl anu deyday, awkà kà madəhəṅ aṅkul aw. Avà à akul mapis gay à vok aṅha deyday aya.
- <sup>9</sup>Zlahaw kagodaw kà, kà uwana mædàhàṅ sləray delga, kagodaw zlà kà. Avà kà deyday, dza atsa zlapay aw.
- <sup>10</sup>Aga kiya uwanay, kà uwana masla la uwana adàhà à anu. Avà à anu sifa mawga la Yesu Kristu, kà azlatatak delga la sifa gami la abà, delga uwana adàhàṅ à ahəṅ kà dagay uwarà kà anu aṅa madəhəṅ.
- <sup>11</sup>Kà uwaga kà, gəwulla à akul à gəl, akul azladza uwana azla Yahudiya aw, dagay la mayyi akul, à akul, azladza uwana makadav atà à uda gə kà, tazala à akul ala kà: Akul azlamakadav à uda gə aw. Ama tapəhay kà lakəl aṅa tatak uwana la uda gə pəra, à uwana azladza tadəhəṅ à vok aṅatà à vok pəra.
- <sup>12</sup>Awul akul à gəl kà, la kaslà uwatà, kagàw kərkər la Kristu, uwana mafal dzakwa à gəl gə, kagàw azla Isərayel aw. Zəzagəla akəs vok slawda la tsəhay aṅha, la uwana la abà apəh à atà à ahəṅ kà aṅa madəhəṅ, ama akul kà, tatùgw la akul aw, kà uwana akul azladza à uda, tatak la ahəṅ, à uwana kafawal yewdi à tsəh la uwaga la abà aw. Kagàw la gudəṅ la vok, ama kasəlàw Zəzagəla aw.
- <sup>13</sup>Uwarà kà, kagàw kərkər la Zəzagəla. Ama lagonay kà, kahamaw gay à vok la Kristu. A masla uwana asəkw aṅiz aṅha à vəfàh kà akul, kità kà, akul kərkər la masla aya aw.
- <sup>14</sup>Kikay kà masla à uwana masəl vok la ahəṅ la tataka gami la abà. Dagay uwarà azla Yahudiya la azladza uwana azla Yahudiya aw tavàhàla. Ama masla la uwana apakànula tsəhay tekula, madəguva la ahəṅ uwarà la tataka gami la abà, bokuba zlagam. Masla akalàh à ahəṅ, la mamətsay aṅha.

- <sup>15</sup>Mapəhay aña azla Yahudiya agod: 'Dahəŋ uwanay, uwanay', ama masla azəŋ ala. Adəhəŋ kiya uwaga kà, kà masla aña maham gay azla Yahudiya à vok la azladza uwana azla Yahudiya aw. Tagay tekula la masla la abà tadasəl vok,
- <sup>16</sup>kà uwana aməts à ahəf à adi, madəguva la ahəŋ la tataka aŋatà la abà aya aw, adazəb à uda. Kikay kà masla adapakatàla kà tsəhay aŋha, ŋgaha adasəl atà vok.
- <sup>17</sup>Asà à waŋ à gudəŋ à vok, kà mazakulla gay marabəŋ, akul uwana akul azla Yahudiya aw kagəw kərkər la Zəzagəla uwarà, lagonay kà kabəzəwwal lapiya. ŋgaha à anu azla Yahudiya, uwana məgà nekwa la slaka Zəzagəla mədəbəz lapiya babay.
- <sup>18</sup>Gəgod kà anu azla Yahudiya, la akul uwana azla Yahudiya aw, kà anu ŋgaha akul bay, mədəbəz tetəvi la Kristu la abà kà anu aña maz vok à slaka Zəzagəla. Masasədok tsikasla azlak à akul, bə Masasədok gə la uwaga azlak à anu babay.
- <sup>19</sup>Kità kà, akul azlaməlok aya zlà ma aw. Akul azlaməna mas à waŋ la uda aya aw. Akul azladza gudəŋ adagay, bokuba azladza anik, uwana azlaaŋa Zəzagəla, akul la huf gəy aŋha adagay.
- <sup>20</sup>Akul kà bokuba akul azlaakur uwana tahazlla gəy, matatukw gəy kà azlaməna asik, la azlaməna mapəh à atà gay ahəl kà mapahəh à azladza, ŋgaha Yesu Kristu la gəl aŋha kà, akur mawad gəy, akəs azlaanik.
- <sup>21</sup>Kà masla la uwana, gəy adza à ahəŋ la afik, ŋgaha azala vok à gəl akul la azladza anik babay kà, kagaw kà bokuba gəy uwanay Sufəl Zəzagəla adza à ahəŋ la aku.
- <sup>22</sup>Kà uwana khamaw gay à vok la Yesu Kristu, akul babay la azladza anik kà, bokuba gəy uwanay la uwana la aku Masasədok Zəzagəla adza à ahəŋ la aku.

### Efesəya 3

- <sup>1</sup>Kà uwaga à uwana gəpəh à akul kà, gi Pol gədav kudà à Zəzagəla kà aŋkul. Gi la daŋay kà Yesu Kristu, tawədà gi kà akul, uwana azla Yahudiya aw.
- <sup>2</sup>Təga kà, katsənəwwəŋ kà Zəzagəla afà gi à ahəŋ, kà gi aña madəh sləray kà aŋkul. Kà vok mahamay aŋha à uwana gədəhəŋ kiya uwanay.
- <sup>3</sup>Zəzagəla apəhgəla tatak mahadəŋ à ahəŋ gə, nasiri uwana uwarà, kà gi aña masəlay. Gədatsetser à akul lakəl aña nasiri uwaga ŋuv.
- <sup>4</sup>Aŋŋà, kadzeŋaw uwaga kà, kadatsenaw nasiri uwana gəsəl lakəl aña Yesu Kristu.
- <sup>5</sup>La məl uwana la abà, adada à lig kà, Zəzagəla apəhla tatak uwaga à azladza aw. Ama lagonay kà, adasləl Masasədok aŋha à waŋ kà mapəhla à azlaməna maz gay aŋha, la à azlaməna mapəh à ata gay ahəl kà mapəh à azladza uwana abək atà à fəta à awtəy kà azlaaŋha.
- <sup>6</sup>Aganay tatak uwana mapəhla ala gə: Uwana Zəzagəla avà à azla Yahudiya bokuba ləmana kà, akul uwana akul azla Yahudiya aw kà, kadəbəzəwwal babay suwaŋ: Akul la azla Yahudiya kà, kagaw tekula. Tatak uwana Zəzagəla apəh à ahəŋ, kà mav à

azladza, uwana azlaaŋa Yesu Kristu kà, adavà à akul babay. Azlatatak uwaga kà, tasà à uda kà la gay marabəŋ la abà.

<sup>7</sup>Vok ahamà Zəzagəla, azəb gi à sləray aŋha à abà, kà gi aŋa maz gay marabəŋ uwanay à azladza. Adàhà uwaga kà la maslay aŋha.

<sup>8</sup>Gi masla mazəb dagum aŋa azlaməna madiŋal gəl à vok anik gesina, bà la uwaga bay kà, Zəzagəla akəs à gi, kà gi aŋa maz gay marabəŋ, uwana asà à uda la ahəl aŋa Yesu Kristu, à azladza uwana azla Yahudiya aw. Ləmana uwaga kà, məŋga zəŋzəŋ, kà matsəŋəŋ à uda aŋa azladza.

<sup>9</sup>Masla la uwana avà à gi tetəvi kà mapəhla à azladza gesina lakəl aŋa tatak mahadəŋ à ahəŋ gà, uwana uwarà Zəzagəla apəh, adapaka vok. Zəzagəla la uwana aŋaləh azlatatak gesina, adàhà tatak uwaga à ahəŋ la yewdi aŋa azladza, tsərəh à lakana.

<sup>10</sup>Lagonay kà, Zəzagəla adapəhla ala la tataka azlaməna madiŋal gəl à vok la abà, kà azlamalika la azlasufəl aŋatà tadəŋəŋ azlaməna madiŋal gəl à vok, ŋgaha atà aŋa masəl matsihila aŋa Zəzagəla. Kà uwana matsihila aŋha kà gərgər la azlatetəvi anik.

<sup>11</sup>Kiya uwaga adàhəŋ bokuba uwana ayəh madəhəŋ, à mok uwana gudəŋ à vok aləg madzəka à vok dadəŋ. Apəhla uwaga ala la magola la ahəl aŋa Sufəl gami Yesu Kristu.

<sup>12</sup>Kà uwana anu azlaaŋa Yesu Kristu, ŋgaha mədiŋ gəl à masla à vok kà, mədàza vok à slaka Zəzagəla la kokudà kurit yewdi.

<sup>13</sup>Tsa Zəzagəla adadəhəŋ kiya uwanay kà, gədəv à akul kudà, kà ləv aŋa mavalay akul à gay, kà uwana gəs ŋgərpa kà akul, aw. Azlauwala kà à vok, kà akul karabaw kà dza uwana as ŋgərpa kà akul, hadəy.

<sup>14</sup>Kà aŋa azlatatak uwanay gədapəh à akul kà, gədəv kudà à Zəzagəla la makədəd à ahəŋ, ŋgaha la iyaw tugwi kà aŋkul.

<sup>15</sup>Ndzer, Baba uwanay kà, Baba aŋa azladza gesina uwana la zagəla, ŋgaha la azlauwana la vədəh.

<sup>16</sup>Ndzer kà, masla kà la mazləbay, akoray gesina. Kità kà, gədəval kudà kà, kà Masasədök aŋha aŋa mav à akul ndzədə, kà akul aŋa magay la ndzədə la ləv aŋkul la tsəh.

<sup>17</sup>Gədəval kudà babay, kà Yesu Kristu aŋa madz à ahəŋ la ləv aŋkul la tsəh, kà uwana kadiŋaw gəl à masla à vok. Gədəval kudà babay, kà akul aŋa mawoy vok akul à akul. Baŋa kawoyaw vok kà akul à akul, mawoy vok aŋkul adəgay la ndzədə, bokuba ahəf uwana adàhàla slilih aŋha à tsəh iyaw, ŋgaha bokuba gəy uwana atsizl à matatukway à afik lela.

<sup>18</sup>Kiya uwaga akul, la azlaməna gay Zəzagəla anik gesina kà, sələw kà Yesu Kristu awoya anu kaykay. Baməraka kadədaw à uwali, kadədaw à zagəla, kadədaw à afik à agu kà, mawoy akul aŋha kà, bà aga la ahəŋ la abatà.

<sup>19</sup>Gədöv kudá à Zəzagəla kà, kà akul aña masəl mawoyəñ aña, uwana məslala vok aña matsənəñ la paraka dadəñ aw. Kà azlatatak uwana tahəñ Zəzagəla ala, aña mahəñ ləv gami ala suwəñ.

<sup>20</sup>Zəzagəla kà, aslala vok aña madəh tatak gesina. Aduwa gesina, uwana mənəval kà madəhəñ, aduwa madzugway gami gesina, adəhəñ kà la maslay aña, uwana adəh sləray la anu la abà.

<sup>21</sup>Məzləbà masla, anu azlaməna maham à ahəñ mənə gay Zəzagəla gesina, ñgaha Yesu Kristu bay. Məzləbà masla koksikoksi aña tsərəh à awtəy! Amen.

#### **Efesəya 4**

<sup>1</sup>Tsa kiya uwanay kà, gədöv à akul kudá, kà uwana tadüw gi à dañay kà sləray aña Sufəl Yesu Kristu, uwana gədfəhəñ. Kamkam gətuwa à akul à vok kà matuway kà, nəfəw maday delga à uwana Zəzagəla azaləkulla.

<sup>2</sup>Gəw tələmna lela, gəw azladza delga, gəw azlaməna mabasıñ, wòyàw vok akul à akul, ñgaha basəwwəñ vok kà akul à akul babay.

<sup>3</sup>Wədəw vok à uda kà madz à ahəñ la tekula la abà, bokuba uwana Masasəfok apakənula tekula, ñgaha dzəw à ahəñ la lapiya la abà la tataka añkul la abà, kà akul aña magay tekula.

<sup>4</sup>Maham à ahəñ mənə madiñal gəl à vok bokuba vok aña Kristu, vok tekula pəra. Dəgaha Masasəfok bay, kà tekula pəra. Tatak uwana Zəzagəla azalənula kà, anu aña maduwal à adi kà tekula pəra babay aya.

<sup>5</sup>Sufəl gami Yesu kà tekula, madiñal gəl à vok gami kà tekula, ñgaha tetəvi aña batem bay kà tekula.

<sup>6</sup>Zəzagəla kà tekula pəra, uwana masla Baba aña azladza gesina. Akoray lakəl aña tatak gesina, aga la slaka gesina, aga la azlatatak gesina la abà babay.

<sup>7</sup>Kəla uwabeyuwi gami gesina abəzal mavəy la aña la aña, bokuba uwana asa à Yesu Kristu, avà à anu.

<sup>8</sup>Uwaga bokuba uwana tatsetsèr à wakitə Zəzagəla à abà, tatsetsèr lakəl aña Kristu kà: 'Mok uwana adada à afik à zagəla kà, akəđasl azlaməna məzam aña, ahahay atà à tsəh, adàla atà à afik bay. La lig la ahəñ avəh azlamavəy à azladza la gudəñ la vok.'

<sup>9</sup>Hadəy, la magodəy: Maday à zagəla, mana asal magodəy ma? Uwaga asal magodəy kà, asà à vədəh tsərəh à kutso à abà dadəñ.

<sup>10</sup>Dza uwana asà à abanay à vədəh kà, bə dza gə la uwana ahəd à zagəla. Amatsikakadəy aña zagəla à afik, kà masla aña makoray lakəl aña azlatatak gesina.

<sup>11</sup>Masla la uwana avəh azlamaslay à azladza. A azlaməna masləlay anik avà à atə maslay, kà mad maz gay aña. A azlaanik mapəh à atə gay ahəl aña Zəzagəla, kà mapəh à azladza, à azladza anik bay, avà à atə maslay kà maz gay aña à azladza uwana tasəl Zəzagəla aw. A azladza anik bay, avà à atə maslay kà manəñla

azlamaham à ahəŋ mənə gay Zəzagəla, ŋgaha azlaanik babay kà, avà à atà maslay kà matapla azladza anik.

<sup>12</sup>Avàh sləray uwaga kiya uwaga, kà masla aŋa madàh azlaməna gay Zəzagəla à ahəŋ, kà madàh sləray aŋha, kà maham à ahəŋ mənə gay Zəzagəla uwatà à vok aŋa Kristu aŋa mad à huma à gay.

<sup>13</sup>Ada à huma à gay la mawad' vok à uda kà, tsəràh à uwana anu mədàgay tekula, kà uwana mədav ləv gami à Yesu gesina, ŋgaha gesina gami məsəl masla. Kiya uwaga mədàgay azlazil, mədàgay sətaka bokuba Kristu bay.

<sup>14</sup>Kità kà, la kaslà uwaga mədàgay azlabəza aya aw. Azlaməna mapapatàh dza uwana tapapatàh à azladza la dèmdem aŋatà kà, la azlagay aŋatà uwana tapapatanula, tadàza anu à tetəvi à tsəh la matapanula aŋatà aw, bokuba uwana afaɸ abəlak kəslah iyaw, wùlà à abanay, wùlà à abanay lakəl iyaw aw.

<sup>15</sup>Məga kiya uwaga aw, məwoya vok kà anu à anu, ŋgaha məpàh vok dziriga la tataka gami la abà, kà anu aŋa magay bokuba Yesu ndzer, à masla uwana lakəl gami la afik gesina.

<sup>16</sup>Masla la uwana abək azladza à ahəŋ gesina, kà atà aŋa magay tekula bokuba vok aŋa dza uwana atsà vok la azlaamil. La vok aŋa dza kà kiya uwaga babay. Baŋa azlamanabay aŋa vok tadàh sləray aŋatà lela kà, vok gesina azigənay lela. Kiya uwaga babay la maham à ahəŋ mənə gay Zəzagəla, baŋa azladza tawoya vok kà atà kà atà kà, maham à ahəŋ uwana vok aŋa Kristu kà, agay la ndzəɸa kaykay.

<sup>17</sup>Tatak uwana asa à gi mapəhay kà gəpəhay la sləm aŋa Sufəl, gi gəɸaŋ à afik la magoɸay kà, kanəfaw tetəvi uwana azlauwana tasəl Zəzagəla aw tanəfay aw, kà uwana atà kà tadzugway kà azlatatak deydayga pəra.

<sup>18</sup>Madzugway aŋatà kà mələs gà. La huma aŋa sifa mawga, uwana Zəzagəla avày kà, atà kà bokuba azlaməlokga, kà uwana atà la gəl dzaŋɸdzaŋga hawhahaw, ŋgaha kiya uwaga kà tasəl tetəvi aŋa Zəzagəla aw.

<sup>19</sup>Ziruwi aŋatà la ahəŋ aw, tavà vok aŋatà kà azlatatak mawisiga pəra, ŋgaha tatsizl à ahəŋ aw.

<sup>20</sup>Kà aŋkul kà, Kristu atàpakulla kiya uwanay aw.

<sup>21</sup>Masla la uwana kakəsàwwalla gay la ahəl ala aw takay? Akul uwana kahamàw gay à vok la Kristu kà, tatàpakulla azlatatak delga, uwana apəhànula uwaga aw takay?

<sup>22</sup>Tsa baŋa kiya uwanay kà, kanəfaw tetəvi, uwana kanəfàhàw uwarà aya aw. Tsòkw vok ala, kiya matsokw makatsekatsa la vok ala, kà uwana tetəvi uwaga kà awis akul ala, kà uwana kawòyàhàw azlatatak mawisiga la mapapat gəl aŋkul.

<sup>23</sup>Vàw tetəvi à Zəzagəla, kà mazəɸ madzugway aŋkul, ŋgaha la ləv aŋkul aŋa magay mawga.

<sup>24</sup>Nəfàw tetəvi mawga uwana Zəzagəla adahàŋ à ahəŋ kà aŋa magay kiya masla. Kiya matsokw lukut mawga à vok, kà uwana tetəvi uwatà kà dziriga, akəs à Zəzagəla à gəl.



- <sup>25</sup>Kiya uwaga kà, kadàhaw fida aya aw, pèhàw kà dziriga la azladza anik pèra, kà uwana anu gesina mēdagay tekula.
- <sup>26</sup>Baṅa kapakàw ləv kà, dāhàw haṅkəli kà mapak ləv adala akul à madēhəṅ mawisiga à abà aw. Baṅa kadapakaw ləv, kadzaw à ahəṅ tsərəh à matəd à ahəṅ afats aw.
- <sup>27</sup>Kavàw tetəvi à seteni aw.
- <sup>28</sup>Azlaməna gəl tasaka à gəl, tadāha sləray la ahəl aṅatà, kà atà aṅa mazlak azlauwana tanəkudā tatak babay.
- <sup>29</sup>Pèhàw kà azlagay uwana tazigəṅ azladza anik, awkà kapəhaw azlagay deydayga aw; la tetəvi aṅa Zəzagəla la ama kà, pèhàw kà azlagay uwana azladza taslay kà aṅa matsəbal sləm lela.
- <sup>30</sup>Kavàw ṅərpə à Masasədok Zəzagəla, uwana la ləv aṅkul la tsəh aw. Masasədok uwaga kà, masəlay uwana Zəzagəla afà à akul à vok, kà masla mapəhla ala kà akul azlaaṅha. Apəhla ala babay kà bawbaw, kà adàbəl anu aṅa tetuwa.
- <sup>31</sup>Sàwla azlatatak dēhakakga à uda la ləv aṅkul la tsəh gesina la maf dza à ləv à abà la mapak ləv. Kabayaw vok gay aw, katsakaw vok magodāhay à gəl aw, ṅgaha bay, kagaw azlaməna makəsafər aw.
- <sup>32</sup>Gàw tələmma la slaka azladza anik, dāhàw delga à azladza anik babay aya, matsahawwaṅ à vok ala, kà à akul à akul, kà tatak uwana Kristu adāhəṅ kà aṅkul.

## Efesəya 5

- <sup>1</sup>Lagonay, kagaw azlabəza aṅa Zəzagəla, uwana awoya akul. Tsa kiya uwanay kà, gəw bokuba masla.
- <sup>2</sup>La azlatatak gesina uwana la abà kadāhaw à waṅ kà, wòyàw azlaməna magay aṅkul bokuba uwana Kristu awoya anu. Mamətsay uwana akəs kà, kà masla mapakay bokuba tatak matuwulla à anu à gəl, uwana akəs à Zəzagəla à gəl.
- <sup>3</sup>Lagwa kà, kagaw azladza aṅa Zəzagəla. Kadāhaw mabila la azlatatak mawisiga anik anik babay aya aw. Kafaw yewdi à tatak aṅa azladza à tsəh aw. Baməraka bà mapəh gay lakəl aṅha kà, kapəhaw aw, ziruwī.
- <sup>4</sup>Delga kà aṅa mapəh azlagay ziruwiga aw, kusoṅu, ṅgaha la azlamatsakasl à gay deydayga kà delga aw. 'Kikay', gòdāw kà à Zəzagəla pèra kà tatak uwana adāhəṅ.
- <sup>5</sup>Səlāw kà, azlaməna mabila, ṅgaha la azlaməna madāh tsəhay tatak mawisiga uwaga, azlauwana tafa yewdi à tatak aṅa azladza à vok, la azlaməna masləkaw mazlazlay, la azlaməna huṅwa kà atà babay, tadābəza makoray aṅa Zəzagəla la aṅa Kristu tetuwa aw, kà uwana azlatatak uwaga tahəd à atà à adi dāduwa gay Zəzagəla.
- <sup>6</sup>Azladza tavavara akul la azlagay deydayga aw, kà azlatatak mawisiga uwaga la uwana Zəzagəla apakà ləv, ṅgaha apaka ləv gesina lakəl aṅa azlauwana takweska gay aṅha.

- <sup>7</sup>Kità kà, katapaw ahàl à kəsłaf à abà akul nna aw.
- <sup>8</sup>Uwarà kà akul la mələs la abà. Ama lagonay kà, akul la uđaka la abà, kà uwana akul azlaaŋa Sufəl Yesu. Kiya uwaga kà, nəfaw maday aŋa azlauwana atà la uđaka la abà.
- <sup>9</sup>Uwana gəgodf uwaga kà, kà uwana uđaka kà avà azlatatak delga gesina, azlatatak dziriga, ŋgaha azlatatak dzəba aŋha səla aw gə.
- <sup>10</sup>Wədaw vok à uda, kà akul aŋa masəl azlatatak uwana akəs à Sufəl Zəzagəla à gəl.
- <sup>11</sup>Kafaw ahàl aŋkul à sləray aŋa azladza uwana à abà, tadāh sləray mələs aw. Ama pəhəwatàla sləray mawisiga aŋatà, uwana tadəhəŋ la dazuwaya.
- <sup>12</sup>Azlatatak uwana tadəhəŋ la gəl la gəl kà kiya katsal à gay aw, ziruwi.
- <sup>13</sup>Baŋa tapəhla azlatatak uwaga ala gesina la paraka kà, kanəŋaw madz à ahəŋ aŋatà.
- <sup>14</sup>Kà uwana dèwdèw tatak uwana adapəhla vok ala, kà uđaka. Gay gə la uwaga à uwana tagòd: 'Tsən ala à kak uwana kadzehàl, Sà à afik la mamətsay la abà, Kà Kristu aŋa mav à ka uđaka!'
- <sup>15</sup>Kiya uwaga kà, akul kà dāhəwwəŋ kà delga pəra, kəla kaslā gesina, dāhəw haŋkəli la maday aŋkul, kadaw bokuba maday aŋa azladza uwana tasəl tatak aw aw, ama dāw kà bokuba azladza matsihilaga.
- <sup>16</sup>La məlo uwanay azladza tadāh azlatatak mawisiga aŋuvaw kà, akul kà, dāhəwəŋ kà delga pəra kəla kaslā gesina.
- <sup>17</sup>Kagaw azlakusoŋu aw, ama faw sləm à ahəŋ kà matsən tatak uwana asa à Sufəl gami kà madəhəŋ.
- <sup>18</sup>Guzu akadf à akul aw, kawisaw vok aŋkul ala aw. Gəw kà say mahənlaga la Masasədok Zəzagəla pəra.
- <sup>19</sup>Həbəw azlamahabay aŋa Zəzagəla, ŋgaha azlamahabay anik, uwana Masasədok avà à akul. Həbəw uwaga à Sufəl gami, zləbəw masla la ləv aŋkul gesina.
- <sup>20</sup>Kikay, gòdāw à Zəzagəla Baba, kà azlatatak gesina la sləm aŋa Sufəl gami Yesu Kristu. Kikay, gòdāwwal la kaslā gesina.
- <sup>21</sup>Akul uwana kadiŋaw gəl à Yesu Kristu à vok, kəsəw vok gay la ahàl ala kà akul à akul, bokuba uwana kadāhəwwəŋ à Kristu.
- <sup>22</sup>Akul azlamis, kəsəw gəl à ahəŋ la huma aŋa azlazil aŋkul, kiya uwana kakəsaw gay aŋa Sufəl Yesu.
- <sup>23</sup>Kà uwana zil kà sufəl aŋa mis aŋha, bokuba Kristu uwana Sufəl aŋa maham à ahəŋ məna madiŋal gəl à vok. Kristu la uwana gəl gə, maham à ahəŋ məna madiŋal gəl à vok kà, kà vok aŋha, ŋgaha masla la uwana masla abəl atà.
- <sup>24</sup>Tsa baŋa kiya uwanay kà, azlamis takəsa gəl à azlazil aŋatà à ahəŋ lela bokuba maham à ahəŋ məna gay Zəzagəla, uwana akəs à gəl à Yesu Kristu à ahəŋ.

<sup>25</sup>Akul azlazil, wòyàw azlamis aṅkul babay, bokuba Yesu Kristu uwana awoya azladza aṅha, ṅgaha amèts kà aṅatà.

<sup>26</sup>Amèts, kà maham à ahəṅ məna gay Zəzagəla aṅa magay aṅa Zəzagəla aṅa tetuwa. Apalləṅ ala la iyaw ṅgaha la gay aṅha. Kiya uwaga taga tsikasлага kà Zəzagəla.

<sup>27</sup>Kà uwana asal kà atsa à waṅ à huma aṅha, la mazləḅay kokudà aləh, tsidəṅa lela, kokudà mawisiga, sərḁaka kokudà madəḅani à tatak anik.

<sup>28</sup>Azlazil à bay kà kiya uwaga. Akul azlazil, wòyàw aṅkul bokuba uwana kawoyaw gəl aṅkul, dza uwana awoya mis aṅha kà, awoya gəl aṅha babay.

<sup>29</sup>Dza la ahəṅ, aslala vok apəsew vok aṅha aw, say avəl tatak may, afal sləm lela bokuba uwana Kristu afa sləm à azlaməna maham à ahəṅ məna gay Zəzagəla.

<sup>30</sup>Kà uwana anu gesina, mədagay bokuba vok aṅha, bokuba uwana tatsetsèr à wakità Zəzagəla à abà:

<sup>31</sup>'Kà uwaga zil asak baba aṅha la iyà aṅha, kà atà aṅa maham gay à vok la mis aṅha, atà səla aya aw, tapakà vok tekula.'

<sup>32</sup>Gay uwanay kà atapànula tatak dzəḅa aṅha səla aw gə. Apəhay kà lakəl aṅa Kristu la maham à ahəṅ məna madiṅal gəl à vok aṅha.

<sup>33</sup>Kiya uwaga kà, aṅkul babay. Kəla uwabeyuwi aṅkul awoya mis aṅha, bokuba uwana awoya gəl aṅha. Azlamis kəsàw gay aṅa azlazil aṅkul.

## Efesəya 6

<sup>1</sup>Azlabəza, kəsàw gay aṅa azlababa aṅkul la azlaiyà aṅkul. Delga kà azlauwana tahamà gay à vok la Sufəl Yesu tadəhəṅ kiya uwanay.

<sup>2</sup>Tekula aṅa azlamapəhay agod: 'Kəs gay aṅa baba la iyà aṅak!' Mapəhay uwaga kà mapəhay matera, uwana Zəzagəla azàṅ à uwana à adi, apəh à ahəṅ.

<sup>3</sup>Uwaga agòḁ kà: 'Baṅa kasləkaw atà kà, adagay delga kà aṅak, kadàsafay məṅga la gudəṅ uwanay la vok.'

<sup>4</sup>Akul azlababa aṅa azlabəza, kadəhawla ləv à azlabəza aṅkul à huḁ aw, dzadzaraw atà lela. Tapawatàla azlatatak, tsetsehawatàla, bokuba uwana Sufəl Yesu apəh à akul ala tetəvi.

<sup>5</sup>Azlamayà kəsàw gay aṅa azlamənga aṅkul la gudəṅ uwanay la vok. Tsənàw atà. Dgaha hòyàw yewdi aṅa atà, səklàw la huma aṅatà, dāhàw sləray la ləv tekula. Aṅṅà kiya uwaga kà, kakəsaw Kristu.

<sup>6</sup>Kadāhaw sləray kà huma yewdi aṅatà pəra bokuba aṅa azlauwana asa atà kà azladza aṅa mazləḅ atà aw. Səlàw kà, akul azlaməna sləray aṅa Kristu, ṅgaha dāhàw azlatatak uwana asa à Zəzagəla gesina la ləv tekula.

<sup>7</sup>Dahàw sləray la ləv tekula bokuba uwana naka kadāhaw sləray aṅa Kristu, awkà bokuba uwana kadāhaw sləray aṅa azladza aw.

- <sup>8</sup>Sèlàw kà, kèla azlatatak delga, uwana dza adèhəŋ kà, Sufəl Yesu Kristu adàpəlal. Adàgay mayà, adàgay masla makor gəl.
- <sup>9</sup>Akul azlaməŋga aŋa azlamayà, dāhàw delga à azlamayà aŋkul babay, kafaw atà gasa à gəl aw, kà uwana kasəlaw kà, gesina aŋkul kà, akul aŋa madzahaga tekula uwana la zagəla la afik. Masla kà avah dza mavàhay aw.
- <sup>10</sup>Gay gulo uwana asa à gi makədàlla gəl kà, gàw la ndzəda la ahəl aŋa Sufəl gami, la ndzəda məŋga aŋha la abà.
- <sup>11</sup>Hèlàw kazlaŋa aŋa guvəl uwana Zəzagəla abək à akul gesina, kəsàwwəŋ la ahəl, kà akul aŋa mapalla guvəl la seteni, kà aŋa seteni apapat akul, kà akul aŋa mahəl la ahəŋ la masla.
- <sup>12</sup>Guvəl uwana məpay kà, məpay kà la azladza aw, məpay kà la azlamasəsəfok mawisiga, ŋgaha la azlasufəl aŋatà, uwana takor gudəŋ à vok mawisiga uwanay, məpa guvəl la azlatatak mawisiga gesina, uwana atà la ndzəda la afad la abà la zagəla.
- <sup>13</sup>Hèlàw kazlaŋa aŋa guvəl, uwana Zəzagəla abək à akul gesina, baŋa guvəl uwana akəl akəl gə, kà akul aŋa mahəl la ahəŋ. Atà aŋa magəf ndzəda à afik, ŋgaha kà aŋkul aŋa masakala slaka aw.
- <sup>14</sup>Kità kà, dāhàw vok à ahəŋ, gàw azladza dziriga, azlatatak dziriga kà kalkal la parapara, uwana kawadla vok ala ŋəts, kà akul aŋa madāh vok à ahəŋ lela. Dàw la tetəvi dziriga aŋa Zəzagəla la ama, kà uwana baŋa kadāhawwəŋ kiya uwaga kà, adapakay kà bokuba slarapay makəla, uwana kawadāhawla vok ala, kà madz akul à ama.
- <sup>15</sup>Zàw gay marabəŋ, uwana av lapiya à azladza kokudà may vok, uwaga kà kalkal bokuba uwana kabəkaw kwimik à asik kà maday la lela la tetəvi aŋa Zəzagəla la tsəh.
- <sup>16</sup>Vàw ləv aŋkul à Sufəl Yesu la kaslā gesina, bokuba uwana guloku aga akul la ahəl, kà godam uwana seteni amal à wəŋ, aŋa mabəz akul aw. Baməraaka magur adagay la godam uwaga lakəl bay, kà guloku adzalla à ama.
- <sup>17</sup>Tatak uwana Zəzagəla atəfla à akul kà kalkal huməz gəl aŋa guvəl, uwana tafa à gəl kà madz à gəl à ama, ŋgaha zəbàw katsakar aŋa Masasəfok, uwana Zəzagəla avà à akul babay, uwaga kà gay Zəzagəla.
- <sup>18</sup>Dəvəw kudà à Zəzagəla la ləv tekula la kaslā gesina, kəlàw gay la ndzəda aŋa Masasəfok. Dzàw à ahəŋ la adi, karuwaw vok ahəŋ aw, dəvəw kudà koksikoksi, kà azladza aŋa Zəzagəla gesina.
- <sup>19</sup>Dəvəw kudà à Zəzagəla kà aŋulo babay, kà Zəzagəla aŋa mav à gi gay dziriga uwana gədəpəhay, ŋgaha kà gi aŋa maz gay marabəŋ kokudà guba, kà gi aŋa mafətal à adi ala la paraka.
- <sup>20</sup>Kà gay marabəŋ uwaga Yesu Kristu afà gi à ahəŋ, kà masla masləl gi aŋha, kà gi aŋa mad maziŋ à azladza anik, baməraaka gədagay la daŋay bay kà, kà guba aŋa makəs gi aw, kà gi aŋa mapəhay la dazuwaya, bokuba uwana asa à Zəzagəla gəpəhay.

<sup>21</sup>Tisik, deda gami uwana məwoyaŋ, adəh sləray aŋa Sufəl gami la ahəl səla, adəpəh à akul madz à ahəŋ gulo, kà akul aŋa masəl uwana gədeheŋ gesina.

<sup>22</sup>Uwana gəsləl masla à slaka aŋkul kà, kà akul aŋa masəl madz à ahəŋ gami, ŋgaha kà masla aŋa madzəredəh akul à uda babay.

<sup>23</sup>Zəzagəla Baba, la Sufəl gami Yesu Kristu tavà à akul lapiya, à akul azladedə gesina kà, kasəlaw mawoy vok kà akul à akul, ŋgaha kadiŋaw gəl à Yesu Kristu à vok.

<sup>24</sup>Vok mahamay aŋa Zəzagəla agay la azladza uwana tawoya Sufəl gami Yesu Kristu, la masal uwana adəv à gay aw.

## Filipiya

### Filipiya 1

<sup>1</sup>Gi Pol anu la Timotawus uwana anu azlaməna sləray aŋa Yesu Kristu, à uwana mətsetser à akul wakità uwanay. Mətsetseray kà akul azlaməna madiŋal gəl à Zəzagəla à vok la Filipiya, akul gesina uwana akul la ahəl aŋa Yesu Kristu. Mətsetser babay à azlamasiga, ŋgaha à azlauwana tadàh sləray la tataka aŋkul la abà, à akul məna madiŋal gəl à vok babay.

<sup>2</sup>Zəzagəla Baba la Sufəl gami Yesu Kristu tapisakulla gay à vok la mav à akul lapiya.

<sup>3</sup>Kəla uwana gədzugw à akul, 'Kikay', gəgodàh à Zəzagəla kà akul.

<sup>4</sup>Kəla uwana gədəv kudà à Zəzagəla kà aŋkul kà, gəvalàh à zagəla.

<sup>5</sup>'Kikay', gəgod à Zəzagəla, kà uwana mədaham gay à vok anina dagay la madzəka à mok uwana kapakàw azlaməna manəfay tsərəh à lakana.

<sup>6</sup>Ndzer, gəsəl kà Zəzagəla, uwana adzəkà madàh sləray delga la ləv aŋkul la tsəh, adakedəl gəl à ahəŋ, adahənəŋ ala la mavakay, uwana Yesu Kristu adàwul à waŋ.

<sup>7</sup>Delga à uwana gədzugway kiya uwanay lakəl aŋkul, kà uwana gəwoya akul la ləv tekula, kà uwana anina kà, Zəzagəla adàhəŋ delga kà akul aŋa mazlak gi la kaslà uwana gəga la daŋay, à mok uwana gəpəh gay marabəŋ la huma aŋa masla seriya, gəgəf à dziriga à afik.

<sup>8</sup>Zəzagəla asəl kà gəpəh fida aw, gəwoya akul kaykay, Yesu Kristu la gəl aŋha, uwana la gi la abà, la uwana awoya akul.

<sup>9</sup>Gədəv kudà à Zəzagəla kà akul aŋa mawoy vok kà akul à akul kaykay, ŋgaha kà kadəsəlaw dziriga, kà akul aŋa masəl azlatatak delga gà la azlatatak mawisiga.

<sup>10</sup>Kasàwàni azlatatak delga gà kiya uwaga, ŋgaha kadàgaw sətaka, ŋgaha dza aŋa masləh à akul ala vok la mavakay uwana Kristu adàwul à waŋ aw.

<sup>11</sup>Kadàfahahaw azlatatak delga gà la ndzəda aŋa Yesu Kristu pəra. Azladza uwana tadənəŋ uwaga kà, tadàzləb Zəzagəla tadàsləkaway babay.

<sup>12</sup>Azladeda gulo, asa à gi kà kasəlaw, kà azlatatak uwana tabəz à gi, adala gay marabəŋ à huma à gay hadəy, uwaga kà akəsəŋ à ahəŋ aw.

<sup>13</sup>Kà uwaga à uwana azlaslodzi uwana tanaŋla gəy aŋa sufəl aŋa azla Rom, la azladza anik gesina tasəl kà: Gi la daŋay kà Yesu Kristu.

<sup>14</sup>Ŋgaha aya adzərədàh azlaməna madiŋal gəl à vok ala aŋuvaw la tetəvi aŋa Sufəl gami Yesu la tsəh, kurit yewdi agod à atà aw, taslala vok aŋa mapəh gay Zəzagəla la dazuwaya.

<sup>15</sup>Azladza anik aŋatà tapəhay lakəl aŋa Yesu Kristu kà, kà uwana maŋor aza à atà kà gi, asa à atà mas à gi ŋgərpa. Ama kà aŋa azladza anik kà, taza gay Zəzagəla la ləv tekula.

- 16**Tadēhəŋ kiya uwanay kà, kà uwana tawoya gi, kà uwana tasəl kà Zəzagəla la uwana asləl gi à waŋ à abanay, kà maz gay marabəŋ à azladza la dziriga.
- 17**Ama azladza anik uwaga kà, tapəh gay aŋa Yesu Kristu kà, kà uwana asa à atà magay mənŋa kà gi, tapəhay kà la matsəp gay à gay, tayàh maz à gi à ŋgərpa à abà la daŋay.
- 18**Kà madēhəŋ kiya uwanay kà, aza à gi aw. Amiyaka tadəpəhay la ləv delga, baməraka la ləv mawisiga, taziŋ kà gay aŋa Yesu Kristu: Ŋgaha gərabay kà uwaga. Bə la dziri gəda à huma à gay la marabay kà uwaga.
- 19**Kà uwana gəsəl kà azlatatak uwaga gesina adəpaka à vok, Zəzagəla adətəf gi la uwaga, kà uwana kadəvwaw kudà kà gi, ŋgaha aya Masasədok aŋa Yesu azlak gi babay.
- 20**Tatak uwana gəfa madzugway gulo à afik, à gəkuday kà, kà makəlla gi zirui à gəl tetuwa aw, ama kà gi aŋa madzərəf ala la abà, ŋgaha asa à gi kà lagonay, baŋaw la kaslā gesina, baŋa gi la sifa, baməraka gədamətsay, azladza aŋa masləkaw Yesu Kristu kà gi.
- 21**Kà aŋulo kà, baməraka gədəgay la sifa, Yesu Kristu aduwaŋ, ŋgaha mamətsay kà masik gulo.
- 22**Baŋa gədza à ahəŋ la sifa kà, gədādah sləray uwana adəzlaka azladza. Lagwa kà, gəsəl tetəvi uwana gəkəsani aw.
- 23**Azlatatak səla uwaga tagazlla gi à gəl. Gi kà, gəwoyaŋ kaykay kà say mamətsay, kà gi aŋa mad manəŋ Yesu Kristu uwaga la uwana aduwa vok kà madz à ahəŋ la sifa.
- 24**Ama baŋa gədza à ahəŋ la sifa, uwaga akəsa vok kà akul.
- 25**Gəgədaŋ à afik kà kiya uwanay gəgodf à gi, gəsəl babay kà gədādza à ahəŋ la sifa, ŋgaha mədādza à ahəŋ anina. Ŋgaha madz à ahəŋ la tetəvi aŋa Zəzagəla la tsəh aŋa mad à huma à gay, ŋgaha kà akul aŋa marabay.
- 26**Kità kà, baŋa gədasa à uda la daŋay, la mok uwana mədəgay anina aya kà, kadəzləbaw Yesu Kristu mənŋa kà gi.
- 27**Aganay à tatak uwana akəsa à vok, nəfaw tetəvi bokuba uwana gay marabəŋ aŋa Kristu apəh. Baməraka gədāda à awtəy à slaka aŋkul, baməraka gədāda à awtəy aw, gətsenəŋ kà kadzaw à ahəŋ la paŋaw tekula, ŋgaha kà kadahaw sləray la ləv tekula, kà gay marabəŋ aŋa mad à huma à gay.
- 28**Guba akəs akul kà azlaməna məzam aŋkul aw. Baŋa guba aza à akul aya aw kà, atà tadəsəlay kà tadəzila, ama akul kà, Zəzagəla adabəl akul, masla la uwana adapəhatāla uwaga.
- 29**Zəzagəla avà à akul tetəvi kà madiŋ gəl à Yesu Kristu à vok, ŋgaha kà mas ŋgərpa kà Yesu.
- 30**Kanəŋaw guvəl uwana gəpəh. Lagonay aya katsənawwaŋ kà gəpay aya, ŋgaha akul babay kadadaw à abà aŋa mapay.

## Filipiya 2

- <sup>1</sup>Tsa kahamaw gay à vok la Yesu, kà akul la ndzəḍá, tsa awoya akul kà, akul la ndzəḍá. Tsa kahamaw gay à vok la Masasəḍók Zəzagəla la abà kà, wòyàw vok kà akul à akul, ŋgaha vok ahamà akul kà akul à akul babay.
- <sup>2</sup>Tsa baŋa kiya uwanay kà, wòyàw vok kà akul à akul, gàw la madzugway tekula, hamàw gay à vok, ŋgaha gàw la paŋaw tekula, baŋa kaḍáhawwaŋ kiya uwaga, gəḍàḍeḍf gay ləv.
- <sup>3</sup>Kadzugwaw kà à gəl aŋkul pəra aw, kaḍáhaw zlapay aw, wùlàwla gəl à vəḍáh, nəŋàwwəŋ azladza anik kà bokuba taḍuwa akul.
- <sup>4</sup>Kəla uwabeyuwi aḍáha delga à azladza anik, awkà kanərozaw gəl aŋkul pəra aw.
- <sup>5</sup>Dzàw à ahəŋ bokuba uwana Yesu Kristu adzà à ahəŋ.
- <sup>6</sup>Haday kà, masla kà tekula la Zəzagəla, ama maŋor akəs, kà masla aŋa magagazləla gəl aŋha la Zəzagəla aw.
- <sup>7</sup>Asàk à uwaga gesina, apakà mayà la tatak gesina la abà, apakà dza. Uwana adapaka dza kà,
- <sup>8</sup>awùlla gəl à vəḍáh, akəs mapəhay aŋa Zəzagəla, akəs mamətsay zlazladaga, amətsay à ahəf à adi.
- <sup>9</sup>Gay gà la uwaga, Zəzagəla afà à slaka mazləḍbay gà à abà, avəl sləm uwana aḍuwa azlasləm anik gesina.
- <sup>10</sup>Kà azlatatak uwana la zagəla, la azlauwana la vəḍáh, la azlauwana la tsəh iyaw gesina, la mok uwana tadàtsən sləm aŋa Yesu, gesina aŋatà tadàsa à waŋ, tadəkəḍeḍfàl à ahəŋ.
- <sup>11</sup>Ŋgaha gesina aŋatà tadəpəhay la dazuwaya, kà Yesu Kristu kà Sufəl lakəl aŋa tatak gesina. Kiya uwaga tadàzələḅ Zəzagəla Baba.
- <sup>12</sup>Azlaməna gay ləv gulo, kəsàw gay Zəzagəla. Uwarà, mok uwana məgà la slaka gà, kakəsaw gay aŋha. Lagwa kəsàw gay aŋha ḍaḍuwa à gay, uwana gi la slaka aŋkul. Uwaga asal magoḍay, kà Zəzagəla adahəl akul, ḍáhàw sləray la masəkulay, la dziriga.
- <sup>13</sup>Kà uwana Zəzagəla adadzəka maḍàh sləray la akul la abà, kà akul aŋa mawoy azlatatak uwana akəs à masla à gəl, ŋgaha kà akul aŋa maḍàh atà.
- <sup>14</sup>Kəla sləray gesina uwana kaḍáhawwaŋ kà, kaŋoŋuzaw, kagazlaw aw.
- <sup>15</sup>Kà akul aŋa magay sətaka, lela, ŋgaha akul aŋa magay azlabəza aŋa Zəzagəla kokudà tatak mawisiga la akul la abà. Akul la tataka aŋa azlaməna fida la abà, la azlamawisiga, gàw la tataka aŋatà bokuba azlaudàka uwana taḍay.
- <sup>16</sup>Baŋa kaḍáhawwaŋ kiya uwaga kà, akul kapəhaw atà gay uwana av sifa. Ŋgaha la mavakay uwana Yesu Kristu adàsa à ahəŋ kà, gəḍàḍeḍf gay ləv la huma aŋha kà akul, kà uwana apəhla sləray dzaŋdzəŋga uwana ala, gəḍáhəŋ kà apaka deyday aw.



<sup>17</sup>Løv uwana kavàw à Yesu, kà kalkal bokuba makəf tatak uwana kakəfaw à Zəzagəla: Zlahaw tadəkəf gi, ngaha aņiz gulo adàhama à makəf tatak delga aņkul uwaga à abà. Baņa apaka kiya uwaga kà, gədagay la marabay, mədəfəf gay løv la slaka gə.

<sup>18</sup>Gàw la marabay ngaha mərəb anina babay.

<sup>19</sup>Baņa 'Ayyà', Sufəl Yesu agof kà, gədàsləl Timotawus à awtày à slaka aņkul, ngaha masla adədzərədgəla bokuba uwana adzərəfəkulla bay.

<sup>20</sup>Dza la ahəņ la slaka gulo, uwana adzugway bokuba aņulo aw, say masla pəra. Masla kà, adzugway kà akul pəra.

<sup>21</sup>Azladza anik kà, tadzugway kà à gəl aņatà pəra, awkà tadzugw lakəl aņa azlatatak aņa Yesu Kristu aw.

<sup>22</sup>Timotawus kà masla kà, kasəlaw maday aņa kà delga. Anu, anu səla kà mədāh sləray la slaka gə kà aņa gay marabəņ, masla azlaka gi à azlasləray à abà, bokuba uwana bəzi azlaka Baba aņa à sləray à abà.

<sup>23</sup>Gəfa kəla gəl à ahəņ, kà seriya gulo adədəv à gay, kà gədàsləlla à awtày à slaka aņkul katskats.

<sup>24</sup>Gi babay kà, baņa asa à Zəzagəla kà, gədàda à awtày à slaka aņkul zewk.

<sup>25</sup>Deda gulo Epafərodit, masləlay aņkul, uwana kaslələw à gi à waņ, kà mazlak gi la azlatatak uwana gənəkudā aņa, mədāh sləray la slaka gə, məpa guvəl la tsəh ala, gədzugw lagonay kà delga, kà gi aņa mawul à akul à awtày aya.

<sup>26</sup>Kà uwana atùw akul à tsəh kà manəņ akul. Gəl adakafəl à vok, kà uwana asəl kà, katsənəwwəņ kà agə la dūvats.

<sup>27</sup>Haday kà, dūvats akəf kudā kudā, awkà naka amətsay. Vok ahamà à Zəzagəla kà aņa, ama kà masla pəra aw, ama kà gi babay, à uwana awurəņ ala kà gi aņa mazaw la gəl aw.

<sup>28</sup>Kà uwaga à uwana asa à gi kaykay kà gəwulla à slaka aņkul, kà akul aņa manəņ masla la marabay, ngaha løv gulo aņa mataslla.

<sup>29</sup>Baņa adàda à awtày kà, kəsàw masla la ahəl səla, kà uwana masla kà, deda aņkul la tetəvi aņa Sufəl gami la tsəh. Sləkəwəw tsəhay dza uwaga.

<sup>30</sup>Kà uwana aləg kà ņuv ņuv, awkà naka amətsay à sləray aņa Kristu à abà. Atùw sifa aņa aw kà, kà masla aņa mahən uwana ala atəm à ahəņ la slaka aņkul la abà kà aņulo.

### Filipiya 3

<sup>1</sup>Azladeda gulo, aganay tatak uwana gəkəfəla gəl à gay gulo, vələhəw à zagəla, kà uwana akul azlaaņa Sufəl Yesu. Gəy vok aw, gay uwana gəpəh à akul uwarə gəwùllal à tsəh aya, ngaha uwaga adəzlaka à akul kà tatak madəhakullaņ mawisiga à vok aw.

- <sup>2</sup>Dahàw haṅkəli la azlakəda, kà uwana azladza uwaga tadəhəŋ kà sləray mawisiga, takad gəl à azladza à vok. Tadzugway kà lakəl aṅa makadav azladza à uda pəra.
- <sup>3</sup>Anu la uwana, anu azlaməna makadav vok à uda dziriga, awkà atà aw. Kità kà, anu la uwana anu tsəhay aṅa Zəzagəla. Anu la uwana mədəv kudà à Zəzagəla la ndzəda aṅa Masasədok tsikasla, ŋgaha məzləb Yesu Kristu, məfà madzugway gami à madz à ahəŋ aṅa azladza à abà aw.
- <sup>4</sup>Agayṅa azlatatak aṅa gudəŋ à vok uwanay akəs vok kà, naka gəslala vok aṅa maf madzugway gulo à uwaga à afik bay. Baṅa dza aslala vok aṅa madàh, uwana azladza gudəŋ à vok tadəhəŋ, gi kà, gəsəl kà, dziriga gulo aduwaṅ aṅa.
- <sup>5</sup>Gi kà, kà uwana gəgədaṅ à afik kà, gi zil Ibəranəŋkowen slilihga, uwana azla Ibəranəŋkowen tayyà gi. Ŋgaha aya kà, gi zil Isərayel, gəsà à uda la tsəhay aṅa Benyamin. Mok uwana tayyì gi, la lig mahənay mtəgis, takədəv gi à uda, mayahudiya à Yahudiya. Gi tekula aṅa azla Farisəya.
- <sup>6</sup>Gənəfà mapəhay gami lela, tsəràh à uwana gətərebàhà azlaməna madinjal gəl à Yesu à vok, ama mapəhay aṅa azla Yahudiya kà, gəpəsəw amiyaka tekula aw, ndzer, gəgə matsizilla à ahəŋ gà la uwaga la abà la lela.
- <sup>7</sup>Gənərəz kà azlatatak uwaga kà apakà kà bokuba mazəb sili təla gulo, ama lagonay kà, kà Yesu Kristu gədasəlay kà, uwaga apakay bokuba azlatatak deyday.
- <sup>8</sup>Ndzer gəpakà azlatatak uwaga ala gesina kà deyday, kà uwana gədasəl Sufəl gulo Yesu Kristu uwana aduwaṅ azlatatak anik gesina. Kà masla la uwana gədakweska uwaga gesina. Gədapaka azlatatak uwaga ala, bokuba azlaàläh, kà gi aṅa məbəz Yesu Kristu,
- <sup>9</sup>ŋgaha kà gi aṅa magay aṅa aṅa tetuwa. Gi dziriga la huma Zəzagəla, kà uwana 'Gəkəs mapəhay aṅa azla Yahudiya', gəgodf aya aw. Tatak uwana agà à gi dziriga la huma aṅa kà, kà uwana gədiṅ gəl à Yesu Kristu à vok. Zəzagəla la uwana apakagəla dziriga, kà uwana gədiṅ gəl à masla à vok.
- <sup>10</sup>Uwaga asa à gi kà tatak tekula pəra, uwaga kà masəl Kristu, ŋgaha ndzəda aṅa uwana awùlla à uda la mamətsay, kà asa à gi babay kà, gəsa ŋgərpa bokuba uwana asàh, ŋgaha gəkəs gəl à ahəŋ bokuba aṅa uwana akəsà gəl à ahəŋ, akəsə mamətsay.
- <sup>11</sup>Baṅa asa à Zəzagəla kà, awulla gi à uda la mamətsay bokuba aṅa bay.
- <sup>12</sup>Gəgodf magay kà: 'Gədəbəza azlatatak uwana gəkuday', gəgodf aw ŋgaha: 'Gi masla tsakana aya aw', gəgodf aw, ama kà aṅa uwaga kà: 'Gəda à huma à gay kà azlatatak uwaga aṅa magay azlaaṅulo. Kà uwana Yesu Kristu adazəba gi à ahəl aṅa.'
- <sup>13</sup>Azladeda, gəgodf kà: 'Azlagulo gədəbəzal adagay', gəgodf aw. Tatak tekula uwana gəfahəŋ kà, tatak uwana la ləv gulo gesina avika gi, gəwadf vok à uda, kà məbəz tatak uwana akud gi la huma.
- <sup>14</sup>Gəda à huma, kà məbəz à gay kabaw, kà gi aṅa məbəz masik, uwana Zəzagəla azalla anu aṅa məbəzal. Masik uwaga madz à ahəŋ la zagəla la masla, kà Yesu Kristu.

<sup>15</sup>Anu uwana mēdapakàh makoz la tetəvi aṅa Zəzagəla la tsəh kà, delga mēdzugway kiya uwanay. Baṅa mēdzugway anik la ləv aṅkul la tsəh, kà Zəzagəla adəpəhakulla la dazuwaya.

<sup>16</sup>Tatak məṅga kà, mēda à huma à gay la tetəvi uwana la tsəh anu la ama, tsəràh à lakana.

<sup>17</sup>Azladeda gulo, nərəzàw maday gulo, nərəzàw kà azladza uwana taday lela, bokuba uwana kanəṅaw maday gami.

<sup>18</sup>Azladza aṅuvaw la ahəṅ, à uwana maday aṅatà apəhla ala kà, kà atà azlaməna məzam aṅa Kristu, uwana aməts à ahàf à adi. Gədapəh à akul uwanay kà asik dəṅ, lagwa kà gəpəh à akul aya, gəpəh à akul kà la iyaw tugwi la adi.

<sup>19</sup>Baṅa kaslà aṅatà adədəv à gay kà, tadàda à akàl à abà, kà uwana tanəfà tatak ziruwi gə, ama tarabay lakəl aṅa uwaga, tadzugway kà azlatatak aṅa gudəṅ à vok uwanay pəra.

<sup>20</sup>Ama anu kà, anu azlaməna gay aṅa Zəzagəla, məkud Sufəl gami Yesu Kristu, masla maḃəl anu, uwana atsa à ahəṅ la zagəla.

<sup>21</sup>Baṅa adàsa à ahəṅ kà, adəḃəḃəla vok gami guḃguḃga uwanay, kà vok gami aṅa maḃəz ndzəḃə bokuba aṅha. Adədàh uwanay kà la ndzəḃə aṅa masəlay, uwana abək tatak gesina à tsəh à asik aṅha.

## Filipiya 4

<sup>1</sup>Azladeda gay ləv gulo, baṅa kiya uwanay kà, dzàw à ahəṅ la titi la abà, tsa akul azlaaṅa Sufəl. Azladeda gəwoya akul kà kayak, asa à gi mədànəṅəṅ akul aya. Gəḃəḃə gay ləv kà akul, akul la uwana kapəhawla kà sləray gulo ala kà delga, à uwana gəts zlapay.

<sup>2</sup>Evodiya atà la Səntis, kamkam gəgod à akul tsa akul azlaaṅa Sufəl Yesu kà, tsənàw vok gay lela.

<sup>3</sup>Kak deda gulo uwana mədàhàw sləray la slaka gə, kamkam, zlakà azlamis uwana anina, kà mədàh sləray məṅga la məs ṅgərpə kà gay marabəṅ aṅa mad à huma à gay. Anina la azla Kəlement ṅgaha la azlaməna sləray anik, mədàh sləray la slaka gə. Zəzagəla atsetseràh sləm aṅatà à wakità aṅa sifa adəv à gay aw à abà.

<sup>4</sup>Tsa akul azlaaṅa Sufəl Yesu kà: Vələhàw à zagəla la kaslà gesina! Gəgod à akul aya: Vələhàw à zagəla!

<sup>5</sup>Pəhàwla dzəḃə aṅha səla aw aṅkul ala la huma, kà azladza aṅa masəlay kà Sufəl kà nekwa atsa à ahəṅ!

<sup>6</sup>Kadzugwaw à azlatatak deyday aw, ama lakəl aṅa tatak uwana aga la ahəṅ aw kà, pəhàwla à Zəzagəla à uwana asa à akul la madəv kudà kà mazlak akul, 'Kikay', gòḃàwwal bay.

- <sup>7</sup>Baŋa kaɗahawwan̄ kiya uwaga, Zəzagəla adàvà à akul lapiya. Lapiya uwaga kà, aduwa azlatatak uwana azladza tatsənà. Adànhəla ləv aŋkul la madzugway aŋkul, ŋgaha kà tatak aŋa maɓəz akul aw, kà uwana akul azlaaŋa Yesu Kristu.
- <sup>8</sup>Azladeda, tatak uwana gəkəɗla à gəl kà aganay: Dzùgwàw kà lakəl aŋa azlatatak uwana delga kà azladza masləkaway. Uwaga kà azlatatak dziriga à uwana məkəs atà, azlatatak uwana dziriga la tetəvi aŋha, sətaka, la azlatatak uwana akəs à azladza à gəl məsləkaw kà atà pəra.
- <sup>9</sup>Azlatatak uwana gətəpakulla, ŋgaha kakəsàw atà, uwana katsənàwwàn̄ la paŋaw gulo, ŋgaha uwana kanəŋàwwàn̄ kà gəɗehəŋ, ɗahàwwàn̄ kiya uwaga! Ɖgaha Zəzagəla uwana avàh à anu lapiya adàɗza à ahəŋ la akul.
- <sup>10</sup>'Kikay', gəgod à Sufəl Yesu la marabay məŋga, kà uwana kadzùgwàw à gi gotənaŋ. Ndzər dagay uwarà kà, kadzùgwàw à gi, ama kaɓəzàw à tetəvi kà mazlak gi aw, la kaslà uwana ada à lig.
- <sup>11</sup>Uwana gəpəh uwaga kà, kà uwana azlatatak anik taləg kà gi à waŋ aw, ama kà uwana gədatapla madz à ahəŋ la marabay la abà, baməraka adagay bà la kaslà uwala beyli.
- <sup>12</sup>Gəsəl uwana gəɗza à ahəŋ, à baŋa tatak adadəv à gay, gəsəl madz à ahəŋ babay, à baŋa tatak gulo la ahəŋ. Gədatapla madz à ahəŋ la kuɗa la abà, gəɗagay la tatak may, amiyaka gəɗagay la may aw, baməraka tasləka gi aw, amiyaka adàsləka gi.
- <sup>13</sup>Gəslala vok aŋa maɗehəŋ à azlatatak uwanay gesina, la ndzəɗa aŋa Yesu Kristu, uwana adzərəɗgəla.
- <sup>14</sup>Ama kaɗahàwwàn̄ kà delga, kà uwana kazlakàw gi, la matərəɓay gulo la abà.
- <sup>15</sup>Akul azla Filipiya, kasəlaw la kaslà uwana gəɗzəkà mazakulla gay marabəŋ la kutso aŋkul la abà, la Makeduniya, ŋgaha gəwùl aŋulo la slaka aŋkul, kà akul la uwana kazlakàw gi pəra. Akul mahəm à ahəŋ mənə maɗiŋal gəl à vok, à uwana məɓàɗla kà vok tatak uwana mənàhkudà aŋha pəra.
- <sup>16</sup>Mok uwana gi la Tesaloniki kà, kaslələw gi azlatatak uwana à waŋ gənàhkudà aŋha kà asik dəŋ.
- <sup>17</sup>Uwaga asal magodəy kà, asa à gi maɓəz tatak aŋkul pəra aw. Gi la marabay kaykay kà, kà uwana gəsəl kà Zəzagəla adapisaakulla gay à vok kà azlatatak uwana kavàhàw.
- <sup>18</sup>Gəɓəzà tatak gesina uwana kaslələw gi à waŋ ɗaɗuwa à gay uwana gənàkudà aŋha. Mok uwana gəɗaɓəzal tatak uwaga Epafərodit aseɗəla à waŋ kà, tatak gesina uwana gənəkudà la ahəŋ. Ɖgaha bay kà, azlatatak aŋkul kà bokuba tatak uwana takəɗ à Zəzagəla slaslərra, azinal lela, akəsəl à gəl.
- <sup>19</sup>Zəzagəla uwana gəsləkaway kà, akor ləmana aŋuvaw. Adàvà à akul kəla tatak uwana kanàwkudà aŋha, adàvà à akul la magola la ahəl aŋa Yesu Kristu.
- <sup>20</sup>Mazləɓay agay la Zəzagəla Baba gami, tsərəh à awtəy! Amen.

<sup>21</sup>'Ayyi', gòdâw à maham à ahəŋ məna gay Zəzagəla, uwana azlaaŋa Yesu Kristu. Azladza uwana la abanay anina tadəhakulla 'Ayyi' babay.

<sup>22</sup>Azlaməna madiŋal gəl à vok gesina 'Ayyi', tagod' à akul, azlauwana tadəhakullaŋ 'Ayyi' kaykay kà, azlaməna hud' gày məŋ sufəl aŋa azla Rom.

<sup>23</sup>Sufəl gami Yesu Kristu apisakulla gay à vok.

## Kolosəya

### Kolosəya 1

<sup>1</sup>Gi Pol uwana Zəzagəla akəsàni gi, kà gi aña magay masləlay aña Yesu Kristu, gətsetser à akul wakità uwanay, wakità aguwa à uda la ahàl aña Timotawus, uwana masla bay kà deda gami la madijal gəl à vok la abà.

<sup>2</sup>'Ayyi', məgodf à akul, akul tsəhay aña Zəzagəla, uwana akul la ahàl aña Yesu Kristu, uwana kanəfaw la ləv tekula. Zəzagəla Baba gami apis à akul gay à vok, ngaha avà à akul lapiya.

<sup>3</sup>'Kikay', məgodf, à Zəzagəla, Baba aña Sufəl gami Yesu Kristu, kəla kaslà gesina uwana mədəv kudà kà akul.

<sup>4</sup>Kikay məgodf, kà uwana mətsənəñ kà kavàw ləv añkul à Yesu Kristu, ngaha kawoyaw azlatsəhay aña gesina babay.

<sup>5</sup>Kadəhawwanj kiya uwanay kà, kà uwana kafàw yewdi à tatak delga uwana à gay, Zəzagəla adadəhəñ à ahəñ kà añkul la zagəla, uwana katsənàwwəñ ngaha adabəzawwanj tsərəh à slaka añkul.

<sup>6</sup>Gay marabəñ uwaga aslèh gəl à ahəñ gesina la gudəñ la vok, apakay bokuba məñ ahàf uwana av mayyay, ngaha añazilà kaykay. Kiya uwaga à gay marabəñ uwaga, ada à huma à gay la tataka añkul la abà, dagay la mavakay terəña uwana katsənàw tapəh lakəl aña gay aña vok mahamay aña Zəzagəla dadəñ la dziriga, tsərəh à lakana.

<sup>7</sup>Katapawla tatak uwaga kà la slaka aña Epafəras, uwana məwoyan. Anina kà, anu azlaməna madəh sləray aña Yesu Kristu. Adəh sləray la ləv tekula, adəh sləray la slaka añkul kà madegolay anu.

<sup>8</sup>Masla la uwana apəh à anu gay añkul, bokuba uwana Masasədok Zəzagəla avà à akul ndzədə kà mawoy azlaməna magay añkul.

<sup>9</sup>Kà uwaga, dagay mavakay uwana mətsənə uwaga, mədavəh kudà à Zəzagəla kà añkul la kaslà gesina. Mədəv kudà à Zəzagəla kà akul aña masəlay la paraka, uwana akəsəl à gəl, ngaha kabəzaw matsihila uwana Masasədok aña avəy, ngaha akul aña matsən azlatatak la tetəvi aña la tsəh.

<sup>10</sup>Kà uwaga kadəbəzaw maday delga, uwana akəsə à vok kà aña Sufəl Yesu Kristu, ngaha kadəfəhawla uwana akəsəl à gəl gesina, maday añkul adàda à huma à gay la madəh delga, ngaha kadəsəlaw Zəzagəla kaykay.

<sup>11</sup>Mədəv kudà babay kà masla adzərədəhakulla aña deyday, ngaha akul aña madz à ahəñ la mabasiñ la abà la ləv tələmma.

<sup>12</sup>'Kikay', gòdàw à Zəzagəla Baba, uwana apəzl à akul tetəvi, kà akul aña mabəz tatak uwana adəhəñ à ahəñ, kà aña tsəhay aña la zagəla la afik babay, la slaka uwana udəka aña la ahəñ.

- 13**Zəzagəla Baba atəfanula à makoray aṅa mələs la abà, masla la uwana abək anu à makoray aṅa Kona aṅha uwana à abà, awoyaṅ.
- 14**Masla la uwana apèlla anu ala, ṅgaha amatsàn tsakana gami ala.
- 15**Dza adanəṅ Zəzagəla la yewdi aw, ama Yesu Kristu uwana azladza tanəṅəṅ kà, masla la uwana maftsa vok aṅa Zəzagəla, à masla uwana malkwoy aṅha, uwana aduwa azlatatak gesina, uwana Zəzagəla adəhəṅ.
- 16**Zəzagəla adəhə tatak gesina kà la ahəl aṅha, azlatatak uwana la zagəla la afik, la azlatatak uwana la kutso la abà la vədəh, la azlatatak uwana yewdi anəṅəṅ, la azlauwana yewdi anəṅəṅ aw babay. La ahəl aṅa Yesu adəhə uwaga, kəla azlatatak gesina, uwana atà la ndzədə la zagəla, baməraka sufəl aṅa azlamalika bay. Kəla azlatatak gesina uwana tasafay, la azlauwana tasafay aw. Zəzagəla adəhə atà la magolla à uda la ahəl aṅa Kona aṅha, ṅgaha abək atà à ahəl aṅha.
- 17**Masla kà, aga la ahəṅ dagay uwarà, à mok uwana gudəṅ à vok adzəka à vok dadəṅ aw, tatak dèwdèw kà la ahəl aṅha, masla la uwana akəs atà la slaka aṅatà la abà.
- 18**Masla la uwana madzahaga aṅa maham à ahəṅ məna gay Zəzagəla gesina. Maham à ahəṅ məna gay Zəzagəla kà, apakà kà bokuba vok aṅha. Masla la uwana adzəkà sifa mawga. Babay kà, masla la uwana matera aṅa mawul à uda la mamətsay, kà masla aṅa maduwoy azladza gesina, la azlatatak gesina.
- 19**Akəs à Zəzagəla à gəl kà madz à ahəṅ aṅha kà, agay kà madz à ahəṅ aṅa Kona aṅha.
- 20**Zəzagəla akəs kà, masləl Kona aṅha à ahəṅ, kà masla aṅa masəl vok, à masla la azlatatak gesina, azlatatak uwana la vədəh la azlatatak uwana la zagəla la afik, ṅgaha afə masəl vok à tataka aṅha à abà la azladza, adəhə uwaga kà la aṅiz aṅa Kona aṅha uwana akèlla à ahəṅ la ahəl la adi.
- 21**Uwarà kà, akul kərəkər la Zəzagəla, kagəw azlaməna məzam aṅha, kà uwana kadzugwaw kà azlatatak mawisiga, kadəhəwwəṅ kà azlatatak mawisiga babay aya.
- 22**Ama lagonay kà, Zəzagəla adasəl vok la anu la mamətsay aṅa Kona aṅha, uwana apakà dza sləb vok aṅha, uwana akəs mas ṅgərpa, kà akul aṅa magay azladziriga. Dəgaha kà masla mapəhla à akul ala la huma aṅa Zəzagəla, kokudə mawisiga, sətaka, kà dza aṅa madukw à akul ala seriya à gəl aw.
- 23**Iyay, dəw à huma à gay la mav ləv aṅkul à Yesu, dzəw à ahəṅ titi kà fafələw aw. Fəw sləm kà azlagay uwana à afik katsənəwwəṅ la gay marabəṅ la abà. Gay marabəṅ uwaga kà, tazəṅ à kəla dza la gudəṅ la vok gesina. Gi Pol babay, sləray gulo kà maz gay marabəṅ uwaga babay.
- 24**Lagonay, gi la marabay la ləv gulo la tsəh, kà ṅgərpa uwana gəsay kà aṅkul, bokuba uwana uwarà Yesu Kristu asə. Gəsa ṅgərpa la vok gulo babay kà maham à ahəṅ məna gay Zəzagəla, uwana vok aṅha. Gəs ṅgərpa kiya uwanay kà, kà sləray aṅha aṅa mahənla.

<sup>25</sup>Zəzagəla afà gi à ahəŋ, kà masla sləray aŋa azlaməna aŋha, kà gi aŋa mazlak akul. 'Zà gay uwanay à azladza gudəŋ à vok gesina!', agòd à gi.

<sup>26</sup>La məl uwarà kà, ahadà gay uwaga à ahəŋ dadəŋ, azladza tasəl aw. Ama lagonay kà, adasəlla à azladza uda la dazuwaya.

<sup>27</sup>Asà à Zəzagəla mapəhla à azladza kà uwana asal madəhəŋ, kà aduwa azlatatak gesina. Gay mahad à ahəŋ gə uwaga, adasa à uda la dazuwaya, kà uwana Yesu Kristu la ləv aŋkul la tsəh. Kà uwana kasəlaw kà, Zəzagəla adədala akul à mazləbay aŋha à abà.

<sup>28</sup>Uwaga ka Yesu Kristu uwana məpəhla à azladza, məpəh à azladza à vok à abà gesina. Mətəpatàla tatak la matsihila uwana Zəzagəla avà à anu. Asa à anu kà azladza gesina uwana la tetəvi aŋa Yesu Kristu la tsəh kà, tadəgay azlazilga.

<sup>29</sup>Kiya uwaga gədəgədəŋ à afik kà, gəwad vok à uda la ndzəda uwana Yesu Kristu avà à gi, kà gi aŋa madəvla sləray uwanay à gay.

## Kolosəya 2

<sup>1</sup>Asa à gi, kà kasəlaw kà, gədadəh sləray məŋga kà aŋkul azla Kolosəya, ŋgaha kà aŋa azla Lawodikiya babay, ŋgaha kà aŋa azladza anik gesina, uwana tanəŋ gi la yewdi aw bay.

<sup>2</sup>Gədəhəŋ kiya uwanay, kà ləv aŋkul aŋa magay la ndzəda, ŋgaha kà akul aŋa mawoy vok akul à akul, la ləv tekula. Asa à gi babay kà, kasəlaw dziriga uwana Zəzagəla afətal à ama ala, lakəl aŋa Kristu, kà akul aŋa madz à ahəŋ la abà lela, ŋgaha Zəzagəla aŋa mapisakulla gay à vok kà aŋa uwaga. Tatak uwana Zəzagəla afətanula à ama ala kà, kà Yesu Kristu.

<sup>3</sup>Yesu Kristu uwaga kà apəzl à anu tetəvi, kà anu aŋa magay anu azlamatsihilaga, ŋgaha kà anu aŋa matsən tatak uwaga. Matsihila uwaga kà bokuba ləmana.

<sup>4</sup>Gəpəh à akul kiya uwanay kà, kà dza aŋa mavavar akul la azlagay namnamga aw.

<sup>5</sup>Baməraka gədagay kərkər la akul, koksikoksi gədzugway kà akul. Gi la marabay kà uwana à uwana kadəhawwəŋ gesina kà la tetəvi aŋha, ŋgaha la uwana kavəw ləv aŋkul à Kristu, kadzəw à ahəŋ lela.

<sup>6</sup>Lagonay kà, kakəsəw kà Yesu Kristu kà Sufəl aŋkul. Kiya uwaga kà, dəw la maham gay à vok la abà la masla.

<sup>7</sup>Dzəw à ahəŋ la ahəl aŋha bokuba ahəf uwana adàla slilih à kutso à agu kərkər. Dəw kà à huma à gay. Gədəwəŋ à afik à maval ləv aŋkul bokuba uwana tatəpakulla. Kikay gədəw à Zəzagəla koksikoksi babay.

<sup>8</sup>Dahəw haŋkəli kà dza aŋa mavavar akul la matsihila deydayga aw. Matsihila uwaga kà, asa à uda kà la madzugway aŋa dza la abà, ŋgaha la azlamasədək mawisiga, uwana atà la vədəh la gudəŋ uwanay à vok. Asa à wəŋ kà la slaka Kristu aw.



<sup>9</sup>Katsəbaw à atà sləm aw, kà uwana madz à ahəŋ aŋa Zəzagəla kà, aga la Yesu Kristu la abà gesina. Ndzər madz à ahəŋ aŋa Zəzagəla gesina, Yesu Kristu adzà à ahəŋ kiya uwaga babay haday.

<sup>10</sup>Tsa akul kahamàw gay à vok la masla kà, akul kabəzaw sifa aŋha la dziriga babay. Masla kà, aga lakəl aŋa tatak gesina, la azlamasasəfok uwana atà la maslay bay.

<sup>11</sup>La maham gay à vok la masla la abà kà, Zəzagəla adafa à akul masəlay aŋha à vok, uwana apəhla à azladza kà akul azlaaŋha. La zamana uwarà kà, agòd' à azla Yahudiya kà takadav vok à uda, kà masəlay kà azlaaŋa Zəzagəla. Ama kà aŋkul kà, masəlay uwana afà à akul à vok kà, asa à uda kà la ahəl aŋa dza aw, asa à uda kà la ahəl aŋa Yesu Kristu, səlàw kà, masla la uwana azəb à akul à vok ala madz à ahəŋ aŋa uwarà.

<sup>12</sup>Mok uwana tadəhàkulla batem, uwaga apəhla ala kà talà akul, akul la Kristu la slaka gə. Mok uwana kasàw à uda la iyaw la abà, uwaga apəhla ala, kà akul la Kristu, akul kawùllaw à uda la slaka gə la masla aya, kà uwana kadiŋàwwal gəl à vok, kà Zəzagəla à uwana awùlla Yesu à uda la mamətsay, kà masla la maslay kà mawulla akul à uda babay.

<sup>13</sup>Dagay uwarà kà, kagàw bokuba azlamazimnekid' kà uwana kadəhàhàw tsakana, kà uwana kagàw azladza aŋa Zəzagəla aw. Lagonay kà, Zəzagəla adavà à akul sifa mawga la Yesu Kristu, ŋgaha adamatsan tsakana ala, adamatsakullaŋ ala, ŋgaha adamatsanuŋ ala suwaŋ.

<sup>14</sup>Uwarà kà, seriya akəs anu, kà uwana mədàhà uwana 'Dahàwwàŋ', Zəzagəla agòd' aw, la lig la ahəŋ Zəzagəla azəb anu tsakana lakəl ala. Apəl guma, uwana agà la anu lakəl, afà uwaga à gəl aŋa Yesu Kristu, à mok uwana aməts à ahəf à adi.

<sup>15</sup>Mok uwana Yesu Kristu aməts à ahəf à adi kà, azəbà maslay aŋa azlamasasəfok mawisiga ala, ŋgaha la azlasufəl aŋatà gesina babay, akədàsl atà, ahahay atà à tsəh, apəhla atà ala la slaka azladza, la paraka kà, aduwa atà gesina.

<sup>16</sup>Tsa baŋa kiya uwaga kà, dza asləha à akul à vok lakəl aŋa azlatatak uwana kazuwaw la uwana kasaw aw, dza aslaha à akul à vok aya bay la magođay: 'Sləkàwàw madəvaday la azlamavakay anik anik, ŋgaha la azlamanəŋla təla la azlavud' maduw ləv aw.'

<sup>17</sup>Azlatatak uwaga kà maftsa à vok aŋa uwana apahàh à azladza tatak uwana adəpaka vok. Ama dziriga aŋa tatak uwaga kà Yesu Kristu la gəl aŋha.

<sup>18</sup>Kavàw tetəvi à azladza kà madukw akul à uda la masik aŋkul la abà aw. Azladza uwaga tagòd' kà, say mawoy mas ŋgərpa, ŋgaha la masləkaw azlamalika. Atà tapəhay kà azlatatak uwana tanəŋàŋ la masasiŋay la abà. Azlatsəhay dza uwaga kà azlazlapay deyday, tadzugw lakəl aŋa azlatatak aŋa gudəŋ à vok uwanay pəra.

<sup>19</sup>Atà la maham à gay à vok la abà la Sufəl Kristu aw. Kà uwana masla kà gəl gə, ŋgaha maham à ahəŋ mənə gay Zəzagəla la uwana vok aŋha. Azlauwana tahamà gay à vok la masla, avà à atà azlatatak uwana tanəkudə aŋha, kà masla la uwana tahamà gay à vok tekula, kiya uwaga tazigənay la tetəvi aŋha la tsəh, bokuba uwana asa à

Zəzagəla. Masla ahamà gay azladza uwaga à vok la slaka gà, kà masla la atà aña magay tekula, bokuba vok aña dza, uwana tadza à ahəŋ la slaka gà la azlaamil ŋgaha la sləb vok.

<sup>20</sup>Kasəlaw kà, akul gesina kamatsàw la Kristu. Kiya uwaga kà akul la tsəh aña azlamasasəfok uwana la gudəŋ la vok aw. Kayyà, tsa baña kiya uwanay kà, kakay à maday aŋkul ma? Kiya aña azladza uwana tasəl Yesu Kristu dadəŋ aw takay? Kay, kà mana kanəfaw mapəhay aŋatà uwana apəhay:

<sup>21</sup>'Katap ahəl à azlatsəhay tatak uwaga à abà aw, katap tatak uwaga aw, kadəbani tatak uwaga aw', ma?

<sup>22</sup>Tsəhay mapəhay uwaga kà matapla deyday aña azladza, azlatatak uwaga gesina azladza tadəhla sləray kà tadəzahla.

<sup>23</sup>La madzəka, say madəv kudà à Zəzagəla, la manəf maslhay aña, ŋgaha la mawoy sləb vok aw, ŋgaha la mas ŋgərpə à vok. Ama bà la uwaga manəfay aña mapəhay uwatà, azlaka dza tetuwa aw, kà dza aña magay la maslay lakəl aña azlatatak mawisiga uwana abiy dza aw.

### Kolosəya 3

<sup>1</sup>Kasəlaw kà, akul gesina kawùllaw à uda la mamətsay la Kristu. Tsa kiya uwanay kà, fəw yewdi aŋkul kà à azlatatak uwana aŋay la zagəla la slaka uwana Yesu Kristu adza à ahəŋ, adadza madzay la ahəl kaf aña Zəzagəla.

<sup>2</sup>Koksikoksi dzùgwàw kà à azlatatak uwana la zagəla la afik, awkà azlatatak uwana la gudəŋ la vok aw.

<sup>3</sup>Kasəlaw kà akul kamətsàw. Zəzagəla awùlla akul à uda, avà à akul sifa mawga, uwaga à ahəl aña Yesu Kristu, uwaga kà Zəzagəla anəŋla la slaka aña.

<sup>4</sup>Kristu la uwana sifa, ŋgaha masla dziriga aŋkul. Mok uwana adəwul à waŋ aya kà, akul bay, kadəpəhawla vok ala la masla, kəla uwabeyuwi adənəŋ mazləbəy uwana avà à akul.

<sup>5</sup>Kiya uwaga kà, kanəfaw tsəhay maday mawisiga aŋkul, uwana la gudəŋ la vok aw, azlatatak uwaga kà tapakàh kà bokuba azlatatak deyday la yewdi aŋkul. Sàkàw à mabila, kagaw la maday mawisiga aya aw, azlatatak mawisiga uwana takəf à akul ala à yewdi, atà tadza à ahəŋ la akul la abà aya aw, kayahaw azlatatak mawisiga aw, kakəfəw yewdi à azlatatak à abà aw, kà uwana baña kakəfəw yewdi à abà kawoyaw, atà dəfəwə Zəzagəla.

<sup>6</sup>Kà azlatatak mawisiga uwaga à uwana Zəzagəla apakà ləv lakəl aña azladza uwana takəs gay aña aw.

<sup>7</sup>Uwarà, à mok uwana kadzàw à ahəŋ la azlatatak uwaga la abà, maday aŋkul kà aŋh kà kiya uwaga babay.

- <sup>8</sup>Lagonay kà, sàkàw azlatatak uwaga gesina. Kapakaw ləv aw, kaslahaw məl la tsəh ala aw, kadəhaw mawisiga à azladza anik à vok aw, kadawla sləm aŋa azladza la gay aw. Azlagay mawisiga tasa à waŋ la gay aŋkul aya aw.
- <sup>9</sup>Kavavarahaw vok kà akul à akul aw, kà uwana kasakaw maday mawisiga aŋkul uwana uwarà, ŋgaha la azlatatak uwana kadəhəhəwəwəŋ uwarà.
- <sup>10</sup>Nəfəw madz à ahəŋ mawga. Zəzagəla la uwana avà à akul maday mawga, adəhla sləray koksikoksi, kà masla aŋa mapakəŋ ala kiya aŋha, kà akul aŋa masəl masla la dziriga.
- <sup>11</sup>Kiya uwaga kà, tatak la ahəŋ avəh azla Yahudiya ala la azlatsəhay anik aw, ŋgaha tatak la ahəŋ avəh azlauwana takadav atà à uda ala la azlauwana kokudà makadav atà à uda gə, ŋgaha azladza uwana la kəsaf la abà, ŋgaha azladza uwana tasəl tatak aw, ŋgaha azlamayà la azlauwana takor gəl aŋatà, gesina aŋatà kà kalkal, gərgər la ahəŋ la huma Zəzagəla aw, kà uwana məŋga aŋatà kà say Yesu Kristu tekula pəra, ŋgaha aga la ləv aŋa azlauwana la tsəh azlaaŋha gesina.
- <sup>12</sup>Awul akul à gəl kà, Zəzagəla atsatsəmàni akul, kà akul aŋa magay azlaaŋha, awoya akul. Tsa kiya uwanay kà, dəhəw azlatatak uwanay: Vok ahamà akul kà azladza anik, gəw la ləv delga, gəw tələmma, la mabasij gesina babay.
- <sup>13</sup>Tsənəw vok gay kà akul à akul. Baŋa dza adəhəkuləŋ mawisiga à vok matsawallaŋ ala. Matsahawwaŋ à vok ala kà akul à akul, bokuba uwana Sufəl gami amətsəkulləŋ ala.
- <sup>14</sup>Tatak uwana aduwa azlaanik gesina kà, wəyəw vok kà akul à akul, kà uwana mawoy vok akəs azlatatak delga gesina.
- <sup>15</sup>Vəw tetəvi kà à lapiya uwana Kristu afà à akul à ləv à tsəh, akər ləv aŋkul. Awul akul à gəl kà Zəzagəla azalà akul, kà akul aŋa magay tekula, ŋgaha akul aŋa magay la lapiya. 'Kikay', gədəwwal koksikoksi babay.
- <sup>16</sup>Fəw gay aŋa Kristu à ləv à tsəh lela, dzugwəw kà à gay aŋa Kristu. Tapawla kà vok akul à akul, wuləwla kà vok matsihila kà akul à akul. Zləbəw Zəzagəla la ləv aŋkul gesina la azlamahabay anik anik.
- <sup>17</sup>Uwana kadəhawwaŋ la uwana kapəhaw bay, dəhəw uwaga la sləm aŋa Sufəl Yesu. 'Kikay', gədəw à Zəzagəla Baba kà Yesu babay.
- <sup>18</sup>Gəpəhay kà akul azlamis, gəgodf à akul kà: 'Kəsəw gay aŋa azlazil aŋkul, bokuba azlauwana tanəf Sufəl gami tadəhəŋ.'
- <sup>19</sup>Akul azlazil bay kà: 'Wəyəw azlamis aŋkul, kagaw dzaŋdzaŋ la atà aw.'
- <sup>20</sup>Akul azlabəza uwana gəpəh à akul kà à aganay: 'Tsəbəw sləm à paŋaw aŋa azlababa aŋkul la tatak gesina la abà, kà uwana akəs à Sufəl à gəl, kà kadəhawwaŋ kiya uwanay.'
- <sup>21</sup>Kà aŋkul azlababa kà: 'Kadawla ləv à azlabəza à hudf, kà atà aŋa mapak ləv aw.'

<sup>22</sup>Akul azlamayà: 'Kèsàw gay aña azlaməŋga aŋkul la ahàl ala la gudəŋ uwanay la vok la azlatatak gesina la abà, kakəsaw atà gay la ahàl ala la huma yewdi aŋatà pəra, kà atà aña masləkaw akul aw. Ama dāhàw sləray la ləv tekula, kà uwana kasləkawaw kà Sufəl Yesu.

<sup>23</sup>Kəla sləray gesina uwana tavà à akul, dāhàw uwaga la ləv tekula, kà uwana sləray aña Sufəl la uwana kadāhawwaŋ, awkà aña dza asik aw.

<sup>24</sup>Səlàw kà Sufəl la uwana adanəŋ akul à adi, adàvà à akul tatak uwana adadəhəŋ à ahəŋ la zagəla kà aña azladza aŋha. Madzahaga aŋkul uwana kadāhawla sləray, uwaga kà Yesu Kristu.'

<sup>25</sup>Ama azladza uwana tadəhəŋ mawisiga, Zəzagəla adàwulla à atà ala mawisiga uwana tadāhəŋ. Adāh tatak à azladza gesina la ləv tekula.

## Kolosəya 4

<sup>1</sup>Gəpəhay kà à azlaməŋga babay, gəgod' à akul kà: 'Gàw dziriga la huma aña azlamayà aŋkul, dzàw à ahəŋ la atà, bokuba uwana akəsà à vok, səlàw kà, akul azlaməŋga la azlamayà gesina kà: Madzahaga aŋkul aga la zagəla la afik, aduwa akul gesina.'

<sup>2</sup>Dəvəw kudà à Zəzagəla koksikoksi, kadəvaw kudà la guβguβ aw. 'Kikay', gòdàw à Zəzagəla babay.

<sup>3</sup>Dəvəw kudà kà aŋami babay, kà Zəzagəla aña mapəzl anu tetəvi delga, kà maz gay aŋha à azladza, ŋgaha məpəhatàla godega aña gay aña Kristu la makor gəl la abà, kà gay marabəŋ uwaga à uwana gi la daŋay.

<sup>4</sup>Dəvəw kudà à Zəzagəla kà gi aña mapəhla ala la paraka bokuba uwana akəsà à vok lela.

<sup>5</sup>Dahàw haŋkəli la madz à ahəŋ aŋkul la tataka azladza uwana la abà, tasəl Zəzagəla aw, dzùgwàw la kaslà gesina kà mazlak atà.

<sup>6</sup>Səlàw kà say kagaw la gay namnamga, uwana akəs à vok. Ŋgaha səlàw babay gay uwana kadàwulawla à azladza, uwana tanava akul manavay gesina.

<sup>7</sup>Tisik, deda gay ləv gami uwana la tetəvi aña Sufəl la tsəh, masla adāh sləray aŋha la ləv tekula. Anu səla, anu azlaməna masləlay aña aŋha. Masla adəpəh à akul gesina lakəl gulo.

<sup>8</sup>Kà uwaga à uwana gəsləl à akul à awtəy kà masla mapəh à akul gay gami, ŋgaha kà masla madzəradāhakulla babay.

<sup>9</sup>Onesəm, deda gay ləv gami ada à awtəy atà səla. Masla babay anəfa Yesu Kristu la ləv tekula, masla, tsəhay aŋkul. Atà səla nna tadəpəh à akul azlatatak uwana ada à vok la abanay.

<sup>10</sup>Arəstarkus, uwana anu la daŋay anu səla, adāha à akul ala: 'Ayyi'. Mark duguməŋ aña Barnabas adāha à akul ala 'Ayyi', babay. Baŋa tabəz à awtəy à slaka aŋkul kà, kəsàw atà la ahàl səla. Dagay uwarə gədapəh à akul uwaga.

- 11** Yesu uwana tazalàl ala Yustus adàhakulla 'Ayyi' bay, azla Yahudiya makəw uwaga pəra, à uwana mədàh sləray anina la abanay kà aña makoray Zəzagəla. Atà la uwana tadzərədəhàgəla kaykay.
- 12** Epafəras, uwana tsəhay aŋkul adàhakulla 'Ayyi' babay, masla kà, masla sləray aña Yesu Kristu. Koksikoksi adav kudà à Zəzagəla kà aŋkul, kà akul aña madz à ahəŋ lela, kà akul aña magay azlazil la tetəwi aña Zəzagəla la tsəh, ŋgaha kà akul aña masəl uwana akəs à Zəzagəla à gəl ndzer.
- 13** Haday, gəsəl kà, masla as ŋgərpa la sləray la abà kà akul, ŋgaha kà azla Lawodikiya, ŋgaha kà azla Hiyerapoləs bay.
- 14** Luka, dokwtar uwana məwoya, atà la Demas tadàhakulla: 'Ayyi'.
- 15** 'Ayyi', gòdàw à azladza la Lawodikiya. 'Ayyi', gòdàw à Nimfa, ŋgaha la azlaməna madiŋal gəl à vok uwana tahamàhàh gay à vok la mtəga aŋha, kà ahəl gulo.
- 16** Baña kadadzeŋaw wakità uwanay kà, sləlàw à azlaməna madiŋal gəl à vok la Lawodikiya, kà atà aña madzeŋay babay. Dgaha atà azla Lawodikiya bay tasləl à akul à waŋ wakità uwana gətsetser à àtə kà, akul aña madzeŋay suwaŋ.
- 17** Gòdàw à Arsip kà: 'Wàd' vok à uda kà madəw sləray uwana à gay Sufəl Yesu Kristu afal à ahəl.'
- 18** Gi Pol, la ahəl gulo la uwana gətsetseray kà madàhakulla 'Ayyi' la abanay. Avika akul aw kà gi la daŋay. Zəzagəla apis à akul gay à vok.

## 1 Tesaloniki

### 1 Tesaloniki 1

<sup>1</sup>Gi Pol la uwana gətsetser wakità uwanay, anu la Silas ngaha la Timotawus bay. Mətsetser à maham à ahəŋ məna gay Zəzagəla la Tesaloniki, uwana azlaaŋa Zəzagəla Baba, ngaha aŋa Sufəl Yesu Kristu. Zəzagəla apis à akul gay à vok la lapiya aŋha.

<sup>2</sup>Koksikoksi, 'Kikay', məgodf à Zəzagəla la matsal akul à gay la madəv kudā gami la abà babay.

<sup>3</sup>Baŋa mədəv kudā à Zəzagəla Baba gami, mədzugw à madāh sləray aŋkul, uwana kadāhəwəwəŋ, kà uwana kadiŋaw gəl à Yesu Kristu à vok la sləray dzaŋdzaŋga, kà uwana kawoyaw masla la mawadf vok à uda aŋkul la abà lela la Sufəl Yesu Kristu.

<sup>4</sup>Kiya uwaga akul azladedā, məsəl kà, Zəzagəla awoya akul, ngaha atsatsəmàni akul, kà akul aŋa magay azladza aŋha.

<sup>5</sup>Haday, mok uwana məzəkulla gay marabəŋ, uwaga apakà gay deyday pəra aw. Ama Zəzagəla apəhla ndzədə aŋha ala la gay uwaga, la mazlak anu aŋa Masasədok tsikasla, ngaha la uwana məsəl kà gay gami kà ndzer. Kasəlaw madz à ahəŋ gami, à mok uwana mədza à ahəŋ la tataka aŋkul la abà. Mədāhà uwaga kà, kà mazlak akul.

<sup>6</sup>Akul, kanəfaw madz à ahəŋ gami, ngaha la aŋa Sufəl Yesu babay, kasəw ngərpə məŋga kà gay uwaga, ama kakəsəw gay aŋa Zəzagəla la ləv aŋkul la tsəh la marabay uwana Masasədok tsikasla avà à akul.

<sup>7</sup>La kità kà, akul kapakəw maftsa vok aŋa azlaməna madiŋal gəl à vok la kutso Makeduniya, la kutso Akayya gesina.

<sup>8</sup>Kà akul la uwana, gay aŋa Zəzagəla atsən ala la slaka gesina, la Makeduniya ngaha la Akayya pəra aw. Azladza gesina tasəl gay madiŋ gəl à Zəzagəla à vok aŋkul. Kiya uwaga kà, mənəkudā à mapəh gay uwanay aya aw.

<sup>9</sup>Atà tapəh à anu gay manəŋla anu aŋkul, la uwana kakwesəwkà azlamazlazlay, kà akul aŋa manəf Zəzagəla uwana la sifa ngaha dziriga,

<sup>10</sup>la makud mas à ahəŋ aŋa Kona aŋha la zagəla. Yesu uwana Zəzagəla awùlla à uda la mamətsay, masla adətəf anu la mapak ləv aŋa Zəzagəla la vudf seriya, uwana adàsa à waŋ.

### 1 Tesaloniki 2

<sup>1</sup>Azladedā, sələw kà madz à ahəŋ gami la slaka aŋkul kà deyday aw, kà uwana kakəsəw gay marabəŋ.

<sup>2</sup>Mok uwana mələg mabəz mtəga aŋkul kà, azlaməna məzam gami tatəwəb anu məŋga la matsək anu magodāhay à gəl la Filipiya. Akul kà, kasəlaw uwaga babay. Mok uwana mədabəz à slaka aŋkul la Tesaloniki kà, azlaməna məzam gami la ahəŋ babay. Ama Zəzagəla adzəwədā anu à uda, kà anu aŋa mapəh à akul gay marabəŋ aŋha.

<sup>3</sup>Məpəhla à azladza kà tetəvi delga kà manəfay, məpəh fida aw ɲgaha məpəh mawisiga aw. Məpapatà azladza babay aw.

<sup>4</sup>Ama məpəh kà gay uwana Zəzagəla apəh à anu à ahəl, kà aɲa mapəhay à azladza pəra. Kà uwana mok uwana Zəzagəla agùr anu, akəs anu ndzer, ɲgaha avà à anu maz gay marabəɲ. Məyah kà anu aɲa mahəday à azladza à adi aw, ama à Zəzagəla à adi, masla uwana asəl madzugway aɲa ləv gami.

<sup>5</sup>La lela kasəlaw kà, məpəh gay aɲa mavavar akul, ɲgaha gay aɲa mayàh tatak la slaka aɲkul aw, Zəzagəla à masla masəlay.

<sup>6</sup>Məyah masləkaw anu aɲa azladza aw, məyah masləkaw anu aɲkul aw, amiyaka aɲa azladza anik aw.

<sup>7</sup>Məslàla vok aɲa mapəhla gəl gami ala kà anu azlamagolga, kà uwana anu azlaməna masləlay aɲa Yesu Kristu nəma, ama mədzùgw kiya uwaga aw. Məfà à akul sləm bokuba iyà, uwana af sləm à azlabəza aɲha.

<sup>8</sup>Kiya uwaga la mawoy akul gami kà, məgà nekwa aɲa mazakulla, kà gay marabəɲ aɲa Zəzagəla pəra aw, ama sifa gami babay kà məvà à akul, kà uwana kagaw azlabəza gay ləv gami.

<sup>9</sup>Haday azladedə, kasəlaw la mok uwana məzəkulla gay marabəɲ kà, məyahà vok la sləray zlazladəga uwana la abà məfahàhàn mahənay la mavakay kà, kà anu aɲa maf mahanay à azlaməna gay Zəzagəla à gəl aw.

<sup>10</sup>Iyay zlà, akul azlaməna madiɲal gəl à vok kasəlaw, ɲgaha Zəzagəla asəl uwaga babay: Maday gami la tataka aɲkul la abà kà delga, tərta, ɲgaha sətaka. Dza la ahəɲ asləha à anu à vok lakəl aɲha aw.

<sup>11</sup>Kasəlaw kà məfahàkullàn bokuba uwana baba adəhəɲ à azlabəza aɲha.

<sup>12</sup>Ama mədəv akul kudə koksikoksi, kà akul aɲa maday bokuba uwana akəs à Zəzagəla à gəl. Zəzagəla uwana azalà akul, kà akul aɲa mad à makoray aɲha à abà, ɲgaha à mazləbay aɲha à abà.

<sup>13</sup>Kikay, məgod à Zəzagəla koksikoksi babay, kà uwana mok uwana katsənàw gay Zəzagəla, uwana məzəkullàn, kakəsàw uwaga bokuba gay aɲa azladza aw, ama bokuba gay Zəzagəla. Uwaga ndzer, gay Zəzagəla, uwana adəhà sləray la tataka aɲkul la abà, akul azlaməna madiɲal gəl à vok.

<sup>14</sup>Uwana apakà vok la maham à ahəɲ məna gay Zəzagəla la kutso Yahudiya, uwaga apakà vok la akul bay, akul azladedə kabàsàw matərəbay bokuba uwana tasà la ahəl aɲa tsəhay aɲatà, azla Yahudiya bay.

<sup>15</sup>Kiya uwaga azladza uwaga takəd Sufəl Yesu, ɲgaha la azladza uwana tapəh gay Zəzagəla à azladza uwarà, atà bay tatərəbà anu, kiya uwaga tahəd à Zəzagəla à adi aw, atà kà azlaməna məzam aɲa azladza gesina.

<sup>16</sup>Gay gà la uwaga tayàh madəf anu gay à ahəŋ, kà anu aŋa maz gay mabəlay à azladza uwana tasəl Zəzagəla aw, gay gà la uwaga tsakana aŋatà adahən ala, seriya aŋa Zəzagəla abəz atà.

<sup>17</sup>Azladeda, mok uwana məvahà vok ala anina kà, gəl gami adà akul à tsəh, kà manəŋ aŋkul. Mədə aŋami pəra, ama gəl gami agəd à akul à tsəh.

<sup>18</sup>Məyàh mawul à slaka aŋkul aya. Gi Pol la gəl gulo gəyàh tetəvi aŋuvaw kà mad à awtày, ama seteni adəf gi gay à ahəŋ.

<sup>19</sup>Mədzugway kà lakəl aŋkul, akul azlaməna madiŋ gəl à Zəzagəla uwana à vok kadzərədəhəwanula, ŋgaha apəhanula kà gay marabəŋ kà la ndzədə. Akul bay kà, akul la tataka aŋa azladza uwaga la abà. Akul la uwana karàbàw ləv gami babay. Akul la uwana kapəhəwla ala, kà sləray gami kà delga à uwana mədzà à ahəŋ hahalakanna, kà masla la huma aŋa Sufəl gami Yesu, la kasla uwana adàsa à ahəŋ.

<sup>20</sup>La hadəy gà kà akul la uwana kavàw anu madz à ahəŋ la hahalakanna ŋgaha la marabay.

### 1 Tesaloniki 3

<sup>1</sup>La kiya uwaga kà, gəl akəd anu à vok, kà uwana məbəzà à wakità aŋkul aw. Gay gà la uwaga, məslàla vok aŋa mabasiŋ aw, maslà mədzùgw aŋa masləl akul Timotawus à awtày à slaka aŋkul, ŋgaha anu aŋa madz à ahəŋ la Atena disa.

<sup>2</sup>Kiya uwaga məsləl akul deda gami Timotawus à awtày, uwana mədəh sləray aŋa Zəzagəla la slaka gà anina, kà uwana anu məziŋ gay marabəŋ lakəl aŋa Yesu Kristu la slaka gà. Kiya uwaga məsləlla akul à awtày kà masla aŋa madzərədəh akul à uda la madiŋal gəl à vok la abà.

<sup>3</sup>Ŋgaha kà dza aŋkul aŋa mawul à lig, kà ŋgərpa aw. Kà uwana uwaga kà, agay tatak gami, anu azlaməna manəfay bay.

<sup>4</sup>Ndzer, mok uwana mələg la tataka aŋkul la abà kà, məpəh à akul gay aŋa ŋgərpa uwaga à vok à abà dagay uwarà, lagwa kà masla gà la uwaga adabəza akul. Sələw la lela!

<sup>5</sup>Gay gà la uwaga à uwana, məslàla vok aŋa mabasiŋ aya aw, à uwana məsləl Timotawus à awtày kà masəlay lakəl aŋa madiŋal gəl à vok aŋkul, ŋgaha kà gi aŋa masəlay babay. Guba azà à gi kà seteni aŋa madukw akul à ahəŋ, ŋgaha sləray gami aŋa mapakay deyday.

<sup>6</sup>Kay, ama lagonay kà Timotawus adawul à waŋ, adaraba à anu ləv, la gay madiŋal gəl à vok aŋkul, la masal aŋkul uwana kapəhəwla ala. Agəd à anu kà, kadzugwaw kà lakəl gami koksikoksi, asa à akul manəŋ anu bokuba uwana asa à anu manəŋ akul.

<sup>7</sup>Hadəy azladeda, mədzà à ahəŋ la iyaw tugwi la adi məŋga, ama à mok uwana mədatsən gay aŋkul kà, kadiŋaw gəl à Yesu à vok kà adzərədəh anu à uda.



<sup>8</sup>Lagonay kà, bà uwana akul la tetəvi aŋa Zəzagəla la tsəh kà, ləv gami adatasl ala adagay.

<sup>9</sup>Iyay zlà, madəv kudà gesina la kikay uwana məgod à Zəzagəla kà aŋkul ma asla takay? Mədəval kudà kà marabay məŋga uwana karàbàw anu la huma aŋha.

<sup>10</sup>La mok uwana mədəv kudà mahənyay la mavakay kà, kà masla aŋa mav à anu tetəvi aŋa mad manəŋ akul à gay. Asa à anu kà anu mətəpakulla gay uwana aləg à akul, à gay aŋa matapla la madiŋal gəl à vok la abà.

<sup>11</sup>Gay gə la uwaga mədəv, kudà à Zəzagəla Baba gami la Sufəl gami Yesu, kà atà aŋa mapəzl anu tetəvi aŋa mad à awtəy kà manəŋ akul à gay.

<sup>12</sup>Delga kà Sufəl azigəŋ mawoy vok aŋkul, ŋgaha kawoyaw azladza gesina kalkal bokuba uwana məwoya akul.

<sup>13</sup>Kiya uwaga masla adàvə à akul ndzəfà à ləv aŋkul à tsəh, kà akul kadəgaw sətaka la huma Zəzagəla Baba, la mok uwana Sufəl Yesu adàwul à waŋ à gudəŋ à vok la azlaaŋha.

## 1 Tesaloniki 4

<sup>1</sup>Ŋgaha zlà, azladedə, aganay gay uwana atəm kà anu à ahəŋ aya aŋa mapəhakulla. Mok uwana anu la slaka aŋkul kà, katapawla gay maday dziriga uwana akəs à Zəzagəla à gəl la slaka gami, kà kiya uwaga la uwana kadəhàwwəŋ. Lagonay kà, gədəv akul kudà: 'Kamkam', gəgod à akul la sləm aŋa Sufəl gami Yesu, kà akul aŋa mad à huma à gay koksikoksi la manəfay la abà aya.

<sup>2</sup>Mədəpakulla tatak uwana mətəpla la slaka Sufəl Yesu lagwa zlà, ŋgaha babay kà kadasəlaw adagay

<sup>3</sup>Uwana asa à Zəzagəla kà, delga kà akul aŋa magay sətaka, ŋgaha akul aŋa makəs gəl aŋkul kà mabila.

<sup>4</sup>Gay gə la uwaga gəgod à akul gesina: 'Tsənàw vok à gay la azlamis aŋkul. Baŋa katsənaw vok à gay kà, kagaw sətaka la tetəvi aŋa Zəzagəla la ama, ŋgaha azladza tatsəf akul gay à tsəh aw.

<sup>5</sup>Kà uwana baŋa kadzaw à ahəŋ la mabila la abà kà, kapakaw bokuba azladza uwana tasəl Zəzagəla aw.'

<sup>6</sup>Tsa bà kiya uwaga kà, dza adəha tsakana à masla magay aŋha à vok lakəl aŋa azlamis aw, kà uwana ndzer, kasəlaw kà, Zəzagəla adəh seriya à tsəhay dza uwaga à gəl, kà uwana mədəpəh à akul à vok à abà lakəl aŋa uwaga.

<sup>7</sup>Zəzagəla azalà anu à mabila à abà aw, ama aŋa madz à ahəŋ la sətaka la abà.

<sup>8</sup>Gay gə la uwaga, azladza uwana takweska la mapəsew gay uwanay kà, takweska kà dza aw, ama takweska kà Zəzagəla, uwana avà à akul Masasəfok tsikasliga aŋha.

<sup>9</sup>Azladeda, baŋa lakəl aŋa mawoy vok kà, anu la gay aŋa matsetser à akul, akul azlaməna madiŋal gəl à vok, aw, kà uwana Zəzagəla adapəhakulla tsəhay tetəvi uwaga adagay.

<sup>10</sup>Iyay ndzer, kiya uwaga la uwana kadahàwwàŋ à azlaməna madiŋal gəl à vok la kutso Makeduniya gesina. Ama akul kà, 'Duwàwla uwanay aya', məgodf à akul azladeda.

<sup>11</sup>La kità kà akul kà, yàhàw madz à ahəŋ la lapiya la abà, fàw gəl à uwana kanawkuđa aŋha, kà akul aŋa madzadzar gəl aŋkul, bokuba uwana məpəh à akul à vok à abà uwarà.

<sup>12</sup>Ŋgaha baŋa akul azlaməna gay Zəzagəla kà, dahàwwàŋ kiya uwanay, kà azladza uwana la uda tasəl Zəzagəla aw, tadəkəs gay aŋkul, ŋgaha kà akul aŋa mahan dza anik aw.

<sup>13</sup>Azladeda, asa à anu kà kasəlaw azlatatak lakəl aŋa azlauwana tamatsay, kà akul kagaw la mazaw la gəl la abà aw, bokuba azladza anik uwana tasəl gay lakəl aŋa mawul à uda aŋa Yesu aw.

<sup>14</sup>Ama anu kà məsəl kà Yesu aməts, ŋgaha Zəzagəla awùlla à uda la mamətsay, kiya uwaga babay məsəl kà azlauwana taməts à tetəvi aŋha à tsəh kà, Zəzagəla adàwulla atà à uda la mamətsay babay, ŋgaha adàhama atà gay à vok la Yesu.

<sup>15</sup>Anu uwana mələg la sifa dadàŋ, à mok uwana Sufəl Yesu adàwul à waŋ kà, azladza uwana taməts à madiŋal gəl à vok à abà kà, tadətsəvka magagamay la Yesu kà anu. Haday, gay uwaga gəpəh à akul lagonay kà, gay uwana asà à waŋ la slaka Sufəl.

<sup>16</sup>Kiya uwaga la mavakay uwatà, mədətsən masləh məl aŋa dza uwana akoray, kuda aŋa sufəl aŋa azlamalika, la mahohumay aŋa mazlazliŋ aŋa Zəzagəla, ŋgaha Sufəl gami Yesu Kristu la gəl aŋha adàsa à ahəŋ la zagəla. Ŋgaha teraŋa azlauwana taməts à madiŋal gəl à vok à abà tadətsəv vok à uda la mamətsay.

<sup>17</sup>Ŋgaha la lig la ahəŋ, anu uwana mələg la sifa aya la mok uwaga, Zəzagəla adàhəl anu à habaga à abà, kà anu aŋa magagamay la Sufəl Yesu à tataka zagəla à abà. Ŋgaha mədàdza à ahəŋ koksikoksi la masla.

<sup>18</sup>La gay uwanay kà, taslahaw vok gay à ahəŋ kà akul à akul.

## 1 Tesaloniki 5

<sup>1</sup>Azladeda, lakəl aŋa mavakay baŋaw la kaslà aŋa azlatatak uwanay adəpaka vok kà, mənəkudà aŋha aŋa matsetser à akul aw.

<sup>2</sup>Mavakay uwatà kà, akul la gəl aŋkul bay kà kasəlaw lela, kà uwana Sufəl adàsa à ahəŋ la magorəh azladza, bokuba masla gəl, uwana atsa à waŋ la vəd.

<sup>3</sup>Mok uwana azladza tadəgoday: 'Gudəŋ à vok la lapiya, magogutsay la ahəŋ aw', tadəgoday. Katskats la mok uwaga la uwana matəərbay məŋga adàdzəka à vok,

bokuba mis uwana hudf bëzi agur à ahəŋ. Ɖgaha azladza tadətəfay la uwaga la abà dikidiki aw.

<sup>4</sup>Azladede, kà aŋkul kà, akul azlaməlok aŋa gay uwanay aw. La kità kà, mavakay uwatà adàgorəh akul bokuba masla à gəl uwana agorəh azladza aw.

<sup>5</sup>Gesina aŋkul, akul azlaməna maday la udaka aŋa mavakay la abà, awkà anu azlaməna maday la mələs aŋa vəd la abà aw.

<sup>6</sup>Tsa baŋa kiya uwanay kà, mədzehal bokuba aŋa azladza anik uwana tasəl gay uwanay aw aw, ama say mədza à ahəŋ la adi la manəŋla gəl gami.

<sup>7</sup>Iyay zlà, la vud la uwana azladza tadzehal aw takay? Ɖgaha aya kà, guzu akəd atà la vəd bay.

<sup>8</sup>Ama anu kà, anu azladza aŋa vəd aw, anu azlaməna aŋa mavakay, kà uwaga say mənəŋla vok gami, məduw madiŋal gəl à vok la mawoyəŋ bokuba slarapay. Məf manewəŋ aŋa mabəlay gami à gəl, bokuba huməz gəl.

<sup>9</sup>Mədzugw lela, Zəzagəla afà à anu à ahəŋ, kà anu aŋa matap ŋərpə aŋa mapak ləv aŋha aw. Ama kà anu aŋa mabəlay, kà à ahəl aŋa Sufəl Yesu uwana mafal dzakwa à gəl gə.

<sup>10</sup>Masla aməts kà anu. La mok uwana adawul à waŋ baŋa anu la sifa, amiyaka baŋa mədamsay kà anu aŋa madz à ahəŋ la sifa la masla.

<sup>11</sup>Kà uwaga ndzərədəhàw vok ala, taslahaw vok gay à ahəŋ bokuba uwana kadəhàhàwwəŋ.

<sup>12</sup>Azladede azlauwana Sufəl Zəzagəla apakatàla kà azlaməŋga lakəl aŋkul kà aŋa matapakulla sləray kà, sləkàwàw atà, la makəs atà gay la ahəl ala.

<sup>13</sup>Sləkàwàw atà, ŋgaha pəhàwatàla mawoy atà aŋkul, kà sləray məŋga uwana tadəhəŋ, tsənàw vok gay kà akul à akul.

<sup>14</sup>Azladede, kamkam, sləhàw məl à azlaməna mas à gəl, kà atà aŋa madəh sləray, ndzərədəhàw azlaməna guba gə ala, ŋgaha zlakàw azlaməna kokudà ndzədə, basàwwəŋ azladza gesina.

<sup>15</sup>Dahàw haŋkəli kà akul aŋa mawulla matsak vok mawisiga à adi koksikoksi aw, yàhàw madz à ahəŋ la delga la abà kà akul à akul, ŋgaha la azladza à uda babay.

<sup>16</sup>'Ràbàw koksikoksi!

<sup>17</sup>Dəvəw kudà à Zəzagəla kokudà masakal.'

<sup>18</sup>'Kikay', məgod à Zəzagəla kà kəla tatak uwana avà à anu gesina. Aganay tatak uwana sifa gami la abà, anu azladza aŋa Yesu Kristu.

<sup>19</sup>'Kadədaw gay à Masasədok Zəzagəla à ahəŋ aŋa madəh sləray aw.

<sup>20</sup>Kapəsewaw gay aŋa azladza, uwana Zəzagəla apəh à atà à ahəl aŋa mapəh à azladza aw.

21 Ama mædzèdâw nêrèzàw lela, kèsàw kà uwana la tetøvi aña Zəzagəla la ama.’

22 Dgaha nèhàwla gəl aᅇkul lakəl aña tatak mawisiga gesina.

23 Zəzagəla uwana avà à anu lapiya agəᅇ aᅇkul sətaka. Dgaha kà Zəzagəla aᅇᅇᅇla vok aᅇkul gesina, masasəfok aᅇkul, sifa aᅇkul la sləb vok aᅇkul gesina kà aña kaslà uwana Sufəl Yesu Kristu adàwul à waᅇ kà kadàgaw kokudà tsakana.

24 Zəzagəla uwana azalà aᅇkul kà aᅇkul aña magay azlaaᅇha, adàha uwaga kà aña magəf gay aᅇha à afik.

25 'Dèvàw kudà kà aᅇami, azladedà.’

26 'Ayyi', gəgod à azladedà gesina.

27 'Kamkam', gəgod à aᅇkul la sləm aña Sufəl kà. 'Dzèᅇᅇàw wakità uwanay la huma aña azlaməna madiᅇal gəl à vok gesina.’

28 Vok mahamay aña Sufəl gami Yesu Kristu agay la aᅇkul.

## 2 Tesaloniki

### 2 Tesaloniki 1

<sup>1</sup>Gi Pol la uwana gətsetser wakità uwanay, anu la Silas ñgaha la Timotawus bay. Mətsetser à maham à ahəñ məna gay Zəzagəla la gudəñ Tesaloniki, uwana azlaaņa Zəzagəla Baba, ñgaha aņa Sufəl Yesu Kristu.

<sup>2</sup>Zəzagəla Baba la Sufəl Yesu Kristu tapis à akul gay à vok, la lapiya.

<sup>3</sup>Azladeda, 'Kikay', məgod à Zəzagəla kà akul koksikoksi, mədah uwaga ndzer, kà uwana madiñal gəl à vok aņkul, uwana kadiñawwal gəl à vok, adàla slilih məñga, ñgaha mawoy vok aņkul uwana kawoyaw vok ada à huma à gay.

<sup>4</sup>Gay gà la uwaga, baņa anu la huma à azlaməna gay Zəzagəla anik kà, hahalakanna à gày ləv gami, kà uwana amiyaka azladza tasa à akul ñgərpa, tapəsew akul kà, kabasawwaņ, katsizllaw à delga à afik, ñgaha kadiñawwal gəl à vok, amiyaka la matərəbay uwaga la abà gesina.

<sup>5</sup>Azlatatak uwanay gesina apəhanula, kà Zəzagəla adàdah seriya la dziriga. Kasaw ñgərpa kà makoray Zəzagəla, la uwaga la uwana adàzlayla akul aņa mad à slaka makor gəl à abà.

<sup>6</sup>Ndzer, Zəzagəla adàgəf dziriga à afik. Bokuba magoday, adàtərəb azladza uwana tatərəb akul suwaņ.

<sup>7</sup>Lagonay kà kasaw ñgərpa, ama Zəzagəla adàzəb akul ñgərpa lakəl ala, amiyaka anu babay. Adàdah uwaga la wuf uwana Sufəl Yesu adàsa à ahəñ la zagəla, la azlamalika aņa, uwana tazləb masla.

<sup>8</sup>Kiya uwaga Sufəl gami Yesu adàsa à ahəñ la magol akəl la abà, kà madàdahla seriya à azladza uwana à gəl tapəsew Zəzagəla, ñgaha azlauwana à gəl takweska gay marabəñ lakəl aņa.

<sup>9</sup>La abatà la uwana tadàdah à atà seriya dzañdzaņa à gəl, tuwiz tadənəñ huf adi aņa Zəzagəla tetuwa, amiyaka mazləbay, ñgaha la ndzəda aņa aw.

<sup>10</sup>Uwaga adəpaka vok la mawakay uwatà, adàsa à waņ kà, kà masləkaway aņa azladza aņa, azlaməna madiñal gəl à vok tadawoy masla. Akul bay kadəgaw la atà, kà uwana kadiñawwal gəl à gay gami uwana à vok, məpəh à akul.

<sup>11</sup>Gay gà la uwaga mədəv kudà koksikoksi kà aņkul. 'Kamkam', məgod à Zəzagəla gami, kà mapakakulla sətaka, kà akul aņa madz à ahəñ la sifa uwana azalà akul, ñgaha ahən sləray aņa madiñal gəl à vok aņkul ala, mənawal kà masla aņa mazlak à akul la maslay aņa.

<sup>12</sup>La kiya uwaga kà, sləm aņa Sufəl gami Yesu adəgay masləkaway gà la slaka aņkul, ñgaha akul kadəgaw masləkaway gà kà masla. Uwaga gesina adəpaka vok kà vok mahamay aņa Zəzagəla, ñgaha la Sufəl gami Yesu.

### 2 Tesaloniki 2

- <sup>1</sup>Azladeda, gəpəh à akul lakəl aña mavakay aña mas à wañ aña Sufəl gami Yesu, ñgaha la maham gay à vok gami la slaka aña. 'Kamkam', məgod' à akul azladeda,
- <sup>2</sup>kiya uwaga kà baña dza adəgod' à akul kà, afats mas à wañ aña Sufəl kà adəslay kà, gəl adəkad' akul à vok katskats aw, guba adəkəs akul babay aw. Zlahaw, dza adəpəhla uwaga ala bokuba gay aña azladza uwana Zəzagəla apəh à atə gay à ahəl aña mapəh à azladza anik, bañaw aza akul gay Zəzagəla, bañaw agod' à akul kà anu la uwana mətsetsər uwaga.
- <sup>3</sup>Amiyaka la kakay mañ kà, kasakaw dza apapatakula gay aw. Kà uwana mavakay uwaga adəsa à wañ kiya uwaga pəra aw. Say azladza tadəzigən gəl añaatə lakəl aña Zəzagəla dadən, ñgaha masla məzam uwana masla kà aña mazila tetuwa, adəpəhla vok ala.
- <sup>4</sup>Masla kà kəla tatak uwana azladza tanəfay la masləkaway kà, adədədəl gay à ahəñ amiyaka à Zəzagəla, la tatak uwana tasləkaway gesina kà adədədəl gay à ahəñ. Adəzigən gəl aña lakəl aña tatak gesina, adəday kà madz à ahəñ la məñ gəy Zəzagəla la aku. La abatə kà: 'Gi la uwana gi Zəzagəla', adəgoday.
- <sup>5</sup>Awul akul à gəl à uwana gəpəh à akul uwaga gesina, à mok uwana gələg la tataka añkul la abə aw ay?
- <sup>6</sup>Kà uwana lagonay kà, tatak anik la ahəñ adədəl gay à ahəñ kà mas à wañ. Kasəlaw uwana adədəl gay à ahəñ: Kà uwana baña kaslə aña adəslay kà, masla məzam uwaga adəpəhla gəl aña ala.
- <sup>7</sup>Iyay, lagonay ndzəda aña mazingəñ gəl uwaga adəh sləray la slaka azladza, mətəsən tatak uwaga kà la mapəhanula aña Zəzagəla. Ama tatak uwaga kà apaka vok la dazuwaya aw, say baña dza uwana adzala à ama, az vok aña la uwana adəbəza tetəvi.
- <sup>8</sup>La lig aña uwaga la ahəñ kà, masla məzam uwaga adəpəhla vok ala. La vud' uwana Sufəl Yesu adəsa à ahəñ la mazləbəy aña, adəkəday la afad' gay aña, adəziñ ala la mapəhla vok aña ala la abə.
- <sup>9</sup>Masla məzam uwaga adəsa à wañ la ndzəda aña seteni, adədəhəh azlatsəhay sləray mavaləh ləv à azladza à gay anik anik, ñgaha la azlanadzipo fida gə.
- <sup>10</sup>Adəpapatah azlamazehlaga gesina, la azlagay la azlasləray mawisiga aña anik anik gesina. Tadəzehla, kà uwana takweska gay marabəñ, uwana naka abəl atə, la uwaga takweska dziriga.
- <sup>11</sup>Gay gə la uwaga, Zəzagəla la gəl aña adəvə à atə ndzəda, kà atə aña madiñal gəl à fida uwaga à vok.
- <sup>12</sup>Kiya uwaga kəla dza uwana adiñ gəl à dziriga à vok aw, ama arab la mawisiga la abə, Zəzagəla adədəhalla seriya à gəl.
- <sup>13</sup>Say 'Kikay', məgod' à Zəzagəla koksikoksi lakəl añkul azladeda. Zəzagəla awoya akul, atsatsəmənì akul kà dagay madzəka gudəñ à vok kà aña mabəl akul. Kabələw kà

la Masasəfok aŋha, uwana apəkakulla kà azladza aŋha, ŋgaha kabèlàw kà, kà uwana kakèsàw dziriga babay.

<sup>14</sup>Zəzagəla azalà akul à uwaga à abà la gay marabəŋ uwana məzakulaŋ. Azalà akul kà akul aŋa magay la mazləbay, uwana Sufəl gami Yesu Kristu agà la abà la gəl aŋha.

<sup>15</sup>Tsa baŋa kiya uwaga kà, azladedə, wàdàw vok à uda la gay Zəzagəla la abà. Kiya uwaga kəsàwwàŋ la ləv azlatatak uwana mətàpakulla amiyaka uwana mətàpakulla la gay amiyaka uwana mətsetser à akul matsetseray.

<sup>16</sup>Sufəl gami Yesu Kristu la gəl aŋha, ŋgaha Zəzagəla Baba uwana tawoya anu, tapis à anu gay à vok, ŋgaha tavà à anu ndzəfà, kà anu aŋa manəfay kà uwana delga pəra, la mapəhay kà uwana dziriga pəra.

<sup>17</sup>La vok mahamay aŋha, adzərədəkulla koksikoksi, ŋgaha masla azlaka akul aŋa maf manewəŋ à tatak uwana à afik adàsa à ahəŋ.

## 2 Tesaloniki 3

<sup>1</sup>Ŋgaha zla, azladedə, aganay à uwana atəm, kà anu à ahəŋ aya aŋa mapəh à akul: 'Dèvàw kudà à Zəzagəla kà gay aŋha aŋa mad à huma à gay katskats, ŋgaha azladza aŋa masləkaway bokuba uwana apakà vok la tataka aŋkul la abà babay.

<sup>2</sup>Ŋgaha aya, dèvàw kudà à Zəzagəla kà masla aŋa manəŋla anu, kà azlaməna madàh mawisiga la azlaməna makəsafər, kà uwana azladza gesina takəs dziriga aw!'

<sup>3</sup>Ama Sufəl gami kà, masla kà dziriga, adàdzərədàh akul à uda ŋgaha adànəŋla akul la azlamawisiga la abà.

<sup>4</sup>Gay gə la uwaga kà, Sufəl gami avà à anu manewəŋ lakəl aŋkul babay, kà uwana məsəl kà, kadàhawwaŋ uwana məpəh à akul, bə la huma la gay bay kà, kadàdàhaw uwaga.

<sup>5</sup>Awoyaŋ kà Sufəl Zəzagəla, azlaka akul, kà akul aŋa mawoyəŋ kaykay, kà akul aŋa mabas matərəbay bokuba uwana Yesu Kristu abasəŋ.

<sup>6</sup>Azladedə, 'Kamkam', məgod' à akul la sləm aŋa Sufəl Yesu Kristu, kadzaw à ahəŋ la azlaməna masa la slaka gə aw, kà uwana takəs matapatla gami uwana məzàtəŋ aw.

<sup>7</sup>Haday, akul la gəl aŋkul kasəlaw madz à ahəŋ gami, uwana mədzà à ahəŋ la tataka aŋkul la abà lela, nəfàw slaka asik gami, kà uwana anu azlaməna masa aw.

<sup>8</sup>Kiya uwaga məzàw tatak may aŋa azladza deyday aw. Məyà vok məkəs aŋuf la adi ala məfàhàhà sləray mahənay la mavakay, kà anu aŋa madzadzər gəl gami, ŋgaha kà anu maf mahanay à azlaməna gay Zəzagəla à gəl aw.

<sup>9</sup>Ndzer, məslà mazlak anu aŋkul nəma. Ama məfàhàhà kiya uwanay kà, kà akul aŋa manəfay madz à ahəŋ gami.

<sup>10</sup>La dziriga kà, mok uwana mələg la tataka aŋkul la abà kà, məpəh à akul la dazuwaya kà, dza uwana asal sləray aw kà, azuw tatak may suwaŋ aw.

<sup>11</sup>Uwana məpəh à akul kiya uwanay kà, kà uwana mətsənəŋ kà aŋuvaw la tataka aŋkul la abà kà azlaməna masa, tadəh sləray aŋatà aw, say mavalàh à gày aŋa azladza anik à abà pəra.

<sup>12</sup>Tsəhay dza uwaga kà, gənav à akul, ŋgaha gəfaha à akul akur à lig la sləm aŋa Sufəl Yesu Kristu: 'Kà atà tadəhà sləray aŋatà la tetəvi aŋha, kà atà aŋa madzadzar gəl aŋatà!'

<sup>13</sup>Azladeda, akul kà kayàw vok aŋa madəh delga dikidiki aw.

<sup>14</sup>Kiya uwaga baŋa dza akəs matapla gami, uwana mətsetsèr à akul à wakità uwanay à abà aw kà, dùwàwwalla à adi, kafawwal sləm aw, kà ziruwì aŋa makəsay.

<sup>15</sup>Ama kanərəzaw masla bokuba masla məzam aw, say kawullawla matsihila bokuba deda aŋkul.

<sup>16</sup>Sufəl, masla aŋa makor lapiya, avà à akul lapiya la kaslà gesina. A bà la mana beyimi bay. Awoyaŋ kà Sufəl adza à ahəŋ la akul gesina.

<sup>17</sup>Gi Pol, la uwana gətsetsèr wakità uwanay la ahəl gulo: 'Ayyi'. Nəŋàwwəŋ bokuba uwana gəfà ahəl à wakità gulo uwana à afik gesina.

<sup>18</sup>Mapis gay à vok aŋa Sufəl Yesu Kristu agay la akul gesina.



## 1 Timotawus

### 1 Timotawus 1

<sup>1</sup>Gi Pol, la uwana gətsetser wakità uwanay, gi masləlay aña Yesu Kristu, bokuba uwana asa à Zəzagəla Baba. Masla mabəl anu, ɲgaha la Yesu Kristu uwana məfa madzugway gami à masla à afik.

<sup>2</sup>A kak Timotawus, kak kona gulo dziriga, uwana la madiɲal gəl à vok la abà. Zəzagəla Baba gami, atà la Yesu Kristu Sufəl gami, tapis à ka gay à vok la mabasakaɲ, ɲgaha la mav à ka lapiya.

<sup>3</sup>Uwana gənavà ka, à mok uwana gədà à kutso Makeduniya, 'Dzà à ahəɲ la Efesus', gəgòd à ka, kà uwana azladza tapəhla azlamatapla mawisiga ala la ahəɲ la abata, ɲgaha kà asà à gi kà: 'Dzàw à ahəɲ', kagod à atà.

<sup>4</sup>Gòd à atà kà: 'Sàkàw mapəh azlagay aña azlababa aɲkul maviyaga, ɲgaha la azlawakitə aña azlasləm aɲatà deydayga. Kà uwana azlagay uwaga kà, tatsalla magazlay à waɲ deyday pəra, uwaga kà adəh sləray à Zəzagəla la uwana la abà, məsəl la madiɲal gəl à vok la abà aw.

<sup>5</sup>Uwana akəs vok!' Kapəh à atà, kà tawoy azladza anik, ɲgaha la masal uwana asa à uda la ləv sətaka la tsəh, la madzugway delga, ɲgaha la madiɲal gəl à vok, uwana kaskas la tsəh aw.

<sup>6</sup>Azladza anik tasək à tetəvi dziriga la tsəh ala, ɲgaha tanəfa à azlatatak deydayga, kusoɲuga.

<sup>7</sup>Tanərəz gəl aɲatà kà kiya atà, kà azlaməna matapla azladza anik lakəl aña Zəzagəla. Ama tasəl uwana tapəhay aw, tasəl tatak uwana tawadə gəl à afik aw.

<sup>8</sup>Anu kà, məsəl kà mapəhay aña Zəzagəla kà delga, à baɲa dza adəhla sləray bokuba uwana akəs vok.

<sup>9</sup>Baɲa uwaga avika ka aw: Mapəhay kà tadəhəɲ kà aña azladza dziriga aw, ama kà aña azlaməna tsakana, la azlauwana tapəsew Zəzagəla, la azlauwana takəs gay Zəzagəla aw, la azlauwana takweska Zəzagəla, la azlauwana tadəh mawisiga, la azlauwana tavəl à Zəzagəla à ahəɲ lakəl à adi, la azlauwana takad azlababa aɲatà la azlaiyà aɲatà, ɲgaha la azlaməna makad dza gesina.

<sup>10</sup>ɲgaha aya kà aña azlaməna à gəl gaw, la azlaməna matsatsəl vok kà atà kà atà zil zil, la azlaməna madaw dza ala, la azlaməna fida, la azlaməna mazaw mawadəy fida gə, ɲgaha la azlaməna madəh tatak gesina uwana la tetəvi aɲha aw.

<sup>11</sup>Matapla uwanay kà, asà à uda kà la gay marabəɲ uwana la abà kafà à gi à ahəl, ɲgaha uwana lakəl aña Zəzagəla, uwana mazləbay gə, uwana barka gesina atsa à uda la masla la abà koksikoksi.

<sup>12</sup>'Kikay', gəgod à Sufəl gulo Yesu Kristu uwana ahənağəla la ndzəda gesina kà aña sləray aña. 'Kikay', gəgodəl kà uwana anəñ gi à adi, ñgaha afà à gi à sləray aña à abà.

<sup>13</sup>Kay, nəma kà, gəpəh mawisiga lakəl aña, dagay uwarà gədatərebəñ la matsəkal magodəhay à gəl babay. Ama kà, vok ahamà à Zəzagəla kà gi, kà uwana mok uwatà kà, gi la madiñal gəl à vok aw, ñgaha bay kà, gəsəl uwana gədañaw aw aya.

<sup>14</sup>Sufəl gulo adapis à gi gay à vok mənğa mənğa, ayyà agod à gi, kà mav à gi madiñal gəl à vok, ñgaha la masal uwana ahamà à anu gay à vok la masla.

<sup>15</sup>Aganay à gay uwana akəs vok kà azladza gesina takəsay: Yesu Kristu kà asà à wañ à gudəñ à vok kà mabəl azladza gesina uwana azlaməna tsakana. Gi la uwana gəduw à atà gesina la tsakana la tataka aña atà la abà.

<sup>16</sup>Uwaga à uwana, vok ahamà à Zəzagəla kà gi: Asal kà Yesu Kristu apəhla ala la gi la abà, kà gi la uwana gi masla tsakana kaykay. Mabasiñ aña gesina uwana adəhəñ lakana kà, kà aña à huma à gay gesina babay, azlauwana tadiñ gəl à masla à vok, tadəbəza sifa adəv à gay aw.

<sup>17</sup>Zəzagəla la uwana Sufəl uwana amətsay aw, dza anəñəñ aw, masla kokudà gəl aña, la uwana maslay la masləkaway la mazləbay agay la masla aña koksikoksi. Amen.

<sup>18</sup>Timotawus, kona gulo, gəpəh à ka gay uwanay à ahəl: Awul à ka à gəl à gay uwana azlaməna mapəh à atà gay à ahəl tapəh lakəl aña uwarà. Gay aña atà kà apakà ka tatak mapalla guvəl delga.

<sup>19</sup>Kəsà madiñal gəl à vok la madzugway delga. Ama azladza anik kà takweska manəf madzugway delga aña atà, ñgaha kà uwaga à uwana tadiñ gəl à azlatatak dziriga à vok aya aw.

<sup>20</sup>La tataka aña atà la abà Himene atà la Alekəsander la ahəñ, uwana gəbək atà à seteni à ahəl kà atà aña maguray, ñgaha kà atà aña mabəz tetəvi aña mawisiga lakəl aña Zəzagəla aya aw.

## 1 Timotawus 2

<sup>1</sup>Terəña dadəñ, gəfaha à akul akur à lig, kà akul aña manavay la slaka Zəzagəla la madəv kudà, la 'Kamkam', ñgaha la 'Kikay' kà aña azladza gesina.

<sup>2</sup>Say madəv kudà kà aña azlaməñ sufəl, ñgaha kà aña azlaməna makoray gesina, kà anu aña madz à ahəñ la titi la abà la lapiya, la manəb vok gami la Zəzagəla, la maday delga ñgaha mawoyəñ gə, kà la muwulla gəl à vədəh la huma Zəzagəla,

<sup>3</sup>aganay tatak uwana ahəd, ñgaha akəs à Zəzagəla gami masla mabəl anu à gəl.

<sup>4</sup>Asal kà azladza gesina tabəlay, tatsa à wañ kà masəl gay dziriga aña,

<sup>5</sup>uwana apəh à azladza kà, kà Zəzagəla kà tekula pəra, ñgaha masla masəl anu vok la Zəzagəla kà tekula pəra, uwaga kà Yesu Kristu, uwana apakà dza la sləb vok.

<sup>6</sup>Uwana asà à waŋ, avà gəl aŋha, kà anu gesina aŋa magay azlaaŋha la makor gəl la abà. Kiya uwaga agəđà madzugway aŋa Zəzagəla à afik la kaslà uwana Zəzagəla akəđəv à ahəŋ, asal mabəl azladza gesina.

<sup>7</sup>Kà uwaga à uwana Zəzagəla apakəgəla kà masləlay aŋha. Gi masla matapla à maham à ahəŋ dza, kà gi aŋa mazàh gay matsidəyga à azlauwana azla Yahudiya aw, kà atà tadiŋal gəl à vok. Gəpəhay kà dziriga, gəđàh fida aw.

<sup>8</sup>Asa à gi kà, kəla slaka gesina azladza tadəv kuda, tadziyla ahəl aŋatà à slaka Zəzagəla kà madəv kuda la ləv tekula, la kokuda mapak ləv ŋgaha la kokuda magazlay.

<sup>9</sup>Asa à gi babay kà azlamis taduw lukut uwana à vok akəsa à vok, la mazlayla kà vok, ŋgaha la mawulla gəl à vəđàh, awkà tadàha vok la zlazlafa, la azlamatsaha à gəl dzadzakwaga aw, baŋaw la kəsaf sləm luwəluwə gà, baŋaw la azlatatak bəđà anik anik, baŋaw la lukut uwana tsakalay aŋha məŋga aw.

<sup>10</sup>Ama tatak uwana ahəđ à atà kà, tadàhla sləray dzəba aŋha səla aw gə. Azlamis uwana: 'Məkəs Zəzagəla' tagođ kà, say tadəhəŋ kiya uwaga.

<sup>11</sup>Say azlamis takəs matapla la titi ŋgaha la mawulla gəl à vəđàh.

<sup>12</sup>Gəvə tetəvi à mis kà matapla baŋaw aŋa makoray lakəl aŋa azlazil aw, say tadza à ahəŋ titi.

<sup>13</sup>Kà uwana teraŋa kà taŋəl kà Adama dadəŋ, ŋgaha la lig la ahəŋ Hawwa.

<sup>14</sup>Ŋgaha aya kà, seteni apapət kà Adama aw, ama apapət kà mis. Kiya uwaga à uwana mis akweska mapəhay aŋa Zəzagəla.

<sup>15</sup>Ama mis adəbəlay kà la mayyi bəzi, à baŋa awəđ vok à uda la madiŋal gəl à vok la abà, la masal, la tsikasla ŋgaha la mawulla gəl à vəđàh.

### 1 Timotawus 3

<sup>1</sup>Aganay à gay uwana akəs vok: Baŋa dza ayàh kà masla aŋa magay masla manəŋla azlaməna manəfay anik kà, ayahani kà sləray delga gə.

<sup>2</sup>Masiga aŋa azlaanik kà, say agay kà dza uwana dza aslala vok aŋa matsəđal gay à tsəh aw kəla. Agay zil aŋa mis tekula, agay dza tələmmaga, agay masla makəs gəl aŋha, agay dza uwana sləm aŋha la ahəŋ, agay masla makəs azlaməlok dza la ahəl səla, agay masla masəl matapla à azlaanik babay.

<sup>3</sup>Agə masla guzu aw, masla magazlay aw, ama agə kà masla mabasiŋ, agay masla gay baŋaw masla mawoy sili aw.

<sup>4</sup>Kəla kà, agay la maslay kà manəŋla huđ gəy aŋha lela, agay masla mawulla haŋkəli à azlabəza aŋha, kà atà aŋa matsən gay aŋha, ŋgaha kà atà aŋa mazləb masla.

<sup>5</sup>Uwana gəpəh kiya uwanay kà: Kà uwana baŋa dza aslala vok aŋa makoray huđ gəy aŋha aw, ma kakay aslala vok aŋa manəŋla maham à ahəŋ məna gay Zəzagəla ma?

<sup>6</sup>Dza mawga la madiṅal gəl à vok la abà kà, kapakawwan̄ ala kà masiga la katskats aw, kà uwana baṅa mawga kà, zlahaw zlapay adal à gay, ṅgaha seriya atəḍal à gəl bokuba aṅa seteni uwana aga.

<sup>7</sup>Say agay mawoyəṅ gə la huma à azladza, uwana tasəl Zəzagəla aw babay, kà masla aṅa magay mapəseway gə aw, ṅgaha masla aṅa matəḍ à melkaw aṅa seteni à abà aw.

<sup>8</sup>Azlaməna mazlak maham à ahəṅ məna gay Zəzagəla kà, say tagay mawoy atà gə, tagay azlaməna magolla dza la mas guzu aw, baṅaw azlaməna mawoy sili la tetəvi mawisiga aw.

<sup>9</sup>Say tatsizllay kà à dziriga aṅa madiṅal gəl à vok uwana à afik, Zəzagəla apəhatàla, takəsay uwaga la madzugway dziriga la ləv tekula.

<sup>10</sup>Kəla kà, say maham à ahəṅ anəraz atà dadəṅ suwan̄, à baṅa gay aga à atà la vok aw kəla, ṅgaha tada à sləray à abà.

<sup>11</sup>Azlamis aṅatà babay kà taga azlamis delga, taga azlaməna masàh gəl aw, taga azlatələmmaga, taga azladziriga la azlatatak gesina la abà.

<sup>12</sup>Say azlaməna mazlak à maham ahəṅ məna gay Zəzagəla, tagay la mis tekula tekula, tagay azlaməna manəṅla azlabəza aṅatà lela, la huḍ gəy aṅatà gesina.

<sup>13</sup>Kà uwana baṅa tadəh sləray aṅatà kà tabəza gəl aṅatà la madz à ahəṅ lela la abà, ṅgaha tadəpəhay la magəḍəṅ à afik aṅa madiṅal gəl à vok, uwana anu la abà la maham gay à vok la Yesu Kristu.

<sup>14</sup>Amiyaka gi la manewəṅ la abà kà mad à awtəy, kà manəṅ ka nekwa kà, gətsetser à ka wakità uwanay aya.

<sup>15</sup>Kà uwana amiyaka gəda à awtəy katskats aw babay kà, wakità uwanay adətapakalla madz à ahəṅ delga, lakəl aṅa huḍ gəy aṅa Zəzagəla, uwana maham à ahəṅ məna gay Zəzagəla, uwana azlaaṅa Zəzagəla uwana la sifa. Maham à ahəṅ uwaga kà maṅuləv aṅa matapla dziriga.

<sup>16</sup>La tetəvi aṅa matapla uwaga, Zəzagəla apəhlan̄ ala, ṅgaha apəhanula maday gami la tetəvi aṅha la tsəh. Gay uwaga kà aduwa tatak gesina ndzer, uwaga lakəl aṅa dza, uwana apəhla vok ala, bokuba dza la sləb vok. Masasəḍok tsikasla apəhla masla ala, kà dza dziriga, ṅgaha azlamalika tanəṅəṅ. Azladza tatsənəṅ mapəhay aṅha, tazàhà gay aṅha à azladza uwana tasəl Zəzagəla aw, ṅgaha azladza gudəṅ à vok tadiṅ gəl à masla à vok. La lig aṅa uwaga la ahəṅ kà, Zəzagəla azəb à zagəla à slaka mazləbay gə à abà.

## 1 Timotawus 4

<sup>1</sup>Masasəḍok Zəzagəla apəhay la paraka kà, la makəḍ gəl à ahəṅ kà, azladza anik tadəsaka madiṅal gəl à vok la tsəh ala. Tadəsakay kà gay aṅa azlamasasəḍok mavavar dza, la azlatatak uwana azlamasasəḍok mawisiga, tapəhla ala.

<sup>2</sup>Azlaməna matapla uwaga kà, azlaməna magolla dza, à uwana tadəzah dza ala. Madzugway aṅatà kà mamatsay.

- <sup>3</sup>Azladza uwaga kà tadàvarah gay kà mazəb mis la mazuw azlatatak anik anik. Tekedika Zəzagəla adàhàhà azlatatak uwaga kà, kà azlaməna madiŋal gəl à vok, uwana tasəl dziriga aŋa mazuway. A baŋa: 'Kikay', tagodəl kà uwaga gesina kà, mawisiga aya aw.
- <sup>4</sup>Kà uwana dèwdèw tatak uwana Zəzagəla adàhàŋ kà delga. Tatak məzla gə la abà amiyaka tekula aw, ama say məbəza uwaga kà la 'Kikay', la magod à Zəzagəla.
- <sup>5</sup>Kà uwana gay Zəzagəla la madəv kudà gami la uwana taguwaga tsikasla.
- <sup>6</sup>Baŋa katapla azlatatak uwanay à azladedə gami anik kà, kadəgay masla sləray dziriga aŋa Yesu Kristu, la uwaga kadəpəhla vok ala, kà kadzadzar vok la masasəfok dziriga aŋa madiŋal gəl à vok, ŋgaha la matapla dziriga uwana kanəfa gesina.
- <sup>7</sup>Ama matugway aŋa azladza deydayga, uwana akəs à Zəzagəla à gəl aw kà, wùts ala. Nəŋla gəl aŋak la guba aŋa Zəzagəla la abà, la mawad vok à uda.
- <sup>8</sup>Makəs uwana asa à vok, kà la azlaslaka anik kà, akəs vok ŋuv ŋuv, ama mahoy guba aŋa Zəzagəla akəs vok kaykay, kà uwana uwaga kà adala anu à sifa à abà lagonay, ŋgaha bawbaw la huma la gay bay aya.
- <sup>9</sup>Uwaga la uwana gay makəs vok gə, à uwana naka kəla uwabeyuwi akəsay la ləv tekula.
- <sup>10</sup>Kà uwaga à uwana mədàh sləray la mawadàh vok à uda, kà uwana məfa manewəŋ gami kà à Zəzagəla uwana à afik la sifa, kà masla məbəl kà kaykay, kà azladza uwana tadiŋ gəl à masla à vok gesina.
- <sup>11</sup>Sləhalla vok à azlaməna madiŋal gəl à vok tatak uwanay kà, tàpatàla uwaga lela.
- <sup>12</sup>Kak bəzi dən nəma, ama kasak à dza apəsew ka aw. Gə la huma aŋa azlaməna madiŋal gəl à vok gesina la gay aŋak uwana la abà kapəhay, kà bokuba kak tetəvi aŋatà la maday aŋak la abà, la madz à ahəŋ aŋak la abà, la masal aŋak la abà, ŋgaha la madiŋal gəl à vok aŋak la abà gesina.
- <sup>13</sup>Wad vok à uda kà matapatàla kà uwana la wakità Zəzagəla la abà la məpəh à atà gay matsidəyga, tsərəh à mok uwana gədàda à awtəy.
- <sup>14</sup>Kapəsew mavəy aŋa Zəzagəla, uwana avà à ka la məbəkla ahəl à gəl aŋa azlamasiga, uwana tapəh à atà gay ahəl lakəl aŋa mavəy, uwana kabəzal kà aŋa sləray, aw.
- <sup>15</sup>Fà sləm à sləray uwaga la tetəvi aŋha, kà uwabeyuwi aŋa manəŋ kà, kà kaday kà à huma à gay pəra.
- <sup>16</sup>Kəsà gəl aŋak, dāhà haŋkəli la matapla aŋak babay. Baŋa kanəfa madəhəŋ delga kà, kadəbəlay, ŋgaha la azladza uwana tatsəb à ka sləm.

## 1 Timotawus 5

- <sup>1</sup>Iyay zlà, gəgod à ka aya kà, kaslah məl à makoz zil à gəl la ndzəda aw, ama kapəhal gay, kà bokuba uwana kapəh à baba aṅak. Ɖgaha aya kasləha vok à azlamedəga babay kà bokuba uwana kadəhəŋ à azladedə aṅa gəl aṅak.
- <sup>2</sup>Kəs azlagəl mis babay, kà bokuba azlaiyà aṅak, ŋgaha azlaiyaw mis babay, kà bokuba azladedə aṅak dəgam gà la ləv sətaka.
- <sup>3</sup>Fà sləm à azlamis kudà deŋdaŋga, sləkàw atà!
- <sup>4</sup>Ama kəla kà, baṅa mis kudà anik la bəzi amiyaka la bəzi aṅa bəzi aṅha bay kà, say asəl maɖàh sləray, manəfay aṅha la huma azlaməna huɖ gày aṅha, akəs iyà aṅha la ahəl səla, baṅaw iyà madzidziga aṅha, kiya uwaga la uwana akəs à Zəzagəla à gəl.
- <sup>5</sup>Mis kudà deŋdaŋga ndzer, uwana masla mafal sləm la ahəŋ aw, afà madzugway aṅha kà à Zəzagəla à afik pəra, asak à madəv kudà à Zəzagəla mavakay la mahanay aw, kà masla aṅa mazlakay.
- <sup>6</sup>Ama mis kudà, uwana adza à ahəŋ la matsidəy la abà kà, masla kà bokuba mamətsay gà, amiyaka adagay la sifa aṅa lakana.
- <sup>7</sup>Maslà gà la uwaga à uwana kapəh à atà, kà dza aṅa maɖəz atà à tsəh la gay anik anik la abà aw, kà masləh à atà ala vok.
- <sup>8</sup>Baṅa dza afa à sləm à mayyi à tsəh ala aṅa baba aṅha aw, ŋgaha kaykay gà à məna huɖ gày aṅha aw kà, masla kà akweska maɖiṅal gəl à vok, masla kà ŋuləm dza uwana aləg maɖiṅal gəl à vok.
- <sup>9</sup>Lagwa kà, katsetser sləm aṅa mis kudà à sləm aṅa azlamis kudà anik à adi la wakità la abà, kà say à baṅa adagay la mavay dzik mukwa dadəŋ. Ɖgaha bay kà, say baṅa adà à zil kà asik tekula à ahəl pəra.
- <sup>10</sup>Ɖgaha babay kà, say agay masəlay gà la azlasləray delga uwana la abà, adəhəŋ, azigəna azlabəza aṅha la tetəvi delga la tsəh, ŋgaha akəs azlamələk dza uwana tasəh à mtəga aṅha la ahəl səla, ŋgaha apaləh asik à azlaməna maɖiṅal gəl à vok, ŋgaha à baṅa azlakəhà à azlauwana la matəɖəbay la abà, ŋgaha la madz à ahəŋ aṅha la abà kà, adəhəhə kà say sləray delga pəra, kà tsetsèr sləm aṅha.
- <sup>11</sup>Ama kweskà matsetser sləm aṅa azlamis kudà medəga à wakità aṅa sləm à afik, kà uwana la kaslə uwana madzugway aṅatà adàda à zil à tsəh kà, tadəgola vok à tetəvi aṅa Kristu la tsəh ala kà mad à zil.
- <sup>12</sup>Kiya uwaga kà, tadəgay azlamawisiga, kà mapəzl makəs vok aṅatà uwana ala la maɖiṅal gəl à vok la abà.
- <sup>13</sup>Ɖgaha aya kà, tadəzah kaslə aṅatà ala, kà madahay gày la gày. Ama uwana zlazladə kà: Tagay azlaməna gay zlawzlaw, ŋgaha la mavaləh à gay uwana à abà, abəza kà atà aw aya, bokuba azlamavdzagogur, ŋgaha la azlagay uwana azlayla atà aṅa mapəhay aw, bay kà tapahay.

- <sup>14</sup>Kà uwaga à uwana gəgodf à ka: Asa à gi kà azlamis kudà medəga kà tadah à zil, tayyàh bəza, ɲgaha taf sləm à hudf gày aɲatà suwaɲ. Ɖgaha kà anu aɲa mav tetəvi à masla məzam gami, kà masla aɲa mapəh mawisiga lakəl gami aw.
- <sup>15</sup>Gəpəh kiya uwanay kà, kà uwana azlamis kudà medəga la ahəɲ, tawulla à tetəvi dziriga la tsəh ala kà manəf seteni.
- <sup>16</sup>Baɲa azlamis kudà la ahəɲ la tsəhay aɲa mis madiɲal gəl à vok gə kà, say masla la uwana azlaka à atà. Awkà ayahla mazlakay aɲa maham à ahəɲ məna gay Zəzagəla aw, kà uwana uwaga kà mahanay məɲga. Say maham à ahəɲ məna gay Zəzagəla kà azlakay kà uwana dza aɲha la ahəɲ aw.
- <sup>17</sup>Azlamasiga uwana tanəɲla maham à ahəɲ məna gay Zəzagəla lela kà, azlayla à atà aɲa maβəz mazləbay hudf səla, zləbàw azlauwana taziɲ gay Zəzagəla kaykay, la azlauwana tatapla tatak à azladza anik,
- <sup>18</sup>kà uwana wakità Zəzagəla agodf kà: Kafa zagoma à kokur uwana à gay à baɲa azlab hi aw. Kà uwana masla sləray kà azlayla kà vok, aβəza masik aɲha.
- <sup>19</sup>Baɲa tapuwa gudzi à masiga à gəl kà, kakəs la katskats aw, say baɲa azladza səla tapəh baɲaw məna sayda makər dən kəla.
- <sup>20</sup>Sləh à atà à vok la dazuwaya à azladza uwana tadəh mawisiga, kà guba akəs azlaanik kà madəh mawisiga uwaga.
- <sup>21</sup>'Kamkam', gəgodf à ka la huma aɲa Zəzagəla, ɲgaha la huma aɲa Yesu Kristu, ɲgaha la huma aɲa azlamalika uwana matsatsamanatà gə, kəs mapəhay uwanay, kà kasani azladza makasay, la sləray aɲak uwana la abà kadəhəɲ gesina aw.
- <sup>22</sup>'Kamkam', kavà vok aɲa maβək ahəl aɲak à dza à gəl, kà masla aɲa madəh sləray aɲa masla mazlakay aw. Kada à tsakana aɲa azladza anik à abà aw, nəɲla gəl aɲak la sətaka la abà.
- <sup>23</sup>Kasah bà iyaw pəra aw, ama ɲuləm kasah iyaw matavəruk ɲuv ɲuv babay kà, kà hudf aɲak uwana akad ka.
- <sup>24</sup>Tsakana aɲa azladza anik kà, adəpəhla vok ala batsewya kokudà maβəz madəh seriya. Ama aɲa azladza anik kà adəpəhla vok ala kà bawbaw la huma la gay vudf seriya.
- <sup>25</sup>Kiya uwaga babay à uwana, sləray dziriga adəpəhla vok ala. Amiyaka uwana dza anəɲaɲ lakana babay aw kà, ndzer adəpəhla vok ala.

## 1 Timotawus 6

- <sup>1</sup>Azlamayà gesina kà, takəs gay aɲa azlaməɲga aɲatà la masləkaw atà lela, kà dza aɲa mapəh mawisiga lakəl aɲa Zəzagəla, ɲgaha lakəl aɲa matapla gami babay aw.
- <sup>2</sup>Kəla mayà uwana məɲga aɲha kà masla madiɲal gəl à vok kà, apəsew masla kà uwaga aw, la magodfay kà: Anu səla kà tekula, kà uwana anu la deda. Ama bà la uwaga kà, adəha sləray uwana dādūwa à gay uwana uwarà, kà uwana adəha sləray kà

aŋa dza uwana adav ləv aŋha à Kristu, ŋgaha awoya masla. Aganay tatak uwana katapla à azladza anik. Dzərədàhàtála kà madèhəŋ.

<sup>3</sup>Baŋa dza asəla matapla anik à waŋ, à baŋa anəfa kà azlagay dziriga aŋa Sufəl gami Yesu Kristu aw, ŋgaha akəs matapla gami lakəl aŋa madz à ahəŋ delga la huma aŋa Zəzagəla aw,

<sup>4</sup>masla kà adazigəŋ gəl aŋha, asəl tatak aw, masla kà, asəl kà matsigay, ayah kà magazlay lakəl aŋa azlagay. Aganay tatak uwana atsa à uda la uwaga la abà: Maŋor, magazlay, la azlagay matafad' ləv, la madzugway mawisiga lakəl aŋa azlaməna magay.

<sup>5</sup>Masla kà agazlahay pəra, kà uwana madzugway aŋha kà mawisiga, asəl dziriga aya aw. Adzugw kà baŋa anəfa tetəvi aŋa Zəzagəla kà: 'Gədàgay gorobu', agod.

<sup>6</sup>Ndzer kà, manəf tetəvi aŋa Zəzagəla kà uwaga riba məŋga à baŋa dza akəsa madz à ahəŋ aŋha.

<sup>7</sup>La dziriga kà, tatak la ahəŋ məsəlla à waŋ la ahəl à gudəŋ uwanay à vok aw, ŋgaha tatak la ahəŋ mədàdala la ahəl aya babay aw.

<sup>8</sup>Baŋa anu la tatak may, ŋgaha la lukut kà, uwaga kà dəŋ aŋami.

<sup>9</sup>Ama kà aŋa azlauwana tayah magay gorobu kà, azlamavavaray tavavar atà, tasokw à madiŋay aŋa mavavaray à abà. Tawoya azlatatak kusoŋuga uwana tadala azladza à mazila ŋgaha à akəl à abà.

<sup>10</sup>Kà uwana adi aŋa sili kà slilih aŋa tsakana gesina. Azladza tafa yewdi à uwaga à gay, kà uwaga à uwana tazahla la tetəvi aŋa madiŋal gəl à vok la tsəh, tabiya matərabay à gəl aŋatà kaykay.

<sup>11</sup>Ama kak, à kak dza aŋa Zəzagəla, həl à ahəŋ la azlatatak uwaga la abà gesina. Yàh kà dziriga, la masləkaw Zəzagəla, la madiŋal gəl à vok, la masal, la mabasiŋ, ŋgaha la tələmma aŋa ləv.

<sup>12</sup>Pà slagəla dziriga aŋa madiŋal gəl à vok, kà kak aŋa maβəz sifa adəv à gay aw. Zəzagəla la uwana azalà à ka à sifa uwaga à abà, la mok uwana kazà gay sayda aŋa madiŋal gəl à vok aŋak, dzəba aŋha səla aw, la huma aŋa azladza aŋuvaw.

<sup>13</sup>La huma Zəzagəla uwana av sifa à azlatatak gesina, ŋgaha la huma aŋa Yesu Kristu uwana azà sayda dziriga la huma aŋa PontsəyusPilatus, à uwana, gəfahakala akur à lig:

<sup>14</sup>Kəs mapəhay, ŋgaha gəŋ sətaka la kokudà ŋazla aŋa àläh tsərəh à mavakay uwana Sufəl gami Yesu Kristu adəzlaŋalay, hazlaŋ.

<sup>15</sup>Adàwul à waŋ, la kaslà uwana Zəzagəla akədəv à ahəŋ. Masla Zəzagəla kà, aga la maslay gesina, masla kokudà gəl aŋha la uwana Zəzagəla. Adza à ahəŋ la marabay la abà. Masla la uwana Sufəl aŋa azlasufəl, ŋgaha Məŋga aŋa azlaməŋga.



<sup>16</sup>Masla kokudà gəl aŋha la uwana amətsay dikiđiki aw. Masla adza à ahəŋ la ufaka uwana la abà, dza aslala vok aŋa mad à awtày aw. Dza la ahəŋ adanəŋ hud'adi aŋha tetuwa aw. Mazləbaj la maslay, uwana adəv à gay aw, aga la masla aŋa koksikoksi. Amen.

<sup>17</sup>Fàhà à akur à azlaməna gorobu aŋa gudəŋ à vok uwanay à lig, kà atà aŋa magay azlazlapay aw, sləh à atà à vok la magod' à atà kà, tafa madzugway aŋatà à ləmana uwana à afik, adədəv à gay pəra aw, ama kikay tagod' à Zəzagəla, uwana avà à anu tatak uwaga gesina la maduw vok, ŋgaha kà anu aŋa magay la marabay.

<sup>18</sup>Fahà à atà à akur à lig, kà atà aŋa madāh delga la ləmana aŋatà, kà atà aŋa magay azlagorobu la sləray delga aŋatà uwana la abà tadəhəŋ. Say tavàh tatak aŋatà la azladza anik, taga azlahuŋwa aw.

<sup>19</sup>Kiya uwaga kà, tadāhad' ləmana aŋatà à ahəŋ la slaka delga, kà atà aŋa mabəz sifa dziriga. Uwaga kà bokuba dza uwana atadukw gày aŋha à ahəŋ.

<sup>20</sup>Kak, Timotawus, nəŋla tatak uwana tafà à ka à ahəl lela. Həl à ahəŋ kà azlagay deydayga, ŋgaha à uwana la tetəvi aŋa madiŋal gəl à vok aw, la azlamatsigay badaga, la azlauwana azladza tazalalla masəlay zəŋzəŋga, ama tsa uwaga kà, masəlay dziriga aw.

<sup>21</sup>Azlaanik tasləkaw uwaga la huma azladza, ama tasak à tetəvi aŋa madiŋal gəl à vok la tsəh ala. Vok mahamay aŋa Zəzagəla aga la akul.

## 2 Timotawus

### 2 Timotawus 1

<sup>1</sup>Gi Pol, la uwana gətsetser wakità uwanay, gi la uwana masləlay aña Yesu Kristu bokuba uwana asa à Zəzagəla Baba. Masla asləl gi à waŋ, kà gi aña mapàh à azladza, lakəl aña sifa uwana Zəzagəla apəh à ahəŋ, kà aña azlauwana azlaaŋha, la Yesu Kristu la abà.

<sup>2</sup>A kak Timotawus, uwana kak bəzi gay ləv gulo. Zəzagəla Baba la Sufəl gami Yesu Kristu tapis à ka gay à vok la mamatsakaŋ ala, la mav à ka lapiya aya.

<sup>3</sup>'Kikay', gəgod à Zəzagəla gulo kà kak. Gəsləkaw masla bokuba uwana azlababa gulo madzidziga tasləkàwàh. Gədəv kudà mavakay la mahəna gesina. La madəv kudà gulo la abà gesina kà gədzugway kà à kak pəra.

<sup>4</sup>Awula gi à gəl à iyaw tugwi aŋak, ŋgaha gədàya aña kà gəl à tsəh kà kayakay kà aña manəŋ, kà gi aña magay la marabay.

<sup>5</sup>Gədzugway lakəl aña madiŋal gəl à vok aŋak, uwana kaskas la tsəh aw la Yesu Kristu la abà. Teraŋa kà, iyà aŋak madzidziga Loyəs, la uwana adiŋal gəl à vok dadəŋ, la lig la ahəŋ iyà aŋak Yuniya adiŋal gəl à vok aya babay. Ŋgaha gəsəl ndzer kà, kak la madiŋal gəl à vok uwaga la abà suwaŋ.

<sup>6</sup>Kà uwaga à uwana, gəgod à ka kà, kəsàŋ lela, kasakal à tsəh ala à mavày uwana Zəzagəla avà à ka ndzəda kà madəhəŋ aw. Zəzagəla avà à ka uwaga la mok uwana gəbək à ka ahəl à gəl. Dahà uwaga la ləv tekula.

<sup>7</sup>Kà uwana Masasədok, uwana Zəzagəla avà à anu kà, agubgubanula aw, ama Masasədok aŋha la uwana ahənəŋnula la ndzəda, la masal ŋgaha aslèhà anu vok babay.

<sup>8</sup>Kiya uwaga zlà kà, guba akəs ka kà maz sayda lakəl aña Sufəl gami aw, ziruwi akəs ka kà gi, uwana la daŋay bay aw, gi la daŋay kà Yesu. Ama kəs mas ŋgərpa kà gay marabəŋ bokuba aŋulo babay, dāhàŋ kiya uwaga la ndzəda uwana Zəzagəla avà à ka.

<sup>9</sup>Masla la uwana abəl anu, ŋgaha azalà anu, kà anu aña magay tsəhay aŋha, awkà la sləray uwana mədahàŋ aw, ama la dabaray aña gəl aŋha, la vok mahamay aŋha bay. 'Ayyà', agod à anu, kà vok mahamay aña Yesu Kristu, la mok uwana gudəŋ à vok aləg madzəka vok dadəŋ.

<sup>10</sup>Lagonay kà, vok mahamay uwaga kà, adasa à uda la paraka, kà uwana masla mabəl anu, Sufəl gami Yesu Kristu, adasa à waŋ. Azəb anu ndzəda aña mamətsay la kəl ala. La maz gay marabəŋ uwana apəhla ala kà sifa uwana adəv à gay aw.

<sup>11</sup>Zəzagəla afà à gi à gəl kà maz gay marabəŋ uwanay, à gi uwana gi masləlay aŋha, ŋgaha gi masla matapla à azladza uwana la uda.

<sup>12</sup>Kà uwaga à uwana gəs ɲgərpa mənɲa la daɲay uwanay la abà. Ama bà la uwaga kà, ləv aval à gi à gay aw, kà uwana gəsəl ndzer kà, masla la ndzəda kà manəɲla gay marabəɲ uwana afà à gi à ahəl, tsəràh à makəf gəl à ahəɲ.

<sup>13</sup>Kəsà gay uwaga katsənàɲ la slaka gulo, nəfà uwaga, bokuba maftsa à vok kà mapahla ala kiya uwaga, dzà à ahəɲ la madiɲal gəl à vok la abà, ɲgaha la masal la abà, kadəhəɲ kiya uwaga, kà uwana kahamà gay à vok la Yesu Kristu la abà.

<sup>14</sup>Kəsà azlatatak delga uwana tafà à ka à ahəl, la mazlak aɲa Masasədok Zəzagəla, uwana adza à ahəɲ la anu la abà.

<sup>15</sup>Bokuba uwana kasəl kà, azlaməna gay Zəzagəla la kutso Asəya takweska gi gesina, Fizel la Herموzen la tataka aɲatà babay.

<sup>16</sup>Ama Onisəfor kà, koksikoksi adzərədaɲhà gi à uda, zirui akəs la huma azladza kà uwana gi la daɲay aw. Gədəv kufà à Sufəl Zəzagəla kà madàh delga à huɖ gəy aɲha.

<sup>17</sup>Ama bà la uwaga kà, mok uwana adabəza à Rom kà, adzəkà mayàh gi la abatà la ləv tekula, tsəràh à uwana abəzà gi.

<sup>18</sup>Sufəl Zəzagəla azlakàɲ la mavəl vok mahamay aɲha la vuɖ seriya. Mok uwana gi la gudəɲ Efesus kà, azlakà gi mənɲa, kak bay kà, kasəl uwaga lela.

## 2 Timotawus 2

<sup>1</sup>Iyay, kà kak bəzi gulo kà, wəɖ vok à uda kà Yesu Kristu aɲa mav à ka ndzəda, la vok mahamay aɲha, la maham gay à vok la masla la abà.

<sup>2</sup>Uwana katsənàɲ kà gay Zəzagəla, uwana gəzàɲ la paɲaw gulo, gay uwaga gəzàɲ la huma aɲa azladza aɲuvaw kà, həl, dàla à azladza dziriga anik, uwana atà la maslay kà matapla à azladza anik babay suwaɲ.

<sup>3</sup>Kùdà masik aɲak la ɲgərpa la abà, bokuba slodzi dziriga aɲa Yesu Kristu, uwana abas ɲgərpa.

<sup>4</sup>Baɲa dza ada à guvəl, à baɲa asal kà makəs à mənɲa aɲha à gəl, kà ada à gay aɲa azladza à uda à abà aw, bà kà kiya uwaga kà kak babay.

<sup>5</sup>Dzùgw babay à baɲa dza agur mahoyay, kà à baɲa ahoy la tetəvi la tsəh aw, masla adàbəz masik aw.

<sup>6</sup>Masla mapəs guf babay kà as ɲgərpa mənɲa. Kiya uwaga kà akəs vok, kà masla atsa à vok à mazuw mayyay aɲa guf aɲha kəla.

<sup>7</sup>Dzùgw lakəl aɲa uwana gəpəh à ka la abanay, kà uwana Sufəl Zəzagəla adavà à ka maslay kà matsən uwaga gesina.

<sup>8</sup>Awul à ka à gəl lakəl aɲa Yesu Kristu, mayyi à tsəh ala aɲa sufəl David. Masla aməts, ɲgaha awul à uda la mamətsay. Bokuba uwana gay marabəɲ uwana gəzàɲ agod.

- <sup>9</sup>Kà gay marabəŋ uwanay gəzìŋ, la uwana tatsərkwà gi, à gəsa ŋgərpa bokuba masla madàh mawisiga. Ama gay Zəzagəla kà matsərkwəŋga aw.
- <sup>10</sup>Kà uwaga à uwana gəkəs mabasiŋ gesina. Gəbasiŋ kà, kà azladza uwana Zəzagəla atsatsàmàni atà, kà atà babay aŋa mabəz tetəvi uwana Zəzagəla adàbela à atà, ŋgaha kà atà mad à abà aŋa madz à ahəŋ la slaka mazləbay aŋha uwaga à abà aŋa koksikoksi.
- <sup>11</sup>Ndzer, gay uwana gəpəhay kà dziriga: Səl kà, baŋa məməts la masla kà, mədàdza à ahəŋ la sifa la masla aya.
- <sup>12</sup>Baŋa anu məbasiŋ la magəđəŋ à afik kà, mədàkoray la slaka gə la masla. Baŋa anu məkweska masla kà, masla babay kà, adəkweska anu.
- <sup>13</sup>Ama baŋa anu azladza dziriga la huma aŋha aw, tsa masla kà adza à ahəŋ kà la dziriga la abà. Kà uwana masla aslala vok aŋa mawis gəl aŋha ala aw, masla kà agəđ uwana à afik apəh.
- <sup>14</sup>Wulà uwana gəpəh à ka à azlaməna madiŋal gəl à vok, kà atà aŋa madzugway, pəh à atà à vok à abà la huma Zəzagəla, kà atà aŋa magazlahay lakəl aŋa azlagay deydayga aw, kà uwana azlamagazlay uwaga kà, azlaka anu aw, ama awis ləv aŋa azlauwana ala tatsəbal sləm.
- <sup>15</sup>Ama kak kà, wəđ vok à uda, kapəhla vok ala la huma Zəzagəla, kiya uwana akəs à Zəzagəla à gəl, bokuba masla sləray uwana ziruwì azəŋ kà sləray aŋha aw. Tàpla gay dziriga à azladza anik bokuba uwana akəsa vok.
- <sup>16</sup>Ama kà azlagay deydayga uwana akəs à Zəzagəla à gəl aw, kada à abà aw, kà uwana azladza uwana tapəhay kiya uwaga kà tawis vok ala la tetəvi aŋha la tsəh kaykay.
- <sup>17</sup>Matapla aŋatà kà, adagay kà bokuba gorodzu uwana akufla aya aw, ahadz sləb vok. La tataka azladza uwaga la abà kà, Himene atà la Filet la abà,
- <sup>18</sup>tasək à tetəvi dziriga la tsəh ala, ŋgaha tawəs madiŋal gəl à vok aŋa azladza anik ala, la magođay kà: Mawul à uda la mamətsay kà tsewwa adagay.
- <sup>19</sup>Tekedika matatukway uwana Zəzagəla atatukw kà, aga la ahəŋ la ndzəda lela. Aganay uwana matsəteray gə lakəl aŋha: Sufəl Zəzagəla asəl azladza aŋha. Ŋgaha bay kà: Kəla uwabeyuwì uwana agođay kà: 'Gi aŋa Zəzagəla, asakà à madàh mawisiga.'
- <sup>20</sup>La məŋ gəy la aku kà, azlatasà luwəluwà la azlaaŋa gursu pəra la aku aw, uwana tapəđ mapəđay la ahəf la ahəŋ, ŋgaha la uwana taŋəlàh maŋalay la abisl. Matera kà aŋa madəvaday pəra, ama azlaanik kà aŋa kəla mavakay.
- <sup>21</sup>Baŋa dza ag gəl aŋha tsidəŋa la azlatatak mawisiga uwanay la abà, gəpəh kà, masla kà tadəđəhla sləray kà aŋa ləvamay. Kiya uwaga adəgay aŋa məŋga aŋha aŋa tetuwa, masla kà akəsla vok, masla aga nekwa aŋa madəhla sləray delga gesina.

<sup>22</sup>Hòy à azlamadzugway bəzi aṅak à ahàl, yàh magay tər̀ra, madiṅal gəl à vok, masal ṅgaha lapiya, la azlauwana la ləv tekula tazalà à Sufəl Zəzagəla.

<sup>23</sup>Ama kweskà azlagay deydayga la azlagay kusoṅuga, kà uwana uwaga kà atsala magazlay à waṅ.

<sup>24</sup>Haday, masla sləray aṅa Sufəl Zəzagəla kà aga masla magazlay aw. Masla aga mawoyəṅ gə la slaka azladza gesina, aslala à vok kà matapla azladza, ṅgaha aga masla mabasiṅ bay.

<sup>25</sup>Matapla à azlaməna matsədf gay la ləv tələmmaga, ṅgaha zlahaw kà, Zəzagəla adàvə à atà ndzədfà kà aṅa mabədfəla vok la madz à ahəṅ aṅatà la abà, ṅgaha kà atà aṅa masəl dziriga.

<sup>26</sup>Kiya uwaga kà, tadəbəz haṅkəli aṅatà, ṅgaha tadətəf à malkaw aṅa seteni uwanay la gay ala, adəkəs atà à gay, adəpakatàla kà azlaməna manəf masla.

## 2 Timotawus 3

<sup>1</sup>Səl azlagay uwanay gəpəhkala lela: La makədf gəl à ahəṅ gudəṅ à vok kà, azlakaslà zlazladəga adəgahay la ahəṅ.

<sup>2</sup>La haday gə kà, azladza tadəgahay azlaməna mawoy gəl aṅatà pəra, azlaməna mawoy sili, azlaməna mazigəṅ gəl, azlaməna zlapay. Tadəvatsah gay à Zəzagəla à vok, ṅgaha tadəkəsaḥ gay aṅa azlababa aṅatà aw. 'Kikay', tadəgodf à azladza uwana tazlak atà aw, atà tadəsləkaw azlatatak dziriga aṅa Zəzagəla aw.

<sup>3</sup>Tadəgahay dzaṅdzaṅ, vok mahamay aṅatà adəgay la ahəṅ aw, tadəgahay azlaməna masəh gəl, ziruwi aṅatà adəgahay la ahəṅ aw, tsetsi dadəṅ aṅatà la ahəṅ aw, tadəgay azlaməna məzam aṅa dziriga.

<sup>4</sup>Tadətəh kaf à azladza anik à gəl, tadədfəhah azlatatak kusoṅu gə, tadəgahay azlaməna zlapay, tawoya à ahəṅ kà uwana asa à vok aṅatà pəra kà Zəzagəla.

<sup>5</sup>La huma yewdi aṅa azladza kà: 'Anu azlaməna manəf Zəzagəla', tagodf. Ama tsa tadəpəsew ndzədfà aṅha. Hòy à azlatsəhay dza uwaga à ahàl.

<sup>6</sup>Azladza anik aṅatà tadəha à huɸ gəy aṅa azladza, ṅgaha tatapahla azlamis guḃguḃga aṅatà, kà manəf atə. Azlamis uwaga tadəha tsakana məṅga, tanəfa à azlatatak mawisiga gesina uwana tatawwal à tsəh.

<sup>7</sup>Azlamis uwaga, asa à atə matapla azlatatak, ama tasla aṅa masəl tatak dziriga tetuw aw.

<sup>8</sup>Kà uwana azladza mawisiga uwaga kà, tatsədf gay à dziriga à tsəh, kiya uwana uwarə Yanes atə la Yambərəs tadəhəṅ à Musa à vok. Madzugway aṅatà kà mawisiga, tavə ləv aṅatà à Zəzagəla la dziriga aw.

<sup>9</sup>Ama tadada à huma kərkər aw, kà uwana azladza gesina tadəsəl atə azlakusoṅu. Kiya uwana apakà vok kà la Yanes atə la Yambərəs uwaga.

- <sup>10</sup>Ama kak kà, kanəfa gi la matapla gulo la abà, la maday, la madz à ahəŋ, la madiŋal gəl à vok, la mabasiŋ, la masal ŋgaha la matsizlla à ahəŋ gulo la abà gesina,
- <sup>11</sup>la matərabay ŋgaha la mas ŋgərpa gulo la abà babay. Kak, kasəl gesina tatak uwana abəzà à gi, mok uwana gi la Antiyews, la Ikoniyum, la Lisətəra, à ŋgərpa uwana gəsàh. Ama Sufəl Zəzagəla apèlla gi ala la uwaga la abà gesina.
- <sup>12</sup>Hadəy gà, kəla uwabeyuwi uwana asal madz à ahəŋ la dziriga, la maham gay à vok la Yesu Kristu la abà kà, agay la ahəl aŋa azladza kà matərabəŋ.
- <sup>13</sup>Ama azlaməna magolla dza tadàda à huma à gay kà kaykay, kà mavavarəh azladza anik à bada à abà, atà la aslasl gəl aŋatà, kà tadəvavarəh gəl aŋatà.
- <sup>14</sup>Ama kak kà, dzà à ahəŋ la uwana la abà katapla, la uwana kabəzal la ləv tekula. Nəfà azlatatak uwaga, kà uwana kasəl dza uwana atapəkala kà masla atapəkala ala lela.
- <sup>15</sup>Dagay la bəzi gà, kasəl wakità Zəzagəla lela, masla la uwana avà à ka haŋkəli uwana adala ka à mabəlay à abà la madiŋ gəl à Yesu Kristu à vok.
- <sup>16</sup>Dəwdəw uwana tatsetsèr à wakità Zəzagəla à abà kà, uwaga kà afad gay aŋa Zəzagəla, kà mapəhla dziriga ala, kà madukwla mawsiga la vok ala kà matsizlla anu ala, ŋgaha kà mapəhanula maday dziriga uwana akəs à Zəzagəla à gəl.
- <sup>17</sup>Uwana Masasədok Zəzagəla adəhəŋ kiya uwanay kà: Kà kəla dza uwana anəfa Zəzagəla aŋa magay madəh vok à ahəŋ gà, ŋgaha mahənla gà, kà aŋa sləray delga gesina.

## 2 Timotawus 4

- <sup>1</sup>Gənava ka la huma aŋa Zəzagəla, ŋgaha la huma aŋa Yesu Kristu uwana adəfəh seriya à azladza uwana à gəl taləg la sifa la azlauwana tadamatsay, gənava ka la sləm aŋa Sufəl Yesu uwana adəwul à waŋ kà makoray la dziriga.
- <sup>2</sup>Kà uwaga pəh gay Zəzagəla à azladza la magədaŋ à afik, amiyaka adəgay la kaslā matsidayga, amiyaka la matərabay la abà kà. Pəhla mawisiga aŋatà à azladza, dzərədəhatàla, kà madəh delga koksikoksi ŋgaha təpatàla la mabasiŋ dziriga.
- <sup>3</sup>Kà uwana kaslā adàsa à waŋ à uwana azladza tadədiŋ gəl à dziriga uwana à vok, uwana tatəpatàla aw, kà tadəwoyəŋ kà madəh mawisiga, kiya uwaga kà, tadəkəsa azlaməna matapla fida aŋuvaw, tadətsən uwana asal ləv aŋatà.
- <sup>4</sup>Tadətsəb sləm à dziriga aya aw, tadəgola vok kà aŋa maf sləm à mapəhay aŋa azladza fida gà à abà.
- <sup>5</sup>Ama kak kà, dà à huma à gay la masləh vok à vok aŋak koksikoksi, basà azlaŋgərpa, zəŋ gay marabəŋ à azladza, hənà sləray aŋak ala la tetəvi aŋa Zəzagəla la tsəh.
- <sup>6</sup>Kà aŋulo kà, kaslā adaslay kà aŋa mamətsay, adaslay kà makəd gi, bokuba tatak uwana takəd à Zəzagəla.

- <sup>7</sup>Gədfahà sləray aña Yesu Kristu kà la ləv tekula, bokuba dza uwana ap slagəla lela. Gədvəla uwana: 'Dahəŋ', Zəzagəla agədf à gi, bokuba dza uwana adəv magur mahoyay à gay. Ama kà aña azlatatak uwana mədiŋal gəl à vok kà, gənəfà la dziriga.
- <sup>8</sup>Lagonay kà, gəsəl kà, Zəzagəla adadaha à gi tatak aña masik gulo à ahəŋ la zagəla, kà uwana gədfahəŋ kà uwana dziriga. Sufəl uwana adəh seriya à azladza la tetəvi aŋha, la uwana adəvə à gi masik uwatà, la vudf seriya. Adəvay kà à gi pəra aw, ama adəvə à azlauwana asa à atà makuday gesina babay.
- <sup>9</sup>Wədf vok à uda kà kak aña mabəz à gi à vok katskats.
- <sup>10</sup>Kà uwana Demas kà aməlgəla, kà uwana masla kà asəl matsiday aña lakana uwanay, adiy aŋha à Tesaloniki. Kərəsan, masla kà ahəd à Galatiya, Titus ahəd à Dalmatiya bay.
- <sup>11</sup>Luka pəra la abanay. Mok uwana kadàsa à waŋ kà, kadəsəlla Mark à waŋ la tsəh, kà uwana masla kà adəkəs gi vok la sləray aña Sufəl Zəzagəla la abà.
- <sup>12</sup>Tisik kà gədasləl à Efesus.
- <sup>13</sup>Mok uwana kadàsa à waŋ kà, dəguwà la Tərowas, la mtəga aña Karpus, kadəhəl gi lukut anasl gulo, uwana gəsəkəl à ahəŋ la abatà, la azlawakitə gulo babay, kaykay gə, kà azlawakitə zlap uwana matsetseray la vok.
- <sup>14</sup>Alekəsander, masla gəzla adəh à gi mawisiga à vok kà məŋga. Sufəl Zəzagəla adədfahalla seriya à gəl kəla aña mawisiga aŋha, uwana adəhəgəŋ à vok suwaŋ.
- <sup>15</sup>Həyal à ahəl à kak, kà uwana awoyà gay gami aw kà aña tetuwa.
- <sup>16</sup>Terəŋa uwana gəpəh gay gulo la huma seriya kà, dza la ahəŋ kà mazlak gi aw, azladza gesina, takweskà gi. Delga kà Zəzagəla aməts à ata tsakana aŋatà ala.
- <sup>17</sup>Ama Sufəl Zəzagəla adzà à ahəŋ la gi, avà à gi ndzəfa, kà gi aña madəv sləray gulo uwana maz gay marabəŋ à gay, kà azladza gudəŋ à vok gesina tatsənəŋ. Zəzagəla la uwana gətəf à sikalaveri la gay ala.
- <sup>18</sup>Gəsəl kà, Sufəl Zəzagəla adəpəlgəla, la azlatatak mawisiga la abà gesina, ŋgaha adənəŋla gi, kà gi aña mad à makoray aŋha à abà la zagəla babay. Məzləbà masla koksikoksi! Amen.
- <sup>19</sup>Dəh gi 'Ayyi' gulo à Pərəskila atà la Akilas. 'Ayyi', gəgodf babay à huđ gay Onisəfor.
- <sup>20</sup>Erasətus kà, agədf à Korintiya, ŋgaha gəsək Tərofim à ahəŋ la Milet, kà uwana dūvats azən.
- <sup>21</sup>Mərà vok kà mas à waŋ à abanay à mok uwana təla awkusa aləg madzəka à vok dadəŋ. Ebulus, Pudın, Linus ŋgaha Kələdiya uwana misga la azladza uwana la abanay gesina, dədfahà à ka: 'Ayyi'.
- <sup>22</sup>Sufəl Zəzagəla anəŋla ka! Mapis gay à vok agay la akul gesina!

## Titus

### Titus 1

<sup>1</sup>Gi Pol, la uwana gətsetser wakità uwanay, gi mayà aña Zəzagəla, ɲgaha gi masla matapla la slaka Yesu Kristu. Zəzagəla asləl gi, kà gi aña mazəɲ azladza, uwana Zəzagəla adatsatsamani atà, kà atà aña madiɲ gəl à masla à vok, ɲgaha tatapla dziriga kà mapəhanula maday, uwana akəs à Zəzagəla à gəl.

<sup>2</sup>Gədàhàɲ kiya uwanay kà, kà azladza aña masəlay kà atà la sifa adəv à gay aw la Zəzagəla, uwana adàh fida aw. Amiyaka gudəɲ à vok kà adadzəka vok dadàɲ, à uwana Zəzagəla apəh gay aña sifa uwaga à azladza à ahəɲ aw.

<sup>3</sup>La kaslà uwana anàts à ahəɲ, apəhanula sifa uwaga, uwana la gay aɲha la abà. Zəzagəla uwana masla mabəl anu, afà à gi gay uwaga à ahəl, afà à gi à gəl, kà gi aña matapla à azladza.

<sup>4</sup>Gətsetseray kà à kak Titus, kà uwana kagay kà bokuba kak bəzi huɖ gulo, kà uwana anu səla nna mədiɲaw gəl à Yesu Kristu à vok. Zəzagəla Baba, la Yesu Kristu, uwana abəl anu, tapis à ka gay à vok la mav à ka lapiya.

<sup>5</sup>Gəsakà ka la Kəreta la gudəɲ uwana la tataka iyaw la abà, kà kak aña madàhàh azlatatak uwana taləg madàhàh vok à ahəɲ la tetəvi aɲha. ɲgaha kà kak aña matsatsamani azlamasiga, kà atà aña magay məna manəɲla məna gay Zəzagəla, la kəla huɖ gudəɲ gesina, bokuba, uwana gətəpkala.

<sup>6</sup>Dza uwana kakəsani kà magay masiga kà, say agay zil gày, uwana tasləhàla vok aw, agay zil aña mis tekula, azlabəza aɲha tagay azlaməna madiɲ gəl à Yesu Kristu à vok, maday aɲatà agay delga kà azladza aña manərəz atà, tadàh mawisiga aw, ɲgaha tagay azlaməna makəs gay aña azlababa aɲatà koksikoksi.

<sup>7</sup>Masiga aña azlaməna gay Zəzagəla kà mayà aña Zəzagəla. Kiya uwaga kà, say agay kokudà mawisiga tetuwa. Agay zlapay aw, agay masla ləv aw, agay masla guzu aw, agay masla mayàh gay aw, ɲgaha bay, agay masla mawoy sili aw.

<sup>8</sup>Ama agay kà masla makəs azlaməlok dza la ahəl səla, awoyaɲ kà madàh azlatatak delga pəra, aga masla masləh vok à vok aɲha agay dzirirga, aga dza aña Zəzagəla lela, aga masla mabasiɲ.

<sup>9</sup>Say adàh haɲkəli la gay marabəɲ, uwana mətapla à azladza. Baɲa adəhəɲ kiya uwanay kà, adàbəz tetəvi kà matapla gay uwaga à azladza anik, ɲgaha adàdzərədàh atà à uda la gay uwaga babay. ɲgaha adàpahla ala la paraka, kà azlaməna maf gasa à gay marabəɲ à gəl kà, azlayla atà aw.

<sup>10</sup>Bək azlamasiga à ahəɲ kiya uwaga, kà uwana azladza aɲuvaw tadàdzadzaɲah gəl ala, koksikoksi tapəhay kà azlatatak uwana takəs vok aw, tavavar azladza babay. Azlauwana tadehəɲ kiya uwaga kà kaykay gà, kà tsəhay Yahudiya, uwana kadavàw vok à uda tagoɖ.



<sup>11</sup>Delga kà, azlamasiga aña azlaməna gay Zəzagəla tadəf à atà gay à ahəŋ, kà aña matapla azlatatak uwaga à azladza aw, kà uwaga la uwana tawis huɸ gày aña azladza anik ala, la tatak uwana tatapla à azladza, tasla nəma aw, ama asa à atà mabəz sili la tsəhay matapla ziruwi gə uwaga.

<sup>12</sup>Dza anik la ahəŋ, uwana zil gudəŋ Kəreta bokuba atà, apəh à ahəŋ uwarà, uwana adəpaka vok, apəh la paŋaw aŋha: 'Koksikoksi azlaməna gudəŋ Kəreta tapahay kà fida, tasəl gəl aw, bokuba azlatatak fəta, azlaməna masa, tadzugw kà à huɸ aŋatà pəra.'

<sup>13</sup>Ndzer kà, gay uwanay kà dziriga, kiya uwaga kà, sləh à atà à vok la mapəh à atà à vok à abà lela, kà atà aña manəf tetəvi aña Zəzagəla lela.

<sup>14</sup>Pəh à atà à vok à abà lela kà atà aña manəf azlagay deydayga aña azla Yahudiya, uwana tapahahay aw, ŋgaha tanəfa gay aña azladza uwana takweska dziriga aw.

<sup>15</sup>Baŋa la ləv tsədaŋa la huma Zəzagəla, dèwdèw adagay sətaka kà aŋha. Ama kà aña azladza uwana la ləv səla, ŋgaha tadiŋ gəl à Zəzagəla à vok aw kà, tatak la ahəŋ sətaka kà aŋatà aw. Kà uwana atà kà tadzugway kà azlatatak mawisiga aña madəhəŋ pəra, ziruwi aza à atà aw.

<sup>16</sup>Tagoɸ la paraka kà: 'Məsəl Zəzagəla', ama tatak mawisiga uwana tadəhəŋ apəhla ala, kà tasəl masla aw. Tadzadzəŋəh gəl aŋatà ala kaykay la azlamawisiga, taslala vok kà madəhəŋ tatak delga aya aw.

## Titus 2

<sup>1</sup>Ama kà aŋak kà, kapəl à azladza kà tatak uwana akəs vok kà aña tetəvi aña Zəzagəla.

<sup>2</sup>'Guzu akad' akul aw', gəɸ à azlamakoz zilga. 'Dahàw tatak gesina kà la tetəvi aŋha, sləhàw vok à vok aŋkul, diŋàw gəl à Zəzagəla à vok lela, wəyàw azladza anik la ləv tekula, basàwwəŋ azlaŋgəpa koksikoksi!'

<sup>3</sup>Pəh à azlamakoz mis bokuba uwanay babay: 'Dahàwwəŋ kà uwana la tetəvi aña Zəzagəla la tsəh lela. Kakaləhàw sləm aña azladza anik ala aw, kagaw azlamayà aña guzu aw, ŋgaha tapawla azladza anik, uwana akəs vok lela!'

<sup>4</sup>Baŋa tadəhəŋ kiya uwanay kà, tadàtapla azlaiyaw mis babay, kà mawoyəŋ azlazil aŋatà, la azlabəza aŋatà.

<sup>5</sup>Ŋgaha tatapla azlaiyaw mis uwaga, kà masləh vok à vok aŋatà, ŋgaha kà atà aña mazaɸ zil aw, ŋgaha tadəh sləray lela la huɸ gày aŋatà la madəhəh azlatatak delga, ŋgaha la makəs gay aña azlazil aŋatà. Baŋa tadəhəŋ kiya uwaga, azladza tadəgugw mawisiga lakəl aña gay Zəzagəla aw.

<sup>6</sup>Pəh à azlabəza kohana kiya uwaga babay. Gəɸ à atà kà: 'Sləhàw vok à vok aŋkul lela!'

<sup>7</sup>Gəpəh à ka babay kà kadàh tatak delga pəra, kà azlabəza kohana anik aña matapla tatak la uwaga la abà. Baña katapatàla tatak, tàpatàla la ləv tekula, kapah azlatatak deydayga aw.

<sup>8</sup>Tàpatàla kà azlagay uwana tagəf à afik, dza aslala vok aña matsəfal gay à tsəh aw, ŋgaha kà azladza uwana asa à atà matugw à ka mawisiga à vok kà, atà aña mabəz mawisiga la abà aw, ŋgaha ziruwi makəs atà.

<sup>9</sup>Kà aña azlamayà kà, gòf à atà kà: 'Kəsaw gay aña azlaməŋga aŋkul koksikoksi, dāhāwwāŋ kà uwana akəs azlaməŋga aŋkul à gəl, kabayaw vok gay akul nna aw.

<sup>10</sup>Ŋgaha babay kà, katsatsakw ahəl la azlatatak aŋkul la vok aw, dāhāwwāŋ kà azlatatak delga pəra, kà azlaməŋga aŋkul aña masəlay kà akul azladza dziriga hadāy', pəh à atà. Baña azlamayà tadəhəŋ kiya uwaga kà, azladza tadəsləkaw azlatatak uwana mətapla à azladza lakəl aña Zəzagəla, masla mabəl anu.

<sup>11</sup>Delga kà azlaməna gay Zəzagəla tadāh uwanay gəpəh lagwa, kà uwana Zəzagəla adapəhla ala la paraka, kà vok mahamay aña à azladza gesina, kà masla aña mabəl atà.

<sup>12</sup>Bà uwana Zəzagəla adadəhəŋ kiya uwanay kà, məsəl kà, mənəfa tetəvi mawisiga aya aw, mənəfa azlatatak aña gudəŋ à vok, uwana takəf à anu à adi aya aw. Uwaga kà mok uwana anu la gudəŋ la vok la uwana, məslala vok kà masləh vok à vok gami. Mədəha uwana akəs vok, ŋgaha mənəfa tetəvi uwana akəs Zəzagəla à gəl.

<sup>13</sup>Mədəhaŋ kiya uwanay, kà maf gəl gami à mavakay uwana à afik, Yesu Kristu Sufəl gami adəzlanjalay la mazləbay aña, uwana adəpəhanula Yesu masla Sufəl Zəzagəla gami məŋga.

<sup>14</sup>Avà gəl aña, aməts à slaka gami à abà, kà masla aña mapəlanula la tsakana la abà, ŋgaha kà masla aña magəŋ anu sətaka la huma aña, kiya uwaga kà anu aña magay azladza aña, kà anu aña madāh azlatatak uwana delga koksikoksi.

<sup>15</sup>Tàpla à azladza azlatatak uwanay tadzərədəhatàla, pəh à atà à vok à abà, kà uwana asa à atà matsənəŋ aw, pəh à atà la maslay uwana Zəzagəla avà à ka. Ayà kagòf à azladza kà mapəsew ka aw.

### Titus 3

<sup>1</sup>Wulà à azlaməna gay Zəzagəla à gəl kà, takəs gay à azlasufəl la ahəl ala, la azlagumna aŋatà la madāh uwana tapəhatàla. Tawoya madāh azlatatak delga.

<sup>2</sup>Gòf à atà babay kà tatsəf gay mawisiga à azladza à tsəh aw, tagazlla aw, taga təlomma, takəs gay à azladza anik la ahəl ala babay.

<sup>3</sup>Pəh à atà kiya uwaga, kà uwana anu babay uwarà məga azlakusoŋu babay, mədžadzàŋàhà gəl gami ala. Tetəvi dziriga aña Zəzagəla azà anu à adi, kà uwana mətawàh kà madāh azlatatak mawisiga à tsəh pəra, məgà kà azlamawisiga, tetuw tetuw məfàhà à adi à tatak aña azladza anik à tsəh. Azladza tapəsəwàh anu, ŋgaha anu babay məpəsəwàh atà suwaŋ.

<sup>4</sup>Baməraka mədāh kiya uwanay kà, kaslā anik, Zəzagəla uwana abəl anu, apəhla ala kà adāh delga à azladza, ŋgaha awoya anu kaykay.

<sup>5</sup>Abəl anu kà deyday, awkà abəl anu kà kà sləray delga gami uwana mədāhəŋ aw, ama abəl anu kà, kà vok mahamay uwana akəs kà anu. Azəb anu tsakana gami lakəl ala, adāhə uwaga kà la ndzəda aŋa Masasədok tsikasla, kiya uwaga məgə mayyi vok mawga la mabəz sifa mawga.

<sup>6</sup>Zəzagəla ahənanula pawaslwasl la Masasədok tsikasla, la ahəl aŋa Yesu Kristu uwana mabəl anu.

<sup>7</sup>Adāhəŋ kiya uwaga kà, kà anu aŋa mabəz sifa, ŋgaha məsəl kà masla adāvə à anu sifa uwana adəv à gay aw, uwana apakə vok kiya uwanay kà, Zəzagəla adāhə delga, ŋgaha apakənula tsidəŋa la huma aŋha.

<sup>8</sup>Gay uwanay gəpəh à ka, kà dziriga. Dgaha asa à gi kà katapla à azladza uwaga koksikoksi, kà azlauwana tadiŋ gəl à Zəzagəla à vok makəs azlatatak delga uwanay. Gay uwana məpəhla ala kà dzəba aŋha səla aw, azlaka azladza babay.

<sup>9</sup>Baŋa azladza tabay vok gay deydayga kà, kada à abə aw. Baŋa tapəhay lakəl aŋa azlababa madzidziga aŋa uwarə, kada à abə aw, kabay vok gay lakəl aŋa mapəhay aŋa Musa bay aw, kagazllaw akul nna aw, uwaga kà tatak kusoŋuga deyday gə pəra.

<sup>10</sup>Baŋa dza atsalla mavəhla à tataka azlaməna gay Zəzagəla à abə kà, sləhal ala vok asik tekula, baŋa atsənə aw kà, kafal sləm aya aw, gəlla à lig à gay.

<sup>11</sup>Kasəl kà azladza uwana tavəh azlaməna gay Zəzagəla ala kiya uwaga kà, atə kà, tasakə tetəvi mawisiga, tsakana aŋatə adəpəhla vok ala la paraka.

<sup>12</sup>Gədəsləl dza anik à slaka aŋkul, zlahaw Arətemas, baŋaw Tisik, à uwana gədəsləl à awtəy. Baŋa adəbəzə à awtəy kà, wədf vok à uda la katskats kà mad à mabəz gi vok la Nikopoləs. Gədzugw kà, la təla awkusa kà, gədəday kà madz à ahəŋ la abatə.

<sup>13</sup>Zlakə Senas masla masəl mapəhay, ŋgaha zlakə Apolos babay, və à atə tatak uwana akəs vok kà aŋa mauguzahay aŋatə uwana tadəday lagwa, kà atə aŋa manəkudə aŋa tatak aw.

<sup>14</sup>Azlauwana tadiŋ gəl à Yesu à vok bokuba anu tasəlay babay, kà atə aŋa madədāh azlatatak dzəba aŋha səla aw gə uwaga kà, atə mazlakəh azlauwana la kudə la abə. Baŋa tadəhəŋ kiya uwaga kà, madz à ahəŋ aŋatə adəgay deyday aw.

<sup>15</sup>Azladza uwana anina la abanay, tadəha à ka: 'Ayyi' gesina. 'Ayyi', məgod' à azladedə uwana tawoya anu la madiŋal gəl à vok la abə, ŋgaha vok mahamay aŋa Zəzagəla apis à akul à gay à vok gesina.

## Filemon

### Filemon 1

- <sup>1</sup>Gi Pol, la uwana gətsetser à ka wakità uwanay, gi la daɲay kà Yesu Kristu. Gi Pol, anu la deda gami Timotawus, la uwana mətsetser à ka wakità uwanay, à kak slawda gami Filemon, uwana mədàh sləray gami anina.
- <sup>2</sup>Mətsetser à maham à ahəŋ məna gay Zəzagəla, uwana tasaha à waŋ à mtəga aɲak kà madəv kudà à Zəzagəla, ŋgaha à deda gami duguga Appia la Arsip, uwana məpay anina kà aɲa Sufəl gami Yesu.
- <sup>3</sup>Zəzagəla Baba gami, la Sufəl gami Yesu Kristu tapis à akul gay à vok, ŋgaha tavà à akul lapiya aya.
- <sup>4</sup>Baɲa gədəv kudà à Zəzagəla kà aɲak, 'Kikay' gəgodàhàh à Zəzagəla koksikoksi,
- <sup>5</sup>kà uwana gətsənaŋ kà kawoyàh azlaməna gay Zəzagəla ndzer, ŋgaha bay kà, kadiŋ gəl à Sufəl Yesu Kristu à vok.
- <sup>6</sup>Gədəv kudà à Zəzagəla babay kà, kà maham gay à vok aɲak la azladza anik uwana tadiŋ gəl à Yesu Kristu à vok mad à huma à gay, ŋgaha kà kak aɲa masəl azlatatak delga gesina, uwana məbəzal kà masləkawla Kristu.
- <sup>7</sup>Deda gulo, tsəhay mawoyəŋ uwana kawoya azlaməna gay Zəzagəla anik arabà gi, ŋgaha adzərədgəla bay, kà uwana kà kak à uwana ləv aɲa azlaməna gay Zəzagəla anik atəslla ala.
- <sup>8</sup>Bokuba uwana kawoya azlaməna madiŋal gəl à vok anik kà, 'Kamkam', gədəv à ka kudà kà madàh uwana gəpəh à kà. Tsa gi masla matapla la slaka Kristu kà, gi la maslay kà mapəh à ka, 'Dahàŋ kà azlatatak delga!'
- <sup>9</sup>Ama gəpəhay bokuba uwanay aw! 'Kamkam', gənavà ka, kà madəhəŋ uwanay, kà uwana kawoya azlaməna gay Zəzagəla. Gi Pol, uwana gi makoz zil, la uwana gəpəh uwaga, ŋgaha lagwa bay kà, gi la daɲay kà Yesu Kristu.
- <sup>10</sup>'Kamkam', gəgod à ka lakəl aɲa Onesəm. Agay masla madiŋ gəl à Yesu Kristu à vok, masla kà adagay bokuba bəzi hud' gulo. Gi, gədagay baba aɲha la daɲay.
- <sup>11</sup>Uwarà kà, akəs ka vok aw, ama lagonay kà, akəs gi vok, ŋgaha akəs ka vok bay
- <sup>12</sup>Gəwulakala à awtày, ama madzugway gulo kà lakəl aɲha.
- <sup>13</sup>La kaslà uwana gi la daɲay kà gay marabəŋ kà, asa à gi kà madz à ahəŋ anu səla la abanay, kà masla mabəf à slaka aɲak à abà, kà mazlak gi.
- <sup>14</sup>Ama asa à gi madəhəŋ kiya uwanay aw. Asa à gi, kà uwana asa à ka dadàŋ suwaŋ, ŋgaha la lig la ahəŋ asa à gi. Asa à gi maf à ka gasa à gəl, kà madàhgəŋ delga aw. Uwana gəwoya kaykay kà, kazlaka gi la ləv tekula.

- <sup>15</sup>Zlahaw kà, Zəzagəla avà tetəvi kà Onesəm mad madz à ahəŋ la slaka gà kà aŋa kaslà ŋuv, ŋgaha kà masla aŋa mawul à slaka aŋak, ŋgaha kà akul aŋa madz à ahəŋ la slaka gà, akul səla aŋa koksikoksi.
- <sup>16</sup>Lagonay masla kà mayà pəra aya aw, dādūwà à gay mayà, kà uwana masla kà bəzi gay ləv gami. Gi kà, gəwoya Onesəm kaykay, ŋgaha ŋodəgi kà mawoyəŋ aŋak kà adūwa aŋulo, kà uwana mayà aŋak, ŋgaha aya kà, kà uwana deda aŋak la Kristu la abà.
- <sup>17</sup>Baŋa kanəraz gi bokuba manalay aŋa madiŋal gəl à vok aŋak kà, kəs à mtəga aŋak, bokuba uwana naka kakəs gi suwaŋ.
- <sup>18</sup>Baŋa awis à ka tatak ala, baŋa kanəfay la goder, pəh à gi, kà gi aŋa mapəlla à ka.
- <sup>19</sup>Gi Pol, la uwana gətsetser uwanay la ahəl gulo, kà gədəpəl à ka. Ama naka kaslala vok kà manav gi aŋa mapəl à ka nəma aw, kà uwana kikay kà mapəh à ka sayda gulo à uwana kabəzà sifa adəv à gay aw, uwaga kakoray lagwa.
- <sup>20</sup>Kità kà, deda kà, gədəv à ka kudà la sləm aŋa Sufəl Zəzagəla: 'Dahəgəŋ tatak dzəba aŋha səla aw gà, uwana atasl à gi ləv ala, kà uwana anu səla nna mədahamaw gay à vok la Yesu Kristu la abà.'
- <sup>21</sup>La matsetser wakità uwanay, gəsəl la dziriga kà, kadādāh uwana gənavà ka madəhəŋ.
- <sup>22</sup>Baŋa kadəkəs Onesəm à mtəga aŋak dəhəgəŋ slaka à ahəŋ babay, kà uwana gəsəl kà Zəzagəla adətsən tatak uwana kanavawwal, ŋgaha adāvà à gi tetəvi kà mad à awtəy à mtəga aŋak.
- <sup>23</sup>Epafəras uwana aga la daŋay anu səla kà Yesu Kristu kà: 'Ayyi', agod à kak.
- <sup>24</sup>Mark, Arəstarkus, Demas, Luka ŋgaha gi uwana mədāh sləray aŋa Zəzagəla la slaka gà, mədāha à ka: 'Ayyi'.
- <sup>25</sup>Vok mahamay aŋa Sufəl Yesu Kristu agay la kak.

## Ibəranəŋkowen

### Ibəranəŋkowen 1

- <sup>1</sup>Dagay uwarà, aŋuvaw Zəzagəla apəhàhàh à azlababa gami madzidziga, aslālāh à atà azlaməna mapəh à atà gay à ahàl à waŋ, apəh à atà gay la azlatetəvi anik anik gesina.
- <sup>2</sup>Zəzagəla apəhay tsəràh à lakana uwana makəɗ gəl à ahəŋ aŋa mas à waŋ aŋa Yesu. Ama lakana avà à anu Kona aŋha. Aguwà à uda kà la ahàl aŋa Kona aŋha, à uwana Zəzagəla apəh à anu, adàhàŋ gudəŋ à vok. Zəzagəla afà à ahəŋ agəɗàŋ à afik kà masla aŋa makoray lakəl aŋa tatak gesina,
- <sup>3</sup>kà masla la uwana mənəŋa mazləbay aŋa ndzəɗa aŋa Zəzagəla. Masla kà kalkal la Baba aŋha Zəzagəla. La gay aŋha tsikaslaga akəs dèwdèw tatak uwana la gudəŋ la vok. Adàhà tetəvi anik à ahəŋ la uwatà la uwana Zəzagəla azəb tsakana à azladza lakəl ala gesina, kà atà aŋa magay sətaka. La lig aŋa uwaga la ahəŋ, ahàd, adzà madzay la ahàl kaf aŋa Zəzagəla lakəl, kà makoray la masla.
- <sup>4</sup>Gay gà la uwaga, Zəzagəla adàhàŋ Kona aŋha, aduwa azlamalika gesina, kà uwana sləm uwana avà à Kona aŋha kà, aduwa aŋa azlamalika uwanay gesina.
- <sup>5</sup>Tetuw tetuw Zəzagəla apəh à azlamalika kiya uwanay aw: "Kak Kona gulo, dagay lakana azladza tadəsəlay la paraka." Malika la ahəŋ tetuwa à uwana: "Gədàgay Baba aŋak, ŋgaha kadàgay Kona gulo", agòɗal aw.
- <sup>6</sup>Ama la kaslā uwana Zəzagəla asal masləl Kona aŋha à waŋ, uwana lakəl aŋa tatak gesina la gudəŋ la vok agòɗ: "Akul azlamalika gulo gesina sləkàwàw masla!"
- <sup>7</sup>Lakəl aŋa azlamalika kà, Zəzagəla agòɗ: "Adàhà atà kà afad gà, ŋgaha azlamayà aŋha, azlaalāh akəl aya babay."
- <sup>8</sup>Ama lakəl aŋa Kona aŋa Zəzagəla kà, tatsetsèr à wakità Zəzagəla à abà lakəl aŋha kà: "Kak la uwana Zəzagəla, kadàkoray aŋa koksikoksi, kadàkor tsəhay aŋak lela.
- <sup>9</sup>Azlatatak dziriga gà uwana awoyaŋ, ama azlamawisiga kà, asa à ka atà aw, kapəsew atà aŋa tetuwa. Gay gà la uwaga, Baba aŋak Zəzagəla azalà ka, ŋgaha apakàkala mənəga gà la mav à ka maslay mənəga dāɗuwa à gay aŋa azladedə aŋak."
- <sup>10</sup>Zəzagəla agòɗ aya lakəl aŋa Kona aŋha: "Kak Sufəl dagay la madzəka, kak la uwana kadàhà gudəŋ à vok la ahàl aŋak, la uwana kadàhàŋ zagəla babay.
- <sup>11</sup>Dèwdèw tatak uwana kadàhàŋ kà, adàdəv à gay, ama kà aŋak kà, kadàdza à ahəŋ bokuba uwana kak la ahəŋ la uwaga kiya uwaga uwanay aŋa koksikoksi. Azlatatak uwaga gesina tadəpakahay makoz bokuba azlalukut uwana atsəkway.
- <sup>12</sup>Bokuba uwana kakəl lukut à abà, kiya uwaga la uwana kadəkəl à abà aŋa mafay aslələf à gəl. Ama kak kà, kak la ahəŋ bawtawta madz à ahəŋ aŋak adəkəɗ gəl à ahəŋ aw."

<sup>13</sup>Aga la ahəŋ amiyaka tekula aŋa azlamalika à uwana Zəzagəla apəhal gay kiya uwanay aw: "Dzà madzay la ahàl kaf gulo lakəl, tsəràh à uwana gəduw azlaməna məzam aŋak! Gəpaka azlaməna məzam aŋak bokuba azlatatak maf asik à afik aŋak."

<sup>14</sup>Azlauwa azlauwana tapakà azlamalika uwa? Atà kà azlaməna sləray aŋa Zəzagəla. Zəzagəla asləl atà kà mad mazlak azladza uwana adàbəl atà.

## Ibəranəŋkowen 2

<sup>1</sup>Tsa Zəzagəla afaɗanumà la Kona aŋha kà, məpəzl sləm gami à gay uwana apəh à anu à ahəŋ, kà anu aŋa maz à tetəvi delga la tsəh ala dogdogog aw.

<sup>2</sup>Məsəl kà gay uwana azlamalika tasəlla à waŋ kà, agəd à afik. Azlauwana tafəl sləm aw, ŋgaha la azlauwana takəs aw kà, seriya uwana Zəzagəla adükwatəŋ à gəl, kà azlawla atà ndzer.

<sup>3</sup>Kakay mətəfay à baŋa mapak gay aŋa mabəlay ala kà gay deyday ma? Gay aŋa mabəlay uwana Sufəl Yesu azəŋ kà, azlaməna mazəŋ la uwana tagədāŋ à afik: 'Fida la abà aw', Zəzagəla agòd.

<sup>4</sup>Zəzagəla la gəl aŋha babay apəhla ala kà gay uwaga kà ndzer, la madəhəŋ azlamasəlay anik anik, ŋgaha la azlatatak nadzipo gə, avà maslay kà à Masasəɗok tsidāŋa, kà atà aŋa madāh azlatatak bokuba uwana asal.

<sup>5</sup>Uwaga kà azlamalika à uwana Zəzagəla abək atà à ahəŋ, kà aŋa makor gudəŋ uwana adàsa à waŋ aw, ŋgaha à uwana məpəhay babay la abanay aw.

<sup>6</sup>Tekedika la wakità Zəzagəla la abà kà tatsetsèr kà: 'Mana à dza asik kà mafal sləm la mazlakəŋ ma.

<sup>7</sup>Kazəŋ à vədāh la tsəh aŋa azlamalika, kà aŋa kaslā ŋuv la lig la ahəŋ kà, kavəl masləkaway bokuba uwana tasləkawla məŋ sufəl.

<sup>8</sup>Kà madegolay uwaga à uwana, tafà tatak gesina à tsəh asik aŋha.' Uwaga kà apəhay kà lakəl aŋa Yesu uwana Kona aŋa dza. Kà uwana tapəh kà kiya uwanay, Zəzagəla afà tatak gesina à tsəh aŋha. Uwaga asal magodəy kà, tatak gesina kà la tsəh aŋha pəra. Ama aŋa lagonay kà, mənəŋa akor azlatatak uwaga la dazuwaya dadāŋ aw.

<sup>9</sup>Ama məsəl kà Yesu akor azlatatak gesina uwarà. Kà aŋa kaslā ŋuv, Zəzagəla afà à tsəh aŋa azlamalika kà, la vok mahamay aŋa Zəzagəla aməts kà aŋa azladza gesina, kà mas ŋgərpa. La mamətsay aŋa Yesu la uwana, Zəzagəla avəl məŋga, kiya masləkaw sufəl.

<sup>10</sup>Tatak gesina kà aguwa à waŋ kà la slaka Zəzagəla, adāhà à atà kà kà aŋha. Kiya uwaga asal kà mapak Yesu ala sətaka la ŋgərpa uwana asà, ŋgaha azladza aŋuvaw aŋa magay azlabəza aŋha, ŋgaha kà atà aŋa mad à slaka mazləbəy aŋha à abà. Uwaga kà Yesu la uwana agə atà la huma kà mabəl atà.

<sup>11</sup>Yesu la gəl aḡha apaka azladza ala sətaka, atà la Baba tekula, Zəzagəla la uwana Baba aḡatà. Gay gà la uwaga Yesu azala atà ala: Azladede. Ziruwi azəḡ kà aḡa uwaga aw.

<sup>12</sup>Gay gà la uwaga agòd: "Gədàpəhla sləm aḡak ala la slaka azladede gulo, ḡgaha la huma maham à ahəḡ aḡa tsəhay aḡak kà mazləb ka."

<sup>13</sup>ḡgaha kà: "Gədàfa vok gulo à kak Zəzagəla à afik." ḡgaha aya kà: "Gi la uwanay la azladza uwana asakà, kà gəbəl atà."

<sup>14</sup>Azladza uwana apəhay la abanay kà, uwaga kà anu uwana la sləb vok. Kà uwaga Yesu la gəl aḡha adapakay babay bokuba dza la sləb vok, ḡgaha kà la mamətsay aḡha kà aslala vok aḡa makaləh ndzəda aḡa seteni à ahəḡ, uwana aga la maslay kà makad azladza.

<sup>15</sup>Yesu adəhəḡ kiya uwanay, kà guba makəs azladza kà mamətsay aya aw. Dagay uwarə tadzadzərəhà vok la guba aḡa mamətsay la abà, la abà gà kà, masla azəb guba uwaga ala.

<sup>16</sup>Ndzer, wakità Zəzagəla apəh kà azlamalika la uwana tasà à waḡ kà aḡa mapəhay aw, ama asà à waḡ aḡa mazlak mayyi à tsəh ala aḡa Abəraham.

<sup>17</sup>Baməraaka akəs vok kà apakay kiya azladede aḡha gesina, kà magay məḡ madzahaga uwana adəh sləray kà aḡa Zəzagəla, kà masla aḡa mazəb tsakana à azladza lakəl ala, ḡgaha asəlla atà vok la masla. Uwaga məḡ madzahaga delga gà ḡgaha masla vok mahamay gà.

<sup>18</sup>Lagwa aslala vok azlak azlauwana mapapatay apapat atà, kà uwana asà ḡgəpa, ḡgaha agà mapapatayga.

### **Ibəranəḡkowen 3**

<sup>1</sup>Azladede, la kità Zəzagəla babay atsatsəmàni akul kà akul aḡa magay tsəhay aḡha. Baməraaka la uwaga kà, fəw vok aḡkul à Yesu à afik, masla la uwana Zəzagəla asləl à waḡ kà masla aḡa magay məḡ madzahaga aḡa madḡal gəl à vok gami, uwaga masla la uwana, masla masəlla anu vok la Zəzagəla, uwanay la uwana məziḡ la dazuwaya.

<sup>2</sup>Yesu kà dza delga la slaka Zəzagəla, uwana akəsàni kà madəhəḡ sləray uwanay, bokuba Musa uwana agà delga la sləray aḡha la abà uwana adəhəḡ, kà aḡa azladza huđ gəy aḡa Zəzagəla babay.

<sup>3</sup>Tazləb dza uwana aḡal gəy dəduwa à gay gəy la gəl aḡha. Lakəl aḡa Yesu la Musa babay kà kiya uwanay. Masləkaway uwana məsləkaw Yesu kà, aduwa aḡa Musa.

<sup>4</sup>Ndzer, azlagəy gesina kà, dza la uwana aḡaləh atà, ama dza uwana adəhəḡ tatak gesina kà Zəzagəla.

<sup>5</sup>Hadəy, Musa kà aḡa masla sləray aḡa Zəzagəla uwana adəhəḡ lela la huđ gəy aḡha gesina kà, sləray aḡha kà apahla à azladza azlatatak uwana Zəzagəla adəpəhay la huma la gay.



<sup>6</sup>Ama aña Kristu kà, ndzer masla Kona aṅha, uwana anəṅla huɗ gày aña Baba, bokuba magoɗay, masla kà lela la tsəhay sləray aṅatà uwana la abà, adəhəṅ babay. Anu tsəhay aṅha, anu babay kà anu azlaməna huɗ gày aṅha, à baṅa məda à huma à gay la mawad vok à uda, məfa madzugway gami à azlatatak uwaga à afik la marabay, tsərəh à makəɗ gəl à ahəṅ

<sup>7</sup>Gay gə la uwaga Masasəɗok Zəzagəla agòɗ: "Lakana baṅa katsənaṅw kuda aña Zəzagəla kà,

<sup>8</sup>Tsəbàwwal sləm. Kadzadzaṅaw gəl ala, bokuba uwana uwarà azlababa aṅkul madzidziga tadəhəhəṅ aw, la kaslā uwatà, atà la fəta la abà, tadzà à ahəṅ la abà mavay dzik ufad. Atà kà, tapəsəw Zəzagəla, ṅgaha tagùr masla.

<sup>9</sup>Tanəṅà azlatatak dzəba aṅha səla aw gə uwana adəhəhəṅ, dagay mavay dzik ufad bay, tagùrla.

<sup>10</sup>Gay gə la uwaga, ləv azəṅ à gi lakəl aña azladza uwaga. Gəl adakad à atà à vok, tatsən tetəvi gulo dadəṅ.

<sup>11</sup>Kà uwaga à uwana gəfəh akur à ahəṅ, la magoɗ à azladza uwaga kà: Tetuw kadədiya à slaka maduw ləv gulo à abà aw!",fa Zəzagəla agòɗ.

<sup>12</sup>Azladeda gulo, dəhəw haṅkəli kà dza la tataka aṅkul kà aña magay la ləv mawisiga, ṅgaha kokudə madiṅal gəl à Zəzagəla à vok aya, kà masla aña masakiya à masla uwana la tsəh ala la sifa aw.

<sup>13</sup>Ama tsatsəhəhəw vok ala kà akul à akul koksikoksi, kà seteni aña mavavar akul à mawisiga à abà aw, ṅgaha kà akul aña magay azlaməna mapəsəway babay aya aw. Dəw à huma à gay la madəhəṅ kiya uwanay koksikoksi, kà uwana lakana kà, Zəzagəla asal mabəɗma à anu à ama aya.

<sup>14</sup>Baṅa anu məda à huma à gay la makəs azlatatak uwana mədiṅal gəl à vok, dagay la madzəka tsərəh à makəɗ gəl à ahəṅ kà, kiya uwaga haɗay, mədəgay azladza aña Kristu.

<sup>15</sup>Aganay à uwana tatsətsə̀r à wakitə Zəzagəla à abà: 'Baṅa katsənaṅw kuda aña Zəzagəla lakana kà, kadzadzaṅaw gəl ala, bokuba uwana kadadzadzaṅawwanṅla uwarà.'

<sup>16</sup>Azlauwa azladza uwana tatsənà kuda aṅha, ṅgaha tapəsəw uwa? Ndzer, azladza gesina uwana dagay uwarà Musa aguwa à atà à huma kà masəlla atà à uda la gudəṅ Misəra.

<sup>17</sup>Kà madəgolay ma, uwa à uwana Zəzagəla agə magurayga mavay dzik ufad uwa? Ndzer kà, atà azladza uwana tadəhə tsakana. Kà uwaga à uwana taməts à fəta à abà.

<sup>18</sup>Kà azlauwa? Kà azladza uwaga à uwana: 'Gəfəha akur à ahəṅ kà la tetuwa tadəbək asik à slaka gulo uwana à abà gədəduw ləv aw', agòɗ. Ndzer uwaga kà, kà azlauwana takweskə gay aṅha.

<sup>19</sup>La kiya uwanay kà, azladedà gulo, mənəŋaŋ kà tabək asik à slaka maduw ləv à abà aw kà, kà uwana tadīŋ gəl à Zəzagəla à vok aw.

#### **Ibəranəŋkowen 4**

<sup>1</sup>Dagay uwarà, Zəzagəla apəh à azladza kà adəv tetəvi à azladza kà madla atà à slaka maduw ləv aŋha uwana apəh à ahəŋ kà agəɔf à afik, kiya uwatà kà uwaga kà, mədàh haŋkəli kà tekula la tataka aŋami aŋa magəɔf à lig, ŋgaha kà masla aŋa mad à abà aw aw.

<sup>2</sup>Tapəh à anu gay matsidəyga, bokuba uwana uwarà à azlababa madzidziga tatsənəŋ babay. Ama gay matsidəyga, uwaga azlakà atà aw, tadà à slaka maduw ləv uwatà à abà aw, kà uwana takəs gay uwatà aw.

<sup>3</sup>Uwaga kà anu la uwana mədàda à slaka maduw ləv uwatà à abà, anu uwana məkəs gay uwaga. Agəɔf lakəl aŋa azlauwana takəs gay uwaga aw kà: "Gəpək ləv lakəl aŋatà, gəfàha akur à ahəŋ kà tetuwa tadàdiya à slaka maduw ləv uwatà à abà aw!" Zəzagəla adəv sləray aŋha à gay dagay uwarà, à mok uwana adàhà gudəŋ à vok. Kiya uwaga kà, maduw ləv kà aga la ahəŋ ndzer.

<sup>4</sup>La azlaslaka anik, la wakità Zəzagəla la abà, tapəh lakəl aŋa mahəŋay mədəf: 'Zəzagəla adəv sləray aŋha à gay la mavakay mukwa. La mamədəf gə kà, adəv ləv.'

<sup>5</sup>La azlaslaka anik Zəzagəla agəɔf aya babay: "Tetuwa tadàdiya à slaka maduw ləv gulo à abà aw."

<sup>6</sup>Azladza uwana tatsənə gay matsidəyga teraŋa bay, tadà à abà aw, kà uwana takəs gay uwaga aw. Uwaga kà adzàdla: Slaka maduw ləv kà aga la ahəŋ, ŋgaha azladza anik tadàda à abà.

<sup>7</sup>Gay gə la uwaga, Zəzagəla adàhà zamana anik uwana anu la abà lakana. Uwaga adàhà mavay dəŋ la lig la ahəŋ, mok uwana apəh azlagay uwanay à David à ahəl kà, azlagay uwana mədətsetseray adagay kà: "Lakana baŋa kadatsənawwaŋ kuda aŋha kà, fəwwal sləm, kadzadzaŋaw gəl aŋkul ala aw."

<sup>8</sup>Agayŋa Josu'e abəzla azlababa gami à slaka maduw ləv uwaga à abà, ndzer kà, naka Zəzagəla apəhay lakəl aŋa zamana maduw ləv anik aya aw.

<sup>9</sup>Uwanay asal magəɔy kà, azladza aŋa Zəzagəla kà, atà la tetəvi la ama aŋa madiya à slaka maduw ləv aŋa Zəzagəla à abà, bokuba uwana aduw ləv mahəŋay mamədəf.

<sup>10</sup>Dza uwana adiyà à slaka maduw ləv aŋa Zəzagəla à abà kà, masla kà adàh sləray aya aw, masla kà sləray aŋha adadəv à gay, aduw ləv suwaŋ, bokuba uwana Zəzagəla aduw ləv la sləray aŋha la abà bay.

<sup>11</sup>Tsa baŋa kiya uwanay kà, məwad vok à uda, kà anu aŋa madiya à slaka maduw ləv uwatà à abà. Mədàha haŋkəli kà anu aŋa magəɔf à lig bokuba azlababa madzidziga uwana takweskà Zəzagəla aw.

<sup>12</sup>Kà uwana Zəzagəla avà sifa dziriga gə à azladza, adàh sləray la ndzəda. Gay uwana atsà à wəŋ la paŋaw aŋha la awtəy kà la ndzəda, ŋgaha kiya katsakar uwana azuway gay səla nna. uwana aday tsərəh à aslasl à adi. Masla kà bokuba katsakar uwana anats aslasl ala tsərəh à tsəh zəmaw, uwana asa à dza kà madəhəŋ.

<sup>13</sup>Tatak la ahəŋ ahəf vok à Zəzagəla à adi aw. Tatak gesina uwana adəhəŋ kàdazlazla lela la huma aŋha. La huma aŋha la uwana mədəsəlla à uda tatak uwana mədəhəhəŋ gesina.

<sup>14</sup>Anu la məŋ Madzahaga, uwaga kà Yesu, Kona aŋa Zəzagəla, uwana adà à zagəla à afik. Kà uwaga kà, məwad vok à uda lakəl aŋa azlatatak uwana mədiŋal gəl à vok ŋgaha məzahaŋ uwaga la dazuwaya.

<sup>15</sup>Məŋ Madzahaga gami kà, vok ahəmal kà maruw vok à ahəŋ gami. Asà ŋgəpa tsəhay anik anik gesina bokuba aŋami, tapapət masla, ama atəd ə tsakana à abə aw.

<sup>16</sup>Kà uwaga kà: Səw à wəŋ à slaka Zəzagəla uwana avəhəhə vok mahamay aŋha à azladza. Məzə vok à slaka aŋha la ləv tekula, kà anu aŋa mabəzal vok mahamay, ŋgaha kà masla mav à anu dziriga aŋha uwana adəzlaka anu la mok aŋa ŋgəpa!

## **Ibəranəŋkowen 5**

<sup>1</sup>Kəla məŋ madzahaga gesina kà, Zəzagəla atsatsamahani la tataka azladza la abə. Masla afə à ahəŋ kà masla aŋa madəh sləray aŋa Zəzagəla kà aŋa gəl aŋha, ŋgaha kà masla aŋa mavəl tatak kà aŋa mazəbatəla tsakana lakəl ala.

<sup>2</sup>Azladza uwana tasəl tetəvi delga aw, ŋgaha la azlauwana tawul tetəvi la tsəh ala kà, məŋ madzahaga kà asəl kakay à madəh delga la atə mi, kà uwana masla babay kà guḅguḅ, bokuba atə.

<sup>3</sup>Kà madəgolay uwaga kà, say atsa aŋiz à vədəh kà aŋa tsakana aŋa azladza anik pəra aw, ama kà aŋa gəl aŋha babay.

<sup>4</sup>Dza azəḅ vok la gəl aŋha kà magay məŋ madzahaga aw, say Zəzagəla la uwana azəlalla bokuba uwana uwarə azalə Haruna.

<sup>5</sup>Kiya uwanay la Kristu babay. Masla azəḅ gəl aŋha la gəl aŋha kà magay məŋ madzahaga aw. Zəzagəla la uwana azaləl, agədəl: "Kak bəzi gulo, dagay lakana azladza tadasəl kà ndzer."

<sup>6</sup>La azlaslaka anik anik aya, la wakità Zəzagəla la abə tagəd kà: 'Kak kadəgay Məŋ Madzahaga aŋa tetuwa bokuba aŋa Melkisdaka.'

<sup>7</sup>Mok uwana Yesu aləg la gudəŋ la vok kà, masla kà asəl, kà Zəzagəla la maslay kà mawulla à uda la mamətsay, adəval kudə la iyaw tugwi, ŋgaha azə kuda à zagəla. Zəzagəla atsənəŋ, ŋgaha awulla à uda la mamətsay kà akəs gay aŋha.

<sup>8</sup>Ama ku bə masla bəzi aŋa Zəzagəla kà, atəpla kà makəs gay à Zəzagəla ala la ahəl, la mas ŋgəpa.

<sup>9</sup>Mok uwana adadàh sləray aŋha kà, apakà masla mabəl azladza, uwana takəs gay aŋha, ŋgaha abəl atà kà aŋa tetuwa.

<sup>10</sup>Zəzagəla afà masla à ahəŋ Məŋ Madzahaga bokuba Melkisdaka.

<sup>11</sup>Anu la gay lakəl aŋuvaw, kà mapəh à akul lakəl Melkisdaka. Ama zlazladà kà mapəh à akul, kà uwana sləm aga la akul lakəl aw.

<sup>12</sup>Akul lagwa kà, kaslàwwalla vok aŋa magay azlaməna matapla azladza anik, kà uwana kadatapawla azlatatak dagay uwarà, ama kay kà, kasəlaw azlatatak uwaga lela dadàŋ aw kà, akəs vok kà azladza anik tatsawaŋ aŋa matapakulla aya azlatatak uwana katàpəwla dagay la madzəka lakəl aŋa gay Zəzagəla. Kasəlaw mazuw tatak may dzaŋdzəŋga dadàŋ aw, akul kalkal la azlabəza vərna uwana tasa awà dadàŋ.

<sup>13</sup>Ama kəla kà, dza uwana asa awà kà, masla kà bà bəzi vərna, asəl mavàh delga ala la mawisiga dadàŋ aw.

<sup>14</sup>Tatak may dzaŋdzəŋga kà aŋa azlamagol dza tasəl madzugway adagay, atà kà tatapla mavàh tatak delga ala la mawisiga.

## **Ibəranəŋkowen 6**

<sup>1</sup>Tsa kiya uwanay zlà kà, məhəd à huma à gay, mətapla tatak uwana aŋa azlamagol dza, məduwa tatak teraŋaga, uwana mətapla lakəl aŋa Kristu, mədà à huma à gay la tatak məŋga, bokuba dza uwana adadzəka matatukw gày, mətatukw aya aw, ama məŋal à zagəla la madla à huma à gay. Mapəh gay la ləv ala, madàh azlatatak mawisiga uwana adala dza à mamətsay à abà aya, la madiŋ gəl à Zəzagəla à vok aya, mədàpa à akul aya aw.

<sup>2</sup>Məslala vok matapakulla matapla akul teraŋa aya aw. Uwaga la uwana batem dziriga, kakay à mapəs gay à dza à vok la mabək atà à ahəl à gəl la sləm aŋa Zəzagəla mi? Ŋgaha Zəzagəla adàwulla azladza à uda la mamətsay mi, ŋgaha kakay adàdàha atà seriya à gəl, la kaslà makəf gəl à ahəŋ mi?

<sup>3</sup>Məsak azlatatak uwaga gesina, məhad à huma à gay la mazlak anu aŋa Zəzagəla ŋgaha mədàdèhəŋ kiya uwanay.

<sup>4</sup>La dziriga ma, kakay akəs vok à azladza uwana tasəkw à tetəvi mawisiga à ama mi? Kay kà, tadzà à ahəŋ la udàka aŋa Zəzagəla la abà. Tatàp mavày aŋa Zəzagəla, ŋgaha tabəzal Masasədok Zəzagəla tekedik.

<sup>5</sup>Atà tatapəŋ kà gay Zəzagəla kà delga, tatàp maslay aŋha uwana adàgay la zamana uwana la abà adàsa à waŋ.

<sup>6</sup>Ŋgaha tawùl à lig, tetəvi la ahəŋ kà mawulla atà à waŋ aŋa mapəh gay la ləv ala aw, kà uwana azladza uwanay tatatàsl Kona aŋa Zəzagəla, à ahàf à adi kà masəla tatsəkəkal magodàhay à gəl la dazuwaya.

<sup>7</sup>Dzùgwàw lakəl aṅa kutso, baṅa iyaw asuw à guf à abà kà, tatak may atsa à uda, ṅgaha azlaka azlaməna mapəsay, uwaga asal magodəy kà Zəzagəla apis gay à guf uwatà à vok.

<sup>8</sup>Tekeḍika la guf la abà kà, atàk la kəsaf mawisiga atsa à uda la abà, kutso kà tatak deyday. Zweek la huma la gay kà Zəzagəla adàtsafla adəgay mababəh gay gə aṅa tetuwa.

<sup>9</sup>Akul, uwana akul azlaməna gay ləv gulo kà, amiyaka məpəh kiya uwanay kà, məsəl akul, məsəl kà kanəfaw tetəvi delga gə, ṅgaha kà Zəzagəla adabəl akul.

<sup>10</sup>Masla kà dziriga, haḍay gə, kà sləray aṅkul uwana kaḍahawwanəy kà avikaṅ aw, bokuba magodəy, uwana kazlakahaw azladedə aṅkul məna gay Zəzagəla, ṅgaha zlakàw atà kiya uwaga aya, ṅgaha uwaga apəhla ala kà: Kawoyaw Zəzagəla.

<sup>11</sup>Uwana mətəwal à tsəh kayak kà, kawadəw vok à uda, kà kadaw à huma à gay kà akul aṅa maḅəzal tatak uwana kaḍuwawwal yewdi.

<sup>12</sup>Asa à anu kà kagaw azlaməna may vok aw, kiya uwaga kà: Gàw kà bokuba azlauwana tadiṅ gəl à Zəzagəla à vok, tafa manewəṅ aṅatà kà à Zəzagəla à afik. Atà la uwana tadəḅəzal tatak uwana Zəzagəla apəh à ahəṅ.

<sup>13</sup>Kasəlaw kà, dagay uwarà kà Zəzagəla apəh à Abəraham à ahəṅ. Mok uwana apəh uwaga kà, afahà akur à ahəṅ la dziriga. Dza la ahəṅ aduwanəy Zəzagəla aw. Kà Zəzagəla aṅa mazuwal mawadəy aw, kiya uwaga afahà akur à ahəṅ kà la gəl aṅha.

<sup>14</sup>Agòḍ: "Ndzer, gəpəs à ka gay à vok, gədàvə à ka mayyi à tsəh ala uwana dza atugway aw."

<sup>15</sup>Abəraham awadà ləv ala la tsetsi dadəṅ aṅa Zəzagəla, ṅgaha la mabasiṅ. Kiya uwaga akudà azlatatak uwana Zəzagəla apəhal à ahəṅ.

<sup>16</sup>Baṅa azladza tazùw mawadəy kà la sləm aṅa dza məṅga uwana aduwa atà. Mawadəy kà uwana adəv à gay la tataka azladza la abà.

<sup>17</sup>Gay gə la uwaga à uwana, Zəzagəla azùwal mawadəy. Asəl kà azladza uwana apəh à atà gay à ahəṅ kà, tatsən tatak uwana apəh à ahəṅ kà madagəḍiṅ à afik. Gay gə la uwaga apəhal à ahəṅ dadəṅ à tatak uwana adavəl, la lig la ahəṅ azùwal mawadəy.

<sup>18</sup>Kiya uwaga azlatatak səla la ahəṅ uwana dza aslələ vok maḅəḍla aw, uwana Zəzagəla apəh à ahəṅ, ṅgaha la uwana afəhəh akur à ahəṅ lakəl aṅha kà, adəh fida aw, uwana məyahay la slaka Zəzagəla, kà anu aṅa maḅəzal slaka, kà anu aṅa mahad vok à ahəṅ, uwaga adzərəḍ anu à uda kayak, kà anu aṅa maf manewəṅ gami kà à tatak uwana à tsəh Zəzagəla afà à anu à huma à gay.

<sup>19</sup>Tatak uwana məfa manewəṅ gami à afik kà, Zəzagəla akəs anu dzəkka, kà anu aṅa madz à ahəṅ titi la huma Zəzagəla, bokuba kəslah iyaw uwana tawadəṅ à ahəṅ lela la iyaw la abà la gay dərəv. Gay gə la uwaga à uwana, bafta uwana atsək à slaka tsikaslaḡa, ama afətamalla ala la huma gami, kà anu aṅa mad à gəy à huḍ gə, à slaka uwana Zəzagəla la ahəṅ.

<sup>20</sup>Yesu kà adagay la abatà la huma gami, masla la uwana abèd à huma kà anu, kà uwana masla apàk Məŋ Madzahaga mənğa gà, bokuba Melkisdaka adagay mən madzahaga aŋa koksikoksi.

## Ibəranəŋkowen 7

<sup>1</sup>Melkisdaka uwaga uwarà kà agà sufəl aŋa gudəŋ Salem, agà babay madzahaga la huma Zəzagəla uwana kərkər la afik. La zamana anik Abəraham ahàd à guvəl, akàd azlasufəl anik anik à gay. Mok uwana adawul à waŋ la guvəl kà, Melkisdaka ahàd kà magagamay la masla, apìsalla gay à vok.

<sup>2</sup>Abəraham avà à Melkisdaka makulo aŋa kəla tatak uwana azùw la guvəl la abà. Melkisdaka uwaga kà, sləm aŋha asal magodəy kà, teraŋa kà: Sufəl uwana dziriga. Dgaha babay agà sufəl aŋa lapiya kà uwana agà sufəl aŋa Salem, ŋgaha Salem asal magodəy kà: Lapiya.

<sup>3</sup>Dza la ahəŋ asəl baba aŋha la iyà aŋha bay aw, baməraka azlababa aŋha madzidziga bay aw. Məsəl mok mayyay aŋha bay aw, amiyaka bà mamətsay aŋha babay. Masla agà magagazləlaga la Yesu, Kona aŋa Zəzagəla, kà uwana sləray aŋa mav tatak aŋha akəf gəl à ahəŋ aw.

<sup>4</sup>Dzùgwàw lakəl aŋa mənğa aŋha tsi. Abəraham baba gami madzidziga kà, ahəl tatak uwana azùw la guvəl la abà gesina, avàhəŋ ala madziga kulo kulo, avàhal tekula tekula la gay aŋa kulo kulo gesina.

<sup>5</sup>Azlaanik la mayyi à tsəh ala Levi kà, məna makad tatak à Zəzagəla la tataka aŋatà la abà, atà kà azlamadzahaga aŋa wakità seriya aŋa Musa. Tagod à atà: 'Dàw à slaka azladza, kà tavàhà à akul tekula la gay aŋa kəla tatak kulo, kà akul aŋa madzadzarlaka vok.' Haday, məsəl kà tabəzàhal tatak uwaga la ahəl aŋa azladede aŋatà, bà atà dagay mayyi à tsəh ala aŋa Abəraham bay.

<sup>6</sup>Ama Melkisdaka kà agà mayyi à tsəh ala aŋa azlaməna mavəh tatak à Zəzagəla uwaga aw, baməraka la kità bay kà, abəzal tatak la ahəl aŋa Abəraham. Abəraham kà masla kà Zəzagəla apəhal azlatatak uwaga à ahəl. Melkisdaka uwaga la uwana apìs gay à Abəraham à vok.

<sup>7</sup>Haday, məsəl kà baŋa dza apìs gay à dza anik à vok, kà masla la uwana mənğa. Kità kà, Melkisdaka la uwana aduwà Abəraham.

<sup>8</sup>Azlamadzahaga uwana la hud gəy aŋa azlaməna makad tatak à Zəzagəla, uwana tabəzàh à makulo aŋa tatak la ahəl aŋa azladede aŋatà tamàtsàhəh. Ama Melkisdaka kà aməts aw, agà la ahəŋ aŋa koksikoksi, bokuba uwana wakità Zəzagəla agod à anu.

<sup>9</sup>Lagwa məslala vok aŋa magodəy kà, Levi uwana abəzàhà tatak la slaka azladza anik kà, atà babay kà tavà makulo aŋa tatak à Melkisdaka suwaŋ, kà uwana baba aŋha Abəraham avà tatak à Melkisdaka la gəl aŋha.

<sup>10</sup>Bokuba magodây kà, mok uwana Abèraham avà tatak à Melkivadaka, kà Levi kà tayyay dadàñ aw, la lig la ahəñ mayyi à tsəh ala aṅha avàhal babay. Uwaga adzadānəñ ala kà Melkivadaka adūwəñ huđ gày aṅa Levi gesina la kaykay.

<sup>11</sup>Sləray aṅa azlaməna mav tatak à Zəzagəla la huđ gày aṅa Levi kà, taslala vok kà mahənəñ ala uwana asa à Zəzagəla aw. Agayṅa taslala vok kà mahənəñ ala kà, naka delga kà aṅa mas à waṅ aṅa Məñ Madzahaga anik uwana adūwaṅ Melkivadaka aya aw, naka azlaməñ madzahaga tagay kà mayyi à tsəh ala aṅa Levi pəra bokuba Haruna. Uwaga kà aga kà la ahəl aṅa madzahaga aṅa azlaməna mav tatak à Zəzagəla, uwana tagà la huđ gày aṅa Levi à uwana Zəzagəla avà mapəhay aṅha à azlaməna gudəñ Isərayel à ahəl.

<sup>12</sup>Baṅa Zəzagəla abəḍla azlamadzahaga kà, məsəlay bay kà mafàh akur à ahəñ aṅha abəḍla vok babay.

<sup>13</sup>Lagonay kà, məsəl kà tsəhay madzahaga abəḍla vok. Masla à Sufəl gami Yesu, uwana məpəhay la abanay kà, asà à uda kà la tsəhay anik. Masla kà tsəhay aṅa Levi aw. Dza la ahəñ la tsəhay aṅha la abà madzahaga, uwana masla makad tatak aw, ṅgaha à uwana tetuwa adakəd tatak à Zəzagəla, kà tsakana aṅa azladza aw.

<sup>14</sup>Hadây, masla à Yesu kà, asà à uda la tsəhay aṅa Yahuda la abà. Mok uwana Musa apàhàh lakəl aṅa azlaməna makad tatak à Zəzagəla kà, apàh kà lakəl aṅa tsəhay uwaga aw.

<sup>15</sup>Azlaməna makad tatak la huđ gày aṅa Levi kà, taslala vok kà madla azladza à slaka Zəzagəla aw. Aganay à tatak uwana adzad gay uwaga ala: Madzahaga anik aṅa azlaməna mav tatak à Zəzagəla, uwana bokuba Melkivadaka kà adazlaṅalay.

<sup>16</sup>Dza uwatà kà məñ madzahaga aṅa makad tatak à Zəzagəla la mapəhay aṅa azladza aw. Ama masla kà Məñ Madzahaga, kà uwana aga la maslay kà madz à ahəñ la sifa aṅa koksikoksi.

<sup>17</sup>Lakəl aṅa dza uwaga tatsətsèr à wakità Zəzagəla à abà kà: "Kak kà, kadàgay Məñ Madzahaga aṅa koksikoksi bokuba Melkivadaka."

<sup>18</sup>Zəzagəla abəḍla azlamapəhay aṅha uwarà, kà uwaga tagà la ndzəḍa aw, tazlakàh azladza babay aw.

<sup>19</sup>Mapəhay aṅa Musa kà aslala vok magəñ azladza sətaka la huma Zəzagəla aw. Lagonay kà tatak anik la ahəñ, à uwana adūwa mapəhay aṅa dza uwaga. Məfa manewəñ à uwana à afik, avà masəlay kà maz vok à slaka Zəzagəla.

<sup>20</sup>Ḷgaha aya kà: Mok uwana Zəzagəla asal maf Yesu à ahəñ kà Məñ Madzahaga kà, afàhà akur à ahəñ dadàñ, à mok uwana tsəhay Levi apakà məñ madzahaga kà Zəzagəla, afàhà akur à ahəñ kiya uwanay aw.

<sup>21</sup>Ama Zəzagəla azùw mawadây à Yesu la magodây kà: "Gi, gi Sufəl Zəzagəla gəḍabəḍla tatak uwanay aw: Gəḍazuw à ka mawadây, kà kadàgay Məñ Madzahaga aṅa koksikoksi."

<sup>22</sup>Uwanay kà asal magodáy, kà makəs vok slawda uwana Zəzagəla adfahəŋ la anu kà, uwaga dāduwa à gay makəs vok slawda maviyaga uwatà uwarà. Yesu la uwana adzadà tatak uwaga ala.

<sup>23</sup>A babay kà tatak anik la ahəŋ aya, kà azlamadzahaga aŋa makad tatak la huf gày aŋa azla Levi kà tagəh dəŋ, kà uwana tamàtsàh, baŋa anik adamətsay kà, anik abəd à slaka aŋha à abà.

<sup>24</sup>Ama Yesu kà kiya uwaga aw, masla kà amətsay aw aŋa koksikoksi, sləray aŋa magay madzahaga aŋha kà adəkəf gəl à ahəŋ aŋa tetuwa aw.

<sup>25</sup>Kà uwaga à uwana aga la maslay lakəl aŋa tatak gesina kà mabəl azladza uwana tatsa à waŋ à slaka Zəzagəla, kà madegolay masla uwana aga la ahəŋ la sifa aŋa koksikoksi. Abàdàh à huma kà madəv kudà à Zəzagəla kà anu.

<sup>26</sup>Masla kà Məŋ Madzahaga uwana məwoyaŋ. Masla kà tsikaslaga, mawisiga aŋha la ahəŋ à masla aw, adàh tsakana aw. Masla kà kiya azlaməna tsakana aw, Zəzagəla afà à fəta à awtəy tsikasla. Afà aslələf aŋha à gəl la zagəla la afik,

<sup>27</sup>kà aŋa azlamadzahaga anik, uwana kà say takadáy tatak à Zəzagəla kəla mahənaŋ. Baŋa taday kà makad tatak kà, say takədáy kà aŋa gəl aŋatà dadəŋ, ŋgaha atà aŋa makadáy kà aŋa tsakana aŋa azladza anik. Ama kà aŋa Yesu kà, adfahəŋ kiya uwaga aw. Masla kà, avà kà asik tekula pəra, ŋgaha asla kiya uwaga. Mavəy uwaga kà vok aŋha uwana avà.

<sup>28</sup>Azlamadzahaga uwana mapəhay aŋa Musa abək atà à ahəŋ kà, tagə kà azladza deydayga. Tadəhəhə tsakana. Ama mok uwana Zəzagəla afàha akur à ahəŋ kà, abədla Kona aŋha à abà kiya Məŋ Madzahaga, uwana akəf gəl aŋha bokuba uwana asal. Adadza à ahəŋ kiya uwanay aŋa koksikoksi.

## **Ibəranəŋkowen 8**

<sup>1</sup>Gay uwana aduwà à vok kà aganay: Mədadzəka mapəhay: Məŋ Madzahaga gami uwana adadza madzay la kəslah asik la afik la ahəl kaf aŋa Zəzagəla lakəl la zagəla, uwana akor tatak gesina,

<sup>2</sup>masla kà Məŋ Madzahaga la slaka tsikaslaga, uwana la Zəzagəla la abà. Azlamadzahaga tadəhəhə sləray aŋatà la gày lukut uwana la aku, ahəl aŋa azladza adfahəŋ. Ama slaka uwana Yesu adàh sləray aŋha kà la zagəla, slaka dziriga uwana Zəzagəla adfahəŋ.

<sup>3</sup>Azlaməŋ madzahaga gesina kà tabək atà à ahəŋ, kà atà aŋa mavəh tatak à Zəzagəla, ŋgaha bay kà atà makadəl tatak. Gay gə la uwaga, Məŋ Madzahaga gami akor tatak kà mavəy suwaŋ.

<sup>4</sup>Mədzugw, mok uwana agə la ahəŋ la gudəŋ la vok kà, apakà Məŋ Madzahaga aw. Kà uwana azlamadzahaga aŋa azlaməna mav tatak à Zəzagəla la ahəŋ, uwana takədəl tatak bokuba uwana mapəhay aŋa Zəzagəla agəd à azla Yahudiya.



<sup>5</sup>Azlaməna mav tatak à Zəzagəla uwaga kà tadəhəhə sləray aṅatà kà la məṅ gày madəv kudà à Zəzagəla la aku. Ama gày uwaga kà maftsa vok aṅa gày dziriga uwana la zagəla la afik. Mok uwana Musa ahəd kà madəh gày lukut uwatà kà Zəzagəla agòdàl: "Nərəz lela, ṅgaha həd, kadaṅal bokuba uwana gəpəhkala la gudəṅ uwanay la afik."

<sup>6</sup>Kətà hadəy, mənəṅəṅ kà sləray aṅa Yesu Kristu aduwaṅ sləray aṅa azlamadzahaga anik gesina la kaykay, makəs vok slawda uwana akəs anu vok slawda la Zəzagəla, ṅgaha la azladza kà, aduwaṅ makəs vok slawda aṅa uwarà, uwatà bay, kà uwana tatak uwana Zəzagəla apəhəṅ la makəs vok slawda uwanay la abà kà, aduwaṅ azlatatak uwana məbəzal uwarà.

<sup>7</sup>Agayṅa makəs vok slawda teraṅaga agay delga kà, naka Zəzagəla adəh makəs vok slawda anik aya aw.

<sup>8</sup>Ama mənəṅəṅ kà aslā aw, kà uwaga Zəzagəla apəhla tsakana aṅatà à azladza, ṅgaha agòd à atà: "Fəw sləm à abà. Zamana anik adàsa à waṅ à uwana gədəh makəs vok slawda mawga la Isərayel, ṅgaha à azladza tsəhay Yahuda.

<sup>9</sup>Dagay mok uwana gəkəs ahəl aṅa azlababa aṅatà madzidziga kà masəlla atà à uda la gudəṅ Misəra la abà kà, gəkəs vok slawda la atà. Ama makəs vok slawda mawga uwana gədədəhəṅ lagwa, adəgay kà bokuba makəs vok slawda uwatà aya aw. Tawisà makəs vok slawda maviyaga ala, à uwana gədəhəṅ. Gay gə la uwaga à uwana, gəguwatàla à lig à gay. Gi Sufəl Zəzagəla aṅkul la uwana gəpəhay kiya uwanay.

<sup>10</sup>Makəs vok slawda uwana gədədəhəṅ la azladza Isərayel la zamana uwatà kà aganay: Gədəfa à atà mapəhay gulo à ahəl, Gədətsetserah mapəhay gulo à ləv aṅatà à tsəh babay. Gədəgay Zəzagəla aṅatà, Ḍgaha tadəgay azladza gulo suwaṅ.

<sup>11</sup>Dza la ahəṅ adàda à slaka azladedə aṅha kà matapatàla gay gulo matapay aya aw, Kà magod à atà kà: Sələw Sufəl Zəzagəla aya aw, Kà uwana dza gesina tadəsəl gi azlabəziga baməraka azlamagolga bay.

<sup>12</sup>Vok adəhama à gi kà tsakana aṅatà, gədəmətsatəṅ ala adəgay. Gədəfa à atà à ləv à abà aya aw." Kiya uwaga Sufəl Zəzagəla agòd.

<sup>13</sup>Uwana Zəzagəla apəh kiya uwanay kà lakəl aṅa makəs vok slawda mawga, uwaga asal magodəy kà, uwana adəhəṅ teraṅa kà, apakà maviya tatak. Məsəl hadəy kà, tatak uwana adapaka maviya tatak kà, uwaga kà azlaka dza aya aw, iyaw aṅha adadəv à gay adagay.

## **Ibəranəṅkowen 9**

<sup>1</sup>La makəs vok slawda teraṅa la abà kà, mafəh akur à ahəṅ aṅa Zəzagəla la ahəṅ à uwana naka azladza tasləkaw masla. Agà la ahəṅ babay slaka uwana azladza taṅəl, kà masləkaway la aku.

<sup>2</sup>Azladza tadəhə gày lukut huđ səla, mad à gày teraṅa slaka tsikaslaga, la gày uwatà la aku kà fənəs la aku, table la aku, uwana tabək kaf aṅa Zəzagəla à afik.

<sup>3</sup>La gay gamagày aña gày uwatà tanəlan ala la bafta kà huf gày uwatà kà, slaka tsikaslaga kaykay.

<sup>4</sup>Tabək tatak mabək ahəf matərsin luwəluwəga à agu. Tafà sahar aña makəs vok slawda à agu la abatà. La sahar uwatà la abà, tatak may uwana Zəzagəla aslələh à ahəŋ la zagəla kà agəh la abà la abatà, sləm aŋha Manu. Azəva aña Haruna uwana awuratət bay kà, agà la sahar uwatà la abà, ŋgaha azlaakur səla uwana Zəzagəla atsetsəral mapəhay kulo aŋha à adi babay kà agà la abà la abatà.

<sup>5</sup>La sahar uwatà la afik kà, maftsa à vok aña azlamalika səla la ahəŋ, uwana asa à atà kà mapəhla à azladza, kà Zəzagəla la ahəŋ la abatà, tabatàhà gogozläh à sahar uwatà à gəl, kà matsak à slaka uwana à ama takəd tatak à Zəzagəla kà aña mamats tsakana ala. Ama asa à gi kà mapəh gay uwaga à uda lagonay la dazuwaya aw.

<sup>6</sup>Mok uwana sləray adadəh vok à ahəŋ gesina kà, azlaməna makəd tatak tadəhàhà sləray aŋatà la gày teraŋaga la aku koksikoksi.

<sup>7</sup>Huf gày masəla kà, say məŋ madzahaga aña azlaməna makəd tatak à Zəzagəla, la uwana adəh à agu pəra, kəla mavay kà asik tekula pəra adəha à agu, say la aŋiz la ahəl kà mav à Zəzagəla, kà aña gəl aŋha, ŋgaha kà, kà aña azladza babay kà mamats tsakana aña azladza, uwana ala tadəhəŋ gesina kà, kà uwana atà azladza asik pəra.

<sup>8</sup>Masasədok Zəzagəla apəhanula, kà tetəvi uwana adala dza à slaka tsikaslaga kaykay kà adapəzl vok dadəŋ aw, uwana huf gày matera à lig dadəŋ.

<sup>9</sup>Uwaga kà maftsa à vok, uwana apəhanula uwaga kà, asal magodəy kà azlatatak uwana adapaka vok, la uwaga la mas à waŋ aña Yesu uwana tavəh, ŋgaha la uwana takəd à Zəzagəla kà aslala vok aña mag ləv aña azladza uwana tanəfa tetəvi uwaga sətaka aw.

<sup>10</sup>Atapatàla kà lakəl aña tatak may, ŋgaha lakəl aña azlatatak masay, ŋgaha lakəl aña mapaləh tatak may, ŋgaha lakəl aña azlatatak masay, ŋgaha lakəl aña mapaləh tatak pəra. Uwaga kà azlatatak aña gudəŋ à vok, uwana tadza à ahəŋ kà aña dəŋŋa pəra, tsərah à uwana Zəzagəla adəbədla azlatatak gesina à ahəŋ.

<sup>11</sup>Lagonay kà, ndzer Kristu kà adasa à waŋ. Masla kà Məŋ Madzahaga uwana asəlla azlamapis gay à vok à waŋ, la azlatatak delga uwana mədabəzal la ahəl aŋha. Adəh sləray aŋha la gày anik la kay, uwana dādūwa à gay azlagəy lukut, uwana tadəhəhəŋ uwarə, ŋgaha dzəba aŋha səla aw. Uwaga maŋalayga la ahəl aña azladza aw, Zəzagəla la uwana aŋəl la gəl aŋha, gày uwaga kà la gudəŋ uwanay la vok babay aw.

<sup>12</sup>Ama adàla kà aŋiz aña gəl aŋha à gày la ahəl, ŋgaha avə kà asik tekula pəra, la uwaga la uwana abəlla anu à uda la tsakana gami la abà aña tetuwa.

<sup>13</sup>Dagay uwarə kà, takədəl azlabahu ŋgaha la azlakokur, takotsekwəh aŋiz à azladza, uwana azlasətaka la huma aña Zəzagəla aw. Takəsəh vəlīk tatələh à gay, ŋgaha masəka akəl akəlga kà tatsəh à azladza aya babay. Kiya uwaga azladza uwana tawisə mapəhay aña Zəzagəla ala kà, tapakəh sətaka la huma aña mapəhay aña Zəzagəla.

**14**Kayyà, baŋa kiya uwanay kà, aŋiz aŋa Kristu aduwan gesina, kà uwana aŋiz aŋa Kristu kà dāduwà à gay aŋa azlatatak asik, kà uwana masla adāhà tsakana aw. Masla kà avà gəl aŋha à Zəzagəla la ndzəda aŋa Masasədok tsidāŋa, kà anu aŋa madāh azlatatak mawisiga uwana adala anu à mamətsay à abà aw, ama mədāh sləray aŋa Zəzagəla uwana avà à anu sifa adəv à gay aw.

**15**Kà uwaga à uwana apakà masla makəsa anu vok slawda la Zəzagəla. Ŋgaha kà azladza uwana Zəzagəla azalà atà kà, tadəbəza tatak delga uwana Zəzagəla apəh à atà à ahəŋ, kà atà tadəkoray aŋa koksikoksi. Uwaga adāhāhà vok kiya uwaga kà, kà uwana Kristu aməts, la mamətsay aŋha asūkw azladza à uda la tatak mawisiga aŋatà uwana la abà tadāhāhəŋ la mok uwana atà la tsəh aŋa makəs vok slawda maviyaga.

**16**Məsəl kà dza azuw gày, kà say dza amətsay dadəŋ, la uwana dza azuw gày aŋha.

**17**Baŋa dza la sifa kà, mapəhay uwana apəh kà, mavāh tatak kà godega aŋha la ahəŋ dadəŋ aw, say baŋa adamətsay la uwana pəra.

**18**Kità bay, uwana Zəzagəla adāhà makəs vok slawda maviyaga baməraka la mawga kà, say la mats aŋiz à vədāh.

**19**Dagay uwarà Musa apəh mapəhay aŋa Zəzagəla à azladza gesina dadəŋ. La lig la ahəŋ atsāh aŋiz aŋa azlavəlik, la azlabahu ŋgaha ahohodla la iyaw uwana tatadāh. Aslāhānì babasl à ahəl dats babay, ŋgaha la slewzi aŋa padā tuwan mativga kize akotsekwāh à wakità aŋa Zəzagəla, ŋgaha à azladza gesina babay.

**20**Ŋgaha agòd: 'Uwanay kà aŋiz uwana Zəzagəla akəsla vok slawda la akul. Tsizllāw à makəs vok slawda uwanay à afik', agòd à akul.

**21**Musa akotsekwāh aŋiz à gày lukut babay, ŋgaha à azlatatak gesina uwana adāhla sləray à Zəzagəla.

**22**La mapəhay aŋa Zəzagəla la abà kà, gay məŋga aŋa azlatatak kà, tagahəŋ sətaka kà la aŋiz, kokudā aŋiz kà, Zəzagəla aməts tsakana à azladza ala aw, say baŋa aŋiz adanəd à vədāh.

**23**Tetəvi uwana Musa atəpla à azladza dagay uwarà kà, agà kà bokuba maftsa vok aŋa azlatatak dziriga la zagəla pəra. Naka magəhəŋ azlatatak uwaga gesina tsidāŋa, kiya uwaga à uwana mapəhay aŋa Musa apəh. Ama baŋa kà aŋa manəfay dziriga kà, asal makədāl tatak uwana aduw aŋiz aŋa azlatatak, uwaga kà mavāy uwana Yesu Kristu akəd, avà gəl aŋha.

**24**Məsəl kà masla kà ahəd à hud' gày tsikasлага uwana à agu, azladza tanəl la ahəl aw. Uwaga kà maftsa vok aŋa slaka uwana Zəzagəla la abà pəra. Ama ahəd kà à zagəla, à slaka uwana Zəzagəla la ahəŋ, kà masla mawulla anu à tsəh la slaka Zəzagəla.

**25**Azlaməŋ madzahaga aŋa azla Yahudiya tadahāhà à agu à slaka tsikasлага kaykay gā à agu, kà asik tekula kəla mavay, tadahāhà à gày la aŋiz la ahəl, aŋiz aŋa gəl aŋatà aw. Ama Kristu kà avà kà aŋiz aŋa gəl aŋha, masla kà avà gəl aŋha kà asik tekula, awkà asik dəŋ aw.

<sup>26</sup>Agayña agay kiya uwanay, awkà naka asa ngərpa mənğa dagay uwana gudəŋ à lig madzəka vok. Ama asà ngərpa kà asik dəŋ aw. Asà à waŋ kà asik tekula, nekwa la mok makəɗ gəl à ahəŋ pəra. Avà vok aŋha à Zəzagəla kà mazəɓ tsakana à azladza lakəl ala aŋa koksikoksi.

<sup>27</sup>Azladza gesina tamətsay kà asik tekula pəra. La lig la ahəŋ kà, kəla uwabeyuwi tada à huma Zəzagəla kà masla madāh à atà seriya à gəl.

<sup>28</sup>Kristu kà agà kiya uwaga babay, asik tekula pəra, asəkw aŋiz aŋha à vədāh kà masla aŋa mazəɓ tsakana aŋa azladza aŋuvaw. Adāwula à waŋ kà masəla aya. Ama la kaslā uwatā kà, adāsa à waŋ kà, kà mazəɓ tsakana aŋa azladza aya aw, ama kà maɓəl azladza uwana takud masla.

## Ibəranəŋkowen 10

<sup>1</sup>Azlamapəhay aŋa Musa kà, tagà kà maftsa vok aŋa azlatatak delga uwana tadāsa à waŋ la huma la gay pəra. Atà kà azlatatak makəɗ gəl à ahəŋ aw. Azlamadzahaga aŋa azlaməna mav tatak takàdāh tatak à Zəzagəla kà kəla mavay. Azladza uwaga asà à atà maz vok à slaka Zəzagəla la tetəvi uwaga, ŋaha ma la tetəvi ma uwala makəɗ tatak uwaga apakatàla sətaka la?

<sup>2</sup>Agayña tapakà sətaka kà uwana takəɗ tatak asik tekula kà, anaka tsakana aŋatā kà avikaŋ, naka takəɗal tatak aya aw.

<sup>3</sup>Ama kiya uwaga aw. Baməraka la makəɗ tatak uwaga bay kà, tapəhatàla tsakana aŋatā kəla mavay.

<sup>4</sup>Kà uwana aŋiz aŋa azlabahu la azlavəlik la azlakokur aslāla vok kà mazəɓ atà tsakana aŋatā lakəl ala aw.

<sup>5</sup>Kà uwana mok uwana Kristu asal mas à waŋ à gudəŋ à vok kà, agòɗ à Zəzagəla kà: "Asa à ka məkəɗ à ka azlatatak aw, baməraka mav à ka azlatatak aw. Ama kadāhà à gi, kà gi aŋa mawulkala.

<sup>6</sup>Azlatatak uwana takadāy aŋa maɓakay la uwana akəs à ka gəl aw, mats aŋiz à vədāh kà aŋa tsakana kà, akəs à ka gəl babay aw. Kawoyaŋ kà: Makəs gay aŋak pəra.

<sup>7</sup>Hadāy gəgòɗ à ka: Iyay, gi la uwanay Zəzagəla, gəda à awtāy à gudəŋ à vok, kà gi madāh uwana asa à ka, gədàdēhəŋ bokuba uwana tatsetsər lakəl gulo la wakità mapəhay la abà",fa agòɗal.

<sup>8</sup>Gay teraŋaga uwana Kristu apəh kà aganay: "Hadāy, Zəzagəla gulo, asa à ka kà takəɗ à ka tatak kà mav à ka aw, baməraka mav à ka azlatatak anik bay aw. Asa à ka babay aŋa maɓak à ka azlatatak aw, ŋaha asa à ka tatsāhà à ka aŋiz kà mamats tsakana ala babay aya aw." Apəh uwanay kiya uwaga kà, kà uwana azlatatak uwaga tanəfa slaka asik aŋa mapəhay.

<sup>9</sup>Agòɗ: 'Gi la uwanay, gəda à awtāy à gudəŋ à vok, kà gi aŋa madāh uwana akəs à kak à gəl.' Uwaga apəhla ala, kà Zəzagəla akweska madz à ahəŋ maviyaga la matsāh aŋiz à vədāh, ŋaha abəɗla à abà la mamətsay aŋa Yesu Kristu.

- 10** Kà uwana Yesu Kristu kà, adahà uwana akès à Zəzagəla à gəl, avà vok aṅha deyday, mədəgay tsikasla la huma Zəzagəla. La azlamənəfay anik anik kà, akəs vok aya tetuwa aw.
- 11** Azlamadzahaga aṅa azla Yahudiya tadahàhà sləray aṅatà kəla mahənay la slaka matsizilla koksikoksi, takəfəhəhal tatak, ama azlatatak uwaga kà aslala vok aṅa mazəb tsakana aṅa azladza aw.
- 12** Ama Yesu Kristu kà, kà akəf gəl aṅha, uwana agà la maslay kà mazəbla tsakana aṅa azladza gesina aṅa tetuwa. Dgaha adzà madzay la ahəl kaf aṅa Zəzagəla lakəl.
- 13** Lagwa kà akuday kà kaslā uwana Zəzagəla adəbək azlaməna məzam aṅha à tsəh asik aṅha.
- 14** La mav gəl aṅha asik tekula apakà azladza aṅha ala dzaṅdzaṅga la huma Zəzagəla, abək atà à slələf à gəl, apəkatala sətaka aṅa koksikoksi.
- 15** Masasəfok tsikasla babay kà, apəhanula azlatatak uwaga la dazuwaya, uwaga kà dziriga, agəf kà:
- 16** "Sufəl Zəzagəla gami agəf kà: Makəs vok slawda, uwana mədədəhəṅ anina kà, la mok uwatà kà gədəfa mapəhay gulo à ləv aṅatà à tsəh. Gədətsetser à ləv aṅatà à tsəh aya babay."
- 17** Dgaha agəf aya: 'Gədədzugway lakəl aṅa tsakana aṅatà à tsəh aya aw, baməraka lakəl aṅa azlatatak mawisiga uwana tadəhəṅ gesina.'
- 18** Tsa baṅa Zəzagəla adamats tsakana aṅa azladza ala kà, azladza tanəkudə aṅa makəf tatak anik anik aya kà mazəbay mawisiga aṅa azladza aw.
- 19** Azladedə gulo, tsa baṅa kiya uwanay kà, kà mamətsay aṅa Yesu la makəlay aṅa aṅiz aṅha kà anu mənəfa tetəvi delga aṅa mad à slaka tsikaslaga, uwana Zəzagəla la abà.
- 20** Yesu akwohà bafta uwatà ala, à uwana məpəh gay aṅha uwarà, apəzlla anu tetəvi la uwatà, kà mad à huɸ gə gə. Uwaga kà tetəvi mawga uwana məbəz sifa la ama. Bafta uwana akwohəṅ ala kà, asal magodəy kà vok aṅha, uwana tatatəsl à ahəf à adi.
- 21** Anu la Məṅ Madzahaga uwana af sləm à azlaməna gay Zəzagəla.
- 22** Kà uwaga à uwana, məf madzugway gami à Yesu à afik aṅa deṅdeṅ, məzà vok à slaka Zəzagəla la ləv tekula, kà uwana aṅiz aṅa Yesu Kristu adag ləv gami sətaka, ṅgaha adapal anu la iyaw tsidəṅaga.
- 23** Zəzagəla apəh à anu, kà mav à anu tatak anik uwana apəh à ahəṅ. Məhad à huma à gay la mapəhay la dazuwaya, kà anu aṅa madṅ gəl à uwana à vok, Zəzagəla agod: Mədzerükwəw!
- 24** Məfə vok sləm, kà anu aṅa madəh delga koksikoksi.

- <sup>25</sup>Məkweskà maham gay à vok la slaka gà bokuba aña azladza anik, uwana takwesahay aw. Mədzədfàhàhà vok ala kà anu, anu dfađuwa à gay uwaga aya, kà uwana kasəlaw, kà kaslā uwana Yesu Kristu adàsa à wañ kà nekwa à dagay.
- <sup>26</sup>Baņa məsəl dziriga aña Zəzagəla nəma, masla məda à huma à gay la madàh tsakana kà, məsəl kà, dziriga, makədf tatak anik adàgay la ahəñ aya à uwana adàg anu sətaka la huma aña Zəzagəla aw.
- <sup>27</sup>Dza uwana adəhəñ kiya uwaga kà guba akəs, kà uwana Zəzagəla adàdukwla seriya à gəl, seriya uwaga kà adàgay kà bokuba akəl ηədfəh ηədfəhga, uwana adàbabəh azlaməna məzam aña Zəzagəla à gay.
- <sup>28</sup>Kasəlaw kà, baņa dza uwana awis mapəhay aña Musa ala kà, baņa azladza səla, baņa aw makər tatsəl yewdi à vok kà, baməraka takədf babay kà vok, ahamà à azladza kà masla aw.
- <sup>29</sup>Tsa kiya uwanay la mapəhay aña Musa la abà ma, aməraka dza uwana akweska Kona aña Zəzagəla la uwana as ηərpa aw ay? Baņa adakweska kà Baba, akweska aņiz aña Zəzagəla uwana akəsətāla vok slawda la mapakəñla tsidəña babay, uwaga kà adagəfah à Masasədfok Zəzagəla uwana av mapəs gay à dza à vok, dzəba dza uwaga kà, adàsa ηərpa kaykay.
- <sup>30</sup>Zəzagəla la gəl aña agədf: 'Gədfəpəlay lakəl aña azladza uwana takweska gi, gədfəwulla à atà ala azlatatak mawisiga aņatà uwana tafahəgəñ à vok.' Ndzər, məsəl kà adədfah uwana apəh. Agədf aya kà: 'Gi Sufəl Zəzagəla, gədfədfah seriya à azladza gulo à gəl.' Apəh uwaga kà la gəl aña.
- <sup>31</sup>Zəzagəla uwana aga la ahəñ aña koksikoksi, baņa adəh seriya à dza à gəl, ηgaha anəñəñ kà, azlawla aw kà, zlazlafa kà aña dza uwaga.
- <sup>32</sup>Awul akul à gəl, bokuba uwana agə la akul dagay uwarà, kanəñəwəwəñ terəña uđaka aña Zəzagəla. Kasəw ηərpa məñga la mok uwatà la huma aña azladza, ama kabəsəwəwəñ.
- <sup>33</sup>La azlakaslà anik tatsək akul magəfahay à gəl, la huma azladza aņuvaw. La azlakaslà anik kazlāw à ηərpa à abà la azladza anik kiya uwanay.
- <sup>34</sup>Kagəw la slaka gà la azladza uwana tagə la dəñay kà Yesu. Mok uwana azladza takəsəh tatak aņkul, bə la uwaga kà karəbəw, kà uwana kasəlāw kà kadəkəraw tatak anik uwana delga aduwa tatak gesina, ηgaha uwana adədzə à ahəñ aña koksikoksi.
- <sup>35</sup>Kà uwaga: Dəw à huma à gay, la maf madiñal gəl à vok aņkul à Zəzagəla à afik, baņa kadaw à huma à gay la madəhəñ kiya uwanay koksikoksi kà, kadəbəzaw masik aņkul məñga gə.
- <sup>36</sup>Delga kà mabasiñ aņkul agay la ahəñ, kà akul aña madəh uwana akəs à Zəzagəla à gəl, kiya uwaga la uwana kà, kadəbəzaw tatak uwana apəh à akul à ahəñ.
- <sup>37</sup>Gay gà la uwaga Zəzagəla agədf: "Kaslā ηuv kà, dza uwana adàsa à wañ kà adəsafay aya aw.

<sup>38</sup>Dza uwana adàh dziriga la huma gulo kà, adàdza à ahəŋ la sifa aŋa koksikoksi à baŋa adiŋ gi gəl à vok aŋa tsərəh à awtəy. Ama baŋa dza awula à lig, masla kà akəs gi à gəl aw."

<sup>39</sup>Ama anu kà, anu azlaməna mawul à lig kà mazila aw, məga kà anu azladza uwana tadiŋ gəl à Zəzagəla à vok pəra. Kiya uwaga kà mədàbəza sifa adəv à gay aw.

## **Ibəranəŋkowen 11**

<sup>1</sup>Maf gəl à afik, asal magodəy kà: magədəŋ à afik à tatak uwana takuday adəpaka à vok tanəŋəŋ la yewdi aw, tadiŋal gəl à vok kà aga la ahəŋ ndzer.

<sup>2</sup>Azladza uwana uwarə tadiŋ gəl à Zəzagəla à vok, kà kiya uwanay à uwana takəsəl à gəl.

<sup>3</sup>La madiŋ gəl à Zəzagəla à vok la uwana məsəlay kà Zəzagəla adàhà gudəŋ à vok la afad gay aŋha. Uwaga asal magodəy kà, kəla tatak gesina uwana kanəŋawwaŋ la gudəŋ la vok kà, Zəzagəla adàhəŋ uwaga la gay aŋha, uwana mənəŋəŋ aw.

<sup>4</sup>Kà uwana Abel afà madiŋ gəl à Zəzagəla à vok, avəl tatak delga gə, dādūwa à gay aŋa Kaynu, kà uwana adiŋ gəl à Zəzagəla à vok. Zəzagəla anəŋà masla kà bokuba dza dziriga la huma aŋha. Abel asəl uwaga kà Zəzagəla akəs tatak uwana akədəl. Lagwa kà, Abel adamətsay à uwana Zəzagəla apəh à anu gay lakəl aŋha, kà uwana adiŋ gəl à Zəzagəla à vok à uwana apəh à anu gay lakəl aŋha gotənaŋ.

<sup>5</sup>Kà uwana Henok afà madiŋ gəl à Zəzagəla à vok à uwana aməts aw, Zəzagəla azəb à zagəla la adi. Dza la ahəŋ anəŋəŋ aw, Zəzagəla azəb. La wakità Zəzagəla la abà tatsetsèr kà: Mok uwana Zəzagəla aləg mazəb à zagəla kà, masla kà, akəs à Zəzagəla à gəl.

<sup>6</sup>Dza la ahəŋ akəs à Zəzagəla à gəl bokuba madiŋal gəl à vok aw, say məkəs masla dadəŋ, kà uwana baŋa asa à anu maz vok à slaka Zəzagəla kà, say məfa gəl à masla à afik kà aga la ahəŋ. Delga kà dza avəl madzugway aŋha babay, av masik à azladza uwana tayəh masla.

<sup>7</sup>Kà uwana Nuhu afà madiŋ gəl aŋha à Zəzagəla à vok kà, atsəb sləm à gay aŋha, apəhal lakəl aŋa azlatatak uwana adapaka vok. Azlatatak uwaga kà adanəŋ atà la yewdi aŋha dadəŋ aw, ama akəs gay aŋha. Adàhà magol kəslah iyaw, bokuba uwana agədəl: 'Həd à kəslah iyaw à agu la azlahud gəy aŋak.' La kità, Zəzagəla atəfà atà. Apəhla ala kà madz à ahəŋ aŋa azladza anik kà agə mawisiga, kà uwana atà kà tadiŋ gəl à masla à vok aw. Masla la gəl aŋha kà, Zəzagəla apakà masla ala bokuba dza dziriga kà uwana afà gəl à masla à afik.

<sup>8</sup>Kà uwana Abəraham adiŋ gəl à Zəzagəla à vok, akəs gay aŋha à mok uwana: 'Həd à gudəŋ anik à abà', Zəzagəla agədəl, à uwana asəl mavəl. Ahəd à abatà baməraka asəl slaka uwatà babay aw.

<sup>9</sup>Kà uwana adiŋ gəl à Zəzagəla à vok lakəl aŋa tatak uwana Zəzagəla apəhal à ahəŋ kà aŋa mavəl, baməraka adagay mələkga bay, amiyaka adzà à ahəŋ la gəy uwana la aku

tadàhàn la lukut bay. Isak, Yakuba mayyi à tsèh ala aṅha, uwana Zəzagəla avà à atà gudəṅ uwatà babay kà, tadzà à ahəṅ la gày lukut la aku, bokuba masla babay.

**10** Abəraham adàhàn kiya uwanay kà, kà uwana akuda, gudəṅ, uwana Zəzagəla adàhàn, uwana matatukway gà lela. Masla la gəl aṅha la uwana anəh, ṅgaha aṅlālāh.

**11** Kà madiṅal gəl à vok aṅa Abəraham à uwana, agà baba aṅa azlabəza gurdza gurdza. Ama mis aṅha Sara ayyàl bəzi zilga, amiyaka masla dəgərga, manatslaga bay. Uwaga apakà vok kà, kà uwana Abəraham asəl kà Zəzagəla adàha fida aw. Adàha tatak uwana apəh à ahəṅ uwarà.

**12** Kà uwana masla kokudà aṅha kà, apakà makoz gurdza gurdza, kaslà aṅa mayyi bəzi adəkàṅ à lig, ama ayyà bəzi tekula, uwana ayyà à tsèh aṅuvaw bokuba azlatsetsiliṅ uwana la zagəla, ṅgaha bokuba wuyyaṅ uwana la mukwà la tsèh, uwana dza aslala vok aṅa matugway aw.

**13** Azladza uwaga gesina tadiṅ gəl à Zəzagəla à vok, tsərəh à mamətsay aṅatà. Atà kà tabəzà tatak uwana Zəzagəla apəh à ahəṅ aw, ama tasəl kà tatak uwaga adàpaka vok, ṅgaha tarəb kà uwaga. Tapəh la dazuwaya, kà tagà azlaməlokga, slaka madz à ahəṅ aṅatà la ahəṅ la gudəṅ uwanay la vok aw.

**14** Azladza uwana tapəh kiya uwanay kà, tapəhla ala la dazuwaya, kà tayàh slaka kà aṅatà.

**15** Tadzùgw lakəl aṅa slaka uwana tasa à uda la abà aya aw. Agayṅa tayàh slaka uwana tasà à uda la abà kà, naka tabəzà tetəvi mawul à abatà.

**16** Ama aga kiya uwaga aw. Atà tawoyà mayàh slaka uwana aduwaṅ uwana tasàkal à ahəṅ la lig, bokuba magodày kà zagəla, kà uwaga à uwana akəs à Zəzagəla à gəl kaykay. Gay gà la uwaga à uwana Zəzagəla azalàtāla azlaməna aṅha la dazuwaya. Nəṅawwàṅ bokuba uwana adàhà à atà slaka à ahəṅ babay tsi.

**17** Zəzagəla apəh gay à Abəraham à ahəṅ, agòdāl kà: 'Mayyi à tsèh ala aṅak adàguwa à uda la Isak la abà.' Lagonay kà asəl magur Abəraham.

**18** 'Kəd' à gi Isak', agòdāl, 'Bəzi aṅak tekula gà uwaga', agòdāl. Kà uwana masla adiṅ gəl à Zəzagəla à vok, azəb bəzi uwatà, adàlla à makədāl.

**19** Asəl kà Zəzagəla la maslay kà mawulla Isak à ləv. Hadày, apakà vok kiya uwanay, Isak kà, agà bokuba mamətsay gà, ṅgaha awulà à uda la mamətsay.

**20** Kà uwana adiṅ gəl à Zəzagəla à vok, à uwana Isak apis gay à azlabəza aṅha səla à vok, Esaw atà la Yakuba. Apəhatāla gay uwana adàbəza à atà la huma la gay.

**21** Kà aṅa Yakuba kà, aga kiya uwanay babay, kà uwana masla adiṅ gəl à Zəzagəla à vok, la kaslà uwana azlamətsay kà, apis gay à azlabəza aṅa Yusufu à vok səla nna, asà à afik, atsizilla à agəla aṅha à gay dzawwa, azləbà Zəzagəla.

**22** Kà uwana Yusufu babay kà adiṅ gəl à Zəzagəla à vok, mok uwana azlamətsay kà, apəh gay à azla Isərayel, agòd' à atà la huma la gay, kà tadàsa à uda la gudəṅ Misəra la



abà. Tatak uwana anaka tafèhəŋ la azlaaslasl aŋha, à mok uwana adamətsay kà apèh à atà gay aŋha.

<sup>23</sup>Kà uwana azlababa aŋa Musa tadiŋ gəl à Zəzagəla à vok, mok uwana tayyi Musa kà, tahàdāŋ à ahəŋ təla makər. Tanəŋəŋ bay kà bəzi kà ahəd, guba akès atà aw, tafà gəl à mapəhay aŋa sufəl məŋga aŋa azla Misəra uwana: 'Gəkəday', tagòd, aw.

<sup>24</sup>Mok uwana Musa adazigəŋay, asəl kà tazalàlla kona aŋa dugu aŋa sufəl məŋga aŋa azla Misəra aw, kà uwana masla kà adiŋ gəl à Zəzagəla à vok.

<sup>25</sup>Akès kà mas ŋgərpa la azlaməna gay Zəzagəla, awkà asəl marabay la azlaməna madāh mawisiga aw, kà uwana tsəhay marabay uwaga kà asafay aw.

<sup>26</sup>Ahikà mapəseway aŋa azladza la manəf Kristu uwana Zəzagəla adāfal dzakwa à gəl, kà aduwà ləmana uwana la gudəŋ Misəra gesina. Kiya uwaga à uwana adiŋ gəl à Zəzagəla à vok, la masik uwana naka masla aval.

<sup>27</sup>Kà uwana Musa afà madzugway aŋha à Zəzagəla à afik, à uwana asà à uda la gudəŋ Misəra. Sufəl aŋa Misəra apakà ləv, ama guba akès aw.

<sup>28</sup>Kà uwana afà madzugway aŋha à Zəzagəla à afik, apəhalla ala madəvaday uwana tazalalla Paska. Agòd à azla Isərayel kà tasəfāhāh aŋiz aŋa azlatatak à gamagay aŋatà, kà malika aŋa Zəzagəla uwana atsàlla mamətsay à waŋ aŋa makad azlamalkwoy aŋatà aw. Kà uwana mamətsay uwaga la ahəl kà aŋa makadla azlamalkwoy à gay.

<sup>29</sup>Kà uwana azla Isərayel tafà madzugway aŋatà à Zəzagəla à afik, à uwana dərəv uwana tazalalla dərəv mativga, adəzlla ala la huma aŋatà, bərta, ama azla Misəra kà, mok uwana: 'Məduw à uda suwaŋ kà', iyaw akès atà gəl à abà, tuwiz.

<sup>30</sup>Kà uwana azla Isərayel tafà madzugway aŋatà à Zəzagəla à afik à uwana tanudāhà gudəŋ Yeriko à abà, bokuba uwana Zəzagəla apèh à atà. Mok uwana tanuwid Yeriko à abà, mavakay mədəf, zlamgam aŋa gudəŋ abəzl à ahəŋ gesina.

<sup>31</sup>Kà uwana Rahab, mis masla mazaḅ zil gə, afà madzugway aŋha à Zəzagəla à afik, ŋgaha akès azlaməna matsəḅ sləm à mtəga aŋha, ahəd à atà à ahəŋ, kà uwana mok uwana azlaməna gudəŋ Isərayel takəd azladza uwana takweska gay Zəzagəla kà, tasakà masla kà makəday.

<sup>32</sup>Mana gəslala vok aŋa mapəhay lakəl aŋa azladza anik ma? Dabaray la ahəŋ aw, kasla la ahəŋ kà mapəh à akul lakəl aŋa Gideyyon, Barak, Samson, Yafet, David, Samuyel bokuba aŋa azlaməna mapəh à atà gay à ahəl anik anik aŋa Zəzagəla aw.

<sup>33</sup>Kà uwana tadiŋ gəl à Zəzagəla à vok, à uwana tapəh guvəl la azladza gudəŋ anik, ŋgaha tadawà atà, takòr azladza la tetəvi aŋha, tabəzà tatak uwana Zəzagəla apèh à atà à ahəŋ, takàs, ŋgaha tatsàkàh à gay aŋa azlasikalaveri à ama, kà madāh à atà amik à vok aw.

<sup>34</sup>Tamətsāhà akəl uwana ala ababəhà gəmgagəm. Mok uwana asà à azladza kà makad atà la katsakar bay kà tatəf. Tagə la ndzəda aŋa gəl aŋatà aw, ama Zəzagəla avà à atà

maslay. Tapakàh azlamèna guvèl mənğa, tadawà azlamèna guvèl mèlokga, azlamèna guvèl uwatà tahòyàh atà à ahàl.

<sup>35</sup>Kà uwana azlamis tadiņ gəl à Zəzagəla à vok babay, à uwana tanəņà azladza aņatà mamətsay gə, uwana tawùl à uda. Azladza anik tasàhàh ņgərpa aņuvaw. Agayņa tadiņ asik à gay aņa Zəzagəla à gəl kà naka tasakà atà, ama takəs tetəvi aņa matəfay aw. Takəs mamətsay à ņgərpa à abà pəra, kà Zəzagəla aņa mawulla atà à uda la mamətsay, ņgaha kà atà aņa mabəz sifa dāfūwa à gay uwanay.

<sup>36</sup>Azladza anik kà, tatsàk atà magodāhay à gəl, ņgaha taslàhàhà atà ala. Tawàdāhà atà la mazakazak, tadawàh atà à daņay, tabasàhàņ kiya uwaga.

<sup>37</sup>Azladza anik takad atà la akur, azladza anik tanatsàhà atà ala denela denela, azladza anik takad atà la katsakar. Azladza anik aya gày aņatà agàh la ahəņ aw, tauguzàhàh kəla slaka gesina, tagàh azlamèna kudā tadawàh kà zlap à vok. Azladza tatərəbàhà atà, ņgaha tadāha à atà mawisiga à vok.

<sup>38</sup>Tadzàh à ahəņ la kəsaf la abà, ņgaha la gudəņ la afik, tahanàh à tsakur à agu la azlaafək uwana talàh. Azladza uwaga kà, azladza delga. Akəs vok kà atà aņa madz à ahəņ la mawisiga la abà aw.

<sup>39</sup>Azladza uwaga gesina kà, takəsà Zəzagəla à gəl, kà uwana tadiņ gəl à masla à afik. Ama atà kà tabəzà tatak dzəba aņha səla aw gə, uwana Zəzagəla apəh à azladza aņha à ahəņ, uwaga kà Yesu.

<sup>40</sup>Kà uwana Zəzagəla agòd à anu gesina kà, naka avà à anu tatak uwana adūwa uwanay. Masla kà asàl mahən atà ala, uwatà kokudā aņatà pəra aw, say anu gesina gami la slaka gə.

## Ibəranəņkowen 12

<sup>1</sup>Kà aņami kà, azladza uwaga gesina tahamà anu à adi, tapəhanula madiņ gəl à Zəzagəla à vok babay, kà uwaga delga kà məkəs kà tetuwa azlatatak uwana adala à anu à gay à ahəņ kà mad à huma à gay la azlatatak mawisiga, uwana akəs anu à ahəņ, məhoy bokuba uwana Zəzagəla agòd à anu, kà mahoyay, məya vok aw.

<sup>2</sup>Mənəņ à huma à slaka Yesu, kà uwana masla adāhəņ kà anu aņa maf madzugway gami à masla à afik, masla la uwana adàla anu tsəràh à makəd gəl à ahəņ. Masla akəs kà makəd à ahàf à adi, ziruwi akəs kà mamətsay à ahàf à adi aw, kà uwana adzùgw lakəl aņa marabay uwana Zəzagəla adàvəl. Lagonay kà adadza madzay la ahàl kaf aņa Zəzagəla, akoray lakəl aņa tatak gesina.

<sup>3</sup>Mədzugw lakəl aņa Yesu uwaga, kakay azladza mawisiga tapəsəw tak ma? Bokuba uwana abasà magol ņgərpa uwana tadāhàllàņ à vok kà, mədzugw lakəl aņa kà anu aņa maruw vok à ahəņ aw, ņgaha kà akul aņa may vok aw.

<sup>4</sup>Hadāy, akul kà, pàw slagəla la tsakana, ama dza la ahəņ la tataka aņkul adamətsay dadàņ kà uwaga aw. Kità ma, kà mana karùwàw vok à ahəņ ma?

- <sup>5</sup>Avika akul azlagay uwana Zəzagəla adzərədəhla akul ala ay? Azalaàkulla azlabəza aḡha. 'Bəzi gulo, baḡa Sufəl Zəzagəla atapakla à azlaḡgərpa kà, kazəb uwaga bokuba tatak deyday aw. Baḡa agur kà, kà kararabla aw.
- <sup>6</sup>Zəzagəla awula matsihila kà à dza uwana awoyaḡ. Dza uwana adapaka bəzi aḡha la uwana atsetsihəḡla.'
- <sup>7</sup>Kità kà, say kaslawwal vok mas ḡgərpa kà akul aḡa matapla tatak ala uwaga la abà. Dgərpa uwaga apəhla ala, kà Zəzagəla adakəs akul bokuba azlabəza aḡha. Bəzi la ahəḡ baba aḡha awulalla matsihila aw tatakay? Awaḡ, aga la ahəḡ aw.
- <sup>8</sup>Zəzagəla adəhəḡ kiya uwaga gesina la azlabəza aḡha. Kiya uwaga baḡa atàpakulla à ḡgərpa aw, kà kasəlaw kà akul azlabəza aḡha aw, akul azlabəza gəl gaw.
- <sup>9</sup>Tatak anik la ahəḡ aya, azlababa gami la gudəḡ la vok tatàpanula matsihila, məkəs gay aḡatà, ḡgaha ma sakoraka Baba gami uwana la zagəla la afik ay? Baḡa məsləkaw gay aḡha, adàvə à anu sifa adəv à gay aw.
- <sup>10</sup>Azlababa gami la gudəḡ la vok kà tatàpanula kà aḡa kaslā ḡuv, bokuba uwana akəs à atà à gəl. Ama Baba gami uwana la zagəla kà atàpanula, kà anu maham gay à vok la tsikasla aḡha la abà aḡa koksikoksi.
- <sup>11</sup>La kaslā uwana tatàpanula uwaga kà aza à anu, uwaga kà akəs anu à gəl bokuba dal tatak aw. Ama baḡa ḡgərpa adada à lig, azlauwana tatapla tatak la abà la abatà kà, madz à ahəḡ aḡatà kà adahəday la ləv tələmmaga.
- <sup>12</sup>Tsa baḡa kità kà, biyàw ahəl aḡkul ala, ḡgaha bəyàw azlaasik guḡguḡga ala babay aya.
- <sup>13</sup>Azladza anik la ahəḡ la tataka aḡkul la abà kà, azlaguḡguḡga, kiya uwaga kà nəfàw tetəvi tərraga, kà asik aḡkul aḡa mapiyay à tetəvi la tsəh ala aw, kà aḡa uwaga kanəfaw Zəzagəla lela, kà azlauwana azladeri aḡa mawur ala kəla.
- <sup>14</sup>Wādāw vok à uda ḡgaha kà lapiya aḡa madz à ahəḡ la akul la abà la azladza gesina. Wādāw vok à uda, akul babay, kà akul aḡa magay sətaka la huma Zəzagəla, kà uwana baḡa dza aga tsidāḡa, awkà, adənəḡ Zəzagəla aw.
- <sup>15</sup>Dahàw haḡkəli kà dza aḡa makweska mapis gay à vok aḡa Zəzagəla aw! Dahàw haḡkəli babay kà dza la tataka aḡkul la abà aḡa magay dəhakak aw, aḡa kità aw kà, adala dəhakak à azladza anik à vok babay.
- <sup>16</sup>Dahàw haḡkəli kà dza aḡa magay mabila gə aw, kà masla aḡa makweska azlatatak delga aḡa Zəzagəla bokuba Esaw, uwana akweskà magay malkwoy aḡha gesina, kà maḡədlə tatak may à gay aḡa mavakay tekula.
- <sup>17</sup>Kasəlaw kà la lig aḡa uwaga la ahəḡ kà, asal kà baba aḡha akəs aw. Atuw babay, ama dabaray la ahəḡ kà maḡədlə tatak uwana adəhələn à ahəḡ aya aw.
- <sup>18</sup>Səlāw, kà slaka uwana akul katsizllaw à abà la huma Zəzagəla kà, uwaga kà bokuba gudəḡ Sənyyi, kiya aḡa azla Isərayel uwana tatsəzllāh à abà uwarə. Taslāla vok aḡa

madɔbani gudɔŋ uwatà la ahàl aw. Tanaŋàhà akàl uwana ababèhàh la afik ŋadzana ŋadza mɛlɛs agàh tabadamma, tanaŋàhà kular.

<sup>19</sup>Tatsɛnà matsɛnay aŋa mazlazliŋ ŋgaha tatsɛnà kuda aŋa Zɛzagɛla kà Zɛzagɛla aŋa mabadatàma aya aw.

<sup>20</sup>Kà uwana tatak uwana apɛh à atà kà aduwà ndzɛdà aŋatà. Agòd à atà kà: 'Baŋa dza adɔbani gudɔŋ uwanay amiyaka bà tatak fɛta adɔbani kà, kèdàw la matsahay la akur!'

<sup>21</sup>Azlatatak uwana tanɛŋàŋ la abatà ararabàh atà la kaykay. Musa la gɛl aŋha agòd: 'Guba aza à gi, gɛsukulay.'

<sup>22</sup>Ama kà aŋkul kà kiya uwanay aw, akul kà kazàw vok à slaka gudɔŋ uwaga à uwana slɛm aŋha Siyon, la abatà gudɔŋ aŋa Zɛzagɛla uwana la sifa. Tazalalla Urusalima: Gudɔŋ la zagɛla la afik. Azlamalika aŋuvaw tahamà gay à vok la abatà, dza aslala vok aŋa matugway aw, dɛmdadɛm.

<sup>23</sup>Akul la maham gay à vok aŋa azlabɛza aŋa Zɛzagɛla la abà, uwana tahàb madɛvaday, Zɛzagɛla adatsɛtser slɛm aŋatà à wakità aŋa sifa aŋa azladza à abà. Kabɛzàw à huma aŋatà uwana atà dziriga la huma Zɛzagɛla, ŋgaha Zɛzagɛla masla la uwana masla seriya aŋa azladza gesina. Ŋgaha apakatàla sɛtaka.

<sup>24</sup>Kasàwwàŋ à slaka Yesu, kà masla la uwana Zɛzagɛla adàhàŋ makɛs vok slawda mawga la azladza aya, Akul kazàw vok à waŋ kà makotsekw akul aŋiz aŋa Yesu, uwana apakàkulla sɛtaka. Aŋiz uwaga apɛh à anu lakɛl aŋa tatak uwana aduwàŋ gesina, aŋiz aŋa uwana Abel apɛh à anu.

<sup>25</sup>Tsa baŋa kiya uwanay kà: Dahàw haŋkɛli, kakwesàwkà paŋaw aŋa Yesu aw. Zamana uwarà kà azladza takweska kà matsɛb slɛm à dza uwana apɛhatàla mapɛhay aŋa Zɛzagɛla la vɛdàh. Kiya uwaga tabɛzà dabaray kà matɛfay la ŋgɛrpa la abà aw. Anu uwana mɛtsɛb slɛm à kuda aŋa Yesu, uwana asà à ahɛŋ la zagɛla aw, baŋa mɛkweska kà, mɛdàslala vok aŋa matɛfay la abà aw.

<sup>26</sup>Zamana uwarà kà, mabadma aŋa Zɛzagɛla abɛlàkàhà kutso, ama lagonay kà apɛh à ahɛŋ kà: 'Asik tekula aya gɛdàbɛdla gudɔŋ à vok la zagɛla babay.'

<sup>27</sup>Gay uwaga: Asik tekula aya, apɛhanula kà dɛwdɛw tatak uwana adàhàŋ adàbɛlaka vok, ŋgaha adàzahla, kà azlatatak uwana abɛlaka vok aw aŋa madz à ahɛŋ tsɛràh à awtày.

<sup>28</sup>Kiya kà, kikay mɛgod à Zɛzagɛla kà uwana avà à anu makoray uwana abɛlaka vok aw. Mɛzlɛba Zɛzagɛla bokuba uwana akɛsal à gɛl, mɛslɛkaw, ŋgaha mɛhoy yewdi aŋha, ŋgaha mɛdàha slɛray aŋha bokuba uwana ahɛdàl à adi.

<sup>29</sup>Haday gà kà, Zɛzagɛla uwana mɛdɛval kudà kà masla kà bokuba akàl, uwana ababèh tatak uwana à gay, akɛsà gɛl aŋha aw.

### **Ibɛranɛŋkowen 13**

<sup>1</sup>Akul uwana akul azladedà la Kristu la abà, dàw à huma à gay la mawoy vok kà akul à akul.

- <sup>2</sup>Avika akul aña makəs azladza anik aw, azladza anik tadəhəñ kiya uwaga, takəs azlaməlok dza, ŋgaha azlaməlok dza uwaga kà azlamalika. Uwala tasəl atà aw.
- <sup>3</sup>Dzùgwàw lakəl aña azladza uwana la dañay, gàw kà bokuba akul nna, la uwana kadzàw à ahəñ gesina la slaka gà. Dzùgwàw babay lakəl aña azladza uwana tasà atà ŋgərpa, bokuba uwana kasàw ŋgərpa la slaka gà akul nna.
- <sup>4</sup>Kasaw gay lakəl aña mis la zil aña. Kak mis kazaḅ zil aw. Kak zil kadəha à gəl gaw babay aw. Səlàw kà Zəzagəla adəfah seriya à azladza uwana à gəl, tadəhəñ kiya uwaga, ŋgaha adəfah seriya à azladza mabilaga à gəl gesina.
- <sup>5</sup>Kawoyaw sili pəra aw. Delga kà tatak uwana kakoray asla akul, karabawwal la kəl, kà uwana Zəzagəla: 'Kadəvika gi aw, gədəməlkala diki diki aw.'
- <sup>6</sup>Gay gà la uwaga, kəla uwabeyuwi awaḁ vok à uda, kà kəla dza anik gami aña magodəy kà: "Sufəl masla kà uwana azlaka gi, Guba akəs gi, kà tatak anik aya aw. Ma dza asik adəhgəñ aya ma?"
- <sup>7</sup>Dzùgwàw lakəl aña azladza uwana tadəla akul la tetəvi aña Zəzagəla la tsəh. Teraña uwana tazəkulla gay Zəzagəla. Dzùgwàw lakəl aña madz à ahəñ añaṭà la mamətsay añaṭà uwana taməts. Diñàw gəl à Zəzagəla à vok bokuba añaṭà uwana tadiñal gəl à vok.
- <sup>8</sup>Bokuba Yesu uwana dagay uwarà, lakana bay bà masla, masla aya adəbədla vok aw, adədza à ahəñ uwaga aña tsəràh à awtəy.
- <sup>9</sup>Dahàw hañkəli kà uwana azlatsəhay dza anik tapahla azlatatak anik ala gərgər. Zlahaw tadəzakulla tetəvi à adi. Tadəgodəy: 'Nəfəw azlatatak anik la azlaməpəhay anik lakəl aña mazuw tatak may, kà ləv añaṅkul aña magay ndzəḁa ndzəḁa.' Kadətsəbaw sləm à uwana tadəpəhay aw, kà uwana uwaga kà məpəs gay vok aña Zəzagəla, uwana adzadzəñ ləv aña azladza ala kà uwaga kà la tatak may aw. Akəs vok, kà apaka vok kiya uwanay: Azladza uwana tanəfa məpəhay kà madəgolay tatak may kà, tadəbəza tatak delga gà aña məpəhay uwaga tetuwa aw.
- <sup>10</sup>Yesu Kristu avà vok aña deyday, tekedika azlaməna mav tatak à Zəzagəla aña azla Yahudiya, uwana takəḁəhəhəhə tatak la gəy lukut la aku kà, mav vok aña Yesu uwana avà vok aña kà, akəs à atà vok aw.
- <sup>11</sup>Kasəlaw ndzer kà, baña məŋga aña azlaməna mav tatak à Zəzagəla aña azla Yahudiya ats añaṅiz kà aña mav à Zəzagəla kà, adà à gəy, kà la añaṅiz la ahəl pəra, à slaka tsikasla kaykay gà, ŋgaha gəl sləḅ gà uwana kà tazəḅ à uda la huḁ gudəñ kà madla matəl gay.
- <sup>12</sup>Yesu kà kiya uwaga babay à uwana takəḁ à lig gudəñ Urusalima à uda. Kiya uwaga asà ŋgərpa bay la ahəl la adi kà masla aña mazəḅ tsakana à azladza lakəl ala la añaṅiz aña.
- <sup>13</sup>Tsa baña kiya uwanay zlə kà, mədzà à ahəñ bokuba aña Yesu uwana adzà à ahəñ zlə, məhəd à uda à slaka aña. ŋgaha tapəsew anu la slaka gà la masla.

- 14** Kà uwana anu la gudəŋ uwana adàdza à ahəŋ aŋa koksikoksi aw. Məfà madzugway gami à gudəŋ aŋa Zəzagəla uwana à afik adàdza à ahəŋ aŋa koksikoksi.
- 15** Kità kà, məzləbà Zəzagəla aŋa koksikoksi, kà uwana Yesu adàhəŋ kiya uwanay kà, mahabay uwana məzləbà kà apaka bokuba tatak uwana məkədal. La dzəbà gà uwanay, gay gami adàzləb sləm aŋha koksikoksi la huma azladza.
- 16** Dahàw delga à azladza anik, vəhàw uwana kakoraw la azladza anik. Gay uwaga kà avika akul aw, kà uwana tsəhay mavày uwaga la uwana akəs à Zəzagəla à gəl.
- 17** Hòyàw yewdi aŋa azlaməŋga aŋkul, kəsàw gəl à vədàh la huma aŋatà, kà uwana tafà akul sləm, kà uwana tadəpəhay lakəl aŋkul la huma Zəzagəla lakəl aŋa tatak uwana tanəfla akul. Baŋa kà, kəsàw gay aŋatà, tadədàh sləray aŋatà la marabay. Tsa baŋa kità aw kà, tadəgay la mapak ləv gə. Baŋa atà la mapak ləv gə kà, adəkəs akul vok tetuwa aw.
- 18** Dàw à huma à gay la madəv kudà à Zəzagəla kà masla aŋa mazlak anu. Məsəl kà seriya akəs anu deyday aw, məwoya madəhəŋ kà uwana delga koksikoksi pəra.
- 19** Uwana gənavà akul kayakay kà, dèvəw kudà à Zəzagəla, kà la masla aŋa mav à gi tetəvi kà mawul à slaka aŋkul katskats.
- 20** Zəzagəla uwana av lapiya à azladza à ləv aŋatà à tsəh, awùlla Yesu à uda la mamətsay, adàhəŋ bokuba məŋga aŋa masla manəŋla azlatuwaŋ, uwana afà anu sləm. Kà uwana aməts kà aŋami, anu azlatuwaŋ aŋha. Zəzagəla azəb aŋiz aŋha, akəsà anu la vok slawda mawga, uwana adəv à gay aw.
- 21** Tsa baŋa kità kà, Zəzagəla avà à akul ndzəda, kà akul aŋa madàh uwana akəsəl à gəl, kà masla aŋa madàh sləray aŋha la anu la abà la ndzəda aŋa Yesu Kristu, kà anu aŋa mapakay bokuba uwana asal. Mazləbay aga la Yesu Kristu aŋa koksikoksi. Amen.
- 22** Azladedə gulo, gətsetser akul wakità uwanay, kà madzəredàhàkulla, ŋgaha bay, gətsetser akul kà ŋuv pəra. Haday, gəgodf à akul, kà akul aŋa makəs azlagay uwanay à gəl aŋkul.
- 23** Səlàw kà, deda aŋkul Timotawus kà, aga la daŋay aya aw, tadùwal gəl adagay. Baŋa abəz gi à vok katskats kà, gədàdalla à awtày la tsəh, à mok uwana gədàda à awtày à slaka aŋkul.
- 24** Dahàw 'Ayyi' gulo, à azlaməna manəŋla akul. Dgaha la azladza anik aŋkul babay. Azlaməna madinjal gəl à Yesu à vok la gudəŋ Italiya tadəhàkulla: 'Ayyi' babay.
- 25** Vok mahamay aŋa Zəzagəla aga la akul gesina. Amen.

## Yakuba

### Yakuba 1

- <sup>1</sup>Gi Yakuba, uwana gi mayà aña Zəzagəla, la Sufəl Yesu Kristu, la uwana gətsetser wakità uwanay la ahəl gulo: "Ayyi", gəgod' à akul, akul azladza tsəhay aña Zəzagəla uwana kasləhaw gəl à ahəŋ gesina.
- <sup>2</sup>Azlabəza gay ləv gulo, baña azlamaguray anik anik tabəza à akul kà, rabàw kaykay.
- <sup>3</sup>Kà uwana kasəlaw lela, kà baña tagur madiŋal gəl à vok aŋkul, ŋgaha atsizilla à afik lela kà, madiŋal gəl à vok aŋkul adàvə mabasiŋ.
- <sup>4</sup>Tsìzillàw à ahəŋ lela kà mabasiŋ aŋkul aña mapəhla vok ala tsəràh à makəd' gəl à ahəŋ, kà akul aña mapak sətaka aña tetuwa, ŋgaha ləv aŋkul aña magay kokudà mawisiga.
- <sup>5</sup>Baña dza uwana matsihila aña la ahəŋ aw kà, anava à Zəzagəla uwana avàhahay la ləv tekula, uwala akwesla à dza aw. Ndzer kà, av matsihila à dza, uwana anaval kokudà masləhal à vok.
- <sup>6</sup>Ama baña dza anava tatak anik la slaka Zəzagəla kà adiŋal gəl à vok ndzer, kà Zəzagəla avəl, kokudà mabək gəl à ahəŋ səla. Kà uwana dza uwana abək gəl à ahəŋ səla kà, bokuba magan̄tsay aña iyaw, uwana afad' abəlakəŋ la dərəv la afik.
- <sup>7</sup>Kà aña tsəhay dza uwaga adzugw kà: "Gedàbeza tatak la slaka Zəzagəla", agod' aw.
- <sup>8</sup>Kà à uwana abək gəl à ahəŋ səla, anəfa tetəvi aña.
- <sup>9</sup>Dza kudà gə uwana anəfa Yesu Kristu, uwana tafa à matugway à abà aw kà arab, kà uwana Zəzagəla atugw à makoray aña à abà.
- <sup>10</sup>Ama dza uwana galepi gə, aga la matugway uwana la abà, masla bay kà arab kà uwana. Zəzagəla apəhla ala kà lemama aña kà uwana asafay aw. Dəgaha amətsay la vərđi anik, bokuba azlamawuratatay uwana tanisay.
- <sup>11</sup>Afats avədāy la ndzəđa, ŋgaha agul azlakəsaf ala. Azlamawuratatay tanisla, mahədāy aŋatà adəv à gay. Dza galepi gə adəmətsay bokuba azladza anik gesina la sləray aña la abà bay suwaŋ.
- <sup>12</sup>Marabay agay la dza uwana abasa azlamaguray uwaga lela gesina, adàbəza sifa adəv à gay aw, uwana Zəzagəla apəh à ahəŋ kà aña azlauwana tawoya masla.
- <sup>13</sup>Dza atəd' à mapapatay à abà kà, adzug kà: "Zəzagəla la uwana apapat gi", agod' aw, kà uwana dza aslala vok mavavar Zəzagəla kà madāh mawisiga aw, ŋgaha bay Zəzagəla apapat dza bay aya aw.
- <sup>14</sup>Madzugway mawisiga uwana la ləv aña dza la tsəh, la uwana adək dza à madāh mawisiga à abà.
- <sup>15</sup>Azlatatak mawisiga uwana adzugway la ləv aña la tsəh kà, la huma la gay ŋuv kà, adəhəŋ la dazuwaya. Mok uwana tsakana uwaga adan̄azila kà ayyi mamətsay.

- <sup>16</sup>Azlabəza gay ləv gulo, dza avavar akul aw.
- <sup>17</sup>Azlatatak dziriga gə kà, tatsa à ahəŋ la slaka Zəzagəla Baba gami, uwana adəhà uwaga gesina la zagəla la afik. Azlatatak dzəba aŋha səla aw gə kà, uwaga tatsa à ahəŋ la slaka Zəzagəla Baba, uwana adəhà afats, təla la azlatsetsiliŋ. Mabədlə vok la ahəŋ aw. Aday bokuba afats uwana aday kà mabədlə vəd à waŋ la afats aw.
- <sup>18</sup>Avà anu sifa kà la gay aŋha dziriga gə. Gesina adəha uwaga la mawoyəŋ aŋha, kà anu aŋa magay azlateraŋa la azlatatak uwana la abà adəhəhəŋ.
- <sup>19</sup>Azlabəza gay ləv gulo, dzùgwàw à uwanay. Kəla kà, kəla uwabeyuwi aŋkul afa sləm à gay aŋa azladza anik, uwana tapəhay kà, tapəh katskats la zlawzlaw aw, tagəh azlaməna mapak ləv katskats babay aw.
- <sup>20</sup>Kà uwana dza masla ləv gə kà, aslala vok aŋa madəh tatak uwana akəs à Zəzagəla à gəl aw.
- <sup>21</sup>Tsəhay gə uwaga kà, sàw à uda la abà, kadəhaw tsakana aya aw, məsləkaw Zəzagəla ŋgaha məfa sləm à gay uwana afa à ləv gami à tsəh. Gay uwaga kà la ndzəfə, kà mabiy akul à tsakana aŋkul la gay ala.
- <sup>22</sup>Say kadəhaw tatak uwana wakità Zəzagəla apəhakulla, awkà katsəbawwal sləm pəra aw, kà uwana baŋa katsəbawwal sləm pəra la kokudə madəhəŋ kà, kavavaraw gəl aŋkul.
- <sup>23</sup>Baŋa dza atsəb sləm à gay uwaga pəra, ŋgaha masla adəha uwaga aw, kà masla kà adəpakay kalkal la dza uwana anəŋə huɖ à adi aŋha la kutərum la abà, ŋgaha anərəz vok aŋha.
- <sup>24</sup>La lig manərəz huɖ à adi aŋha la ahəŋ, adiy aŋha, ŋgaha katskats madz à ahəŋ aŋa huɖ à adi aŋha avikaŋ.
- <sup>25</sup>Ama kà aŋa dza uwana anərəz azlamapəhay aŋa Zəzagəla, uwana tavà à anu makor gəl kà, ŋgaha anəfa tetəvi aŋa mapəhay uwaga lela, Zəzagəla adəpislə gay à vok kà sləray uwaga. Dza uwana atsəb sləm à azlamapəhay uwaga ŋgaha avikaŋ aw kà, akəs gay aŋha lela. Kità kà, Zəzagəla apislə gay à vok la sləray uwana la abà, adəhəŋ gesina.
- <sup>26</sup>Baŋa dza adzugw kà masla kà masla manəf Zəzagəla, ama baŋa asləh vok aləh aŋha aw, ŋgaha baŋa azlagay mawisiga pəra, tatsa à waŋ la paŋaw aŋha la awtəy, kiya uwaga kà, avavar gəl aŋha, manəf Zəzagəla aŋha kà deyday pəra, gay aŋha kà kalkal la madəfəy afad.
- <sup>27</sup>Manəfay delga uwana akəs à Zəzagəla Baba gami à gəl kà, maf sləm à azlabəza matawaŋ, ŋgaha la azlamis kudə, uwana tasa ŋgərpa. Ŋgaha dza la gəl aŋha asləh vok à vok aŋha babay, kà tatak mawisiga aŋa gudəŋ à vok uwanay aŋa mavavaray, ŋgaha madəhalla mawisiga à vok aw.

## Yakuba 2



- <sup>1</sup>Azladeda gulo tsa kadiṅawwal gəl à Sufəl gami Yesu Kristu à vok, kà uwana masla kà mənḡa, aḡuwa azlatatak gesina la mazləbay kà. Kità kà akul kà, kayahawani dza mayahay aw!
- <sup>2</sup>Zlahaw azladza səla tatsawaṅ à maham à gay à vok aṅkul à abà. Tekula aṅatà atsokw à lukut delga gà à abà, la azladzedà aṅa luwàluwà la ahàl aya. Dza anik uwanay kà kudà gà, azlamakatsekatse pəra adadaw à vok.
- <sup>3</sup>La abatà: 'Ayyi', kagodaw kà à masla madaw à lukut delga gà à vok, kagodawwal: "Sà aṅak à abanay, dza aṅak à madzay la kursi la afik!" Ama masla kudà kà: "Tsizilla à abà gà", baṅaw kagodawwal, "Tsehùr à makəla asik gami la abanay."
- <sup>4</sup>Baṅa kadahawwaṅ kiya uwanay kà, kayàhàwàni dza mayahay aw takay? Kay kazinàw vok à dza anik uwanay ala, azlatatak uwana kadzugwaw kà mawisiga.
- <sup>5</sup>Azlaməna gay ləv gulo, fəwal sləm lela, kasəlaw kà Zəzagəla atsatsəmàni azlaməna kudà aṅa gudəṅ à vok uwanay, kà atà aṅa madiṅ gəl à Yesu à vok aw, takay? Dgaha kà atà aṅa mabəzal ləmana dziriga gà. Atsatsəmàni atà, kà atà aṅa mabəzal makoray, uwana apəh à ahəṅ kà mavày azlauwana tawoya masla.
- <sup>6</sup>Ama akul ma, kà mana à uwana kazinàw vok à azlaməna kudà ala ma? Azlagorobu la uwana tasàhàh tatərbàh akul aw takay? Dgaha atà la uwana tabayàh akul à huma seriya aw, uwà?
- <sup>7</sup>Atà la uwana tatsàd' gay à sləm aṅa Yesu Kristu uwana à tsəh, Zəzagəla avà à akul aw takay?
- <sup>8</sup>Makəs mapəhay aṅa makoray uwana aḡuwa azlaanik dèwdèw, uwana tatsetsèr à wakità Zəzagəla à abà kà, kà delga. Mapəhay uwanay agod: 'Wòyà masla magay aṅak kalkal bokuba uwana kawoya gəl aṅak.' Aṅa kiya uwaga kà, delga kadahawwaṅ.
- <sup>9</sup>Ama baṅa kayàhàwàni dza kà mayahay kà, kadahawwaṅ kà mawisiga, mapəhay adàsliṅid' akul, kà uwana kapəsewaw masla.
- <sup>10</sup>Amiyaka baṅa dza akəs mapəhay aṅa Zəzagəla gesina, ama apəsew kà tekula aṅatà pəra, dza uwaga kà adàpəseway kà gesina aṅha la huma aṅa Zəzagəla.
- <sup>11</sup>Kà uwana masla uwana agòd: "Kada à gəl gaw aw", agòd' aya babay: "Kakəd' dza aw." Baməraka kada à gəl gaw aw, kakəd' dza, kà bà kakweska mapəhay aṅa Zəzagəla.
- <sup>12</sup>Kà uwaga gəgod' à akul, la azlatatak uwana la abà kapəhaw gesina, ṅgaha la azlatatak uwana la abà kadahawwaṅ gesina bay: Səlàw kà: Zəzagəla adàhakullaṅ seriya à gəl. Adàguray à baṅa kakəsaw mapəhay uwana avà à anu makor gəl.
- <sup>13</sup>Baṅa dza la vok mahamay kà azladza anik aw, la mok seriya kà, vok adàhama à Zəzagəla kà masla babay suwaṅ aw. Ama baṅa vok ahama à ka, kà azladza anik, Zəzagəla adàdukw à ka seriya à gəl suwaṅ aw.

- 14**Azladeda, baña dza apəhay la gay kà: "Gədiŋ gəl à Zəzagəla à vok", agodəy, uwala adəh uwana: 'Dahəwwəŋ', Zəzagəla agodə aw kà, gay aŋha kà akəs vok aw. Madiŋal gəl à vok tsəhay gə uwaga kà abələŋ aw, dabaray la ahəŋ aw.
- 15**Zlahaw masla gay Zəzagəla la ahəŋ, uwana anəkudə aŋa lukut ŋgaha anəkudə aŋa tatak may babay.
- 16**Baña dza la ahəŋ la tataka aŋkul la abə agodə atə: "Zəzagəla apis à akul gay à vok. Anasl akədə akul aw, may azakul aw", uwala avə à atə tatak, uwana tanəkudə aŋatə aw, gay aŋha ma akəs à atə vok takay? Awaŋ.
- 17**Madiŋ gəl à Zəzagəla à vok kà kalkal la uwaga babay suwaŋ. Baña dza agodə kà: Gədədiŋ gəl à Zəzagəla à vok, ama uwala adəhəh uwana Zəzagəla anavay aw, kiya uwaga kà, madiŋal gəl à vok aŋha kà mamətsay gə.
- 18**Zlahaw baña dza agodəy kà: Gədiŋ gəl à Zəzagəla à vok, dza anik agodəy aya kà: Gədəhəh sləray delga delga gə. Tatak uwana gədəpəh à ka kà kiya uwanay: "Pəhgəla tsəhay mav ləv aŋak à Zəzagəla, ŋgaha sləray delga gə aŋak uwana kadəhəhəŋ tsi!" ŋgaha gədəpəhkala azladal sləray gulo, kà kak aŋa manəŋəŋ kà, gəvə ləv gulo à Zəzagəla kà, uwana sləray uwaga apəhla ala kà, gəvə ləv gulo à Zəzagəla.
- 19**Kasəl kà Zəzagəla kà tekula pəra. Delga. Amiyaka azlamazlazlay babay kà tasəl masla babay, ŋgaha guba akəs atə kà uwaga.
- 20**Gəl aŋak kà dzaŋdzaŋ, tsəb gi sləm: Gəpəh à ka, baña kadiŋ gəl à Zəzagəla à vok, ŋgaha kadəhəh sləray delga gə aw kà, uwaga kà tatak uwana akəs vok aw, deyday pəra.
- 21**Baba gami madzidziga Abəraham agə dziriga la huma Zəzagəla. Agə dziriga kà la azlatatak uwana adəhəŋ, uwana akəs bəzi aŋha Isak kà makədəy à Zəzagəla aw uwə?fa
- 22**Lagonay kasəl kà Abəraham adiŋ gəl à Zəzagəla à vok, ŋgaha adəhə azlasləray delga gə babay. La madəhəŋ kiya uwanay avə ləv aŋha à Zəzagəla aŋa tetuwa.
- 23**Tatak uwaga kà adəbəza à waŋ bokuba uwana tatsetsèr à wakità Zəzagəla à abə: 'Abəraham afa madzugway aŋha à Zəzagəla à afik, kà uwaga à uwana Zəzagəla apakəŋ ala dziriga la huma aŋha.' Abəraham apakə slawda aŋha.
- 24**Iyay zlə, kanəŋəŋ aw ay? Dza aga la dziriga la huma Zəzagəla kà madegolay sləray aŋha uwana adəhəŋ babay, awkə la madiŋal gəl à vok pəra babay aw.
- 25**Dzùgwəw lakəl aŋa Rahab, masla mazaḅ zil gə babay tsi, agə kiya uwaga babay. Mok uwana azlaməna matsəḅ sləm aŋa azla Isərayel tahəd à slaka aŋha kà, azlakə à atə, apəhatəla tetəvi anik kà atə manəfay. Kà uwana adəhəŋ kiya uwanay la uwana, Zəzagəla agəŋ dziriga la huma aŋha.
- 26**Baña sifa la dza la vok aya aw kà, dza uwaga kà adəmətsay. Madiŋ gəl à Zəzagəla à vok babay kà kiya uwaga. Baña sləray delga la tsəh aw, kà uwaga kà tatak uwana akəs vok aw, deyday pəra.

### Yakuba 3

- <sup>1</sup>Azladeda gulo. Məsəl kà azlauwana tatapla azladeda anik tadàbəza seriya dāduwa aña azladza anik. Gay gə la uwaga kà, kawoyaw mapakahay azlaməna matapla azladza mənğa aw.
- <sup>2</sup>Anu məfəhəh mawisiga aņuvaw. Baņa dza adəh mawisiga la mabədfma la abə aw kà, masla kà dza dziriga, masla kà asləha vok à vok aņha lela.
- <sup>3</sup>Dzùgwàw lakəl aņa pəlis tsi, uwana məfəhəh zagoma à pəlis à gay kà, kà masla aņa makəs gay gami, ŋgaha kà manəf tetəvi uwana asa à anu.
- <sup>4</sup>Dzùgwàw babay lakəl aņa mən kəslah iyaw. Keslah iyaw uwaga kà mənğa gə, ama bəzi tatak ŋuvga la ahən à uwana adala, amiyaka bə afad awul atə à adi babay, kəslah iyaw kà aday à slaka uwana asa à masla madalla.
- <sup>5</sup>Aləh aņa azladza bay kà kiya uwaga. Adagay bəziga babay kà, atsa zlapay hazlak hazlak. Kasəlaw kà, kà bəzi akəl kà, ababəh mələm mənğa à gay gesina, bəhbəbəh.
- <sup>6</sup>La aləh aņa dza babay kà kiya akəl. Mawisiga aņa gudən à vok uwanay kà, aga la abə, la vok gami la abə. Awis dza ala gesina, masla la uwana tatak maz sifa aņa dza ala. Akəl uwaga la gəl aņha, mavats vok gə la gudəh akəl la abə, uwana azəh dza ala tetuw tetuw.
- <sup>7</sup>Azladza takor azlatatak gesina, takor azlatatak asik, la azlatatak mahoyay la zagəla, la azlatatak maday la hudf, la azlatatak uwana la iyaw la abə.
- <sup>8</sup>Ama azladza taslala vok aņa makor aləh aņatə aw, uwaga kà bəzi tatak mawisiga, uwana dza aslala vok aņa madədəl gay à ahən aw. Ahən ala la magur uwana akəd dza.
- <sup>9</sup>Məsləkaw Sufəl Zəzagəla Baba gami la aləh uwanay, ŋgaha mətəsafla azladza bə la aləh uwaga aya gotənaņ.
- <sup>10</sup>Gay mazləbəy la gay matsafay tatsa à waņ bə la gay uwaga la awtəy. Azladeda azlawla kà vok kà madəhən kiya uwanay aw.
- <sup>11</sup>Iyaw matsidayga, la iyaw zazəmzəmga atsa à uda la suwa tekula la abə aw.
- <sup>12</sup>Azladeda, gudəv ayyi kuvu aw, matavərək ayyi gudəv babay aw. Bay aya kà, iyaw matsidayga atsa à uda la iyaw zazəmzəmga la abə aw.
- <sup>13</sup>Aga la ahən dza matsihila gə la tataka aņkul la abə ay? A uwana atsənə azlatatak ay? Adəhə azlatatak delga, ŋgaha azə gəl à vədəh babay aya, uwaga apəhla ala kà, aga la matsihila.
- <sup>14</sup>Ama baņa kadəhaw maņor à azladza anik à vok, ŋgaha akul la ləv səla, ŋgaha kadzugwaw kà lakəl aņkul pəra, kiya uwaga kà, katsaw zlapay deyday aw, ŋgaha kapəhaw mawisiga à dziriga à gəl bay aw.
- <sup>15</sup>Tsəhay haņkəli uwaga kà, atsə à ahən kà la slaka Zəzagəla aw, atsə à uda kà la gudən à vok uwanay la abə. Matsihila aņa Zəzagəla aga la abə aw, uwaga asa à uda kà la ahəl aņa seteni.

<sup>16</sup>La slaka uwana azladza maṅor gâ la ahəŋ kâ, tadzugway kâ à gəl aṅatà pəra, azlatatak tada à vok la tetəvi aya aw, ŋgaha azlatatak mawisiga gesina tadàyyi à tsəh lakəl aṅa uwaga.

<sup>17</sup>Ama matsihila uwana atsà à ahəŋ la afik kâ gərgər. Dza tsəhay matsihila uwaga kâ sətaka, masla kâ tələm̄ma, adzadzəŋa gəl ala aw, masla vok mahamay, koksikoksi masla kâ adəhəŋ kâ azlatatak delga gâ pəra.

<sup>18</sup>Azladza uwana atà la ləv tekula, la uwana tavà lapiya à azladza anik, sləray uwana tadəhən kâ, adàvə mayyay delga gâ, adəkəsa vok. Uwaga kâ bokuba uwana taslək tatak à guf à abà ŋgaha tatsəf uwana tasləka. Atà kâ, azladziriga la yewdi aṅa Zəzagəla.

## Yakuba 4

<sup>1</sup>Kà mana kapahaw gay la magazlay koksikoksi ma? Haḍay aw ay? Kagazlahaw kâ, kâ uwana madzugway mawisiga aṅkul apa slagəla la ləv aṅkul la tsəh.

<sup>2</sup>Kakəḍaw yewdi à azlatatak à abà, ama kabəzawwal aw, gay gâ la uwaga à uwana akul kakəḍaw dza. Kakəḍaw yewdi à azlatatak à abà, ama kaslawwalla vok maḃəzal aw. Gay gâ la uwaga à uwana, kagazlahahaw la map slagəla. Kabəzawwal tatak uwana asa à akul bay aw kâ, kâ uwana kanavaw kâ à Zəzagəla kâ masla aṅa mav à akul aw.

<sup>3</sup>Amiyaka baṅa kadəvaw kuḍa à Zəzagəla kâ, masla mav akul kâ kabəzawwal aw, kâ uwana kadəvaw kuḍa la tetəvi aṅha aw. Kanavaw kâ azlatatak uwana akəḍ akul à adi pəra.

<sup>4</sup>Ndzer, akul kagagahaw bokuba azlamis məna mazaḃ zil gâ, uwana tadza à ahəŋ la slaka la abà titi aw. Bâ la haḍay kâ, kasəlaw kâ, baṅa dza awoya tatak aṅa gudəŋ à vok kâ, masla kâ masla məzam aṅa Zəzagəla. Dza uwana akəs, anəfa azlatatak aṅa gudəŋ à vok kâ, apaka masla məzam aṅa Zəzagəla.

<sup>5</sup>Kadzugwaw kâ gay uwana tatsətsèr à wakità Zəzagəla à abà kâ akəs vok aw, kagoḍaw aw. Tagòḍ: 'Kà Zəzagəla kâ maṅor aṅa Masasəḍok, uwana avà à anu.'

<sup>6</sup>Daduwa à gay uwaga aya kâ apis anu gay à vok, tatsətsèr à wakità Zəzagəla abà: 'Zəzagəla akweska azlaməna zlapay, ama apis gay à azlauwana à vok atà tələm̄ma.'

<sup>7</sup>Gay gâ la uwaga hòyàw yewdi aṅa Zəzagəla koksikoksi. Kwesàwkà seteni, ŋgaha adəhoy akul à ahəl.

<sup>8</sup>Sàw à waṅ, zàw vok à slaka Zəzagəla, ŋgaha masla adàza vok à slaka aṅkul babay. Akul, uwana akul azlaməna tsakana, sàwla ahəl aṅkul à uda la tsakana la abà. Akul azladza uwana la ləv səla, dèḍaw mawisiga aṅkul la ləv ala tetuwa.

<sup>9</sup>Zàwàwla gəl kâ tsakana aṅkul, bəkàw ahəl à kuḍa, ŋgaha tsàhàw hulolo. Kakəḍaslaw aw, ama tawaw. Karabaw aya aw, ama zawawla gəl.

<sup>10</sup>Wulàwla gəl à vəḍah la huma Zəzagəla, kâ masla aṅa makəs akul à afik.

<sup>11</sup>Azladeda, kapəhaw mawisiga à azladza anik à vok aw, dza uwana apəh mawisiga lakəl aŋa masla magay aŋha, ŋgaha atsəfal gay à tsəh, kiya uwaga kà, apəh mawisiga lakəl aŋa mapəhay aŋa Zəzagəla. Masla kà, atsəf gay à mapəhay à tsəh babay. Kayyà, baŋa katsəf gay à mapəhay à tsəh, kak kanəfa masla aw, katsəfal gay à tsəh pəra.

<sup>12</sup>Dza tekula la uwana avà mapəhay à azladza, uwaga kà Zəzagəla, masla kà masla seriya. Masla kokudà gəl aŋha la uwana aslala vok kà mabəl azladza, ŋgaha masla kokudà gəl aŋha la uwana akəfay aya. Kà aŋak ma: "Gi uwa?", kagod, à uwana katsəf gay à masla magay aŋak à tsəh uwa?

<sup>13</sup>Tsəbàw gi sləm, akul azladza uwana kagodaw: Lakana baŋaw lebəŋ, mədàda à gudəŋ anik mədàdza à ahəŋ la abatà mavay tekula, kà mədàbəza sili.

<sup>14</sup>Akul azladza uwana kapəhaw kiya uwaga kà, kasəlaw uwana adəpaka vok lebəŋ aw. Sifa aŋkul kà kalkal la kəsək uwana akəsalla, apəhla vok ala, ŋgaha la lig la ahəŋ kà, adəsahla aya.

<sup>15</sup>Uwana naka kapəhaw kà: Baŋa asa à Zəzagəla madàdza à ahəŋ la sifa, mədàfəhəŋ tatak uwanay baŋaw tatak uwahà.

<sup>16</sup>Ama baŋa kiya uwaga aw kà, akul azlazlapay, gay uwana kapəhaw kà, say gay zlapay. Madəhəŋ kiya uwaga kà delga aw, mawisiga.

<sup>17</sup>Kità kà, awul akul à gəl, baŋa dza asəl madàh delga, ŋgaha adəhan aw, kiya uwaga kà masla adadàh tsakana.

## **Yakuba 5**

<sup>1</sup>Akul azlaməna gorobu tsəbàw gi sləm, kà uwana naka akul katawaw la matsəh hulolo, kà azlanjərpa uwana kadəsahaw.

<sup>2</sup>Kà uwana ləmana aŋkul adàzinla, ŋgaha maməŋ adəzaw lukut aŋkul à gay.

<sup>3</sup>Luwəluwà aŋkul la gursu aŋkul kà, marzaw adəkasay, ŋgaha marzaw adəgay bokuba sayda lakəl aŋkul, ŋgaha adəpaday vok aŋkul à gay, bokuba akəl. Kahamaw ləmana à ahəŋ kà la makəf gəl à ahəŋ gudəŋ à vok.

<sup>4</sup>Uwanay la uwana masik aŋa azlaməna sləray, uwana tapəs guf aŋkul, ŋgaha mapuw gudzi aŋa dziriga aŋa azlaməna sləray adaday à huma Zəzagəla uwana la zagəla la afik, ŋgaha masla uwana akoray lakəl aŋa tatak gesina adatsən atà.

<sup>5</sup>Kadzàw à ahəŋ la matsiday la abà la gudəŋ à vok, kadahaw tatak uwana asà à akul. Kazùwàw lela, kagagəsəhàw dadaftakorra bokuba azlasla uwana tagagəsəh atà aŋa makaday.

<sup>6</sup>Kakadàvəw seriya à azladza uwana à gəl tadəhəŋ mawisiga aw, kakàdàw atà babay, atà kà takweska akul aw.

<sup>7</sup>Azladeda, kà uwaga gəgod à akul, basàwwəŋ tsəràh à kaslà uwana Sufəl gami awul à ahəŋ. Dzùgwàw lakəl aŋa masla mapəs guf, akud matsəf tatak aŋha la mabasiŋ. Akud iyaw madzəba iyaw tsəràh à madiy aŋha aŋa iyaw.

- <sup>8</sup>Akul babay basàwwàṅ kiya uwaga, wàdàw ləv ala, kà uwana mavakay uwana Sufəl gami adàwula à waṅ kà nekwa.
- <sup>9</sup>Azladeda gulo katseteslaw vok gay à vok kà akul à akul aw, ṅgaha kà Zəzagəla aṅa makəs akul la seriya aw. Tsəbàwwal sləm, masla seriya kà atsa à waṅ, aga la gay gamagày.
- <sup>10</sup>Azladeda gulo, dzùgwàw à azlaməna mapəh à atà gay à ahəl uwana uwarà, tapàhàh sləm aṅa Zəzagəla. Tapàwla azlatatak la atà la afik, bokuba uwana tasàh ṅgərpa, ṅgaha tadzà à ahəṅ la mabasiṅ la abà.
- <sup>11</sup>Məgodf kà, azladza uwaga tasà à afik la ahəl, kà uwana tabasəṅ. Katsənàwwàṅ lakəl aṅa Job. Kakay abasəṅ azlatatak uwaga la mok uwana asà ṅgərpa ma? Akul kasəlaw babay kà Zəzagəla adàhàlla delga la lig aṅa mas ṅgərpa aṅha la ahəṅ. Haday, vok ahamà à Zəzagəla kà azladza uwatà, adàhà à atà delga.
- <sup>12</sup>Azladeda gulo, gay kaykayga kà aganay: Baṅa kapəhaw gay anik kà, kazuwaw mawaday aw, kazuwaw mawaday la zagəla aw, kazuwaw mawaday la gudəṅ à vok aw kazuwaw mawaday la tatak anik aw. Baṅa kagədfawwaṅ à afik gòdàw: "Iyay", pəra. Baṅa kagədfawwaṅ à afik aw: "Awaṅ", gòdàw pəra. Pəhàw kà kiya uwanay pəra, kà seriya aṅa Zəzagəla aṅa matəf à akul à gəl aw.
- <sup>13</sup>Dza la ahəṅ la tataka aṅkul la abà as ṅgərpa ay? Adəv kudà à Zəzagəla. Dza la ahəṅ la tataka aṅkul la abà la marabay ay? Masla azləba Zəzagəla la mahabay.
- <sup>14</sup>Dza la ahəṅ la tataka aṅkul la abà la dūvats ay? Masla azala azlamasiga aṅa gay Zəzagəla, kà atà aṅa madàhalla aməl à gəl, la sləm aṅa Sufəl gami Yesu. Dgaha tadəv kudà à Zəzagəla kà masla.
- <sup>15</sup>Baṅa tadiṅal gəl à vok kà, madəv kudà aṅatà uwana tatsizlla à afik kà, adàbəl masla dūvats, ṅgaha Zəzagəla adàtsizlləṅ ala aya. Baṅa adadàh tsakana kà, Zəzagəla adàmatsalaṅ ala babay.
- <sup>16</sup>Kà madegolay uwaga gəgodf à akul: Pəhàw gay ləv ala kà akul à akul, ṅgaha kadəvaw kudà à Zəzagəla kà mawurla. Madəv kudà aṅa dza dziriga la huma Zəzagəla aga la ndzəfà lakəl aṅa azlatatak gesina.
- <sup>17</sup>Dzùgwàw à Eliya uwana uwarà tsi. Eliya kà dza bokuba anu babay, kiya uwaga dagay kaslà uwatà adəv kudà à Zəzagəla tsərəh mavay makər la tenma, iyaw asùw à makoray uwatà à abà aw.
- <sup>18</sup>La lig aṅa uwaga la ahəṅ, adzəkà madəv kudà aya, kà iyaw aṅa masuway aya, kiya uwaga Zəzagəla avà iyaw aya, ṅgaha azlatatak tadzəkà mas à uda aya.
- <sup>19</sup>Azladeda, baṅa dza la ahəṅ la tataka aṅkul la abà az à tetəvi dziriga aṅa Zəzagəla la tsəh ala dogdogogga, ṅgaha dza anik awùlla à tetəvi à tsəh,
- <sup>20</sup>səlàw kà, dza uwana awùlla masla tsakana à tetəvi à tsəh kà, masla aṅa mas à uda la tsakana la abà kà adàbiyəṅ à mamətsay la gay ala. Baməraka tsakana aṅha məṅga, kà Zəzagəla adàmatsalaṅ ala, haday.

## 1 Piyer

### 1 Piyer 1

<sup>1</sup>Gi Piyer, uwana gi masla matapla la slaka Yesu Kristu, gi gətsetser à akul wakità uwanay, akul uwana Zəzagəla atsatsàmàni akul, kà aña magay azlatsəhay aña. Gətsetser à akul, akul uwana kaslèhàw gəl à aheñ, la azlakutso uwana la abà sləm aña: Pontiya, Galatiya, Kapadotsəya, Asəya ñgaha Bitiniya. Kadzaw à aheñ la abata bokuba akul azlaməlok gə.

<sup>2</sup>Iyay, dagay uwana Zəzagəla, Baba gami, apèh à ahəñ kà kadəgaw tsəhay aña la Masasədök aña, apakakulla kà azlatsehay aña, kà akul aña matsəb sləm à Yesu Kristu, ñgaha kà makotsekwàh akul añaiz aña, kà akul mapak sətaka la huma Zəzagəla, kà Zəzagəla aña mapisakulla gay à vok, la vok mahamay aña, la lapiya aña, la madz à ahəñ la wurwur kaykay.

<sup>3</sup>Məzləba Zəzagəla Baba aña Yesu Kristu gami, kà uwana vok ahamà à Yesu kà anu. 'Ayyà', agòd à anu, kà mav à anu sifa mawga la ahəl aña Yesu Kristu. Kà uwana Zəzagəla awùlla Yesu à uda la mamətsay. Kà mawul à uda uwaga, məfa manewəñ gami à ahəñ, lakəl aña, mədàwulla à uda la sifa aya.

<sup>4</sup>Ndzer, məsəl babay kà, kadàkoraw tatak delga, uwana Zəzagəla adədəhəñ à ahəñ kà aña kul la zagəla, akul tsəhay aña, uwana abədla vok aw, awis ala aw, atatuway aw.

<sup>5</sup>Akul uwana kadiñawwal gəl à vok kà akul la maslay aña ndzəda aña, kà azladza gesina aña masəlay kà adabəl akul la paraka, la kasla uwana gudəñ à vok adədəv à gay.

<sup>6</sup>Iyay zla, kà azlatatak uwana Zəzagəla adəhəñ kà akul katsekaw, baməraka lagonay kasaw azlañgərpa anik anik kà aña kasla ñuv pəra.

<sup>7</sup>Kasəlaw kà azlamaguray, la azlañgərpa uwana kasaw, kà akul aña masəlay kà ləv uwana kavàw à Zəzagəla kà akəs vok ndzer. Azladza taguray madzərədəy aña luwàluwà la akəl la abà, tekedika madzərədəy aña adəv à gay. Kiya uwanay la madiñal gəl à vok gami babay zla, uwana aduwa luwàluwà la kaykay. Tsəhay madiñal gəl à vok magurayga uwanay, adəv à akul mazləbay, la masik, la masləkaway la vud uwana Yesu adəsa à ahəñ.

<sup>8</sup>Baməraka kanəñaw masla dadəñ aw kà kawoyawwanəñ. Kadiñaw gəl à masla à vok kà uwaga à uwana katsekaw kaykay, matsəkay uwana aduwanəñ uwana tapəhay la pañaw.

<sup>9</sup>Kà uwana kà, gədañwanəñ à afik ndzer kà, kadabəlaw.

<sup>10</sup>Azladza uwana uwarà, Zəzagəla apəh à atə gay ahəl kà mapəh à azladza, tayəhəh la manərəzay lela kà matsənəñ godega aña, uwana anaka Zəzagəla abəla à azladza. Tapəh à azladza à vok à abà dagay uwarà, lakəl aña tatak matsidəyga, uwana Zəzagəla adəhəñ à ahəñ kà aña kul.

**11**Bokuba uwana Masasədök Kristu agà la atà la abà, apèh à atà à vok à abà kà, Kristu adàsa ngərpa, la uwana masla aña mabəzal mazləbay. Azlaməna mapəh à atà gay ahəl uwaga tayàh masəlay la məlo, ma uwala à uwana naka azlatatak uwanay tapaka vok, ngaha la magay la ahəy aña zlà.

**12**Zəzagəla apəhatàla azlatatak uwana naka tapaka à vok la məlo aņatà aw, ama uwaga kà aņkul. Lagonay, azlauwana tazəy gay matsidəyga tapəh à akul azlatatak uwaga. Uwaga kà Masasədök uwana Zəzagəla asləl à waņ, la uwana atsà à waņ la gay aņatà. Amiyaka azlamalika tayàhàh kà masəlay godega aña azlatatak uwaga babay.

**13**Kà uwaga wàdāw madzugway aņkul ala, kà akul aña manəf masla la dziriga, fāhàw akur à vok aņkul à lig, fāw manewəy aņkul kà à mabasiņ à afik, uwana adāvà akul la kaslà uwana Yesu Kristu adāwula à waņ.

**14**Kəsàw koksikoksi gay aña Baba aņkul uwana la zagəla la afik. Uwarà, mok uwana kasələw gay matsidəyga aw, kanəfaw mabila aña vok aņkul gesina, ama lagonay kà, kanəfaw aya aw.

**15**Kiya uwaga: Dzàw à ahəy la sətaka la abà, kà uwana Zəzagəla azalà akul, kà akul aña magay azlatsəhay aña, kà uwana masla kà tsikasla la tatak gesina la abà.

**16**Dagay uwarà tatsetsèr à wakità Zəzagəla à abà kà: 'Gàw sətaka, kà uwana gi babay kà, gi kiya uwaga.'

**17**Baņa kadəvaw kuđà à Zəzagəla kà kagodāhawwal: "Baba, Baba". Tsa baņa kiya uwaga kà, say kahoyaw ziruwī aña, la mahənay, uwana akul la gudəy la vok aña dəyga. Nəhàwla vok lela, kà uwana masla adāh seriya à dza kokudā mahoy à adi, say la kəla sləray aņatà, uwana tadāhàhəy pəra.

**18**Sələw kà Yesu Kristu apəlanula gəl à ahəy la tsakalay məyga aw takay! Kà akul aña masak manəfay aña azlababa aņkul deydayga, uwana tatəpakulla. Kà magur la azlaņgərpa uwana kasaw kà, kà akul aña masəlay kà ləv uwana kavàw à Zəzagəla kà, akəsà vok ndzer, baməraka azladza tagur luwàluwà uwana adədəv à gay vərđi anik, kà maguray à baņa delga. Kiya uwanay la madiņal gəl à vok aņkul babay zlà, uwana adūwa luwàluwà la ndzəđà, la uwana apəlanula gəl à ahəy.

**19**Ama tsa tekedika, apəlla akul gəl à ahəy la aņiz gəl aña, uwana la ndzəđà məyga məyga. Masla Kristu apakà bokuba magadzaw uwana kokudā mawisiga, sətaka.

**20**La kaslà uwana aləg madāh gudəy à vok, Zəzagəla akəsàni masla, ngaha lagonay la kaslà uwana gudəy à vok adəv à gay, Zəzagəla adəfətalla à ama ala, la dazuwaya, kà masla aña mabəl akul.

**21**Kà madegolay Yesu la uwana kafawla kà gəl à ahəy la Zəzagəla la ləv aņkul. Zəzagəla awùlla à uda la mamətsay, ngaha avəl mazləbay. La kità kà, gəđāw madiņal gəl à vok aņkul à Zəzagəla à afik, ngaha fāw manewəy kà à masla à afik.

**22**Kiya uwaga, akul kagaw sətaka, kà uwana kakəsàw gay Zəzagəla, ngaha wòyàw azladedà aņkul məna manəfay. Kiya uwaga gəgod à akul: "Wòyàhàw vok kà akul à akul la ləv tekula."



<sup>23</sup>Akul kasəlaw kà kadayyaw vok mawga, la gay Zəzagəla uwana avà sifa, uwana asafay, akədf gəl à ahəŋ aw. La abatà kà, kapakàw azlabəza aŋa dza, uwana amətsay tetuwa aw, kà uwana sifa uwaga kabəzəwwal kà, la slaka dza uwana amətsay aw.

<sup>24</sup>Tatsetsèr à wakità Zəzagəla à abà: 'Azladza gesina kà atà bokuba azlakəsaf, marabay aŋatà gesina kà bokuba azlamawuratatay aŋa kəsaf; kəsaf agulla ala, mawuratetay aŋha asakway.

<sup>25</sup>Ama gay aŋa Sufəl Zəzagəla masla adəv à gay aw.' Gay uwanay kà, gay marabəŋ gà uwana katsənawwaŋ.

## 1 Piyer 2

<sup>1</sup>Tsa ndzer Zəzagəla adavà à akul sifa mawga uwanay kà, wùtsàw mawisiga ala gesina, katsədaw gay aya aw, kagaw azlaməna magolla dza aya aw, kadəhaw à adi aya aw, kazuwaw vok aŋa dza aya aw.

<sup>2</sup>Pakàw bokuba azlabəza vərna, uwana tawoya awà koksikoksi la slaka azlaiyà aŋatà, uwaga akul babay, kà akul aŋa mazigənay. Kawoyaw gay Zəzagəla koksikoksi tsərah à kaslā uwana Zəzagəla adəfətala à ama ala, kà masla adəbəl akul ndzer.

<sup>3</sup>Akul say kayahaw mad à huma à gay la mawoyəŋ, kà uwana kasəlaw kà Zəzagəla kà atsid.

<sup>4</sup>Zàw vok à slaka Sufəl Yesu Kristu, kà uwana av sifa à azladza, masla kà akur uwana azladza tapəsəw, tekedika masla la uwana Zəzagəla adəfal à ahəl, kà masla la uwana akur mawad gəy gesina.

<sup>5</sup>Akul babay, akul la sifa, gəw bokuba akur uwanay, kà Zəzagəla aŋa makəs akul kà aŋa maŋalla akul gəy, kà Masasədok aŋha aŋa madz à ahəŋ la aku. La gəy uwatà la aku, kadəgaw azlaməna mav tatak à Zəzagəla, kà akul aŋa madəhalla sləray la ləv tekula, à uwana ahədəl à adi, kà madegolay Yesu Kristu.

<sup>6</sup>Kiya uwanay tatsetsèr à wakità Zəzagəla à abà: 'Nəŋəwwəŋ, gəfa akur tekula à gudəŋ uwana sləm aŋha Siyon, kà aŋa maŋal gəy gulo, azlaakur anik tadədəl à gəl. Gəyàhàni kà uwana dzəba aŋha səla aw, kəla dza uwana adin gəl à masla à vok zirui, adəkəsay tetuwa aw.'

<sup>7</sup>Kà akul uwana kadiŋaw gəl à masla à vok kà, masla dzəba aŋha səla aw, ama kà aŋa azladza uwana tadinjal gəl à vok aw kà, kiya uwanay tatsetsèr à wakità Zəzagəla à abà, Zəzagəla agòd: 'Akur uwana azlaməna maŋal gəy tapəsəw kà, adapakay akur mawad gəy gesina.'

<sup>8</sup>Dgaha agòd aya: 'Akur uwanay la uwana atsahla matekwid à azladza, à uwana tatəd à ahəŋ.' Matekwid atsəhla atà kà la masla, kà uwana tadin gəl à gay Zəzagəla à vok aw, uwana dagay uwarə Zəzagəla apəhəh kà, say apakà vok kiya uwanay.

<sup>9</sup>Tekedika, kà aŋkul azlatsəhay uwana Zəzagəla akəsàni akul, akul maham à ahəŋ mənə mav tatak à Zəzagəla, akul tsəhay tsikaslaŋa aŋha. Masla atsatsəmàni à akul, kà akul aŋa mazin à azladza aŋha azlatatak mənŋa, uwana la abà adəhəhəŋ. Masla la

uwana ahèl akul à uda la mëlòs la abà, ñgaha abèk akul à ufàka aṅha à abà, uwana apèhla à akul ala, kà akul dzòba aṅha sèla aw gà.

<sup>10</sup>Dagay uwarà kà, akul tsèhay aṅa Zèzagèla aw, ama lagonay kà kadapakaw azlaaṅha, dagay uwarà kasèlàw vok mahamay aṅa Zèzagèla aw, ama lagonay kà, adagay mav à akul gà.

<sup>11</sup>Azlamanalay, sèlàw kà akul azlamèlok la gudəṅ la vok, kà uwaga gədəv à akul kuḍa: Kamkam katapaw ahàl à azlatatak mawisiga à vok, ñgaha kà adiya aṅa makəs akul aw, kà uwana azlatatak uwaga adàdèdè à akul gay à ahəṅ aṅa madèhəṅ uwana ahəd à Zèzagèla à adi.

<sup>12</sup>Lagonay, akul la tataka azladza uwana la abà tasəl Zèzagèla aw, tsìzllàw à ahəṅ lela la maday aṅkul la abà, amiyaka tatsəd akul gay à tsəh, baṅa tanəṅa madèhəṅ aṅkul lela, tadàzləb Zèzagèla la kaslà uwana adàwula à waṅ.

<sup>13</sup>Kiya uwaga kanəfaw Sufəl gami Yesu Kristu, tsèbàw sləm à paṅaw aṅa azladza, uwana tanəṅla akul la gudəṅ la vok, uwana atà la ndzədə. Hòyàw yewdi aṅa azlaməṅ sufəl uwana takoray lakəl aṅa tatak gesina.

<sup>14</sup>Hòyàw yewdi aṅa azlaməna manəṅla akul, uwana məṅ sufəl abèk atà à ahəṅ kà madàh seriya à azlaməna madàh mawisiga, ñgaha aṅa mazləb azlaməna madàh delga.

<sup>15</sup>Asa à Zèzagèla kà kadaw lela, kà azladza kà masəl akul, ñgaha tadza à ahəṅ titi kà matsəd à akul gay à tsəh.

<sup>16</sup>Gàw bokuba azladza makor gəl gà, ama kagodaw kà akul la makor gəl la abà, kà kadàhawwaṅ mawisiga la masal aṅkul aw. La kità, gàw azlamagamza aṅa Zèzagèla.

<sup>17</sup>Kèsàw azladza gesina, wòyàw azladedà aṅkul məna manəf gay Zèzagèla, guba akəs akul kà Zèzagèla, kèsàw gay aṅa məṅ sufəl babay. Nəfàw slaka asik aṅa Yesu uwana anəfà.

<sup>18</sup>Gəpəhay kà akul azlamagamza, uwana kadàhaw azlasləray, kèsàw gəl à ahəṅ la huma azlaməṅga aṅkul, hòyàw guba kà aṅatà. Kasləkawaw azlauwana tasəl akul pəra aw, ama sləkàwàw azlauwana tadàhakulla mawisiga à vok bay.

<sup>19</sup>Baṅa dza anik abas ñgərpa kà madegolay Zèzagèla, amiyaka ñgərpa uwatà kà lakəl aṅa deyday kà, uwaga la uwana tatak uwana ahəd à Zèzagèla à adi.

<sup>20</sup>Iyay, baṅa kadàhaw mawisiga, ñgaha tazlabàh akul, ñgaha kabasawwaṅ ma, uwa adàzləb akul uwa? Ama baṅa kadàhaw delga, ñgaha tasa à akul ñgərpa, lakəl aṅa uwaga kabasawwaṅ kà, uwaga tatak uwana ahəd à Zèzagèla à adi.

<sup>21</sup>Kà aṅa kiya uwaga à uwana Zèzagèla azàlla akul. Yesu uwana mafal dzakwa à gəl gà, kà masla la gəl aṅha, kà adàhàṅ kiya uwanay kà mabəl akul. Apèhàkulla tetəvi, kà akul aṅa manəf slaka asik aṅha.

<sup>22</sup>Masla adàhàhà mawisiga tetuwa aw, avavàrà dza dikiḍiki aw.

<sup>23</sup>Iyay, amiyaka tatsàkal magodàhay à gəl babay kà, masla awulatàla azlamagodàhay aw. Amiyaka tasàl ngərpa, masla adzùgw madàh mawisiga à azladza uwatà à vok aw. Ama masla kà avà vok aṅha kà à Zəzagəla uwana à afik, adàh seriya la mahoy adi aw.

<sup>24</sup>Yesu Kristu la gəl aṅha, masla azəb tsakana gami à gəl aṅha, à mok uwana tatatàsl à ahàf à adi, kà anu aṅa magay bokuba azladza uwana tamàts kà ahàl tsakana, ama kà anu aṅa madz à ahəṅ la sifa, kà madegolay dziriga. Kawùràw ala, kà uwana taslàhàṅla.

<sup>25</sup>Dagay uwarà kagàw bokuba azlatuwan uwana tetəvi adazah atà à adi, ama lagonay kà, kadabəzaw vok aya, nəfàw masla manəṅla akul, uwana afa à akul sləm, masla asal kà mawisiga adəbani akul babay aw.

### 1 Piyer 3

<sup>1</sup>Akul azlamis, hòyàw yewdi aṅa azlazil aṅkul. Baṅa kadàhàwwàṅ kiya uwanay, azlazil aṅkul uwana tasəl gay Zəzagəla aw, tadàbədla madz à ahəṅ, tadàdiṅ gəl à Zəzagəla à vok kà madz à ahəṅ delga aṅa azlamis aṅatà.

<sup>2</sup>Tadànəṅəṅ maday aṅkul sətaka, ṅgaha bay, la mawoy atà aṅkul.

<sup>3</sup>Kayahaw bədà aṅa vok aṅkul aw, bokuba magodày mats gəl anik anik, kà mapəhla vok ala, ṅgaha bay, kakay mabək tatak bədà luwàluwàga à vok mi, ṅgaha aya kakay à maduw dzersay à vok mi.

<sup>4</sup>Ama delga kà, uwaga aguwa à uda kà la ləv aṅkul la tsəh, delga kà ləv aṅkul agay mabasiṅ gà, ṅgaha tələmmaga, kà uwana tsəhay bədà uwana aguwa à uda la ləv, awis ala dikiḍiki aw, uwaga la uwana tatak uwana ahəd à Zəzagəla à adi, aduwa azlaanik gesina.

<sup>5</sup>Azlamis uwana uwarà tanəfàh Zəzagəla tagàh kiya uwanay, tahòyàh yewdi aṅa azlazil aṅatà

<sup>6</sup>Kiya uwaga nərèzàw Sara, akəs gay aṅa zil aṅha Abəraham, azalàlla kà Baba, baṅa ziruwi akəs akul aw kadàhaw uwana delga gà, akul babay kapakaw bokuba masla suwan.

<sup>7</sup>Akul azlazil bay, say kadzaw à ahəṅ la matsən vok gay la abà la azlamis aṅkul. Atà kiya akul aw, kà uwana atà kà azlaguḍguḍ. Nəṅàw atà à adi bokuba uwana kanəṅaw à vok aṅkul à adi, sifa uwaga Zəzagəla avà à akul kà deyday, ṅgaha avà à akul, ṅgaha avà atà babay la slaka gà. Baṅa kadàhawwan kiya uwanay, Zəzagəla adàtsəb sləm à madəv kudà aṅkul, tatak la ahəṅ adàdédal gay à ahəṅ aw.

<sup>8</sup>Iyay zlà, aganay gay madəvla à gay: Akul gesina dzàw à ahəṅ la ləv tekula. Vok mahamay agay la akul gesina. Wòyàw vok kà akul à akul la tetəvi aṅa Zəzagəla la ama, gàw tələmna, wòyàw vok.

<sup>9</sup>Baṅa dza adàhakulla mawisiga à vok kà kawulawla aw. Baṅa dza agòdàh à akul, kagodàhawwal aw. La abatà kà: Pìsàwla gay à vok, kà uwana la kaslà uwana Zəzagəla azalà akul kà magay tsəhay aṅha kà, apəh à akul à ahəṅ kà adapisakulla gay à vok.

- <sup>10</sup>La wakità aña Zəzagəla la abà tatsetsèr kà: 'Dza uwana asal kà aña madz à ahəŋ la matsiday la abà kà, say asakiya mawisiga la fida, uwana atsa à uda la ləv aŋha.
- <sup>11</sup>Delga kà, azəb ahəl aŋha à uda la mawisiga la abà, ŋgaha adàh delga la mayàh tetəvi matsən vok gay la Zəzagəla, ŋgaha la azladza anik pəra.
- <sup>12</sup>Sufəl anəŋla azlauwana tadàh delga, afa à atà sləm la matsən madəv kudà aŋatà. Ama kà aña azlauwana tadàh mawisiga kà, atsəb à atà sləm tetuwa aw',fa Zəzagəla agòd.
- <sup>13</sup>Baŋa kayahaw madàh delga la ləv aŋkul la tsəh gesina, uwa à dza uwana adàfahakulla mawisiga uwa?
- <sup>14</sup>Amiyaka kasaw ŋgərpa lakəl aña azlatatak delga uwana kadahawwəŋ lakəl aña uwaga kà Zəzagəla adapisakulla gay à vok, kiya uwaga ləv aval akul à gay, kà azladza uwana tadàhakulla mawisiga à vok aw.
- <sup>15</sup>La kità kà sləkàwàw Kristu la ləv tekula, masla apakà madzahaga aŋkul. Gàw nekwa koksikoksi kà akul aña mawulla ala lakəl aña à uwana anava akul gesina lakəl aña uwana kafàw manewəŋ aŋkul kà à masla à afik.
- <sup>16</sup>Baŋa kawulawatàla, dāhàwwàŋ kà la ləv tələmmaga, sləkàwàw atà babay, kadāhaw mawisiga dīkidīki aw kà uwana baŋa azladza tatugw mawisiga lakəl aŋkul kà ziruwī, kà uwana tatsək magodāhay à delga aŋkul uwana à gəl la tetəvi aña Kristu la tsəh.
- <sup>17</sup>Ɔuləm kasaw ŋgərpa kà madàh delga, kiya uwaga la uwana Zəzagəla awoyəŋ; uwaga la uwana aduwa à vok, kà akul kasaw ŋgərpa, à kà madàh mawisiga.
- <sup>18</sup>Yesu Kristu la gəl aŋha aməts asik tekula kà madegolay tsakana aŋkul, adəvə sləray aŋha à gay la mamətsay aŋha. Masla, uwana dza dziriga, aməts kà aña azladza uwana azladziriga aw, kà masla aña madla anu à slaka Zəzagəla. Atà takəd masla, ama Zəzagəla awùlla à uda la sifa la Masasədok aŋha.
- <sup>19</sup>Mok uwana Zəzagəla adāhəŋ, uwanay ahəd, azəŋ à azladza uwana atà la dāŋay mamətsay la abà, la mezewi.
- <sup>20</sup>Uwaga kà azladza uwana uwarà takweskà mapəhay aña sufəl Zəzagəla, Zəzagəla akudà atà la mabasiŋ mok uwana Nuhu adāhà kəslah iyaw, ama takweskà. Azladza uwana tahəd à kəslah iyaw à abà kà atà dəŋ aw, atà mtəgis pəra à uwana Zəzagəla atəfà atà kà iyaw.
- <sup>21</sup>Iyaw uwatà apakà magagazləla la batem uwana abəl akul la tsakana aŋkul la abà. Batem uwaga kà mapal vok pəra aw. Ama uwana adala anu à maham gay à vok à abà la Zəzagəla la ləv tekula, kà uwaga à uwana Sufəl Yesu Kristu awulà à uda la mamətsay.
- <sup>22</sup>Ɔgaha awulà à zagəla, adadza madzay la ahəl kaf aña Zəzagəla. Masla akoray lakəl aña azlamalika, ŋgaha la azlatatak anik gesina uwana atà la ndzədà la abatà.

## 1 Piyer 4

- <sup>1</sup>Nèhàwwàṅ kà Yesu Kristu asa ṅgərpa la vok aṅha, kà uwaga à akul babay: Gàw nekwa aṅa masay ṅgərpa bokuba aṅha bay, kà uwana dza uwana as ṅgərpa la vok aṅha, adàh tsakana aya aw.
- <sup>2</sup>Lagonay mədzəka la madla à huma à gay la kəla kaslā uwana kadzaw à ahəṅ la gudəṅ uwanay la vok kaslawwala vok aṅa madàh uwana ahəd à Zəzagəla à adi, awkà azlatatak mawisiga uwana asa à ləv aṅkul aw.
- <sup>3</sup>Kaslā uwana kadazawwaṅla adagay diga. Azlatatak uwana kadàhàwwàṅ kà, aganay azlatatak uwana kadàhàhàwwàṅ uwarà, kadàhàhàwwàṅ kà uwana asa à vok aṅkul pəra: Kagàhàw azlaməna guzu, kahabàhàw azlamadəvaday kəla mavakay, kahamàhàw gay à vok kà mas guzu, kasləkàwàhàw azlamazlazlay atà uwana tawis mapəhay aṅa Zəzagəla ala ndzer.
- <sup>4</sup>Ama lagonay kà, kagagàmàwla vok à ahəl la azladza uwana tasəl Zəzagəla aw, aw. Kà uwaga ləv adaval atà à gay, ṅgaha tatsəka à akul magodəhay à gəl.
- <sup>5</sup>Ama vuḏ tekula tadàtsizilla à huma aṅa Zəzagəla kà aṅa seriya. A masla kà nekwa aṅa madàh seriya à azladza uwana à gəl atà la sifa, ṅgaha azlauwana à gəl tamatsay babay.
- <sup>6</sup>Makəs vok aṅa uwana Kristu azàṅ gay marabəṅ kà, azlauwana la mezewi bay kà atà aṅa madz à ahəṅ la sifa bokuba Zəzagəla uwana la sifa. Kay kà, Zəzagəla adàhà à atà seriya à gəl bokuba uwana adəhəṅ à azladza la gudəṅ la vok gesina nəma.
- <sup>7</sup>Gudəṅ à vok kà nekwa adəv à gay. Gay gə la uwaga kəsàw gəl aṅkul, ṅgaha gəw nekwa kà akul aṅa madəv kuḏà à Zəzagəla.
- <sup>8</sup>Iyay, tatak məṅga gə kà, say kawoyaw vok kà akul à akul la ləv aṅkul gesina, kà masal kà, aslaslad maham à ahəṅ tsakana ala.
- <sup>9</sup>Kiya uwaga kəsàw azladza la ahəl səla kokudà maṅoṅuzay.
- <sup>10</sup>Zəzagəla adàdàhakulla delga la azladabaray anik anik. Avà maslay à kəla uwabeyuwi aṅkul, kà madàh azlatatak anik anik, say kəla uwabeyuwi adàh dziriga, masla azəb maslay aṅa Zəzagəla uwana avəl kà masla mazlakla azladza anik.
- <sup>11</sup>Dza uwana la maslay kà mapəh gay anik apah azlagay uwaga à uwana asà à waṅ la slaka Zəzagəla, dza uwana la maslay kà mazlak azladza anik, azlaka atà la ndzəḏa uwana Zəzagəla avəl. Dahàwwàṅ kiya uwanay kà azladza aṅa mazləbaya Zəzagəla la tatak gesina la abà, kà madegolay Yesu Kristu, masla uwana la maslay la mazləbay aṅa koksikoksi! Amen.
- <sup>12</sup>Azladedə gulo, ləv avalla akul à gay, kà manəṅ azlamatərbəy anik anik aw. Azlatatak uwaga abəzà à akul kà aṅa maguray madiṅal gəl à vok aṅkul, kadzugwaw kà azlatatak uwaga kà azlatatak mavalakulla à ləv à gay aw.
- <sup>13</sup>Kahamaw à ṅgərpa uwana à abà Kristu asà, kà uwaga kà, vələhàw à zagəla la kaslā uwana azladza tadànəṅəṅ kà masla məṅga la yewdi anatà, akul kadàvalahaw à zagəla la ləv aṅkul gesina.

<sup>14</sup>Baṅa azladza tatsəka akul magodəhay à gəl kà, kà uwana akul azlaaṅa Kristu, Zəzagəla adapisakulla gay à vok kà uwaga, kà uwana Masasədok aṅa Zəzagəla uwana ndzəda, ṅgaha aduwaṅ gesina adza à ahəṅ la akul.

<sup>15</sup>Baṅa dza la ahəṅ la tataka aṅkul la abà asa ṅgərpa, kà uwana adahà mawisiga baṅaw akəf dza, baṅaw adà à gəl aṅa azlatatak anik, baṅaw kamavàläh à gay aṅa azladza anik à abà bokuba mavdzagor kà, dza azləbà kà uwaga aw, apakà vok kiya uwaga la akul aw.

<sup>16</sup>Ama baṅa dza asa ṅgərpa, kà uwana masla aṅa Kristu, ziruwi akəs kà uwaga aw. Kiya uwaga kà, 'Kikay', agod à Zəzagəla, kà uwana azladza tazalla ala kà masla dza aṅa Kristu.

<sup>17</sup>Kaslà kà adaslay à uwana Zəzagəla adah seriya à azladza à gəl. Adəfah seriya kà azlaaṅha à gəl dadəṅ. Kayyà, baṅa adəfəhəṅ kà azladza aṅha à gəl dadəṅ, ma kakay adəpaka vok la azladza uwana tatsəb sləm à gay marabəṅ aw ma?

<sup>18</sup>Bokuba uwana tatsətsər à wakità Zəzagəla à abà: 'Baṅa Zəzagəla adakəsay azlaaṅha la seriya, atà uwana azladziriga, mana adəpaka vok la azladza mawisiga uwana tasəl Zəzagəla aw ma?'

<sup>19</sup>Kà humà à gay uwaga, azlauwana tasa ṅgərpa kà uwana Zəzagəla awoyàṅ, kiya uwaga kà tada à huma à gay la madəh delga, ṅgaha tavà vok aṅatà gesina à Zəzagəla à ahəl, masla uwana adahà à atà, ṅgaha masla uwana dziriga.

## 1 Piyer 5

<sup>1</sup>Lagonay gəpəhay kà à akul azlamasiga uwana la tataka aṅkul la abà. Gi babay kà, gi masiga bokuba akul: Mok uwana tasà ṅgərpa à Kristu kà, gənəṅəṅ, gətəp gay gəl à ahəl à abà, məkaləṅ mazləbay aṅa Kristu uwana Zəzagəla apəhanula, kà uwaga à uwana 'Kamkam', gəgod akul:

<sup>2</sup>Fàw sləm à azladza aṅa Zəzagəla, uwana abək à akul atà à ahəl: 'Dahəwwəṅ kiya uwana masla manəṅla azlatuwaṅ af sləm à azlatuwaṅ aṅha; fàw à atà sləm la ləv tekula, bokuba uwana asa à Zəzagəla. Kadəhəwwəṅ la ləv səla aw, kadəhaw sləray kà məbəzal sili pəra aw. 'Dahəw sləray uwaga la ləv aṅkul gesina.

<sup>3</sup>Kakoraw la ndzəda lakəl aṅa azladza uwana Zəzagəla abək à akul atà à ahəl aṅkul aw, fàw à atà sləm. Ama kà nəfəw maday delga kà məpəhatàla maday delga.

<sup>4</sup>Baṅa kadəhawwaṅ kiya uwanay kà, la kaslà uwana məṅ Sufəl aṅa azlaməna manəṅla azlatuwaṅ adàsa à waṅ, akul, azladza uwana kaduwwaw atà kadəbəzawwal la ahəl aṅha masik mənṅa gə, uwana aduwa azlatatak anik gesina, uwana akəl atsal à adi ala aw, adəda à ahəṅ aṅa koksikoksi.

<sup>5</sup>Gəgod à akul azladza medəga: Hòyàw yewdi aṅa azlamasiga aṅkul, kapakaw azlaməna zlapay aw, dəhəw vok sləray kà akul à akul, uwaga kà bokuba uwana tatsətsər à wakità Zəzagəla à abà: 'Zəzagəla kà apəsew azlaməna zlapay, ama adəh delga à azladza tələmmaga.'

- <sup>6</sup>Kà uwaga à uwana gəgodf à akul: Wulàwla gəl à vədāh la huma aṅa Zəzagəla, uwana akoray lakəl aṅa tatak gesina, baṅa kadāhawwaṅ kiya uwaga kà, la mok uwana kaslà adāsa à waṅ, masla adāzigən akul.
- <sup>7</sup>Azlatatak gesina uwana azlazlazladā kà aṅkul kà, bə̀kàw atà à ahàl aṅa Zəzagəla, kà uwana masla afa à akul sləm.
- <sup>8</sup>Dzàw à ahəṅ mazil à zil, kadzewhal aw. Masla məzam aṅkul, seteni kà, masla la uwaga auguzahay, ayàh dza kà makəsay bokuba sikalaveri uwana awiyay, ayàh tatak may.
- <sup>9</sup>Kiya uwaga kavàwwal tetəvi aw, dāw à huma à gay la mav ləv aṅkul à Zəzagəla. Səlāw, kà azladedā aṅkul uwana la tetəvi aṅa Zəzagəla la tsəh la gudəṅ la vok gesina tasa ṅərpā babay bokuba aṅkul.
- <sup>10</sup>Baṅa kasaw ṅərpā kà aṅa kaslà ṅuv kiya uwaga, Zəzagəla uwana adāhaha delga koksikoksi, masla, la gəl aṅha adādāhaha akul à ahəṅ, adāvà à akul ndzəda kà akul aṅa masakiya à tetəvi la tsəh ala aw. Azalà akul, aṅa maday à mazləbay aṅha à abà, uwana adəv à gay aw, la ahàl aṅa Kristu.
- <sup>11</sup>Masla la uwana la maslay aṅa tsəràh à awtāy. Amen.
- <sup>12</sup>Silas azlakà gi matsetser bəzi wakità uwanay. Gəsəl kà masla dza dziriga la tetəvi aṅa Zəzagəla la ama. Gətsetsèr à akul kà gədzərədfāh akul à uda, ṅaha bay aya, gəgodf à akul la paraka ndzer, mazləbay aṅa Zəzagəla kà bokuba uwana gəpəh à akul. Wādāw ləv ala la azlatatak uwaga la abà gesina.
- <sup>13</sup>Maham à ahəṅ mənā gay Zəzagəla la abanay la Babila, uwana Zəzagəla atsatsàmànì atà, bokuba uwana atsatsàmànì akul babay, 'Ayyi', tagodf à akul. Mark uwana Kona gulo, avà à akul 'Ayyi' aṅha babay suwaṅ.
- <sup>14</sup>Dahàw vok 'Ayyi', kà akul à akul, la mawoy vok la abà. Zəzagəla avà à akul lapiya, à akul gesina, uwana akul la ahàl aṅa Kristu.

## 2 Piyer

### 2 Piyer 1

<sup>1</sup>Gi Səmon Piyer, gi uwana gi mayà aña Yesu Kristu, gi masla matapla la slaka aña bay, à uwana gətsetser à akul wakità uwanay, akul uwana kadiñaw gəl à Yesu à vok kalkal bokuba uwana mədiñal gəl à vok babay, anu gesina məbəzà à tatak uwaga la slaka gə. Yesu Kristu adàhà uwaga kà añami gesina, kà uwana masla kà dziriga. Masla kà Zəzagəla la gəl aña, ñgaha masla məbəl anu babay.

<sup>2</sup>Awoyàñ kà mapis gay à vok aña Zəzagəla agay la akul kaykay, la lapiya, kà akul aña masəlay kaykay Zəzagəla la Yesu, Sufəl gami.

<sup>3</sup>Yesu Kristu apèhanula Zəzagəla uwana azàlla anu, kà anu aña maham à mazləbay aña à abà, ñgaha kà anu aña manəf maday aña, uwana aduwa gesina, kiya uwaga masla avà à anu ndzəda aña maslay aña, azlatatak gesina uwana anu mənəkudà aña, kà anu aña məbəzal sifa mawga, ñgaha kà anu aña manəf maday uwana ahəd à Zəzagəla à adi.

<sup>4</sup>La azlatsəhay tetəvi uwanay à uwana avà à anu azlatatak uwanay, uwana apèh à ahəñ uwarà kà aña mav à anu azlatatak uwana dzəba aña səla aw kà añami. Adàhəñ kiya uwanay kà, kà madegolay azlatatak uwanay, kà azlatatak mawisiga aña gudəñ à vok uwana akəd à adi aña mabiy akul aw, kà akul aña maf gəl à azlamadzugway aña Zəzagəla.

<sup>5</sup>Lakəl aña azlatatak uwanay, gəgod akul kà: Wədāw vok à uda! Diñaw gəl à Yesu Kristu à vok lagonay, kanəfaw maday delga! Dàw à huma la maday delga! Yàhàw kà masəl azlatatak babay!

<sup>6</sup>Kà uwana kasəlaw azlatatak uwanay, dzàw à ahəñ titi babay, kà uwana kadafahaw akur à vok añkul à lig, tsizllàw à ahəñ la ndzəda la azlamatərbəy la abà la mawadàh vok à uda. Nəfàw bokuba uwana ahəd à Zəzagəla à adi.

<sup>7</sup>Kà madla vok kà akul à akul bokuba uwana ahəd à Zəzagəla à adi. La madz à ahəñ uwana bokuba akul la azladedə, wəyàw azladza gesina babay.

<sup>8</sup>Baņa kadàhəw azlatatak uwanay koksikoksi kà, masəl Yesu Kristu añkul adakəsakulla vok, ñgaha maday añkul adavà mayyay lela.

<sup>9</sup>Ama kà aña azladza uwana tadàh uwaga aw kà, tapakahay bokuba azlaguləf. Adavika atà à tsakana uwana tadàhəhəñ uwarà, Zəzagəla amàtsatəñ ala.

<sup>10</sup>Azladeda, tsa baņa kiya uwanay kà, wədàhəw vok à uda, kà uwana Zəzagəla azalà akul, ñgaha atsatsəmàni akul kà madəhəñ kiya uwanay. Baņa kadàhəwəñ kiya uwanay, tetuwa tetəvi aña Zəzagəla adàvika akul aw.

<sup>11</sup>Kiya uwanay la kokudà matsigay, Zəzagəla adəpəzlla akul gamagəy, kà akul aña mad à makoray aña Sufəl gami Yesu Kristu à abà, uwana abəl anu. Makoray uwatà adədzehəñ aña koksikoksi.



- <sup>12</sup>Kà uwaga kà, gèdàwulakulla à gəl koksikoksi, tekedika kà, sèlàw nəma kà akul aṅa matsizl à ahəṅ la ndzəda la azlagay dziriga uwanay la abà, katapawla.
- <sup>13</sup>La mok uwana gi la ahəṅ la sifa dadàṅ la gudəṅ la vok, gəsəl kà dzəba aṅha səla aw kà gi aṅa mawulakulla tatak uwanay à gəl, kà akul aṅa madz à ahəṅ la adi.
- <sup>14</sup>Gəzləmətsay à dagay, bokuba uwana Sufəl Yesu Kristu apəh à gi à vok à abà.
- <sup>15</sup>Uwana gəwad vok à uda lagwa, kà baṅa gədamətsay kà, kadàbəzaw à tetəvi aṅa mawul akul à gəl aṅa azlagay uwanay.
- <sup>16</sup>Dagay uwarà məpəh à akul mas à waṅ aṅa Yesu Kristu la maslay aṅha à gudəṅ à vok. La mapəh à akul kiya uwanay, məpəh à akul azlagay maviyaga, uwana asàhàh à uda la madzugway aṅa azladza la abà aw. Ama mənəṅəṅ ndzəda aṅa mazləbay aṅha, la yewdi gami.
- <sup>17</sup>La kaslā uwana abəzà à masləkaway ṅgaha la mazləbay la ahəl aṅa Zəzagəla, məgà la abatà, mətsənəṅ kà Zəzagəla uwana aduwaṅ gesina la mazləbay, apəh gay uwanay: 'Uwaga kà bəzi gay ləv gulo, uwana gəwoyaṅ kaykay', Zəzagəla agəɔf.
- <sup>18</sup>La mok uwana məgà la gudəṅ tsikaslaga la afik, la Sufəl gami Yesu Kristu, à uwana mətsənà azlagay uwanay, atsən à ahəṅ la zagəla
- <sup>19</sup>Uwana azlaməna mapəh à atà gay à ahəl aṅa Zəzagəla tapəh kà, apakà vok la huma yewdi gami babay, kà uwaga mədiṅ gəl à mapəhay aṅatà à vok. Delga kà kadəhaw haṅkəli la mapəhay aṅatà, kà uwana sayda aṅatà kà, aga bokuba fənəs, uwana audəy la mələs la abà. Dàw à huma à gay la matsəbal sləm, tsərah à kaslā mavakay uwana adəpəhla vok ala la paraka. La mavakay uwatà kà, ṅuzla bebəṅ, uwana Kristu, adəpəhla vok ala, ṅgaha kadənəṅaw azlatatak gesina la paraka.
- <sup>20</sup>Azlatatak uwana aduwa vok gesina, à uwana gəpəh à akul, kà gay aṅa azlaməna mapəh à atà gay à ahəl uwarà tapəh, ṅgaha tatsətsər à wakità Zəzagəla à abà babay, gay uwaga kà matsihila aṅa azladza aw.
- <sup>21</sup>Gay aṅa azlaməna mapəh à atà gay à ahəl uwaga kà matsihila aṅa azladza aw, Masasəɔk tsikaslaga la uwana avà à atà maslay, kà atà aṅa mapəh paṅaw aṅa Zəzagəla, uwana apəh à atà.

## 2 Piyer 2

- <sup>1</sup>Kiya uwaga à uwana azlaməna mapəh à atà gay ahəl fida gə tasa à uda la tataka aṅa azla Isərayel la abà. Kiya uwaga babay, azlamatapla fida gə tadəsah à uda la tataka aṅkul la abà bay. Tadətapla à azladza gay mazəhatàla, tadədzəzin Sufəl masla mabəl atà tetuwa. La madəhəṅ kiya uwanay kà, magol seriya adətəɔf à atà à gəl katskats.
- <sup>2</sup>Azladza aṅuvaw tadənəf madəh mawisiga aṅatà. Kà uwaga à uwana azladza tadəpah mawisiga lakəl aṅa dziriga aṅa Zəzagəla.

<sup>3</sup>Azlaməna matapla fida à azladza uwaga, tadəkad yewdi à tatak aŋa azladza anik à abà, tadàpah fida kà mavavarla akul, kà aŋa maβəz tatak. Dagay uwarà Zəzagəla apəh à ahəŋ kà madaha à atà seriya à gəl. Masla seriya adəzahatàla gesina, adzəhal aw!

<sup>4</sup>Amiyaka azlamalika uwana tadāhà tsakana uwarà. Tsakana aŋatà avikà Zəzagəla aw. Adawadāh atà à mələs à abà la mazakazak, kà madawits atà à akəl à abà la vud seriya. Tadādza à ahəŋ la mələs tabadammaga la abà tsərah à vud uwana Zəzagəla adādāh seriya à azladza gesina à gəl.

<sup>5</sup>La kità la azladza aŋa uwarà babay. Zəzagəla asək atà kiya uwanay aw, adāhà à atà seriya à gəl la iyaw. Iyaw ahəl azladza à gay, la gudəŋ la vok gesina. Abəlāŋ kà Nuhu, uwana apəh dziriga aŋa Zəzagəla à azladza, ŋgaha la azladza mədəf uwana la huđ gəy aŋha pəra.

<sup>6</sup>Gudəŋ, uwana tazalalla Sodom la Gomor kà, Zəzagəla akəs azladza uwana tadzà à ahəŋ la huđ aŋha la seriya, ababəh atà à gay la akəl, agəd à ahəŋ kà say masək à akəl akəl pəra. Kiya uwaga apəhla ala kà azladza uwana takəs gay aŋha aw kà, adədukw atà seriya à gəl kiya uwaga babay suwaŋ.

<sup>7</sup>Lot kà, agà dza delga, ŋgaha Zəzagəla asəlla à uda la gudəŋ Sodom la abà. Ləv azəŋ kà tatak aŋa azladza uwaga tadāhəhəŋ.

<sup>8</sup>Dza delga uwatà adzà à ahəŋ la tataka aŋa azladza mawisiga uwaga la abà, kəla mahənay anəŋəhà azlatatak mawisiga uwana tadāhəhəŋ, atsənəhà gay mawisiga uwana tapəh, ŋgaha azəhəŋ la ləv la tsəh məŋga, kà uwana masla kà, agà dza dziriga.

<sup>9</sup>Iyay la dziriga, Sufəl Zəzagəla asəl tetəvi uwana abəlla azladza uwana tanəfà masla, la magoray uwana la abà atərəb atà, ŋgaha asəl tetəvi aŋa manəŋla azladza mawisiga uwana adādāha à atà seriya à gəl la vud makəd gəl à ahəŋ.

<sup>10</sup>Haday, gəpəh à akul kà, ŋgərpa uwaga kà, Zəzagəla adāvà à azladza uwana tadāhəh mawisiga à vok aŋatà, ŋgaha kà uwana takəs mapəhay aŋa Zəzagəla aw. Azlaməna matapla fida à azladza uwaga kà, gəpəh à akul, kà kurit yewdi agod à atà aw, ŋgaha tafa à gəl azladza babay aw, tahoy yewdi aŋa azlamalika uwana atà la mazləbay aw, kiya uwaga takədasl à atà.

<sup>11</sup>Baməraka azlamalika uwana tadūwa azlaməna matapla fida à azladza la tetuwa bay kà, tapəh à atà gay à vok la huma aŋa Zəzagəla aw.

<sup>12</sup>Azladza uwaga tadāh tatak deydayga, kà madz à ahəŋ aŋatà kà bokuba azlatatak fəta, uwana takəs atà kà makad atà. Atà tapəh gay à azlatatak deydayga uwana à vok tatsənà sləm aw. Ndzer, Zəzagəla adəzahatàla bokuba azlatatak fəta.

<sup>13</sup>Zəzagəla adāvà à atà matərəbay, bokuba uwana tatərəba azladza anik suwaŋ. Asa à atà kà aŋa mazuw gudəŋ pəra, tadāh uwaga gesina la dazuwaya, amiyaka la afats. Baŋa tadza à ahəŋ la akul, ŋgaha kazuwaw kà, ziruwi kà aŋkul, ŋgaha tarabay à baŋa tavavara akul.

<sup>14</sup>Madzugway aŋatà kà say lakəl aŋa azlaməna madaw gaw ala pəra, tayi vok kà madāh tsakana dikiđiki aw. Baŋa tanəŋa azladza uwana azlaguβguβga la tetəvi aŋa

Zəzagəla la tsəh kà, tavavar atà, ngaha tadukw atà à tsakana à abà. Koksikoksi takad yewdi à tatak aña azladza à vok. Zəzagəla adàtsafla atà, la makəs atà la seriya.

<sup>15</sup>Tasakiya à tetəvi aña Zəzagəla la tsəh ala, tanəfay kà aña gəl aņatà, tadəheņ kà uwana Balam kona aña Bosor adəhàņ, uwana awoyà madəh mawisiga, kà azladza aña mavəl sili.

<sup>16</sup>Haday, vərđi anik Zəzagəla abəzal à tsəh la tsakana aņha la abà. La kaslā uwatà ziwņņu uwana adabadmna à dza didi aw, abadmna bokuba dza. A masla mapəhal gay ahəl aña Zəzagəla uwatà, kà masla aña manəf azlatatak deydayga uwaga aw.

<sup>17</sup>Lakəl aña azlaməna matapla fida uwaga à azladza kà, atà kà tagay bokuba azlamukwà uwana takakəzəhay aya aw, tagahay bokuba azlahabaga uwana afad adadasıņla. Zəzagəla adəđəh slaka à ahəņ kà aņatà la mələs tabadammaga la abà.

<sup>18</sup>Tats zlapay la ndzəđa la azlagay deydayga. La kità babay, tabəza azladza uwana à tsəh la uwana la abà, tasəl tetəvi aña Zəzagəla dadəņ aw, azlaməna matapla fida uwaga à azladza, asa à atà kà azladza tadiya à madəh mawisiga à abà, bokuba uwana atà tadəhəņ suwaņ.

<sup>19</sup>Tapah à azladza à vok à abà, kà atà tadəbəz makor gəl, tekedika atà la gəl aņatà kà azlamayà aña tsakana, kà uwana kəla tatak uwana akor dza, uwaga kà mayà aña tatak uwana akoray.

<sup>20</sup>Baņa dza asəl kà Sufəl Yesu Kristu kà masla mabəl anu, ngahaa asak à azlatatak mawisiga aña gudəņ à vok uwanay à tsəh ala awis dza ala, ngaha takor masla ayà. Haday, kà aņatà kà, kaslā uwaga adəgay zlalzadā kà aņatà, đadıwa à gay uwana uwarà.

<sup>21</sup>Baņa kiya uwaga kà, agayņa tadza à ahəņ aña masəl tetəvi delga kà ņuləm, à kà uwana tasəl tetəvi lela ngaha tawullal à tsəh ala ayà, takəs mapəhay aña Zəzagəla ayà aw.

<sup>22</sup>Tatak uwana adəbəz à azladza uwaga kà, apəhànula kà gay la gay la abà uwana tagod kà: 'Kəda avələh tatak may uwana à uda, azuw, ngaha awulləl à tsəh à mavələhay aņha aya.' Tagod aya kà: 'Tapal namzi kà masla magay kuzekaka, ama awulla à dzabay à abà.'

## 2 Piyer 3

<sup>1</sup>Azlaməna gay ləv gulo, aganay wakitā masəla uwana gətsetser à akul. La wakitā səla uwaga la abà, gətsetsər à akul kà, gəwulla à akul à tsəh kà azlatatak uwana kasəlaw adagay kà aña mawulla à akul à gəl aña azlatatak uwaga la dziriga.

<sup>2</sup>Iyay, asa à gi kà gay uwana azlaməna mapəhəh azlagay uwana Zəzagəla apəhatāla mapəh à akul kà avika akul aw, ngaha bay, la mapəhay uwana Sufəl Yesu Kristu uwana abəl anu, apəh à azlaməna matapla la slaka aņha à ahəl, aña azlaməna matapla uwana asləl atà à waņ.

- <sup>3</sup>Tatak uwana asa à gi aṅa mapəh à akul kayak kà: La kaslà uwana gudəṅ à vok adàdəv à gay kà, azladza tadəpəhahla vok ala uwana tadəfəh dèwdèw mawisiga, uwana asa à atà gesina. Azladza uwaga tadəkədəsəlah akul.
- <sup>4</sup>Hahayyà kà, kà mana Yesu Kristu kà atsa à waṅ, bokuba uwana tapəh aw mi, tadəgodəy? Azlababa gami madzidziga tamàts à gay, azlatatak uwana la gudəṅ la vok kà bawtawta bokuba uwana Zəzagəla aṅəl pəra.
- <sup>5</sup>Azladza tadəpəhay kiya uwanay, asa à atà kà matsənəṅ kà dagay uwarə Zəzagəla apəh à ahəṅ, ṅgaha kiya uwana aṅəl zagəla ṅgaha kutso. Kutso aguwà à uda kà la iyaw la abà, ṅgaha avaha à atà ala. Zəzagəla adəhà uwaga gesina la afaď gay aṅha.
- <sup>6</sup>Ama vərđi anik, la tsəhay afaď gay aṅa Zəzagəla uwaga, madz à ahəṅ aṅa uwarə kà akaləh à ahəṅ, iyaw azà gudəṅ à vok ala gesina.
- <sup>7</sup>Zəzagəla agəď aya babay kà, zagəla la kutso uwana mənəṅ atà lakana kà, tadza à ahəṅ tsəràh à mavakay uwana akəl adəpadəh à gay, la mavakay aṅa seriya uwatà aya kà, adəkəf azladza uwana takəs gay aṅha aw bay.
- <sup>8</sup>Azlaməna gay ləv gulo, tatak uwanay gəpəh à akul kà avika akul aw! Kà uwana la huma Zəzagəla kà mavay dəbow kà kalkal la mavakay tekula la yewđi aṅha.
- <sup>9</sup>Azladza aṅuvaw uwana tagodəy kà: "Zəzagəla kà aduw à tsəh kà kayak, kà mas à waṅ aṅa madəh tatak uwana apəh à ahəṅ!", tagodə. Ama kiya uwaga aw. Kà uwana masla kà abasakullaṅ la makud à akul la abà pəra. Asa à Zəzagəla kà kabəzaw tetəvi kà akul aṅa mapəh gay la ləv ala, kà uwana asal kà, dza azila bə tekula aw. Hərəz kà aṅa asal, kà azladza gesina tabəđla vok.
- <sup>10</sup>Tekedik baṅa kaslà adəsəy kà, Sufəl gami Yesu Kristu adəsə à waṅ, ndzer, ama dza la ahəṅ asəl mavakay uwana adəsə à waṅ aw. Adəsə à waṅ kà bokuba masla à gəl uwana agurəh dza gurəh. La mavakay uwatà, azladza tadətsən magol kuda məṅga bərəm, ṅgaha zagəla adəzila tuwiz. Akəl adəbabəh tatak uwana à gay, la zagəla la afik gesina. Adəpaka masək à akəl akəl, kutso la tatak uwana la huď aṅha gesina adədəv à gay.
- <sup>11</sup>Tsa baṅa azlatatak uwanay gesina adədəv à gay gesina la kiya uwanay zlə kà, akul kà, dəw à huma à gay la maday delga la abà, dəw bokuba uwana akəs à Zəzagəla à gel la azlatatak gesina la abà.
- <sup>12</sup>Fəw madzugway aṅkul kà à mavakay uwana à afik. Zəzagəla adəwulla à waṅ, ṅgaha dəhəw uwana kaslawwəla vok babay, kà mas à waṅ aṅa mavakay uwaga la katskats. La mavakay uwatà, akəl adəbabəh zagəla à gay, la azlatatak uwana la afik gesina.
- <sup>13</sup>Ama Zəzagəla apəh à anu à ahəṅ kà adəṅal zagəla mawga, ṅgaha la kutso mawga aya. La abatà kà, azlatatak dziriga la uwana tadədzə à ahəṅ la abà. Uwaga kà tatak uwana məkuday lagwa pəra.
- <sup>14</sup>Azlaməna gay ləv gulo, kà uwaga à uwana gəgodə à akul bokuba uwana kakudaw mas à waṅ aṅa Sufəl kà, wəđəw vok à uda kà akul aṅa maday la lela la abà, kà uwana

baŋa adàsa à waŋ kà, kadàgaw la tataka la abà kokudà mawisiga, ŋgaha ləv aŋa madz à ahəŋ la titi la abà la huma Zəzagəla.

**15**Awulla à akul à gəl kà mana mi kagodaw ay? Uwana Sufəl Yesu Kristu atsa à waŋ katskats aw kà! Kà uwana asal kà akul kabəzaw tetəvi kà aŋa maḃəlay dadəŋ. Tatak uwana Pol, uwana akəs ləv gami, atsetsèr à akul, atapəkulla kiya uwanay babay. Atsetsèr kà la matsihila, uwana Zəzagəla avəl,

**16**la azlawakità aŋha la abà gesina, baŋa atsetsèr kà lakəl aŋa azlatatak uwanay, kiya uwanay à uwana apəh. Azlatatak anik la ahəŋ la wakità uwanay la abà, uwana zlazladà kà matsənəŋ. Azladza uwana la matsihila aw, azlauwana tawəf ləv ala aw, uwana gay uwanay asal mapəhay kà tagola à tetəvi anik à tsəh, bokuba tabəḃla azlagay anik anik la wakità Zəzagəla la abà babay. La madəhəŋ kiya uwaga kà, tabiy seriya aŋa Zəzagəla à gəl aŋatà.

**17**Azlaməna gay ləv gulo, tatak uwanay kà kasəlaw adagay. Kà uwaga à uwana gəgodf à akul kà: Dahaw haŋkəli, kà azladza uwaga takəs gay aŋa Zəzagəla aw, aŋa madukw akul, ŋgaha aŋa mazəḃakulla la slaka uwana katsizləw à afik aw.

**18**Kà aŋa uwaga kà: Dəw à huma la manəf Sufəl gami Yesu Kristu, masla maḃəl anu, ŋgaha masla aŋa mapisakulla gay à vok kaykay, ŋgaha aya, kà akul aŋa masəl masla kaykay aya suwaŋ. Delga kà, azladza tazləḃ masla lagonay, ŋgaha aŋa tsərəh à awtəy. Amen.

## 1 Yuhana

### 1 Yuhana 1

<sup>1</sup>Mətsetser à akul lakəl aṅa gay aṅa sifa, uwana agà la ahəṅ dagay la madzəka gudəṅ à vok. Mətsənàṅ, mənəṅàṅ la yewdi gami, ṅgaha mətsəkəl yewdi à gay, ṅgaha bay mədəbanì la ahəl gami aya.

<sup>2</sup>La mok uwana sifa uwaga adasa à waṅ à gudəṅ à vok, mənəṅàṅ, gay gà la uwaga məpəh à akul lakəl aṅha, ṅgaha məzəkulla sifa uwana adəv à gay aw, nekwa la slaka Zəzagəla, Baba gami, sifa uwatà apəhanula vok la paraka.

<sup>3</sup>Tatak uwana mənəṅàṅ, ṅgaha la uwana mətsənàṅ, mətəpakulla, kà akul aṅa magay tekula la maham gay à vok la abà, la Baba, ṅgaha la Kona aṅha Yesu Kristu.

<sup>4</sup>Mətsetser à akul tatak uwanay kà anu aṅa mavalàh à zagəla la marabay.

<sup>5</sup>Aganay uwana Yesu atəpanula, ṅgaha uwaga la uwana mətəpakulla babay, Zəzagəla kà udaka, tetuwa mələs la ahəṅ la masla la abà aw.

<sup>6</sup>Baṅa məgodfay kà mədahama gay à vok la masla, ama mēda à huma à gay la madz à ahəṅ la mələs la abà kà, mədadāh fida la gay la abà, ṅgaha la sləray la abà.

<sup>7</sup>Ama baṅa mēdza à ahəṅ la udaka la abà, bokuba uwana Sufəl gami adza à ahəṅ la udaka la abà, anu la maham gay à vok la azladza anik, kiya uwaga kà, aṅiz aṅa Yesu, Kona aṅha, apalla tsakana gami gesina.

<sup>8</sup>Baṅa: 'Anu azlaməna tsakana aw', məgodf kà, mədāvavar gəl gami, ṅgaha kà dziriga la ahəṅ la anu la abà aya aw.

<sup>9</sup>Ama baṅa məpəhla tsakana gami à Zəzagəla, məslala vok, mēfa gəl à masla à afik. Kà uwana adāhà sləray kà la tetəvi aṅha. Dziriga, adāmats tsakana gami ala, ṅgaha adəpalanula mawisiga gami ala gesina.

<sup>10</sup>Baṅa: 'Anu azlaməna tsakana aw', mədapaka Zəzagəla ala bokuba masla fida, gay aṅha azlak anu aya aw.

### 1 Yuhana 2

<sup>1</sup>Azlabəza gay ləv gulo, gətsetser à akul uwanay, kà akul aṅa madāh tsakana aya aw. Baṅa dza anik adāh tsakana, anu la masla mazlak anu anik, uwana nekwa la slaka Baba, Yesu Kristu, masla uwana dziriga,

<sup>2</sup>azlaka anu. Takədf masla kà madegolay tsakana gami. Adāhà uwaga kà aṅami pəra aw, kà aṅa azladza gudəṅ à vok gesina, kà tsakana aṅatà aṅa mamats ala.

<sup>3</sup>Kiya uwaga, baṅa məkəs mapəhay aṅha, kiya uwaga məsəl masla la dziriga.

<sup>4</sup>Dza uwana: 'Gəsəl Zəzagəla', agodf, ṅgaha akəs mapəhay aṅha aw, dza uwaga kà, masla fida, dziriga la ahəṅ la masla la abà aw.

- <sup>5</sup>Ama dza uwana afa mapəhay aŋha à ahəŋ la ləv, masla kà dza uwana la masal dziriga. Aganay masəlay uwana apəhanula maham gay à vok gami la Zəzagəla.
- <sup>6</sup>Dza uwana agodəy la dazuwaya: 'Gi la maham gay à vok la Zəzagəla la abà', say adza à ahəŋ bokuba madz à ahəŋ aŋa Yesu.
- <sup>7</sup>Azlaməna gay ləv gulo, gətsetser à akul mapəhay mawga aw, kà uwana uwanay gətsetser à akul kà mapəhay maviyaga, kabəzàwwal uwaga dagay la madzəka. Mapəhay maviyaga uwaga kà gay Zəzagəla uwana katsanàwwəŋ.
- <sup>8</sup>La azlaskala anik gətsetsèr à akul, bokuba azlamapəhay mawga dziriga aŋha. Apəhla ala la Kristu la abà, ŋgaha apəhla vok ala la akul la abà babay. La hadəy, mələs aŋa madiy aŋha, ŋgaha udəka dziriga aŋa maudəy adagay.
- <sup>9</sup>Dza uwana: 'Gi la udəka la abà' agod, ama adzedzin deda aŋha bà gotənaŋ kà, dza uwaga kà aga la mələs la abà aya.
- <sup>10</sup>Dza uwana awoya deda aŋha, adza à ahəŋ la udəka la abà, masla aga la zlamtsa kà madukw dza anik à tsakana à abà aw.
- <sup>11</sup>Ama dza uwana apəsew deda aŋha, adza à ahəŋ la mələs tabadəmmaga la abà, ŋgaha asəl slaka uwana aday aw, adapaka guləf.
- <sup>12</sup>Azlabəza, gətsetser à akul uwanay kà, kà uwana tsakana aŋkul adəmətsila. Zəzagəla adəmətsakullaŋ ala kà uwana Yesu avà gəl aŋha kà aŋkul.
- <sup>13</sup>Azlababa gətsetser à akul, kà uwana kasəlaw masla agə la ahəŋ dagay madzəka. Azlabəza kohana, gətsetser à akul kà uwana kadūwəw seteni.
- <sup>14</sup>Azlabəza gətsetser à akul kà uwana kasəlaw Baba. Azlababa, gətsetser à akul kà uwana kasəlaw masla agə dagay la madzəka. Azlabəza kohana, gətsetser à akul kà uwana akul azlandzədə ndzədə, ŋgaha gay Zəzagəla aga la akul la ahəl, ŋgaha babay kà uwana kadūwəw seteni.
- <sup>15</sup>Kawoyaw gudəŋ à vok aw, kawoyaw azlatatak uwana la gudəŋ à vok la abà babay aw. Masal aŋa Baba Zəzagəla aga la ləv aŋa dza uwana la tsəh, awoya gudəŋ à vok aw.
- <sup>16</sup>Kəla tatak uwana aŋa gudəŋ à vok, kà madzugway mawisiga aŋa sləb vok, makəd yewdi à uwana à vok mənəŋaŋ kà mabəzal, magay zlapay lakəl aŋa uwana məkoray, azlatatak uwaga gesina kà, tatsa à waŋ kà la slaka Baba Zəzagəla aw, ama tatsa à waŋ kà la gudəŋ la vok pəra.
- <sup>17</sup>Gudəŋ à vok uwanay kà, masla la uwaga adəv à gay. Ŋgaha kəla tatak uwana dza adzugway la gudəŋ la vok, adədəv à gay babay suwaŋ. Ama dza uwana adəh uwana akəs à Zəzagəla à gəl kà, adədzə à ahəŋ aŋa koksikoksi.
- <sup>18</sup>Azlaməna gay ləv gulo, makəd gəl à ahəŋ kà adəgay nekwa nekwa. Katsənəw uwana tapəh kà: Leri masla məzam aŋa Kristu atsa à waŋ. Ama lagonay, aŋuvaw azlaməna məzam aŋa Kristu tasəhəh à waŋ, hadəy. Uwana apəhanula kà, makəd gəl à ahəŋ kà nekwa nekwa.

<sup>19</sup>Tetuw tetuw, azladza uwaga taga la akul la dziriga aw. Kà uwaga à uwana, tasak anu vok ala. Haday ndzer, agayna tagay la anu kà, naka tadza à ahəŋ la anu. Ama taga azlaanami kà aŋa gay gà pəra, gay gà la uwaga tasaka anu à ahəŋ kà uwaga aŋa madzəɗla kà baməraka tekula aŋatà kà, adəb à anu à vok aw.

<sup>20</sup>Kà aŋkul kà, kabəzàw Masasəɗok Zəzagəla. Kristu adzadzəb akul à gəl, kà uwaga à uwana kasəlaw dziriga gesina.

<sup>21</sup>Baŋa gətsetser à akul kà, kà uwana kasəlaw dziriga, awkà kà uwana kasəlaw dziriga aw aw, ama gətsetser à akul kità kà, kà uwana kasəlaw babay, fida atsa à waŋ la dziriga la abà, tetuwa aw.

<sup>22</sup>Uwa à masla fida uwa? Dza uwana agoday la paraka kà: Yesu kà Kristu aw. Dza uwaga la uwana, masla məzam aŋa Kristu, masla akweska atà səla nna, Baba Zəzagəla atà la Kona aŋha.

<sup>23</sup>Haday, kà dza uwana akweska Kona, kà akweska Baba babay aya. Kà aŋa dza uwana asəl Kona kà, aga la Baba babay suwaŋ.

<sup>24</sup>Ama akul katsənaw uwaga dagay madzəka, tatak uwanay kasəkàwwal adza à ahəŋ la akul la abà. Baŋa tatak uwana katsənəwwəŋ dagay madzəka adza à ahəŋ la akul la abà, kà akul babay kadzaw à ahəŋ la Kona la abà, ŋgaha la Baba la abà babay suwaŋ.

<sup>25</sup>Aganay tatak uwana Kristu apəh à anu à ahəŋ, kà mav à anu sifa uwana adəv à gay aw.

<sup>26</sup>Gətsetser à akul tatak uwanay, kà lakəl aŋa azladza uwana tayəh mavavar akul.

<sup>27</sup>Baŋa kà aŋkul kà, Kristu adadzəb à akul Masasəɗok tsikasłaga aŋha à gəl, kà Masasəɗok uwaga aŋa madz à ahəŋ la akul la abà, akul kà manəkudā aŋa matapakulla tatak aŋa dza aw. Haday ndzer, Masasəɗok Zəzagəla atapakulla azlatatak gesina. Uwana Masasəɗok apahla ala kà dziriga, awkà fida aw. Gay gà la uwaga, məkəs uwana Masasəɗok atapànula, uwaga asal magoday: Dzàw à ahəŋ tekula la Kristu.

<sup>28</sup>Iyay, azlabəza gay ləv gulo, dzàw à ahəŋ la Kristu la abà, kà aŋami kà məgəɗəŋ à afik, ndzer baŋa adəwul à waŋ, kà ləv gami aŋa mahənlā la ziruwi, la huma aŋha, la mavakay uwana adəwul à waŋ aw.

<sup>29</sup>Kasəlaw kà Kristu kà dziriga, kità babay kà, kəla dza uwana akəs, uwana akəs dziriga kà, masla kà dziriga babay suwaŋ, dza uwaga kà, masla dza aŋa Zəzagəla.

### 1 Yuhana 3

<sup>1</sup>Nəŋəw mawoy anu aŋa Baba tsi, mawoyəŋ aŋha aga la ahəŋ kayak, azaləkulla azlabəza aŋha, ŋgaha uwaga kà dziriga, anu azlabəza aŋa Zəzagəla. Baŋa gudəŋ à vok awoya akul aw kà, kà uwana asəl Zəzagəla babay aw.

<sup>2</sup>Azlaməna gay ləv gulo, lagonay kà, anu azlabəza aŋa Zəzagəla adagay. Ama Zəzagəla adapəhla ala la dazuwaya dadəŋ à uwana mədàbəzal vərđi anik, aw. Ama



mədàbəza uwaga la kaslà uwana Kristu adàpəhla gəl aŋha ala la paraka, mədàgay kiya masla, kà uwana anu mədànəŋəŋ huɖadi aŋha la yewdi gami.

<sup>3</sup>Kəla dza uwana asal manəŋ Kristu, say adəhəŋ haŋkəli, kà masla aŋa madəbani tsakana aw, kiya uwaga kagaw sətaka, bokuba Kristu uwana sətaka babay.

<sup>4</sup>Kəla dza uwana adəhəŋ kà tatak mawisiga pəra, uwala adəh mapəhay aŋa Zəzagəla aw, akweska mapəhay aŋa Zəzagəla, kà masla aŋa madəh tsakana.

<sup>5</sup>Ama kasəlaw kà, Yesu, Sufəl gami asà à waŋ à gudəŋ à vok, kà mazəb tsakana à azladza la kəl ala. La masla la abà kà, tsakana la ahəŋ aw.

<sup>6</sup>Kəla dza uwana adza à ahəŋ kà la masla la abà kà, adəh azlatatak mawisiga aya aw, ŋgaha dza uwana ada à huma à gay la madəh azlatatak mawisiga kà, adanəŋ Kristu la tetuw tetuw aw. Asəl masla dikiɖiki aw.

<sup>7</sup>Azlabəza gulo kavàw vok aŋkul à azladza tapapat akul aw! Dza uwana adəh dziriga, masla kà dziriga babay suwaŋ, bokuba Kristu uwana dziriga.

<sup>8</sup>Dza uwana ada à huma à gay la madəh azlatatak mawisiga, masla kà aga la ahəl aŋa seteni; seteni kà akweska Zəzagəla dagay madzəka, Kona aŋa Zəzagəla asà à waŋ, kà masla makaləh tatak uwana à ahəŋ, seteni adəhəŋ.

<sup>9</sup>Dza agay bəzi aŋa Zəzagəla la mayyi vok mawga, dza uwaga aslala vok aŋa madəh azlatatak mawisiga aya aw, kà uwana ndzəda aŋa Zəzagəla, uwana ayyà vok mawga, adza à ahəŋ la masla la abà, aslala vok kà madəhəh azlatatak mawisiga aya aw, kà uwana adapaka kona aŋa Zəzagəla.

<sup>10</sup>Dza uwana adəh tatak uwana dziriga aw, ŋgaha awoya deda aŋha aw, dza uwaga kà kona aŋa Zəzagəla aw, aŋa seteni. Azlasləray aŋatà tapəhanula la paraka, kà uwana tavəhla la Kona aŋa Zəzagəla, kà atà azlaaŋa seteni.

<sup>11</sup>Hadəy dziriga, uwana katəpawla teraŋa kà: Wòyàw vok kà akul à akul, tatak uwaga kà kadatapawla dagay madzəka.

<sup>12</sup>Kità kà, dza anəfa tsəhay gə aŋa Kaynu aw, kà uwana masla kà agə kona aŋa seteni, akəɖ deda aŋha. Kà mana akəɖ deda aŋha ma? Kà uwana Kaynu adəhəhəh azlatatak mawisiga. Ama tatak uwana deda aŋha adəhəhəhəh agəhəhəh dziriga.

<sup>13</sup>Azladeda, ləv aval akul à gay à baŋa azlaməna gudəŋ à vok uwanay tapəsew akul aw.

<sup>14</sup>Ama məsəl kà mədasa à uda la mamətsay la abà, ŋgaha mədada à sifa à abà. Gay gə la uwaga à uwana məslala vok kà mawoy azladeda gami. Dza uwana awoya deda aŋha aw kà, aga la ahəl aŋa seteni.

<sup>15</sup>Kà aŋa dza uwana awoya deda aŋha aw kà, masla makəɖ dza hadəy, adəbəza sifa adəv à gay aw, tetuw tetuw aw.

<sup>16</sup>Yesu Kristu kà, avà sifa aŋha kà aŋami, uwana adəhəŋ kà, masla mapəhanula mawoyəŋ dziriga. Kità kà, anu babay məvə sifa gami kà aŋa azladeda gami suwaŋ zlə.

- <sup>17</sup>Baŋa dza gorobu anəŋa deda aŋha la kuḏa la abà, ama asal mazlakay aw, kakay dza uwaga agodəy kà: 'Gəwoya Zəzagəla la ləv gulo', agodəy ma?
- <sup>18</sup>Azlabəza gulo, asla kà magodəy 'Gəwoyaŋ', pəra aw, kapahaw azlagay namnamga pəra aw, masal dziriga kà apəhla vok ala kà la uwana la abà mədəhəŋ.
- <sup>19</sup>Aganay à tatak uwana apəhanula kà manəf tetəvi aŋa dziriga. Ŋgaha aganay tatak uwana apəhanula kà guba aŋa makəs anu, kà mad à huma Zəzagəla aw.
- <sup>20</sup>Hadəy, baŋa ləv gami apuwa à anu gudzi à gəl, məsəl kà Zəzagəla gami kà aduwa ləv gami, ŋgaha məsəl babay kà, masla gami asəl tatak gesina.
- <sup>21</sup>Kità kà, azlaməna gay ləv gulo, baŋa ləv gami apuw à anu gudzi à gəl aw, guba akəs anu kà mad à huma Zəzagəla aw.
- <sup>22</sup>Zəzagəla kà adavà à anu tatak uwana mənəvay gesina, kà uwana mədəh tatak uwana: 'Dahəwwəŋ', masla agod, la uwana akəsəl à gəl.
- <sup>23</sup>Aganay tatak uwana: 'Dahəwwəŋ', agod: Fəw madzugway aŋkul à Kona aŋha Yesu Kristu à afik, ŋgaha wəyàw vok akul à akul, bokuba uwana Kristu apəh à anu.
- <sup>24</sup>Dza uwana akəs mapəhay aŋa Zəzagəla, ŋgaha adədəh slaka madz à ahəŋ aŋha à ahəŋ la ləv aŋha la tsəh, masla adəzda à ahəŋ la masla la abà. Uwaga kà Masasədok uwana Zəzagəla avà à anu à uwana apəh à anu, Masasədok uwaga aga la ləv gami la tsəh.

## 1 Yuhana 4

- <sup>1</sup>Azlaməna gay ləv gulo, kafaw madzugway aŋkul à azladza uwana à afik gesina: 'Anu la Masasədok uwana atsà à waŋ la slaka Zəzagəla', tagod aw. Ama nərəzəw atà dadəŋ, kà akul aŋa masəl: atà la Masasədok aŋa Zəzagəla ndzer. Hadəy ndzer, azlaməna mapəh à atà gay ahəl fidaga la ahəŋ, uwana tadàsa à waŋ à gudəŋ à vok, tasləh gəl à ahəŋ gesina.
- <sup>2</sup>Aganay tetəvi uwana kasəlawla à baŋa dza uwaga la Masasədok aŋa Zəzagəla ndzer. Kəla dza uwana agodəy kà: 'Yesu kà Kona aŋa Zəzagəla, asà à gudəŋ à vok, apakà dza bokuba anu', dza uwaga kà, akor kà Masasədok, uwana atsà à ahəŋ la slaka Zəzagəla.
- <sup>3</sup>Ama kəla dza uwana agodəy kà: 'Yesu kà Kona aŋa Zəzagəla aw, ŋgaha ndzer apakà dza bokuba anu aw', dza uwaga aga la Masasədok uwana asà à ahəŋ la slaka Zəzagəla aw. Ama dza uwatà kà la masasədok aŋa masla məzam aŋa Kristu. Hadəy, katsənəwwəŋ kà masla adàsa à waŋ. Lagonay kà, mədanəŋəŋ la gudəŋ la vok adagay zlà.
- <sup>4</sup>Ama kà aŋkul azlabəza gay ləv gulo, akul azlaaŋa Zəzagəla, ŋgaha kaduwa azlaməna mapəh à atà gay à ahəl fidaga uwaga. Masasədok Zəzagəla uwana aga la akul la abà aduwa masasədok aŋa azladza uwaga tetuw tetuw, kà uwana aŋatà kà aŋa gudəŋ à vok uwanay.

- <sup>5</sup>Azladza uwaga tapəhay kalkal la gudəŋ à vok uwanay, kà uwaga tapəhay lakəl aŋa gudəŋ à vok uwanay, ŋgaha gudəŋ à vok akəs gay aŋatà.
- <sup>6</sup>Ama anu, anu azlaaŋa Zəzagəla, kəla dza uwana asəl Zəzagəla, atsəb à anu sləm, ama kà aŋa azlauwana azlaaŋa aŋha aw, tatsəb à anu sləm aw. Kiya uwaga à tetəvi kà masəlay Masasəfok dziriga aŋa Zəzagəla, ŋgaha masasəfok mazila, kà kità ndzer.
- <sup>7</sup>Azlaməna gay ləv gulo, məwoya vok kà anu à anu. Kà uwana masal kà atsà à ahəŋ kà la slaka Zəzagəla, ŋgaha kəla dza uwana awoyaŋ deda aŋha kà, masla kona aŋa Zəzagəla, ŋgaha asəl Zəzagəla.
- <sup>8</sup>Dza uwana awoyaŋ Zəzagəla aw, masla asəl Zəzagəla aw, tekedika Zəzagəla masla mawoyəŋ.
- <sup>9</sup>Kiya uwaga à uwana, Zəzagəla apəhanula masal aŋha: Asləl Kona aŋha tekula gə uwatà à waŋ à gudəŋ à vok, kà masla aŋa mav à anu sifa adəv à gay aw.
- <sup>10</sup>Godega aŋa mawoyəŋ uwanay kà, Zəzagəla awoya anu, asləl à anu Kona aŋha à waŋ, kà aŋa mapis à anu gay à vok, ŋgaha amatsən tsakana gami ala. Anu la uwana məwoyaŋ Zəzagəla teraŋa aw, ama masla la uwana atsà à vok à mawoy anu dadəŋ.
- <sup>11</sup>Azlaməna gay ləv gulo, bokuba uwana Zəzagəla awoya anu kayakay kà, say məwoya vok kà anu à anu babay suwaŋ.
- <sup>12</sup>Dza la ahəŋ adanəŋ Zəzagəla didi aw, ama baŋa məwoy vok kà anu à anu, Zəzagəla adza à ahəŋ la anu, ŋgaha azladza tanəŋəŋ la paraka masal aŋa Zəzagəla, uwana la anu la abà.
- <sup>13</sup>Kiya uwanay la uwana, anu la maham gay à vok la Zəzagəla, masla adza à ahəŋ la anu la abà, masla avà à anu Masasəfok aŋha.
- <sup>14</sup>Mənəŋəŋ, ŋgaha məpəh uwaga la kuda zləkkà: Baba asləl Kona aŋha à waŋ à gudəŋ à vok, kà masla aŋa mabəl anu.
- <sup>15</sup>Kəla dza uwana apəhay la paraka kà Yesu kà: Kona aŋa Zəzagəla kà, masla adza à ahəŋ la Zəzagəla la abà.
- <sup>16</sup>Anu məsəl masal uwana Zəzagəla awoya anu, ŋgaha mədakəs masal uwaga. Zəzagəla masla masal. Dza uwana aga la masal uwaga la abà, masla la maham gay à vok gə la Zəzagəla, ŋgaha Zəzagəla la masla la abà bay.
- <sup>17</sup>Aganay tatak uwana apəhanula kà masal aŋa Zəzagəla mahənlaga la anu la abà, guba akəs anu, kà kaslà aŋa seriya aw, kà uwana sifa gami adagay magagazləlaga la aŋa Yesu Kristu.
- <sup>18</sup>Dza uwana adakəs masal ndzer, dza uwaga, guba azəŋ diki diki aw, masal dziriga ahəlal guba la vok ala. Ama dza uwana guba azəŋ kà mahənlaga la masal aw, kà uwana guba kà tatak tekula la seriya.
- <sup>19</sup>Ama anu kà, məwoya Zəzagəla, kà uwana Zəzagəla atsà à vok à mawoy anu teraŋa.

<sup>20</sup>Dza uwana agoday: 'Gəwoya Zəzagəla', awoya deda aṅha aw, dza uwaga kà: Masla fida. Kayyà, kakay awoya Zəzagəla à masla uwana anəṅaṅ aw ma, ṅgaha kà awoya deda aṅha uwana anəṅaṅ la yewdi aw ma?

<sup>21</sup>Uwanay kà mapəhay uwana Yesu apəh à akul: Dza uwana awoya Zəzagəla, say awoya deda aṅha babay suwaṅ.

## 1 Yuhana 5

<sup>1</sup>Kəla dza uwana adiṅal gəl à vok, kà Yesu kà dza, uwana Zəzagəla afəl dzakwa à gəl, agoday kà, masla kà mayyay aṅa Zəzagəla. ṅgaha kəla dza uwana awoya Baba, awoya mayyay aṅha babay suwaṅ.

<sup>2</sup>Kakay məsəlay kà masal gami la ahəṅ, anu azlabəza aṅa Zəzagəla la dziriga ma? Baṅa məwoya Zəzagəla la gəl aṅha, ṅgaha à baṅa mədāh uwana masla apəhanula.

<sup>3</sup>Ndzer, dza uwana awoya Zəzagəla, masla kà adāh tatak uwana masla apəhla ala babay. Uwana Zəzagəla apəh à akul kà, zlazladā aw.

<sup>4</sup>Haday, kà uwana dza uwana mayyay aṅa Zəzagəla aslala vok kà madūw gudəṅ à vok. Tetəvi uwana aduwla gudəṅ à vok kà, uwaga kà madiṅ gəl à Yesu Kristu gami à vok.

<sup>5</sup>Uwa aslala vok aṅa madūw gudəṅ à vok uwa? Say dza uwana akəs Yesu Kona aṅa Zəzagəla.

<sup>6</sup>Yesu Kristu kà masla uwana asà à waṅ. Asà à waṅ la iyaw aṅa batem aṅha, ṅgaha la aṅiz aṅa mamətsay aṅha bay. Agà madāhalla batem gə la iyaw pəra aw, ama la aṅiz aṅa mamətsay aṅha bay. Masasədok tsikasla aza sayda lakəl aṅha kà uwaga dziriga, kà uwana Masasədok aṅa Zəzagəla kà masla fida aw.

<sup>7</sup>Kità kà, tatak makər la ahəṅ à uwana taza sayda aṅha.

<sup>8</sup>Masasədok tsikasla, la iyaw ṅgaha aṅiz aya. Azlatatak makər uwaga kà tapəhanula lakəl aṅa tatak dziriga tekula: Yesu kà, masla Kristu, Kona aṅa Zəzagəla. Masla uwana apakà dza.

<sup>9</sup>Məkəs uwana azladza taziṅ, ama uwana Zəzagəla apəh kà, adūwa gay aṅa azladza uwana tapəh. Aganay uwana Zəzagəla apəh lakəl aṅa Kona aṅha Yesu:

<sup>10</sup>'Dza uwana adiṅ gəl à Kona aṅa Zəzagəla à vok, abəza sayda uwaga la ləv aṅha la tsəh. Ama dza uwana adiṅ gəl à Zəzagəla à vok aw, apaka Zəzagəla ala kà masla fida. Kà uwana akəs sayda aṅa Zəzagəla uwana masla afà à gəl aṅa Kona aṅha aw.'

<sup>11</sup>Mana gay uwaga agod à anu ma? Zəzagəla avà à anu sifa adəv à gay aw, sifa uwaga kà avà à anu, kà la Kona aṅha la abà.

<sup>12</sup>Dza uwana la Kona, masla la sifa uwaga, ama dza uwana la Kona aṅa Zəzagəla aw kà, masla la sifa mawga aw.

- 13** Gətsətsər à akul, kà akul aña masəlay kà, akul kà, akul la sifa uwana adəv à gay aw, ndzer, kà uwana kadìṅàw gəl à sləm aña Kona aña Zəzagəla à vok.
- 14** Aganay makəs vok aña uwana məslala vok aña maz à vok à slaka Zəzagəla. Guba akəs anu aw, kà uwana məsəl kà, baña mənava tatak à masla la tetəvi aña, kà masla: 'Ayyà', agod à anu.
- 15** Kà uwana məsəl kà atsəb sləm à baña mənəval tatak la matsizl à afik ndzer, uwana mənəval kà, adàv à anu, ndzer.
- 16** Baña dza anəña deda aña anik adàh tsakana, uwaga adala à mamətsay aw, dza uwaga adəv kudà kà aña deda aña uwaga, ṅgaha Zəzagəla adàbasallaṅ la maval sifa. Tatak uwaga kà ndzer, kà aña tsakana uwana adala dza à mamətsay aw pəra. Tsakana uwana adala dza à mamətsay la ahəṅ. Gənaava akul, kà akul aña madəv kudà lakəl aña tsəhay tsakana uwaga aw.
- 17** Dèwdèw tatak uwana kadàhawwaṅ la tetəvi uwana Zəzagəla apəh aw, uwaga gesina kà tsakana. Ama azlatsakana la ahəṅ, uwana tadala dza à mamətsay aw.
- 18** Məsəl kà mayyay aña Zəzagəla kà, adàh tsakana aya aw, kà uwana Kona aña Zəzagəla anəṅla, ṅgaha ndzəfà aña seteni la ahəṅ lakəl aña aya aw.
- 19** Amiyaka gudəṅ à vok gesina la ahəl aña seteni kà, ama anu kà, anu azlaməna huḏ gày aña Zəzagəla.
- 20** Məsəl babay kà Kona aña Zəzagəla asà à waṅ à gudəṅ à vok. Masla avà à anu matsihila, kà anu aña məsəl Zəzagəla la dziriga. Anu mədahama gay à vok la Zəzagəla la abà la dziriga, kà madegolay Kona aña Yesu Kristu. Yesu Kristu kà masla Zəzagəla la gəl aña, masla bay sifa, uwana adəv à gay aw.
- 21** Azlabəza gay ləv gulo, fàhàw haṅkəli kà azlamazlazlay fidaga.

## 2 Yuhana

### 2 Yuhana 1

<sup>1</sup>Gi masiga, gətsetser à kak iyà aṅa azlabəza, uwana Zəzagəla akəsàni, ṅgaha à azlabəza aṅha, uwana gəwoya atà kayak. Gi kokudà gəl gulo pəra à uwana gəwoya akul aw, ama la azlauwana tasəl dziriga gesina babay.

<sup>2</sup>Məwoya akul kà, kà uwana dziriga la ahəṅ la anu la abà, ṅgaha adagay la anu la tsəràh à awtày.

<sup>3</sup>Zəzagəla Baba la Yesu Kristu, Kona aṅha, uwana mədahama gay à vok la dziriga, ṅgaha la masal, tavà à anu vok mahamay la dzəba aṅha səla aw, uwana amatsànuṅla tsakana, ṅgaha la mav à anu lapiya la ləv la tsəh. Kà akul aṅa mabəzal tatak makər uwaga la dziriga la abà, ṅgaha la masal aṅha la abà bay.

<sup>4</sup>Gərab mənṅa, kà magagamay la azlabəza aṅak anik, ṅgaha la manəṅ atà uwana tadza à ahəṅ la dziriga la abà, ndzer, atà tadza à ahəṅ bokuba uwana: 'Dzàw à ahəṅ', Zəzagəla Baba gami agòd.

<sup>5</sup>Lagonay kà: Gənav à ka, kak iyà aṅa azlabəza uwana Sufəl akəsàni kà, məwoya à vok kà anu à anu, mapəhay uwana gətsetser à kak kà mapəhay mawga aw, ama mapəhay aṅa Zəzagəla, uwana məkəs dagay la madzəka.

<sup>6</sup>Madàh uwana Zəzagəla apəh kà uwaga masal. Aganay uwana: 'Dahàwwàṅ', Zəzagəla agòd dagay madzəka, kà akul aṅa manəf tetəvi aṅha, ṅgaha kà kadzaw à ahəṅ la masal la abà.

<sup>7</sup>Aṅuvaw azlaməna fida tasà à waṅ à gudəṅ à vok, taslèh gəl à gudəṅ à abà gesina. Takès kà Yesu Kristu masla adapaka dza ndzer aw. Dza uwana apəhay kiya uwanay kà: masla fida, masla kà, masla məzam aṅa Kristu.

<sup>8</sup>Dahàw haṅkəli, tsizllàw à ahəṅ lela kà gəl aṅkul, kà akul aṅa maz masik aṅkul ala aw, uwaga kà mayyay aṅa sləray aṅkul uwana kadahàwwàṅ, kà akul aṅa mabəz masik aṅkul mahənlaga, pawasla.

<sup>9</sup>Kəla dza uwana adàh uwana Kristu apəhakulla aw, ama azalà azlatatak anik anik à gəl aya, dza uwaga kà, maham gay à vok gà la Zəzagəla aw. Ama dza uwana anəfa tatak uwana Kristu apəhla, masla la maham gay à vok la Baba, ṅgaha la Kona babay.

<sup>10</sup>Kəla dza uwana atsà à waṅ à slaka aṅkul, ama atapakulla kiya uwanay aw, 'Ayyà', kagodəwwal kà madz à ahəṅ aw. Təfà, kagodəwwal kà mapisla gay à vok la mapis gay à vok aṅa Zəzagəla aw. Baməraka 'Ayyi' bay kà, kagodəwwal, la 'Ayyi' aṅa maham gay à vok la azladedaw,

<sup>11</sup>kà uwana dza uwana 'Ayyi', agoday à tsəhay dza uwaga, apisla gay à vok kà, tahamà gay à vok la slaka gà la sləray mawisiga uwaga la abà, uwana dza uwanay adàhəṅ.

<sup>12</sup>Gay aga la gi lakəl aɲuvaw, nəma kà mapəh à akul. Ama asa à gi gətsetser à akul matsetseray aya aw, gədàda à awtày à slaka aɲkul la gəl gulo, ɲgaha gədàpəh à akul kà ləv gami aɲa mahənla la marabay.

<sup>13</sup>Azlabəza aɲa deda aɲak misga tadaha ka: 'Ayyi', atà uwana Zəzagəla atsatsàmàni atà babay.

## 3 Yuhana

### 3 Yuhana 1

- <sup>1</sup>Gi masiga, gətsetser à kak Gayyus. Kak slawda gulo, uwana gəwoya kak kaykay.
- <sup>2</sup>Slawda gay ləv gulo, asa à gi kà dèwdèw tatak ada à vok lela la slaka aṅak. Dgaha kà kak aṅa magay wurwur, ɲgaha madiṅal gəl à vok aṅak maṅazila koksikoksi.
- <sup>3</sup>Mok uwana azladede tasà à waṅ à slaka gulo kà, tapèh à gi dziriga aṅak gesina, bokuba magodfay, kà kanəfàh dziriga la lela kà madegolay uwaga à uwana, ləv gulo arəb kaykay.
- <sup>4</sup>Mok uwana gətsənəṅ kà azlabəza gulo kà taday la dziriga la abà kà, ləv gulo arəb. Tatak anik la ahəṅ azigəṅ marabay gulo kiya uwaga aw.
- <sup>5</sup>Slawda gulo, gəwoya ka kà kaykay, kadfah sləray lela gesina kà aṅa azladede gami, amiyaka kà aṅa azlaməlok gə bay.
- <sup>6</sup>La dazuwaya, azladza uwaga tapèh la huma à azlaməna madiṅal gəl à vok à mawoy atà aṅak. Lagonay: Kamkam zlakà atà kà mad à huma à gay, kà tsəhay mauguzahay aṅatà, uwaga aṅa magay makəs vok gə à Zəzagəla.
- <sup>7</sup>Azladza uwaga taday zlà, asa à atà mapəhla Sufəl Yesu Kristu ala. Ama asà à atà mazlak atà aṅa azladza uwana tasəl Zəzagəla aw aw.
- <sup>8</sup>Uwaga kà sləray gami, anu azlaməna gay Zəzagəla, say məkəs mazlak à tsəhay azladza uwaga gesina, kà madfah sləray la slaka gə, kà maz gay dziriga la slaka gə.
- <sup>9</sup>Gətsetser bəzi wakità à azlaməna madiṅal gəl à vok, ama Diyotəref atsəb sləm à mapəhay gulo aw, asal magay sufəl lakəl aṅa azlaməna madiṅal gəl à vok uwaga.
- <sup>10</sup>Gay gə la uwaga, gədəpəhay la paraka azlatatak mawisiga gesina uwana adfahəṅ à azladede gami à vok, à mok uwana gədəgay la tataka aṅkul la abà. Masla apèh à anu azlagay maksafər à vok, azlafida gesina uwana apəhay lakəl gami. Ama bə uwaga pəra aw. Kaykay aya kà, akəs azladede gami uwana tadà à awtəy aw, ɲgaha adəf gay à azladza à ahəṅ, kà makas atə aya, la tataka azlaməna gay Zəzagəla la abà, ɲgaha akəs atə à uda la gəy Zəzagəla la abà.
- <sup>11</sup>Slawda gulo, gəwoya ka kaykay, kamkam, kanəfa tetəvi uwaga aw, ama dfahəṅ kà uwana delga, akəsa vok pəra. Dza uwana adfah uwana delga kà, masla kà dza aṅa Zəzagəla. Ama dza uwana adfah azlatatak mawisiga kà, adanəṅ Zəzagəla dfikidiki aw.
- <sup>12</sup>Azladeda gesina tapəhay lakəl aṅa sləray delga aṅa Demetərius, ɲgaha uwana tapəhay kà dziriga. Anu babay kà, məpəhay kà lakəl aṅa azlatatak delga babay. Kak, Gayyus, kasəl uwana məpəhay kà uwaga dziriga gesina pəra.
- <sup>13</sup>Gay aga la gi lakəl aṅuvaw, kà aṅa mapəh à ka, ama asa à gi aṅa matsetser à ka matsetseray aw.



<sup>14</sup>Nekwa gədà à awtày kà mabadma la slaka gà lakəl aḡha, kà anu aḡa mapəh vok à adi la yewdi la yewdi.

<sup>15</sup>Zəzagəla avà à ka lapiya. Azlaslawda aḡak uwana la abanay kà: 'Ayyi', tagod à ka babay. 'Ayyi', gòd à azlaslawda la tekula tekula gesina.

## Yahuda

### Yahuda 1

<sup>1</sup>Gi, Yahuda la uwana gətsetser wakità uwanay, gi mayà aña Yesu Kristu, gi mabəziga bəzi gà aña Yakuba uwana Baba gami tekula la iyà tekula. 'Ayyi', gəgodf à akul, akul azlaaña Zəzagəla Baba, uwana awoya akul la ləv tekula. Atsatsàmànì akul kà magay azladza aña, anəŋla akul la Yesu Kristu.

<sup>2</sup>Zəzagəla avà à akul mamatsila, lapiya la masal aña kaykay.

<sup>3</sup>Azlaməna gay ləv gulo, gədawadf vok à uda kà matsetser akul gay aña mabəlay uwanay, mədahamay à masla à abà. Lagwa kà, gətsetser à akul kà madzərədəh akul à uda, kà akul aña mapay la madiŋal gəl à vok, kà azlatatak uwana kadiŋawwal gəl à vok uwana la abà, Zəzagəla avà à azladza aña aña koksikoksi.

<sup>4</sup>Gəpəh uwanay kà, kà uwana azladza uwana tasəl Zəzagəla aw, taguḅ akul à tsəh la maham gay à vok aŋkul la abà. Atà tagor mawis gay ala lakəl aña tatak uwana Zəzagəla avà deyday, la magodfay kà Zəzagəla avà à tetəvi kà madāh mawisiga uwana asà à anu gesina, tagodf. La madəhəŋ kiya uwaga kà, takweska Yesu, uwana madzahaga, ŋgaha Sufəl gami. Dagay uwarà la wakità Zəzagəla la abà tatsətsər kà: Zəzagəla adàdukw seriya à azlatsəhay dza uwaga à gəl.

<sup>5</sup>Iyay, amiyaka kadasəlaw tatak uwana gəpəh à akul kà, ama bà gotənaŋ kà, gəpəh à akul aya. Kiya uwaga, la zamana uwarà Sufəl abəlla azlatsəhay aña, asəlla atà à uda la gudəŋ Misəra. Dgaha akədf azladza uwana à gay la tataka aŋatà, uwana tadiŋal gəl à vok aw.

<sup>6</sup>Azlamalika babay, uwana tazigənà gəl la kokudā mav à atà aña Zəzagəla, atà tazà vok la slaka uwana Zəzagəla abək atà à abà, kà Zəzagəla ahəl atà, awadāh atà, ŋgaha abək atà à mələs tabadammaga à abà aña koksikoksi, tsərəh à kaslā uwana Kristu adāsa à waŋ kà madāh seriya à azladza gesina à gəl.

<sup>7</sup>Dgaha aya kà, dzùgwàw lakəl aña gudəŋ Sodom atà la Gomor babay, ŋgaha la azlagudəŋ anik la azlakutso uwatà la abà. Azladza aña azlagudəŋ uwatà tadāhàhà azlamabila babay, tadāhàhà azlatsəhay tatak anik mawisiga, uwana naka dza la sləḅ vok adəhəŋ aw. Zəzagəla afà à atà à gəl kà akəl uwana adāmatsala didi aw. Uwanay apəhanula, kà kiya uwanay la uwana Zəzagəla adədehəŋ à azlatsəhay dza uwaga à gəl.

<sup>8</sup>Azladza uwana tasà à waŋ à tataka aŋkul à abà, tadəhəŋ kiya uwanay babay. Baməraka masesiŋay uwana asesiŋla atà kà, tadāh mabila, asa à atà kà Zəzagəla akor atà aw, ŋgaha tatsədḅ gay mawisiga à azlamalika uwana à tsəh, atà la mazləḅay.

<sup>9</sup>Amiyaka Misel, uwana məŋga aña malika anik gesina kà, agòdāh à seteni aw, mok uwana tabayà vok gay la seteni lakəl aña Musa kà, adāhà zlapay lakəl aña sləḅ vok aña aw, ama afà kà à ahəl aña Zəzagəla pəra. Agòdal pəra kà: 'Say Zəzagəla la uwana adāhà à ka seriya à gəl!', agòdal.

<sup>10</sup>Ama kà aña azladza uwana tatsèk magodahay à azlatatak uwaga à gəl kà, tasəl godega aña aw. Tadehəŋ kà say tatak uwana asa aresl añaatà pəra, bokuba azlatatak fəta, azlatatak uwaga la uwana awisatàla.

<sup>11</sup>Uwaga kà ŋərpə uwana anəfa tetəvi aña Kaynu, ŋgaha babay tadəh mawisiga kà maḃəz sili bokuba aña Balam uwana adəhəŋ uwarà. Taməts à gay kà uwana tadzadzəŋə gəl añaatà ala lakəl aña Zəzagəla, bokuba uwana Kora adəhəŋ.

<sup>12</sup>Digiya baña kadzaw madzay kà mazuw tatak may akul nna kà, ziruwi kà aŋkul, tahabəh madəvaday, tafa à gəl kà à vok añaatà pəra, ziruwi bay aza à atà, tapakahay kà bokuba habaga uwana asal masa à afik, ama afad' adadasinla, tapakahay kà bokuba azlaahəf uwana amiyaka kaslā mayyay añaatà babay kà tayyay aw, tagahay kà bokuba azlaahəf maḃad' à ahəŋ gə.

<sup>13</sup>Tagahay kà bokuba azlaiyaw uwana tagaŋtsay la dərəv la afik, atà la titi aw. Falfafal, tagodəy bokuba iyaw uwana la dərəv la afik, tsakana añaatà kà apəhla à vok ala, la udəka la abà, bokuba mahərapapay aña iyaw, uwana amətsal à tsəh ala. Tagahay bokuba azlatsetsiliŋ uwana tabad' vok. Zəzagəla adadəhatəŋ slaka mələs gə à ahəŋ tabadamma. La abatà la uwana tadədz à ahəŋ aña tsərah à awtəy.

<sup>14</sup>Ŋgaha aga la ahəŋ dagay uwarà Enok, uwana mayyi à tsəh ala mamukwa la lig aña Adama la ahəŋ, apəh à ahəŋ uwarà lakəl aña azladza uwanay: 'Tsəbəwwal sləm', agòd', 'Sufəl atsa à waŋ, la azlamalika aña aŋuvaw,

<sup>15</sup>ama azlātsa à waŋ kà madəh seriya à azladza gudəŋ à vok à gəl, adədukw seriya à azladza uwana à gəl, takəs gay aña aw gesina, kà tatak mawisiga uwana tadəhəhəŋ à vok gesina, ŋgaha la azlagay mawisiga uwana tatagəl à vok', Enok agòd'.

<sup>16</sup>Azladza uwanay taŋoŋuzay à tsəh ala kiya uwanay koksikoksi. Tarabay didi aw, tadəhəŋ kà say tatak uwana asa à ləv añaatà, tapəhay kà bəlaslaslaga, ŋgaha tapapət azladza, tavavàrah azladza, kà azladza aña makəs gay añaatà.

<sup>17</sup>Akul, azlaməna gay ləv gulo, avika akul gay uwana azlaməna matapla aña Sufəl gami Yesu Kristu tapəh à akul à vok à abà dagay uwarà aw.

<sup>18</sup>Tagòdəhə à akul kà la madəv à gay gudəŋ à vok kà, adəgahay la ahəŋ azladza uwana tadəkədaslah azladza uwana tanəfa Zəzagəla. Atà kà, tasəl masla aw, tadəhəŋ kà azlatatak mawisiga uwana asa à ləv añaatà pəra.

<sup>19</sup>Ŋgaha aya kà atà la uwana tatsala mavəhla à waŋ. Atà kà azladza uwana takor gəl añaatà, atà la Masasədok Zəzagəla aw.

<sup>20</sup>Ama akul kà, akul azlaməna gay ləv gulo kà, wədfaw vok à uda la ndzəda, zlakəw vok kà akul à akul, akul gesina vəw ləv aŋkul kaykay à gay marabəŋ uwana katsənəwwəŋ. Zəzagəla la gəl aña apəhakulla, dəvəhəw kudā à ndzəda aña Masasədok Zəzagəla.

<sup>21</sup>Dzəw à ahəŋ la dziriga la abà, ŋgaha sələw kà Zəzagəla awoya akul, fəw madzugway aŋkul kà à kaslā uwana afik, Sufəl Yesu adəpəhla ala, vok ahaməl aña uwana ala kà anu, ŋgaha avà à anu sifa uwana adəv à gay aw.

<sup>22</sup>Gàw la vok mahamay kà azladza uwana ləv aṅatà matasləla gə aw.

<sup>23</sup>Bàyàw azladza anik à akàl la gay ala. Kà aṅa azladza anik aya kà, gəw la vok mahamay. Hòyàw atà à ahàl kà tsakana aṅatà, amiyaka bà lukut aṅatà uwana tadaw à vok kà madàhla tsakana la vok kà, kadəbawni aw.

<sup>24</sup>Məzləba Zəzagəla, uwana masla la maslay kà manəṅla akul kà tetəvi aṅa maz à akul à adi aw. Adazəb akul à kəl ala tsakana, uwana kadàhàwwəṅ gesina, ṅgaha adàtsizl akul à huma aṅha, kadànəṅaw mazləbay aṅha, kadàhənwla la marabay.

<sup>25</sup>Məzləbà Zəzagəla la gəl aṅha, asləl à wəṅ Sufəl gami Yesu Kristu kà masla aṅa mabəl anu. Mazləbay agay la masla, azladza gesina tatataslla ahàl. Masla la uwana məṅ Sufəl gami, maslay aṅha adza à ahəṅ aṅa tsərəh à awtày. Kiya uwaga dagay madzəka ṅgaha tsərəh à lakana, ṅgaha aṅa tsərəh à awtày bay. Amen.

## Mafətala

### Mafətala 1

<sup>1</sup>Aganay uwana Yesu Kristu afətàla à azlamayà aṅa Zəzagəla la kəl ala. "Iyay, fətàlla ama ala Zəzagəla", agòdàl, kà atà aṅa masəlay uwana adàpaka vok la huma la gay. Kà uwaga Yesu Kristu aslèl à waṅ malika aṅha à slaka mayà aṅha Yuhana, kà mapəhalla azlatatak uwaga.

<sup>2</sup>Kiya uwaga Yuhana azàṅ la huma azladza gesina uwana anəṅàṅ, agòd la magədəṅ à afik, ndzer uwaga kà gay aṅa Zəzagəla, ṅgaha babay kà baməraka Yesu kà agədāṅ à afik, kà uwaga kà dziriga.

<sup>3</sup>Mapis gay à vok agay la azladza, uwana tadzeṅ wakità uwanay la huma azladza la kuda zləkkà, azlagay uwanay kà atsà à waṅ kà la paṅaw aṅa Zəzagəla la awtày, kà aṅa azladza uwana tatsəb sləm à azlagay uwanay, ṅgaha takəs kà, Zəzagəla adàpis à atà gay à vok. Hadāy kà, kaslā uwana azlatatak uwanay adàpaka vok kà, adāgay nekwa nekwa.

<sup>4</sup>Gi Yuhana, la uwana gətsetser à akul wakità, 'Ayyi' gəgod à akul, akul maham à ahəṅ mənə gay Zəzagəla slaslaka mədəf, uwaga la kutso aṅa Asəya la abà. Zəzagəla apisakulla gay à vok, ṅgaha adzala akul à ahəṅ la lapiya la abà. Masla uwana agà la sifa dagay uwarà, mok uwana gudəṅ à vok gesina la ahəṅ dadāṅ aw, ṅgaha lakana aga la ahəṅ la sifa aya, ṅgaha adàsa à waṅ à gudəṅ à vok. Azlamasasədok mədəf tapis à akul gay à vok, ṅgaha tadzala akul à ahəṅ la lapiya la abà. Azlamasasədok mədəf uwaga tadza à ahəṅ la huma kursi aṅa Zəzagəla, tapis à akul gay à vok.

<sup>5</sup>Yesu Kristu masla sayda dziriga, apis à akul gay à vok la mav à akul lapiya. Masla la uwana teraṅa aṅa mawul à uda la tataka azlamazimnekid la abà, ṅgaha masla Sufəl aṅa azlasufəl aṅa gudəṅ à vok gesina. Yesu uwaga awoya anu, aməts kà aṅami, kikay kà aṅiz aṅha, ndzəda aṅa tsakana lakəl gami aya aw, atəfà anu.

<sup>6</sup>Masla mapakanula kà tsəhay aṅha, kà uwana masla Sufəl gà gà. Masla adəfahəṅ kiya uwanay, kà anu aṅa magay azlaməna makad tatak babay, kà mazlak Zəzagəla Baba aṅha, dza atəm à ahəṅ aṅa mazləbay aw, zləbàw masla gesina. Maslay atsa à waṅ kà la slaka aṅha koksikoksi. Amen.

<sup>7</sup>Nəṅàwwàṅ aganay atsa à ahəṅ la habaga la abà. Yewdi aṅa azladza gesina adənəṅəṅ baməraka azlauwana tatsàh la atsəkad babay. Azladza gesina tadàtsah hulolo, kà uwana guba adàza atà, kà uwana taweskà masla. Ndzer. Amen.

<sup>8</sup>Sufəl Zəzagəla agòd: 'Gi la uwana Alfa, ṅgaha gi la uwana Omega.' (Uwana asal magodāy kà: Gi la uwana gi matera aṅa tatak gesina, ṅgaha gi la uwana makəd gəl à ahəṅ aṅa tatak gesina aya) Masla la maslay gesina la ahəl. Aga la sifa dagay uwarà, mok uwana gudəṅ à vok la ahəṅ dadāṅ aw, lakana aga la ahəṅ la sifa, ṅgaha adàsa à waṅ à gudəṅ à vok hadāy.

<sup>9</sup>Gi Yuhana, deda aṅkul la uwana gətsetser wakità uwanay. Anina gesina gami mədahama gay à vok la Yesu la abà. Kiya uwaga məhama à ṅgərpa uwaga à abà,

ngaha à makoray aṅha, uwana à abà mēbasanḡ gami. Kà aṅha gulo tekeḡdika tadùw à matēkukurùh uwana à afik, la tataka dērēv la abà, uwana slēm aṅha Patmos, kà uwana gēpēh gay Zēzagēla la magēḡḡē à afik kà Yesu la uwana dziriga, gēgòḡ.

<sup>10</sup>La vuḡ ladu anik Masasēḡòk Zēzagēla akēs gi, ḡgaha gētsēnāḡ kuda la lig gulo la ndzēḡā, bokuba matsēnay aṅha mazlazliḡ.

<sup>11</sup>Uwana agòḡ: "Uwana kanēḡāḡ la uwana katsetser à wakità à abà, slāl à slaka maham à ahēḡ mēna gay Zēzagēla slaslaka mēḡḡēf uwana la Efesus, la Sēmirna, la Pergam, la Tiyatir, la Sardēs, la Filadelfiya, ḡgaha la Lawodikiya", agòḡ à gi.

<sup>12</sup>Mok uwana gētsēnāḡ, kiya uwaga gēgolà vok kà manēḡēḡ dza uwana avāts à gi gay uwaga, ḡgaha gēnēḡāḡ fēnēs slaslaka mēḡḡēf uwana madēhēhēḡḡa la luwàluwà.

<sup>13</sup>La tataka aṅatà la abà gēnēḡāḡ maḡtsa à vok aṅha dza babay. Masla la lukut zinjzḡḡa la vok, tsērāh à ḡḡagāḡḡa, mawad vok ala gā la gay lēv la gabaga luwàluwà.

<sup>14</sup>Aḡidz aṅha kà, mēḡēkuga sayya, bokuba slewzi. Yewdi aṅha awutsēḡḡay bokuba alāh akāl.

<sup>15</sup>Asik aṅha wutswawuts bokuba ada vērzeganiḡa, uwana taf akāl à abà, kuda aṅha kalkal la mahohumay aṅha iyaw uwana la mukwà la afik.

<sup>16</sup>Tsetsiliḡ mēḡḡēf la ahāl kaf aṅha, katsakar mazuwayḡa gay sēla nna, asà à waḡ la gay aṅha la awtāy. Huḡ adi aṅha ḡērāzì à adi bokuba afats aṅha tataka afats.

<sup>17</sup>Kay, mok uwana gēnēḡāḡ, gēḡēḡ à makēla asik aṅha bokuba gi mamētsay gā. Ama la lig la ahēḡ abēk gi ahāl kaf aṅha à gēl, agòḡ à gi: "Guba akēs ka aw. Gi uwana gēḡa la ahēḡ dagay uwarà, ḡgaha gi uwana gēḡḡḡay la ahēḡ aya.

<sup>18</sup>Gi, gi uwana la sifa. Gēmēts ama gēḡza à ahēḡ la sifa aṅha tsērāh à awtāy. Gi la ndzēḡā lakēl aṅha mamētsay, ḡgaha gi la tsēkurēm aṅha slaka uwana azlamazimnekid tadza à ahēḡ aya.

<sup>19</sup>Kiya uwaga kà uwana kanēḡāḡ lagonay la uwana adāpaka vok bawbaw gesina kà: Tsetsēr!

<sup>20</sup>ḡḡaha lakēl aṅha azlatsetsiliḡ mēḡḡēf uwana kanēḡāḡ la ahāl kaf gulo, ḡgaha la azlafēnēs mēḡḡēf uwana madēhēḡ gā la luwàluwà kà, gēpēhakalla godeḡa aṅha azlatatak uwaga. Godeḡa aṅha azlatsetsiliḡ mēḡḡēf kà apēhla ala azlamalika mēḡḡēf uwana Zēzagēla abēk atà à azlaskaka mēḡḡēf aṅha maham à ahēḡ mēna gay Zēzagēla. Azlafēnēs mēḡḡēf uwanay apēhla ala azlamaham à ahēḡ mēna gay Zēzagēla uwatà aya pēra", masla agòḡ.

## Mafətala 2

<sup>1</sup>Yesu agòḡ: "Tsetsēr gay uwanay à malika, uwana anēḡla mēna maḡiḡal gēl à vok la Efesus. Aganay gay aṅha dza uwana la tsetsiliḡ mēḡḡēf la ahāl kaf aṅha, akēsiniḡ, ḡgaha uwana auguzahay la tataka aṅha azlafēnēs mēḡḡēf uwaga la abà.

<sup>2</sup>Gəsəl sləray aṅak uwana kadahàn gesina, kabasàn ṅərpa uwaga. Kavà tetəvi à azlaməna makəsafər aṅa matapakala azlatatak aw. Azladza uwana tagod̄ay: 'Anu azlaməna masləl anu à waṅ gə aṅa Yesu', tagod̄, teked̄ika azlaaṅulo aw, gür atà, kabəza atà à tsəh kà azlaməna fida.

<sup>3</sup>Kà gi à uwana kabasàn ṅərpa, ṅaha kasakawal à tsəh ala aw.

<sup>4</sup>Ama gi la gay lakəl aṅak, kà uwana kawoya gi bokuba uwana uwarà aya aw.

<sup>5</sup>Dzùgw slaka uwana katəd̄ à ahəṅ, pèh gay la ləv ala, dzà à ahəṅ aya bokuba madz à ahəṅ aṅak uwana uwarà, tsa baṅa kiya uwaga aw, kà gədàda à awtày, ṅaha gədàwula fənəs aṅak à tsəh.

<sup>6</sup>Ama la ahəl anik kadàhà delga, kà uwana kakweskà uwana azla Nikolayya tadəhəṅ bokuba uwana gəkweskà suwaṅ.

<sup>7</sup>Kəla dza uwana sləm lakəl, atsəb sləm à uwana Masasəd̄ok Zəzagəla apəhay à maham à ahəṅ mənə gay Zəzagəla. Azlauwana taguwà à uda la abà la makəd̄aslay kiya uwanay, gədàvə à atà tetəvi kà mazuw mayyay aṅa ahəf uwana la gày aləl aṅa Zəzagəla la abà uwana avà sifa à azladza", Yesu agod̄.

<sup>8</sup>Yesu agod̄ aya: "Bà gotənaṅ tsetsər gay uwanay à malika uwana anəṅla azlaməna madiṅal gəl à vok la Səmirna. Aganay gay aṅa dza uwana agà la ahəṅ dagay uwarà, ṅaha masla adàgay la ahəṅ aya. Aməts, ṅaha awulà à uda la mamətsay.

<sup>9</sup>Gəsəl matərəbay uwana katərəbay, gəsəl kà kak masla kudà aṅa gudəṅ à vok. Ama la slaka gulo kà kak gorobu. Gəsəl mawisiga uwana azladza tapèh à kak à vok babay. Mənə mapəh à ka uwaga à vok kà: 'Anu azla Yahudiya', tagod̄. Ama tsa, azla Yahudiya kà aṅa gay gə pəra, maham à ahəṅ aṅatà kà aṅa seteni.

<sup>10</sup>Guba akəs ka, kà ṅərpa uwana kadàsay la huma aw. Səl kà, seteni adàdaw azlaanik aṅkul à daṅay la tataka aṅkul la abà kà magur akul, ṅərpa uwaga kà kadàsaw aṅa mahənaṅ kulo. Baməraka tafa akul makits à kuda babay, kabasawwaṅ pəra. Kiya uwaga gədàvə à akul sifa adəv à gay aw, bokuba masik aṅkul.

<sup>11</sup>Kəla dza uwana la sləm lakəl, atsəb sləm à uwana Masasəd̄ok Zəzagəla apəhay à maham à ahəṅ mənə gay Zəzagləa, azlauwana taguwà à uda la abà, la makəd̄aslay, kiya uwanay mamətsay masəla adətəd̄ atà à gəl aya aw", Kristu agod̄.

<sup>12</sup>Yesu agod̄ aya: "Bà gotənaṅ tsetsər gay uwanay à malika uwana anəṅla azlaməna madiṅal gəl à vok la Pergam. Aganay gay aṅa dza uwana akor katsakar mazuwayga, gay səla nna.

<sup>13</sup>Gəsəl gudəṅ uwana kadza à ahəṅ la abà, uwaga makoray aṅa seteni. Ama la kaslā uwana azladza takəd̄ magamza gulo dziriga gə Antipas kà, kabəd̄la gay aw, kawaslàhà gi à ahəṅ la madiṅal gəl à vok la abà, takəd̄ masla à gudəṅ aṅkul à abà, kay kà, kak kadàh sayda gulo la dazuwaya, kà gi Sufəl aṅak.

- 14**Gəfahà à ka akur à lig babay. Ama azlatatak anik la ahəŋ la tataka aŋak la abà uwana asà à atà manəf matapla aŋa Balam, uwana atapla à Balak uwana apapàtla azla Isərayel, kà mapad azlasləb matulay, ŋgaha kà atà aŋa madāh mabila aya babay.
- 15**Kiya uwaga babay azlaanik la tataka aŋak la abà, tadəhəhəŋ bokuba azlauwana tanəfa matapla aŋa azla Nikolayya.
- 16**Tsa baŋa kità kà, pəh gay la ləv ala. Awkà, gədà à awtày à slaka aŋak, gəp guvəl la azladza uwaga la katsakar uwana atsa à waŋ la gay gulo la awtày.
- 17**Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ mənə gay Zəzagəla. La azlauwana taguwà à uda la abà la makədāslay, kiya uwaga gədātsəkla kaf, uwana asà à ahəŋ la zagəla uwana azladza tasəl aw. Gədāvəha à atà babay akur medəkuga uwana matsetseral sləm mawga à vok gə. Dza la ahəŋ asəl sləm uwatà aw, say dza uwana abəzal uwaga pəra", Yesu agòd.
- 18**Yesu agòd aya: "Bà gotənaŋ tsetsər gay uwanay à malika uwana anəŋla azlaməna madiŋal gəl à vok la Tiyatir. Aganay gay aŋa Kona aŋa Zəzagəla. Yewdi aŋha kà awutsədāy bokuba aləh akəl, azlaasik aŋha tawutsədāy wutswawuts bokuba ada vərzeganiga.
- 19**Gəsəl uwana kadəhəŋ. Gəsəl kà kawoya azladedə aŋak, ŋgaha la mad à huma à gay, uwana kadiŋ gi gəl à vok, ŋgaha la mabasiŋ aŋak la sləray la abà, ŋgaha la masal aŋak aya. Gəsəl kà uwana kadəhəŋ la uwaga kà, dādūwa la uwana kadāhəŋ uwarà.
- 20**Ama gi la gay lakəl aŋak: Mis uwaga la tataka aŋkul, sləm aŋha Yezabel kà, avavara ka aw. Masla agodāh kà: 'Gi masla mapəhal gay ahəl aŋa Zəzagəla', agod, ŋgaha kavəl tetəvi kà madz à ahəŋ la slaka aŋak aw. Masla la uwaga atapla fida à azlamayà gulo, kà atà aŋa masokw à mabila à abà, la mapadāh sləb matulay.
- 21**Gədəkədəval kaslā à ahəŋ, kà masla aŋa mapəh gay la ləv ala; ama adà à huma à gay kà la madāh mabila aŋha pəra.
- 22**Kiya uwaga kà, gədāməlal gəl à kəslah à afik la dūvats, adāsa ŋgərpa. Azlaməna matsatsəlāh vok atà nna tadāsa ŋgərpa babay, say baŋa atà tapəh gay la ləv ala, ŋgaha la masakal à tsəh ala sləray aŋa mis uwaga gesina bay aya.
- 23**Ŋgaha aya bay kà, kəla dza uwana abəzal masik aŋa sləray aŋha, uwana adāhəŋ. Gədəkad azlabəza aŋha, kà maham à ahəŋ mənə gay Zəzagəla aŋa masəlay, kà gi la uwana gənərəz madzugway aresl aŋa azladza, ŋgaha la uwana tatuwal à tsəh gesina.
- 24**Lakəl aŋa azlauwana la gudəŋ Tiyatir uwana tanəfa matapla aŋa mis uwanay aw, tasəl uwana azladza tazalalla godega nasiri aŋa seteni aw. Gay la ahəŋ lakəl aŋatà aw.
- 25**Ama gədawaŋ à afik kà, say uwana gətəpakulla pəra, tsərəh à kaslā uwana gədəwul à waŋ.
- 26**Azlauwana taguwà à uda la abà la makədāslay, ŋgaha uwana takəs gay gulo tsərəh à makəd gəl à ahəŋ, kiya uwaga gədəpakatāla kà azlasufəl lakəl aŋa azlatsəhay gesina uwana tasəl gi aw.



<sup>27</sup>Masley uwana gədàvà à atà kà, uwana Baba gulo avà à gi babay. Tadàgahay azlasufəl dzaṅdzaṅga, azlaməna madàh mawisiga kà tadàdzamahatàla bokuba dza uwana adəf masak à gəl dōhdoh.

<sup>28</sup>A azladza uwaga gədàvà à atà aya ṅuzla bebəṅ.

<sup>29</sup>Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahəṅ məna gay Zəzagəla", Sufəl gami agòd.

### Mafətala 3

<sup>1</sup>Yesu agòd aya: "Aya gotənaṅ tsetsèr gay uwanay à malika uwana anəṅla məna madiṅal gəl à vok la Sardəs. Aganay gay aṅa dza uwana la Masasəfok Zəzagəla mədəf, ṅgaha la tsetsiliṅ mədəf la ahəl bay. Gəsəl madəhəṅ aṅak, ṅgaha azladza tadzugway kà: 'Kak la sifa', tagòd, tsa kak mamətsayga.

<sup>2</sup>Tsənàla, wàd vok à uda, tsa baṅa kiya uwaga aw, kadàmətsay tsokwfasl, kà uwana gənəṅṅ sləray aṅak kà adàhenla la yewdi aṅa Zəzagəla dadəṅ aw.

<sup>3</sup>Iyay awula à kak à gəl, uwana katàpla uwarà, la uwana kadà à abà, kapəh gay la ləv ala, ṅgaha kakəs gay gulo. Baṅa katsənla aw kà, gədàda à awtày la gurùh, la kokudà masəlay aṅak bokuba masla à gəl.

<sup>4</sup>Ama tekedika azlaanik la ahəṅ la slaka aṅkul la Sardəs, uwana tadàh àläh à lukut aṅatà à vok aw, bokuba magodəy azlasətaka la ləv aṅatà la tsəh. Atà azladza uwaga kà, tadàduw à vok lukut medəkuga, anina mədàday la slaka gà, kà uwana azlayla atà.

<sup>5</sup>Azlawana taguwà à uda la abà la makədəslay kiya uwanay, gədàtsokwah atà à lukut medəkuga à abà, gədàwis sləm aṅatà ala la wakità aṅa sifa la abà tetuw aw, la mok uwana gədàgay la huma aṅa Baba gulo la azlamalika aṅha. La dazuwaya gədàpəhay kà, azladza uwanay kà gədàgodəy ndzer kà: Azlaaṅulo.

<sup>6</sup>Kəla dza uwana sləm lakəl, atsəb sləm à uwana Masasəfok Zəzagəla apəhay à maham à ahəṅ məna gay Zəzagəla", Yesu agòd.

<sup>7</sup>Yesu agòd aya: "Aya bə gotənaṅ tsetsèr gay uwanay à malika uwana anəṅla məna madiṅal gəl à vok la Filadelfiya. Aganay gay aṅa dza uwana asa à waṅ la slaka Zəzagəla, ṅgaha masla dziriga. Tsəkurəm aṅa madla à makoray aṅa sufəl David la ahəl aṅha. Baṅa gi gədapəzl gamagày, dza aslala vok aṅa matsakalla à ama aya aw, ṅgaha aya, baṅa gi gədatsak à gamagày à ama dza aslala vok aṅa mapəzllay aya aw.

<sup>8</sup>Gəsəl madəhəṅ aṅak. Gəsəl kà kak la ahəṅ la ndzəfà aw. Tekedika kakəs gi gay la ahəl ala la dazuwaya, kà kak aṅulo. Nəṅṅ gədàpəzl gamagày kà kak, dza la ahəṅ aslala vok kà matsakal à ama aw.

<sup>9</sup>Tsəbal sləm aganay uwana gədàdèhəṅ la maham à ahəṅ dza aṅa seteni: 'Anu azla Yahudiya', tagòd, tsa azla Yahudiya kà aṅa gay gà pəra. Gədàbay atà à waṅ, kà atà makədəf à ka à ahəṅ. Kiya uwaga tadəsəlay kà gəwoya ka.

- 10** Kak kafà sləm à gay gulo! Kabasaŋ, kà uwaga gi babay gədàfa à ka sləm, kà kak aŋa madàdiya à matərəbay uwana à abà, adàsiya azladza gudəŋ à vok à gəl gesina aw.
- 11** La katskats gədàwula à waŋ. Tsizllàw à afik la makəsəŋ uwana kabəzal, kà dza aŋa mazəb masik aŋa maduwiŋ aŋak aw.
- 12** Azlauwana taguwà à uda la abà la makədàslay kiya uwanay kà, gədàbək atà à ahəŋ, bokuba azlamaŋuləv la gày aŋa Zəzagəla gulo la aku. Tatak la ahəŋ adàkudək atà la uda aya aw. Gi, gədətsetser à atà sləm aŋa Zəzagəla gulo à vok, la sləm aŋa gudəŋ aŋa Zəzagəla gulo, gudəŋ uwaga kà Urusalima mawga, uwana Zəzagəla adàsləl à ahəŋ la zagəla. Gi la gəl gulo gədətsetser sləm gulo mawga à azladza uwaga à vok babay.
- 13** Kəla dza uwana sləm la kəl, atsəb sləm à uwana Masasədok Zəzagəla apəhay à maham à ahəŋ mənə gay Zəzagəla", agòd.
- 14** Yesu agòd aya: "Bà gotənaŋ aya, tsetsər gay uwanay à malika uwana anəŋla mənə madiŋal gəl à vok la Lawodikiya. Aganay gay aŋa dza uwana sləm aŋha: Amen. Masla sayda dziriga, fida atsa à waŋ la gay aŋha aw. La ahəl aŋha la uwana Zəzagəla adàhà tatak gesina.
- 15** Gəsəl sləray aŋak: Uwala kak iyaw akəl akəl magay aw, uwala kak iyaw matesl gə aw. Düləm kaga tekula aŋatà.
- 16** Ama bokuba uwana kak la tataka gə la abà kiya uwanay kà, gi gədəkəsəl ka à vədàh, puway.
- 17** Gi gorobu, gəkor tatak, gədahama gay à gorobu gulo à vok, gənəkudà aŋa tatak aya aw!', kagòd. Tsa tekedika, kak masla kudà uwana vok ahamay, kak la diga, kokudà lukut, kak guləf bay.
- 18** Dəv gi kudà, kà gi aŋa matab à ka gay à ahəŋ, sùkw luwàluwà mawutsədàyga la slaka gulo, kà kak aŋa magay gorobu. Sùkw babay lukut medəkuga, kà kak aŋa matsokw à abà, ŋgaha kà kak aŋa mahadla ziruwi aŋak à ahəŋ. Bà gotənaŋ sùkw aya yohof yewdi la slaka gulo, kadəb à adi, kà kak aŋa manəŋla lela.
- 19** Haday ndzer kà, baŋa gəwoya dza kà, bà masla la uwana gəslahala vok, ŋgaha gətsetsehəŋla. Tsa baŋa kiya uwanay kà, pəh gay la ləv ala, kapaka bokuba iyaw matesl gə aw.
- 20** Tsəbal sləm, gi la uwaga gədatsizl à gay gamagày gəzalahay. Dza uwana atsəna mazalahay gulo, apəzl gi gamagày, gədàda à gày à slaka aŋha, ŋgaha mədàzuw tatak may anu səla.
- 21** Azlauwana tadəguwa à uda la abà la makədàslay, kiya uwanay gədàvə à atà tetəvi kà mas à waŋ aŋa madàdzah madzay la kursi gulo la afik, bokuba uwana gəguwa à uda la abà la makədàslay, ŋgaha gədàmadzay la Baba gulo la kursi aŋha la afik.
- 22** Kəla dza uwana sləm lakəl, atsəb sləm à uwana Masasədok Zəzagəla apəhay à maham à ahəŋ mənə gay Zəzagəla", Sufəl Yesu agòd.

## Mafətala 4

<sup>1</sup>Mok uwana gay uwanay akèd gəl à ahəŋ, la lig la ahəŋ, gənəŋəŋ aya gamagày mapəzl vok gə la zagəla. Gətsənà kuda aŋa dza uwana avàts à gi gay uwarà aya, kuda uwaga la uwana atsən bokuba matsəŋay aŋa mazlazliŋ. Dza uwatà agòd à gi: "Sà à afik à abanay, kà gi aŋa mapəhakala uwana adàsa à waŋ la huma la gay."

<sup>2</sup>Katskats Masasədòk Zəzagəla akəs gi, ŋgaha gənəŋà kursi Sufəl la zagəla la afik, dza ndzədəffa la afik.

<sup>3</sup>Mahədəy aya aŋa dza uwatà la afik aw. Huf adi aŋha kà awutsədəy, bokuba akur kuyah kuyahga, uwana tazalalla yaspe atà la saruwan, kursi uwatà makəsəl gay à adi gə la agəla makozakoz dikəts, azlaagəla makozakoz uwatà tawutsədəy bokuba azlaakur uwaga babay.

<sup>4</sup>Kursi anik dzik səla gəl aŋha ufađ uwatà la afik azlamadzahaga tadzəh madzay la afik dikəts tatsòkwəh kà azlalukut medəkuga à abà, garamusa aga atà lakəl, azlagaramusa uwatà kà madəhəŋ ga la luwəluwə.

<sup>5</sup>La kursi sufəl uwatà la afik la tataka la abà kà, mawutsədəy la masläh məlo aŋa habaga asà à uda la abà aya. Aga la ahəŋ la abatà babay azlaakəl mavats à ahəŋ gə mədəf taudəy la huma kursi. Azlaakəl mavats à ahəŋ gə mədəf uwaga kà, apəhla ala kà azla Masasədòk mədəf uwana tadza à ahəŋ la huma Zəzagəla.

<sup>6</sup>Tatak anik la ahəŋ la huma kursi aya, masla aga bokuba takenədəka uwana dzəraŋ dzadzəraŋ. Aga la ahəŋ azlatatak ufađ uwana taduw kursi à tataka à abà. Atà la sifa, huma la lig aŋatà kà bà yewdi, yewdi gesina.

<sup>7</sup>Maftsa vok aŋa matera kà bokuba sikalaveri, masəla kà bokuba kokur kaslaga, mamakər kà, huf adi aŋha kà bokuba dza, ŋgaha maufađ, kà zulo uwana ahoyay kagodəy.

<sup>8</sup>Atà ufađ nna kà, atà la gogozläh mukwa mukwa. Vok gesina kà, bà yewdi, yewdi tsatsabasla hudga la uda gə, takəs gay kà mahabay aw. Vəđ la afats bà mahamay tahabay. Tagòd: 'Kak Sufəl Zəzagəla, kak la maslay gesina tsikasla, kak tekula. Kak la ahəŋ la sifa à mok uwana gudəŋ à vok la ahəŋ dadəŋ aw. Lakana kak la ahəŋ la sifa aya, ŋgaha kadàsa à waŋ à gudəŋ à vok.'

<sup>9</sup>Kiya uwaga azlatatak ufađ uwaga la sifa tahaba à dza madza madzayga uwaga la kursi Sufəl la afik, masla uwana adzà à ahəŋ aŋa tsərəh à awtəy, mazləbay, la maslay, la kikay agay la masla.

<sup>10</sup>Bà kəla uwana tadəhəŋ kiya uwaga kà, azlamadzahaga dzik səla gəl aŋha ufađ uwaga kà, takədəđ à ahəŋ la huma Zəzagəla, uwana madza madzayga la kursi Sufəl la afik, ŋgaha masla uwana la sifa aŋa koksikoksi, atà tazləba masla, tahaläh garamusa lakəl ala, tabakəh à vədəh la huma aŋha.

<sup>11</sup>Tagòd: 'Hadəy, kak Sufəl Zəzagəla gami. Kak uwana kadəhà tatak gesina, kà uwana asà à ka, à uwana kadəhà à atà, ŋgaha atà la ahəŋ lagwa. Ka uwaga à uwana, kaslā kà,

kəla uwabeyuwi aŋa mazləb ka, la masləkaw ka, ŋgaha la makəs mapəhay aŋak babay.'

## Mafətala 5

<sup>1</sup>Ŋgaha gənəŋà wakità makəlbaga la ahəl aŋa dza uwatà la kursi Sufəl la afik. Masla adakəsay la ahəl kaf. Wakità uwatà matseseray gə gay səla nna. Madəhalla masəlay à vok gə slaslaka mədəf, kà dza aŋa mapəzlay aw.

<sup>2</sup>La lig la ahəŋ gənəŋà məŋ malika uwana anavà la kuda zləkkà: "Uwa à uwana azlayla kà mafətal masəlay uwanay la vok ala uwa? Ŋgaha mapəzlay wakità uwanay uwa?", agòd.

<sup>3</sup>Dza la ahəŋ azlayla aw, adəgay dza uwana la vədəh adəgay la zagəla, adəgay la tsəh iyaw, adəguwaŋ mali bay kà, taslala vok aŋa mapəzl wakità uwanay, ŋgaha aŋa manərəz huđ aŋha aw.

<sup>4</sup>Kà uwana dza la ahəŋ azlayla aŋa mapəzlay, à kà manərəz huđ gə gə aw, gətùw mənğa, kà uwatà.

<sup>5</sup>Kiya uwaga tekula la tataka azlamadzahaga uwaga la abà agòd à gi: "Katuw aw, aganay dza uwana bokuba sikalaveri, uwana asa à uda la tsəhay aŋa Yahuda la abà, masla mayyi à tsəh ala aŋa sufəl David, masla akədàslla tatak gesina la maduwəŋ. Masla adəfətalla vok ala masəlay uwaga, ŋgaha adəpəlz wakità uwaga", agòd à gi.

<sup>6</sup>La mapəh uwaga la gay ala kà, gənəŋà dza la slaka matsizlla ala dzawwa la tataka azlakursi la abà. Azlamadzahaga la azlatatak ufađ uwaga la sifa, takəsalla gay à adi. Maftsa à vok aŋha kà bokuba magadzaw, la yewdi gulo kà bokuba takədəy uwarà. Dzadzukwa dərəw mədəf lakəl, ŋgaha yewdi mədəf la vok babay. Azlayewdi uwaga kà azla Masasəfok mədəf uwana tadza à ahəŋ la huma Zəzagəla, uwana Zəzagəla aslala atà gesina à gudəŋ à vok.

<sup>7</sup>Kiya uwaga magadzaw uwaga azà à vok à awtəy, azəb wakità la ahəl kaf aŋa masla madza madzayga uwaga, la kursi Sufəl la afik.

<sup>8</sup>Mok uwana adazəbay kà, azlatatak ufađ uwaga la sifa, ŋgaha la azlamadzahaga dzik səla gəl aŋha ufađ uwaga takədèd à ahəŋ gesina aŋatà, ŋiziŋ agà atà la ahəl gesina, kəla uwabeyuwi aŋatà azlatasà dewni la ahəl aŋatà, mahənlaga la kidzidzi. Uwaga apəhla ala kà madəv kudà aŋa azlaməna gay Zəzagəla.

<sup>9</sup>Atà tahəb mahabay mawga. Tagòd: 'Kak azlayla kà aŋa mazəb wakità uwanay aŋa mapəzlay, kà uwana takəd ka, ŋgaha kapəzl gəl à azladza à ahəŋ. La aŋiz gəl aŋak kà awùlla atà à slaka Zəzagəla. Azladza uwaga tasà à uda la azlatsəhay la azlagay anik anik gesina. Ŋgaha tasà à waŋ la makəd gəl à ahəŋ gudəŋ à vok gesina.

<sup>10</sup>Kak kapəkətàla, kà azlatsəhay aŋak, kà uwana kak, Sufəl gə gə. Kadəhəŋ kiya uwanay, kà mapəkətàla kà azlaməna makəd tatak à Zəzagəla gami. Atà tadəgay azlasufəl, lakəl aŋa azladza gudəŋ à vok.'

<sup>11</sup>La lig la ahəŋ gəŋəŋà azlamalika aŋuvaw, uwana dza aslala vok aŋa matugway aw. Tanudà kursi à abà la azlatatak ufaɗ uwaga, ŋgaha la azlamadzahaga uwaga gesina dikòts. Kiya uwaga gətsənà mahabay aŋatà.

<sup>12</sup>Tahàb la kuda zləkkà à magadzaw uwana takədɗ kà aŋa matulay: 'Ndzer, masla azlayla kà mazəɓay la slaka azladza maslay, La gorobu, la matsihila, la ndzəɗa, La mazləɓay, la masləkəway, ŋgaha la kikay gesina la ahàl aŋha. Kay nəŋàwwàŋ məŋga aŋha tsi!' tagòɗ.

<sup>13</sup>La lig la ahəŋ aya gotənaŋ dèwdèw tatak uwana Zəzagəla adàhàŋ kà, tahàb mahabay azlauwana la zagəla, azlauwana la gudəŋ la vok, azlauwana la tsəh iyaw, ŋgaha la azlauwana la iyaw la abà, gesina aŋatà tahàb mahabay tekula: 'Məzləɓa dza uwana la kursi la afik, ŋgaha la uwana maftsa à vok aŋa magadzaw uwana tadàhla matulay məsləkaw atà. Maslay gesina atsa à waŋ kà la atà la ahàl. Mətatasl atà à ahàl aŋa koksikoksi.'

<sup>14</sup>Mok uwana tahabay kiya uwanay azlatatak ufaɗ uwaga tagòɗ: "Amen", ŋgaha azlamadzahaga uwaga takədèd à azlauwana à ahəŋ la kursi la afik, ŋgaha tasləkàw atà aya.

## Mafətala 6

<sup>1</sup>Mok uwana magadzaw azəɓ wakità masəlay mədəf uwaga à ahàl, kiya uwaga gəŋəŋà adzəkà mapəzl masəlay matera. Mok uwana adafətalla à ama ala, matera aŋa azlatatak ufaɗ uwaga la sifa agòɗ: "Sà à waŋ", matsənaŋ aŋa kuda aŋha bokuba habaga.

<sup>2</sup>Kiya uwaga gəŋəŋà pəlis medəkuga asà à uda. La pəlis uwatà la afik kà, dza la afik alək la ahàl, tavəl garamusa. Ahàd la makəɗaslay kà mats à atà à ahəŋ.

<sup>3</sup>Magadzaw afətà à masəlay masəla la ama ala. Gətsənà masəla aŋa azlatatak ufaɗ uwaga la sifa agòɗ aya: "Sà à waŋ."

<sup>4</sup>Ŋgaha pəlis anik asà à uda aya mativga vikuza. Dza uwana la afik aya kà, masla masəlla guvəl à gudəŋ à vok, kà azladza aŋa makad vok kà à atà kà atà. Tavəl magol katsakar à ahàl.

<sup>5</sup>Ŋgaha aya magadzaw afətà masəlay mamakər la ama ala, ŋgaha gətsənà mamakər aŋa azlatatak ufaɗ uwaga la sifa agòɗ: "Sà à waŋ." Gəŋərəz, ŋgaha gəŋəŋà pəlis marsiga, dza uwana la afik kà daram la ahàl.

<sup>6</sup>Gətsənəŋ tatak anik atsən la tataka azlatatak ufaɗ uwaga la abà la sifa, bokuba kuda aŋa dza. Masla agòɗ: "Sili aŋa sləray mavakay tekula aŋa dza kà asukway pəra kà hi tsergi nagoda tekula pəra, ama mərəkala kà, nagoda makər." Agòɗ à dza aŋa pəlis aya: "Kà aŋa aməl la iyaw aŋa matavərək maməsliga kà, tadza à ahəŋ kiya uwanay", agòɗal.

<sup>7</sup>Ŋgaha magadzaw afətà masəlay maufaɗ la ama ala, ŋgaha gətsənəŋ maufaɗ aŋa azlatatak uwaga la abà la sifa, agòɗ: "Sà à waŋ."

<sup>8</sup>Gənərəz à awtày, ɲgaha gənəɲaɲà pəlis uwana kuforuh ruhga. Dza uwana la afik kà, sləm aɲha kà: Mamətsay, ɲgaha mezewi anəfay la tsəh. Tavà à atà ndzəɗà kà aɲa makad à gay tekula aɲa maufad, aɲa gudəɲ à vok à gay. Tadəkadàh atà la katsakar, la may, azladza anik tadàmatsah à dɹuvats à abà ɲgaha azlatatak fəta tadəkadàh azladza anik aya.

<sup>9</sup>Kiya uwaga magadzaw afətà à masəlay mazlo la ama ala. ɲgaha gənəɲà azlamasasəfok aɲa azlamamatsay la slaka uwana takadàh tatak à Zəzagəla. Takad azladza uwaga, kà uwana tazà gay Zəzagəla, ɲgaha kà uwana tagəd à gay aɲa Yesu à afik.

<sup>10</sup>Mok uwana gənəɲà atà tawiyà la kuda zləkkà, tagəd: "Sufəl, kak tsikasla, kak dziriga. Azladza uwaga la vədàh, la gudəɲ la vok takad anu, ma mana kadəhəɲ aɲa madàh à atà seriya à gəl ma, ɲgaha kà seriya aɲa matəd atà à gel suwaɲ ma?"

<sup>11</sup>ɲgaha tatsòkwàh atà à lukut medəkuga à abà, tagəd à atà: "Basàwwàɲ ɲuv aya, say takad azladedà aɲkul, uwana tanəfa Zəzagəla, bokuba uwana takad akul dadàɲ. Baɲa takad atà bokuba uwana Zəzagəla agəd kà pəra, seriya adəgay la ahəɲ."

<sup>12</sup>ɲgaha aya magadzaw afətà masəlay maməkwa uwatà la ama ala. Gənəɲà kutso abəlakà à vok, afats apakà marsiga. Ama təla kà apakà mativga vikuza bokuba aɲiz.

<sup>13</sup>Azlatsetsiliɲ tasòkw à ahəɲ la zagəla bokuba mayyay ahəf ɲuwazlaga, uwana magol kular asakwəɲ à ahəɲ.

<sup>14</sup>Zagəla azalà tuwiz, bokuba uwana takəl tatak à abà. Azlagudəɲ uwana iyaw akàs atà à gay à adi tazàhla. Azlagudəɲ gesina tabədàhà vok la slaka aɲatà la abà.

<sup>15</sup>Kiya uwaga azladza gudəɲ à vok gesina tahədàhà vok à gudəɲ à afik, ɲgaha tahədàhà vok à azlatsakur uwana à agu la tataka azladzəgəla la abà. Azlamayà la azlauwana azlamayà aw gesina tahəy kà mahadàh vok à ahəɲ. Amiyaka azlasufəl, la azlamadzahaga, la azlaməɲga aɲa azlaslodzi, la azlagorobu, la azlauwana sləm aɲatà atsən ala, gesina aɲatà tahəd kà mahad vok à ahəɲ.

<sup>16</sup>Atà tadàvə kudà à azlagudəɲ la azladzəgəla: "Fətəkàw anu à gəl, kamkam, tsakàw anu à ama, kà dza uwana la kursi la afik aɲa manəɲ anu aw, ɲgaha kà magadzaw aɲa madukw à anu seriya à gəl aw!"

<sup>17</sup>Iyay, mavakay aɲa məɲ mapak ləv aɲha kà adaslay. Uwa à uwana aslay aɲa matəfal à gay ala uwa? Dza la ahəɲ aslay aw", tagəd.

## Mafətala 7

<sup>1</sup>Kiya uwaga la lig aɲa uwaga la ahəɲ aya, gənəɲà azlamalika ufad tatsizlla ala la gay tər gudəɲ ufad kà makəs azlakular ufad aɲatà à ahəɲ, uwana tadəɗay, kà atà aɲa madəɗay à gudəɲ à abà aw kà mawis kutso amiyaka iyaw ɲgaha la azlaahəf ala aw.

<sup>2</sup>Gənəɲà malika anik uwana asà à waɲ la mas à afik afats, tatak madàh masəlay à azladza à madəgay aɲa Zəzagəla, uwana la sifa, la ahəl. Azalà azlamalika ufad uwaga

à tsəh azlauwana Zəzagəla, avà à atà ndzəda kà mawis gudəŋ à vok ala, ŋgaha la iyaw ala.

<sup>3</sup>Agòd à atà: "Kawisaw kutso, iyaw, ŋgaha la azlaahàf ala dadàŋ aw. Kùdàw tsərəh à uwana anu mənàh masəlay aŋa Zəzagəla à madəgay aŋa azladza aŋha dadàŋ."

<sup>4</sup>Kiya uwaga la lig la ahəŋ atà tapəh à gi matugway aŋa azladza uwana tanahà à atà masəlay uwaga à madəgay. Tagà dəbow dzim bəzi aŋha dzik ufaɖ, gəl aŋha ufaɖ. Azladza uwanay kà mayyi à tsəh ala aŋa azlatsəhay Isərayel gesina.

<sup>5</sup>Aga la ahəŋ dəbow kulo gəl aŋha səla mayyi à tsəh ala aŋa Yahuda, dəbow kulo gəl aŋha səla la mayyi à tsəh ala aŋa Ruben, dəbow kulo gəl aŋha səla la mayyi à tsəh ala aŋa Gad.

<sup>6</sup>Dəbow kulo gəl aŋha səla la mayyi à tsəh ala aŋa Asər, dəbow kulo gel aŋha səla la mayyi à tsəh ala aŋa Neftali, dəbow kulo gəl aŋha səla la mayyi à tsəh ala aŋa Manase.

<sup>7</sup>Dəbow kulo gəl aŋha səla la mayyi à tsəh ala aŋa Səmeyyon, dəbow kulo gəl aŋha səla la mayyi à tsəh ala aŋa Levi, dəbow kulo gəl aŋha səla la mayyi à tsəh ala aŋa Isakar.

<sup>8</sup>Dəbow kulo gəl aŋha səla la mayyi à tsəh ala aŋa Zabulon, dəbow kulo gəl aŋha səla la mayyi à tsəh ala aŋa Yusufu, ŋgaha dəbow kulo gəl aŋha səla la mayyi à tsəh ala aŋa Benyamin bay. Azladza uwaga gesina taga la masəlay aŋa Zəzagəla la vok aŋatà.

<sup>9</sup>La lig aŋa uwaga la ahəŋ, gənəŋà maham à ahəŋ dza aŋuvaw, dza aslala vok aŋa matugway aw. Azladza uwaga tasà à uda la azlatsəhay, la azlagay, ŋgaha tasà à waŋ la makad gəl à ahəŋ gudəŋ à vok gesina. Tatsizilla à ahəŋ la huma kursi, ŋgaha la huma aŋa magadzaw, tatsòkwàh lukut medekuga à abà, ŋgaha la azlababasl la ahəl aŋatà kà mazləbɓla.

<sup>10</sup>Tawiyà la kuda zləkkà: "Zəzagəla uwanay la kursi la afik atà la magadzaw la uwana tatəfà anu", tagòd.

<sup>11</sup>Azlamalika gesina tatsàzl à makəla kursi, ŋgaha à makəla aŋa azlamadzahaga, ŋgaha à azlatatak ufaɖ uwatà la sifa. Atà takədèdàh à huma kursi, la makas gəl à vɔɖah, ŋgaha tasləkàw Zəzagəla,

<sup>12</sup>la magoɖay: "Haday gà, mazləbay, la matsihila, la kikay gami, la masləkaway, la ndzəda, la makoray gesina taga la ahəl aŋha. Azlauwaga kà Zəzagəla gami akoray aŋa tsərəh à awtày. Amen!"

<sup>13</sup>Tekula aŋa azlamadzahaga dzik səla gəl aŋha ufaɖ uwaga agòd à gi: "Kasəl azladza uwaga tatsòkwàh lukut medekuga à abà ay? Tasà à waŋ à ama la?"

<sup>14</sup>Gəgòɖal: "Kak, la uwana kasəl mənɔga, gi kà, gəsəl aw." Agòd à gi: "Azlauwanay kà, azlauwana tasà ŋgərpa mənɔga, uwana aduwa ndzəda aŋatà la makad gəl à ahəŋ. Tadza à ahəŋ la dziriga la abà. Atà tapalàh lukut aŋatà kuzekaka la aŋiz aŋa magadzaw la abà.

<sup>15</sup>Kà uwaga à uwana tatsizlla à huma kursi aña Zəzagəla, tazləb masla la mənə gày aña la aku, mavakay la mahənay, dza uwaga la kursi la afik adəhuəb atà à gəl.

<sup>16</sup>Kà may aña maz atà à aya aw, nəlay aña makəs à atà babay aya aw. Marabak aña maslərnəhatàla aya aw, tatak anik la ahənə adəvəf à atà la maz à atà aya aw. Kà mana ma?

<sup>17</sup>Kà uwana magadzaw, uwana la tataka aņatà la kursi la afik adəgay masla manəņla atà. Adədəhla atà à gay aña iyaw aña sifa uwana akəlay. La kità aya, Zəzagəla adəslasladəh atà iyaw tugwi la adi ala."

## Mafətala 8

<sup>1</sup>Bà gotənaņ magadzaw afətà masəlay mamədəf la ama ala, uwana agà makəd' gəl à ahənə. Mok uwana adafətal la ama ala, tatak gesina la zagəla 'Məslək', tagod' aw, tadzà à ahənə titi tsərəh à tenma aña sa.

<sup>2</sup>Ŋgaha la lig aña madz à ahənə titi la ahənə, gənəņà azlamalika mədəf uwana tatsəzl à ahənə la huma Zəzagəla, tabəzəl mazlazliņ mədəf la slaka aña.

<sup>3</sup>La abatà aya, malika anik asà à waņ la slaka makad' tatak la abà, la ahəl aña daram madəhənə gà la luwəluwà, tavəl kidzidzi aņuvaw, kà masla aña mabəkay, la slaka makad' tatak luwəluwà gà uwatà la afik, la huma Zəzagəla, ŋgaha la mavəy la slaka gà azlamadəv kudà aña məna madiņal gəl à vok.

<sup>4</sup>Kəsək aña kidzidzi uwana aduwal à akəl à tsəh, asà à malika uwatà la ahəl ala dzedzika la huma Zəzagəla, ŋgaha la madəv kudà aña azladza aña, uwaga adəl à sləm à agu aya.

<sup>5</sup>Mok uwana malika adadəhənə kiya uwanay, azəb daram uwaga ahənəņ ala la slaslay akəl la slaka makad' tatak la abà, ŋgaha adùw à vədəh. Uwaga masləh məlo aña habaga atsən azlamawutsədəy tawutsədəh, ŋgaha kiya uwaga kutso abəlakà vok.

<sup>6</sup>La lig la ahənə, azlamalika mədəf uwana mazlazliņ agəhà à atà la ahəl tadəhà vok à ahənə kà aña matsay.

<sup>7</sup>Malika matera atsà mazlazliņ aña, matsatsay iyaw, la akəl mahohodəlaga la aņiz asùw à vədəh. Kiya uwaga tekula aña mamakər aña gudəņ à vok ababəh à gay, la azlaahəf la azlakəsaf aña gesina, dənna.

<sup>8</sup>Malika masəla atsa mazlazliņ aña aya. Azəb mənə tatak anik, bokuba mənə gudəņ dzəgərha, akəl ababəhay la afik. Atsəl gəl à magol dərəv à abà, ŋgaha tekula aña mamakər aña iyaw apakà aņiz.

<sup>9</sup>Azlatatak uwana la iyaw uwaga la abà gesina, taməts à gay hənats; azlakəslah iyaw tawis ala gesina babay.

<sup>10</sup>Kiya uwaga aya, malika mamakər atsà mazlazliņ aña. Magol tsetsiliņ mənəga abəd' à vok la zagəla, uwana ababəhay bokuba akəl atəd' à azlamukwà à tsəh la azlazləlok.



<sup>11</sup>Tsetsiliṅ malika asta mazlaliṅ e uwatà kà sləm aṅha kà vəzlmadiya. Tekula aṅa mamakər aṅa iyaw uwatà, apakà dēhakak, mok uwana azladza tas iyaw uwatà, aṅuvaw la tataka aṅatà la abà tamàts, kà iyaw uwatà.

<sup>12</sup>Bà gotənaṅ aya, malika maufad atsà mazlazliṅ aṅha. Mok uwana adatsay, tekula aṅa mamakər aṅa afats, ṅgaha la təla apakà marsiga tsiktsetsik. Ḍgaha tekula aṅa mamakər aṅa azlatsetsiliṅ apakà marsiga babay. Kiya uwaga taùd aya aw. Tekula aṅa mamakər aṅa mavakay aṅa afats atəf à zagəla, ṅgaha tekula aṅa mamakər mahənaṅ vəd aṅa təla atəf à zagəla bay.

<sup>13</sup>La kità aya, gəṅəṅà zulo uwana ahoyay la ləv zagəla la abà la magodəy: "Kayyà, kayyà, ṅgərpa adəgay la azladza uwana la vədah. A baṅa mazlazliṅ aṅa azlamalika makər uwanay adàtsənaṅ, ndzer", agòd.

## Mafətala 9

<sup>1</sup>Kiya uwaga aya gotənaṅ malika mazlo atsà mazlazliṅ aṅha aya, gəṅəṅà tsetsiliṅ uwana atəd à ahəṅ la zagəla. Tavàl tsəkurəm kà mapəzlla afək zəṅzəṅga kà mələs tuwisl la abà.

<sup>2</sup>Mok uwana tsetsiliṅ uwaga apəzl afək uwaga, dəhut, kəsək asà à uda la abà bokuba kəsək aṅa matəl tatak. Kəsək uwatà atsək afats à ama tabadamma akəl mələs.

<sup>3</sup>Dəmdadəm dawanagay asà à uda la kəsək uwaga la abà, taslèhà gəl à gudəṅ à vok. Tavà à atà ndzəda kalkal la aṅa aliz.

<sup>4</sup>Ḍgaha tagòd à atà kà: "Pàdāw azlakəsaf, la azlaahəf uwana atsà à uda la kutso la abà aw, ama dāw kà mawisəṅla kà azladza gudəṅ à vok ala pəra, azlauwana kokudā masəlay aṅa Zəzagəla la madəgay aṅatà", tagòd à atà.

<sup>5</sup>Tavà à atà tetəvi kà aṅa makad azladza aw, ama pəra kà: "Katərəbaw atà", tagòd atà, tatərəb atà kà aṅa təla zlo, azlamazay uwaga kalkal la mazay aṅa aliz.

<sup>6</sup>La təla zlo uwatà, azladza tayəh mamətsay ama tabəzəl aw. "Sà à waṅ, sà à waṅ", tagòd à mamətsay, ama mamətsay ahòy atà à ahəl.

<sup>7</sup>Nəṅəw azladawnagay gə uwana tadəbàni à vok la azlapəlis aṅa guvəl, tapakà tatagà à gəl, bokuba garamusa aṅa luwəluwə. Hud adi aṅatà kà kalkal la hud adi aṅa azladza.

<sup>8</sup>Ḍgaha aṅidz aṅatà kà bokuba aṅidz aṅa azlamis, slid aṅatà kà kiya aṅa sikalaveri.

<sup>9</sup>Tawədaḥ slarapay aṅa ada à makəla aṅatà, ṅgaha mahohumay aṅa azlagogozlāh aṅatà kà, kalkal la mahohumay aṅa azladərkwa uwana azlapəlis tabiyəṅ, kà mad à guvəl aya.

<sup>10</sup>Gudaz aṅatà godam la gay, bokuba aṅa azlaaliz, gudaz aṅatà uwaga la uwana avà à atà ndzəda kà mamalla azladza tsərah à təla zlo.

<sup>11</sup>Məṅga aṅatà kà masla la uwana akoray lakəl aṅa afək zəṅzəṅga uwaga, sləm aṅha la gay ibəranəṅkowen kà Abaddon, ṅgaha la gay gərək kà Apollyon (Uwana asal magodəy: masla makalāh tatak à ahəṅ)

<sup>12</sup>Kiya uwanay à uwana, ñgërpa matera adà à lig. Aganay azlanjërpa sèla tazlanjalay aya zlà.

<sup>13</sup>Kiya uwaga malika maməkwa atsà mazlazliñ aña, gətsənəñ kuda, atsən la gay ndzika ufađ aña slaka makad tatak, uwana madehəñ gə la luwəluwə la huma Zəzagəla.

<sup>14</sup>Kuda uwaga agòđ à masla mats mazlazliñ uwaga la ahəl à ahəl: "Pàlla azlamalika ufađ uwaga ala, uwana tawəđəh atà à ahəñ la gay məñ mukwə uwana tazalalla Efərat."

<sup>15</sup>La abatà kà, tapəlla atà ala. Zəzagəla adəhà atà à ahəñ la mavay uwanay la abà, la təla uwanay la tsəh, la mavakay uwanay, ñgaha la sa uwanay, kà takad tekula aña mamakər aña azladza gesina. Kà aña uwaga à uwana: "Pàlla atà ala", kuda agòđ à malika uwaga.

<sup>16</sup>La abatà aya tapəhgəla maham à ahəñ aña azladza uwana tahəd à pəlis guvəl à afik, "Million dadərmokw səla", tagòđ à gi.

<sup>17</sup>Kiya uwaga à uwana gənəñà la mafətala la ama ala uwaga la abà. Gənəñà azlapəlis uwaga, ñgaha azlaməna madəh à afik. Tawəđəh vok ala la azlaslarapay aña guvəl mativga bokuba akəl, azlaanik makur zagəla kurzagəla, azlaanik mazaybəzi zaybəzi. Akəl kəsək ñgaha huleli tasà à afik la mañula añaatà dzedzika. Gəl aña azlapəlis añaatà kà, bokuba gəl aña azlasikalaveri.

<sup>18</sup>Akəl, kəsək ñgaha huleli la uwana tagə azlanjërpa makər uwana tasà à uda la mañula aña azlatatak mapəlis pəlis gə uwaga, takad tekula aña mamakər aña azladza à gay.

<sup>19</sup>Kiya uwaga la mañula kuda añaatà la ahəñ, la uwana ndzəđa atsà à afik, ñgaha aya gudaz añaatà kà bokuba gəl bebi, kà matsəhla azladza.

<sup>20</sup>Ama kà matəm à ahəñ aña azladza uwana tamatsəh à ñgërpa uwaga ahəl aw, tasakà à madehəñ añaatà la tsəh ala aw, tadà à huma à gay la makədedəhəy à azlamasasəđok à ahəñ, ñgaha la masləkawəh à azlafəla, uwana tadəhəhəñ la luwəluwə, la gursu, la ada vərəganiga, la azlaakur, ñgaha la azlaahəf. Tekedika azlafəla uwaga kà, tatak la ahəñ tadəhəñ aw, taslala vok kà aña manəñla aw, tatsən sləm aw, ñgaha taday bay aw.

<sup>21</sup>Azladza uwaga tadà à huma à gay la makad dza babay, tasakəl à tsəh ala aw. Tayəhəhə azlaahəf anik anik, ñgaha tadəhəhə mabila la mad à gəl gesina. Tetuw, tetuw ləv avəl à atà à gay kà mawul à lig aw.

## Mafətala 10

<sup>1</sup>Kiya uwaga la lig la ahəñ, gənəñəñ magol malika anik, atsà à ahəñ la zagəla, lukut aña uwana la vok kà habaga, mafafad gəl à uda gə la gəla makoz akoz, huđ adi aña kà awutsəđay bokuba afats. Asik aña kà bokuba aləh aña akəl.

<sup>2</sup>La ahəl aña malika uwaga, bəzi wakità mapəzlay gə la ahəl. Adùw asik ahəl kaf aña à dərəv à gəl, asik ahəl gudzay kà afa à kutso à abà.

- <sup>3</sup>Abadmà la kuda zləkkà, bokuba mawiyay aṅa sikalaveri uwana atawahay. Mok uwana abadmà, gətsənà maslèh mēlo mēdēf aṅa habaga awulàlla.
- <sup>4</sup>Ama mok uwana habaga aslèh mēlo mēdēf, gəwoyà matsetser uwana tapèh, ama gətsənà kuda anik asà à ahəṅ la zagəla agòd à gi: "Kəsàṅ kà aṅak pəra, à uwana habaga apèh, awkà katsetser aw", agòd à gi.
- <sup>5</sup>Kiya uwaga malika uwana afà asik anik à dərəv à gəl, ṅgaha anik à kutso à abà, adzilà ahàl kaf aṅha à zagəla.
- <sup>6</sup>Masla azùw mawadāy la sləm aṅa Zəzagəla uwana adəv à gay aw, à masla uwana adāhà zagəla, ṅgaha la azlatatak uwana la afik gesina, adāhà kutso la azlatatak uwana la abà gesina, ṅgaha adāhà iyaw aya la azlatatak uwana la iyaw la abà gesina aya gotənaṅ.
- <sup>7</sup>Agòd aya: "Baṅa mazlazliṅ aṅa malika mamədēf adàtsənay, Zəzagəla adàhənəṅ ala madzugway aṅa nasiri aṅha, say tatak uwaga gesina kà apakà vok la katskats, bokuba uwaga Zəzagəla apèh à azlaməna mapèh à atà gay à ahàl kà mapəh à azladza."
- <sup>8</sup>Ḷḡgaha kuda uwana gətsənəṅ dagay la zagəla, agòd à gi aya: "Hàd, zèb wakità mapəzlay gà uwaga la ahàl aṅa malika, uwaga asik tekula la dərəv lakəl, ṅgaha asik anik la kutso la abà", agòd à gi.
- <sup>9</sup>Kiya uwaga, gəhàd à slaka malika, gəgòdāl: "Và à gi bəzi wakità uwanay." Masla agòd à gi: "Pàd, adàgay namnam la gay aṅak, bokuba zuway mazuway, ama baṅa kadadugw à gay ala kà, adàgay dēhakak la huđ aṅak", agòd à gi.
- <sup>10</sup>Ḷḡgaha gəzèb wakità uwaga la ahàl aṅha, gəpàd. Ndzer, agà namnam la gay gulo bokuba zuway mazuway hadāy. Ama mok uwana gədadugw à gay ala kà, dēhakak, hadāy.
- <sup>11</sup>Tagòd à gi aya kà: "Say kaz paṅaw aṅa Zəzagəla uwana apèh lakəl aṅa azladza uwana tasà à uda la azlatsəhay la azlagay anik anik gesina, uwana tasà à waṅ la makəd gəl à ahəṅ gudəṅ à vok gesina, ṅgaha la azlasufəl aṅatà", tagòd à gi.

## Mafətala 11

- <sup>1</sup>Kiya uwaga aya, tavà à gi golakay, bokuba azəva magurla tatak, tagòd à gi: "Hàd, gùr gày Zəzagəla, ṅgaha slaka makad tatak aya. Tùgw azladza uwana tadəv kuđà à Zəzagəla la aku babay aya", agòd à gi.
- <sup>2</sup>"Ama kagur lig gà aw, sàkal kità", agòd à gi. "Kà uwana masla kà gəvə à azladza uwana azla Yahudiya aw. Atà tadàhaba à ahəṅ ala gudəṅ aṅa Zəzagəla tsikaslaga, tsərəh à təla dzik ufad gəl aṅha səla.
- <sup>3</sup>La lig la ahəṅ gədàsləl azlaməna sayda gulo səla à awtày", agòd. "Uwana tadàtsokwah à lukut kuđà à abà, ṅgaha atà tadàza gay gulo à azladza la kaslà uwatà tsərəh à mavakay dəbow la dadərmokw səla bəzi aṅha dzik mukwà", kiya uwaga agòd à gi.

<sup>4</sup>Azlaməna sayda səla uwaga kà atà səla nna, tatsizlla à ahəŋ la huma Sufəl Zəzagəla uwana akor gudəŋ à vok. Atà azlaahàf səla uwana tazala atà ala kuvu. Gotənaŋ azlafənəs səla aya babay.

<sup>5</sup>Baŋa dza asal madàh à atà mawisiga à vok kà, akàl atsa à waŋ la gay aŋatà la awtày, ŋgaha ababəh atà à gay. Kiya uwaga tadàkad' atà azlauwana tayàh madàh à atà mawisiga à vok.

<sup>6</sup>La kità, la mok uwana tadàzah sayda kà, atà la maslay kà matsakay à zagəla à ama, kà iyaw aŋa manəf à ahəŋ aw. Gotənaŋ, atà la maslay aŋa mapak iyaw ala kà aŋiz, ŋgaha atà la maslay kà aŋa mav azlaŋgərpa anik anik à azladza gudəŋ à vok, bokuba uwana asa atà bay.

<sup>7</sup>Ŋgaha mok uwana tadàdəv maz gay aŋatà à gay, tatak fəta asa à uda la afək zəŋzəŋga la abà, akəs atà la guvəl, aduwa atà, ŋgaha akad' atà.

<sup>8</sup>Kiya uwaga azlavok aŋatà kà, tadàdza à ahəŋ la tetəvi aŋa məŋ huf gudəŋ la slaka uwana tatəsl Sufəl aŋatà à ahàf à adi uwarà. Gudəŋ uwatà tazalalla la gay zil kà Sodom baŋaw Misəra, kà uwana azlagudəŋ uwaga tadàhàhà mabila, takəs gay aŋa Zəzagəla aw.

<sup>9</sup>Haday, azladza uwaga tasà à uda la azlatsəhay aŋa azlagay, ŋgaha tasà à waŋ la makad' gəl à ahəŋ gudəŋ à vok gesina. Atà tadənərez mazimnekid', mavakay makər la tenma, tadàvə tetəvi kà mal atà aw. Kà uwana tagòd' kà: "Atà səla nna, tawisà gudəŋ à vok ala", tagod'.

<sup>10</sup>Kiya uwaga azladza gudəŋ à vok tadàbak agər à abà, kà uwana takad' azladza səla uwaga. Atà tadàhabahah azlamadevaday la mavàhay azlatatak deyday babay. Kà uwana azladza səla uwaga tasàh zladà à azladza gudəŋ. (La maz gay Zəzagəla uwana tazàhàŋ)

<sup>11</sup>Iyay, mok uwana mavakay makər uwaga la tenma adada à lig, Zəzagəla afəta atà afad' à gəl kà mawulla atà ala sifa, ŋgaha hahadzək, tatsazlla ala. Azladza uwaga la abatà gesina guba akəs à atà.

<sup>12</sup>Mok uwana tatsizlla, tatsəna kuda atsəna à ahəŋ la zagəla, agod' à atà: "Sàw à afik à abanay!" Kiya uwaga tada à afik la habaga la abà, la yewdi aŋa azlaməna məzam aŋatà.

<sup>13</sup>La mok uwatà kutso abəlaka vok məŋga, tsəràh à uwana tenma aŋa makulo aŋa gudəŋ uwatà azala tetuwa. Mabəlaka vok aŋa kutso uwaga kà, azaŋ ala dza dəbow mədəf, matəm à ahəŋ aŋa azladza uwaga kà, guba akəs atà məŋga. La vud' uwaga tanəŋa məŋga aŋa Zəzagəla, tasləkaw.

<sup>14</sup>Kiya uwanay à uwana ŋgərpa masəla uwanay ada à lig. Ama haŋkəli, aganay mamakər uwana azlaŋalay aya gotənaŋ zlà.

<sup>15</sup>Kiya uwaga malika mamədəf atsà mazlazliŋ, azlakuda tatsənà à ahəŋ la zagəla, ŋgaha tagòd': "Sufəl Zəzagəla gami la masla uwana mafal dzakwa à gəl gà kà: Gudəŋ à vok adagay la ahəl aŋatà kà makoray. Makoray aŋatà adànats à gay ala aw."

<sup>16</sup>Mok uwana takèd gəl à uwaga, azlamadzahaga dzik səla gəl aṅha ufaɗ uwana tadzàhà madzay la kursi la afik, la huma Zəzagəla takàsà gəl à ahəṅ la huma aṅha, tazlòbà,

<sup>17</sup>tagòd: "Haday, Sufəl, kak uwana kaga la ahəṅ la sifa dagay uwarà. Dgaha kak la ahəṅ la sifa lakana aya. Kikay məgod à ka, kà uwana tatak gesina adada à ka à ahəl, kagay la kəl gə gesina.

<sup>18</sup>Kiya uwaga azladza uwana tasəl kak aw, atà tapakà ləv lakəl aṅak. Ama la uwaga kà, sà aṅak adaslay kà kak aṅa mapak ləv lakəl aṅatà suwaṅ. Kaslà adaslay à uwana kadàh seriya à azlamamatsay à gəl. Dgaha aya kaslà adaslay à uwana kavà masik à azlamayà aṅak, uwana kapəh à atà gay à ahəl aṅa mapàh à azladza. Kak kadavà masik à azlatsəhay aṅak gesina, azlaməṅga, bə amiyaka bə la azlabəza gə bay. Azlauwana takəs gay aṅak gesina, kadavà à atà masik. Ama kà aṅa azlauwana tawis gudəṅ ala kà, kaslà adaslay à uwana kak aṅa madàzahatàla suwaṅ!",fa tagòd.

<sup>19</sup>Mok uwana tadəv uwaga à gay gesina, gəy aṅa Zəzagəla apəzlla vok la zagəla, tsəràh à uwana azladza tanəṅà sahar makəs vok slawda apokwà vok la paraka. Azlamawutsəday tawutsəɗàh bəzlabəzəl, habaga aslèh məlo, kutso abəlakà vok, ṅgaha matsatsay iyaw anis à ahəṅ aṅuvaw.

## Mafətala 12

<sup>1</sup>Kiya uwaga məṅ nadzipo apəhla vok ala la zagəla. Aganay nadzipo uwaga: Mis tekula uwana adatsokw afats à abà bokuba lukut, abək asik aṅha kà à təla à afik, nalbət aṅha babay kà, taga kà azlatsetsiliṅ kulo gəl aṅha səla, bokuba garamusa aṅa sufəl.

<sup>2</sup>Mis uwaga aga la bəzi la huɗ, azlāsokw à ahəṅ, ṅgaha aga la mabas vok la abà, awiyay kà mazəṅ aṅha.

<sup>3</sup>Ama nadzipo anik apəhla vok ala la zagəla aya. Tatagà məṅga gə bokuba kudu, ṅgaha mativga, uwana akor gəl mədəf, ṅgaha dərəw kulo kulo la kəla gəl gesina la garamusa.

<sup>4</sup>Tatagà uwaga kà la gudaz. Gudaz aṅha kà abəd tssetsiliṅ tenma aṅa mamakər aṅa zagəla à ahəṅ, ṅgaha awits atà à vəɗàh. Tatagà uwatà atsizlla à ahəṅ la huma aṅa mis uwaga, asəl masokw à ahəṅ, kà masla aṅa mapila à gay, à baṅa adasokw à ahəṅ.

<sup>5</sup>Mis ayyà bəzi zilga, uwana adənəṅla tsəhay gesina la agəla ada. Mok uwana adayyay, tazəb bəzi uwaga katskats, tadàlla à slaka Zəzagəla uwana la kursi la afik.

<sup>6</sup>Ama mis kà ahəy à kəsaf à abà, la slaka uwana Zəzagəla adàhàllàn à ahəṅ. Masla adzadzaray la abatà tsəràh à mavakay dəbow la dadərmokw səla bəzi aṅha dzik mukwa.

<sup>7</sup>La lig la ahəṅ gənəṅà à zagəla kà guvəl adadzəka à vok. Misel ṅgaha la azlaməna aṅha tapa guvəl la tatagà uwaga la azlamalika aṅha.

<sup>8</sup>La abatà Misel la azlamalika aṅha tafuwà atà, kiya uwaga slaka abəzà à vok kà tatagà la azlaaṅha aṅa madz à ahəṅ la zagəla aya aw,

<sup>9</sup>aga maduw à vəḏəh gà. Tatagà mənḡa uwaga, la uwana maviya bebi, masla uwana azahà azladza gudəṅ à vok gesina ala, sləm aṅha kà, baba aṅa mawisiga, sləm aṅha anik aya kà seteni. Tadùw à vəḏəh, masla la azlamalika aṅha gesina.

<sup>10</sup>Ḑgaha la lig la ahəṅ, gətsənà kuda atsən à ahəṅ la zagəla agòḏ: "Lagonay kà mazləbay aṅa Zəzagəla kà, adapaka vok, lagonay kà, Zəzagəla adapəhla makoray aṅha ala. Lagwa Kristu adapəhla maslay aṅa ndzəḏa aṅha ala, kà uwana masla məzam gami, uwana atsəzlàh à huma Zəzagəla, uwana apapàtəh azladedda gami, kà matəh à atà kaf à gəl mavakay la mahəṅay gesina kà, taməl à uda la zagəla.

<sup>11</sup>Azladeda gami tatsà à ahəṅ. Kikay kà aṅiz aṅa magadzaw, ṅgaha kikay kà gay dziriga uwana tazàtəṅ, atà takəs mav sifa aṅatà.

<sup>12</sup>Kà uwaga à uwana, takudək seteni à ahəṅ la zagəla. Ḑgaha akul, azladza uwana la afik, rabàw! Ama kà aṅkul gudəṅ à vok la azladərev aya, ṅgərpə la akul, kà uwana seteni kà tadaməl à slaka aṅkul la vəḏəh. Apakà ləv, kà uwana asəl kà kaslà aṅha kà atəm à ahəṅ kà ṅuv pəra."

<sup>13</sup>Mok uwana tatagà uwaga asəl kà taməl à vəḏəh kà, adzəkà manəf mis uwaga la tsəh, ayyà bəzi zilga.

<sup>14</sup>Atà tavà gogozlāh à mis, kalkal la aṅa zulo mənḡa gà, kà aṅa mahoyay à huma ala katskats la uwaga, à slaka aṅha uwana à abà Zəzagəla adədzadzarayla à abatà. Mavay makər la tenma adədzə à ahəṅ la abatà, kà bebi uwaga aṅa makəsəy aw.

<sup>15</sup>La kiya uwaga, bebi adəhəṅ dabaray la mavəlāh iyaw à vəḏəh kà iyaw aṅa manəf mis la tsəh aṅa mazəb mis.

<sup>16</sup>Ama kutso azlāk mis, apəslāk ala, asà iyaw uwana à gay, asà à uda la hud aṅa tatagà uwaga.

<sup>17</sup>Kiya uwaga tatagà uwaga abəzà à mis à tsəh aw, vədzəgəlāh agolà vok aṅa maday aṅa map guvəl la azlamayyi à tsəh ala aṅa mis uwaga. Azlamayyi à tsəh ala aṅha uwaga kà, azlauwana takəs gay Zəzagəla, ṅgaha atà uwana tanəfà dziriga aṅa Yesu, uwana apəhatàla.

<sup>18</sup>Kiya uwaga tatagà uwaga ahəd, atsizl à gay dərəv.

## Mafətala 13

<sup>1</sup>Kiya uwaga gənəṅà tatagà anik asà à uda la dərəv la abà, uwana agà la azlagəl dzadzukwa mədəf, ṅgaha la kəla gəl aṅha kà, dərəw kulo kulo la kəl. Kəla dərəw aṅha kà garamusa aṅa sufəl la tsəh. La kəla gəl aṅha la vok babay kà, sləm mawisiga aṅa magodəhay à Zəzagəla la vok.

<sup>2</sup>Tatagà uwatà kà, gənerəz kà, maftsa vok aṅha kà bokuba zimməli, azlaasik aṅha kà bokuba azlaasik aṅa balagoday. Ḑgaha gay aṅha kà bokuba gay aṅa sikalaveri. Abəḏla

tatagà uwaga à slaka aṅha à abà. Tatagà uwana adzà madzay la kursi aṅa kudu la afik, abəzà ndzəda aṅha babay.

<sup>3</sup>Ama gənəṅəṅ kà tekula la tataka azlagəl aṅha la abà kà, bokuba makəday gə uwarà, ṅgaha amik aṅha awùr ala, akès nadzipo à azladza gudəṅ à vok gesina, ṅgaha abiyà atà la uwaga, tanəfà masla.

<sup>4</sup>Kiya uwaga, azladza gesina tasləkàw tatagà uwana avà ndzəda aṅha à tatagà uwaga. Tasləkàw tatagà uwaga babay, la magoday: "Uwa à uwana mənṅa bokuba tatagà uwanay uwa?", tagòd.

<sup>5</sup>Kiya uwaga tatagà uwaga abəzà à tetəvi aṅa mapəh mawisiga à Zəzagəla à vok, abəzà maslay aṅa madəhəṅ kiya uwanay kà, kà aṅa təla dzik ufaḍ gəl aṅha səla pəra.

<sup>6</sup>Tatagà uwaga adzəkà mapəsew slaka aṅha la zagəla, la azlauwana tadzà à ahəṅ la afik, la sləm aṅha, ṅgaha baməraka Zəzagəla la gəl aṅha, apəsəw masla babay.

<sup>7</sup>Masla abəzàl tetəvi aya aṅa map guvəl la azladza aṅa Zəzagəla, ṅgaha la makədasl atà la gudəṅ la vok. Avàl ndzəda aya lakəl aṅa azladza uwana tasà à uda la azlatsəhay la azlagay la abà, ṅgaha tasà à waṅ la makaf gəl à ahəṅ gudəṅ à vok gesina la ahəl aṅha aya.

<sup>8</sup>Azladza gudəṅ à vok gesina tasləkaw tatagà uwaga, bokuba magoday, azladza uwana sləm aṅatà la ahəṅ la wakità aṅa sifa la abà dagay madzəka aw. Say magadzaw uwana takədla, la uwana akor wakità uwaga pəra.

<sup>9</sup>Agòd: "Kanekaw à sləm à ama aw, tsənàw gay uwanay gəpəhay!"

<sup>10</sup>Kiya uwaga agòd: "Dza uwana mokfak aṅa makəs à daṅay la vok, ndzer kà tadəkəs à daṅay, tadəkəday la katsakar aya dza uwana la mokfak aṅa katsakar la vok. Kay, tsa baṅa kiya uwanay kà, ṅuləm azladza aṅa Zəzagəla tabasəṅ la maday à huma à gay la madiṅ gəl à Zəzagəla à vok, kà atà aṅa madz à ahəṅ la adi."

<sup>11</sup>Kiya uwaga gənəṅəṅ tatagà anik asà à lag la kutso la aku. Masla la dərəw səla lakəl, bokuba magadzaw, apəhay kà la kuda uwana agagazläh azladza ala.

<sup>12</sup>Masla adəhla sləray la ndzəda aṅa matera, ṅgaha la masəlay aṅa matera bay. Tatagà masəla uwaga afà leri à azladza gudəṅ à vok à gəl, kà atà aṅa masləkaw matera gə uwaga, à masla uwana la amik mamətsay la vok, awùr ala.

<sup>13</sup>Masəla gə uwaga adəhàhà azlatatak nadzipo mənṅa, azalà akəl à ahəṅ la zagəla la yewdi aṅa azladza gesina.

<sup>14</sup>Masla abəzàl tetəvi kà madəh azlanadzipo la huma aṅa tatagà matera gə uwatà, avavàràhà azladza gudəṅ à vok à bada à abà la magod à atà: "Dàlàw mazlazlay la maftsa vok aṅa tatagà uwaga awurà ala la amik aṅa katsakar la abà, aṅa masləkaw masla."

<sup>15</sup>Kiya uwaga tatagà uwanay apəh, kiya uwaga kà masla mabəzal ndzəda kà mafətay afad sifa à mazlazlay, atà aṅa madzəka mabəfma, atà akad azladza gudəṅ à vok à gay gesina, azlauwana takweska gay aṅha.

<sup>16</sup>Tatagà uwaga afà leri à azladza à gəl gesina, azlabəzaga la azlaməŋga, azlagalepi la azlaməna kuda, azlamayàga ŋgaha la azlauwana takor gəl, kà atà mabəz masəlay la ahəl kaf, baŋaw la madəgay.

<sup>17</sup>Uwaga aŋa mapəhla ala kà: Dza uwana la masəlay uwaga aw, tetəvi la ahəŋ kà aŋha aŋa masukw tatak, amiyaka bà maduw tatak ala aw. Masəlay uwaga kà sləm aŋa tatagà uwaga. Sləm aŋha bay kà kəzlakula.

<sup>18</sup>Lagonay la uwana anu mədāh matsihila, dza uwana la haŋkəli kà aslala vok aŋa masəl godega aŋa gay uwanay tapəh, la matugway aŋa tatagà uwanay la abà, kà uwana matugway uwaga kà, magazləla gə la sləm aŋa dza, matugway uwaga aga kà dadərmokw mukwa, la dzik mukwa gəl aŋha mukwa.

## Mafətala 14

<sup>1</sup>Mok uwana uwaga adada à lig, gənəŋà tatak anik aya. Gənəŋà magadzaw uwana adatsizlla à ahəŋ la gudəŋ uwana la afik, tazalalla Siyon. Masla la azladza uwana masəlay aŋa sləm aŋa Zəzagəla Baba, la aŋa magadzaw aga la atà la madəgay aŋatà. Matugway aŋa azladza uwatà kà taga dəbow dzim bəzi aŋha dzik ufad gəl aŋha ufad.

<sup>2</sup>Dgaha aya gətsənà mahohumay la zagəla, uwana adabani vok la mahohumay aŋa iyaw. Mahohumay aŋha babay kà bokuba mahohumay aŋa habaga, ŋgaha bokuba mahohumay aŋa madəd ŋiziŋ.

<sup>3</sup>Kiya uwaga azladza dəŋ uwaga tatsəzl à huma kursi aŋa Zəzagəla la huma aŋa azlatatak ufad uwana la sifa, ŋgaha la huma azlamadzahaga uwatà. Tahəb mahabay mawga. Tetuwa masla masəl mahab mahabay uwatà la ahəŋ aw. Say atà uwatà Zəzagəla abəl atà pəra.

<sup>4</sup>Azladza uwaga tanəŋla gəl aŋatà la tsikasla la abà, kà uwana tagagaməh la azlamis aw. Atà tanəfà magadzaw la tsəh à kəla slaka uwana adà à abà gesina. Atà uwana mabək atà gə à fəta à awtəy la tataka azladza anik la abà kà aŋa Zəzagəla la magadzaw.

<sup>5</sup>Fida asà à waŋ la gay aŋatà aw, atà sətaka.

<sup>6</sup>Kiya uwaga gənəŋà malika tekula uwana ahoyay la ləv zagəla la abà. Asà à waŋ kà maz gay marabəŋ gə, uwana adàdza à ahəŋ aŋa koksikoksi, adəziŋ à azladza uwaga tasà à uda la azlatsəhay, la azlagay, ŋgaha tasà à waŋ la makad gəl à ahəŋ gudəŋ à vok gesina.

<sup>7</sup>Malika uwaga abadətəmà la kuda zləkkà, agəd à atà: "Hòyàw yewdi kà aŋa Zəzagəla, zləbàw masla kà uwana kaslā uwana adəfah seriya à azladza à gəl kà adaslay. Sləkàwəw masla! A masla uwana adəhəŋ zagəla, la kutso la mukwà, ŋgaha la azlamakakəzay aŋha gesina."

<sup>8</sup>Kiya uwaga aya, malika anik anəfà à tsəh à uwaga à uda la magodəy: "Babila, məŋ huđ gudəŋ adabəzlba, adabəzlba bərəf, tsewwa! Masla atəpla azladza kà madəh



mabila aṅha, kiya uwaga azladza gesina uwaga tabiy mapak ləv aṅa Zəzagəla à gəl aṅatà gesina.”

<sup>9</sup>Kiya uwaga malika mamakər adəvla à tsəh à uda. Uwatà agòd' la kuda zləkkà: "Kəla azlauwana tasləkàw tatagà uwatà asà à uda la iyaw la abà, ṅgaha la maftsa vok aṅa tatagà uwatà, atà la masəlay aṅa tatagà la madəgay, baṅaw la ahəl aṅatà,

<sup>10</sup>atà tadàsa ṅgərpa la ahəl aṅa Zəzagəla. Tetuwa namnamga adəgay la abà dikiḍiki aw. Azladza uwana tadàday à akəl à abà uwana makodà à ahəṅ gə la huleli, kiya uwanay à uwana tadàsa ṅgərpa la huma azlamalika aṅa Zəzagəla, ṅgaha la huma aṅa magadzaw.

<sup>11</sup>Tetuwa kəsək aṅa akəl, uwana adəbabəh azladza uwaga kà, adəkəf gəl aw, kà uwana tasləkàw mazlazlay la azlatatagà uwaga, ṅgaha atà la masəlay aṅha la vok aṅatà. Kiya uwaga atà tadəbəza maduw ləv aw, tadəs ṅgərpa kiya uwanay mavakay la mahəny gesina.”

<sup>12</sup>Kà uwaga akul, uwana kakəsàw gay aṅa Zəzagəla, diṅàw gəl à Yesu à vok, akul uwana kabasàwwəṅ à vok kà uwana akul, akul azladza aṅa Zəzagəla.

<sup>13</sup>La lig aṅha, gətsənà kuda atsən la zagəla, kuda uwaga agòd' à gi: "Tsetsèr uwanay: lakana ṅgaha tsərəh à huma à gay, azlauwana tadinṅ gəl à Sufəl Yesu à vok, ṅgaha tamats à abà, atà la uwana Zəzagəla adəpis à atà gay à vok." "Iyay, kiya uwanay", Masasədok tsikasla awulà à uda: "Sləray aṅatà kà adadəv à gay, taslala vok aṅa maduw ləv adagay, kà uwana mats à gəl aṅa sləray aṅatà kà adəpəhla vok ala la dazuwaya.”

<sup>14</sup>La abatà gənəṅà tatak anik aya. Gənəṅà habaga medəkuga. Tatak anik la habaga uwatà la afik. Agà bokuba maftsa vok aṅa dza, lakəl aṅha garamusa aṅa sufəl lakəl, uwana madəhəṅ gə la luwəluwə. Mavaw mazuwayga la ahəl aṅha aya.

<sup>15</sup>Kiya uwaga malika anik asà à lag la məṅ gəy Zəzagəla la aku, azalà la ndzədà à dza uwana adzà madzay la habaga la afik: "Dahà sləray la mavaw aṅak, tsəf tatak, kà uwana sartà aṅa matsəf tatak kà adaslay, tatak vədəh adahəny kà matsəfay.”

<sup>16</sup>Ḷgaha dza uwana agà la habaga la afik azəb mavaw, atsəf tatak uwana la vədəh, atsəf gesina.

<sup>17</sup>Ḷgaha la abatà gənəṅà malika anik aya, asà à uda la gəy Zəzagəla la aku. Masla babay agà la mavaw mazuwayga la ahəl aya.

<sup>18</sup>Malika anik aya asà à wəṅ kà la slaka makəf tatak. Masla kà mənṅa aṅa akəl, asà à wəṅ aṅa mazalay à malika anik uwana mavaw mazuwayga la ahəl, agòd'al: "Zəb mavaw aṅak, ṅgaha həd, datsəf mayyay tatak la abatà, kà uwana tahəny." (Gudəṅ à vok kà guf)

<sup>19</sup>Kiya uwaga malika azəb mavaw aṅha, ahəd kà matsəf tatak uwaga la guf la abà, ahəd à slaka uwana takuditsəh, afətükw à abà la abatà. Uwaga gesina apəhla ala kà Zəzagəla adapaka ləv mənṅa.

<sup>20</sup>Slaka makuditsay kà la lag gudəŋ la uda. Mok uwana adakuditsay iyaw gà à uda la abà, iyaw gà uwaga kà aŋiz, la uwana asà à uda, uwaga akèl bokuba mukwà kèrkər, ŋgaha makəlay aŋha kà bokuba magur mahodəy pəlis dzim bəzi aŋha dzik zlo, ŋgaha zəŋzəŋ aŋha kà təzləm dza. Kiya uwaga à uwana Zəzagəla adəkəs azladza makəsafərga uwaga la mapak ləv aŋha. Tetuwa adəpaka atà ləv à gəl.

## Mafətala 15

<sup>1</sup>La lig aŋa uwaga la ahəŋ, gənəŋəŋ aya magol nadzipo, maval ləv à dza à gay gà la zagəla. Agà la ahəŋ malika mədəf la ŋgərpa la ahəl aŋatà. Uwanay kà madəvla à tsəh aŋa ŋgərpa, kà uwana uwanay bay kà madəvla à tsəh mapak ləv aŋa Zəzagəla uwana adazinal à gəl.

<sup>2</sup>Kiya uwaga aya gənəŋəŋ tatak anik, uwana bokuba dərəv, uwana awutsədəy bokuba kutərum, uwana la akəl la abà babay. Aya gənəŋəŋ azladza uwana takədəsl à tatagà uwatà, atà la mazlazlay uwana tafətəl afad à vok. Atà takweska masəlay aŋa sləm aŋha. Atà tatsəzlla à ahəŋ la gay dərəv uwaga la ŋiziŋ la ahəl, uwana Zəzagəla avà à atà.

<sup>3</sup>Tahəb mahabay uwana Musa magamza aŋa Zəzagəla uwana ahabəh uwarà, uwaga kà mahabay aŋa magadzaw. Tahəb la magodəy: 'Kak Sufəl Zəzagəla gami uwana kakoray lakəl aŋa tatak gesina, Sləray aŋak uwana kadəhəŋ kà mənŋa, dzəba aŋha səla aw, aduwan gesina. Kak la uwana Sufəl aŋa gudəŋ à vok gesina, Koksikoksi kadəhəŋ kà dziriga, kak dziriga gà.

<sup>4</sup>Hadəy Sufəl, uwana adəhoy yewdi aŋak aw kagod uwa? Uwa à uwana gəzləb kà aw adəgodəy uwa? Dza tsikaslaga, kà kak tekula pəra. Azladza gudəŋ à vok gesina tadəsa à wan à huma aŋak, Kà mazləb ka, kà uwana azladza gesina tanəŋa uwana kadəhəŋ, kà la tetəvi aŋha.'

<sup>5</sup>La lig aŋa uwaga la ahəŋ kà, gənəŋəŋ magol gəy Zəzagəla la zagəla mapəzlla à ama ala gà. Gəy uwatà madəhəŋ gà la lukut, la slaka uwana Zəzagəla agagamahay la azladza.

<sup>6</sup>Gənəŋəŋ azlamalika mədəf uwaga, ŋgərpa agà à atà la ahəl, tasà à lag kà la gəy Zəzagəla la aku, tatsəkwəh lukut medəkuga à abà kuzlatta, tawədəh vok ala la slarapay aŋa luwəluwà.

<sup>7</sup>Kiya uwaga tekula la tataka aŋa azladza ufad uwaga la abà la sifa, avəh à azlamalika mədəf uwaga tasà luwəluwà mədəf. La azlatasà uwatà la abà mapak ləv aŋa Zəzagəla adahən à abà. Zəzagəla gami uwana aga la ahəŋ aŋa koksikoksi, masla la mapak ləv gà lakəl aŋa azladza.

<sup>8</sup>Kəsək atatəkw, ahənəŋ gəy ala. Asà à uda la mazləbəy aŋha la abà ŋgaha la maslay aŋha la abà. Dza aslalə vok aŋa mad à gəy uwatà à agu aw, say ŋgərpa mədəf uwaga la ahəl aŋa azlamalika adəv à gay dən.

## Mafətala 16

- <sup>1</sup>La lig aña uwaga la ahəŋ, gətsənà kuda atsən à lag la gày Zəzagəla la aku. Dza uwatà agòd à azlamalika mədəf uwaga: "Dàw kadàsokwahaw mapak ləv aña Zəzagəla uwana la azlatasà la abà à vədàh. Sòkwàhàw à vədàh mədəf nna!"
- <sup>2</sup>Kiya uwaga malika matera ahəd, asòkw aňha à vədàh. Azlamagol gorodzu uwana azay tapàhla vok ala, la vok aña azladza uwana masəlay aña tatagà uwatà aga à atà la vok, atà uwana tasləkàw mazlazlay.
- <sup>3</sup>Ŋgaha aya malika masəla ahəd, asòkw aňha à dərəv məŋga à abà. Kiya uwaga mukwà uwaga abədla vok à aňiz, bokuba uwana atsà à mazimnekid la vok ala. Azlatatak gesina la iyaw uwaga la abà taməts à gay, hənats.
- <sup>4</sup>Malika mamakər ahəd, asòkw aňha à azlamukwà uwana à tsəh takəlay, ŋgaha la azlauwana takakiz à uda la kutso la abà; ŋgaha atà babay tapakàh kiya aňiz.
- <sup>5</sup>Kiya uwaga gətsənà malika uwana masla məŋga aña iyaw agòd: "Kak, uwana kak tsikasla dagay uwarà, ŋgaha kak la ahəŋ la sifa lakana aya. Kak uwana kak la ahəŋ la sifa, kak masla manats seriya ala la tetəvi aňha,
- <sup>6</sup>kà uwana azladza uwanay kà tatsàh aňiz aña azladza aňak à vədàh, la aña azlaməna mapəh à atà gay à ahəl aňak, lakana kavà à atà aňiz kà atà aña masay, tabəzà uwana azlayla atà abəzal, suwaŋ."
- <sup>7</sup>Ŋgaha gətsənà kuda atsən la slaka makad tatak, agòd: "Iyay, kak la uwana kak Sufəl aña gudəŋ à vok gesina, kadàh seriya à azladza kà la tetəvi aňha, ndzer."
- <sup>8</sup>Kiya uwaga malika maufad asòkw aňha à afats à adi. Afats adzəkà mavədəy bokuba akəl, kà uwana abəzà tetəvi la slaka Zəzagəla kà mavədəy, kà maslərnàh azladza ala.
- <sup>9</sup>Uwana tanəŋəŋ aslərnàhatàla kà, tatsək magodəhay à Zəzagəla à gəl, kà uwana masla la uwana ŋgərpa uwaga la ahəl. Bà la kità bay, takweskà mapəh gay la ləv ala, tamàts à mawisiga aňatà à abà. Atà tazləbà sləm aña Zəzagəla aw.
- <sup>10</sup>Kiya uwaga aya malika mazlo asòkw aňha à kursi aña tatagà uwaga à afik. Ŋgaha mələs apakà vok la makoray aňha. Azladza tadzəkà mapadàh slic, kà maz atà aňha.
- <sup>11</sup>Ama atà tapəh gay la ləv ala aw, tadà à huma à gay la madàh mawisiga aňatà, tatsək magodəhay à Zəzagəla à gəl, kà uwana tasa ŋgərpa məŋga la gorodzu aňatà la abà.
- <sup>12</sup>Kiya uwaga malika maməkwa asòkw aňha à mukwà məŋga gà à abà, uwana sləm aňha Efərat. Mukwà agòl ala, kà azlasufəl uwana tasà à afik la mas à afik afats aña maguwa à uda la abà la abatà.
- <sup>13</sup>La lig aña uwaga la ahəŋ, gənəŋà azlamasasədok mawisiga makər, maftsa vok aňatà kà bokuba azlagoftok. Tekula asà à uda la huɸ aña kudu, anik aya la huɸ aña tatagà uwatà, ŋgaha mamakər asà à uda la huɸ aña tatagà masla mapəhal gay à ahəl fidaga uwatà.
- <sup>14</sup>Gesina aňatà azlamasasədok mawisiga uwaga, taguwà à uda kà la seteni la abà, masla uwana avà à atà ndzədə kà madàh nadzipo anik anik. Tadàh à slaka azlasufəl

gudəŋ à vok gesina, kà maham à atà gay à vok, kà atà aŋa mas à waŋ aŋa map guvəl la Zəzagəla, uwana aduwa gesina, la vud uwana adàfəta à maslay aŋha la ama ala.

<sup>15</sup>"Tsəbàwwal sləm", Yesu agòd à atà, "Gi la uwaga gədàda à awtày bokuba masla à gəl! Mapis gay à vok agay la dza uwana adza à ahəŋ la adi, la maf sləm à lukut aŋha, kà masla maday la godega deyday la vud mas à waŋ gulo, kà ziruwi aŋa makəsay la huma azladza aw."

<sup>16</sup>Mok uwana azlamasəsədok uwaga taday, tahama gay azlasufəl à vok, tahamà à atà gay à vok la slaka uwana tazalalla la gay ibəranəŋkowen: Harmagedon.

<sup>17</sup>Dgaha la makədəl gəl, malika mamədəf asòkw aŋha à afad à abà, ŋgaha kuda atsən la huma kursi aŋa Zəzagəla la magol gày Zəzagəla la aku, agòd: "Diga, tsewwa."

<sup>18</sup>Kiya uwaga azlamawutsədəy tawutsəd, azlahabaga tasläh məlo babay. Kutso abəlakà vok mənŋa. Didi didi, dagay uwana Zəzagəla adàhà gudəŋ à vok kà, kutso adabəlaka vok kiya uwanay didi aw.

<sup>19</sup>Kiya uwaga mən huf gudəŋ apəslakàhla makər, ŋgaha azlahuf gudəŋ, uwana la gudəŋ la vok gesina, tawəslla babay. Katskats awulà à Zəzagəla à gəl, à mawisiga aŋa gudəŋ Babila. Apakà ləv mənŋa lakəl aŋha, la mapak ləv aŋha la abà kà, asà à atà azlamagol ŋgərpa, la magodəy: "Sàw à gay."

<sup>20</sup>Kiya uwaga dèwdèw bəza gudəŋ uwana iyaw anudàhà atà à gay à adi, ŋgaha la azlagudəŋ gesina tazàhàlla tuwiya.

<sup>21</sup>Matsatsa iyaw asòkw à ahəŋ kà mənŋa mənŋa, mahanay aŋha kà bokuba nəvol. (Kilo aŋha aslay 40, asal magodəy tasà hi 20) Atà atəd à azladza à gəl. Bà gotənaŋ kà, azladza tapakà ləv lakəl aŋa Zəzagəla, tatsəkəl magodəhay à gəl kà uwana tatərəb la matsatsa iyaw uwaga la abà. Dgərpa uwanay kà aduwa azlaŋgərpa anik uwana adada à lig gesina la kaykay.

## Mafətala 17

<sup>1</sup>La lig aŋa uwaga la ahəŋ, malika tekula la tataka azlamalika mədəf uwaga la abà, tasà mədəf la ahəl, asà à waŋ, agòd à gi: "Sà à waŋ, gəpəhakalla kakay à uwana mis masla mazaḅ zilga uwaga adàsa ŋgərpa mi, mis uwaga kà asal magodəy kà: Huf gudəŋ uwana taŋəl à gay mukwà dəŋ.

<sup>2</sup>Kiya uwaga azlasufəl aŋa gudəŋ à vok tadàhàhà mabila la masla, ŋgaha atəpla madàh mabila aŋha à azladza la mabiy azladza gudəŋ à vok, ŋgaha tadà à madàh uwaga à abà babay."

<sup>3</sup>Kiya uwaga Masasədok Zəzagəla asà à gəl gulo, ŋgaha malika uwatà adàla gi à fəta à abà. Mok uwana gi la fəta la abà, gənəŋà mis tekula adadza à tatagà à lig. Tatagà uwatà kà mativga, gəl mədəf la vok, ŋgaha la dərəw kulo lakəl. Vok aŋha kà tsatsabasla matsetser à ahəl sləm matsəkəla magodəhay à Zəzagəla à gəl ala à vok.

<sup>4</sup>Ama kà aŋa mis uwatà kà, masla atsòkw azlalukut seda mativga vikuzaga à abà. Masla abək tatak bədà à vok, azlaadaga la azlaluwəluwàga, ŋgaha la azlaakur uwana

sləm aṇatà la ahəŋ, tasà luwàluwà gà la ahàl. Tasà uwatà adahenla la azlatatak vanṇaṅga, bokuba magodāy kà mabila uwana adahàhàṅ.

<sup>5</sup>La madəgay aṇa mis uwaga kà sləm anik la ahəŋ. Uwaga kà sləm uwana mahad vok à ahəŋ gà. Sləm uwaga tatsetser kà aga: MƏD HUD GUDƏD BABILA, IYÀ ADA AZLAMƏNA MAZAB ZIL, DGAHA IYÀ ADA AZLATATAK VADVAḌGA MAWISIGA, VADVAḌGA UWANA LA GUDƏD LA VOK GESINA.

<sup>6</sup>Gəŋəṅà mis uwatà kà, aṇiz aṇa azlaməna gay Zəzagəla adawisla gəl à vok. Kà mana takəd atà mi kagodāw ay? Kà uwana tazà gay marabəŋ aṇa Yesu. Uwana gəŋəṅà uwaga kà, ləv avàl à gi à gay.

<sup>7</sup>Malika uwatà agòd à gi: "Kà mana ləv avàl à ka gay ma?" Agòd à gi: "Tsənəŋ, gəpəhakala godega aṇa gay mahad vok à ahəŋ gà uwaga, lakəl aṇa mis uwanay kà, ŋgaha lakəl aṇa tatagà uwana mis aga la lig kà, uwaga kà tatagà uwana gəl aṇha mədəf ŋgaha dərew kulo lakəl kà uwaga.

<sup>8</sup>Tatagà uwaga kanəŋəŋ kà, agà la sifa uwarà, ama lagwa kà la sifa aya aw. Zewk kà, adàwula à uda la afək zəŋzəŋga uwatà la abà aya. Baṇa adasa à uda kà, Zəzagəla adəkəday tsokwfasl. La mok uwana Zəzagəla adzəkà maṇal gudəŋ à vok, atsetsər sləm aṇa azladza uwana tadàbəza sifa à wakità aṇa sifa à abà, ama azladza anik la ahəŋ kà, sləm aṇatà la wakità aṇa sifa la abà aw. La kaslà uwana tadənəŋ tatagà uwaga kà, ləv adàval atà à gay, kà uwana agà la sifa uwarà. Ama lagwa kà la sifa aya aw, ama zewk kà adàwula à uda."

<sup>9</sup>Kiya uwaga agòd à gi aya: "Kà matsən uwaga kà, say azladza tagay azlamatsihilaga, la haṅkəli. Azlagəl mədəf uwaga kà, apəhla ala kà azladadəgwal mədəf, uwana mis adza à afik. Uwaga apəhla ala kà azlasufəl mədəf babay.

<sup>10</sup>Kiya uwaga azlasufəl mədəf: Azlasufəl zlo kà makoray aṇatà kà adada à lig tsewwa. Maməkwwaga aga la sufəl la afik. Ama mamədəf kà, kaslà aṇha adasa à waŋ dadəŋ aw. Baṇa kaslà uwaga adàslay kà, adàzuw sufəl kà, kà aṇa kaslà ŋuv pəra.

<sup>11</sup>Tatagà uwaga la aslasl gəl aṇha, uwana agà la sifa uwarà, ŋgaha masla la sifa aya aw. Masla tekula la tataka aṇa azlasufəl mədəf bay, masla adəpakay sufəl mamtəgis. Baṇa adàzlaŋazlay kà, Zəzagəla adəkəday aṇa tetuwa."

<sup>12</sup>"Kà aṇa azladərew kulo aṇa tatagà uwaga kà, kanəŋəŋ kà, masla apəhla ala kà lakəl aṇa azlasufəl kulo, uwana tadàzlaŋalay, ama tazùw sufəl dadəŋ aw. Ama mok uwana tadàzlaŋalay kà, tadàbəza maslay kà aṇa kaslà ŋuv.

<sup>13</sup>Azlasufəl uwaga gesina tadətsən vok gay. Atà tadàvə ndzəda la maslay aṇatà kà madàh sləray à tatagà uwaga,

<sup>14</sup>tadàpa guvəl la magadzaw. Masla kà, aduwa atà, kà uwana masla kà Sufəl aṇa azlasufəl. Masla la uwana aduwa azlasufəl gudəŋ à vok gesina, azlaaṇha tanəfay la ləv tekula. Kà uwana masla la uwana atsatsàmàni atà ŋgaha azalà atà kà manəfay, kiya uwaga kà tadàduw atà gesina."

<sup>15</sup>Bà gotənaŋ, malika uwaga agòd à gi: "Dərəv uwanay kanəŋəŋ, à uwana mis masla mazaḅ zilga uwaga adza à afik kà, apəhla ala kà azladza tsəhay gay gesina, ŋgaha azlauwana tasà à waŋ la makad' gəl à ahəŋ gudəŋ à vok gesina.

<sup>16</sup>Azladərew kulo uwaga kanəŋà atà, ŋgaha la tatagà uwaga la aslasl gəl aŋha la uwana tadàzin vok à mis masla mazaḅ zilga uwaga ala. Tadàhəl tatak à mis uwaga ala, tadàməl à ahəŋ la godega deyday. Matəm à ahəŋ aŋha kà tadətəl à gay.

<sup>17</sup>Uwaga kà, kà uwana Zəzagəla aguwà la ləv aŋa azlasufəl kulo uwaga la tsəh, kà madəhəŋ uwana asal. Kiya uwaga kà, tatsənà vok gay, kà madfàh sləray la ndzəda aŋatà gesina kà aŋa tatagà uwaga. Tatagà uwaga adàkoray tsərəh à uwana à gay aŋa Zəzagəla adàgəd' à afik."

<sup>18</sup>"Ŋgaha mis uwana kanəŋəŋ kà uwaga kà məŋ gudəŋ, uwana la maslay lakəl aŋa azlasufəl gudəŋ à vok gesina."

## Mafətala 18

<sup>1</sup>La lig aŋa uwaga la ahəŋ, gənəŋà malika anik atsà à ahəŋ la zagəla. Masla agà la maslay məŋga, azladza gudəŋ à vok gesina tanəŋà udfaka la mazləḅay aŋha.

<sup>2</sup>Masla awiyà la ndzəda, agòd: "Babila, Babila mabəzl gəl à abà gà, mabəzl gəl à abà gà, bədfətal, adəpaka slaka mahad' vok à ahəŋ aŋa azlamasasədok mawisiga, ŋgaha azlatatak mahoyay tadàdza à ahəŋ la abata.

<sup>3</sup>Babila, ma kà mana abəzl à abà à mi kagodəw takay? Kà uwana avà à vok aŋha à mabila la matapla mabila aŋha à azladza. Azlasufəl la gudəŋ la vok tadəhəhə mabila la masla. Azlaməna tsakalay tagəh gorobu kà azlatatak dzəḅa aŋha səla aw gà, uwana la gudəŋ uwaga la abà."

<sup>4</sup>Ŋgaha gətsənà kuda anik atsən à ahəŋ la zagəla, agòd: "Azladza gulo, səw à uda. Baŋa kahamaw gay à vok la mawisiga aŋha la abà, akul babay, kadəzlakaw atà à tsəh!

<sup>5</sup>Kà uwana tsakana aŋha adəŋazla tsərəh à zagəla. Ŋgaha babay kà sləray mawisiga aŋha avika Zəzagəla aw.

<sup>6</sup>Dahəwwaləŋ à vok bokuba uwana adəhəkulləŋ à vok suwaŋ. Baŋa agòr à akul mawisiga tasà tekula gòràwwal à afik tasà səla.

<sup>7</sup>Səgəw ŋgərpa aŋha ala kà ləv aŋha mazəŋ; bokuba uwana agà la maslay kà madz à ahəŋ la matsidəy la abà. Masla agòd' la gəl aŋha kà: 'Gi nuha sufəl; awkà: gi mis kudà aw, gi gəsəl mamətsay à gi aw', agòd.

<sup>8</sup>Gay gà la uwaga matəḅəḅay aŋha adəsakaŋ à waŋ, kà vud' tekula pəra. Duvats, mamətsay ŋgaha may, akəl adəbabəh à gay, kà uwana Sufəl Zəzagəla kà, masla la uwana Sufəl aŋa tatak gesina, masla la uwana adəfəhalla seriya à gəl."

<sup>9</sup>Kiya uwaga azlasufəl aŋa gudəŋ à vok uwana tadəhə mabila la gudəŋ uwaga, mok uwana tadənəŋ kəsək aŋa akəl uwana ababəhay kà, tadətaway la mabək ahəl à kudà, kà uwana tadzà à ahəŋ la matsidəy la abà.

- 10**Kiya uwaga ngərpa aña gudəŋ adàvà à atà guba. Kà uwaga tatsàzl à fəta à awtày la mabak ahàl à gəl la mataway gəđ gà gəđ: "Məŋ gudəŋ Babila, kakay la kirim yewdi, seriya adatəd à ka à gəl ma!"
- 11**Kiya uwaga aga la azlaməna matsakalay la gudəŋ la vok gesina, tataway la mabakàh ahàl à gəl babay, kà uwana akàl adababəh gudəŋ à gay, ngaha masukw tatak la ahəŋ aya aw.
- 12**Aganay azlatatak madaw ala aŋha: Luwàluwà, gursu, azlaakur uwana sləm aŋatà la ahəŋ, kà aña madàhla tatak bəđdà, azlaturmi lukut zlazladəga, azlaseda mativga, ngaha la azlatsəhay lukut mahəđayga. Ngaha aya azlatatak uwana azlaməna tsakalay tadàwàh ala, taga azlatsəhay ahàf anik uwana azinay lela, ngaha la azlatatak uwana tadàhàhəŋ la azlasliđ gawwan, azlatatak anik bay la azlaahàf mapəđay gà delga, azlatatak anik tadàhàhəŋ la azlaada vərzegani, ngaha la azlaakur mikoslaga.
- 13**Azladza uwaga tadàwàh azlatsəhay matərsin anik anik ala, ngaha azlababasl uwana azinay lela. Tadàwàh ala aya iyaw matavəruk, la azlaamàl, nalkama, la azlapəhaw nalkama, ngaha la azlasla, la azlatuwaŋ, la azlapəlis, la azladərkwa uwana azlapəlis tabiyəŋ, ngaha la azlamayà tadawah ala; ama masla masukway la ahəŋ aya aw. Kiya uwaga tataw la magəđay à gudəŋ uwatà. Azlaməna matsakalay tagəđ à məŋ huđ gudəŋ uwaga:
- 14**"Azlatatak uwana kaval à ləv aŋak, akàl adababəh à gay liđfa. Gorobu aŋak, la matsiđay aŋak gesina adazila, kadàbəzal aya aw."
- 15**Kiya uwaga azlaməna matsakalay, uwana tagahay gorobu kà masla, ngərpa aña gudəŋ uwaga adavà à atà guba. Kà uwaga tadatsazl à fəta à awtày la mabak ahàl à gəl la mataway.
- 16**Tadàwits hulolo gay gəđgəgəđ: "Məŋ gudəŋ adabəzl à abà. Masla agà bokuba mis uwana atsəkwàh azlaturmi mativga à abà, ngaha la azlaseda zlazladəga, ngaha la azlatsəhay anik mahəđay gà, masla abàk tatak bəđdà à vok məŋga, azlaanik tadàhahaŋ la luwàluwà, azlaanik la azlaakur uwana sləm aŋha la ahəŋ.
- 17**Kay, kakay awma ababəh à gay la gorobu aŋha la kirim yewdi kiya uwanay ma?" Azladza uwana tabelàk kəslah iyaw la azlaməŋga aŋatà, ngaha la azlaməna matsakalay uwana tauguzahahay la kəslah iyaw, ngaha kəla dza uwana la kəslah iyaw la afik, tatsàzl à fəta à awtày kərkər gesina.
- 18**Atà tanərèz mok uwana tanəŋà kəsək akàl, uwana ababəh gudəŋ, tawiyà la ndzəda: "Tekedik kà gudəŋ anik la ahəŋ, kà aña magagazla la masla aw!"
- 19**Kiya uwaga atà tatàw la mabak ahàl à gəl, tatabàbàlàh la kutso la abà, tawiyà gəđfa, tagəđ: "Aganay məŋ gudəŋ uwanay, adabəzl à abà à uwana, azladza uwana takòràh kəslah iyaw gesina tagàh gorobu la ahàl aŋha. Uwaga adabəzl à abà kà la kirim yewdi!"
- 20**Kay, akul azladza uwana la zagəla la afik, rabàw aŋkul. Akàl adababəh à gay Babila. Akul azladza aña Zəzagəla, akul azlaməna matapla, ngaha akul uwana tapəh à

akul gay à ahàl kà mapàh à azladza, rabàw, kà uwana Zəzagəla adafəhalla seriya à gəl kà tatak uwana adafəhàkullàŋ à vok!

<sup>21</sup>Uwana uwaga adada à lig, məŋ malika anik azəb akur məŋga bokuba vəl, adùw à dərəv à abà la magodəy: "Kiya uwanay à uwana tadàduw məŋ gudəŋ Babila ala la ndzədə, adàzila tuwiz, dza adànəŋəŋ aya diki diki aw.

<sup>22</sup>Mahohumay aŋa azlaŋəziŋla dəs, la azlaməna mats talakway, la azlamazlazliŋ adàtsanay la abà aya aw. Tadàbəza azlaməna madəh azlatatak anik anik la abà aya aw. Baməraka matsənay aŋa madzam tatak, babay adàmatsah à gay gesina hənats.

<sup>23</sup>La abatà udəka aŋa azlafənəs adəgahay la abà aya aw. Mawiyay mazaḅ mis la madəh zil adàtsanay la abà aya aw. 'Gi, zlà', kagòḏ, la maduw azlagudəŋ à vok gesina la matsakalay, ŋgaha kà vavaraha azladza à bada à abà la məzla aŋak. Kà uwaga à uwana seriya adəkəs ka!"

<sup>24</sup>"Zəzagəla anəŋà aŋiz aŋa azlaməna mapəh à atà gay à ahàl aŋha, ŋgaha la aŋa azlaməna madinjal gəl à vok, uwana takədəh atà la gudəŋ la vok gesina, agà la kuda aŋha. Kiya uwaga à uwana Zəzagəla adadukwla seriya à gəl suwaŋ", malika agòḏ.

## Mafətala 19

<sup>1</sup>La lig aŋa uwaga la ahəŋ, gətsənà kuda atsən à ahəŋ la zagəla bokuba kuda aŋa maham à ahəŋ dza, tagodəy: "Məzləba Zəzagəla! Mətataslla ahàl à Zəzagəla gami, masla la uwana atəfà azladza. Mazləbay la maslay gesina kà la ahàl aŋha.

<sup>2</sup>Iyay, masla la uwana, masla seriya dziriga gə, adəh seriya à azladza la asik aŋha. Adukw seriya à masla mazaḅ zil uwaga à gəl, masla uwana awisà azladza gudəŋ à vok ala la sləray mawisiga aŋha. Zəzagəla adavàl ŋgərpa, kà uwana akədàl azlamayà aŋha."

<sup>3</sup>Ŋgaha tagòḏ aya: "Məzləba Zəzagəla! Kəsək aŋha adəv à gay tsəràh à awtəy aw!"

<sup>4</sup>Kiya uwaga azlamadzahaga dzik səla gəl aŋha ufaḏ uwatà, ŋgaha la azlatatak ufaḏ uwatà la sifa, takədèḏ à ahəŋ la huma Zəzagəla uwana aga la kursi la afik, tasləkàw Zəzagəla tagòḏ: "Məzləba Zəzagəla! Amen!"

<sup>5</sup>Kiya uwaga kuda atsən à uda la kursi Sufəl la abà agòḏ: "Zləbàw Zəzagəla gami, akul azlamayà aŋha; azlaməŋga gə, ŋgaha la azlabəzaga gesina, akul uwana kahoyaw yewdi aŋha!"

<sup>6</sup>Ŋgaha kiya uwaga gətsənà kuda atsən bokuba mavats gay aŋa maham à ahəŋ dza. Atsən babay bokuba mahohumay aŋa iyaw mukwà. Ŋgaha aya bokuba mahohumay aŋa habaga uwana asläh mələ à uwana gətsənəŋ. Matsənay aŋa kuda gə uwana kà, agòḏ kà: "Məzləbà Zəzagəla, kà uwana Sufəl Zəzagəla gami kà, adazuw Sufəl ala aŋa tetuwa.

<sup>7</sup>Məràb la marabay, kà uwana kaslà aŋa mazəḅ mis aŋa magadzaw kà adaslay, ŋgaha mawdà aŋha adafəh vok.



<sup>8</sup>Tavà tetøvi à mis kà matsokw à lukut tsidaŋaga à abà, uwana awutsəday wuzlwawuzl." (Lukut delga uwaga kà, asal mapəhla ala kà, magay sətaka aŋa azlauwana tafà gəl aŋatà à Yesu à afik)

<sup>9</sup>Kiya uwaga malika anik agòd' à gi: "Tsetsèr à wakità à abà: Marabay agay la dza uwana Zəzagəla azalàl à madəvaday aŋa mazəb mis aŋa magadzaw à abà." Bà gotənaŋ malika uwaga agòd' à gi aya: "Azlagay uwanay kà, taga dziriga, kà uwana tasa à waŋ kà la paŋaw aŋa Zəzagəla."

<sup>10</sup>Kiya uwaga mok uwana gətsənà uwaga, gətəd' à makəla asik aŋha, kà masləkaway, ama agòd' à gi: "Kadàhàŋ kiya uwaga aw, gi bay kà, gi mayà aŋa Zəzagəla bokuba kak la azladedà aŋak uwana tadiŋ gəl à gay uwana à vok, Yesu afətətàla à adi ala. Kà aŋa uwaga kà, kazləba gi aw, zləbà kà Zəzagəla!" Azlaməna mapəh à atà gay à ahəl tapəh slilih aŋa gay uwana Yesu afətətàla à adi ala bay, kà uwaga la uwana avàh à atà ndzəda.

<sup>11</sup>Kiya uwaga gənəŋà zagəla, kà zagəla mapəzlla à ama ala gə, ŋgaha pəlis medəkuga azlaŋəl. Dza uwana la afik kà sləm aŋha kà Dziriga, kà uwana adəhahəŋ kà say dziriga. Apa guvəl la tetøvi aŋha.

<sup>12</sup>Yewdi aŋha kà awutsəday bokuba aləh akəl, garamusa kà dəŋ la gəl la kəl. Matsetser à ahəl sləm à vok gə, dza la ahəŋ asəl sləm uwatà aw, say masla pəra.

<sup>13</sup>Atsòkw à lukut uwana à vok aŋiz aŋiz gə. Sləm aŋha kà: Gay aŋa Zəzagəla.

<sup>14</sup>Azlamalika aŋa guvəl aŋuvaw tanəfà masla, gesina aŋatà la pəlis medəkuga la afik, tatsòkwəh azlalukut medəkuga à abà koha babay.

<sup>15</sup>Katsakar mazuwayga asà à waŋ la gay aŋha la awtəy. Adàkadla azladza uwana tavələhà atà à ahəŋ lakəl à adi. Adakor atà la agəla ada. Adàhabahatàla bokuba mayyay ahəf uwana takudits iyaw à uda la abà. Kiya uwaga à uwana adəpəhla à atà ala, kà Zəzagəla la mapak ləv məŋga.

<sup>16</sup>La lukut aŋha la vok, ŋgaha la matataba aŋha kà tatsetsèr sləm aŋha à abatà: 'Kà Sufəl aŋa azlasufəl, Məŋga uwana aduwa azlaməŋga anik gesina aya.'

<sup>17</sup>Ŋgaha aya gətsənà malika anik uwana atsizlla à afats à afik azalahay la kuda zləkkà, agòd': "Azlakolaŋ, azlakolaŋ uwana tahoyay la ləv zagəla la abà, sàw à waŋ gesina kazuwaw madəvaday məŋga uwanay Zəzagəla adadəhakulaŋ à ahəŋ.

<sup>18</sup>Sàw à waŋ, kazuwaw sləb vok aŋa azlasufəl, zùwàw babay aŋa azlaməna guvəl la azlaməŋga aŋatà, zùwàw aŋa azlapəlis la azlaməna madàh à afik, ŋgaha la aŋa azladza gesina, azlamayà la azlauwana takor gəl, baməraaka azlamagolga la azlabəzaga, zùwàw à gay gesina!", agòd' à atà.

<sup>19</sup>Kiya uwaga gənəŋà tatagà uwatà la mokfak mawurlaga la vok, ŋgaha la azlasufəl gudəŋ à vok, tahamà gay à vok kà map guvəl la masla mad à pəlis medəkuga uwatà à afik, ŋgaha la azlaməna guvəl aŋha.

<sup>20</sup>La lig la ahəŋ, katskats, takəs tatagà uwaga, ŋgaha la tatagà masəla fidaga, uwana adàhàhà azlanadzipo la masəlay aŋa tatagà matera. Apapàt atà aŋa maβəz masəlay la vok aŋatà uwana tasləkəw la mazlazlay, uwana la maftsa vok aŋa matera. Kiya uwaga, mok uwana takəs tatagà uwaga la masla fida uwaga, tawìts atà à gudùh akàl, uwana à abà madəhəŋ à abà gà la huleli la adi.

<sup>21</sup>Ama azlaməna guvəl aŋha, uwana la pəlis la afik kà, akəd à gay la katsakar uwana asà à waŋ la gay aŋha. Azlakolaŋ gesina tadəv à waŋ, tazùw.

## Mafətala 20

<sup>1</sup>Kiya uwaga gəŋəŋà aya malika anik atsà à ahəŋ la zagəla la tsəkurəm aŋa afək zəŋzəŋga, la magol mazakazak tadzəbərta la ahəl.

<sup>2</sup>Ahəd, akəs kudu, uwana uwarà kà bebi uwana arahəlla azladza à uda. Masla la uwana baba aŋa masasədok mawisiga, ŋgaha sləm aŋha anik aya kà seteni. Malika uwaga akəs atsərkwəŋ aŋa mavay dəbow.

<sup>3</sup>Uwana malika adatsərkwəŋ, adùw masla à afək zəŋzəŋga à abà, atsəkalla à ama la tsəkurəm, ŋgaha aslèrəbal à tsəh tsərəh à mavay dəbow, kà masla aŋa marəhla azladza gudəŋ à vok à uda aya aw. Say baŋa mavay uwaga tafəl à ahəŋ, adədəv à gay. La abatà tadəpələŋ ala aŋa kaslà ŋuv aya.

<sup>4</sup>La lig aŋa uwaga la ahəŋ, gəŋəŋà azlakursi sufəl. Azladza uwana tadzəh madzay la afik, tabəzà maslay la slaka Zəzagəla kà madəh seriya. Gəŋəŋà babay sifa aŋa azladza uwana tanətsəh à atà gəl la vok ala uwarà, kà gay dziriga aŋa Yesu uwana tagadəŋ à afik, ŋgaha la uwana tazəŋ gay Zəzagəla aya. Atà tasləkəw tatagà uwaga amiyaka bə la maftsa vok aŋha bay aw, ŋgaha atà takəs masəlay aŋa tatagà kà manəh à madəgay baŋaw ahəl aŋatà aw. Tadz à ahəŋ la Yesu lagwa takoray la slaka gà la masla tsərəh à mavay dəbow.

<sup>5</sup>Aganay azladza teraŋa uwana tawul à uda la mamətsay. (Ama azlaanik uwanay kà tadawul à uda dadəŋ aw, say baŋa mavay dəbow uwanay adaslay)

<sup>6</sup>Gay gà la uwaga marabay agay la azladza uwana tawula à uda teraŋa. Atà Zəzagəla adapis à atà gay à vok kaykay. Ndzədə aŋa mamətsay masəla la ahəŋ lakəl aŋatà aya aw, atà tadəgah azlaməna mav tatak la huma Zəzagəla la Yesu. Tadəkoraŋ la Kristu mavay dəbow.

<sup>7</sup>La mavay dəbow uwaga la abà, seteni kà matsərkwəŋga la mazakazak. Baŋa uwaga adàda à lig kà tadəpələŋ ala aya.

<sup>8</sup>Adada à marəhəhla azladza anik anik à uda la gudəŋ la vok gesina. Sləm aŋa azlagudəŋ uwaga kà Gog atà la Magog. Masla adəhama à atà gay à vok kà map guvəl la Zəzagəla tadəgay kà aŋuvaw bokuba wuyyaŋ uwana la mukwà la tsəh.

<sup>9</sup>Aganay tazlaŋalay tasləh gəl à ahəŋ, tadəh à slaka gesina, takas gay à slaka maham à ahəŋ aŋa azlaməna gay Zəzagəla à adi, ŋgaha la huɸ gudəŋ uwana Zəzagəla awoyaŋ bay. Mok uwana takəs atà gay à adi, akàl asa à ahəŋ la zagəla, ababəh atà à gay.

<sup>10</sup>Seteni uwana azàhàtála kà, takès, taduw à gudùh à abà la masla mapəhal gay à ahàl fidaga uwatà. Tadàsa ngərpa mavakay la mahənay la abà la abatà aña tsəràh à awtày.

<sup>11</sup>Ŋgaha aya gənəṅà kursi sufəl medəkuga, dza la afik, dzəgova. Gudəṅ à vok la zagəla tazàlla à huma ala tuwiz, manəṅ atà la ahəṅ aya aw tetuwa.

<sup>12</sup>Ŋgaha aya kà, gənəṅà azlauwana tamàtsàh gesina, azlamagolga la azlabəzaga, atà tatsàzl à huma kursi aña Zəzagəla. La abatà azlawakità mapazl vok gà la ahəṅ, la azlawakità uwatà la abà, à uwana tatsetsèrəh madəhəṅ aña azladza à abà tadza à ahəṅ la sifa aña tsəràh. Mok uwana tapəzlay wakità, Zəzagəla adàhà seriya à azladza uwana à gəl tamàtsàh uwarà. Adàhà atà seriya la tetəvi aña, kalkal bokuba uwana tadàhàhəṅ à uwana tatsetsèr à wakità uwaga à abà.

<sup>13</sup>Baməraka azlauwana tazàh à iyaw à abà la azlatsəhay anik anik kà Zəzagəla adàwulla atà à uda gesina, kà madàh à atà seriya kalkal la uwana tadàhàhəṅ suwaṅ.

<sup>14</sup>Ndzəfà aña mamətsay la mezewi adagay la ahəṅ aya aw, kà uwana taga la gudùh akàl la abà. Uwaga slaka mamətsay masəla.

<sup>15</sup>Baṅa dza uwana sləm aña matsetserayga la wakità aña sifa la afik aw kà, tadàduw à gudùh akàl à abà, aña tetuwa bay.

## Mafətala 21

<sup>1</sup>Kiya uwaga la lig la ahəṅ, gənəṅà zagəla mawga la gudəṅ à vok mawga. Zagəla maviyaga la gudəṅ à vok maviyaga adada à lig, ṅgaha azladərəv la ahəṅ aya aw.

<sup>2</sup>Ŋgaha gənəṅà huɸ gudəṅ tsikaslaga, huɸ gudəṅ uwatà kà maw Urusalima, uwana atsà à ahəṅ la zagəla la slaka Zəzagəla, atsà à vədàh. Zəzagəla adadàhalla vok à uda bokuba dugu uwana adàh vok kà mad à zil.

<sup>3</sup>Ŋgaha aya gətsənà kuda atsən la ndzəfà la kursi sufəl la abà, agòɸ: "Nəṅəṅ Zəzagəla adəṅal gày aña à tataka azladza à abà, adàdza à ahəṅ la tataka aṅatà la abà, tadəgay azladza aña. Zəzagəla la gəl aña adəgay la atà.

<sup>4</sup>Masla adàdàhah à atà iyaw tugwi la adi ala gesina. Mamətsay adəgay la ahəṅ aya aw, matuway la maɸak ahàl à kuɸa adəgay la ahəṅ aya aw, mazay adəgay la ahəṅ aya aw, matərabay adəgay la ahəṅ aya aw, gesina kà tsewwa adagay, kà uwana azlatatak maviyaga kà adada à lig!"

<sup>5</sup>Dza uwaga la kursi la afik agòɸ: "Nəṅəṅ, gəpakà azlatatak gesina ala kà mawga!" Ŋgaha agòɸ à gi: "Tsetsèr uwanay gəpəh à ka, kà uwana azlagay uwanay kà dziriga, fida la tsəh aw."

<sup>6</sup>Agòɸ à gi aya: "Tsewwa adagay. Gi la uwana gi matera aña tatak gesina, ṅgaha gi la uwana gi makəɸ gəl à ahəṅ aña tatak gesina aya. Gi uwana gədzəkà tatak, ṅgaha gi uwana gəɸəkəɸ gəl à tatak gesina. Azladza uwana nəlay aza à atà, gəɸətəɸ à atà iyaw deyday. Iyaw uwaga kà iyaw uwana avà sifa.

- <sup>7</sup>Aganay azlatatak uwana gədàvə azladza uwana takədàsl à mawisiga, gədàgay Zəzagəla aṅatà, ṅgaha atà tadàgay azladza gulo.
- <sup>8</sup>Ama azladza uwana tasakal à tsəh ala, la azladza uwana tadiṅ gəl à Yesu à vok aw, la azlaməna ləv mawisiga, la azlaməna makad dza, la azlaməna mabila, la azlaməna madàh məzla, la azlaməna manəf mazlazlay, la azlaməna fida kà, tadàwits atà à gudùh akàl uwana à abà madəhəṅ à abà gà la huleli. Uwaga la uwana agay mamətsay masəla.”
- <sup>9</sup>Kiya uwaga malika anik asà à slaka gulo. Agà tekula la tataka azlamalika mədəf uwana la abà la tasà la ahàl uwana azlaṅgərpa makəd gəl à ahəṅ agàh la abà. Mok uwana adasa à waṅ agòd à gi: "Sà à waṅ, gəpəhakala dahalay uwana magadzaw adazəbay tsi.”
- <sup>10</sup>La kirim yewdi, Masasədok Zəzagəla asà à ahəṅ à gəl gulo, ṅgaha malika uwaga adàla à gi à məṅ gudəṅ matsəkakadəyga à afik. Apəhgəla Urusalima huđ gudəṅ tsikasлага aṅa Zəzagəla la zagəla la slaka Zəzagəla.
- <sup>11</sup>Gudəṅ uwatà awutsədəy wuzlwawuzl bokuba akur uwana sləm aṅha yaspe, sləm aṅha la ahəṅ kà məṅga gà. Awutsədəy bokuba takenedəka. Uwaga kà mazləbay aṅa Zəzagəla la uwana awutsədəy kiya uwaga.
- <sup>12</sup>Gudəṅ uwaga zlagam məṅga, ziṅziṅga anudà ala gay à adi dəkəts, gamagəy kulo gəl aṅha səla la vok. La kəla gamagəy kulo gəl aṅha səla uwaga kà tatsətsèrəh sləm aṅa tsəhay kulo gəl aṅha səla aṅa azla Isərayel à adi.
- <sup>13</sup>Kəla makəla tekula kà, gamagəy makər makər la vok. Makər la mas à afik afats, makər la matəd à ahəṅ afats, makər la gəl la aku, ṅgaha makər la tsəh la ahəṅ, bokuba magodəy magadzaw.
- <sup>14</sup>Tafà zlagam uwaga kà à azlaakur matatukw gəy kulo gəl aṅha səla à afik. La kəla akur la adi tatsətsèrəh sləm aṅa azlaməna matapla la slaka aṅa Yesu à adi.
- <sup>15</sup>Malika uwana atùgw à gi gay uwaga kà, agà la agəla luwàluwà la ahàl, uwaga kà agəla kà magorla tatak. Ahàd kà magor gudəṅ, la azlagamagəy, ṅgaha la zlagam aṅha.
- <sup>16</sup>Huđ gudəṅ uwaga kà, agà baṅuga kiya uwaga gay ufađ nna kà kalkal gesina. Malika agùr gudəṅ uwaga la agəla aṅha: Ziṅziṅ aṅha kà, agà zuwid slewzi dəbow la dadərmokw səla, kəla gay tekula, kiya uwaga gay ufađ nna à ziṅziṅ aṅha bay.
- <sup>17</sup>La lig la ahəṅ malika agùr zlagam aṅha mawalay dzim la dzik ufađ gəl aṅha ufađ. Magur aṅha kà bokuba uwana anu azladza məgur tatak.
- <sup>18</sup>Zlagam gà, uwana kà tahàzl la tsəhay akur uwana tazalalla yaspe. Ama kà aṅa huđ gudəṅ kà taṅàl kà la luwàluwà dzəraṅ dzadzəraṅ bokuba takenedəka medəkuga.
- <sup>19</sup>Azlaakur matatukw zlagam kà la luwàluwà tadəhàhəṅ, kà la azlaakur anik anik mahadəyga. Akur teraṅa uwana taṅàlal zlagam à gəl kà tazalalla kà yaspe, masəla kà safir, mamakər kà agat, maufađ kà emerod,

<sup>20</sup>mazlo kà sardonikəs, maməkwa kà saruwan, mamədfəf kà kərisolit, mamtəgis kà beril, maladəga kà topas, makulo kà kərisopəras, makulo gəl aŋha tekula kà tiwrkəs, ŋgaha makulo gəl aŋha səla kà amətəs.

<sup>21</sup>Kà aŋa gamagày kulo gəl aŋha səla uwaga kà, kəla gamagày kà, tafahəŋ kà la Perle, uwaga kà bokuba kololo, tetəvi aŋa huɸ gudəŋ kà tafal kà luwàluwà dzəraŋ dzadzəraŋga bokuba takenedəka medəkuga.

<sup>22</sup>La huɸ gudəŋ uwaga kà gày Zəzagəla la ahəŋ aw, kà uwana Zəzagəla la gəl aŋha abəɸ à abà, atà la magadzaw.

<sup>23</sup>Kiya uwaga gənəŋà afats atà la təla tawudəy aya aw, kà uwana azlaka dza aya aw. Kà uwana la abatà kà, mazləbay aŋa Zəzagəla awudəy ŋgaha magadzaw avəɸay kiya fənəs la huɸ gudəŋ la abà.

<sup>24</sup>Azladza gudəŋ à vok gesina tadəuguzahahay la uɸaka aŋha la abà. Kikay kà uɸaka uwaga, azlasufəl aŋa gudəŋ à vok tadàda à abà kà mav maslay aŋatà gesina à Zəzagəla.

<sup>25</sup>Azlagamagày aŋa huɸ gudəŋ tadàdza à ahəŋ mapazl vok gà kəla mavakay gesina. Matsakalla à ama la ahəŋ aw tsərəh à awtày, kà uwana vəɸ adəgay la ahəŋ aya aw.

<sup>26</sup>Kiya uwaga tadəsahla maslay aŋatà à waŋ azlatatak zəbzəbga, zəbzəbga uwana la gudəŋ la vok. Tadàdalla uwaga à slaka Zəzagəla kà mavəl.

<sup>27</sup>Ama kà aŋa tatak mawisiga kà, adàda à gudəŋ uwaga à abà aw. Azladza uwana àläh àlähga, la azlaməna fida tadàda à abà aw. Say azladza uwana tatsetsèr sləm aŋatà à wakità aŋa magadzaw à afik pəra, la uwana tadàdza à ahəŋ la sifa aŋa tsərəh à awtày.

## Mafətala 22

<sup>1</sup>Malika apəhgəla mukwà iyaw uwana avà sifa à azladza aya. Awudəy dzəraŋa tsərəh à godega bokuba tekenedəka medəkuga, akəl à uda la kursi aŋa Zəzagəla la abà, la aŋa magadzaw.

<sup>2</sup>Masla akəlay la ləv barama aŋa huɸ gudəŋ uwaga la ama. Ama ahəf uwana avà sifa à azladza dzərra la gay mokmak nna, avà mayyay kəla təla asik tekula, bokuba magodəy asik kulo gəl aŋha səla la mavay la tsəh. Amiyaka babasl aŋha bay kà, yohof kà mawar azladza gudəŋ à vok ala gesina.

<sup>3</sup>Ama uwana Zəzagəla adàtsafla gesina kà adàbəza vok la abà aw. Say kursi aŋa Zəzagəla la aŋa magadzaw pəra uwana tadəgay la huɸ gudəŋ uwaga la abà, la azlaməna sləray aŋatà kà masləkaway.

<sup>4</sup>Tadənəŋ huɸ adi aŋha, tadətsetserah sləm aŋha à madəgay aŋatà.

<sup>5</sup>Kiya uwaga vəɸ adəgay la ahəŋ aya aw, azlafənəs, la afats adəzlaka azladza aya aw. Kà uwana Sufəl Zəzagəla la gəl aŋha adəv uɸaka. Atà tadəkoraŋ aŋa tsərəh à awtày.

<sup>6</sup>Kiya uwaga malika agòɸ à gi: "Gay uwanay kà dziriga, fida la abà aw. Sufəl Zəzagəla uwana avà Masasəɸok aŋha à azlaməna mapəh à atà gay à ahəl kà mapəh à

azladza, aslël malika aṅha à ahəṅ kà mapəhla ala uwana adàpaka vok la huma à gay à azlamagamza aṅha.”

<sup>7</sup>Yesu agòd: "Nekwa, gəwula à waṅ. Marabay agay la azladza uwana takəs gay uwana la wakità uwanay la abà, kà uwana Zəzagəla la uwana afətalla à ama ala la Masasəfok aṅha!”

<sup>8</sup>Gi Yuhana gətsənà azlatatak uwaga la sləm gulo, ṅgaha gənəṅəṅ uwaga gesina la yewdi gulo. Mok uwana gədatsən uwaga gesina la manəṅəṅ, gəkədəd à makəla asik aṅa malika, uwana apəhgəla uwaga gesina, kà masləkaway.

<sup>9</sup>Ama agòd à gi: "Kadahaṅ kiya uwanay aw. Gi bay, gi magamza aṅa Zəzagəla, bokuba kak, ṅgaha la azladza aṅak uwana Zəzagəla apəh à atà gay ahəl la azlauwana tanəfa gay aṅa wakità uwanay. Kà aṅa uwaga kà, kazləba gi aw, zləbà kà Zəzagəla!”

<sup>10</sup>Kiya uwaga agòd à gi aya: "Zəzagəla afətaka à ama ala à uwana tatsətsèr à wakità uwanay à abà. Kakəsa gay uwanay la ləv aṅak pəra aw, kà uwana kaslə aṅa azlatatak uwanay kà nekwa.

<sup>11</sup>Gəgod à azlaməna madāh mawisiga, gəgod à azlaməna ləv mawisiga kà baṅa asa à akul magay kiya uwaga kà: 'Dàw à huma à gay la ləv mawisiga pəra zlə.' Kà aṅa dza dziriga bay kà, ada à huma à gay la madāh dziriga aṅha, dza uwana sətaka, ada à huma la sətaka aṅha gesina.”

<sup>12</sup>Kiya uwaga Yesu agòd: "Digiya tsənàwəṅ, nekwa gəwul à waṅ. Gi gədəsəlla azlatatak à waṅ la ahəl, kà gi aṅa mapəl masik aṅha à dza.

<sup>13</sup>Gi uwana gi la ahəṅ dagay uwarà, ṅgaha gi uwana gədəgay la ahəṅ aya. Gi uwana gədzəkà tatak, ṅgaha gi uwana gədəkəf gəl à tatak gesina.”

<sup>14</sup>Marabay agay la azladza uwana tapalāh lukut aṅatà, atà la uwana la tetəvi aṅa maday à huɖ gudəṅ à abà. Atà la uwana azlawla atà, kà mazuw mayyay ahəf, uwana avà sifa à azladza.

<sup>15</sup>Ama azlaməna falay, la azlaməzla, la azlaməna madāh mabila kà, tadəgəf à uda. Azlaməna makəf dza babay, la azlauwana tasləkaw mazlazlay, la azlaməna manəf fida kà, tadəgəf à uda babay, tetuwa tadəbək asik à huɖ gudəṅ à abà aw!

<sup>16</sup>Yesu agòd: "Gi, Yesu uwana gəsləl à akul malika gulo à waṅ kà maz à akul tatak uwanay gesina la azlagəy maham à ahəṅ mənə gay Zəzagəla la aku, gi kà, gi dza uwana kakudaw. Gi mayyi à tsəh ala aṅa David. Gi ṅuzla gəl bebəṅ.”

<sup>17</sup>Masasəfok Zəzagəla, la mawda aṅa magadzaw takəs la azlaahəl səla: "Sà à waṅ zlə!" Akul uwana katsənaw gay uwanay babay: "Sà à waṅ!", kagodaw. Dza uwana nəlay azəṅ kà, asa à waṅ, abəzà iyaw sifa uwanay deyday.

<sup>18</sup>Gi Yuhana gəsləhakulla sləm ala. Akul gesina uwana katsəbàw sləm à gay uwanay la wakità la abà, asà à waṅ la slaka Zəzagəla. Gi gəpəh à akul kà, baṅa dza akədəvəni gay à wakità uwanay à tsəh kà, Zəzagəla adəzala ṅgərpa à gəl suwaṅ, à uwana masla apəh la wakità uwanay la abà.

<sup>19</sup>Ngaha bay, baŋa dza atetuwa uwana Zəzagəla afətàla à ama ala la wakità uwanay la abà kà, Zəzagəla adàzəbal aŋa ala humà mayyay ahàf uwana avà sifa, ngaha la humà huɗ gudəŋ tsikaslaŋa uwanay, wakità uwana adapəhla ala.

<sup>20</sup>Masla sayda dziriga aŋa gay uwana la wakità uwanay la abà, agod: "Ndzer, gi nekwa, gəwula à waŋ." 'A tsa bà kità! Sà à waŋ, Sufəl Yesu!'

<sup>21</sup>Sufəl Yesu apis à akul gay à vok kaykay gesina. Amen.

## Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira

2021, Vitória/ES - Brasil